

Holy Bible

Aionian **Edition®**

**Teke Sud-Ouest
Teke-Tyee Bible**

Holy Bible Aionian Edition ®
Teke Sud-Ouest
Teke-Tyee Bible
Language: Teke-Tyee
Congo, Gabon

Creative Commons Attribution ShareAlike 4.0 International, 2018-2026

Source text: eBible.org

Source version: 8/8/2026

Source copyright: Creative Commons Attribution ShareAlike 4.0

Wycliffe Bible Translators, 2024

Formatted by Speedata Publisher 5.9.2 (Pro) on 8/31/2026

100% Free to Copy and Print

TOR Anonymously and <https://AionianBible.org>

Published by Nainoia Inc, <https://Nainoia-Inc.signedon.net>

All profits are given to <https://CoolCup.org>

We pray for a modern Creative Commons translation in every language
Translator resources at <https://AionianBible.org/Third-Party-Publisher-Resources>
Volunteer help and comments are welcome and appreciated!

Celebrate Jesus Christ's victory of grace!

Preface

Teke-Tyee at AionianBible.org/Preface

The *Holy Bible Aionian Edition* ® is the world's first Bible *un-translation*! What is an *un-translation*? Bibles are translated into each of our languages from the original Hebrew, Aramaic, and Koine Greek. Occasionally, the best word translation cannot be found and these words are transliterated letter by letter. Four well known transliterations are *Christ*, *baptism*, *angel*, and *apostle*. The meaning is then preserved more accurately through context and a dictionary. The Aionian Bible un-translates and instead transliterates eleven additional Aionian Glossary words to help us better understand God's love for individuals and all mankind, and the nature of afterlife destinies.

The first three words are *aiōn*, *aiōnios*, and *aiōdios*, typically translated as *eternal* and also *world* or *eon*. The Aionian Bible is named after an alternative spelling of *aiōnios*. Consider that researchers question if *aiōn* and *aiōnios* actually mean *eternal*. Translating *aiōn* as *eternal* in Matthew 28:20 makes no sense, as all agree. The Greek word for *eternal* is *aiōdios*, used in Romans 1:20 about God and in Jude 6 about demon imprisonment. Yet what about *aiōnios* in John 3:16? Certainly we do not question whether salvation is eternal! However, *aiōnios* means something much more wonderful than infinite time! Ancient Greeks used *aiōn* to mean *eon* or *age*. They also used the adjective *aiōnios* to mean *entirety*, such as *complete* or even *consummate*, but never infinite time. Read Dr. Heleen Keizer and Ramelli and Konstan for proofs. So *aiōnios* is the perfect description of God's Word which has *everything* we need for life and godliness! And the *aiōnios* life promised in John 3:16 is not simply a ticket to eternal life in the future, but the invitation through faith to the *consummate* life beginning now!

The next seven words are *Sheol*, *Hadēs*, *Geenna*, *Tartaroō*, *Abyssos*, and *Limnē Pyr*. These words are often translated as *Hell*, the place of eternal punishment. However, *Hell* is ill-defined when compared with the Hebrew and Greek. For example, *Sheol* is the abode of deceased believers and unbelievers and should never be translated as *Hell*. *Hadēs* is a temporary place of punishment, Revelation 20:13-14. *Geenna* is the Valley of Hinnom, Jerusalem's refuse dump, a temporal judgment for sin. *Tartaroō* is a prison for demons, mentioned once in 2 Peter 2:4. *Abyssos* is a temporary prison for the Beast and Satan. Translators are also inconsistent because *Hell* is used by the King James Version 54 times, the New International Version 14 times, and the World English Bible zero times. Finally, *Limnē Pyr* is the Lake of Fire, yet Matthew 25:41 explains that these fires are prepared for the Devil and his angels. So there is reason to review our conclusions about the destinies of redeemed mankind and fallen angels.

The eleventh word, *eleēsē*, reveals the grand conclusion of grace in Romans 11:32. Please understand these eleven words. The original translation is unaltered and a highlighted note is added to 64 Old Testament and 200 New Testament verses. To help parallel study and Strong's Concordance use, apocryphal text is removed and most variant verse numbering is mapped to the English standard. We thank our sources at eBible.org, Crosswire.org, unbound.Biola.edu, Bible4u.net, and NHEB.net. The Aionian Bible is copyrighted with creativecommons.org/licenses/by/4.0, allowing 100% freedom to copy and print, if respecting source copyrights. Check the Reader's Guide and read at AionianBible.org, with Android, and with TOR network. Why purple? King Jesus' Word is royal and purple is the color of royalty! All profits are given to CoolCup.org.

History

Teke-Tyee at AionianBible.org/History

06/21/75 - Two boys, P. and J., wonder if Jesus saves all and pray.
04/15/85 - Aionian Bible conceived as B. and J. pray.
12/18/13 - Aionian Bible announced as J. and J. pray.
06/21/15 - Aionian Bible birthed as G. and J. pray.
01/11/16 - AionianBible.org domain registered.
06/21/16 - 30 translations available in 12 languages.
12/07/16 - Nainoia Inc established as non-profit corporation.
01/01/17 - Creative Commons Attribution No Derivatives 4.0 license added.
01/16/17 - Aionian Bible Google Play Store App published.
07/01/17 - 'The Purple Bible' nickname begins.
07/30/17 - 42 translations now available in 22 languages.
02/01/18 - Holy Bible Aionian Edition® trademark registered.
03/06/18 - Aionian Bibles available in print at Amazon.com.
09/15/18 - Aionian Bible dedicated as J. and J. pray again.
10/20/18 - 70 translations now available in 33 languages.
11/17/18 - 104 translations now available in 57 languages.
03/24/19 - 135 translations now available in 67 languages.
10/28/19 - Aionian Bible nursed as another J. and J. pray.
10/31/19 - 174 translations now available in 74 languages.
02/22/20 - Aionian Bibles available in print at Lulu.com.
05/25/20 - Illustrations by Gustave Doré, La Grande Bible de Tours, Felix Just.
08/29/20 - Aionian Bibles now available in ePub format.
12/01/20 - Right to left and Hindic languages now available in PDF format.
03/31/21 - 214 translations now available in 99 languages.
11/17/21 - Aionian Bible Branded Leather Bible Covers now available.
12/20/21 - Social media presence on Facebook, Twitter, LinkedIn, YouTube, etc.
01/01/22 - 216 translations now available in 99 languages.
01/09/22 - StudyPack resources for Bible translation study.
01/23/22 - Volunteers celebrate with pie and prayer.
02/14/22 - Strong's Concordance from Open Scriptures and STEP Bible.
02/14/23 - Aionian Bible published on the TOR Network.
12/04/23 - Eleēsē added to the Aionian Glossary.
02/04/24 - 352 translations now available in 142 languages.
05/01/24 - 370 translations now available in 164 languages.
08/05/24 - 378 translations now available in 165 languages.
08/18/24 - Creative Commons Attribution 4.0 International, if source allows.
10/20/24 - Gospel Primer handout format.
11/24/24 - Progressive Web Application off-line format.
01/28/25 - All profits are given to CoolCup.org.
03/12/25 - 382 translations now available in 166 languages.
06/21/25 - 468 translations now available in 230 languages.
09/01/25 - 538 translations now available in 291 languages.
08/31/26 - 539 translations in 291 languages with 9,609,899 verses.

Table of Contents

NEW TESTAMENT

Matye	1
Mareke	33
Luke	53
Dzã	87
Bigyighili	113
Rome	147
1 Korente	162
2 Korente	177
Ngalate	187
Efedze	192
Filipe	197
Kolose	201
1 Tesalonike	204
2 Tesalonike	207
1 Timote	209
2 Timote	213
Tite	216
Filemõ	218
Ba-Eebere	219
Dzake	230
1 Piere	234
2 Piere	238
1 Dzã	241
2 Dzã	245
3 Dzã	246
Dzude	247
Apokalipese	249

APPENDIX

Reader's Guide

Glossary

Maps

Destiny

Illustrations, Doré

NEW TESTAMENT



Yiisu ályele bu: «Taara, sa bo kolokolo, mu kuulu bo ka bali mu ogyahaba mi bali mu okagyighili o.» Báti empa kii nga a bwehe, ya bákaba biko bi nde.
Luke 23:34

Matye

1 Musyi a dzumu li Yiisu-Kriste, Dabvide, li nkagha-kwuru a Yiisu, Abarahame li nkagha-kwuru a Dabvide. **2** Abarahame áburu Idzake, Idzake áburu Dzakobe, Dzakobe áburu Yuda ya bambwee ya banaana ba nde ba babaghala. **3** Yuda áburu Faredze ya Dzara mu Tamare. Faredze áburu Eserō, Eserō áburu Arame. **4** Arame áburu Aminadabe, Aminadabe áburu Naasō, Naasō áburu Salamone, **5** Salamone áburu Bohese mu Rahabe. Bohese áburu Obede mu Rute, Obede áburu Yese, **6** Yese áburu mukogho Dabvide. Dabvide áburu Salomō mu mukala a Uri, **7** Salomō áburu Roboame, Roboame áburu Abiya, Abiya áburu Adzafe, **8** Adzafe áburu Dzodzafate, Dzodzafate áburu Dzorame, Dzorame áburu Odzyase, **9** Odzyase áburu Yohatame, Yohatame áburu Akadze, Akadze áburu Edzekyase, **10** Edzekyase áburu Manase, Manase áburu Amose, Amose áburu Dzodzyase, **11** Dzodzyase áburu Dzekonya ya bambwee ya banaana ba nde ba babaghala mu ena ki bábiri baara mu minsunughu ku Babilone. **12** Ŋa mbihi a ŋa bábiri baara mu minsunughu ku Babilone, Dzekonya áburu Salatyale, Salatyale áburu Dzorobabele, **13** Dzorobabele áburu Abiwude, Abiwude áburu Elyakime, Elyakime áburu Adzore, **14** Adzore áburu Sadoke, Sadoke áburu Akime, Akime áburu Eliwude, **15** Eliwude áburu Eleyadzare, Eleyadzare áburu Matane, Matane áburu Dzakobe, **16** Dzakobe áburu Dzodzefe mulumu a Mari, me mu nde báburu Yiisu wu baakata Kriste. **17** Mu obo, mu obaana Abarahame tee Dabvide, biseene bili kwumu ya bina. Mu obaana Dabvide tee mu ena ki bábiri baara mu minsunughu ku Babilone, biseene bili kwumu ya bina. Ya mu obaana matala mamō tee etsughu ki báburu Kriste biseene bili kwumu ya bina. **18** Bu me bu báburu Yiisu-Kriste: Ngughu a nde Mari áli mukaha wu ógwi Dzodzefe bilyimi. Lo nsomo bakala nzo mo, Mari ákeghele mu lileene li Mufulu a Ngili. **19** Dzodzefe mulumu a nde, áli mbwuru wu bunsumu. Ya nde bu ágwene odzyi otwuhu Mari budzwa ŋa mihi mi baara, nde ábagha bitsimi bii okahaba bala mu ensweghe. **20** Mu matala ma ákabulutsimi nde obo, ngye-yulu a Mfumu áyamonono a nde mu nzolo ya ályele kundaa nde ti: «Dzodzefe mwana a Dabvide,

ka bara nzalamweē mu ogwolo Mari, mukala a we mu nzo a we o. Mu kuulu, mu lileene li Mufulu a Ngili nde aakeghele. **21** Nde sa aburu mwana wu baghala ya we sa gwa nde nkwwu Yiisu, mu kuulu nde sa abvwuhu baara ba nde mu masumu ma bo.» **22** Mandagha mwohonono mamō mámonono mu kuulu mi ólyele Mfumu mu mubighili mikeele: **23** «Mono, mutughu wu munkyini sa akeghele. Nde sa aburu mwana wu baghala, ya sa bata nde mu nkwwu yi a Emanwele.» Mbaala ti: «Nzaami ŋa kara li bihi-a-be.» **24** Bu asighili kunsá ensama, Dzodzefe ási bwunu a bu ótumu nde ngye-yulu a Mfumu, ya ágwolo mukala a nde álo nde mu nzo. **25** Lo nde ka ábvughu mbughu ya Mari o, tee matala ma áburu nde mwana wu baghala wu ágwi nde nkwwu Yiisu.

2 Báburu Yiisu ku Beteleeme, mu nsie yi a Yude, mu matala ma óli Erode mukogho. Mono, banga-a-mayele báfi ku ookapala tala, ya báyanto ŋa Yerusaleme. **2** Ya bákabulufwulu ti: «Mukogho a ba-Dzwife wu baaburu kunu ali? Mu kuulu bihi liimono ŋomajomo a nde ku ookapala tala, ya bihi liigyi mu oyagwa nde baana.» **3** Mukogho Erode bu agyughu obo, nde ya baara ba Yerusaleme bwohonono, mikolo mi bo mikala maā-maā. **4** Nde ábvughu bakwuru ba bangaa ba nzaami bwohonono ya baluo-mikyene ba báli ŋa kara li ekaana, ya áfwulu bo kunu-ako bafaana oburu Kriste. **5** Ya bo bályele kundaa nde ti: «Ku Beteleeme, lili Yude, mu kuulu mubighili ásono bu: **6** “We Beteleeme, mu nsie yi a Yude, We ka li ebvu-bvulu ŋa kara li mabvulu mama Yude o. Mu kuulu, me mu we akala oopala mfumu, Wu aabiri Isaraye, baara ba me.”» **7** Mu obo, Erode bu ati banga-a-mayele mbili mu ensweghe, ábagha ogyighili ogyahaba kundaa bo munsá matala ŋomajomo aamonono. **8** Ya nde ágweghe bo ku Beteleeme ya ályele ti: «Ligye ligyighili ofwulu baara mu mi mitala mwana, ya be limana omonono nde, liyalyele me, mu kuulu mehe si ngye yingwa nde baana.» **9** Bo bu bamana ogyughu mi ólyele mukogho, bágyene. Ya bo báfirimono ŋomajomo wu bámono bo ku ookapala tala, ákatwama ku nkulu a bo, tee ku áyitemene nde mu engye-angye ŋa ebini ki óli mwana. **10** Bu bamono ŋomajomo, bo básomo kunsá muyayaā wu alagha. **11** Bu basomo munsá nzo, bámono mwana ya Mari, ngughu a nde.

Bo bábwí masu mu nsie mu ogwa nde baana. Bádzubulu bimpogholo bi bo, ya bágwí nde bikaba: Oore, muyiri ya mananaase mama miire. **12** ǀa mbihi, Nzaami ágyehe bo mu nzolo, banyaá obvughuru kundaa Erode. Bo bábvughuru ku nsie a bo mu nzili nkimi. **13** Banga-a-mayehe bu babvughuru, ngye-yulu a Mfumu áyamoṅono kundaa Dzodzefe mu nzolo ya ályele nde ti: «Temene, gwolo mwana ya ngughu a nde, bara a bo ku Edzipite. Yikala oko tee mu matala ma akala aandyele me we ti bvughuru. Mu kuulu, Erode sa asagha mwana mu kuulu adzwa nde.» **14** Mu mpyibi gyini oyo, Dzodzefe átemene, ágwolo mwana ya ngughu a nde, ya áyisweme ku Edzipite. **15** Nde ákala oko tee matala ma ókpi Erode. Myehene mimye, mu kuulu mandagha ma ólyele Mfumu mu muṅma a mubighili makeele: «Me aanti mwana a me mbili, apala mu Edzipite.» **16** Erode bu amono ti banga-a-mayehe baapfiri nde, nde ákolo nkehe yi alagha. Ya nde ágweghe bambumbulu ku Beteleeme ya mu bitsulu bi nsie bi nde byehene, mu kuulu bayidzwa biba-baana bibi babaghala byehene bibi bamvulu buolo, ya ku nsie, embe-embe ya matala ma ólyele nde banga-a-mayehe. **17** Oṅo me ǀa ótswughu ndagha yi ólyele mubighili Dzeremi ti: **18** «Likyi li lili mu ofa ku Rama, Likyi li bilili ya minyoó mi milagha. Rasyele li mu olili baana ba nde. Ya nde aabihi babuono nde, mu kuulu baana ba nde ka baafirisiyili o.» **19** Erode bu akpi, ngye-yulu a Mfumu áyimoṅono kundaa Dzodzefe mu nzolo ku Edzipite, **20** ya ályele kundaa nde ti: «Temene, gwolo mwana ya ngughu a nde, ya bvughuru ku nsie yi a Isarayehe, mu kuulu babo ba baakasagha odzwa mwana baakpi». **21** Dzodzefe átemene, ágwolo mwana ya ngughu a nde, ya ábvughuru ku nsie yi a Isarayehe. **22** Lo nde bu agyughu ti Arakelaose li mu okatumu nsie a Yude ǀa ebini e taara a nde Erode, Dzodzefe ámono nzalamweé mu ogye oko. Nzaami bu agyehe nde mu nzolo, nde áyisweme ku bitsulu bi nsie bibi ku Ngalile. **23** Bu ato, nde áyikala mu bvulu lili Nadzarete, mu kuulu mandagha ma ólyele mibighili magye mu mana: «Sa balyele nde ti nde musi Nadzarete.»

3 Mu bitsughu bibye, Dzā Muboghoró ámoṅono ku syehe lili Yude, ákabuluta mukwughu wu: **2** «Ligyinji mayele, mu kuulu Emfumu ki Mayulu eebehene!» **3** Wu me munde wu ókabighili

mubighili Edzayi, ǀa ályele ti: «Likyi li munde wu li mu okakehe engumbu ku syehe: Ligyighili nzili a Mfumu, lisa mankwulu ma nde makala nsumu!» **4** Dzā, áli a enkuru ki bátwu mu mfu a nyama wu a nkwumu syamo, ya ákuru musili wu a mu nkobo a nyama mu bala li nde. Nde ákabuludza bansense ya nyunju wu ebiri. **5** Baara baba Yerusaleme, baba Yude lwohono, ya baba etsulu e nsie kyehehe kii Dzurudē, bákagye kundaa nde, **6** ya nde ákaboghoró bo mu nzala yi a Dzurudē bu bákakihi masumu ma bo ǀa mihi mi baara bwohono. **7** Bu amono ba-Faridzyē balagha ya ba-Saduseyē ba bákagya kundaa nde mu kuulu nde aboghoró bo, nde ályele kundaa bo ti: «Etswumu ki bampili! Nande aasuo be bu liibara nkehe a Nzaami yili mu ogya? **8** Liikasuo mu bigyighili ti be liigyinji mayele. **9** Ya ka likakala a bitsimi bi mu beme o ti: “Taara a bihi Abarahame!” Mu kuulu, me ndyele be ti: Nzaami kughu okirili mameé ma makala baana kundaa Abarahame! **10** Ekwu ayi baatwulu mu otsyiri midza mi miti. Mu obo, nswe muti wu aagwene okaburu bimburu bi bibwe, sa bakpaa nde ya batsili nde ku mbaa. **11** Me ndi mu okaboghoró be mu madza mu nkooro a ogyinji mayele. Lo munde wu li mu ogya ǀa mbihi a me, bvulu me mpini, me ka nkughu onyana misyi mi bikoghoró bi nde o. Nde sa aboghoró be mu Mufulu a Ngili ya mu mbaa. **12** Nde li a nkwogho yi mampala ǀa kwogho e nde mu okabala bimburu ya bisagha, sa akwomo mbala a nde, sa akwu bimburu bi bele bi nde kunsá etaghala, lo sa atsughu bisagha ku mbaa yi aagwene okadzimi.» **13** ǀa mbihi oṅo, Yiisu fi ku Ngalile, gyi ku Dzurudē kundaa Dzā mu kuulu aboghoró nde. **14** Lo Dzā ka ákadzyi o, ya ályele kundaa nde ti: «Me ndi a nzala ati baboghoró me kundaa we, lo we firigya kundaa me!» **15** Yiisu ábvuhulu kundaa nde ti: «Mu matala ma, nyaá okala obo. Mu kuulu ofaana okala obo kundaa bihi a we mu kuulu likuhu myehene mi ookatumu Nzaami.» Oṅo Dzā ákihi. **16** Bu basaaboghoró nde, ǀaana oṅo Yiisu ápala mu madza. Ya mono, mayulu mádzubulu kundaa nde, ya nde ámono Mufulu a Nzaami mu okayakumunu ti beeme, ya gyi ǀa yulu a nde. **17** Ya ndagha yífi mu mayulu ya yílyele ti: «Wu me Mwana a me wu mukolo. Mu nde me aankamono esee.»

4 ̦a mbihi o̦o, Mufulu ábiri Yiisu ku syehe, mu kuulu dyabulu agyeele nde. **2** Yiisu bu akuru nswele mu bala mu bitsughu makwumu mana ya mampyi bi makwumu mana, ku masini, nzala yifuru nde. **3** Nga-a-bigyeele áyasele ya ályele kundaa nde ti: «Kala ti we li Mwana a Nzaami, sa ti mameē ma makighiri mampa.» **4** Lo Yiisu ábvuhulu kundaa nde ti: Básono ti: Mbawuru ka akala mweē yini a mu mampa o, lo mu mandagha mwohonu ma maakapala mu mu̦ma a Nzaami. **5** O̦o dyabulu ábiri nde ku Yerusalem, bvulu lili ngili, átwulu nde ku yulu a nsweē a Nzo a Nzaami, **6** ya ályele kundaa nde ti: Kala ti we li Mwana a Nzaami, bwa ku nsie, mu kuulu básono ti: Nde sa agwa litumu kundaa bange-yulu ba nde mu nkooro a we, ya bo sa bagyagha we mu myaā mi bo, mu kuulu kwulu e we enyaā okubu limeē. **7** Yiisu ábvuhulu kundaa nde ti: Básono si ti: Ka agyeele Mfumu Nzaami a we o. **8** Dyabulu áfiribiri nde ku yulu a munguo wu a nkara mutele. Nde ásuu nde bimfumu bi nsie byehene ya nsia a bye, **9** ya ályele kundaa Yiisu ti: «Me sa ngwa we bilogho byehene bi, kala ti we kunu mabuo ̦a nkulu a me mu ogwa me baana.» **10** Mu obo Yiisu ályele kundaa nde ti: «Satana, mara ̦a bele a me! Mu kuulu básono ti: We Mfumu Nzaami a we faana obuono, ya yini a nde we faana osamana.» **11** O̦o dyabulu ányaā nde, ya mono, bange-yulu báyabehene ya nde ya bábaana osalala nde. **12** Yiisu bu agyughu ti baalo Dzā mu boloko, nde ágyene ku Ngalile. **13** Nde ásihi Nadzaretu ya áyikala ku Kaperenawume, mu bele a mubu, mu etsulu e nsie kii Dzabulō ya Nefetali, **14** mu kuulu mandagha ma ólyele mubighili Edzayi makeele: **15** Etsulu e nsie kii Dzabulō, etsulu e nsie kii Nefetali, nzili yi a mubu, ku ngulu a Dzurudē, Ngalile lili baara baala ka bali ba-Dzwife o! **16** Baara ba báli kunsu mpyibi yi a la̦a-la̦a, baamono otsyeme ku onene, ya kundaa babo ba bali kunsu edzwunu kii lipfu, otsyeme omor̦ono! **17** Obaana matala mamo, Yiisu ábaana oluo ya ákabululyele ti: «Ligyin̦i mayele mu kuulu Emfumu ki Mayulu eeyabehene!» **18** Bu ákabuludzye mu mukogho a mubu a Ngalile, Yiisu ámono baana buolo ba taara mumō, Simō wu baakata ti Piere ya Andere mbwee a nde, mu okatere likoho mu mubu, mu kuulu bo báli bilebe banswi. **19** Nde ályele kundaa bo ti: «Linama me, ya me sa nsa be bilebe baara.» **20** ̦aana o̦o, bo basaabulunyaā

nkoho a bo, ya banama nde. **21** Bu afirisehe ̦a nkulu, nde áfirimono baana buolo bakimi ba taara mumō: Dzake ya Dzā, baana ba Nzebede ba babaghala munsu bwara bu bunene. Bo báli ya taara a bo Nzebede mu okagyighili nkoho. Yiisu áti bo mbili. **22** ̦aana o̦o, bo básaabulunyaā bwara bu bunene ya taara a bo ya bānama nde. **23** Yiisu ákabulugye mu etsulu e nsie kii Ngalile kyehene, mu okabululuo munsu manzo mama lisamana ma ba-Dzwife, ya ákabulutsala Nsia yi Mbwe yi a Emfumu. Nde ákabuludzuhu mabyele mwohonu ya bipfwumu byehene ̦a kara li baara. **24** Nsia a nde yitsarjama mu Siiri lwohonu. Ya bákayabiri kundaa a nde baara bwohonu ba báli a mabyele mama mawa-mawa ya ba bákamono mpara: banga a mifulu mi mibi, banga a nzyere, ba ópki binama, ya nde ákadzuhu bo. **25** Ya mampwumu ma baara ma máfi ku Ngalile, ku etsulu e nsie kii mabvulukwumu, ku Yerusalem, ku Yude, ya ku ngulu a Dzurudē, mábwi onama nde.

5 Yiisu bu amono mampwumu ma baara, ákumu ku yulu a munguo, ya bu abwi nsini, binduono bi nde bísele kundaa nde. **2** Bu atsughu ndagha, nde ábwi oluo ya ólyele bo ti: **3** «Esee kundaa bawe le mu Mufulu, mu kuulu Emfumu ki Mayulu eli kii ndaa bo! **4** Esee kundaa ba bali mu okalili, mu kuulu Nzaami sa abuono bo! **5** Esee kundaa babo ba bali badzuunu, mu kuulu bo sa babagha pfa li nsie yi ósiini a bo Nzaami! **6** Esee kundaa babo ba bali a nzala ya nyoro a bunsumu, mu kuulu bo sa bagyughuru! **7** Esee kundaa babo ba baakamono bana nyii, mu kuulu sa bamono bo si nyii! **8** Esee kundaa babo ba bali a mikolo mimi tse-tsee, mu kuulu bo sa bamono Nzaami! **9** Esee kundaa babo ba baakasa ti edzuunu ekala, mu kuulu sa bata bo baana ba Nzaami! **10** Esee kundaa babo baala bali mu okamwehē bo kimini mu nkooro a bunsumu, mu kuulu Emfumu ki Mayulu eli kii ndaa bo! **11** Esee kundaa be kala ti baara batughu be, bamwehē be kimini, ya babili mandagha mwohonu ma mabi mama mpya mu be, mu nkooro a me. **12** Likala a emiini ya likala kunsu muyayaā! Mu kuulu mufuru a be mu mayulu li munene. Me obo si bákamwehē mibighili mi mítswama nsomo ya be kimini.» **13** «Be lili munbga a nsie. Lo, kala ti munbga ka afirisyili a ese o, lo mu ema bakughu ofiribvurulu nde kye? Lo nde ka afirisyili a esala o. Bafaana otsili nde ku mbala

ya baara badzyara nde. **14** Be lili otsyeme o nsie nsyini. Bvulu li bátwu ŋa yulu a munguo ka likughu osweme o. **15** Ka baakanahaba mwindi ya bafughu nde nkuru o, lo baakatwulu nde ŋa yulu a ebini ki baakwulu mwindi, ya nde aakagwa otsyeme kundaa baara bwohono ba bali munsa nzo. **16** Mu obo, nyaā otsyeme o be omogono ŋa mihi mi baara bwohono, mu kuulu bo bamono bigyighili bi be bi bibwe, ya basyighi Taara a be wu li mu mayulu.» **17** «Ka litsimi o ti me aangyi mu oyatsala Mikyene mi Moyidze bwunu we maluo ma mibighili. Me ka aangyi mu otsala o, lo mu osa kuulu ti mye mikeele. **18** Mu engarjma me ndyele kundaa be ti, tee mu matala ma ooluru yulu ya nsie, lo ti esono kii nkwumu i, bwunu we empi-mpiri ki esono nga-emō, ka bamaha kye mu Mikyene o, tee ŋa ookeele mandagha mwohono. **19** Mu obo, nswe munde wu aatsala mukyene si mumō mu mi mibvulu busala mi, ya luo baara mu osa bumō, sa bata nde wu bvulu busala mu Emfumu ki Mayulu. Lo munde wu aasalala mye ya aaluo mye, sa balyele ti nde mbwuru wu munene mu Emfumu ki Mayulu. **20** Me ndyele kundaa be ti, kala ti bunsumu bu be ka bubvulu bubu ndaa baluo-mikyene ya bubu ndaa ba-Faridzyē o, lo be akala ka lisomo mu Emfumu ki Mayulu o.» **21** «Be áli liigyughu bályele kundaa bakwuru ti: “Ka dzwa o”. Munde wu aadzwa bafaana osa nde muyala. **22** Lo me, me ndyele kundaa be ti: Nswe munde wu aakolo nganda-mbwuru a nde nkehe, bafaana osa nde muyala. Munde wu aalyele nganda-mbwuru a nde ti: “Ewulu!” Bafaana osa nde muyala kundaa Ekwuru ki ba-Dzwife. Munde wu aalyele ti: “Nga-a-lala!” Lo bafaana otubu nde ku mungele a mbaa. (Geenna g1067) **23** Lo kala ti we li mu ogwa ekaba ŋa ebini ki baakagwa bikaba, ya we libili mweē ti nganda-mbwuru li a ndagha ya we, **24** lo nyaā ekaba e we oŋo, matswana yigwihini ya nde, ŋa nseele sa yabvughuru ya gwa ekaba e we. **25** Sa maswa mu ogwihini ya mbwuru wu liibagana ya we, ŋaala be ya nde nkini lili mu nzili. Kala pele, nde sa atyeghe we kundaa nsughu a lamana, nsughu a lamana sa agwa we ŋa myaā mi bambumbulu, ya bambumbulu sa balo we munsa boloko. **26** Mu engarjma me ndyele kundaa we ti: We ka apala omo o, tee ŋa aamana ofiri we mupara wu masini mu ebyimi ki li a we.» **27** «Be áli liigyughu bályele ti: “Ka bvughu mbughu ya mulumu bwunu

we ya mukala a nganda-mbwuru o.” **28** Lo, me ndyele kundaa be ti: Nswe mbwuru wu aatala mukaha ya sughu mukolo mu nde, nde maabvughu mbughu ya nde munsa mukolo a nde. **29** Kala ti lihi li we lili ku ngo-kwogho liikabwihi we mu masumu, sogholo lo ya tsili lo la ya we. Mu kuulu, obvulu bubwe kundaa we mu opihili esighi emō mu bisighi bi nyuru a we, ya banyaā otsili nyuru a we yohono ku mungele a mbaa. (Geenna g1067) **30** Kala ti ngo-kwogho e we eekabwihi we mu masumu, tsyiri kye ya tsili kye la ya we. Mu kuulu, obvulu bubwe kundaa we mu opihili esighi emō mu bisighi bi nyuru a we, mu kuulu nyuru a we yohono yinyaā ogye ku mungele a mbaa.» (Geenna g1067) **31** «Báfirilyele si ti: “Kala ti mbwuru byi mukala a nde, lo agwa nde mukaana wu ookpi bala.” **32** Lo me, me ndyele kundaa be ti: “Nswe munde wu aabyi mukala a nde, kala ti ka oli mu nkooro a enkwunu o, lo nde sa atsiini nde mu obwa mu bukala. Ya kala ti mbwuru kye mukaha wu baabyi ku bala, lo nde bwi mu bukala.” **33** «Be áli líifirigyughu bályele kundaa bakwuru ti: “Ka laba mukihi wu a mpya o, lo we faana ogyighili ndagha yi álabá we mukihi kundaa Mfumu”. **34** Lo me, me ndyele kundaa be ti, si okala a bunu, ka likalaba mukihi o, ngu okala mu nkwumu a yulu, mu kuulu lilo likubu li Nzaami. **35** Ngu okala mu nkwumu a nsie, mu kuulu yo yili ebini ki ookatwulu Nzaami myili, ngu okala mu nkwumu a Yerusaleme. Mu kuulu lo lili bvulu li Mukogho wu Munene. **36** Ka laba mukihi mu mutswi a we si o, mu kuulu we ka kughu osa ti lifu si limō liperegeme bwunu we lipiyini o. **37** Nyaā mbiili a we yikala kala “heē” lo “heē”, kala “pele”, lo “pele”. Mandagha mwohono ma baakabwehe ŋa yulu kundaa Nga-a-bubi maakafa.» **38** «Be áli liigyughu bályele ti: “Lihi mu lihi, ya lyini mu lyini”. **39** Lo me, me ndyele kundaa be ti: Kala ti mbwuru si be bubi, ka libvurulu nde etere o. Lo, kala ti mbwuru kaha we limpala mu tama lili ku ngo-kwogho, taama nde si tama li like. **40** Kala ti mbwuru dzyi osa we mumfwunu mu kuulu agwolo enkuru e we kii butulu, gwa nde si enkuru e we ki ela kii kobo. **41** Kala ti mbwuru si we enkwili mu odzyara mankpāā pfwunu mu myili ya nde, lidzyara mapfwunu mwolo ma mankpāā ya nde. **42** Gwa kundaa munde wu aaluomo we. Kundaa munde wu dzyi osuomo kundaa we, ka bihi o.» **43** «Be áli líifigyughu bályele ti: “Dzyi nganda-

mbwuru a we ya bele mutaara a we.” 44 Lo me, me ndyele kundaa be ti: Liikadzyi mitaara mi be, ya liikasamana mu babo ba baakamwehē be kimini. 45 Me obo be liikala baana ba Taara a be wu li mu mayulu, mu kuulu nde aakapaha tala li nde mu baara ba babwe ya ba babi. Ya aakanohō mvulu mu banga-a-bunsumu ya mu ba bagwene a bunsumu. 46 Mu obo, kala ti be okadzyi yini a ba baakadzyi be, nsa mufuru be liibagha? Mintolo-mpagha ka oli bumō nye si miikasa o? 47 Ya kala ti be mboro okagwa yini a kundaa bankele ba be ba babaghala ya ba bakaha, lo nsa ndagha yi okijimi be liikagyighili? Baala ka bali ba-Dzwife o, bo ka baakasa bumō o? 48 Be me baala likala baara ba bakughu, ti bu oli Taara a be mukughu mu mayulu.»

6 «Lisa mayele mu ogwene osuo bunsumu bu be ŋa mihi mi baara mu nzala a omoŋono kundaa bo. Kala pele, be ka libagha mufuru kundaa Taara a be wu li mu mayulu o. 2 Mu matala ma aakakaba we kundaa bawele, ka fulu mvulu-a-mvulu o, ti bu ookasa bampibi mu manzo ma lisamana ma ba-Dzwife, ya mu manzili, mu kuulu baara basyighi bo. Mu engarjma, me ndyele kundaa be ti: Bo áyi babagha mufuru a bo. 3 Lo we, mu matala ma aakakaba we kundaa bawele, kwogho e we kii engbambogho enyaā osoolo mi ookasa ngokwogho e we, 4 mu kuulu ekaba e we ekala kii ensweghe, ya Taara a we wu aakamono mu ensweghe, sa abvurulu we kye.» 5 «Ŋa liikasamana be, ka likakala ti anga bampibi ba baakadzyi okasamana mu mukiri mu manzo mama lisamana mama ba-Dzwife o, ya mu mapfulu ma minsagha, mu kuulu baara bamono bo. Mu engarjma, me ndyele be ti: Bo áyi babagha mufuru a bo. 6 Lo we, mu matala ma dzyi we osamana, somo munsangwumu a we, dzughubu muŋma a nzo, ya samana Taara a we mu ensweghe. Ya Taara a we wu aakamono mu ensweghe sa agwa we mvuru.» 7 «Mu matala ma liikasamana be, ka likapaha mandagha malagha o ti bu ookasa baala ka bali ba-Dzwife o, ba baakatsimi ti Nzaami sa agyughu bo kala ti babili ku olagha. 8 Ka likapaha mandagha malagha ti bo o. Nzaami a be soolo bi lili a be nzala bye nsomo be liluomo. 9 Mu obo, be lifaana okasamana bu: “Taara a bihi wu li mu mayulu! Nyaā nkwumu a we yikala yi a ngili. 10 Nyaā emfumu e we egya, nyaā dzyi li we likala

ŋa nsie ti bu oli ku yulu. 11 Gwa bihi lolo li, bi-odza bi bihi bibi nswe etsughu. 12 Sa bubi bu bihi kolokolo, ti bu liikasa bihi si kolokolo kundaa babo ba baakasa bihi bubi. 13 Ka nyaā bihi libwa mu bigyeele o, Lo kwulu bihi mu bubi.” [Mu kuulu emfumu, lileene ya nsia bili bibi we, mu mibvu nswe mibvu. Aamene.]» 14 «Kala ti be lisi bubi bu baara kolokolo, Taara a be wu li ku mayulu sa asa be si kolokolo. 15 Lo, kala ti be ka lisi baara kolokolo o, Taara a be si ka asa masumu ma be kolokolo o.» 16 «Ŋa liiakuru be nswele mu bala, ka likakala a bidzili bibi nyī o, ti bu ookasa bampibi. Bidzili bi bo biikakighiri mu kuulu bagyighili osuo kundaa baara ti bo baakuru nswele mu bala. Mu engarjma, me ndyele kundaa be ti: Bo áyi bábagha mufuru a bo. 17 Lo we, ŋa aakakuru we nswele mu bala, aakaswagha busu bu we, ya aakagyogho mutswi a we mananaase. 18 Mu kuulu nyaā omoŋono kundaa baara ti we aakuru nswele mu bala, ya Taara a we wu aakamono mu ensweghe, sa agwa we mvuru.» 19 «Ka likakwu busini mu beme ŋa nsie yi o, mu kuulu minkeghere ya bansiele biikabyihi bo, ya banga-a-pfyibi baakabulu bidzughubu ya baakaturu. 20 Lo liiakwu busini bu be ku yulu, oko kuulu minkeghere ya bansiele ka biikabyihi bo o, ya banga-a-pfyibi ka baakabulu bidzughubu ya baakaturu o. 21 Mu kuulu ŋa oli busini bu we, me oŋo si ŋa ookala mukolo a we.» 22 «Lihi lili mwinda a nyuru. Kala ti lihi li we lili nsili, lo nyuru a we yohono sa yikala kunsatsyeme. 23 Lo, kala ti lihi li we libyele, lo nyuru a we yohono sa yikala kunsampyibi. Kala ti otsyeme ku oli mu we oli ti mpyibi, lo mpyibi oyo yili nkara yi a laŋa-laŋa.» 24 «Ka oli a mbwuru wu kughu osalala bamfumu buolo o. Mu kuulu nde sa abele mumō ya sa adzyi wu muke, bwunu we nde sa anabara mu mumō ya sa atsaala wu muke. Be ka likughu osalala Nzaami emō ya Nzi o.» 25 «Mu obo me ndyele kundaa be ti: Ka likanyoō mu nkooro a laama li be o, mu mi mitala bi liidza, bwunu we bi liiŋma, ya mu nkooro a nyuru, mu bi liilaha. Laama ka libvulu mupfunu ya bi-odza o? Ya nyuru ka yibvulu binkuru o? 26 Litala baŋmini ba yulu: Bo ka baakakunu o, ya ka baakatolo o, bo ka baakakwu mu bitaghalo o, ya Taara a be wu li ku yulu, aakabununu bo. Lo bunu, be ka libvulu bo mupfunu o? 27 Nande ŋa kara li be kughu obwehe bitsughu mu laama li

nde mu minyoō?» **28** «Mu emakye be lili mu okabulunyoō mu nkooro a binkuru? Litala bu ookamene bifulu mu ebiri: Bye ka biikasala o, ya ka biikatwu biko o. **29** Me ndyele kundaa be ti: Si kala Salomō ndeme, kunsu nsia a nde yo yohono, ka ābululaha enkuru ki ebvulu bubwe ti efulu nga-emō mu bye o. **30** Kala ti Nzaami aakalaha bisagha bibi manseghe obo, biili lolu li bye bili, ya mbala-tsughu sa batsili bye ku mbaa, lo bunu, nde ka kughu obvululaha be o, baara baala kana li lisala? **31** Ka likakala a minyoō ya ka likabulubili o ti: “Emakye liidza? Bwunu we emakye liirjma? Bwunu we emakye liilaha?” **32** Mu kuulu bye byehene bibye, baara bwohono ba bagwene osoolo Nzaami baakabulusagha bye ku ogwene a okolo. Taara a be wu a ku yulu soolo ti be lili a nzala a bilogho byehene bibye. **33** Nsomo, litswama sagha Emfumu e Nzaami ya bunsumu bu nde, sa babwehe be bye byehene bibye ŋa yulu. **34** Mu obo, ka likakala a minyoō o mu mi mitala etsughu kii mbala, mu kuulu etsughu kii mbala sa ekala a minyoō mu kyeme. Nswe etsughu eli ya mpara a kye.»

7 «Ka likalamana o, mu kuulu banyaā olamana be si. **2** Mu kuulu, bwunu a bu likalamana be banganda-baara, me bwunu obo si akala baalamana be, ya eteese ki liikateese be banganda-baara, me mu kyini ekye si akala baateese be. **3** Mu emakye we li mu okatala lisele li lili mu lihi li nganda-mbwuru a we, lo we ka li mu okamono mubaa wu li mu lihi li weme o? **4** Bwunu we, bunu we kughu oleye kundaa nganda-mbwuru a we ti: “Nyaā me maha lisele mu lihi li we”, ŋaala weme li a mubaa mu lihi li we? **5** Mpibi, matswama maha mubaa mu lihi li weme, ya we bu gyighili omono, we sa bagha bu omaha lisele mu lihi li nganda-mbwuru a we.» **6** «Ka ligwa bilogho bibi ngili kundaa bambwa o, ya ka litsili nsia kundaa bangubulu o, kala pele, bo sa badzyara yo, ya bo bakaala mihi kundaa be, bakaghala be.» **7** «Liluomo, ya sa bagwa be, lisagha, ya be sa libagha, likoboro, ya sa badzubulu be, **8** mu kuulu, nswe munde wu aakaluomo, baakagwa nde, wu aakasagha aakabagha, ya baakadzubulu kundaa munde wu aakakoboro. **9** Nande ŋa kara li be kughu ogwa mwana a nde limeē, kala ti nde luomo limpa? **10** Bwunu we, kala ti nde luomo nswi, nde gwi nde ntaala? **11** Kala ti be baara ba babi lisoolo ogwa bilogho bi bibwe kundaa baana

ba be, lo Taara a be wu li ku mayulu, bunu akughu ogwene ogwa bilogho bi bibvulu bubwe kundaa babo ba baaluomo nde bye?» **12** «Mu obo, myehene mi lidzyi ti baara basa mu be, be si lisa bumō mu bo. Mu kuulu, mimye me Mikyene mi Moyidze ya Mibighili.» **13** «Lisomo mu muŋma a nzo wu asala, mu kuulu muŋma a nzo wu munene ya nzili yi nene biikabiri ku obyihl ya baara balagha baakasomo mu yo. **14** Muŋma a nzo li asala, ya nzili yi aakabiri ku laama yili yi aaswele, ya babo ba baakamono yo ka bali balagha o.» **15** «Lisa mayele mu mibighili mimi mpya! Mye mili mu okagya kundaa be mu efaana ki bindoomo, lo kunsu kara mye mili bango baba nsihl. **16** Be sa ligyahaba mye mu bigyighili bi bo. Mu munsene-a-nsene ka bakughu oka bimburu bi bviini o, bwunu we mu mungaama ka bakughu oka mburu a finge o. **17** Muti wu mubwe aakaburu bimburu bi bibwe, ya muti wu mubi, aakaburu bimburu bi bibi. **18** Muti wu mubwe ka kughu oburu bimburu bi bibi o, ya muti wu mubi ka kughu oburu bimburu bi bibwe o. **19** Nswe muti wu aagwene oburu bimburu bi bibwe, nde wu okpaa ya wu otsili ku mbaa. **20** Me mu obo, be sa lisoolo mibighili mu bimburu bi bo.» **21** «Ka oli nswe munde wu aakalyele kundaa me ti: “Mfumu, Mfumu!” Aasomo mu Emfumu ki Mayulu o, lo munde wu aakagyighili waa li Taara a me wu li mu mayulu. **22** Mu etsughu ekye, baara balagha akala baalyele kundaa me ti: “Mfumu, Mfumu, bihi ka likabighili mu nkwmu a we o? Bihi ka likabyi mifulu mi mibi mu nkwmu a we o? Bihi, ka likasa bimamaā mu nkwmu a we o?” **23** Oŋo me sa ndyele kundaa bo ti: “Me ka nsoolo be si mu tala limō o! Limara ŋa bele a me, be ba likasa bubil!”» **24** «Mu obo, nswe mbwuru wu aagyughu mandagha ma ndyele me ma ya salala mo, nde li efaana kii baghala nga-a-mayele wu aatwu nzo a nde ŋa yulu a limeē. **25** Mvulu bu anoō, ndwuru yigy, efulu egyi ya enyihl nzo oyo, lo yo ka yibwi o, mu kuulu batwu bitsini bi nzo oyo ŋa yulu a limeē. **26** Lo nswe wu aagyughu mandagha ma me ma, ya ka asalala mo o, nde li ti baghala wu ewulu wu aatwu nzo a nde ŋa yulu a dzyele. **27** Mvulu bu anoō, ndwuru yi gyi, efulu egyi ya enyihl nzo oyo. Nzo yibwi, ya yisaatsajama.» **28** Ankoho, mu matala ma ōmana Yiisu oluo mandagha mamu, mampwumu ma baara máŋjimi mu maluo ma nde, **29** mu kuulu nde ka ákaluo ti

bu ookaluo baluo-mikyene o, lo nde ákaluo ti mbwuru wu li ya litumu.

8 Mu matala ma ófi Yíisu ku yulu a munguo, mampwumu ya mampwumu ma baara máyanama nde. **2** Ya, nga-a-buala mutsyini áyasele kundaa nde, ya ákunu mabuo mu nsie ŋa nkulu a nde ya ályele nde ti: «Mfumu, kala we dzyi, lo we kughu otsehebe me.» **3** Yíisu bu alabala kwogho, ábyeme nde ya ályele kundaa nde ti: «Me ndzyi, kala wu atsyeme!» Ya ŋaana oŋo, nde átsyeme mu buala bu nde. **4** Yíisu áfirilyele kundaa nde ti: «Yughu! Ka lyele kundaa mbwuru ti mumō o, lo gye yisuo nyuru kundaa ngaa a nzaami, ya yigwa ekaba ki ótumu Moyidze, mu osuo kundaa baara bwohono ti we aadzughu.» **5** Mu matala ma ókasomo Yíisu mu bvulu lili Kaperenawume, mfumu a ekuru ki bambumbulu nkama mumō áyasele kundaa nde ya ábuono nde **6** mu olyele bu: «Mfumu, musala a me baakwoho ku nzo, binama bi nde biikpi, ya nde li mu okamono mpara yi alagha.» **7** Yíisu ályele kundaa nde ti: «Me sa ngya ya me sa ndzuhu nde.» **8** Lo mukwuru a bambumbulu nkama ábvuhulu kundaa nde ti: «Mfumu, me ka ndi wu a kughu o kuulu we somo mu nzo a me. Lo tsughu yini a ndagha mō, ya musala a me sa adzughu. **9** Mu kuulu, meme si ndi kunsá litumu li bakwuru ba me, ya me ndi a bambumbulu ba aakantumu me. Kala ti me ndyele kundaa mumō ti: “Gye!”, Lo nde gyene, kala ti me ndyele kundaa wu muke ti: “Gyal”, Lo nde gyi, ya kala ti me ndyele kundaa musala a me ti: “Sa esala ki!”, Lo nde si kye.» **10** Yíisu bu agyughu obo, nde ákinjimi ya ályele kundaa ba bákabulunama nde ti: «Mu enganma me ndyele kundaa be ti, me nkini aamono mbwuru wu li a kana li linene lili bu mu Isarayele o. **11** Me ndyele be yo, balagha sa bamara ku ookapala ya ku ookadzyama tala mu oyadza kyiri ebini emō ya Abarahame, Idzake ya Dzakobe mu Emfumu ki Mayulu. **12** Lo baana ba Emfumu ki Mayulu sa batsili bo kunsá mpyibi yi a laŋa-laŋa yi a ku mbala. Oko sa okala a bilili ya odza myini.» **13** Ya Yíisu ályele kundaa mukwuru a bambumbulu nkama ti: «Bvughuru ku nzo a we, ya nyaā okala bwunu a bu aasi we kana.» Mu matala maana mamo, musala a nde ádzughu. **14** Yíisu bu asomo ku nzo a Piere, nde ámono buko bu Piere wu mukaha ágyonomo mu nkooro a mukaama. **15** Yíisu ábyeme kwogho e nde, ya mukaama áfi.

Nde átemene ya ábwi osalala Yíisu. **16** Nkonkolo bu yito, báybiri kundaa Yíisu baara balagha banga a mifulu mi mibi. Ya mu ndagha a nde, Yíisu ábyi mifulu mimye ya ádzuhu babyele bwohono, **17** mu kuulu mandagha ma, ma áli ólyele mubighili Edzayi makeele: «Nde aagwolo bipfwumu bi bihi ya aabiri leme li mabyele ma bihi-a-be.» **18** Yíisu bu amono mpwumu a baara yi áadzzyi nde, nde ágwi litumu kundaa binduono bagye ya nde mu ngulu yinke yi a mubu. **19** Muluo-mikyene mumō áyasele ya ályele kundaa nde ti: «Muluo, nswe ku aagye we, me sa nama we.» **20** Yíisu ályele kundaa nde ti: «Mibagha mili a miŋma mi baakasweme, ya baŋmini ba mayulu bali a manzo, lo Mwana a mbwuru ka li a ŋa aasiili mutswi o.» **21** Mukimi mu binduono bi nde ályele kundaa nde ndiri: «Mfumu, gwa me muswa me mangye yindzyighi taara a me.» **22** Lo Yíisu ábvuhulu kundaa nde ti: «Nama me ya nyaā ba bákpi badzyighi bibyimi bi bo.» **23** Ya Yíisu bu asomo mu bwara bu bunene, binduono bi nde bínama nde. **24** Ensihibi, efulu ki enene ébwi ofulu ŋa yulu madza ma mubu. Mampo ma madza mábaana oluhu bwara. Lo Yíisu áli mu ensama. **25** Binduono bígyi ŋa bele a nde, bísiili nde ya bílyele ti: «Mfumu, bvuwu bihi! Bihi likpi!» **26** Nde ályele kundaa bo ti: «Mu emakye be lili a nzalamweé? Be baara baba kana li lisala!» Mu obo, nde átemene, áfyee efulu ya madza ma mubu mu ebaghala, ya edzuunu ki enene ékala. **27** Baara bákinjimi ya bákályele ti: «Nsa mbwuru wu, wuulu bifulu ya mubu biikagyughu nde!» **28** Ya Yíisu bu ato mu ngulu a mubu yinke, mu nsie yi a basi Ngadara, baara buolo banga a mifulu mi mibi bápala kunsá mampyeme ya bábyabwana nde. Bo báli a ebaghala ki elagha, me mu obo mbwuru ti mumō ka ákaluru mu nzili oyo o. **29** Bo bábaana okehe bingubu ti: «Mwana a Nzaami! Nki ndagha yili ŋa kara a bihi ya we? We bu aagyi ŋa mu oyamwehé bihi mpara nsomo matala mato?» **30** Ankoho, lala ya bo óli a mukaā a bangubulu wu munene wu áakabuludza. **31** Mifulu mi mibi mibuono Yíisu ya mílyele kundaa nde ti: «Kala ti we bihi aabyi, lo gweghe bihi mu mukaā a bangubulu.» **32** Yíisu ályele kundaa mye ti: «Ligye!» Mifulu mimye mípala ya míyisomo mu bangubulu. Ya mono, mukaā a bangubulu ábwi okumunu ku nsie a munguo mu ntyini, bo báybwa mu mubu ya bákpi mu madza. **33** Bankyele ba bangubulu

básuru a ntyini ya bábvughuru kunsu bvulu, ya bályele mandagha mwohonon mamō bu máluru, ya mi óbwana a baara banga a mifulu mi mibi. 34 Mu obo, baara ba bvulu lwohonon bápala mu oyibwana Yíisu, ya bu bamono nde, bábuonon nde amara mu etsulu e nsie e bo.

9 Yíisu bu asomo mu bwara bu bunene, ápala mubu ya ágyene ku bvulu lili ndaa ndeme. 2 Baara báybiri mbwuru wu ókpi binama kundaa nde wu bálaha ŋa yulu a laba. Yíisu bu amono kana li bo, ályele kundaa nde ti: «Kala a bukyini mwana a me! Masumu ma we basi mo kolokolo.» 3 Ankoho, ndaama a baluo-mikyene bákatsimi kunsu mikolo mi bo ti: «Mbwuru wu li mu okatsaala Nzaami!» 4 Yíisu bu abaghala bitsimi bi bo, ályele ti: «Mu emakye be lili a bitsimi bi bibi mu mikolo mi be? 5 Nsa ndagha yibvulu oleje? Olyele ti: “Masumu ma we basi mo kolokolo”, bwunu we olyele ti: “Temene ya dzyara”? 6 Mu kuulu be ligyahaba ti Mwana a mbwuru li a litumu lii osa masumu kolokolo ŋa yulu a nsie.» Mu obo nde ályele kundaa mbwuru wu ókpi binama ti: «Temene, gwolo laba li we ya bvughuru ku nzo a we.» 7 Baghala átemene ya ágyene ku nzo a nde. 8 Mampwumu ma baara bu mamono obo, mábagha nzalamwee, ya mábwi osyighi Nzaami wu aagwi kundaa baara litumu lili obo. 9 Yíisu ámara oŋo ágyene. Nde bu ákagye, ámonon baghala mumō, nkwwu a nde Matye, wu áabwi nsini ŋa ebini ki baakatolo mpagha. Nde ályele kundaa nde ti: «Nama me!» Matye átemene ya ánama nde. 10 Yíisu bu ákadza mu nzo a Matye, mintolo-mpagha milagha ya banga-a-masumu bágyi mu odza emō ya nde ya binduonon bi nde. 11 Ba-Faridzyē bu bamono obo, bályele kundaa binduonon bi nde ti: «Mu emakye Muluo a be ali mu okadza ya mintolo-mpagha ya banga-a-masumu?» 12 Yíisu bu agyughu obo, ályele ti: «Ka oli baara baba nsiili bali a nzala a ngaa-libughu o, lo babo ba bali babyele. 13 Ligye ligyighi ndagha yi: “Mukolo wu a nyii me ndzyi, lo ka otsughu me banyama mu mikaba o”. Mu kuulu, me ka aangyi mu ota baara baba bunsumu mbili o, lo mu babo banga-a-masumu.» 14 Binduonon bi Dzā bígyene kundaa Yíisu ya bífwulu nde ndiri: «Mu emakye bihi ya ba-Faridzyē liiakuru nswele mu bala, lo binduonon bi we ka biiakuru nswele mu bala o?» 15 Yíisu ábvuhulu kundaa bo ti: «Bandughu ba wu aakye bakughu okala

kunsu nyii mu matala maala wu aakye li nkini ya bo? Lo bitsughu sa bigya biili sa bamaha wu aakye ŋa kara li bo, me oŋo bo akala baakuru nswele mu bala.» 16 «Ka oli a mbwuru wu kughu olo epighi mu enkuru ki ekulu mu mupa wu munyaghara o. Kala pele mupa munde wu baabwehe sa akaghala enkuru ekye ku oluru. 17 Ka baakaloŋonon si bviini li linyaghara mu manduru ma makulu mama mu bibaana bi banyama o, kala pele manduru sa makagha, bviini litsanama ya manduru mapfighili. Lo bviini li linyaghara okaloŋonon mu manduru ma manyaghara mama mu bibaana bi banyama, me obo bakughu okele bye binsa byele.» 18 Ŋaala Yíisu nkini áli mu okalyele bo mandagha mamon, mu-Dzwife mumō wu áali mfumu áyabehene, ákunon mabuo ŋa nsie ŋa nkulu a nde, ya ályele kundaa nde ti: «Mwana a me wu mukaha maakpa, lo ya naā kwogho ŋa yulu a nde, ya nde sa akala mwee.» 19 Yíisu ya binduonon bi nde bu batemene, bánama nde. 20 Mukaha mutsyini wu ókabulupala makili mu bamvulu kwumu ya buolo ágyi ku mbihi a Yíisu ya ábyeme nto a enkuru e nde. 21 Mu kuulu nde ákatsimi kunsu mukolo a nde ti: «Kala me mbagha bu obyeme enkuru e nde, me sa mbvwughu.» 22 Lo, Yíisu bu akaghala, ámonon mukaha munde, ya ályele kundaa nde ti: «Kala a bukyini, mwana a me! Kana li we liibvwuhu we.» Ya mu matala maana mamon, mukaha ásaabvwughu. 23 Yíisu bu ayato ku nzo a mfumu munde, ámonon ba baakafulu bilue bi bifaana ti biwebe-a-webe ya mpwumu a baara yi áakalili mu mpini. 24 Nde ályele kundaa bo ti: «Lipala ku mbala be bwohonon, mutughu ka aakpi o, nde ensama aagyogomon.» Lo bo bábwi osebe nde. 25 Mpwumu a baara bu yipala ku mbala, Yíisu ásomon mu nzo, ákwara kwogho ki mutughu, ya mutughu ásigghili. 26 Nsia yitsanama mu etsulu e nsie kyehehe. 27 Mu matala ma ómara Yíisu ŋa ebini ekye, binkpa-mihi byelee bíbwi onama nde ya bíkabulukehe bingubu ti: «Mwana a Dabvide, monon bihi nyii!» 28 Yíisu bu ato ku nzo, binkpa-mihi bíyasele ŋa bele a nde, nde áfwulu kundaa bo ti: «Be lili a kana ti me nkughu ogyighili obo?» Bo bábvuhulu kundaa nde ti: «Eē, Mfumu!» 29 Obo me buulu, nde ábyeme mihi mi bo ya ályele kundaa bo ndiri: «Nyaā okala kundaa be bwunu a bu oli kana li be.» 30 Mihi mi bo mímonon. Ŋa nseele, mu ebaghala, Yíisu ályele kundaa bo ti: «Liyighili ogyughu, kparaa,

mbwuru si mumō anyaa osoolo ndagha yi!» 31 Lo bo bu bapala, báyitsala nde nsia mu etsulu e nsie kyehene. 32 Mu matala ma ópala binkpamihi, báyabiri nkini wu áali a mufulu wu mubi kundaa Yiiisu. 33 Yiiisu bu abyí mufulu wu mubi munde, nkini ábaana obili. Mampwumu ma baara mákinjimi ya mályele ndiri: «Bihi nkini límaamono yi a bu mu Isarayelee o!» 34 Lo ba-Faridzyé bákalyele ti: «Mu mpaana a mukwuru a mifulu mi mibi nde ali mu okapaha mifulu mi mibi.» 35 Yiiisu ákabulugye mu mabvulu ya mala mwohonó. Nde ákabululuo mu manzo ma lisamana, ákabulutsala Nsia yi Mbwe yi a Emfumu ki Mayulu, ya ákabuludzuhu mabyele mwohonó ya bipfwumu byehene. 36 Yiiisu bu amono mampwumu ma baara, nde ámono mo nyíi kunsá mukoló, mu kuulu mo máli makoló, ya ka máli a bukyini o, ti anga bindoomo bi bigwene a munkaala bibuoló. 37 Mu obo Yiiisu ályele kundaa binduono bi nde ti: «Bi-otolo bilagha mu nseghe, lo ba baatolo bali basala. 38 Mu obo, libuono mfumu nga-a-nseghe agweghe basala ba balagha ba baatolo mu nseghe a nde.»

10 Yiiisu bu ati binduono bi nde kwumu ya byele mbili, nde ágwi bo litumu lili obyí mifulu mi mibi ya odzuhu mabyele mwohonó ya bipfwumu byehene. 2 Ma me mankwumu ma bantumu kwumu ya buoló: Wu a nsomo Simó ya Andere mbwee a nde, Dzake ya Dzā mbwee a nde, baana ba Nzebede 3 Filipe ya Baretelemi, Toma ya Matye muntolo-mpagha, Dzake mwana a Alafe ya Tade, 4 Simó mu-Nzelote ya Yuda Isikaryote, munde wu átyeghe Yiiisu. 5 Ba me baara kwumu ya buoló ba ógweghe Yiiisu ya ba ályele nde ti: «Ka ligye kundaa baara baala ka bali ba-Dzwife o, ya ka lisomo mu bvulu si limó lili basi Samari o. 6 Lo ligye ku oli bindoomo bi nzo a Isarayelee bi bídzimini. 7 Bu lili mu okabulugye, likabululuo ya okabululyele ti: «Emfumu ki Mayulu eeyabehene!» 8 Lidzuhu babyele, lisiili ba bákpi mu lipfu, litsehebe banga-a-buala, libyí mifulu mi mibi. Be liibagha kuu ogwene ogwa nzi, ligwa si kuu ogwene oluomo nzi. 9 Ka ligwolo si oore o, ngu okala ngele, ngu okala nzi mu miswele mi bala mi be, 10 ngu okala empogholo, ngu okala binkuru byele bi bila, ngu okala bikogholo, ngu okala mukaana. Mu kuulu musala faana obagha bi-odza bi nde.» 11 «Ŋa liisomo be mu bvulu bwunu we mu bula, lifwulu kala ti oli a mbwuru wu a

kughu mu ogyagha be, ya likala mu nzo a nde tee matala ma liimara be oŋo. 12 Ŋa liisomo be munsá nzo a baara, ligwa bo mboro. 13 Kala ti nzo oyo yili yi a kughu, lo nyaá edzuunu e be ekala mu yo. Lo kala ti yo ka yili yi a kughu o, lo nyaá edzuunu e be ebvughuru kundaa beme. 14 Nswe munde wu agwene ogyagha be ya wu agwene ogyughu mandagha ma be, lipala munsá nzo oyo, bwunu we bvulu lilo, likubulu lifufunu li myili mi be. 15 Mu enganma me ndyele kundaa be ti: Mu etsughu kii Muyala, baara ba bvulu lilo sa babagha masyeme ma mabvulu mama baara ba Sodome ya Ngomore.» 16 «Ligyughu, me ngweghe be ti bindoomo ŋa kara li bango. Likala yeelee ti bantaala, ya likala a mikoló mi mitsyeme ti anga mabeeme. 17 Lisa mayele mu baara, mu kuulu bo sa batyeghe be ku mambala ma miyala ya bo sa bakaha be nswa-nswa munsá manzo ma bo mama lisamana. 18 Sa babiri be ŋa nkulu a bamfumu ba bitsulu bi mansie ya mikogho, mu nkooro a me, me oŋo be liikala bumpughulu bu me ŋa nkulu a bo, ya kundaa baala ka bali ba-Dzwife o. 19 Ŋa akala batyeghe be, ka likala a nzalamweé o ti bunu liibili bwunu we mayo liilyele, mu kuulu mu matala mamó, sa bagwa be mandagha ma akala liibili. 20 Ka be akala liibili o, lo Mufulu a Taara a be akala aabili mu be. 21 Mwana a taara sa atyeghe mwana a taara mu lipfu, ya taara sa atyeghe mwana a nde. Baana sa bakala mitaara mi bataara ya bangughu ba bo, ya sa batumu baara badzwa bo. 22 Baara bwohonó sa babele be mu nkooro a nkwwu a me. Lo munde wu aasa mukama tee ku masini, nde sa abvwughu. 23 Mu matala ma akala baamwehé be mpara mu bvulu limó, libara mu bvulu li like. Mu enganma, me ndyele kundaa be ti, be ka limana odzerene mabvulu ma Isarayelee mwohonó o, nsomo-a-nsomo Mwana a mbwuru agya.» 24 «Enduono ka eluru muluo a kye o, ya nkana si mumó ka luru mfumu a nde o. 25 Ofaana okala ti enduono ekala ti muluo a kye ya nkana akala ti mfumu a nde. Kala ti bati mfumu a nzo Beledzebule, lo mayo baagwene olyele mu ba bali munsá nzo a nde?» 26 «Mu obo ka libara bo o! Mandagha mwohonó ma máswe me sa mamogono, mansweghe mwohonó sa basoolo mó. 27 Mandagha ma aandyele me be kunsá mpyibi, be lilyele mó mu mwíi wu ebala. Mandagha ma liikagyughu be mu mamfwunu, be lita mó mukwughu ku yulu a see li nzo

lili eyala. **28** Ka likabara baara ba baakadzwa nyuru o, lo ka bakughu odzwa muwumunu o. Lo likabara munde wuulu kughu odzihibi muwumunu ya nyuru ku mungele a mbaa. (Geenna g1067) **29** Ka baakatyeghe binswini-a-nswini byele mu mupara mumō. Lo emō mu bye ka ekughu obwa ŋa nsie o, kala ti Taara a be ka gwi muswa o. **30** Ya kundaa be, si okala mfu a be, Nzaami soolo mutala a yo yohono. **31** Mu obo, ka likala a nzalamweē o! Be libvulu binswini-a-nswini bi bilagha mu mupfunu.» **32** «Mu obo, nswe munde wu aakihi ŋa nkulu a baara ti nde li wu a me, lo mehe si sa nkihi ti nde li wu a me ŋa nkulu a Taara a me wu li ku mayulu. **33** Lo nswe munde wu aatunu me ŋa nkulu a baara, lo mehe si sa ntunu nde ŋa nkulu a Taara a me wu li ku mayulu.» **34** «Ka litsimi o ti me aayambiri edzuunu ŋa nsie. Me ka aangyi mu oyabiri edzuunu o, lo lipee. **35** Me aangyi mu okabala mumpala ya taara a nde, mutughu ya ngughu a nde, mukala a mwana ya buko bu nde wu mukaha. **36** Ya mitaara mi mbwuru, sa mikala baara ba bali ya nde munsa nzo a ndeme.» **37** «Nswe munde wu dzyi taara a nde, bwunu we ngughu a nde ku obvulu me, nde ka faana mu okala wu a me o. Nswe munde wu dzyi mwana a nde wu baghala bwunu we wu mukaha ku obvulu me, nde ka faana okala wu a me o. **38** Nswe munde wu aagwene obiri kuruwa li nde ya onama me, ka faana okala wu a me o. **39** Munde wu aakele laama li nde, sa apfihili lo, ya munde wu aapfihili laama li nde mu nkooro a me, sa afiribagha lo.» **40** «Nswe munde wu aabwana a be, lo meme nde abwana, ya munde wu aabwana a me bwana a munde wu áagweghe me. **41** Nswe munde wu aabwana a mubighili mu kuulu nde li mubighili, sa abagha mufuru wu baakagwa mubighili. Ya nswe munde wu aabwana a mbwuru wu li nsumu mu kuulu nde li nsumu, nde sa abagha mufuru wu a mbwuru wu li nsumu. **42** Nswe munde wu aagwa si ebaha ki madza mama mudzili kundaa mumō mu bike-bike bi mu kuulu kye eli enduono e me, mu engarjma me ndyele be ti, nde ka apfihili mufuru a nde o.»

11 Yiisu bu amana ogwa mikyene mimye kundaa binduono bi nde kwumu ya byele, nde ámara oŋo, áyiluo ya áyitsala nsia yi mbwe mu mabvulu ma bo. **2** Ya Dzā, munsa boloko mu áli nde, ágyughu bu bákabili mu bigyighili

bi Kriste. Nde ágweghe binduono bi nde, **3** mu oyifwulu kundaa nde ti: «We me munde wu li mu ogya, bwunu we mukimi bihi lifaana okebe?» **4** Yiisu ábvuhulu kundaa bo ti: «Ligye lilyele kundaa Dzā mi lili mu ogyughu ya omono: **5** Binkpa-mihi bili mu omono, bikara bili mu odzyara, banga-a-buala bali mu otsyeme, binkpa-matswi bili mu ogyughu, ba bákpi bali mu osighili mu lipfu, ya bali mu otsala Nsia yi Mbwe kundaa bawele. **6** Esee kundaa munde wu aagwene obwihi kana li nde mu nkooro a me!» **7** Binduono bibye bu bibvughuru, Yiisu ábwi obili kundaa mampwumu mu mi mitala Dzā: «Emakye be liiyitala ku syehe? Edzyara ki oli mu okanyihí efulu? **8** Bu be emakye liiyimono? Baghala wu aalaha binkuru bibi ntala? Bu tala babo ba baakalaha binkuru bi bibwe mu manzo ma mikogho baakakala. **9** Emakye be liiyimono? Mubighili, eē? Me ndyele kundaa be ti, nde bvulu ku oluru ya mubighili. **10** Me mu mi mitala nde básono bu: Mono, me ntswahaba ntumu a me ku nkulu a we, mu ogyighili nzili a we. **11** Mu engarjma, me ndyele be yo: ŋa kara li ba báburu mu mukaha, ka oli a mbwuru wu áli wu bvulu Dzā Muboghoroo. Lo wu bvulu bugye mu Emfumu ki Mayulu bvulu nde mu bukwuru. **12** Obaana mu matala ma Dzā Muboghoroo tee mu matala ma, bali mu odzwana a Emfumu ki Mayulu mu mpini. Me banga-a-ngirini bali mu okagwohono kye. **13** Mu kuulu mibighili myehene, ya Mukyene a Moyidze mikabighili tee mu matala ma Dzā. **14** Kala ti be likughu okihi yo, me nde, Eli wu áakaagya. **15** Nyaā nga-a-matswi, agyughu! **16** Ya nande me nkughu obvughu eseene ki? Kye efaana ti anga bike-bike bi biibwi nsini ŋa mbala a baara bwohono, ya bili mu okalyele mu mpini kundaa bambaala bike-bike ti: **17** “Bihi liifulu be bilue bi bifaana ti biwebe-a-webe, lo be ka liikini o. Bihi liigyimi ekwumu kii lipfu, lo be ka liilili o!” **18** Mu kuulu Dzā aagyi, nde ka akadza ya okarjma o, ya baara baalyele ti: “Nde li a mufulu wu mubi!” **19** Mwana a mbwuru aagyi, nde li mu okabuludza ya okabulurjma, ya bo bali mu okalyele ti: “Nde li nga-a-elyili ya enkolo-mala, ndughu a mintolo-mpagha ya banga-a-masumul” Lo Bunsughu buumorjono bubu nsumu mu bigyighili bi nde.» **20** ŋa mbihi oŋo, Yiisu ábwi ofyeē mabvulu mamo mu ási nde emvulu-ngughu ki bimamaā bi nde, mu kuulu mo ka mágyinjí mayele o. **21** «Nyiĩ kundaa

we bvulu lili Koradzine! Nyii kundaa we, bvulu lili Betesayida! Mu kuulu kala ti bimamaa bi basi na kara li be mu mabvulu mama Tire ya Sidō basi bye, nkini li edzighi baara baba oko bakaalaha mangooro ya ogogho lifuru a mbaa mu osuo ti bo baagiyi mayele. **22** Mu obo me ndyele be ti: Mu etsughu kii mumfwunu a baara, ebili e be sa ebvulu kii Tire ya Sidō. **23** Ya we bvulu lili Kaperenawume, sa bakuhubu we tee ku yulu? Pele! Sa basurulu we tee ku nsie a ba baki! Mu kuulu kala ti bimamaa bi basi na kara li we, ali ku Sodome basi bye, nkini bvulu lilo lili tee lolo bu. (Hades g86) **24** Me obo me ndyele be ti: Mu etsughu kii mumfwunu a baara, ebili kii nsie a Sodome sa ebvulu busala ya kii we». **25** Mu matala mamō Yiiisu alyele ti: «Me nsyighi we Taara, Mfumu a yulu ya nsie, mu kuulu we aasweghe mandagha mamō na mihi mi bansughu ya banga-a-maye, lo we aasuo mo kundaa bike-bike. **26** Eē, Taara, we aadzyi ti okala obo.» **27** «Taara a me agwi me byehene. Ka oli a mbwuru si mumō wu soolo Mwana o, kala ka oli yini a Taara o. Ya ka oli a munde wu soolo Taara o, kala ka oli yini a Mwana o ya munde wu odzyi Mwana osuo kundaa Taara.» **28** «Ligya kundaa me, be bwohono ba liikolo mu obiri maleme, ya me sa ngwa be bumpoholo. **29** Lilaha nkogholo a me ya ligyighi kundaa me, mu kuulu me ndi wu adzuunu ya me ndi a mukolo wu a bunya-nyaā, ya be sa libagha ogwumu ku miwumunu mi be. **30** Mu kuulu nkogholo a me ka yili a mpara mu obiri o, ya leme lili ndaa me lilele.»

12 Mu matala mamō, Yiiisu akaluru munsā manseghe ma bele, mu etsughu kii sabate. Binduono bi nde bifuru nzala ya bifwi oka binsia bi bimburu ya odza bye. **2** Ba-Faridzyē bu bamono obo balyele kundaa nde ti: «Mono, binduono bi we bili mu ogyighili mi balighi ogyighili mu etsughu kii sabate». **3** Lo Yiiisu abvuhulu kundaa bo ti: «Bunu, be kalitaā mi ogyighili Dabvide o, mu matala ma ofuru nde nzala ya ba bakakala ya nde? **4** Bunu-abo nde asomo mu Nzo a nzaami, ya ali mampa ma bagwi ekaba kundaa Nzaami, maala nde ya ba bakakala ya nde ka bali a muswa mu odza o, lo yini a bangaa ba nzaami? **5** Bwunu we be ka litaā mu Mukyene o ti, mu etsughu kii sabate, munsā Nzo a nzaami, bangaa ba nzaami baakatsumunu ngili a etsughu kii sabate ku ogwene a obagha

ebili? **6** Lo me ndyele kundaa be ti: Oli na, yibvulu Nzo a nzaami. **7** Kala ti ali liigyahaba mbaala a bisono bi: Me ki ndzyi mukolo wu a nyii, lo ka okadzwa banyama mu bikaba o, nkini be ka likaakagwa ebili kundaa baara ba bagwene osoolo ndagha o. **8** Buulu Mwana a mbwuru li Mfumu a sabate.» **9** Yiiisu bu amara ogo, agyene munsā nzo a bo yi lisamana. **10** Mu nsa omo, ali a baghala wu ali a kwogho ki ekee. Ba-Faridzyē bu bakasagha ndagha yi baaburulu nde, bagwi nde efwulu ki: «Bunu, oli a muswa mu odzuhu mubyale mu etsughu kii sabate?» **11** Ya Yiiisu abvuhulu kundaa bo ti: «Nande na kara li be wuulu kala ti nde li a endoomo etsyini, ya kye ebwi mu dzunu mu etsughu kii sabate, nde ka ayipaha kye o? **12** Buta mbwuru bvulu mupfunu ya endoomo! Mu obo, oli a muswa mu ogyighili bubwe mu etsughu kii sabate.» **13** Ogo nde alyele kundaa baghala ti: «Labala kwogho e we». Nde alabala kye ya kye ebvughuru nsii ti kwogho ki eke. **14** Ba-Faridzyē bu bapala, bakuru mfumu yi osagha bunu baadzwa Yiiisu. **15** Yiiisu bu asoolo obo, amara ogo. Ya mampwumu ma baara malagha akanama nde, ya nde adzuhu bo bwohono. **16** Yiiisu atswi bo mukele, banyaā otsala nde nsia ti nde na ali, **17** mu kuulu mandagha ma alyele mubighili Edzayi matswighi: **18** «Mono musala a me wu aanswolo me, wu ndzyi me, ya mu nde me aankamono esee. Me sa ntwulu Mufulu a me mu nde, ya nde sa alyele bunsumu kundaa baara ba mansie. **19** Nde ka banja ya mbwuru o, ka akehe bingubu o, ka bagyughu likyi li nde mu minsagha o. **20** Nde ka abogholo edzyara ki bamaafuru o, nde ka adzihibi musyi a mwinda wu li nkini mu okatsuru o, tee na aasa nde ti bunsumu bulughulu. **21** Ya bikaana byehene sa bisa emiini mu nkwumu a nde.» **22** Bayabiri kundaa Yiiisu mbwuru mumō wu ali a mufulu wu mubi, nde ali enkpa-mihi ya nkini. Yiiisu adzuhu nde. Mbwuru wu ali nkini abwi obili ya abwi omono. **23** Mampwumu ma baara mwohono akanjimi ya alyele ti: «Wu ka Mwana a Dabvide o?» **24** Lo ba-Faridzyē bu bagyughu obo, balyele ti: «Mbwuru wu mu lileene li Beledzebule, mfumu a mifulu mi mibi, ali mu okabyi mifulu mi mibi.» **25** Yiiisu bu agyahaba bitsimi bi bo, alyele kundaa bo ti: «Kala ti baara ba bali a emfumu baakadzwana bo-a-bo, lo emfumu ekye sa ebwa. Ya baara baba bvulu bwunu we baba dzumu limō kala ti

bakaghaba, bvulu lilo bwunu we dzumu lilo ka lilaama o. **26** Kala ti Satana byi Satana, lo nde li mu okaghaba ya ndeme, bunu-a-bo emfumu e nde ekughu olaama? **27** Kala ti me mu lileene li Beledzebule ndi mu okabyi mifulu mi mibi, lo baana ba be mu lili nande baakabyi mye? Mu obo, bomo sa bakala bansungu-a-lamana ba be. **28** Lo, kala ti mu Mufulu a Nzaami me ndi mu okabyi mifulu mi mibi, lo Emfumu e Nzaami ayi eeyato kundaa be. **29** Bwunu we, bunu-a-bo mbwuru akughu osomo mu nzo a nga-a-mpini ya ogwolo bilogho bi nde byehene, kala ti nde ka tswama okuru nde misyi o? Lo, nde amana osa obo, nde kughu ogwohono byehene bi bili mu nzo a nde. **30** Nswe munde wuulu ka ali ya me o, li mutaara a me, ya munde wu aagwene obvughu baara ya me, nde li mu otsala. **31** Me mu obo me ndeyele kundaa be ti: Sa basa baara kolokolo mu masumu ma bo mwohono ya otsaala kwohono, lo munde wu aatsaala Mufulu a Ngili ka bakughu osa nde kolokolo o. **32** Ya kala ti mbwuru lyele ndagha yi mbi mu Mwana a mbwuru, sa basa nde kolokolo. Lo munde wu aabili bubi mu Mufulu a Ngili, ka basa nde kolokolo o, ngu okala mu matala ma, ngu okala mu matala ma maagya.» (aiōn g165) **33** «Kala ti muti li mubwe, lo bimburu bi nde si bili bi bibwe. Ya kala ti muti li mubi, lo bimburu bi nde si bili bi bibi. Mu kuulu muti okagyhaba nde mu bimburu bi nde. **34** Etswumu ki bampili ki! Bunu-abo be likughu olyele mandagha ma mabwe, gaala be lili baara ba babi? Mu kuulu mandagha ma maakapala mu mujma, me ma maalwulu mu mukolo. **35** Mbawuru wu mubwe aakapaha bilogho bi bibwe bi bili mu nkiri-mbughu a nde yi mbwe. Mbawuru wu mubi aakapaha bilogho bi bibi bi bili mu nkiri-mbughu a nde yi mbi. **36** Me ndeyele kundaa be ti: Mu etsughu kii Muyala, nswe mbawuru sa agwa mvuru mu mandagha ma magwene a mupfunu ma apaha mu mujma a nde. **37** Me mu mbiili a we, we akala alughulu, ya me mu mbiili a we, we akala abwa.» **38** Jaana oyo, baluo-mikyene bana ya ba-Faridzye babake balyele kundaa Yiisu ndiri: «Muluo, bihi lidzyi ti we, we suo bihi elyimi nga-emō.» **39** Nde abvuhulu kundaa bo ti: «Eseene kii lolo, ki eli ebi ya ki eegwene okanama Nzaami eli mu oluomo elyimi! Lo ka oli a elyimi ki baasuo kundaa be o, kala ti ka oli yini a elyimi kii mubighili Dzonase o. **40** Bwunu a bu osi Dzonase bitsughu bitere

ya mampyibi matere munsu mwee a nswi wu munene, bwunu obo si Mwana a mbwuru aasa bitsughu bitere ya mampyibi matere ku nsini a nsie. **41** Mu etsughu kii muyala, baara baba bvulu li Ninibve sa batemene ya bafwunu baara baba eseene ki. Bo sa babwihi eseene ki, buulu baara ba Ninibve bagyiini mayele mu maluo ma Dzonase. Lo oli ja, wu bvulu Dzonase. **42** Mu etsughu kii muyala, Ngasa wu a nsie yi a Sude, sa atemene ya afwunu eseene ki, ya sa abwihi kye, mu kuulu Ngasa amara ku bitsulu bi nsie bi bibvulu la mu oyagyughu bunsughu bu Salomō. Lo oli ja, wu bvulu Salomō!» **43** «Ja ookapala mufulu wu mubi mu nyuru a mbwuru, nde aakagye mu bibini bibi syehe mu okabulusagha ja aagwumu. Lo kala ti nde ka abagha kye o, **44** oyo nde aalyele bu: “Me mbvughuru ku nzo a me yi nkulu, omo mu ampala me”. Ya nde bu ayabvughuru, nde sa ayabagha yo mukajana, yi bagyighili okuomo ya bunkere. **45** Oyo nde aayigwolo ya nde mifulu nsama mikimi mi mibvulu nde mu bubi, mye myehene misomo ya mibagha bibini omo. Bunsili bu mbwuru munde bubu masini sa bubvulu bubi ya bubu nsomo. Bwunu obo si ookala mu eseene ki ebi ki.» **46** Yiisu ali nkini mu okabili kundaa mampwumu ma baara, ngughu ya bambwee ba nde batemene ku mbala ya bakasagha obili ya nde. **47** [Mbwuru mumō alyelele kundaa nde ti: «Ngughu a we ya bambwee ba we bali ku mbala ya badzyi obili ya we.»] **48** Yiisu abvuhulu kundaa munde wu akabili ya nde ndiri: «Nande li ngughu a me? Ya bana bali bambwee ba me?» **49** Ja nseele nde alabala kwogho kundaa binduono bi nde ya alyele ti: «Limono ngughu a me ya bambwee ba me. **50** Nswe munde wu aasa waa li Taara a me wu li mu mayulu, me munde li mbwee bwunu we naana a me wu baghala, nkele a me, ya ngughu a me.»

13 Mu etsughu ekye, Yiisu bu apala mu nzo, ayabwa nsini ja mukogho a mubu. **2** Mampwumu ma baara malagha mayabvunjuru ja bele a nde, ya mu obo, nde asomo munsu bwara ya abwi nsini, ya mpwumu a baara yohono yisyili mu mukogho a madza. **3** Mu mankumu, nde alyele mandagha malagha kundaa bo ti: «Mukunu apala mu oyikunu. **4** Mu matala ma akanyahala nde nsia, ndaama a nsia yibwi mu mukogho a nzili. Barjmini bagyi ya batooro yo yohono. **5** Yinke yibwi mu oli mamee, jaala

nsie ka yíli yi alagha o. Yo yímene mu maswa, lo mu nkooro a nsie yiili ka yíli a mubighi o, 6 mwíi bu abala ya buulu misumunu ka mfilí a midza o, mye mídzhigí ya mífkee. 7 Yinke yíbwí kunsá mingaama, ya mingaama bu mikulu mísí yo mpíjǐ. 8 Yinke yíbwí mu nsie yi mbwe ya yíburu bimburu: Yini bimburu nkama, yinke bimburu makwumu masemene, ya yimō bimburu makwumu matere. 9 Munde wu li a matswí, agyughu!» 10 Binduono bu biyasele kundaa nde, bífwulu nde ti: «Mu emakye we li mu okabulubili ya bo mu mankumu?» 11 Nde ábvuhulu kundaa bo ti: «Kundaa be baagwi bwehe ba osoolo mpaana a Emfumu ki Mayulu, lo ka kundaa bo o. 12 Mu kuulu, kundaa munde wu li a elogho, sa bafirigwa nde, ya sa akala a bye bi bilagha, lo kundaa munde wu gwene a elogho, sa bamaha nde ekye ki ali a nde. 13 Me mu obo me ndi mu okabulubili ya bo mu mankumu, mu kuulu si kala ti bo batala, lo bo omono we, ya si kala ti bo banama, lo bo ogyughu we ya obaghala we, 14 ya mpaala mandagha ma mályele mubighili Edzayi makeele mu bo: Be sa ligyighili ogyughu, lo ka libaghala o, Be sa ligyighili otala, lo ka limono o. 15 Mu kuulu mukolo a ekaana ki ayi aakubu, bo baakuru matswí ma bo ya baadzwi mihi mi bo. Mu kuulu banyaā omono mu mihi mi bo, ya banyaā ogyughu mu matswí ma bo, ya banyaā obaghala mu mikolo mi bo. Ya bakwono ogyinjí mayele, ya me ndzuhu bo.» 16 «Esee kundaa be mu kuulu mihi mi be mili mu omono, ya matswí ma be mali mu ogyughu. 17 Mu enganjma, me ndyele kundaa be ti: Mibighili milagha ya baara baba bunsumu balagha bákasagha omono mi lili mu omono be, lo bo ka bámono mye o, bákasagha ogyughu mi lili mu ogyughu be, lo ka bágyughu mye o.» 18 «Be me baala ligyughu mbaala a nkumu yi a mukunu: 19 Ba baakagyughu ndagha a Emfumu e Nzaami ya bakwono obaghala, bo bali efaana kii mukogho a nzili munde wu oobwi mburu. Wu Mubi agwolo gyi ya gwohonono byehene bi baakunu mu mikolo mi bo. 20 Nsie yi a mameē mu oobwi mburu, me munde wuulu bu agyughu ndagha a Nzaami, gyagha yo maswa-maswa ya esee. 21 Lo, nde ka li a midza mu ndeme o, nde mbwuru wu gwene a mukama. Ya ŋa oogya mpara bwunu we makimini mu nkooro a Ndagha a Nzaami, ŋaana-oŋo nde bwi. 22 Nsie yi a mingaama mu oobwi mburu, me munde wu gyughu Ndagha a Nzaami, lo

minyoo mi nsie ya ntono a busini biikasa Ndagha a Nzaami mpíjǐ ya yo ka yiikaburu bimburu o. (aiōn g165) 23 Nsie yi mbwe mu oobwi mburu, me munde wuulu bu agyughu Ndagha a Nzaami, baghala yo. Nde aakaburu bimburu, limō ligwi nkama a bimburu, lini ligwi bimburu makwumu-masemene, li like ligwi bimburu makwumu-matere.» 24 Yiisu áfirita bo nkumu nkimi. Nde ti: «Emfumu ki Mayulu efaana ya mbwuru wu aakunu nsia yimbwe mu nseghe a nde. 25 Mu matala maala baara baagyongomo ensama, mutaara a nde gyi, kunu nsia a esagha ki ebi ŋa kara li bele ya gyene. 26 Bele limene ya liburu binsia, esagha ki ebi si epala. 27 Basala ba mfumu nga-a-nzo bagyi ya balyele kundaa nde ndiri: “Mfumu, bunu, we ka oli nsia yimbwe aakanu mu nseghe a we o? Bu esagha ki ebi ki kunu-ako eefi?” 28 Nde bvuhulu kundaa bo ti: “Me mutaara aasi obo.” Basala balyele kundaa nde ti: “Bunu, we dzyi ti bihi liyitumunu esagha ekye?” 29 Nde lyele kundaa bo ti: “Pele! Mara bu litolo esagha ki ebi, be litumunu si bele nzili mō ya kye. 30 Linyaā bye binsa byele bikulu tee ku baatolo bimburu. Ya mu matala ma baatolo, me sa ndyele kundaa ba baatolo ti: Limatswama otolo bisagha bi bibi, likuru bye mu biko ya litsughu bye mbaa. ŋa nseele be likwu bele kunsá etaghala e me.”» 31 Yiisu áfirita bo nkumu nkimi ti: «Emfumu ki Mayulu efaana ti nsia a muti wu a nkwumu mutaade yi ogwolo mbwuru ya akunu mu nseghe a nde. 32 Yo yibvulu busala mu nsia yo yohonono. Lo ŋa yiikapala yo, yo yiikabvulu miswoho myehene mimi mu ebwa mutele. Yo yiikakala muti wuulu baŋmini ba yulu baakayatwu manzo ma bo mu mampala ma nde.» 33 Yiisu áfirita bo nkumu nkimi ti: «Emfumu ki Mayulu efaana a pfini li oogwolo mukaha ya atwulu mu mankpaā matere ma farine, tee ku oofuulu mankpaā ma farine mwohonono.» 34 Mandagha mwohonono mamō Yiisu ákalyele mō kundaa mampwumu ma baara bwohonono mu mankumu. Ya nde ka ákabili ya bo ku ogwene a ma mankumu o. 35 Mu kuulu mandagha ma áli olyele mubighili makeele: Me sa ndzubulu muŋma a me mu obili mu mankumu, me sa ndyele bo mandagha mama ensweghe obaana mu ebaana e nsie. 36 Yiisu bu abulusihi mampwumu ma baara, áyisomo mu nzo, ya binduono bi nde bíyasele kundaa nde, ya bílyele kundaa nde ti: «Gwa bihi mbaala a nkumu yi a esagha ki ebi mu

nseghe.» 37 Nde ábvuhulu kundaa bo ti: «Munde wu aakanyahala nsia yi mbwe me Mwana a Mbwururu. 38 Nseghe me nsie, nsia yi mbwe me baana ba Emfumu ki Mayulu, esagha ki ebi me baana ba Nga-a-bubi. 39 Mutaara wu aakanyahala nsia a esagha ki ebi me dyabulu, otolo bimburu me masini ma nsie, ba baakatolo bimburu me bangye-yulu. (aiñ g165) 40 Mu obo, bwunu a bu baakatumunu esagha ki ebi ya otsughu kye kyehehe ku mbaa, me obo si akala ookala ku etsughu kii masini ma nsie. (aiñ g165) 41 Mwana a mbwururu sa agweghe bangye-yulu ba nde. Bo sa bapaha mu Emfumu e nde, byehene bi biikabwihi baara mu masumu, ya ba baakagyighili bubi. 42 Ya sa batsili bo kunsu mungele a mbaa, oko ku ookala bilili ya odza myini. 43 Ojo banga-a-bunsumu sa basehene ti anga tala mu Emfumu e Taara a bo. Nyaã nga-a-matswi, agyughul!» 44 «Emfumu ki Mayulu efaana ti busini bu básweghe kunsu nseghe, buulu mbwururu ámono bo, áfirisweghe bo. Mu emiini kyehehe, nde sa ayityeghe bilogho bi nde byehene ya ayaswumu nseghe oyo.» 45 «Emfumu ki Mayulu efirifaana ti munta-nkaala wu li mu okabulusagha nsia a bolo yi mbwe. 46 Bu amono lisia limō lili ntala yi alagha, nde yityeghe bye byehene bi ali a bye, ya yaswumu lisia lilo.» 47 «Emfumu ki Mayulu efaana ti likoho li batubu mu mubu li likogho banswi baba mawa-mawa. 48 Bu lilwulu, bilebe-banswi bidzuru lo mu mukogho a madza, ya baara bu babwi nsini mu mukogho, babwi osuolo banswi ba babwe ba baalo mu mankuru ya batsili ba bagwene a mupfunu. 49 Bwunu obo si ookala mu etsughu ki masini ma nsie. Bangye-yulu sa bagya, sa bakabala ba babi ya ba banga-a-bunsumu, (aiñ g165) 50 ya sa batsili ba babi ku mungele a mbaa. Oko ku ookala bilili ya odza myini.» 51 «Bunu, be liibaghala mandagha mwohonon ma?» Bo bakihi ti: «Eē.» 52 Nde ályele kundaa bo ti: «Obo me buulu, nswe muluo-mikyene wu báluo mu mi mitala Emfumu ki Mayulu, faana ti mfumu nga-a-nzo wu paha munsu nkiri-mbughu a nde, bilogho bi binyaghara ya bi bikulu.» 53 Yiiisu bu amana ota mankumu mamo, ámara ojo. 54 Bu agyi ku etsulu e nsie e ndeme, ku Nadzarete nde ábwi oluo bo mu nzo a lisamana a bomu ya bo bwohonon ba báakagyughu nde bákinjimi ya bályele ti: «Kunu oofi nde bunsughu bu ya bimaã bi? 55 Bunu, wu ka li mwana a munkomo-

manzo o? Ngughu a nde ka Mari o? Ya Dzake, Dzodzefe, Simō ya Yude ka bali bambwee ba nde o? 56 Ya bankale ba nde bwohonon ka ba bali nga kara li bihi o? Kunu-ako nde aabagha myehene mi?» 57 Bo báakakubu makya mu nkooro a nde. Yiiisu ályele kundaa bo ti: «Mubighili, ka baakagwa nde budiziri bibini byehene, lo ka mu nsie a ndeme ya mu dzumu li ndeme o.» 58 Ya oko Yiiisu ka ási bimaã bilagha o, mu kuulu bo ka báli a kana o.

14 Mu matala mamo, Erode mfumu a Ngalile, ágyughu nsia a Yiiisu, 2 ya ályele kundaa basala ba nde ti: «Munde Dzā Muboghoron aasighili nga kara li ba báпки! Ya me mu obo nde ali a lileene lili okabulusa bimaã.» 3 Mu kuulu, Erode áli agwi litumu basyimi Dzā, bakuru nde misyi ya balo nde mu boloko mu nkooro a Erodyade, mukala a Filipe, mbwee a nde. 4 Mu kuulu Dzā ákalyele kundaa nde ti: «We ka li a muswa wu ogwolo mukaha munde o!» 5 Erode ákadzyi odzwa Dzā, lo nde ákabara mpwumu a baara mu kuulu yo yikamonon ti Dzā li mubighili. 6 Lo etsughu kii kyiri ki ndibili-amweē a etsughu ki báburu Erode bu eto, mwana a Erodyade wu mukaha áyakini nga nkulu a baara ba ógwi Erode mampighi, ya Erode ámonon esee mu nde. 7 Mu obo Erode ágwi nde misiini ya álabu mukihiti ti: «Nswe elogho ki aaluomon we me, me sa ngwa we kye.» 8 Mu luo li ngughu a nde, nde ályele kundaa Erode ti: «Gwa me nga munsu ndoō mutswi a Dzā Muboghoron!» 9 Mukogho ányoō, lo mu nkooro a mukihiti wu aalaba ya mu nkooro a baara ba aagwi nde mpighi, nde ágwi litumu bayabiri nde mutswi a Dzā. 10 Erode átumu baara munsu bolokon bayikehe Dzā bolon. 11 Báyabiri mutswi a Dzā munsu ndoō ya bágwi nde kundaa mutughu, ya mutughu ágyene a nde kundaa ngughu a nde. 12 Binduonon bi Dzā bígyi, bígwolon ebyimi e nde ya bídzyighi kye. Nga mbihi ojo, bo báytwohonon nsia kundaa Yiiisu. 13 Yiiisu bu agyughu nsia oyo, nde ámara ojo mu bwara ya ágyene ngasighi ku nkolo yi gwene a baara. Lo mampwumu ma baara bu masoolon obo, mápala mu mabvulun mamo ya mánama nde mu myili. 14 Nde bu apala mu bwara, ámonon mpwumu a baara yi nene ya nde ámonon bo nyi, ya ábwi odzuhu babyele ba bo. 15 Nkonkolon bu yiton, binduonon bi Yiiisu bíyasele ku bele a nde ya bílyele kundaa nde ti: «Ebini ki eli ki e nkeē ya bwihiti ayi ku

ogyili. Bvurulu mampwumu ma baara magye mu mala mu oyiswumu bi-odza.» **16** Lo [Yiisu] ábvuhulu kundaa bye ti: «Bo ka bali a nzala a obvughuru o, ligwa bo bi-odza beme.» **17** Bye bílyele kundaa nde ti: «Bihi ki lili a kye ŋa, yini a mampa mataana ya banswi buolo.» **18** Mu obo, nde ályele kundaa binduono ti: «Ligya a me bye ŋa.» **19** Ya nde átumu mampwumu ma baara mabwa nsini ŋa yulu a nsele. Nde ágwolo mampa mataana ya banswi buolo, ákala ku yulu, áseme bye, átsyiri bye ya ágwí kundaa binduono bi nde, ya binduono bíkaba bye kundaa mampwumu ma baara. **20** Bo bwohono báli, bágyughuru. Ya bábiri bitubu kwumu ya byele bi bílwulu mu bitsulu bi bísyili. **21** Babo ba báli bye áli bakughu oto mapfwunu mataana ma babaghala, gwene otala bakaha ya baana ba basala. **22** Ya ŋaana oŋo, Yiisu ásiní binduono bi nde bisomo munsa bwara ya bitswana ku nkulu a nde ku ngulu a mubu, mu edzighi ki ákavvurulu nde mampwumu ma baara. **23** Ya bu amana obvurulu mampwumu ma baara, nde ákumu ku yulu a munguo, mu oyisamana ngasighi. ŋa ogyili bwihi, nde áli oŋo, ngasighi. **24** Bwara áli ayi la ya mukogho a mubu. Mampo ma madza ma manene mákabwa mu bo mu nkooro a efulu kii mpini ki ékagya. **25** Ku bele a ku ookya bwihi, Yiisu ágyene kundaa bo mu okabuludzyara mu yulu a mubu. **26** Binduono bu bimono nde mu okadzyara ŋa yulu a madza ma mubu, enkwughu ki enene ésuughuru mu bo ya bályele ti: «Ekye etoomo!» Ya mu nzalamweé, bo bábwí okehe bingubu. **27** ŋaana oŋo, [Yiisu] átsughu ndagha kundaa bo ti: «Likala a bukyini, wu me me, ka likala a nzalamweé o!» **28** Piere ályele kundaa nde ti: «Mfumu, kala ti wu me we, lo gwa litumu mu kuulu me ngya kundaa we mu yulu a madza.» **29** Yiisu ályele nde ti: «Gya!» Piere ásuughuru mu bwara, ábwí odzyara mu yulu a madza ya ábaana ogye kundaa Yiisu. **30** Lo bu amono efulu kii mpini, Piere ábagha nzalamweé, ya nde ábaana odzyama. Nde ákehe engubu ya ályele ti: «Mfumu, bvuwu me!» **31** Ya ŋaana oŋo, Yiisu bu alabala kwogho, ákwara nde ya ályele kundaa nde ti: «Mbwuru nga a kana li lisala, mu emakye we aasi mikeme?» **32** Ya bu basomo mu bwara, efulu édzunu. **33** Ba báli mu bwara bákunu mabuo mu nsie ŋa nkulu a nde ya bályele ti: «Mu engarŋma we li Mwana a Nzaami!» **34** Bu bapala mu ngulu a mubu, bo báto mu etsulu e nsie kii Ŋnedzarete.

35 Baara baba ebini ekye bu bagyhaba Yiisu, bátsala nsia a nde mu etsulu e nsie kyehehe, ya báyabiri babyele bwohono kundaa nde. **36** Bábuono nde mu kuulu nde anyaa bo babyeme yini a nto a enkuru e nde. Baara bwohono ba bábyeme kye bádzughu.

15 Ba-Faridzyé ya baluo-mikyene báfi ku Yerusalemé ya bágyi kundaa Yiisu, ya báfwulu kundaa nde ti: **2** «Mu emakye binduono bi we biigwene okanama ekulu ki bakwuru? Mu kuulu bo ka baakaswagha myaa mu matala mama odza o.» **3** Yiisu ábvuhulu kundaa bo ti: «Be mu emakye liigwene okanama mandagha ma ookatumu Nzaami ya be okasalala ekulu ki bakwuru ba be? **4** Mu kuulu Nzaami ályele ti: Gwa taara ya ngughu a we budziri, ya ályele si ti: Munde wu aabiili taara a nde bwunu we ngughu a nde epwolo, bafaana odzwa nde. **5** Lo be, be liikalyele ti nswe munde wu aalyele kundaa taara a nde bwunu we kundaa ngughu a nde ti: “Bibye bi kaangwa me we mu obaha we, bili ekaba ki aangwa me kundaa Nzaami”, **6** lo mbwuru wu obo, ka li a nzala a ogwa taara bwunu we ngughu a nde budziri o. Obo me bu liikakahaba be Ndagha a Nzaami mu nkooro a ekulu ki bakwuru ba be. **7** Bampibi! Mubighili Edzayi ágyighili obighili mu be ŋa ályele nde ti: **8** Ekaana ki okasyighi me yini a mu bibolo, lo mikolo mi bo mili la ya me. **9** Nsamana a bo mu me yi a bwunu, mu kuulu maluo ma bali mu okabululuo bo yini a mandagha ma ookatumu embwuru baakanama.» **10** ŋa mbihi oŋo, bu ati mpwumu a baara mbili, nde ályele kundaa bo ti: «Ligyughu ya libaghala! **11** Ka oli ki eekasomo mu muŋma eekasumunu mbwuru o, lo me mĩmye mi miikapala mu muŋma, miikasumunu mbwuru.» **12** Oŋo binduono bíyasele ku bele a Yiisu ya bílyele kundaa nde ti: «We gyahaba ti ba-Faridzyé baamono mpara mu mikolo ŋa baagyughu bo mandagha ma we mamó?» **13** Yiisu ábvuhulu kundaa bo ti: «Nswe muti wuulu ka oli Taara a me mu yulu aakunu nde o, sa batumunu nde. **14** Linyaá bo! Bo bali binkpa-mihi bi biikabulubiri bambaala [binkpa-mihi]. Kala ti enkpa-mihi eekabulubiri mbaala enkpa-mihi, bye binsa byele sa biyibwa mu dzunu.» **15** Piere ályele kundaa nde ti: «Gwa bihi mbaala a nkumu [yi].» **16** Yiisu ábvuhulu ti: «Behe si nkini ka lili a mayele ma obaghala o? **17** Bunu, be ka lisoolo o ti bye byehene bi biikasomo mu

munjma, biikasughuru mu mweē, ya baakatsili bye ku nto a nkwulu? **18** Lo mandagha ma maakapala mu munjma ku mukolo maakafa, ya me mo maakasumunu mbwuru. **19** Mu kuulu mu mukolo ookapala bitsimi bi bibi, odzwa baara, obvughu mbughu ya mukala bwunu we mulumu a nganda-mbwuru, enkwunu, pfyibi, bumpughulu bubu mpya, otsaala babake. **20** Bibye biikasumunu mbwuru! Lo odza kuulu myaā oswagha we, ka okughu osumunu mbwuru o.» **21** Ŋa nseele Yiiisu ámara oŋo, ágyene ku etsulu e nsie kii Tire ya Sidō. **22** Mukaha mutsyini wu musi kaana wu áakakala mu etsulu e nsie ekye, ágyi kundaa Yiiisu, ákakehe bingubu kundaa nde ti: «Mfumu, Mwana a Dabvide, mono me nyi! Mufulu wu mubi li mu okamwehē mwana a me wu mukaha kimini.» **23** Yiiisu ka ábvuhulu nde si ndagha mo o. Binduono bi nde býasele ya býylele kundaa nde ti: «Bvurulu mukaha wu, mu kuulu nde li mu okayakehe bingubu ŋa mbihi a bihi-a-be.» **24** Yiiisu ábvuhulu kundaa bo ti: «Yini a kundaa bindoomo bi basi Isarayele bi bídzimini baagweghe me.» **25** Lo mukaha munde ágyi, ákunu mabuo ŋa nkulu a nde ya ályele ti: «Mfumu, baha me!» **26** Yiiisu ábvuhulu ndiri: «Ka oli bubwe o mu ogwolo mampa ma baana ya otsili mo kundaa baana ba bambwa.» **27** Mukaha ályele ti: «Bwunu obo Mfumu! Lo baana ba bambwa baakadza mfi-mfihini yi aakabwa ku nsie a tablele li bamfumu ba bo.» **28** Oŋo Yiiisu ábvuhulu kundaa mukaha ti: «Mukaha, kana li we lili li linene! Nyaā okala kundaa we bwunu a bu dzyi we.» Ya mwana a nde wu mukaha ádzughu mu matala maana mamo. **29** Yiiisu bu amara oŋo, ágyene ku mukogho a mubu wu a Ngalile. Nde ákumu ku yulu a munguo ya ábwi nsini oko. **30** Mampwumu ma baara balagha mágyi kundaa nde, báybiri banga a bipfwumu, binkpa-mihi, bikara, bankini ya babyele balagha bakimi. Bo bátwulu bo ŋa myili mi nde, ya nde ádzuhu bo. **31** Baara bákiŋimi mu omono bankini mu obili, banga-a-bipfwumu mu odzughu, bikara mu odzyara, binkpa-mihi mu omono. Ya bo bákasyighi Nzaami a Isarayele. **32** Yiiisu áti binduono bi nde mbili, ya ályele kundaa bo ti: «Me ndi a nyi a mpwumu a baara yi, mu kuulu bitsughu bitere ayi bamaasa ŋa ya me, ya bo ka bali a bi-odza o. Me ka ndzyi obvurulu bo ya nzala o, mara bayibwa-kulu mu nzili.» **33** Binduono býylele kundaa nde ti:

«Kunsa syehe kunu, kunu-ako liibagha mampa ma malagha ma oogyughuru mpwumu a baara yi alagha yi?» **34** Yiiisu ályele kundaa bo ti: «Mampa kpe be lili a mo?» Bo bábvuhulu nde ti: «Nsaama, ya mana a binswi-nswi.» **35** Yiiisu átu mu mpwumu a baara yibwa nsini ŋa nsie, **36** ágwolo mampa nsaama ya banswi, bu abvuhulu matuono kundaa Nzaami, nde átsyiri mo ya ágwí mo kundaa binduono bi nde. Ya binduono bi nde bíkaba mo kundaa mampwumu ma baara. **37** Bo bwohono báli ya bágyughuru. Ya bábiri bitubu nsaama bi bilwulu mu bitsulu bi býsili. **38** Babo ba báli bye báli mapfwunu mana ma babaghala, gwene a otala bakaha ya baana ba basala. **39** Ŋa mbihi, bu abvurulu mampwumu ma baara, nde ásomo munsu bwara ya ágyene ku etsulu e nsie kii Mangandane.

16 Ba-Faridzyē ya ba-Saduseyē báýabehene kundaa Yiiisu, ya bátsihi nde. Bo báluomo nde asuo bo elyimi ki eefa ku yulu. **2** Yiiisu ábvuhulu kundaa bo ti: [«Ŋa ookadzyama tala, be liikalyele ti: “Sa okala a matala ma mabwe, buulu yulu libie.” **3** Ya mu epala be liikalyele ti: “Lolo mvulu sa anoō, mu kuulu yulu lipyini.” Be lisoolo obaghala bifa bi mayulu, lo be ka likughu obaghala bilyimi bibi matala o!]] **4** Eseene ki ebi ya kii gwene a mukama mu Nzaami ki eli mu okasagha elyimi! Ka basuo kye elyimi o, kala ti ka kii Dzonase o.» Ya nde ábulusihi bo oŋo ya ágyene. **5** Binduono bi Yiiisu bu bipala mu ngulu yinke yi mubu, bye bídzimini ogwolo mampa. **6** Yiiisu ályele kundaa bye ti: «Limono ya lisa mayele mu pfini li ba-Faridzyē ya ba-Saduseyē!» **7** Bo bábwí otsimi bomo ya bályele ti: «Ampe mu kuulu bihi ka liigwolo mampa o.» **8** Lo Yiiisu bu asoolo bitsimi bi bo, nde ályele kundaa bo ti: «Baara baba kana li lisala, mu emakye be liitsimi ti mu nkooro a bu ligwene a mampa? **9** Be nkini liibaghala o? Be limaadzimini nsimi a mampa mataana ma liikaba kundaa mapfwunu mataana ma babaghala. Ya mutala a bitubu bi liitolo? **10** Ngu okala mampa nsaama ma liikaba kundaa mapfwunu mana ma babaghala. Ya mutala a bitubu bi liitolo? **11** Bunu, be ka liibaghala o ti me ka aambili kundaa be mu nkooro a mampa o, ŋa aandyele me be ti: “Limono ya lisa mayele mu pfini li ba-Faridzyē ya ba-Saduseyē!”» **12** Oŋo bo bághala ti Yiiisu ka ákabili mu osa mayele mu pfini li mampa o, lo mu maluo ma ba-Faridzyē ya ba-Saduseyē.

13 Yīisu bu ato mu etsulu e nsie ki eli bele ya bvulu lili Sedzare lili Filipe, nde áfwulu kundaa binduono bi nde ti: «Mu mbiili a baara, Mwana a mbwuru nande ali?» 14 Bo bábvuhulu nde ti: «Mu bana ti me Dzā Muboghoru, babake ti me Eli, bakimi ti me Dzeremi bwunu we mumō ŋa kara li mibighili.» 15 Yīisu áfwulu bo ti: «Lo mu be, me nande ndi?» 16 Simō Piere ábvuhulu ti: «We li Kriste, Mwana a Nzaami wu a mweē.» 17 Mu obo, Yīisu ályele kundaa nde ti: «Esee kundaa we, Simō mwana a Dzonase, buulu ka oli musunu ya makili biisuo we ndagha oyo o, lo Taara a me wu li mu mayulu. 18 Ya mehe si me ndyele kundaa we ti: We li limeē, ya ŋa yulu a limeē li me sa ntwu Libwunu li me. Ya lileene li lipfu ka libvulu lili lo mu mpini o. (Hadēs 986) 19 Me sa ngwa we mankogholo ma Emfumu ki mayulu. Mamo ma aakuru we ŋa nsie, sa bakuru mo mu mayulu. Ya mamo ma akala aanyana we ŋa nsie, sa banyana mo mu mayulu.» 20 Mu obo nde átswi binduono bi nde mukele binyaā olyele kundaa mbwuru si mumō ti nde me Kriste. 21 Obaana mu matala mamo, Yīisu ábwi osuo epankala kundaa binduono bi nde ti: «Me mfaana okumu ku Yerusaleme ya omono mpara yi alagha ŋa myaā mi bakwuru, bakwuru ba bangaa ba nzaami ya baluo-mikyene, bafaana odzwa me, ya mu etsughu kii bitere, me sa nsighili mu lipfu.» 22 Piere ábiri Yīisu mu libee, ábwi ofyē nde ya ályele kundaa nde ti: «Mfumu, nyaā Nzaami akala we mu mimye! Pele, mandagha mamo manyaā obwa mu wel!» 23 Lo nde bu akaghala, ályele kundaa Piere ti: «Satana, mara ŋa nkulu a me! We li kya mu nzili a me, mu kuulu bitsimi bi we ka bili bitsimi bi Nzaami o, lo bili bibi baara.» 24 Ŋaana oŋo, Yīisu ályele kundaa binduono bi nde ti: «Kala ti mbwuru dzyi onama me, lo atunu nyuru a ndeme, agwolo kuruwa li nde ya anama me. 25 Mu kuulu, nswe munde wu dzyi obvwuhu laama li nde, sa apfihili lo. Lo munde wu aapfihili laama li nde mu nkooro a me, nde sa afiribagha lo. 26 Nsa ndaana mbwuru aakala a yo, kala ti nde bagha busini bu nsie nsyini ya pfihili laama li nde? Bwunu we, emakye mbwuru akughu ogwa ki eli a mupfunu mu oswumu laama li nde? 27 Mu kuulu, Mwana a mbwuru li mu ogya ya bangye-yulu ba nde kunsia nsia a Taara a nde. Ya oŋo nde sa agwa kundaa mbwuru-mbwuru bwunu a bu oli bigyighili bi nde. 28 Mu engañma me ndyele be ti: Babake ŋa kara li

ba lili ŋa, ka bakpa o nsomo bamono Mwana a mbwuru mu ogya mu Emfumu e nde.»

17 Bitsughu bisemene bu biluru, Yīisu ágwolo Piere, Dzake ya Dzā mbwee a Dzake, ya ábiri bo mu libee ku yulu a munguo wu mula. 2 Nde ákighiri ŋa nkulu a bo: Edzili e nde ébwi osehene ti tala, binkuru bi nde bípenjeme ti otsyeme. 3 Mono, Moyidze ya Eli báýamonono kundaa bo, mu okabili ya nde 4 Piere ályele kundaa Yīisu ti: «Mfumu! Oli bubwe ti bihi-a-be likala ŋa. Kala ti we dzyi, lo me ntwu bibvulu bitere ŋa, emō kii we, emō kii Moyidze, ya emō kii Eli.» 5 Nde áli nkini mu okabili, mono, edzi kii otsyeme éfughu bo, ya mono, likyi lífi kunsia edzi ya lílyele ti: «Wu me Mwana a me wu mukolo, mu nde me aankamono esee, ligyughu nde!» 6 Binduono bu bigyughu obo, bíbwi mapfumunu masu mu nsie, bye bíli a nzalamweē yi alagha. 7 Yīisu áyasele, bu aberene bo ályele ti: «Litemenel! Ka likala a nzalamweē o.» 8 Bu basiili masu ma bo, bo bámono yini a Yīisu ngasighi. 9 Ŋaala bo mu okakumunu munguo, Yīisu átswi bo mukele wu: «Ka lilyele kundaa mbwuru si mumō o, mandagha ma liimono be, tee etsughu ki oosighili Mwana a mbwuru ŋa nsa ba bákpí.» 10 Binduono bífwulu kundaa nde ti: «Mu emakye baluo-mikyene baakalyele ti Eli faana ogya nsomo?» 11 Nde ábvuhulu kundaa bo ti: «Ngañma! Eli faana ogya mu obvurulu bilogho byehene nsumu. 12 Lo me ndyele kundaa be ti Eli maagya, ya baara ka baasoolo nde o, lo baasi nde nswe mimye mi baadzyi bo. Bwunu obo si, bo sa bamwehē Mwana a mbwuru mpara.» 13 Ŋaana oŋo binduono bíbaghala ti nde mu Dzā Muboghoru ákabili kundaa bo. 14 Bu bato ŋa bele a mpwumu a baara, mbwuru mumō áyakunu mabuo ŋa nkulu a Yīisu, 15 ya ályele ti: «Mfumu, mono mwana a me wu baghala nyiī, mu kuulu nde li a ebyele ki nzyere ya li mu okamono mpara yi alagha. Emvulu-gughu nde aakabwa ku mbaa bwunu we mu madza. 16 Me aambiri nde kundaa binduono bi we, lo bye ka biileene odzuhu nde o.» 17 Yīisu ábvuhulu ti: «Aa! Esee ki egwene a kana ya ki egwuŋumu! Tee nki matala me aankuru mukolo mu be? Ligya a me nde ŋa.» 18 Yīisu áñaā mufulu wu mubi ebaghala, nde ápala mu mwana ya mu matala maana mamo, mwana ádzughu. 19 Mu obo binduono bíyasele kundaa Yīisu, bífwulu nde ŋa ebini kii bo ngasighi ti: «Mu emakye

bihi liikwono obyi mufulu wu mubi munde?» 20 Nde ábvuhulu kundaa bo ti: «Mu nkooro a kana li be li lisala. Mu enganyma me ndyele kundaa be ti, kala ti be lili a kana li linene ti liburu li muti a mutaade, be sa lilyele kundaa munguo wu ti: “Mara ŋa. Gye kunii”, ya nde sa agye. Ka oli a ndagha yi liikuono a be o.» [21 Lo yini a mu lisamana ya mu okuru nswele mu bala be likughu obyi mufulu wu obo]. 22 Etsughu nga-emō, bu babvunjunu ku Ngalile, Yiisu ályele kundaa bo ti: «Sa batyeghe Mwana a mbwuru ŋa myaā mi baara, 23 bo sa badzwa nde, ya mu etsughu kii bitere, nde sa asighili mu lipfu.» Binduono bísomo kunsá minyoō mi milagha. 24 Bu bato ku Kaperenawume, mintolo-mpagha míyasele kundaa Piere ya mífwulu kundaa nde ti: «Bunu, Muluo a be ka aakafiri mpagha a Nzo a nzaami o?» 25 Nde ábvuhulu ti: «Nde aakafiri yo.» Piere bu abvughuru ku nzo, Yiisu átswama olyele kundaa nde ti: «Simō, we bunu tsimi, mikogho mi nsie, kundaa bana miikaluomo mi bátsyiri ya mpagha? Kundaa baana ba bomo bwunu we kundaa banzyi?» 26 Piere ábvuhulu ti: «Kundaa banzyi». Yiisu ályele ti: «Mu obo, baana ka baakafiri o. 27 Mu kuulu bihi a we linyaā okala makya kundaa baara, gye yitubu ndobo mu mubu. Gwolo nswi wu a nsomo wu aalobo we, dzubulu muŋma a nde, we sa mono mupara. Gwolo nde ya gye yigwa bo nde mu nkooro a me ya we.»

18 Mu matala mamo, binduono bi Yiisu bíyasehe kundaa nde ya bifwulu nde ti: «Nande bvulu bukwuru mu Emfumu ki mayulu?» 2 Nde bu ati mwana wu asala mbili, átwulu nde ŋa kara-a-kara li bo 3 ya ályele ti: «Mu enganyma me ndyele kundaa be ti, kala ti be ka ligyiŋi mayele ya likala ti anga baana ba basala o, lo be ka lisomo mu Emfumu ki mayulu o. 4 Mu obo, nswe munde wu akughulu ti anga mana mwana wu, me munde wu bvulu bukwuru mu Emfumu ki mayulu. 5 Ya munde wu aagyagha mwana ti anga wu mu nkwumu a me, lo meme nde agyagha.» 6 «Nswe munde wu aabwihi mu lisumu, mumō mu bike-bike bi biikasa kana mu me bi, lo bubwe bakuru nde limeē li linene mu nkyighi, batsili nde ku nsie a mubu. 7 Nyiī kundaa baara ba nsie yi, mu kuulu mi miikasa ti baara bakubu makya, mili milagha! Mu enganyma, okubu makya ofaana okala, lo nyiī kundaa mbwuru wu aakasa ti

babake bakubu makya! 8 Kala ti kwogho bwunu we kwulu e we eekabwihi we mu masumu, tsyiri kye tsili, kye la ya we. Obvulu bubwe kundaa we mu osomo mu laama li enganyma ya kwogho bwunu we kwulu etsyini, ya bu kala a myaā ya myili minsa myele ya batsili we ku mbaa yi a mibvu ya mibvu. (aiōnios g166) 9 Ya kala ti lihi li we liikabwihi we mu masumu, lo sorolo lo, tsili lo la ya we. Obvulu bubwe kundaa we mu osomo mu laama lili enganyma ya lihi limō, ya bu kala a mihi minsa myele ya batsili we ku mungele a mbaa.» (Geenna g1067) 10 «Lisa mayele! Ka libele mwana si mumō mu bike-bike bi o, mu kuulu me ndyele kundaa be ti, mu mayulu, bangye-yulu ba bo baakatemele matala mwohono ŋa nkulu a Taara a me wu li mu mayulu. [11 Mu kuulu Mwana a mbwuru aagyī mu obvwuhu babo ba bádzimini.] 12 Be bunu litsimi? Kala ti mbwuru li a bindoomo nkama, ya emō mu bye egwujumu, nde ka asihi bindoomo makwumu-wa ya wa ku yulu a munguo mu oyisagha ekye ki eegwujumu o? 13 Ya kala ti nde mono kye, mu enganyma me ndyele kundaa be ti, nde sa akala a esee ki ebvulu mu kye, ya ki ali a nde mu bindoomo makwumu-wa ya wa bi biigwene ogwujumu. 14 Bwunu obo si, Taara a be wu li mu mayulu dzyi ti si mumō mu bike-bike bi ka dzimini o.» 15 «Kala ti nganda-mbwuru gyighili we ndagha yi mbi, gye yimono nde ya syeme nde ŋa o be buolo. Kala ti nde gyughu we, lo we aafiribagha nde. 16 Lo, kala ti nde ka gyughu we o, gwolo mbwuru mumō bwunu we baara buolo bakimi bakala ya we, mu kuulu ligyighili ndagha oyo ŋa nkulu a bampughulu buolo bwunu we batere. 17 Kala ti nde bihi ogyughu bo, lo lyele ndagha oyo ŋa nkulu a emvujunu e nzaami. Ya kala ti nde bihi ogyughu emvujunu e nzaami, lo nyaā nde akala kundaa we ti anga mbwuru wu aagwene okasa kana mu Nzaami, bwunu we muntolo-mpagha.» 18 «Mu enganyma, me ndyele kundaa be ti: Nswe ndagha yi akala liikuru be ŋa nsie sa bakuru yo mu mayulu, ya nswe ndagha yi akala liinyana be ŋa nsie, sa banyana yo mu mayulu.» 19 Me firindyele be ti: «Kala ti baara buolo ŋa kara li be bagwihini ŋa nsie mu oluomo ndagha nswe ndagha mu lisamana, lo Taara a me wu li mu mayulu sa agyighili bo yo. 20 Mu kuulu, oŋo ŋa oobvujunu baara buolo bwunu we batere mu nkwumu a me, me ndi ŋa kara li bo.» 21 Oŋo, Piere áyasele ŋa ndaa Yiisu ya áfwulu nde ti: «Mfum! Mansa kpe

me mfaana osa nganda-mbwuru kolokolo, kala ti nde gyighili me ndagha yi mbi? Tee mansa nsaama?» 22 Yiiisu ábvuhulu kundaa nde ti: «Me ka ndeyele kundaa we ti tee mansa nsaama o, lo tee mansa makwumu nsaama mbala nsaama. 23 Me mu obo Emfumu ki mayulu efaana ti bu: Mukogho mutsyini ádzzi ti basala ba nde basuo nde bu basalala bo nzi a nde. 24 Mu obaana, báyabiri kundaa nde munde wu áli a ebyimi ya nde kii mafwunu mwolo ma mipara. 25 Buulu nde ka áli a nzi yi ofiri ebyimi ekye o, mfumu a nde ágwi litumu batyeghe nde, mukala a nde, baana ba nde ya bilogho bi nde byehene, mu kuulu bafiri ebyimi e nde. 26 Mu obo, musala ábwi ŋa nsie a myili mi mfumu a nde, ákunu mabuo ŋa nsie ya ályele ti: “Makuru mukolo a we mu okebe, ya sa me mfiri ebyimi e we kyehene.” 27 Mfumu bu ámono musala a nde nyii, nde ányaghala ebyimi e nde, ya ányaá nde agye. 28 Musala munde bu apala, ábwana a mumō mu banganda ba nde baba esala wu áli a ebyimi ya nde kii nkama a mipara mimi bisyeē. Nde ábwirili nde, ápyere nde ŋa bolo, ya ályele kundaa nde ti: “Firi ebyimi ki ásuomo we kundaa me.” 29 Nganda a nde ákunu mabuo ŋa nsie ŋa nkulu a nde, ya ábuono nde ti: “Makuru mukolo a we mu okebe, ya me sa mfiri ebyimi e we kyehene.” 30 Lo wu muke ábihi, nde ágyene áyilo nde mu boloko tee mu matala ma áfiri nde ebyimi ekye. 31 Basala babake bu bamono mi míluru, basomo kunsá minyoō mi milagha ya báytwoho myehene mi míluru kundaa mfumu a bo. 32 Mu obo, mfumu áti nde mbili ya ályele kundaa nde ti: “We li musala wu mubi! Me aanyaghala ebyimi e we kyehene mu nkooro a bu aabuono we me. 33 Wehe si, we áli faana omono nganda a we nyii ti bu aamono me we nyii.” 34 Ya mu nkehe, mfumu ágweghe nde mu oyisala engaama tee ŋa aamana nde ebyimi kyehene ofiri». 35 Yiiisu áfiribwehe ndiri: «Bwunu obo si Taara a me wu li mu mayulu akala aasa mu be, kala ti mbwuru-mbwuru mu be ka si nganda kolokolo mu mukolo a nde mumō o.»

19 Yiiisu bu amana ogwa maluo mamō, nde ámara ku Ngálege, ya ágyene ku etsulu e nsie kii Yude, ku ngulu a mwele wu a Dzurdē. 2 Mampwumu ma baara mánama nde, ya oko nde ádzuhu babyele balagha. 3 Ba-Faridzyē báyasele kundaa Yiiisu mu otsihi nde. Bo báfwulu nde

ti: «Mu mikiyene mi bihi-a-be, mbwuru li a muswa mu obyí mukala a nde mu nswe ebili?» 4 Yiiisu ábvuhulu kundaa bo ti: «Be nkini lítala mandagha ma básono mu mukaana a Nzaami o ti: “Mu ebaana, Mugyighili ámyene bo baghala ya mukaha?” 5 Ya Nzaami ályele ti: “Me mu obo, baghala faana osihi nzo a taara ya ngughu a nde mu oyikala emō ya mukala a nde, ya bo bansa buolo sa bakala mbwuru mumō”. 6 Mu obo, bo ka bafirikala baara buolo o, lo bo ayi mbwuru mumō. Nyaá mbwuru ka kabala ba óbvughu Nzaami o!» 7 Ba-Faridzyē báfwulu nde ti: «Mu emakye Moyidze ágwi baghala muswa wu ogwa mukala a nde mukaana wu odzwa mabala, ŋa ali mu okabyi nde?» 8 Yiiisu ábvuhulu kundaa bo ti: «Mu nkooro a mikolo mi be mi mikubu Moyidze ágwi be muswa mu obyí bakala ba be. Lo ku ebaana, ka óli obo o. 9 Lo me ndeyele kundaa be ti: Nswe munde wu aabyi mukala a nde, kala ti ka oli mu enkwunu o, ya nde kye mukaha mukimi, lo nde bukala asi.» 10 Binduono [bi nde] bílyele kundaa nde ti: «Kala ti leme me lilo mulumu afaana okala a lo ŋa nkulu a mukala a nde, lo ka oli mupfunu mu okye o.» 11 Yiiisu ábvuhulu kundaa bo ti: «Ka oli baara bwohonó baabaghala maluo [ma o]. Lo yini a babo ba ógwi Nzaami muswa mu obaghala mo. 12 Baara bana ka bakye o, mu kuulu bo bali bamfi obaana emburu-ngughu. Ba bake, bákala bamfi mu ku bágwogholo bo. Ba bake si bákala bamfi mu nkooro a Emfumu ki mayulu. Nyaá wu kughu obaghala, abaghala!» 13 Baara báyabiri bike-bike kundaa Yiiisu, kuulu nde anaá bye myaá ya asamana mu nkooro a bye. Lo binduono bísyeme baara babo. 14 Mu obo, Yiiisu ályele ti: «Linyaá bike-bike bigya, ka likahaba bye mu ogya kundaa me o, mu kuulu Emfumu ki mayulu eli kii ba bali ti anga bye.» 15 Ya bu amana onaá bye myaá, nde ámara ŋa ebini ekye. 16 Ya mono, baghala mutsyini áyasele kundaa Yiiisu, ya ályele nde ti: «Muluo, emakye ki ebwe me mfaana osa mu obagha laama lili mibvu ya mibvu?» (aiōnios g166) 17 Yiiisu ályele kundaa nde ti: «Mu emakye we li mu ogwa me efwulu mu mi mibwe? Yini a mumō li mubwe. Kala ti we dzyi osomo mu laama lili mibvu ya mibvu, kebe mikiyene.» 18 Baghala munde áfwulu kundaa Yiiisu ti: «Nki mikiyene?» Yiiisu ábvuhulu nde ti: «Ka dzwa o, ka bvughu mbughu ya mukala bwunu we mulumu a nganda-mbwuru o, ka kala mpughulu wu a mpya o, ka turu o, 19 gwa taara

a we ya ngughu a we budziri, ya Dzyi nganda-mbwuru ti anga weme.» **20** Mumpala munde ályele kundaa nde ti: «Mye myehene minye me aakansalala mye. Emakye me nkughu ofirisa?» **21** Yiisu ályele kundaa nde ti: «Kala ti we dzyi okala mukughu, lo gye, tyeghe bi li a we ya gwa nzi kundaa bawele, ya we sa bagha busini mu mayulu. Ija mbihi oyo, gya, nama me!» **22** Lo, mumpala munde bu agyughu ndagha oyo, ágyene kunsá minyoõ, mu kuulu nde áli a busini bulagha. **23** Yiisu ályele kundaa binduono bi nde ti: «Mu enganyma me ndyele yo kundaa be, oli mpara kundaa esini mu osomo mu Emfumu ki mayulu. **24** Me firindyele kundaa be ti, ka oli a mpara o kundaa nyama wu baakata Syamo mu oluru mu kuhu li nyoõ, lo obvulu a mpara kundaa esini mu osomo mu Emfumu e Nzaami.» **25** Binduono bi Yiisu bu bigyughu ndagha oyo, bíkijimi ku olagha ya bílyele ti: «Lo nande kughu obvwughu?» **26** Yiisu bu atala kundaa bo, ályele ti: «Kundaa baara, ka okughu okala o, lo kundaa Nzaami myehene mikughu okala.» **27** Mu obo, Piere ályele kundaa Yiisu ti: «Mono, bihi liisihí byehene mu onama we. Bunu ookala kundaa bihi?» **28** Yiisu ábvuhulu kundaa bo ti: «Mu enganyma, me ndyele kundaa be ti, mu matala ma obwa Mwana a mbwuru nsini Ija likubu li nde lili nsia mu nsie yi nyaghara, be ba liinama me, behe si sa libwa nsini Ija makubu kwumu ya mwolo mu osa madzumu kwumu ya mwolo mama Isarayeleye muyala. **29** Ya nswé munde wu aasihí manzo, bankele ba nde ba babaghala ya ba bakaha, taara, ngughu, baana, bwunu we manseghe mu nkooro a nkwwu a me, lo nde sa abagha bye ku obvulu mansa nkama, ya sa abagha pfa lili laama lili mibvu ya mibvu. (aiõnios g166) **30** Balagha ba bali ba bansomo mu matala ma, sa bakala binsiele-mbihi, ya balagha ba bali binsiele-mbihi sa bakala ba bansomo.»

20 «Emfumu ki mayulu eli ti anga mfumu a nzo wu pala mu epala-epala, mu kuulu agwolo basala ba baayisala mu nseghe a nde yi a bviini. **2** Nde ágwihiini ya basala babo mu ofiri bo mupara mumõ mu etsughu, ya nde ágweghe bo ku nseghe a nde yi a bviini. **3** Mu tala lili wa, nde bu afiripala mu nzo, ámono baara bakimi ba bátemene Ija ebini emõ gwene a ki baasa. **4** Nde ályele kundaa bo ti: “Behe si ligye ku nseghe a me yi a bviini, ya me sa ngwa be mufuru wu a

kughu.” **5** Bo bágyene. Ya nde bu afiripala mu tala lili embehe, ya mu lili kwumu ya mataana, nde ási bwunu obo. **6** Ku bele a tala lili kwumu ya nsaama, nde bu afiripala, ámono babake bátemene oyo ya nde ályele kundaa bo ti: “Mu emakye be liitemene Ija bwihi butsyini, ku ogwene a elogho osa?” **7** Bo bábvuhulu kundaa nde ti: “Mu kuulu ka oli a mbwuru wu aagwolo bihi mu osala o.” Nde ályele kundaa bo ti: “Behe si ligye ku nseghe a me yi a bviini.” **8** Nkonkolo bu yito, nga-a-nseghe a bviini ályele kundaa wu aakatumu basala ba nde ti: “Ta basala mbili, ya gwa bo mufuru a bo, obaana mu ba aangwolo me nseele ya mana mu baba nsomo.” **9** Baba tala lili kwumu ya nsaama bágyi, ya mbwuru-mbwuru ábagha mupara mumõ-mumõ. **10** Ija masini, ba bansomo bágyi, ya bo bákatsimi ti bo sa babagha mufuru wu bvulu, lo boho si bábagha mupara mumõ-mumõ mu mbwuru. **11** Bu bagyagha mufuru, bo bábwí onjununu mu nga-a-nzo. **12** Bo bályele ti: “Baba nsiele ba baasala yini a tala limõ, lo we ofuru bo mutala mumõ ya bihi ba liimono mpara mu osala bwihi bu mpwugu kunsá kyanjana kii mpini!” **13** Nga-a-nseghe ábvuhulu kundaa mumõ mu bo ti: “Ndughu a me, me ka ndi a epfwumu kundaa we o, bihi a we ka liigwihini mu mupara mumõ o? **14** Gwolo mufuru a we ya mara Ija. Me ndzyi ogwa kundaa wu aagyí nsiele wu ti bu aangwi me we. **15** Me ka ndi a muswa wu ogyighili mi ndzyi mu nzi a me o? Bunu, we mukolo mubi mu kuulu me ndi mbwuru wu mubwe?” **16** Mu obo, baba nsiele sa bakala baba nsomo, ya baba nsomo sa bakala baba nsiele.» **17** Mu matala ma ókagye Yiisu ku Yerusaleme, mu nzili nde ábiri [binduono] kwumu ya byele mu libee, ya ályele kundaa bo ti: **18** «Mono! Bihi-a-be lili mu okakumu ku Yerusaleme, ya sa bagwa Mwana a mbwuru Ija myaã mi bakwuru ba bangaa ba nzaami ya baluo-mikyene. Bo sa bagwolo mukakana wu odzwa nde, **19** ya sa bagwa nde Ija myaã mi baala ka bali ba-Dzwife o. Bo sa basa nde munsensehẽ, bakaha nde nswa-nswa, bakomo nde Ija kuruwa, ya mu etsughu kii bitere, nde sa asighili mu lipfu.» **20** Ijaana oyo, ngughu a baana ba Nzebede ásele kundaa Yiisu ya baana ba nde ba babaghala. Ya nde ákunu mabuo mu nsie mu oluomo ndagha mõ kundaa nde. **21** Yiisu áfwulu nde ti: «We emakye dzyi?» Nde ábvuhulu kundaa Yiisu ti: «Sa kuulu ti, Ija aakala we mukogho, baana

ba me buolo ba babwa nsini ya we, mumō ku ngo-kwogho, ya wu muke ku engbambogho.»

22 Yiisu ábvuhulu ti: «Be ka lisoolo mi lili mu okaluomo be o. Bunu, be likughu oṁma ebaha kii kimini ki aṁma me?» Bo ábvuhulu kundaa nde ndiri: «Bihi likughu.»

23 Yiisu ályele kundaa bo ti: «Ebaha e me, be sa liṁma kye. Lo mu mi mitala obwa nsini ku ngo-kwogho e me ya ku engbambogho e me, me ka ndi a litumu lilo o, bibini bibye bili bibi babo ba ogyighili Taara a me bye.»

24 Binduono kwumu bibike bu bigyughu obo, ka bámono esee mu naana ya mbwee o.

25 Yiisu áti bo mbili ya ályele kundaa bo ti: «Be lisoolo ti bitumu bi mansie biikamwehē baara mpara mu litumu li bo, ya baara baba mupfunu baakasuo leme li emfumu e bo ṁa yulu a babake.

26 Ka ofaana okala obo ṁa kara li be o. Lo, munde wu dzyi okala mukwuru ṁa kara li be, nyaā nde akala esala e be.

27 Ya kala ti mbwuru mu be dzyi okala wu a nsomo, nyaā nde akala nkana a be.

28 Me mu obo Mwana a mbwuru ka agyi mu kuulu baara basalala nde o, lo mu osalala ya ogwa laama li nde mu ofiri ekolo mu baara balagha.»

29 Yiisu ya binduono bi nde bu bakapala mu bvulu lili Dzeriko mpwumu a baara yi nene yíluono nde.

30 Ya, binkpa-mihi byelee bíbwi nsini mu mukogho a nzili. Bo bu bagyughu ti Yiisu li mu okaluru, bábwí okehe bingubu: «Mfumu, Mwana a Dabvide, mono bihi nyií!»

31 Mpwumu a baara yífyēē bo mu ebaghala mu kuulu bo bakala pii. Lo bo ábvulu ofirikakehe bingubu mu mpini: «Mfumu, Mwana a Dabvide, mono bihi nyií!»

32 Yiisu bu atemene, áti bo mbili ya ályele kundaa bo ti: «Emakye be lidzyi ti me nsa mu be?»

33 Bo ábvuhulu nde ti: «Mfumu, nyaā we dzubulu bihi mihi!»

34 Yiisu ámono bo nyií, áberene a mihi mi bo, ya ṁaana oṁo, bo bábwí omono ya bánama nde.

21 Bu bayabehene ya Yerusaleme ya bato ṁa Betefadze, ṁa bele a Munguo wu a mi-Olibve, Yiisu ágweghe binduono byelee.

2 Nde ályele kundaa bo ti: «Ligye ku bula bu buli ṁa nkulu a be, ya oṁo, be sa limono eburu e aane ki baakuru ya mwana a nde. Linyana ya liyabiri me bye.

3 Ya kala ti mbwuru lyele be ndagha, be libvuhulu kundaa nde ti: “Mfumu li a nzala a bye.” Ya nde sa anyaā bye bigye.»

4 Mandagha ma mábwí mu kuulu mi ólyele mubighili mitswighi: **5** «Lilyele kundaa mutughu

wu a Siyō ti: Mono mukogho a we li mu ogya kundaa we, nga-a-edzuunu, ya nde aakumu ṁa yulu a eburu e aane, ṁa yulu a pulu li aane, mwana a nyama wu akabiri bi biri.»

6 Binduono bígyene ya bísi bwunu a bu ótumu bo Yiisu.

7 Bo bágyene a eburu e aane ya pulu li aane, bátwulu ṁa yulu a biko bi bo, ya Yiisu ábwí nsini ṁa yulu a nde.

8 Mpwumu a baara yi alagha yikagya binkuru mu nzili, baara babake bátsyiri matsyiri ma miti ya bágyala mo mu nzili.

9 Mampwumu ma máli ku nkulu ya ma máli ku mbihi a nde mákabulubiili bingubu: «Odzaana kundaa Mwana a Dabvide! Liseme kundaa munde wu li mu ogya mu nkwumu a Mfumu! Odzaana mu bibini bi bili ku nkara a yulu!»

10 Yiisu bu asomo mu Yerusaleme, bvulu lwohonon línyni ya baara bákalyele ti: «Wu nande?»

11 Mampwumu mákabvuhulu ti: «Wu me Yiisu, mubighili wu a ku Nadzarete, mu Ngaliile.»

12 Yiisu bu asomo mu nzo a Nzaami, nde ábyi bo bwohonon ba bákatyeghe ya ba bákaswumu munsá nzo a Nzaami, átsili batabele ba baakasobo nzi ya bipehe bi minta-nkaala a mabeeme ku mbala.

13 Ya nde ályele kundaa bo ti: «Básonon ti: “Nzon a me sa bata yon nzon yi a lisamana”. Lo be liikirili yon ngala a bantwumu!»

14 Binkpa-mihi ya banga-a-bipfwumu báyasele kundaa nde munsá nzo a Nzaami, ya nde ádzuhu bo.

15 Bakwuru ba bangaa ba nzaami ya baluo-mikyene ka bámonon esee o, bu bamonon mandagha mama okinjimi ma ókagyighili Yiisu, ya bike-bike bi bíkabili bingubu munsá Nzon a nzaami ti: «Odzana kundaa Mwana a Dabvide!»

16 Bo bályele kundaa nde ti: «Bunu, we li mu ogyughu bu bali mu okalyele bo?» Yiisu ábvuhulu kundaa bo ti: «Eē! Bunu, be nkini ka lítala o ti: “We ási kuulu ti miṁma mi mana bike-bike ya mimi ba bali mu okajma mabyene, miwa we masyighi?”»

17 Ya bu abulusihi bo oṁo, nde ápala mu bvulu ya ágyene ku Betani, ku áluhu nde mpyibi.

18 Mu minkya-nkya, Yiisu bu akayabvughuru ku bvulu, nzala yifuru nde.

19 Yiisu bu ataala mufinge mu mukogho a nzili, áyabehene ya nde, lo nde ka ámonon elogho o, yini a matsyiri. Nde ályele kundaa nde ti: «Si okala ka bunu, we ka kughu ofiriburu bimburu o!» Ya mufinge ásaakee. (aíōn g165)

20 Binduono bu bimono obo, bikiñimi ya bílyele ti: «Bunu-abo mufinge aasaakee?»

21 Yiisu ályele kundaa bo ti: «Mu engajma me ndyele kundaa be ti, kala ti be lili a kana ya ka lisi mikeme o, be ka

ligyighili yini a mi nsi me mu mufinge o, lo be lilyele kundaa munguo wu ti: “Mara oyo ya yibwa mu mubu”, lo sa okala obo. **22** Nswe ki akala liiluomo be mu lisamana, bu lisi kana, be sa libagha kye.» **23** Yiisu ásomo mu nzo a Nzaami. Mu matala ma ákaluo nde, bakwuru ba bangaa ba nzaami ya bakwuru ba ba-Dzwife báyasele ya bályele kundaa nde ti: «Mu nsa litumu we li mu okabulugyighili mamo? Ya na aagwi we litumu lilo?» **24** Yiisu ábvuhulu kundaa bo ti: «Mehe si ndi a efwulu, yini a emō ki aangwa me be, kala ti be ligwi me mvuru, mehe si sa ndyele kundaa be munsa litumu me ndi mu okabulugyighili mamo. **25** “Nande áagweghe Dzā mu obogho baara? Nzaami bwunu we baara?” Bo báfuhunu bo-a-bo ndiri: Kala lilyele ti: “Nzaami”, nde sa alyele kundaa bihi-a-be ti: “Bu mu emakye be liigwene okasa kana mu nde?” **26** Ya limana olyele ti: “Baara”, bihi-a-be lifaana osa mayele mu mpwumu a baara, mu kuulu baara bwohono baakagwolo Dzā ti mubighili.» **27** Mu obo, bo bábvuhulu kundaa Yiisu ti: «Bihi ka lisoolo.» Ya ndehe si ályele kundaa bo ti: «Mehe si ka andyele be munsa litumu me ndi mu okabulugyighili mamo o.» **28** Yiisu áfirilyele ti: «Be bunu litsimi mu ndagha yi? Baghala mumō áli a baana buolo. Bu ayasele kundaa wu a nsomo, ályele kundaa nde ti: “Mwana me, gye yisala lolo ku nseghe a bviini.” **29** Mwana ábvuhulu kundaa nde ti: “Me ka ndzyi o”. Ya mana matala bu maluru, mwana áso bo bitsimi ya ágyene ku nseghe a bviini. **30** Nde bu ayasele kundaa wu a buolo, ályele kundaa nde bwunu obo. Mwana ábvuhulu kundaa nde ti: “Mfumu, me ndi mu ogye”. Lo, ka ágyene o. **31** Mu bo buolo nande aasi waa li taara a nde?» Bo bábvuhulu ndiri: «Wu a nsomo». Yiisu ályele kundaa bo ti: «Mu engan̄ma, me ndyele kundaa be ti, mintolo-mpagha ya bakaha banga-a-enkwunu sa batwama nkulu ya be mu Emfumu e Nzaami. **32** Buulu Dzā ali aagyi kundaa be mu nzili yi a bunsumu, ya be ka liisi kana mu nde o, lo mintolo-mpagha ya bakaha banga-a-enkwunu baasi kana mu nde. Ya ku nkulu, be bu limono obo, be ka liigyinj̄i mayele o mu osa kana mu nde.» **33** «Ligyughu nkumu yinke. Óli a nga-a-nzo wu ákunu nseghe a bviini. Nde ási yo ekagha, átsimi dzunu li baakakamana mala ya átwu nzo yi mutele wu mula. Ya ŋa mbihi, nde ágwihini ya binkamana bi bviini bikasalala o bo yo, ya nde ágyene midzye.»

34 Matala mama otolo bimburu bu mato, nde ágweghe basala ba nde kundaa binkamana bi bviini mu ogwolo kaba lili ndaa nde. **35** Lo binkamana bi bviini bfbwirili basala ba nde, mumō bákaha nde nswa-nswa, wunu bádzwi nde, wu muke bádzwi nde mu mameē. **36** Nde áfirigweghe basala babake ba babvulu olagha ya baba nsomo, ya bágyighili bumō kundaa bo si. **37** Ŋa masini, nde ágweghe bo mwana a nde, ya ályele ti: «Bo sa bagwa mwana a me budziri.» **38** Lo binkamana bi bviini bu bimono mwana, bfbili bo-a-bo ti: «Wu me wu aagwolo pfa li taara a nde! Ligya, litswe lidzwa nde ya ligwolo pfa li nde.» **39** Bu babwirili nde, bátsili nde ku mbala a nseghe a bviini ya bádzwi nde. **40** Obo me buulu, ŋa akala oogya mfumu a nseghe a bviini, nde bunu aasa mu binkamana bi bviini bi? **41** Bo bábvuhulu kundaa nde ti: «Nde sa adzwa ba babi babo ku ogwene a nyi, ya nde sa agwihini ya binkamana bi bviini bikimi bikasalala o bo yo, bi akala bikagwa nde bimburu mu matala ma bye.» **42** Ya Yiisu ályele kundaa bo ti: «Bunu, be nkini ka lítala mi básono o: “Limeē li ootsili ba baakatwu, me lo ayi lili li linsomo ŋa ŋa mihi mi bihi, yili ndagha yi okinjimi!”» **43** «Me mu obo me ndyele kundaa be ti: Emfumu e Nzaami, sa bamaha be kye, mu ogwa kye kundaa ekaana ekimi ki eeburu bimburu mu kye. **44** [Nswa munde wu akala aabwa ŋa yulu a limeē li sa atsajama, ya nswe munde wu liibwirili lo, sa apweē.]» **45** Bakwuru ba bangaa ba nzaami ya ba-Faridzyē bu bagyughu mankumu mamo, bábaghala ti Yiisu me mu bo ákabili. **46** Bo bákasagha bunu baasyimi nde, lo bábara nzalamweē a mampwumu ma baara, mu kuulu mo mákagwolo Yiisu ti mubighili.

22 Yiisu áfiribili kundaa bo mu mankumu, ya ályele ti: **2** «Emfumu ki mayulu efaana ya mukogho mutsyini wu áagyighili kyiri ki mabala ma mwana a nde. **3** Nde ágweghe basala ba nde mu oyita ba bágwi mpighi a kyiri kii mabala mbili, lo bo ka bádzyi ogya o. **4** Nde áfirigweghe basala bakimi ya ályele bo mu otuoho mukyene wu kundaa ba bágwi mpighi: “Mu matala ma, baamana onaā bi-odza, baadzwi bangoomo ya bibuolo bi me bibi maala, byehene biikughu, ligya ku odza!” **5** Lo babo ba bágwi mpighi, bágyene obo ku ogwene okihi mbili, mumō ku manseghe ma ndeme, wu muke ku nkaala a

nde, 6 bana bu babwirili basala ba nde, bátughu bo ya bádzwí bo. 7 Mukogho ákolo nkehe. Nde ágweghe bambumbulu ba nde mu oyidzwa babo ba baadzwi basala ba nde ya otsughu bvulu li bo mbaa. 8 Ŋa nseele, nde ályele kundaa basala ba nde ti: “Byehene bibi kyiri kii mabala biikughu, lo ba baagwi mpighi ka baakakala ba bafaana o. 9 Ligye mu mapfulu, ya lita baara bwohono ba liimono be mbili bagya ku kyiri.” 10 Basala ba nde bápala, bágyene mu manzili ya bábvughu baara bwohono ba bámono bo, ba babi ya ba babwe. Mbala a kyiri yífwulu mu baara. 11 Mukogho bu agyi mu okabulutala ba baagyi ku kyiri, nde ámono mbwuru wuulu ka álahá enkuru kii kyiri o. 12 Nde áfwulu kundaa nde ti: “Ndughu a me, we bunu aasi mu osomo mu kuu ogwene a enkuru kii kyiri?” Lo mbwuru munde ka ábvuhulu nde ndagha o. 13 Mu obo mukogho ályele kundaa basala ba nde ti: “Likuru nde misyi mu myili ya mu myaá, litsili nde ku mbaala ku oli mpyibi, oko ku ookala bilili ya odza myini.” 14 Baara balagha báti mbili, lo ba básuolo bali ndaama.» 15 Mu obo, ba-Faridzyé báykuru mfwunu bunu baaleghebe Yiisu mwere mu mi aabili nde. 16 Ŋa mbihi bo bágweghe kundaa nde binduono bi bo, emō ya baara baba emvūjunu ki Erode mu olyele ti: «Muluo, bihi ligyahaba ti we nga a engajma ya ti we li mu okabululuo baara nzili a Nzaami mu engajma, ku ogwene a obara mbwuru, mu kuulu we ka aakatala baara mu bidzili o. 17 Lo lyele bihi, we bunu tsimi mu ndagha yi: Oli a muswa mu ofiri mpagha kundaa Sedzare bwunu we pele?» 18 Lo Yiisu bu asoolo bitsimi bi bo bi bibi, ályele kundaa bo ndiri: «Bampibi! Mu emakye be lidzyi otsihi me? 19 Lisuo me mupara wu baakafiri mpagha.» Bo básuo nde denye mumō. 20 Nde áfwulu kundaa bo ti: «Edzili ki ya bisono bi bibi na?» 21 Bo bábvuhulu kundaa nde ti: «Bibi ndaa Sedzare.» Mu obo, nde ályele kundaa bo ti: «Libvurulu bibi Sedzare kundaa Sedzare, ya bibi Nzaami kundaa Nzaami.» 22 Bo, bu bagyughu mandagha mamō, bákijimi, bábulusihi nde ya bágyene. 23 Mu etsughu ekye, ba-Saduseyē ba baakalyele ti osighili mu lipfu ka oli o, báyabehene ku bele a Yiisu ya bo báfswulu nde ti: 24 «Muluo, Moyidze ályele ti: “Kala ti baghala kpi ku ogwene oburu baana, mbwee a nde sa akie mupfiili, mu oburu nde baana”. 25 Ku bula bu bihi óli a baana nsaama ba baghala baba taara mumō. Wu a nsomo, kie

mukala, kpi ku ogwene a baana, ya sihi mukala a nde kundaa mbwee wu aanama nde. 26 Bumō si kundaa wu a buolo, kundaa wu batere ya tee mu bo bwohono nsaama. 27 Ŋa nseele, ŋa mbihi a bo bwohono, mukaha kpi. 28 Lo ŋa akala oosighili baara mu lipfu, nde mukala a na aakala, buulu bo bansa nsaama áli balumu ba nde?» 29 Yiisu ábvuhulu kundaa bo ti: «Be liigwujumu, mu kuulu ngu okala Bisono, ngu okala lileene li Nzaami, be ka lisoolo bye o. 30 Ŋa akala oosighili baara mu lipfu, ka okala a balumu o, bwunu we bakala o, lo bo sa bakala ti anga bangye-yulu mu yulu. 31 Ya, mu mi mitala osighili o ba bákpi, be ka lítala ndagha yi ólyele be Nzaami o ti: 32 “Me ndi Nzaami a Abarahame, Nzaami a Idzake, ya Nzaami a Dzakobe?” Nde ka li Nzaami a ba bákpi o, lo nde li Nzaami a baba mweē.» 33 Mampwumu ma baara mákijimi ŋa mágyughu mo maluo ma nde. 34 Ba-Faridzyé bu bagyughu ti Yiisu aakuru mījma mi ba-Saduseyē, bo bábvūjunu ŋa ebini kyini ekye. 35 Ya mumō mu bo, muluo-mikyene bu adzyi otsihi Yiisu, áfwulu nde ti: 36 «Muluo, nsa mukyene bvulu bunene mu Mikyene?» 37 Yiisu ályele kundaa nde ti: «“Dzyi Mfumu Nzaami a we mu mukolo a we wohono, mu mugwumu a we wohono ya mu mayele ma we mwohono”. 38 Munde me mukyene wu bvulu bunene ya wu a nsomo. 39 Wu a myele wu a faana a nde me wu: “Dzyi nganda-mbwuru a we ti budzyi weme”. 40 Mikyene myehene ya mibighili mili kunsá mikyene myele mi.» 41 Buulu ba-Faridzyé áli bábvūjunu, Yiisu áfwulu kundaa bo ti: 42 «Etsimi e be bunu eli mu nkooro a Kriste? Nde mwana a na ali?» Bo bábvuhulu kundaa nde ti: «Wu a Dabvide.» 43 Nde ályele kundaa bo ti: «Lo bunu-a-bo, mu Mufulu, Dabvide áti nde “Mfumu”, ŋa ályele ti: 44 Mfumu aalyele kundaa Mfumu a me ti: Bwa nsini ŋa kwogho e me kii babaghala tee ŋa aantwulu me mitaara mi we ŋa nsie a myili mi we? 45 Kala ti Dabvide li mu ota nde “Mfumu”, lo bunu nde akughu ofirikala mwana a nde?» 46 Mbwuru si mumō ka ákughu ogwa Yiisu mvuru mu ndagha nsyini o. Ya obaana etsughu ekye, ka oli a mbwuru wu áafirikabagha bukyini mu ogwa nde bifwulu o.

23 Mu obo Yiisu ábili kundaa mampwumu ma baara ya kundaa binduono bi nde ti: 2 «Esala ki Baluo-mikyene ya ba-Faridzyé me mu okabaala Mikyene mi Moyidze. 3 Be,

liikagyighili ya liikakebe mandagha mwohonon ma baakalyele bo be, lo ka likanama bigyighili bi bo o, mu kuulu bo baakabili, lo ka baakagyighili mi baakabili o. **4** Bo baakakuru matsulu [mama leme ya mpara mu obiri] ya baakanaa mo nga yulu a bisaŋama bi baara. Lo bomo, ka baakaberene a mo mu mulyeme o. **5** Bigyighili bi bo byehene bili mu nzala a omorono nga mihi mi baara. Bo baakagyighili mipa mi minene mu baŋono mandagha ma Nzaami mi baakalaha nga yulu a mbwi bwunu we nga kwogho mu matala ma baakasamana bo, ya baakalabala manto ma binkuru bi bo. **6** Bo badzyi bibini bi binsomo mu byiri bibi odza ya bibini bi binsomo mu manzo ma lisamana ma ba-Dzwife. **7** Ya bo badzyi ti bakagwa bo mamboro mu bibini bibi baara bwohonon, ya badzyi ti baara bakata bo Muluo. **8** Lo be, banyaā okata be Muluo, mu kuulu be lili a Muluo yini a mumō, ya be bwohonon lili bakulu ya bambwee. **9** Ka likata mbwuru si mumō “Taara” a be nga nsie o. Mu kuulu be lili a nde yini a mumō, Taara wu li ku yulu. **10** Banyaā si okata be “Mugyihi wu munene”, mu kuulu be lili a mugyihi yini a mumō, ngu Kriste. **11** Wu bvulu bukwuru nga kara li be akala musala a be. **12** Munde wu aakumu sa basurulu nde, ya munde wu aasughuru sa bakhuhubu nde.» **13** «Nyiī kundaa be Baluo-mikyene ya ba-Faridzyē! Be lili bampibi, mu kuulu be liikakahaba baara osomo mu Emfumu ki mayulu. Beme ka liikasomo omo o, ya be ka liikagwa baara ba badzyi osomo omo nzili o!» [**14** Nyiī kundaa be Baluo-mikyene ya ba-Faridzyē! Be lili bampibi, mu kuulu be liikagwolo busini bwohonon bubu bapfiili baba bakaha ya be liikasa nsamana yi nda mu kuulu baara bamono be. Me mu obo, Nzaami sa alamana be mu nkehe.] **15** Nyiī kundaa be Baluo-mikyene ya ba-Faridzyē, be lili bampibi! Mu kuulu be liikadzye mu bibini byehene bibi nga nsie ya mu mibu mu obagha mbwuru mumō wu aakihi osomo mu emvuŋunu e be. Ya be bu libagha nde, be likirili nde mwana wu a mungele a mbaa, wu bvulu be mansa mwolo. (Geenna g1067) **16** Nyiī kundaa be, mimbiri mi binkpa-mihi mi miikalyele ti: «Munde wu aalaba mukihi mu nzo a Nzaami, ka li a ndagha o. Lo munde wu aalaba mukihi mu oore li nzo a Nzaami, nde faana okuhu mukihi a nde.» **17** Be lili biwulu ya binkpa-mihi! Emakye ebvulu mupfunu: Oore bwunu we nzo a Nzaami yi aakagwa lo bungili?

18 Ya be liifirikalyele ti: «Munde wu aalaba mukihi mu ebini ki baakatsughu bikaba ka li a ndagha o. Lo munde wu aalaba mukihi mu ekaba ki baatwulu nga yulu a ebini ekye, nde faana okuhu mukihi a nde.» **19** Binkpa-mihi! Emakye ebvulu mupfunu: Ekaba bwunu we ebini ki baakatsughu bikaba eekasa ti ekaba ekala kii ngili? **20** Munde wu aalaba mukihi mu ebini ki baakatsughu bikaba aakalaba nde mu ebini e kye ya mu bilogho byehene bi bili nga yulu a kye. **21** Ya munde wu aakalaba mukihi mu nzo a Nzaami aakalaba nde mu yo ya mu munde wu aakakala munsa yo. **22** Munde wu aalaba mukihi mu nkwwu a yulu, aakalaba mukihi mu likubu li Nzaami ya mu munde wu aakabwa nsini nga yulu a lo. **23** Nyiī kundaa be baluo-mikyene ya ba-Faridzyē baara baba bampibi! Mu kuulu be liikagwa kaba lili kwumu lili mampihi-a-mpihi ya lili miswoho mimi nkwwu anete ya kumine, ya be liikamejene bi bibvulu mupfunu mu mikyene: Bunsumu, mukolo wu a nyiī ya kana. Me mimye be likaakasa ya ogwene a omejene mi miki si. **24** Mimbiri mi ókpi mihi, be liikakele mala ma be mu omaha bimpimpi, lo be liikamini nyama wu baakata syamo wu mutsyini! **25** Nyiī kundaa be baluo-mikyene ya ba-Faridzyē, be lili bampibi! Mu kuulu be liikatsehebe mbihi a ebaha ya mbihi a ndorjo, lo kunsu kara bilwulu mu bilogho bibi pfiyibi ya mu nzala a mandagha ma mabi. **26** We mu-Faridzyē wu enkpa-mihi! Matswama otsehebe ebaha mu kara, mu kuulu ebaha ekala si ki etsyeme ku mbala. **27** Nyiī kundaa be baluo-mikyene ya ba-Faridzyē be lili bampibi! Mu kuulu be lili ti anga mampyeme ma bágyogho mpeeme. Ku mbala mo maakamoronon ma mabwe. Lo kunsu kara mo malwulu mu miwehe mi ba bákpi ya nyara yi alagha. **28** Bumō si kundaa be, ku mbala be liikamoronon ti baba bunsumu, lo kunsu kara be lili bampibi ya liilwulu mu bubu. **29** Nyiī kundaa be baluo-mikyene ya ba-Faridzyē be lili bampibi! Be ba liikatwu mampyeme ma mibighili ya be liikabwehe mampyeme ma baba bunsumu, **30** ya be liikalyele ti: «Kala ti bihi áli liili mu matala mama bataara ba bihi, nkini bihi ka líkaakala mfwunu mō ya bo mu otsala makili ma mibighili o.» **31** Mu obo, be lili bampughulu ba beme ti be lili baana ba babo ba bádzwi mibighili. **32** Lo be, limana esala ki óbaana bataara ba be! **33** Be lili bantaala, etswumu kii bampibi! Bunu-abo be likughu ogwenjē masyeme

ma mungele a mbaa? (Geenna g1067) 34 Me mu obo, me ngweghe mibighili, bansughu ya baluomikyene kundaa be. Be sa lidzwa bana mu bo ya likomo bo ŋa kuruwa, be sa likaha babake nswa-nswa mu manzo mama lisamana ma ba-Dzwife, ya be sa libyi bo mu mabvulu ya mabvulu. 35 Mu kuulu makili ma baba bunsumu mwohonon ma mātšajama ŋa nsie, obaana makili ma Abele, wu a bunsumu tee mu Dzakari mwana a Baraki, wu lidzwi be ŋa kara li ebini ki baakatsughu bikaba ya ngwumu yi a ngili, mabwa ŋa yulu a be. 36 Mu engarjma me ndyele kundaa be ti: «Masysteme mwohonon mamo sa mabwa ŋa yulu a eseene ki!» 37 «Yeruseleme, Yeruseleme, we wu aakadzwa mibighili ya wu aakadzwa bantumu ba baakagweghe we mu mameē. Matala malagha me aakansagha obvughu baana ba we ti anga bu ookakogho nsuhu baana ba nde kunsu mapaba. Lo we ka dzyi o. 38 Mono! Nzo a be sa yisyili mukajana. 39 Mu kuulu, me ndyele kundaa be ti be akala ka liifirimono me o, tee mu matala ma liilele be ti: Munde wu aagya mu nkwwu a Mfumu, li wu liseme!»

24 Yiisu āpala mu Nzo a Nzaami, ya bu abaana ogye, binduono bi nde bfyasele kundaa nde mu osuo nde bu bātww Nzo a Nzaami. 2 Nde ābvuhulu kundaa bo ti: «Be lili mu okamono bilogho byehene bi? Mu engarjma me ndyele be, ka akala osyili limeē ŋa yulu a limeē ŋa ebini ki o, byehene sa bitsajama.» 3 Bu abwi nsini ŋa Munguo wu a mi-Olibve, binduono bfyasele kundaa nde mu libee, ya bfyale nde ndiri: «Lyele bihi, munsu matala mandagha mamo akala maamonono, ya nsu elyimi eesuo ogya o we ya masini ma nsie.» (aiōn g165) 4 Yiisu ābvuhulu kundaa bo ti: «Lisa mayele, mbwuru anyāā odzihibi be. 5 Mu kuulu, balagha akala baagya mu nkwwu a me, ya sa balyele ti: “Me ngu Kriste!” Ya sa badzihibi baara balagha. 6 Be sa ligyughu bakabili mu mamvulu ya mu nsia a mamvulu mama ku la. Likala yeele! Ka likala a nzalamweē o, mu kuulu mandagha mamo mafaana ogya, lo mamo nkini ka mali masini o. 7 Mu kuulu baara ba nsie mō sa batemene mu oyidzwana a baara baba nsie yinke, ya mukogho mumō sa atemene mu oyidzwana a mukogho wu muke, sa okala a munzyala, ya nsie sa yinyinj mansa malagha. 8 Myehene mimye ngu ebaana ki misuo mii oburu. 9 Mu matala mamō sa batara be mu kuulu bamwehē

be kimini, ya sa badzwa be, sa babele be kundaa bikaana byehene mu nkooro a nkwwu a me. 10 Ya mu matala mamo, balagha akala baabwa, bo-a-bo sa batara bambaala ya sa babele bambaala. 11 Mibighili milagha mimi mpya sa mipala ya sa midzihibi baara balagha. 12 Mu nkooro a bubi ba buubvulu, dzyi li baara balagha sa liwolo. 13 Lo munde wu asa mukama tee ku masini, sa abvwughu. 14 Sa batsala Nsia yi Mbwe yi a Emfumu yi mu nsie yohonon, mu kuulu yo yisuo bumpughulu kundaa bikaana byehene. Me oyo akala masini maagya.» 15 «Ŋa akala liimono be mu ebini kii ngili Ngughu a bubi ba buukabyihi, bu āli ōlyele mubighili Danyelee, nyaā wu li mu otala abaghala. 16 Mu matala mamo, babo ba baakala mu Yude, nyaā babara ku yulu a minguo. 17 Munde wu aakala ku yulu a see li nzo lili eyala, anyāā osuguru mu otolo bilogho bi bili munsu nzo a nde. 18 Munde wu aakala ku manseghe, anyāā obvughuru ku mbihi mu oyigwolo enkuru ki ela kii kobo. 19 Nyi kundaa bakaha ba baakala a mayimi ya ba baakala mu otsyaha baana mu bitsughu bibye! 20 Lisamana Nzaami mu kuulu be linyaā obara mu ndo yi a mpie yi alagha, ya mu etsughu kii sabate. 21 Mu kuulu oyo sa okala a mpara yi alagha, yiili nkini ka yimaabwa o, obaana ku ebaana e nsie tee mu matala ma, ya kimini lii obo ka lifirikala o. 22 Ya kala ti mutala a bitsughu bibye ka bāsi nde wu a sala o, nkini mbwuru si mumō ka ākaabvwughu o. Lo mu nkooro a ba ōsuolo Nzaami, bitsughu bibye sa bikala bi bisala. 23 Me mu obo, kala ti mbwuru lyele kundaa be ti: “Kriste li ŋa!” Bwunu we: “Nde li ŋanii!” Ka lisa nde kana o. 24 Mu kuulu, bakriste baba mpya ya mibighili mimi mpya sa batemene. Bo sa basa bilyimi bi binene ya mandagha mama okinjimi mu eteese kii odzihibi, ngu oli ba bāsuolo kala ti okughu okala. 25 Me aangyehe be! 26 Lo kala balyele kundaa be ti: “Limono, nde li ku syehe”, ka ligye oko o. Bwunu we balyele ti: “Limono nde aasweme ŋa”, ka lisa nde kana o. 27 Mu kuulu, bwunu a bu ookasehene musehene a nzele ku ookapala tala tee ku ookadzyama tala, bwunu obo si ogya o Mwana a mbwuru akala ookala. 28 Ŋa ebini ki ookala ebyimi, me oyo bangombimi akala baabvuhunu.» 29 «Ŋaana oyo, ŋa mbihi a bitsughu bibye bibi kimini lili lagha, tala sa likala mpyibi, mweele wu a ngoono ka afrigwa otsyeme o, banomanomo sa babwa ŋa nsie, ya lileene lili mayulu sa linyinj. 30 Oyo

elyimi e Mwana a mbwuru sa epala mu yulu, ya baara baba bitswumu byehene bi bili ya nsie sa basyama mu bilili, ya sa bamono Mwana a mbwuru bu aagya mu bidzi bi mayulu mu lileene ya mu nsia yi nene. **31** Ya nde sa agweghe bangye-yulu ba nde ya mvulu-a-mvulu yi nene, ya bo sa babvughu baba ndaa nde ba ásuolo mu manto ma nsie mansa mana, tee mu nto ya nto yi a mayulu.» **32** «Libaghala nkumu yi a mufinge: Manto ma mampala ma nde kala ayi mineje ya kala ti matsyiri maafulu, lo be lisoolo ti dzwa liibehene. **33** Bumō si, ŋa akala liimono be mandagha mwohonono mamō, lo be lisoolo ti Mwana a mbwuru ayi aayabehene, nde ayi be-bele. **34** Mu ngan̄ma me ndyele kundaa be ti, eseene ki ka eluru o, nsomo mandagha mwohonono mamō maakughu. **35** Yulu ya nsie sa biluru, lo mandagha ma me ka maluru o.» **36** «Mu mi mitala etsughu ekye ya matala mamō, mbwuru si mumō ka soolo bye o, ngu okala bangye-yulu ba mayulu, ngu okala Mwana, yini a Taara nde ngasighi. **37** Bwunu a bu óli mu bitsughu bi Nowe, bwunu obo si ogya o Mwana a mbwuru ookala. **38** Bwunu a bu óli baara [babō] mu bitsughu bi bit̄swama ndwuru a madza yi nene, bo bákadza ya bákanḡma, bo bákakie ya bákakwehe, tee mu etsughu ki ósomo Nowe mu bwara ba bunene. **39** Bo ka bákasoolo o, tee ŋa ógyi ndwuru a madza yi nene yi áabiri bo bwohonono. Me bwunu obo [si] ookala ogya o Mwana a mbwuru. **40** Mu obo, mu baara buolo ba baakala mu nseghe, sa bagwolo mumō, ya sa basihi wu muke. **41** Mu bakaha buolo ba bali mu okasighi mburu ŋa yulu a limeē li baakasighi mburu, sa bagwolo mumō, ya sa basihi wu muke. **42** Mu obo, be likahala mihi, mu kuulu be ka lisoolo o nsa etsughu Mfumu a be akala aagya. **43** Be lisoolo ti kala nga-a-nzo áli gyahaba matala mama mpyibi ma oogya muturu, nkini nde ákaakahala mihi, ya ka ákaatala o ti babulu nzo a nde. **44** Me mu obo, behe si, likala yeelee, mu kuulu Mwana a mbwuru sa agya mu matala maala be ka likala a etsimi o.» **45** «Nande li musala wu bunsumu ya wu li a mayele, wuulu mfumu aagwi nde litumu ŋa yulu a baara ba nzo a nde mu ogwa bo bi-odza mu matala ma mafaana? **46** Esee kundaa musala munde, wuulu mfumu a nde bu agyi yabagha nde ŋa yulu a esala ekye. **47** Mu ngan̄ma, me ndyele kundaa be ti, nde sa agwa nde emfumu ŋa yulu a bilogho bi nde byehene. **48** Lo, kala ti musala li wu

mubi ya etsimi kunsu mukolo a nde ti: “Mfumu a me ka ali mu obaagya o”, **49** ya bwi okaha banganda ba nde baba esala, bwi odza ya on̄ma ya binkolo-mala, **50** mfumu a musala munde sa agya mu etsughu kiili nde ka ali mu okakebe nde o, ya mu matala maala nde ka agyahaba o. **51** Mfumu sa abyí nde ya musala munde sa ebagha masyeme emō ya bampibi, oko ku ookala bilili ya odza myini.»

25 «Emfumu ki mayulu efaana a batughu baba nkyini kwumu, baala bu bagwolo miindi mi bo, bápala mu oyibwana mulumu. **2** Bataana mu bo báli biwulu, ya bataana babake báli ya mayele. **3** Batughu baba biwulu, bu bagwolo miindi, ka bágwolo maala o. **4** Lo batughu baba mayele bágwolo miindi mi bo ya maala mu mana a mambwara. **5** Mulumu bu ágwe ne obaagya, bo bwohonono bátuo ensama ya bágyon̄omo tolo. **6** Mu kara-a-kara li mpyibi, engubu ébwi: “Mulumu ndeghe! Lipala liyibwana a nde.” **7** Mu obo batughu bwohonono básighili ya bábwi ogyighili miindi mi bo. **8** Batughu baba biwulu bályele kundaa batughu baba mayele ti: “Ligwa bihi mana ndaama a maala ma be, mu kuulu miindi mi bihi mili mu okagye ku odzimi.” **9** Lo babo baba mayele bábvuhulu kundaa bo ti: “Pele! Mo ka makughu mu bihi ya mu be o. Ligye kundaa minta-nkaala ya liswumu maala mama ndaa beme.” **10** Mu matala ma bágyene bo ku oyiswumu maala, mulumu áyato, ya batughu ba báli yeelee básomo munsu nzo a kyiri kii mabala, ya bákuru munḡma a nzo. **11** ŋa mbihi on̄o, batughu bataana babake bágyi, ya bákalyele ti: “Mfumu, mfumu, dzubulu bihi nzo!” **12** Lo nde ábvuhulu ti: “Mu engan̄ma me ndyele kundaa be ti, me ka nsoolo be o.” **13** «Me mu obo, likahala mihi, mu kuulu be ka lisoolo o, ngu okala etsughu, ngu okala matala.» **14** «Sa okala ti anga mbwuru wu li mu okagye ku midzye, nde áti basala ba nde mbili ya ágwi bo busini bu nde. **15** Kundaa mumō nde ágwi batalanta bataana, kundaa wunu nde ágwi buolo, kundaa wu muke nde ágwi mumō, bwunu a bu oli mpini a mbwuru-mbwuru, ya nde ágyene midzye. **16** Musala wu áabagha batalanta bataana áyisalala mu bo ya ábagha bataana bakimi ŋa yulu. **17** Bwunu obo si, wu bágwi batalanta buolo ábagha batalanta buolo bakimi. **18** Lo munde wu bágwi talanta mumō, áyitsimi dzunu mu nsie ya ásweghe nzi a mfumu a nde

alyele kundaa ba baakala ku ngo-kwogho e nde ti: “Ligya, be ba óseme Taara a me, libyala pfa li Emfumu ki bágyighili mu be obaana ku ebaana e nsie. **35** Mu engañma me aandi a nzala, ya be liigwi me bi-odza, me aandi a nyoro, ya be liigwi me bi-onjma, me aandi munzyi, ya be liibwana a me. **36** Me aandi mpene, ya be liigwi me binkuru, me aandi mubele ya be liiyatala me, me aandi mu boloko, ya be liiyatala me.” **37** Mu obo, baara baba bunsumu sa babvuhulu kundaa nde ti: “Mfumu, bu nki matala bihi ali liimono we ya nzala ya bihi liigwi we bi-odza, we ya nyoro, ya bihi liigwi we madza? **38** Bu nki matala bihi ali liimono we munzyi ya bihi liibwana a we, mpene ya bihi liigwi we binkuru? **39** Nki matala bihi ali liimono we mubele bwunu we mu boloko, ya bihi liigwi kundaa we?” **40** Ya mukogho sa abvuhulu kundaa bo ti: «Mu engañma, me ndyele kundaa be ti: Nswe ŋa liikasa be obo kundaa mumō mu ba babvulu osala ba, ba bali bambwee ya banaana ba me, me kundaa me be liikasa obo!» **41** «Ŋa nseele, mfumu sa alyele kundaa ba bali ku engbambogho e nde ti: “Be ba bágwi epwolo, ligye la ya me, ku mbaa yi aagwene okadzimi yi bágyighili mu nkooro a dyabulu ya bangye-yulu ba nde. (aiōnios g166) **42** Mu kuulu me aandi ya nzala ya be ka liigwi me bi-odza o, me aandi ya nyoro ya be ka liigwi me madza o. **43** Me aandi munzyi ya be ka liibwana a me o, me aandi mpene ya be ka liigwi me binkuru o, me aandi mubele ya mu boloko, ya be ka liiyamono me o.” **44** Mu obo, boho si sa babvuhulu kundaa nde ti: “Mfumu, nki matala bihi áli liimono we ya nzala bwunu we ya nyoro, munzyi bwunu we mpene, mubele bwunu we mu boloko, ya bihi liikwono oyabaha we?” **45** Nde sa abvuhulu kundaa bo ti: «Mu engañma, me ndyele kundaa be ti: “Nswe ŋa liikwono osa be obo kundaa mumō mu ba babvulu osala ba, me kundaa mehe si be liikwono osa obo!” **46** Ya, bo sa bagye ku masyeme mama mibvu ya mibvu, ya baara baba bunsumu ku laama lili mibvu ya mibvu.» (aiōnios g166)

Matye

nzaami ya bakulu baba ekaana ki ba-Dzwife bábvuṅunu ku mbala nzo a mfumu a bangaa ba nzaami wu a nkumu a Kayife. 4 Bo bákuru mfwunu mu osyimi Yiiisu mu mayele mu kuulu badzwa nde. 5 Lo bo bákalyele ti: «Ka ṅa kara li kyiri o, mu kuulu mpaatsala yinyaā obwa ṅa nsa baara.» 6 Ya Yiiisu bu áli ku Betani, ku nzo a Simō nga-a-bwala, 7 mukaha mumō áyasele kundaa nde ya mbwara yi a mu alabateri yi áalwulu mu mananaase mama ntala. Nde ágyiri mo ṅa yulu a mutswi a Yiiisu ṅaala bo bábwi nsini ṅa table. 8 Binduono bu bimono obo, ka bímono esee o ya bílyele ti: «Mu emakye bapfihili mananaase ma? 9 Mu kuulu, ali bakughu otyeghe mo mu ntala yi alagha, ya ogwa nzi oyo kundaa bawe!» 10 Yiiisu bu asoolo ndagha oyo, nde ályele kundaa bo ti: «Mu emakye be lili mu omweē mukaha wu mpara? Nde aagyighili ndagha yimbwe mu me. 11 Mu kuulu bawe, be sa likala ya bo mu matala mwohonono. Lo me ka ankala ya be mu matala mwohonono o. 12 Nde bu agyiri mananaase ma mu nyuru a me, nde aasi me mansagha ma baadzyighi me. 13 Mu enganyama me ndyele kundaa be ti: Nswe ebini ki akala baatsala Nsia yi Mbwe mu nsie nsyini, sa babili si mu yo, bu balibili nde mweē mu ndagha yi aagyighili nde.» 14 Mu obo, mumō mu kwumu ya buolo wu a nkumu Yuda Isikaryote, ágyene kundaa bakwuru ba bangaa ba nzaami, 15 ya ályele kundaa bo ti: «Be emakye liigwa me mu kuulu me ntyeghe nde kundaa be?» Bo bágwi nde makwumu matere ma mipara mimi bisyeē. 16 Obaana oṅo, nde ábwi osagha matala ma mabwe mu kuulu nde atyeghe bo Yiiisu. 17 Mu etsughu kii nsomo kii mampa ma magwene a pfini, binduono bílyele kundaa Yiiisu ti: «Kunu-ako we dzyi ti bihi linaā we bi-odza bibi kyiri kii Paake?» 18 Nde ályele ti: «Ligye ku bvulu kundaa mfu-nga-empele ya lilyele nde ti: “Muluo bu alyele ti: Matala ma me maabehene, ku nzo a we me aandza kyiri kii Paake ya binduono bi me.”» 19 Binduono bísi bwunu a bu ótumu bo Yiiisu ya bábwehē kyiri kii Paake. 20 Nkonkolo bu yito, nde ábwi nsini ṅa table ya binduono kwumu ya byele. 21 Mu matala ma bákadza bo, Yiiisu ályele ti: «Mu enganyama me ndyele be, mumō ṅa kara li be sa atyeghe me.» 22 Bo bányoō ku olagha, bábaana olyele kundaa nde mumō-mumō ti: «Mfumu, me?» 23 Nde ábvuhulu ti: «Munde wu aalo kwogho mu ndoō sa limō ya me, me nde aatyeghe me.

24 Mwana a mbwuru li mu ogye bwunu a bu básono mu nde, lo nyii kundaa munde wu li nzili yi baatyeghe Mwana a mbwuru! Ali bubwe banyaā oburu mbwuru munde!» 25 Yuda wu aatyeghe nde ályele kundaa nde ti: «Muluo, me?» Yiiisu ábvuhulu kundaa nde ti: «Weme lyele yo!» 26 Mu matala ma bákadza bo, Yiiisu ágwolo limpa, ya bu aseme lo, nde átsyiri lo, nde ágwi lo kundaa binduono bi nde, ya nde ályele ti: «Ligwolo, lidza, yi me nyuru a me.» 27 Bu agwolo ebaha ya bu abvurulu matuono, ágwi bo kye ya ályele ti: «Liṅma kye be bwohonono, 28 mu kuulu ma me makili ma me, makili mama ogwihini ma maatsanyama mu nkooro a baara ba balagha, mu kolokolo a masumu. 29 Me ndyele kundaa be ti: Me ka amfiriṅma mala ma bviini ma o tee mu etsughu ki akala aamfiriṅma me mo ma manyaghara emō ya be mu Emfumu e Taara a me.» 30 Bu bamana ogyimi bikwumu bibi masyighi, bo bápala mu ogye ku Munguo wu a mi-Olibve. 31 Mu obo Yiiisu ályele kundaa bo ti: «Mu mpyibi yi, be bwohonono sa libwa mu nkooro a me. Mu kuulu básono ti: Me sa nkaha munkala-bibuolo, ya bindoomo bibi mukaā a bibuolo sa bitsanyama 32 Lo, ṅa akala aansighili me mu lipfu, me sa nswama ku Ngalile.» 33 Piere ábvuhulu kundaa nde ti: «Ngu okala ti bwohonono sa babwa mu nkooro a we, si okala ka bunu, me ka ambwa o.» 34 Yiiisu ályele kundaa nde ti: «Mu enganyama, me ndyele kundaa we, mu mpyibi yi, nsomo mulumu a nsuhu akuolo, we sa tunu me mansa matere.» 35 Piere ályele kundaa nde ti: «Ngu okala ti me mfaana okpa emō ya we, si okala ka bunu, me ka ntunu we o.» Ya binduono byehene bílyele bwunu obo si. 36 Yiiisu bu ayato ya bo ṅa ebini kii nkumu Ngetesemane, nde ályele kundaa binduono ti: «Libwa mansini ṅa, mu matala ma aayinsamana me Nzaami ṅanii.» 37 Bu abiri Piere ya baana ba Nzebede bansa buolo, nde ábaana omono nyii ya mukolo maā-maā. 38 Mu obo, nde ályele kundaa bo ti: «Mwumunu a me ayi ya nyii tee mu eteese kii lipfu. Likala ṅa ya likahala mihi ya me.» 39 Nde bu agyene mana etiiri ki ela, ábwi edzili ṅa nsie, ábuono Nzaami ya ályele ti: «Taara a me, kala ali bukughu okala, nyaā ebaha ki eluru la ya me! Lo, ka bu ndzyi me o, lo bu dzyi we!» 40 Nde áyabvughuru kundaa binduono ya nde ámono bye bigyongomo ensama. Nde ályele kundaa Piere ti: «Bu me buulu be ka liibagha mpini yi okele ya me mu tala limō o!» 41 «Likahala

mihi ya lisamana mu kuulu be linyaã obwa mu bigyele. Mufulu li a mpini, lo nyuru yikolo.» 42 Nde áfirigye la mu sa lili ywolo, ásamana ya ályele ti: «Taara a me, kala ti ebaha ki ekughu oluru kuulu me kye oŋma we, nyaã waa li we likala!» 43 Ŋa mbihi, nde áfiriyabvughuru ya áyabagha bo mu ensama, mu kuulu mihi mi bo áli míleme. 44 Nde bu asihi bo, áfirigye la ya bo ya ásamana Nzaami mu sa lili tere. Nde áfirilyele mandagha maana mamō. 45 Mu obo nde ábvughuru kundaa binduono ya lyele kundaa bo ti: «Mu matala ma, ligyongomo ya ligwumu o be! Mono, tala liibehene, ya Mwana a mbwuru sa bagwa nde ŋa myaã mi banga-a-masumu. 46 Litemene! Liyatswe! Limono, munde wu aatyeghe me maayabehene!» 47 Nde áli nkini mu okabili, mono, Yuda, mumō mu binduono kwumu ya byele, áyato ya mpwumu a baara yi nene yi áali a mapee ya mankwogho, ba ógweghe bakwuru ba bangaa ba nzaami ya bakulu baba ekaana ki ba-Dzwife. 48 Ya munde wu aakatyeghe nde ágwi bo elyimi, ályele ti: «Munde wu aanyuburu me, me munde, lisyimi nde!» 49 Ŋaana oŋo, nde áyasele kundaa Yiiisu ya ályele ti: «Muluo, mboro a we!» Ya nde ányuburu nde. 50 Yiiisu ályele kundaa nde ti: «Ndughu a me, esala ki aayasa we, sa kye!» Bu bayasele, bábwirili Yiiisu ya básyimi nde. 51 Ya mono, mumō mu ba bali ya Yiiisu, bu apaha lipee li nde, átini musala a mfumu a bangaa ba nzaami, átsyiri nde tswi. 52 Mu obo, Yiiisu ályele kundaa nde ti: «Bvurulu lipee li we ŋa likukuru li lo, mu kuulu babo ba baakagwolo lipee, sa bakpa mu lipee. 53 We bunu tsimi, ti me ka nkughu obuono Taara a me o, mu kuulu nde agwa me ŋa-ŋa mikaã mi bangye-yulu kwumu ya myele? 54 Lo bunu-abo Bisono bi biilyele ti ofaana okala obo biikeele?» 55 Ŋa nseele, Yiiisu ályele kundaa mampwumu ti: «Be liipala ya mapee ya mangbala mu osyimi me ti anga ntwumu! Nswe etsughu me aakambwa nsini munsá nzo a Nzaami mu akaluo, lo be ka liisyimi me o. 56 Lo myehene mimye miimoŋono mu kuulu mi básono ya mi ólyele mibighili mikeele.» Oŋo binduono byehene bíbulusihi nde ya bíbara. 57 Ba básyimi Yiiisu báberi nde kundaa Kayife mfumu a bangaa ba nzaami, oko ku óbvugunu baluo-mikyene ya bakulu ba ba-Dzwife. 58 Piere ákanama nde la-la tee kunsá mbala a nzo a Mukwuru a bangaa ba nzaami. Bu asomo kunsá kara, ábwi nsini ya bankyele ba Kayife mu omono bunu ndagha yi yiisughu. 59 Bakwuru ba bangaa ba nzaami ya ekwuru ki ba-Dzwife kyehene bákasagha bumpughulu bubu mpya mu Yiiisu mu kuulu batsyiri nde mukakana wu lipfu. 60 Lo bo ka bábagha o, ngu okala ti bampughulu baba mpya balagha báamoŋono. Ŋa masini, babaghala buolo bágyi 61 ya bályele ti: «Mbwuru wu aakalyele ti: “Me nkughu otsala nzo a Nzaami ya ofiritwu yo mu bitsughu bitere.”» 62 Mukwuru a bangaa ba nzaami ba atemene, ályele kundaa nde ti: «We ka li a ndagha yi aabvuhulu mu bumpughulu bu baara ba mu we o?» 63 Lo Yiiisu ka átsughu ndagha o. Mukwuru a bangaa ba nzaami ályele kundaa nde ti: «Mu nkumu a Nzaami wu a mweë, me nduomo we mu olyele bihi, kala ti we me Kriste, Mwana a Nzaami.» 64 Yiiisu ábvuhulu kundaa nde ti: «Weme lyele yo. Lo me ndyele kundaa be ti, obaana matala ma, be sa limono Mwana a mbwuru ábwi nsini ŋa ngo-kwogho ki Nga-a-lileene ya li mu okagya mu bidzi mu mayulu.» 65 Mu obo mfumu a bangaa ba nzaami ákaghala binkuru bi ndeme ya ályele ti: «Nde aatsaala Nzaami. Mu emakye bihi liifirikala a nzala a bampughulu? Be liigyughu bu aatsaala nde Nzaami. 66 Be bunu litsimi?» Bo bábvuhulu ti: «Nde faana okpa!» 67 Oŋo bo bábwi otswulu nde manteë ku edzili ya okaha nde minkono, bana bákahe nde mampala, 68 ya bákalyle ti: «Kriste, bighili, nande mu bihi aakaha we?» 69 Piere áli ábwi nsini ku mbala a nzo. Musala mumō wu mukaha bu ayasele kundaa nde, ályele ti: «Wehe si aakakala ya Yiiisu wu a ku Ngalile!» 70 Lo nde átuŋu ŋa nkulu a baara bwohonono, ya ályele ti: «Me ka nsoolo ndagha yi dzyi we olyele o.» 71 Ŋa nseele, Piere bu ákagye ku bele a edzughubu ki enene ki ekagha, musala mukimi wu mukaha ámono nde ya ályele kundaa ba báli oŋo ti: «Mbwuru wu aakakala ya Yiiisu musi Nadzarete.» 72 Nde áfiritunu ya ályele ti: «Me ndaba mukihí, me ka nsoolo mbwuru wu o!» 73 Ŋa mbihi a edzighi ebi, ba báli oŋo báyasele ya bályele kundaa Piere ti: «Mu engayma, wehe si li wu a ndaa bo! Mu kuulu mbiili a we yi li mu ofwunu we.» 74 Mu obo nde álaba mukihí mu okabiili mpwoho ti: «Me ka nsoolo mbwuru wu o!» Ya ŋaana oŋo mulumu a nsuhu ákuolo. 75 Ya Piere álibili mweë mu ndagha yi ólyele nde Yiiisu: «Nsomo mulumu a nsuhu ákuolo, we sa tunu me mansa

matere.» Ya nde bu apala ku mbala, ábuulu mukaba a elili kii minyoŋ.

27 Bwihi bu buki, bakwuru ba bangaa ba nzaami bwohono ya bakulu ba ekaana ki ba-Dzwife bákuru mfwunu yi otsyiri Yiisu mukakana wu lipfu. **2** Ya bu bakuru nde misyi, bábiri nde ya bágwi nde ŋa myaā mi Pilate, mfumu a etsulu e nsie. **3** Yuda wu aatyeghe Yiisu, bu amono ti baatsyiri nde mukakana wu lipfu, áso bo bitsimi, ya áyibvurulu makwumu matere ma mipara mimi bisyeē kundaa bakwuru ba bangaa ba nzaami ya bakulu ba ekaana ki ba-Dzwife, **4** ya ályele kundaa bo ti: «Me aans masumu bu aantyegehe makili mama wu gwene osoolo ndagha!» Lo bo bályele ti: «Ka mitala bihi o! Oyo ndagha a we!» **5** Nde ábulutsili mipara mimi bisyeē mu nzo a Nzaami, ápala ya áyilele swe. **6** Bakwuru ba bangaa ba nzaami bágwolo mipara mimi bisyeē mimye ya bályele ti: «Ka oli a muswa mu olo mye mu baakabunu nzi a nzo a Nzaami o, mu kuulu mye mili mutala a makili.» **7** Bo bákuru mfwunu, báswumu nseghe a wu aakagyighili bilogho bi bámyene mu mubweē mu mipara mimye mu kuulu yikala mampyeme ma banzyi. **8** Me mu obo tee mu matala ma, baakata nseghe oyo «nseghe a makili». **9** Obo me bu ókeele mi áli ólyele mubighili Dzeremi: «Bo baagwolo makwumu matere ma mipara mimi bisyeē, munde me mutala wu ólyele baana ba Isaraye, wu bákehe mu mbwuru munde, **10** ya bo baagwi mipara mimye mu nseghe a wu wu aakagyighili bilogho bi bámyene mu mubweē, bwunu a bu ógwi me Mfumu litumu.» **11** Bábiri Yiisu ŋa nkulu a Mfumu a etsulu e nsie. Nde áfwulu nde ti: «Bunu, we me mukogho a ba-Dzwife?» Yiisu ályele ti: «Weme lyele yo.» **12** Lo mu matala ma ókafwulu nde bakwuru ba bangaa ba nzaami ya bakulu ba ekaana ki ba-Dzwife, nde ka ábvuhulu ndagha o. **13** Mu obo, Pilate ályele kundaa nde ti: «Bunu, we ka li mu okagyughu mandagha mwohono ma bali mu okakwighi we o?» **14** Lo Yiisu ka ábvuhulu nde mvuru o, ya mfumu a etsulu e nsie ákinjimi ku olagha. **15** Mu nswe kyiri kii Paake, mfumu a etsulu e nsie ekye áli a epfu kii okapaha mbwuru a boloko mumō, wu odzyi mpwumu a baara. **16** Mu matala mamo óli a mbwuru a boloko mumō wu a nsia, nkumu a nde [Yiisu] Barabase. **17** Pilate áfwulu kundaa mpwumu yi áabvurunu ti: «Nande be lidzyi ti

me nyaā, [Yiisu] Barabase, bwunu we Yiisu wu baakata Kriste?» **18** Mu kuulu, nde ásoolo ti bo baatyeghe Yiisu mu nkooro a ebaa e bo. **19** Mu matala ma ábwi nde nsini ŋa epehe kii muyala, mukala a Pilate ágweghe mbwuru alyele kundaa nde ti: «Ka somo mu ndagha a mbwuru wu bunsumu wu o! Mu kuulu lolo mu nzolo me aamono mpara alagha mu nkooro a nde.» **20** Bakwuru ba bangaa ba nzaami ya bakulu ba ekaana ki ba-Dzwife bápeene a mampwumu ma baara mu kuulu mo maluomo Barabase ya badzwa Yiisu. **21** Bu afiribili, mfumu a etsulu e nsie áfwulu kundaa bo ti: «Mu bo buolo, be na lidzyi me nyaā?» Bo bábvuhulu ti: «Barabase!» **22** Pilate áfwulu kundaa bo ti: «Emakye me aansa mu Yiisu, wu baakata ti Kriste?» Bo bwohono bábvuhulu ti: «Bakomo nde ŋa kuruwa!» **23** Nde áfirifwulu bo ti: «Nde nsa bubi aagyighili?» Lo bo bákakehe bingubu mu mpini ya bákalyele ti: «Bakomo nde ŋa kuruwa!» **24** Pilate bu amono ti nswe yi aalyele nde ka yifirikala a mupfunu o, lo mpaatsala yiikabvulu, nde ágwolo madza ya áswagha myaā ŋa nkulu a mpwumu a baara, ya ályele ti: «Me ka nsolo ndagha mu makili ma o. Mitala beme!» **25** Baara bwohono bábvuhulu ti: «Nyaā makili ma nde mabwa ŋa yulu a bihi, ya ŋa yulu a baana ba bihi!» **26** Oŋo, nde ányaā bo Barabase. Lo Yiisu, bu bamana okaha nde nswa-nswa, Pilate ágwi nde ŋa myaā mi bo mu kuulu bakomo nde ŋa kuruwa. **27** Mpwumu yohono yi a bambumbulu ba mfumu a etsulu e nsie yíbiri Yiisu mu nzo a emfumu, ya yídzyi nde. **28** Bo bádzwulu nde binkuru ya bálaha nde enkuru ki ela kii mungala. **29** Bátwu ebara kii mansiene ya bákwighi nde kye ŋa yulu a mutswi. Bágwi nde edzyara akwara ŋa ngo-kwogho. Bu bakunu mabuo ŋa nkulu a nde, bábwi osa nde munkulu ya bákalyele ti: «Mukogho a ba-Dzwife, mboro a we!» **30** Bo bátswulu nde manteē, bágwolo edzyara ya bábwi okakaha nde ŋa mutswi. **31** Ya bu bamana osa nde munsensehē, bádzwulu nde enkuru ki ela ya báfirilaha nde binkuru bi ndeme. Ya bábiri nde mu okomo nde ŋa yulu a kuruwa. **32** Bo bu bapala mu bvulu, bámono mbwuru mumō wu a ku Sirene, nkumu a nde Simō, bákwighi nde kuruwa li Yiisu obiri. **33** Bo báto ŋa ebini ki baakata ti, «Ngolongota», mbaala ti, «etye ki mutswi a mbwuru». **34** Bájmihi nde mala ma bviini li bábvughu ya nsogho-ŋmeē. Bu alyini lo, nde ábihi oŋma. **35** Bu bamana okomo nde ŋa yulu a kuruwa,

bákaba binkuru bi nde mu empa kiili nga-a-bwehe me wu aagwolo. **36** Ya bo bábwi nsini mu okakebe nde oṅo. **37** Bo bátwulu liyu-yulu li mutswi a nde ebili ki lipfu li nde, básono ti: «Wu me Yiiisu, mukogho a ba-Dzwife.» **38** Mu matala maana mamō, bambumbulu bákomo emō ya nde ṅa yulu a makuruwa, bantwumu buolo, mumō ku ngo-kwogho, wu muke ku engbambogho. **39** Baara ba bákáluru bákátughu nde ya bákanyihī mitswi mi bo, **40** ya bákalyele ti: «We wu aatsala nzo yi a ngili ya ofiritwu yo mu bitsughu bitere, bvuwu nyuru a we weme. Kala ti we li Mwana a Nzaami, sughuru ṅa kuruwa!» **41** Bumō si bakwuru ba bangaa ba nzaami, Baluo-mikyene ya bakulu ba ekaana ki ba-Dzwife, bákasa nde munsensehē ya bákalyele ti: **42** «Nde aabvwuhu babake, lo ka kughu obvwuhu nyuru a ndeme o! Nde li mukogho a Isarayelee, mu bu nyaā asughuru ṅa kuruwa, ya bihi sa lisa kana mu nde! **43** Nde ási mukolo a nde mu Nzaami, nyaā Nzaami akwulu nde mu matala ma, kala ti nde dzyi nde, mu kuulu nde aalyele ti: “Me ndi Mwana a Nzaami!”» **44** Bantwumu ba bákomo ṅa yulu a makuruwa emō ya nde bákátughu nde bwunu obo si. **45** Obaana mu tala lili embehe tee mu tala lili matere, mpyibi yíbwi ṅa yulu a nsie yohono. **46** Ku bele a tala lili matere, Yiiisu ásyama mu likyi lili mpini ya ályele ti: «Eli, Eli, lema sabakatani?» Mbaala ti: «Nzaami a me, Nzaami a me, mu emakye we aanyaghala me?» **47** Mu ba báli oṅo, bu bagyughu, bana bályele ti: «Ligyughu, nde li mu ota Eli mbili!» **48** Ṃaana oṅo, mumō mu bo ábara áyigwolo nsana, átsubu mu bviini lili ṅeē, ya bu akuru yo mu edzyara, ágwi nde aṅma. **49** Lo babake bályele ti: «Makebe, litswe limono kala ti Eli sa ayabvwuhu nde!» **50** Lo Yiiisu áfirisyama mu likyi lili mpini, ya átaghaba. **51** Ya mono, nkpaṅa eko yi aakakabala nzo yi a ngili yíkagha mu bipa byele, obaana ku yulu tee ku nsie. Nsie yínyini, mameē ma manene mábaghala. **52** Mampyeme mádzubulu, baara balagha baba ngili baala áli bákpi, básighili mu lipfu. **53** Bo bápala mu mampyeme, ya ṅa mbihi a osighili o Yiiisu mu lipfu, bo básomo mu bvulu lili ngili ya bámogono kundaa baara balagha. **54** Mukwuru a bambumbulu nkama ya ba bákakebe Yiiisu, bu bamono bu ónyini nsie ya mi míbwi, bábagha nzalamweē yi alagha ya bályele ti: «Nganṅma, wu ali Mwana a Nzaami!» **55** Oṅo óli a bakaha balagha ba bákatala la-la. Bo bákana

Yiiisu obaana ku Ngaliile, ya bákabulusalala nde. **56** Mu bo oli a Mari musi Mangadala, Mari ngughu a Dzake ya Dzodzefe, ya ngughu a baana ba Nzebede. **57** Nkonkolo bu yito, baghala mumō wu esini wu a nkwumu a Dzodzefe, musi Arimate, ágyi. Ndehe si áli enduono e Yiiisu. **58** Nde áyimono Pilate ya áluomo nde nyuru a Yiiisu. Pilate ágwi litumu ti bagwa nde yo. **59** Dzodzefe bu agwolo nyuru a Yiiisu, ádzyi yo kunsā nkpaṅa yi a lino li linyaghara. **60** Nde átwulu yo mu dzunu li ndeme li linyaghara li átsimi kunsā limeē, ákimini limeē li linene mu okyi dzunu ya ágyene o nde. **61** Mari musi Mangadala ya Mari wu muke áli bábwi nsini ṅa nkulu a mpyeme. **62** Etsughu ki eluono áli etsughu ki ékanama etsughu ki baakabwehē sabate. Bakwuru ba bangaa ba nzaami ya ba-Faridzyē bágyene mu emvugunu kundaa Pilate, **63** bo bályele ti: «Mfumu, bihi liilibili mweē ti nga-a-mpya munde, ṅa aali nde mweē, nde ályele ti: “Ṃa mbihi a bitsughu bitere, me sa nsighili mu lipfu.” **64** Mu obo, gwa litumu mu kuulu bakebe mpyeme tee mu bitsughu bitere, mfangolo binduono bi nde biyaturu nde ya bilyele kundaa baara ti: “Aasighili ṅa kara li ba bákpi!” Ya mpya yi masini oyo sa yibvulu yi a nsomo.» **65** Pilate ályele kundaa bo ti: «Be lili a babo ba baakakebe. Ligyē likebe mpyeme bwunu a bu lidzyi be.» **66** Ya bo bu bagyene, bákakebe mpyeme, bu bakuru yo mu limeē ya basi yo bilyimi, bátwulu ba baakakebe oṅo.

28 Ṃa mbihi a etsughu kii sabate, mu epala-epala kii etsughu kii nsomo mu liminjī, Mari musi Mangadala ya Mari wu muke, báyitala mpyeme. **2** Ya mono, nsie yínyii ku olagha. Ngye-yulu a Mfumu áfi ku yulu, áyakimini limeē ya ábwi nsini ṅa yulu a lo. **3** Nde ákasehene ti anga musehene a nzele ya enkuru e nde éli kii buṅu lili nkara olagha. **4** Bambumbulu ba bákakebe mpyeme bu bamono nde, bábwi oteghere mu nzalamweē ya bákala ti anga bibyimi. **5** Lo ngye-yulu átsughu ndagha ya ályele kundaa bakaha ti: «Be ka likala a nzalamweē o, mu kuulu me nsolo ti be Yiiisu wu baakomo lili mu okabulusagha. **6** Nde ka li ṅa o, mu kuulu nde aasighili mu lipfu bwunu a bu áli ályele nde. Ligyā, limono ebini ki ali baalaha nde. **7** Ya lisa maswa liyilyele kundaa binduono ti: “Nde aasighili ṅa kara li ba bákpi, ya mono, nde aatswama ku Ngaliile, oko be liimono nde.”

Limono, me ndyele be yo.» **8** Bo bámará ku mpyeme mu maswa, ya nzalamweē ya esee ki elagha, bábara ntyini báyilyele nsia kundaá binduono. **9** Lo mono, Yíisu áyibwana a bo ya ályele kundaá bo ti: «Mboro a be!» Bo báyasele kundaá nde, bákunu mabuo ŋa nsie ŋa nkulu a nde ya bákware myili mi nde. **10** Oŋo Yíisu ályele kundaá bo ti: «Ka likala a nzalamweē o. Ligye, liyitwoho nsia kundaá banaana ya bambwee ba me, bagye ku Ngalile, me oko bo baamono me.» **11** Bo áli nkini mu nzili, mono, ndaama mu bankyele bágyi ku bvulu ya bátwoho nsia yi a mandagha mwohonono ma mábwi kundaá bakwuru ba bangaa ba nzaami. **12** Bakwuru ba bangaa ba nzaami ya bakulu baba ekaana ki ba-Dzwife bábvuŋunu ya bákuru mfwunu. Bu bagwi mutala a nzi wu afaana kundaá bambumbulu **13** bátswi bo mukele wu: «Liyilyele bu: “Binduono bi nde biigyi mu mpyibi ya biituru nde, mu matala ma liikagyoŋomo bihi.” **14** Ya kala ti mfumu a etsulu e nsie gyughu ndagha yi, bihi akala liibwihí [nde] mukolo, bihi liisa ti be linyaā okala mu mpara.» **15** Bo bágwolo nzi ya bágyighili bwunu a bu báluo bo. Ndagha oyo yítsanjama kundaá ba-Dzwife tee mu etsughu kii lolo. **16** Binduono kwumu ya emō bígyene ku Ngalile, ku munguo wu áli ólyele bo Yíisu. **17** Bo bu bamono nde, bákunu mabuo ŋa nsie ŋa nkulu a nde, lo babake báli a mikeme. **18** Yíisu bu ayasele, ályele kundaá bo ti: «Litumu lwohonono bágwi me lo ku yulu ya ŋa yulu a nsie. **19** Mu obo, bu liigye, lisa ti bikaana byehene bikala binduono bi me, liboghoró bo mu nkwumu yi a Taara, ya yi a Mwana, ya yi a Mufulu a Ngili. **20** Liluo bo bakakebe mandagha mwohonono ma aantumu me be. Ya mono, me ndi ya be bitsughu byehene, tee ku masini ma matala.»

(aiōn g165)

Mareke

1 Ki me ebaana ki Nsia yi Mbwe yi a Yiisu-Kriste, Mwana a Nzaami. **2** Ti bu básono mu mukaana a mubighili Edzayi: «Tala, me sa ngweghe ntumu a me ku nkulu a we mu kuulu nde agyighili we nzili. **3** Likyi li munde wu li mu okakehe engubu ku syehe: Ligyighili nzili a Mfumu, lisa mankwulu ma nde makala nsumu!» **4** Dzā ágyi, me nde áakaboghoru baara ku syehe, ya áakatsala nsia yi a oboghoru kuu ogyiŋi mayele, mu obagha kolokolo a masumu. **5** Baara bwohonu mu etsulu e nsie kii Yude ya baba bvulu lili Yerusaleme bákagye kundaa nde ya bákakihi masumu ma bo ŋa nkulu a baara bwohonu. Mu obo Dzā áakaboghoru bo mu nzala wu a Dzurudē. **6** Dzā áli alaha eko ki batwu mu mfu a nyama wu baakata ti syamo ya álahá musili wu a mu nkobo a nyama mu bala. Nde ákadza bansense ya nyuru wu musuru. **7** Nde ákatsala nsia yi: «Mbwuru wu li mu ogya ŋa mbihi a me luru me mu lileene. Me bu mfuŋumu, me ka mfaana si eke mu onyana misyi mi bikoghoru bi nde o. **8** Me ndi mu okaboghoru be mu madza, lo nde sa aboghoru be mu Mufulu a Ngili.» **9** Mu bitsughu bibye, Yiisu áfi ku bvulu lili Nadzarete mu etsulu e nsie kii Ngalile, ya Dzā áboghoru nde mu nzala yi a Dzurudē. **10** ŋa ósaapala Yiisu mu madza, nde ámono mayulu mu obaghala ya Mufulu áfi ku yulu ya ásughuru ŋa yulu a nde mu efaana kii beeme. **11** Likyi líbili mu mayulu ti: «We li Mwana a me wu mukolo, me aakamono esee ki elagha mu we.» **12** ŋaana oŋo, Mufulu ábiri Yiisu ku syehe. **13** Oko, Satana ágyeele nde mu bitsughu makwumu-mana. Nde áli ŋa kara li banyama baba musuru, ya bange-yulu bákasalala nde. **14** ŋa mbihi a ŋa bátyeghe Dzā, Yiisu ágyene ku Ngalile ya ábaana oluo Nsia yi Mbwe yi a Nzaami. **15** Nde ákalyele ti: «Matala maato ya Emfumu e Nzaami eeyabehene. Ligyiŋi mayele, ya lisa kana mu Nsia yi Mbwe.» **16** Mu matala ma ókaluru Yiisu mu mukogho a mubu wu a Ngalile, nde ámono Simō ya Andere mbwee a nde, mu okatubu nkoho a bo mu madza ma mubu, mu kuulu bo báli bilebe banswi. **17** Yiisu ályele kundaa bo ti: «Linama me! Me sa nkirili be bilebe bibi baara.» **18** ŋaana oŋo, bo bábulunyaá nkoho a bo ya bánama nde. **19** Bu afirisehe ela-la, nde

ámono Dzake mwana a Nzebede wu baghala, ya Dzā mbwee a nde, ba báli si munsá bwara ya ba bákabaama nkoho. **20** ŋaana oŋo, nde áti bo mbili, bo bábulusihi taara a bo Nzebede ya basala ba nde munsá bwara, ya bánama Yiisu. **21** Bo báyanto ŋa bvulu lili Kaperenawume. Mu etsughu kii Sabate, Yiisu ásomo mu nzo a lisamana a ba-Dzwife, ya ábaana oluo. **22** Baara bákakiŋimi mu nduo-nduo yi ákaluo nde, mu kuulu nde ka ákaluo ti bu ókaluo baluo-mikyene o, lo ti mbwuru wu li a litumu. **23** Munsá nzo a lisamana a ba-Dzwife óli a baghala mumō wu áali a mufulu wu mubi wu áakehe engubu ti: **24** «Yiisu musi Nadzarete, we ya bihi ndagha ma? We bu aagyi mu osa kuulu ti bihi lipfighili? Me ngyahaba we na nde li: We li Wu a Ngili wu oogweghe Nzaami.» **25** Yiisu áfyē nde ya ályele ti: «Kuru muŋma a we ya pala mu baghala wu.» **26** Mufulu wu mubi ányihí nde mu mpini ya ákehe mungili wu munene. ŋa mbihi oŋo nde ábulupala mu baghala munde. **27** Baara bwohonu bákakiŋimi. Mu obo bákafuhunu bo-a-bo ti: «Yi ma yo? Ma maluo ma manyaghara! Nde li mu otumu si mifulu mi mibi ya litumu, ya mye mili mu ogyughu nde!» **28** Mu obo nsia a Yiisu yítšanama mu etsulu e nsie kii Ngalile kyehene. **29** Yiisu bu apala mu nzo a lisamana a ba-Dzwife, ŋa mbihi oŋo ágyene ya Dzake ya Dzā ku nzo a Simō ya Andere. **30** Buko bu Simō wu mukaha áli ágyonomo mu nkooro a mukaama. Yiisu bu asaayato, bályele nde ndagha oyo. **31** Yiisu áyasele ŋa bele a nde ya bu akwara nde mu kwogho, átehebe nde. Mukaama áfi nde ya nde ábwi osalala bo. **32** Mu nkonkolo, ŋa mbihi a ŋa ódzyama tala, bágyi a nde babyele balagha ya banga a mifulu mi mibi. **33** Baara ba bvulu bwohonu báyabvuŋunu ŋa nkulu a muŋma a nzo yi áli nde. **34** Nde ádzuhu baara balagha ba báli a mabyele mama mawa-mawa ya ábyi mifulu mi mibi milagha. Ka ágwi muswa kundaa mifulu mi mibi ti mibili o, mu kuulu mye mígyahaba nde. **35** Mu minkya-nkya, ŋaala nkini áli ya mpyibi, Yiisu átemene ya ápala mu ogye ku ebini ki egwene a baara ya ábwi osamana. **36** Simō ya baara ba báli ya nde bábaana osagha nde. **37** Mu matala ma bámono bo nde, bo bályele kundaa nde ti: «Baara bwohonu bali mu okabulusagha we.» **38** Nde ábvuhulu bo ndiri: «Litswe nkolo nkimi, ku mala ma mali bitaataa bi, mpaala me nduo si oko, mu kuulu me mu obo me aangyi ŋa

nsie.» **39** Mu obo nde ágyene mu etsulu e nsie kii Ngalile kyehene ya ákabaluluo mu manzo mama lisamana ma ba-Dzwife, ya ákabyi mifulu mi mibi mu baara. **40** Nga-a-buala mutsyini ágyi kundaa Yíisu. Bu akunu mabuo ña nsie ña nkulu a nde, ábuono nde bu: «Kala ti we dzyi, we kughu osa me wu a tse-tse.» **41** Yíisu ámono nde nyíi. Bu alabala ekee, ábyeme nde ya ályele ti: «Me ndzyi, kala wu a tse-tse.» **42** Ñaana oño buala búfi ya nde ásaatsyeme. **43** Ñaana oño Yíisu ábvurulu nde ku bula bu nde, átswi nde mukele mu ebaghala **44** ya ályele nde ti: «Yíghili ogyughu: Ka lyele mbwuru si mumõ o, lo gye yisuo nyuru a we kundaa ngaa a nzaami, ya gwa mu otsehebe o nyuru a we ekaba ki ótumu Moyidze. Obo sa osuo bumpughulu bu otsyeme o we kundaa baara bwohono.» **45** Lo baghala munde bu agyene, ábwi otsala nsia a ndagha oyo mu mpini ya mu yulu. Mu obo Yíisu ka áfiribagha bu aasomo epankala mu nswe bvulu o. Nde ákabalukala yini a ku mbala a bvulu, mu bibini bi bigwene a baara. Ya baara ba bákafo mu mankolo mwohono bákafo kundaa nde.

2 Ña mbihi a mana bitsughu, Yíisu áyabvughuru ku Kaperenawume. Baara básoolo ti nde áli ku nzo. **2** Mpwumu a baara yi nene yíbvununu ya ka ófirisyili a ebini munsá nzo o, ngu okala ña munjma a nzo. Yíisu ákaluo bo Ndagha a Nzaami. **3** Baara bágyi a nde mbwuru wu ónerene binama wu óbiri babaghala bana. **4** Mu kuulu ka bákafo obiri nde tee ña óli Yíisu o, mu nkooro a mpwumu a baara, bo báku mu ku yulu a see li nzo lili eyala, ña yulu a ebini ki áli bátemene bo, bátobolo lo ya básurulu laba li bálafo baghala wu ónerene binama. **5** Yíisu bu amono kana li bo, ályele kundaa baghala wu ónerene binama ndiri: «Mwana a me, masumu ma we baasi mo kolokolo.» **6** Oño óli a ndaama a baluo-mikyene ba bábwí-nsini ba bákafo bu mu mikolo mi bo: **7** «Mu emakye nde ali mu okabili bu? Nde li mu okatsaala Nzaami. Nande kughu osa masumu kolokolo, kala ka yini a Nzaami o?» **8** Ñaana oño, Yíisu ágyahaba bitsimi bi bo mu mifulu a nde ya ályele bo ndiri: «Mu emakye be lili a bitsimi bibi obo? **9** Emakye egwene a mpara, olyele baghala wu ónerene binama ti: “Baasi masumu ma we kolokolo”, bwunu we olyele ti: “Temene, gwolo laba li we ya dzyara?” **10** Lo me ndzyi ti be lifyahaba

ti Mwana a mbwuru li a litumu ña yulu a nsie mu osa masumu kolokolo.» Nde ályele mbwuru wu ónerene binama ti: **11** «Me ndyele we yo, temene, gwolo laba li we ya bvughuru ku nzo a we.» **12** Baghala átemene, ñaana oño ágwolo laba li nde ya ápala mu nzo ña mihi mi baara bwohono. Mu obo baara bwohono bákinjimi ya bákafo Nzaami bu bakalyele ndiri: «Kaala bihi nkini límaamono ndagha yi a bu yi o!» **13** Yíisu áfirigye ku mukogho a mubu wu a Ngalile. Mpwumu a baara yohono yíkafo kundaa nde, ya nde ákaluo bo. **14** Bu ákaluru, nde ámono Lebvi mwana a Alafe wu baghala wu áabwí-nsini ña nzo yi baakafiri mpagha. Yíisu ályele nde ti: «Nama me!» Lebvi átemene, ya ánama nde. **15** Bu báli ña tabele ku nzo a Lebvi, mintolo-mpagha milagha ya banga-a-masumu bákafo ebini emõ ya Yíisu, ya binduono bi nde. Mu kuulu bo báli balagha ba bákanama nde. **16** Mu matala ma ómono baluo-mikyene mi míli mu emvununu kii ba-Faridzyé Yíisu mu okadza ya mintolo-mpagha ya banga-a-masumu, bo bályele kundaa binduono bi nde ti: «Mu emakye nde ali mu okadza ya mintolo-mpagha, ya banga-a-masumu?» **17** Yíisu bu agyughu obo, ályele bo ndiri: «Ka oli baara ba bali nsiili baakakala a nzala a ngaa-libughu o, lo babyele. Me ka aangyi mu ota baara ba bali nsumu mbili o, lo mu ota banga-a-masumu mbili.» **18** Etsughu emõ, binduono bi Dzā ya ba-Faridzyé bákafo nswele mu bala. Baara báafwulu Yíisu ti: «Binduono bi Dzā ya bibi ba-Faridzyé biikafo nswele mu bala, lo mu emakye binduono bi we ka biikafo obo o?» **19** Yíisu ábvuhulu bo ti: «Bandughu ba baghala wu aakie bakughu okuru nswele mu bala mu matala maala wu aakie li nkini ya bo? Matala mwohono ma baakala bo ya wu aakie, bo ka bakughu okuru nswele mu bala o. **20** Bitsughu sa bigya biili sa bamaha wu aakie. Mu obo, mu bitsughu bibye bo sa akala bakuru nswele mu bala.» **21** «Ka oli a mbwuru wu aakabaama mupa a eko wu munyaghara ña yulu a enkuru ki ekulu o. Amana osa obo, mupa a eko wu munyaghara sa akaghala wu mukulu ya dzunu sa likala li libvulu bunene. **22** Ya ka oli a mbwuru wu aakalo bviini li linyaghara munsá manduru mama mu bibaana bi banyama ma makulu o. Kala pele, bviini sa libulu manduru ya nde sa apfihili bviini ya manduru. Bviini li linyaghara bafaana olo lo mu manduru ma manyaghara.»

23 Mu etsughu etsyini kii sabate, Yiisu ákaluru munsá manseghe ma bele ya binduono bi nde bíkabuluka binsia mu nzili-a-nzili. 24 Mu obo, ba-Faridzyē bályele Yiisu ndiri: «Mu emakye binduono bi we bili mu okagyighili ndagha yiili ka bágwi muswa mu etsughu kii sabate o?» 25 Yiisu ábvuhulu bo bu: «Be nkini áli litaá ndagha yi ósi Dabvide ŋa ákeghele nde ya ófuru nde nzala, nde ya baara ba báli ya nde?» 26 Bunu-abo nde ásomó munsá nzo a Nzaami mu matala ma óli Abyatare mukwuru a bangaa ba Nzaami. Nde áli mampa ma bágwi Nzaami mukaba, maala yini a bangaa ba Nzaami bali a muswa mu odza mó. Nde ágwi mó si kundaa ba báli ya nde?» 27 Ya Yiisu áfirilyele bo ndiri: «Bási sabate mu nkooro a mbwuru, lo ka bási mbwuru mu nkooro a sabate o. 28 Mu obo Mwana a mbwuru li mfumu a sabate.»

3 Yiisu áfiriyisomo mu nzo a lisamana a ba-Dzwife. Omo óli ya baghala mutsyini wu ónegene kwogho. 2 Baara bákatala Yiisu mu omono kala ti nde ákaadzuhu nde mu etsughu kii sabate mpaala babagha ndagha yi baafwunu nde. 3 Mu obo Yiisu ályele kundaa baghala wu ónegene kwogho ti: «Temene ŋa, ŋa kara li baara bwohonó!» 4 Ŋa mbihi oŋo nde áfwulu bo ti: «Nki ndagha bágwi muswa mu etsughu kii sabate? Osa bubwe bwunu we osa bubi, obvwuhu bwunu we odzwa?» Lo bo ka bátsughu ndagha o. 5 Mu obo, Yiisu átala bo bwohonó ya nkehe, ya ámonó nyíi yi alagha mu nkooro a mikoló ngýi mi bo ya ályele baghala munde ti: «Labala kwogho e we!» Nde álabala kye ya kwogho e nde ébvughuru bu éli nsomo. 6 Bu basaapala, ba-Faridzyē bábvuŋunu ya baara baba emvuŋunu ki Erode mu osagha mayele ma baadzwa nde. 7 Yiisu ágyene ku bele a mubu wu a Ngálie ya binduono bi nde. Mpwumu a baara yi nene yínama nde. Yo yífi ku bitsulu bi mansie bibi Ngálie ya Yude, 8 ku bvulu lili Yerusaleme, ku etsulu e nsie kii Idume, ku mala mama mi ngulu a nzala yi a Dzurudé, ya ku bitsulu bi mansie bibi ku bele a mabvulu mama ku Tire ya Sidó. Mpwumu a baara yi nene bu yigyughu mandagha mwohonó ma ákagyili nde, yígyi kundaa nde. 9 Nde ályele kundaa binduono bi nde bitwulu nde bwara, mu kuulu mpwumu a baara yinyaá osa nde mpiŋi. 10 Mu kuulu, buulu Yiisu ákadzuhu baara balagha, babyele bwohonó bákagyighiri mu nyuru a

nde ya bákasagha obyeme nde. 11 Ŋa ókamono nde mifulu mi mibi, mye míkabwa mu nsie ŋa nkulu nde ya míkakehe engubu ti: «We, we li Mwana a Nzaami!» 12 Lo nde ákatswa mye mukele mu ebaghala mpaala minyaá olyele nde na ali. 13 Ŋa mbihi oŋo, Yiisu ákumu ku yulu a munguo. Nde áti babo ba ásuoló nde mbili ya bo bágwi kundaa nde. 14 Nde ásuoló kwumu ya buoló ŋa kara li bo ya ágwi bo nkwwumu yi a bantum mpaala bakala ya nde ya mpaala nde agweghe bo bayiluo Nsia yi Mbwe. 15 Nde ágwi bo lileene lili obyí mifulu mi mibi. 16 Ba me bantum kwumu ya buoló ba ásuoló nde: Simó wu ágwi nde nkwwumu yi a Piere, 17 baana ba Nzebede: Dzake ya Dzā mbwee a nde. Yiisu ágwi bo nkwwumu yi a Bowanerengese, yidzyi olyele ti «baana ba nganzele», 18 Andere, Filipe, Baretelemi, Matye, Toma, Dzake mwana a Alafe, Tade, Simó musi kana, 19 ya Yuda Isikaryote munde wu áatyeghe Yiisu. 20 Ŋa mbihi oŋo Yiisu ábvughuru ku nzo ya mpwumu a baara yífiribvuŋunu, mu obo Yiisu ya binduono bi nde ka bábagha bu baadza o. 21 Badzighi ba Yiisu bu bagyughu obo, bágwi mu oyasyimi nde, mu kuulu bo bákalyele: «Nde ka li mu ofirikasoolo mandagha ma ali mu okagyighili o.» 22 Baluo-mikyene ba báfi ku Yerusaleme bákalyele ti: Nde li a «Beledzebule. Me mu lileene li mfumu a mifulu mi mibi nde ali mu okabyi mifulu mi mibi.» 23 Yiisu áti bo mbili ya ábwi obili ya bo mu mankumu: «Bunu-abo Satana akughu ofiribi Satana?» 24 Kala ti baara ba empu emó bakaghaba mu odzwana mvulu bo-a-bo, empu ekye ka egyili o. 25 Ya kala ti baara ba dzumu limó badzwana bo-a-bo, dzumu lilo ka ligyili o. 26 Mu obo kala ti Satana temene nsumu ya ndeme, nde li wu aakaghaba ya nde ka kughu ogyili o, lileene li nde liifi. 27 Ka oli a mbwuru wu kughu osomo mu nzo a mbwuru nga-a-mpini ya gwolo bilogho bi nde, kala ti ka tswama kuru nde misyi o. Kala ti nde kuru nde misyi, nde kughu obiri bilogho byehene bi bili munsá nzo a nde. 28 Mu engarjma me ndyele be ti: Nzaami sa asa mandagha mwohonó ma osa baara kolokolo, ngu okala masumu ngu okala otsaala. 29 Lo nswé mbwuru wu aatsaala Mufulu a Ngili si okala ka bunu, ka kughu obagha kolokolo o. Nde li a ebili mu lisumu lili mibvu ya mibvu.» (aíōn g165, aíōnios g166) 30 Yiisu ábili obo mu kuulu bo bákalyele ti nde li a mifulu wu mubi. 31 Ŋa mbihi oŋo ngughu ya bambwee ba Yiisu

báyato. Bo báli ku mbala ya bágweghe mbwuru mu oyita nde mbili. **32** Mpwumu a baara yíbwi nsini ya yísi Yíisu ña kara, ya bályele nde ndiri: «Ngughu a we, bambwee ba we ya bankele ba we bali ku mbala, bo bali mu okasagha we». **33** Yíisu ábvuhulu ndiri: «Nande li ngughu ya bana bali banaana bwunu we bambwee ba me?» **34** Bu atala baara ba bási nde ña kara, nde ályele ti: «Ba me bangughu ya bambwee ba me. **35** Mu kuulu, nswe munde wu aasa waa li Nzaami, munde me naana bwunu we mbwee a me, nkele a me ya ngughu a me.»

4 Yíisu áfirikaluo ña mukogho a mubu. Mpwumu a baara yi alagha yíyabvuñunu ña bele a nde. Mu obo nde ásono munsu bwara ba búli mu madza ma mubu ya ábwi nsini omo. Mpwumu a baara yíbwi nsini ña nsie mu mukogho a mubu. **2** Nde ákaluo bo mandagha malagha mu mankumu. Kunsu mandagha ma ákaluo nde, nde ákalyele bo ndiri: **3** «Ligyughu! Etsughu nga-emō, mukunu mutsyini ápala mu oyikunu. **4** Mu matala ma ákanyahala nde nsia, ndaama a nsia yíbwi mu mukogho a nzili. Barmini bágyi ya báli yo. **5** Ndaama yinke yíbwi ña ebini ki éli a mameē, ñaala nsie ka yili a mubighi o. Mburu yímene mu maswa-maswa, mu kuulu nsie áli yi asala. **6** Lo mwíi bu abala, mye mídzigghi ya míkée mu kuulu misumunu ka míli a midza o. **7** Nsia yinke yíbwi kunsu mingaama, ya mingaama bu mikulu mísi yo mpiñi ya yo yíkwono oburu bimburu. **8** Lo ndaama a nsia yinke yíbwi mu nsie yi mbwe. Yo yímene, yíkulu ya yíburu mburu. Miti mi mike miburu mburu makwumu-matere, yinke mburu makwumu-masemene, yinke mburu nkama». **9** Ña mbihi oño Yíisu ályele ti: «Nyaā munde wu li a matswi mu ogyughu, agyughu!» **10** Mu matala ma ágyene nde mu libee, babo ba bádzyi nde emō ya ba Kwumu ya buolo bábwi ofwulu nde mu mi mitala mankumu. **11** Nde ályele bo ti: «Kundaa be baagwa mansweghe ma Empu e Nzaami, lo kundaa baara baba ku mbala mandagha mwohonu okaluru mu mankumu, **12** mu efaana kiili, “ngu okala ti bapana mihi, bo ka bamono elogho o, ngu okala ti bo bagyighili ogyughu, lo bo ndagha obaghala we, kala pele sa bagyini mayele ya Nzaami sa asa bo kolokolo.”» **13** Yíisu áfirilyele bo ti: «Kala ti be ka liibaghala nkumu yi o, lo bunu-abo be likughu obaghala mankumu

mwohonu ma make? **14** Mukunu aakakunu Ndagha a Nzaami. **15** Ba bali mu mukogho a nzili me babo baala mu bo baakakunu Ndagha a Nzaami, lo ña baakagyughu bo yo, Satana aakayamaha Ndagha yi baakunu mu bo. **16** Babo ba baakunu mu bibini bi bili a mameē, me babo baala bu bagyughu Ndagha a Nzaami, basaakihi yo mu esee, **17** lo ka bali a midza mu bomo o. Bo baakasa kana yini a mu mana matala. Ña ookagya mpara bwunu we kimini mu nkooro a Ndagha a Nzaami, oño bo ka baafirikasa kana o. **18** Babake ba baakunu kunsu mingaama, me babo ba baakagyughu Ndagha a Nzaami, **19** lo minyoō mi nsie, ntono a busini bubu mpya ya nzala bilogho bibike bu yisomo mu mikolo mi bo, biikasa Ndagha a Nzaami mpiñi ya yo ka yiburu mburu o. (aiññ g165) **20** Babake ba bákunu mu nsie yimbwe, babo me ba baakagyughu Ndagha a Nzaami, bo baakakihi yo ya baakaburu mburu: Mumō mburu makwumu-matere, wu muke mburu makwumu-masemene, mukimi mburu nkama.» **21** Yíisu áfirilyele bo ti: «Baakatwulu mwindi kunsu nkuru, bwunu we ku nsini a mbughu? Ka ña yulu a ebini ki baakatwulu mwindi o? **22** Mu kuulu, ka oli a ndagha si mō yi ensweghe yi aagwene omogono ña otsyeme o. **23** Kala ti mbwuru li a matswi mu ogyughu, agyughu.» **24** Yíisu áfirilyele bo ti: «Lisa mayele mu mi liikagyughu be. Eteese ki liikateese be bambaala, me mu kyini ekye si akala baateese be, ya sa bafiribwehe be bi biluru. **25** Mu kuulu, kundaa munde wu li a elogho, sa bafirigwa nde, lo kundaa munde wu gwene a elogho, sa bamaha nde si ekye ki ali a nde.» **26** Yíisu áfirilyele ti: «Emfumu e Nzaami efaana a mburu yi onyahala baghala munsu nseghe. **27** Ngu okala ti yonjomo, ngu okala ti nde kahala mihi, mwíi ya mpyibi, mburu yiikalughubu ya yiikakulu, lo nde ka aakagyahaba bunu-a-bo o. **28** Nsie yiikamyehē mburu yomo. Nsomo musumunu aakapala, ña mbihi oño ensia ya ña nseele bele li ligyighili ogyele mu ensia. **29** Ya mburu bu yiisaagyele, batsyiri yo mu mukpere wu a furunu mu kuulu matala mama otolo mburu maato». **30** Yíisu áfirilyele ndiri: «Nki efaana likughu ogwolo mu mi mitala Emfumu e Nzaami? Mu nki nkumu likughu osuo kye? **31** Kye efaana a liburu li mutaade liili ña baakakunu lo mu nsie, lo liluru osala mu mburu yohonu yili ña busu bu nsie. **32** Lo, kala bakunu lo, limene ya liluru miswoho myehene

mutele ya lipaha mampala ma manene. Mu obo banmini ba mayulu baakatwu manzo ma bo mu mampala ma nde.» **33** Me mu mankumu malagha mama bu Yiisu ákaluo baara Ndagha a Nzaami bwunu a bu bákughu bo ogyughu nde. **34** Nde ákabili ya bo yini a mu mankumu, lo nde ákabaala binduono bi nde mankumu mwohono ña áli nde ngasighi ya bo. **35** Etsughu kyini ekye mu nkonkolo, Yiisu ályele kundaa binduono bi nde ti: «Litswe lisaghaba ku ngulu a mubu yinke». **36** Bu bamana obvurulu mpwumu a baara, binduono bi Yiisu bígyene ya nde mu bwara mu áli nde. Óli si ya mabwara makimi ya nde. **37** Efulu kii mpini ébwi ofulu ya mampo ma madza mákabwa mu bwara ya bwara búkalwulu mu madza. **38** Yiisu ákayongomo ku masini ma bwara ya ásiili mutswi mu tsulu li biko. Binduono bísiili nde ya bílyele ti: «Muluo, bihi lili mu okapfighili ya we ka li mu okamono mukolo mpara o?» **39** Yiisu bu asighili, áfyē efulu ya ályele madza ma mubu ti: «Dzuunu! Kala pii!» Efulu éfi, ya edzuunu ki enene égyi. **40** Ya nde ályele kundaa bo ti: «Mu emakye be lili a nzalamweē? Be nkini ka lili a kana o?» **41** Enkwughu ki enene ésughuru bo ya bákabili bo-a-bo ti: «Nde nande ali, mbwuru wu, wuulu efulu ya mubu biikagyughu nde?»

5 Yiisu ya binduono bi nde báto ku ngulu yinke yi a mubu mu etsulu e nsie ki ba-Ngerasenyēē. **2** Yiisu bu asaapala mu bwara, baghala mutsyini wu áali a mufulu wu mubi ápala kunsá mampyeme ya áyabwana nde. **3** Nde kunsá mampyeme ákakala ya ka óli a mbwuru wu áakughu ofirikuru nde misyi o, ngu okala basyene. **4** Mu kuulu, mansa malagha bákawulu nde myili kunsá edzu ya bákakuru nde mu basyene, lo nde ákabulu edzu ya ákatsyiri basyene. Ya ka óli a mbwuru nga-mpini mu odzarala nde o. **5** Matala mwohono, mpyibi ya mwii, nde áli kunsá mampyeme ya ku yulu a minguo. Nde ákabulukehe bingubu ya ákabuludzwaha nyuru a ndeme mu mameē. **6** Nde átaala Yiisu, áyabara, ákunu mabuo mu nsie ña nkulu a nde, **7** ya ákehe engubu ti: «Yiisu, Mwana a Nzaami, Nzaami wu a Ensoō-yulu, nki ndagha li ña kara li bihi a we? Me mbuono we mu nkhwumu a Nzaami, ka mwehē me kimini o!» **8** Nde ábili obo mu kuulu Yiisu ákalyele nde ti: «Mufulu wu mubi, pala mu baghala wu!» **9** Yiisu áfwulu nde ti: «Nkwumu a we na?»

Nde ábvuhulu ti: «Nkwumu a me Mpwumu, mu kuulu bihi balagha lili.» **10** Ya nde ábuono Yiisu ku olagha ti nde anyaa ogweghe mifulu mi mibi ku nsie nkimi. **11** Ankoho, óli a mukaā a bangubulu wu munene ña bele a munguo ba báli mu okabuludza. **12** Mifulu mi mibi míbuono Yiisu ti: «Gweghe bihi mu bangubulu banii, nyaā bihi lisomo mu bo.» **13** Nde ágwi bo muswa ya mifulu mi mibi mípala, míyisomo munsá bangubulu ya bangubulu bwohono básughu ku nsie a munguo ya báybwa mu mubu. Bo áli bakughu oto mapfwunu-muolo, ya bangubulu bwohono bákpi mu madza ma mubu. **14** Baara ba bákakebe bangubulu bábara ya báyitsala nsia kunsá bvulu ya mu mala, ya baara báyitala nki ndagha áaluru. **15** Bo báyanto kundaa Yiisu ya bo bámono baghala wu áali a mpwumu a mifulu mi mibi, wu áabwi nsini, wu áalaha binkuru ya wu áali a embwuru e nde kyehe. Bo bábagha nzalamweē. **16** Baara ba bámono mandagha ma máluru bályele bo mi míbwi mu baghala wu áali a mifulu mi mibi ya mu bangubulu. **17** Mu obo, bo bábwi obuono Yiisu mpaala amara mu etsulu e nsie e bo. **18** Mu matala ma ókasomo Yiisu munsá bwara, baghala wu áali a mifulu mi mibi ábuono nde mu okala ya nde. **19** Lo Yiisu ka ágwi nde muswa o ya ályele nde ndiri: «Gye ku nzo a we, kundaa baara ba we ya lyele bo mandagha mwohono ma oogyighili Mfumu mu we, bunu-abo nde aamono we nyii.» **20** Nde ágyene ya ábaana otsala nsia a mandagha mwohono ma ogyighili nde Yiisu mu etsulu e nsie ki baakata Mabvulu-kwumu, ya baara bwohono bákinjimi. **21** Yiisu áfiribvughuru ku ngulu a mubu yinke mu bwara, ya mpwumu a baara yíyabvugunu ña áli nde ña mukogho a mubu. **22** Mfumu a nzo a lisamana a ba-Dzwife mumō, nkhwumu a nde Dzayiruse, áyato. Bu amono Yiisu, nde ábwi ña nsie a myili mi nde, **23** ya ábuono nde ku olagha ti: «Mwana a me wu asala wu mukaha li kunsá lipfu. Gya, naā nde myaa mpaala nde abvwughu ya akala mweē!» **24** Yiisu ágyene ya nde. Mpwumu a baara yi nene yínama nde ya yíkasa nde mpiji. **25** Ankoho óli a mukaha mutsyini ña nsa baara babo wu áali a ebyele kii okapala makili ki ési bamvulu kwumu ya buolo. **26** Nde ámono mpara yi alagha ña myaa mi bangaa-libughu balagha, ya ámana nzi a nde yohono wene a omono bubwe, ña yulu a yini a mpara yíikabvulu. **27** Bu agyughu bákabili mu Yiisu, nde ágyi ña nsa baara, ña

mbihi a nde ya ábyeme enkuru e nde. **28** Mu kuulu nde ákalyele ti: «Kala me mbyeme yini a enkuru e nde, me sa ndzughu.» **29** Ŋaana oŋo, makili ma mákapala nde mákanyama, ya nde ámono mu nyuru a nde ti ádzughu mu bubyele bu nde. **30** Yiisu ásoolo ŋaana oŋo ti lileene lípala mu nde. Nde ákaghala ŋa nsa baara ya áfwulu ti: «Nande aabyeme binkuru bi me?» **31** Binduono bi nde bílyele nde ndiri: «We li mu okamono mpwumu a baara ba bali mu okasa we mpiŋi, ya we firifwulu ti: “Nande aabyeme me?”» **32** Lo Yiisu áatala ŋa kara li baara mu omono mbwuru wu áabyeeme nde. **33** Mukaha bu agyhaba mi mfbwi mu nde, ábwi oteghere mu nzalamweé, ábwi ŋa myili mi Yiisu ya ályele nde enganyama kyehehe. **34** Lo Yiisu ályele nde ndiri: «Mwana a me wu mukaha, kana li we liibvwuhu we. Gye mu edzuunu, nyaá we dzughu mu bubyele bu we.» **35** Yiisu áli nkini mu okabili ŋa óyato baara ba báfi ku nzo a mfumu a nzo a lisamana a ba-Dzwife, ba bályele ndiri: «Mwana a we aakpi. Mu emakye we aafirisa Muluo enkwili mu mwana a we?» **36** Lo Yiisu wu áagyughu mandagha mamó ályele kundaa mfumu a nzo a lisamana a ba-Dzwife ti: «Ka kala a nzalamweé o, sa yini a kana.» **37** Ya nde ka ákihi ti baara bagye nzili mó ya nde o, kala ti ka yini a Piere, Dzake, ya Dzā mbwee a Dzake. **38** Bu bato ŋa nzo a mfumu a nzo a lisamana a ba-Dzwife, Yiisu ámono mpwumu a baara yi áali kunsu kyaá. Baara bákali ya bákakehe bingubu. **39** Bu asomo munsu nzo, nde ályele bo ti: «Kyaá ki kii ema ya bilili bi bii ema? Mwana ka aakpi o, lo nde ogyoromo aagyoromo.» **40** Bo bákasebe nde. Bu apaha baara bwohonu ku mbala, Yiisu ágwole taara ya ngughu, ya ba báli ya nde, ásono ku óli mwana. **41** Nde ákwara mwana mu kwogho ya ályele nde ndiri: «Talita kume», mbaala ti, «Mutughu, me ndyele we ti: Sighili!» **42** Ŋaana oŋo, mutughu átemene ya ábwi odzyara. Nde áli a bamvulu kwumu ya buolo. Bo bákiŋimi ku olagha. **43** Yiisu átswi bo mukele mu kuulu mbwuru si mutsyini anyaa osoolo ndagha oyo, ya nde ályele bo bagwa mutughu bi-odza.

6 Yiisu ámara oŋo ya ágyene ku bvulu li nde, ya binduono bi nde bínama nde. **2** Etsughu kii sabate bu eto, nde ábwi oluo mu nzo a lisamana a ba-Dzwife. Baara balagha ba bákagyughu nde bákiŋimi ya bályele ndiri: «Mbwuru wu

mandagha ma kunu-ako aabagha mo? Nande aagwi nde munzeele wu ya bimaá bi ali mu okasa mu myaa mi nde? **3** Nde ka li munkomo-manzo o, mwana a Mari, naana a Dzake, Yose, Yude ya Simō? Ya bankele ba nde ka ŋa bali o, ŋa kara li bihi?» Bo ka bási kana mu nde o. **4** Lo Yiisu ákalyele bo ndiri: «Yini a mu nsie a nde baakabihi ogwa mubighili budziri, ŋa kara li baara ba dzumu li ndeme ya baba nzo a nde.» **5** Oko nde ka ákughu osa emaá si etsyini o, nde yini a ndaama a babyele ádzuhu, babo ba ánaá nde myaa ŋa yulu mitswi mi bo. **6** Yiisu ákiŋimi mu kuulu bo ka báli a kana o. Ŋa mbihi oŋo, Yiisu ákabulugye mu mala ma máli be-bele ya Nadzarete ya ákabululuo. **7** Bu ati bantumu ba nde kwumu ya buolo mbili, ábwi ogweghe bo bagye buolo-buolo ya ágwi bo lileene lili obyí mifulu mi mibi. **8** Átswi bo mukele ti banyaá obiri elogho si emō, ngu okala limpa, ngu okala empogholo bwunu we nzi mu muswele kala ka yini a mukaana o. **9** Lo nde ályele bo ti: «Lilaha bikogholo mu myili ya ka lilaha binkuru bi bila byele o.» **10** Yiisu áfirilyele bo ti: «Ŋa akala liisomo be munsu nzo ngamō, likala omo tee mu matala ma akala liimara be oŋo. **11** Ya kala ti mu ebini nga-emō baara babihi obwana be bwunu we ogyughu be, mu matala ma liimara be oŋo, likubulu lifufunu li myili mi be, obo sa osuo bumpughulu mu bo.» **12** Binduono bígyene ya bítsala nsia ti baara báfaana ogyiŋi mayele. **13** Bye bíkabyi mifulu mi mibi kyele, bíkakili babyele balagha maala ya bíkadzuhu bo. **14** Mukogho Erode ágyughu mi okasa Yiisu. Mu kuulu nkwwumu a Yiisu yíkadzumu nsia ya baara bákalyele ti: «Mbwuru wu Dzā Mubogholo aasighili ŋa kara li ba bákpi. Me mu obo nde ali a lileene mu okasa bimaá.» **15** Babake bákalyele ti: «Munde Eli.» Bakimi bákalyele ti: «Nde li mubighili ti anga mumō mu mibighili mi bihi.» **16** Lo Erode bu agyughu mandagha mamó, ályele ti: «Dzā wu aantumu me ti bakehe nde bolo, me nde aasighili ŋa kara li ba bákpi!» **17** Mu kuulu, Erode ndeme áli aagweghe baara bayisyimi Dzā ya balo nde mu boloko, mu nkooro a Erodyade mukala a Filipe mwana a taara a nde, wu ákie nde. **18** Mu kuulu Dzā ákalyele Erode ti: «We ka li a muswa mu ogwole mukala a mwana a taara a we o.» **19** Erodyade áli a mbele a Dzā ya ákasagha odzwa nde. Lo ka ákakughu o, **20** mu kuulu Erode áli a nzalamweé a Dzā,

bu ábaghala ti Dzā áli mbwuru wu a nsumu ya wu a ngili. Mu obo Erode ákakala nde. 19 ákagyughu nde Dzā, bitsimi bi nde bíkagwimi, lo nde ákagyughu Dzā ya esee. 21 Lo Erodyade ábagha mpeene yi odzwa Dzā etsughu ki ósi Erode malagha mama ndibili a mweē a etsughu ki báburu nde. Erode áti mbili mu oyadza basala ba nde baba budziri, bamfumu ba bambumbulu ya bansughu baba etsulu e nsie kii Ngalile. 22 Mwana a Erodyade wu mukaha áyasomo munsu mu bákadza malagha ya ákakini. Makini ma nde mágwí Erode ya baara ba ágwí nde mpighi esee. Mu obo mukogho ályele kundaa mutughu mukaha ndiri: «Luomo me nswe elogho ki dzyi we, me sa ngwa we kye.» 23 Nde álabá mukihí: «Ki aaluomo we me, me sa ngwa we kye, ngu okala ti epa ki empu e me.» 24 Mutughu mukaha ápala ya áfwulu ngughu a nde: «Emakye me aanduomo?» Ngughu a nde ábvuhulu ti: «Mutswi a Dzā Muboghoró.» 25 Mutughu mukaha ábvughuru maswa-maswa kundaa mukogho ya ályele nde ndiri: «Me ndzyi we gwa me mutswi a Dzā Muboghoró mu ndonjō lili.» 26 Mukogho ányoō ku olagha, lo mu nkooro a mikihi mi álabá 19a nkulu ba bákadza, nde ka áli a bu ofiribihi o. 27 19aana o19o nde ábi19ini nkyele mutsyini ya litumu lili ogya a nde mutswi a Dzā. Nkyele áyikehe Dzā bolo munsu boloko, 28 ya áyabiri mutswi a nde mu ndonjō. Nde ágwí mutswi kundaa mutughu ya mutughu ágwí nde kundaa ngughu a nde. 29 Binduono bi Dzā bu bigyughu ndagha oyo, bíyagwolo ebyimi e nde ya bálo kye kunsu mpyeme. 30 Bu bayabvununu kundaa Yíisu, bantumú bályele nde mandagha mwohonó ma bágyighili ya ma baluo bo. 31 Yíisu ályele bo ndiri: «Liyatswe mu libee, ku ebini ki egwene a baara, ya limagwumu.» Mu kuulu baara balagha báakagya ya báakabvughuru, ya bo ka bákabagha si matala mama odza o. 32 Mu obo bo básomo mu bwara mu ogye ku libee, ku ebini ki egwene a baara. 33 Baara balagha bámono bo mu okagye ya básoolo bo. Mu obo, bo bákafa mu mabvulu mwohonó mu myili, bábvununu ya bátswama oyito ku okagye Yíisu ya bantumú ba nde. 34 Yíisu bu apala mu bwara, ámono mpwumu a baara yi nene ya nde ámono bo nyií, mu kuulu bo báli ti anga bindoomo bi bigwene a munkaala-bibuolo. Mu obo nde ábwi oluo bo mandagha malagha. 35 Buulu bwihi ali ayi ku ogyili, binduono bi Yíisu bíyalyele nde ti: «Ebini ki ka eli a baara o, ya bwihi buugyili. 36 Bvurulu baara ba ku mala ma bo mpaala bayiswumu bi-odza mu mala ma masala ya ma manene ma mali bitaa-taa bi.» 37 Lo Yíisu ábvuhulu bo ti: «Be beme, ligwa bo bi-odza!» Bo bályele nde ndiri: «We dzyi ti bihi liyiswumu mampa ma makughu mu nkama-gyolo yi a denye ya bihi ligwa bo mo?» 38 Yíisu áfwulu bo ti: «Mampa kpe be lili a mo? Ligye limatala.» Bu bayitala, bályele nde ndiri: «Mampa mataana ya banswi buolo lili a bye.» 39 Mu obo, Yíisu ágwí bo litumu mu obwihi baara nsini mu yulu a nsele yi a mapeē mu mampwumu. 40 Baara bábwí-nsini mu miluo mini baara nkama, mi mike baara makwumu-mataana. 41 Nde bu agwolo mampa mataana mamó ya banswi buolo babo, ákala ku yulu ya ábvurulu matuono. 19a mbihi o19o, ákehe mampa ya ágwí mo kundaa binduono bi nde mpaala bo bakaba mo. Yíisu ákaba si banswi buolo kundaa baara bwohonó. 42 Baara bwohonó báli ya bágyughuru ya 43 binduono bítoló bitsulu bi mampa ya bibi banswi bi bísyili. Bo báluhu bitubu kwumu ya byele. 44 Baara ba báli mampa báli babaghala mapfwunu mataana. 45 19aana o19o, Yíisu ásiní binduono bi nde mu osomo mu bwara ya mu otswama ku ngulu yinke yi a mubu, ku nkolo yi a bvulu lili Betesayida, edzighi ki aabvurulu ndeme baara ku manzo ma bo. 46 Mu obo nde ásihi bo ya ágyene ku yulu a munguo mu oyisamana. 47 Mpyibi bu yibwi, bwara búto kara-a-kara li mubu ya nde ábulusyili ngasighi 19a yulu a nseghe. 48 Yíisu ámonó ti binduono bi nde bíkamono mpara mu odzughu bwara, mu kuulu bo báli ku mfulu a efulu. Ku bele a ku ookya bwihi, nde ágyene kundaa bo mu myili 19a yulu a madza ya ákaabululuru bo. 49 Bu bamono nde mu okayadzyara 19a yulu a madza ma mubu, bo bátsimi ti ekye etoomo éeli ya bákehe bingubu. 50 Mu kuulu bo bwohonó bákamono nde ya báli a mikoló maā-maā. 19aana o19o Yíisu ábílí ya bo ya ályele ti: «Likala a bukyini! Wu me, ka likala a nzalamweē o!» 51 Ya nde ásomó mu bwara ya efulu éfi. Bo báki19imi ku olagha, 52 mu kuulu bo ka bábaghala ndagha yi a mampa o: mu kuulu bo báli a mikoló ngyi. 53 Bu bamana opala mubu, bo báto 19a mbwuu yi a etsulu e nsie kii Ngenedzarete. 54 Bo bu basaapala mu bwara, baara básoolo ti munde Yíisu. 55 Baara bágyene mu etsulu e nsie kyehe ne ya bá kayabiri babyele 19a yulu a malaba mu nswe ebini ki bákasoolo ti

nde li oŋo. **56** Mu nswe ebini ki ókato Yíisu, mu mala, mu mabvulu, mu manto ma mala, baara bákawulu babyele mu mambala ya bákabuono nde mu kuulu bo babyeme yini a mufuru a enkuru e nde. Bo bwohono ba bákabyeme nde bákadzughu.

7 Ba-faridzye ya ndaama a baluo-mikyene ba báfi ku Yerusaleme bábvuŋunu ya Yíisu. **2** Bo bámono binduono bi nde bibike bi bíkadza myaã mpii, gwene a oswagha myaã. **3** Ankoho ba-Faridzye ya ba-Dzwife bwohono ka baakadza o kala ti bo ka bagyighili oswagha myaã o, mu kuulu bo baakasalala ekulu ki bankagha-kwuru ba bo. **4** Ya mu matala ma baakafa bo ku mbala yi a baara bwohono, bo bafaana otswama otsehebe manyuru nsomo badza. Bo baakasalala mikyene mikimi mimi ekulu e bo ti anga oswagha bibaha, mayughu, bibene bibi boronze ya mambughu. **5** Mu obo ba-Faridzye ya baluo-mikyene báfswulu Yíisu ti: «Mu emakye binduono bi we biikadza ya myaã mimi mubviini ŋa ebini kii onama ekulu ki bankagha-kwuru?» **6** Yíisu ábvuhulu bo ndiri: «Edzayi ágyighili obili bu ookabili mubighili mu be, bampibi, bwunu a bu básono ti: “Ekaana ki okasyighi me yini a mu bibolo, lo mikolo mi bo mili la ya me. **7** Ku obwunu baakabuono me, mu kuulu maluo ma bo mali yini a mikyene mi baara.” **8** Be liikanyaghala mikyene mi Nzaami, ya liikanama ekulu e baara.» **9** Nde áfirilyele bo ndiri: «Be liikatsili mukyene a Nzaami ya likatwulu ekulu e be. **10** Mu kuulu Moyidze ályele ti: “Gwa taara ya ngughu a we budziri” ya “sa badzwa munde wu aatughu taara ya ngughu a nde.” **11** Lo be, be likalyele ti: Kala mbwuru lyele taara bwunu we ngughu a nde ndiri: “Bibye bi kaangwa me we mu obaha we, bili Korobane, mbaala ti, ekaba kii ngili”, **12** be ka lili mu ogwa nde nzili yi ofiribaha taara bwunu we ngughu a nde o. **13** Obo me bu lili mu okakahaba be Ndagha a Nzaami mu nkooro a ekulu ki lili mu okaluo be. Ya be likasa mandagha makimi mama obo.» **14** Ŋa mbihi oŋo, bu afirita mpwumu a baara mbili, Yíisu ályele bo ndiri: «Be bwohono ligyughu ya libaghala! **15** Ka oli a elogho ki eli ku mbala a mbwuru kiili bu esomo mu nde esumunu nde o. Lo ngu ki eekapala mu mukolo a nde ki eekasumunu nde.» [**16** Kala ti mbwuru li a matswi mu ogyughu, agyughu.] **17** Mu matala ma ógyene Yíisu ku nzo, ŋa mbihi a ŋa abulusihi

nde mpwumu a baara, binduono bi nde bífswulu nde mu mi mitala nkumu oyo. **18** Nde ályele bo ndiri: «Behe si ka lili a mayele o? Be ka liibaghala o ti ka oli a elogho kii ku mbala kiili bu esomo mu mbwuru ekughu osumunu nde o? **19** Mu kuulu kye ka eekasomo mu mukolo a nde o, lo mu mila mi nde. Ŋa mbihi oŋo kye eekagye ku nto-a-nkwulu.» Obo Yíisu ásuu ti bi-odza byehene bili bitsyeme. **20** Nde áfirilyele ti: «Ŋu bi biikapala mu mukolo a mbwuru biikasumunu nde. **21** Mu kuulu me ku kara, mu mukolo a baara, ookapala bitsimi bi bibi: enkwunu, pfyibi, odzwa baara, **22** obvughu mbughu ya mukala bwunu we mulumu a nganda, nzala a obagha, mukolo mubi, mayele mabi, esighi, nta-ntala yi mbi, oburulu mandagha mu babake, mubili a nyuru, lala. **23** Mandagha mwohono ma mabi mamo maakapala mu mukolo a mbwuru ya maakasumunu nde.» **24** Yíisu ámara oŋo ya ágyene ku etsulu e nsie kii bvulu lili Tire. Oko nde ásono mu nzo nsyini, nde ka akadzyi o ti mbwuru si mumō asoolo, lo nde ka ákughu osweme o. **25** Mukaha mutsyini wu áali a mwana wu mukaha wu áali a mufulu wu mubi ágyughu nsia a Yíisu ya áyabwa ŋa baana a myili mi nde. **26** Mukaha munde áli mu-Ngereke, wu báburu ku Siri, mu etsulu e nsie kii Fenisi. Nde abuono Yíisu mu obyi mufulu wu mubi wu áali mu mwana a nde. **27** Lo Yíisu ályele nde ndiri: «Nyaã baana bamatswama ogyughuru, mu kuulu ka oli bubwe mu ogwolo mampa ma baana ya otsili mo kundaa bimbwa-mbwa o.» **28** Lo mukaha ábvuhulu nde ti: «Ngayma Mfumu! Lo bimbwa-mbwa bi bili ku nsie a tabele biikadza mpfi-mpfihini yi ookabwihi baana.» **29** Yíisu ályele nde ndiri: «Mu nkooro a mvuru oyo, gye, mufulu wu mubi aapala mu mwana a we wu mukaha.» **30** Nde bu ato ku nzo a nde, áyibaha mwana wu aagyongomo ŋa yulu a mbughu, mufulu wu mubi áli ápala mu nyuru a nde. **31** Ŋa mbihi oŋo, Yíisu ámara mu etsulu e nsie kii Tire. Nde ábululuru mu bvulu lili Sidō mu ogye ku nkolo a mubu wu a Ngaliile, ya ábulusaghaba etsulu e nsie kii Mabvulu-Kwumu. **32** Bagyi a nde enkpa-matswi ki ékabili mu mpara, ya bábuono nde anaã nde myaã ŋa yulu a mutswi. **33** Yíisu bu ábiri nde mu libee, mana la ya mpwumu a baara, álo nde milyeme kunsu matswi, átswulu manteē mu mulyeme ya ábyeme nde nzalisogho ya manteē ma nde. **34** Ŋa mbihi oŋo, nde ákala ku

yulu, ágwumunu ya ályele ti: «Efata», mbaala ti, «we dzubulu!» **35** Ijaana oŋo, matswi ma nde mádzubulu, nzalisogho yíleē ya ábaana obili ku obwe. **36** Yiisu átswi bo mukele wu ogwene olyele ndagha oyo kundaa mbwuru si mumō. Lo nswe matala ma ákalighi nde bo banyaā otsala nde nsia, baara bákatsala nsia yiluru. **37** Baara bákakinimi ku olagha ya bákalyele ti: «Nde aakagyili mandagha mwohonno ma mabwe. Nde li mu okasa kuulu si okala binkpa-matswi bigyughu ya bankini babili.»

8 Mu bitsughu bibye, mpwumu a baara yífiribvuununu. Mu kuulu yo nkini ka yíli o, Yiisu áti binduono bi nde mbili ya ályele bo ndiri: **2** «Mpwumu a baara yi yili mu ogwa me nyí, mu kuulu bitsughu bitere bo bali ya me, ya ka bali a bi-odza o. **3** Kala me mbvurulu bo ku mala ma bo nzala, sa bakolo mu nzili, mu kuulu ŋa kara li bo, babake la baafi.» **4** Binduono bi nde bíbvuhulu nde ti: «Kunu-ako bakughu obagha mampa mpaala bo bagyughuru ŋa ebini kiili baara we yí?» **5** Yiisu áfwulu bo ti: «Be mampa kpe lili a mo?» Bo bábvuhulu nde ti: «Nsaama.» **6** Oŋo nde átuumu mpwumu a baara babwa-mansini mu nsie. Bu agwolo mampa nsaama mammo, ábvurulu matuono kundaa Nzaami, ákehe mo ya ágwi binduono bi nde mu kuulu bakaba mo, ya bo bákaba mo kundaa mpwumu a baara. **7** Bo báli si ya mana binswi-nswi. Yiisu bu amana osemi bye, ályele binduono bi nde bikaba byehe si. **8** Baara báli ya bágyughuru, ya bátolo mankuru nsaama bi bitsulu bi bísyili. **9** Bo áli bakughu oto mapfwunu-mana. Ŋa nseele, Yiisu ábvurulu bo ku mala ma bo. **10** Ijaana oŋo Yiisu ásommo mu bwara ya binduono bi nde, ya bágyene ku etsulu e nsie kii Dalamana. **11** Ba-Faridzyé bágyi kundaa Yiisu, bábaana otsoho ya nde, ya mu otsihi nde, bo báluomo nde elyimi ki eefa ku yulu. **12** Yiisu ágwumu mu mpini mu mufulu a nde ya ályele ndiri: «Mu emakye baara baba eseene ki bali mu oluomo elyimi? Mu engarjma me ndeyele be yo, ka bagwa elyimi si emō kundaa baara baba eseene ki o.» **13** Ŋa mbihi oŋo, Yiisu ámara oŋo ya ásommo mu bwara mu ogye ku ngulu a bana yinke. **14** Binduono bi Yiisu bídzinimi ogwolo mampa. Bo báli yini a limpa litsyini muna bwara. **15** Yiisu átswi bo mukele wu: «Lidzubulu mihi ya lisa mayele mu pfini li ba-Faridzyé ya lili Erode.» **16** Binduono bi Yiisu bíkatsimi bye a bye ti Yiisu

bu ábili obo mu kuulu bo ka báli a mampa o. **17** Nde ábaghala mi bákatsoho bo-a-bo ya áfwulu bo ti: «Mu emakye be lili mu okatsoho ya lili mu okalyele be a be ti be ka lili a mampa o? Be nkini liibaghala o? Be nkini liikwara o? Mikolo mi be nkini mikubu? **18** Be lili a mihi, lo ka lili mu okamono o? Be lili a matswi, lo ka lili mu okagyughu o? Be ka lili mu okalibili mweē o **19** ŋa aantsyiri me mampa mataana mu ogwa kundaa baara mapfwunu-mataana, bitubu bi bilwulu mu bitsulu bi mampa kpe be liibiri?» Bo bábvuhulu: «Kwumu ya byele.» **20** «Ya ŋa aantsyiri me mampa nsaama mu baara mapfwunu-mana, bitubu bi bilwulu kpe be liibiri?» Bo bábvuhulu ndiri: «Nsaama» **21** Yiisu ályele bo ti: «Be nkini liibaghala o?» **22** Yiisu ya binduono bi nde bíto ku Betesayida. Baara bágyi a nde enkpa-mihi ya bábuono nde abyeme kye. **23** Yiisu ákwara enkpa-mihi mu kwogho ya ábiri nde ku mbala a bula. Bu atswulu manteē ŋa yulu a mihi mi nde, ánaā nde myaā ya áfwulu nde ti: «We li mu omono elogho?» **24** Enkpa-mihi édzubulu mihi ya élyele ndiri: «Me ndi mu okamono baara, me ndi mu okamono bo ti anga miti, lo bo bali mu okabulugye.» **25** Yiisu áfiritwulu nde myaā ŋa yulu a mihi, ya enkpa-mihi bu epana mihi, kye édzughu ya ékamono bubwe. **26** Oŋo Yiisu abvurulu nde ya ályele nde ti: «Ka somo kusa bula o.» **27** Yiisu ya binduono bi nde bágyene ku mala ma máli mu etsulu e nsie kii Sedzare lili Filipe. Mu nzili nde ábwi okafwulu binduono bi nde ti: «Mu mbiili a baara, me nande ndi?» **28** Bo bályele nde ndiri: «Baara bana ti we li Dzā Muboghorro, babake ti we li Eli, bakimi si ti we li mumō mu mibighili.» **29** Yiisu áfwulu bo ti: «Lo mu be, me nande ndi?» Piere ábvuhulu nde ti: «We, we li Kriste.» **30** Yiisu átswi bo mukele banyaā olyele ndagha oyo kundaa mbwuru. **31** Mu obo, nde ábaana oluo bo ti Mwana a mbwuru áli faana omono mpara yi alagha. Bakwuru, bakwuru ba bangaa ba Nzaami ya baluo-mikyene báfaana obihi nde ya odzwa nde. Ya ŋa mbihi a bitsughu bitere, nde faana osighili ŋa kara li ba bákpi. **32** Nde ákalyele bo mandagha mammo epankala. Mu obo Piere ábiri nde mu libee ya áfyē nde. **33** Lo Yiisu bu akaghala, ákala binduono bi nde ya áfyē Piere ya ályele nde ti: «We Satana! Mara ŋa nkulu a me, mu kuulu we ka li mu okatsimi ti anga Nzaami o, lo ti anga baara.» **34** Ŋa mbihi oŋo, nde áti mpwumu a baara ya

binduono bi nde mbili, ya ályele bo ndiri: «Kala ti mbwuru dzyi onama me, lo atunu nyuru a ndeme, agwolo kuruwa li nde ya anama me. 35 Mu kuulu, nswe munde wu dzyi obvwuhu laama li nde, sa apfihili lo. Lo, nswe munde wu aapfihili laama li nde mu nkooro a me ya mu nkooro a Nsia yi mbwe, sa abvwuhu lo. 36 Nsa ndaana mbwuru aakala a yo kala ti nde bagha bupfulu bu nsie nsyini ya pfihili laama li nde? 37 Nki elogho mbwuru akughu ogwa mu ogyiŋi ŋa ebini kii laama li nde? 38 Mu kuulu, munde wu akala aamono budzwa mu me ya mu mandagha ma me ŋa kara li eseene kii enkwunu ya kii banga-a-masumu ki, Mwana a mbwuru si sa amono nde budzwa ŋa akala aayabvughuru nde ya bangye-yulu baba ngili kunsu nsia a Taara a nde.»

9 Yiiisu áfirilyele binduono bi nde ya mpwumu a baara ndiri: «Mu engayma, me ndyele be ti, babake mu baara ba bali ŋa ka bakpa o nsomo-a-nsomo bamono Emfumu e Nzaami ki eegya mu lileene.» 2 Ŋa mbihi a bitsughu bisemene, Yiiisu ábiri Piere, Dzake ya Dzā bo ngasighi mu libee, ku yulu a munguo wu mula. Nde ákighiri ŋa nkulu a bo. 3 Binkuru bi nde bíbwi osehene ya bípeneme mu buŋu liili ka oli a laā lili kughu ogwa buŋu lili obo ŋa nsie o. 4 Eli ya Moyidze bámonono kundaa bo. Bo bákabili ya Yiiisu. 5 Piere ályele kundaa Yiiisu ndiri: «Muluo, Oli bubwe ti bihi-a-be likala ŋa. Litswe litwu bibvulu bitere: etsyini kii we, etsyini kii Moyidze ya etsyini kii Eli» 6 Piere ka ákasoolo ndagha yi obili o, mu kuulu bo báli a nzalamweē. 7 Edzi égyi ya edzyimi-a-dzyimi e kye éfughu bo, ya ndagha yípala kunsu kye: «Wu me Mwana a me wu mukolo, ligyughu nde!» 8 Ŋaana oŋo bo bátaala nkolo ya nkolo, lo bo ka bámono mbwuru mukimi o ŋa yulu a yini a Yiiisu ngasighi ya bo. 9 Ŋa bákasughuru bo munguo, Yiiisu átswi bo mukele banyaā olyele mbwuru mi bámono bo tee ŋa akala oosighili Mwana a mbwuru mu lipfu. 10 Bo bási ndagha oyo nsimi, lo bakafumunu bo-a-bo ti: «Osighili mu lipfu bunu-a-bo odzyi olyele?» 11 Ya binduono bi Yiiisu bífwulu nde ti: «Mu emakye baluo-mikyene baakalyele ti Eli faana otswama ogya?» 12 Nde ábvuhulu bo ti: «Eli tswama ogya mu obvurulu mandagha mwohonono bwunu a bu máli. Bunu-abo bakughu osonono mu Mwana a mbwuru ti nde faana omonono mpara yi

alagha ya sa babele nde? 13 Lo me ndi mu olyele be ti Eli ágyi, ya baara bási nde bu bádzyi bo, bwunu a bu oli mandagha ma básonono mu nde.» 14 Mu matala ma báyanto bo ŋa óli binduono bibike, bo bámonono mpwumu a baara yi nene yi áasi binduono ŋa kara-a-kara ya baluo-mikyene ba bákatoŋo ya bo. 15 Mpwumu a baara bu yisaamono Yiiisu, yíkinjimi ya yíyabwana nde mu ntyini mu ogwa nde mboro. 16 Yiiisu áfwulu binduono bi nde ndiri: «Be mu nsa ndagha lili mu okatoŋo ya bo?» 17 Baghala mumō ŋa kara li mpwumu a baara ábvuhulu nde ti: «Muluo, me aayambiri mwana a me wu baghala wu li a mufulu wu a nkini kundaa we. 18 Nswe ebini ki ookasyimi mufulu mwana, agwolo tsili nde mu nsie. Fulu liikapala mwana mu muŋma, aakakwere myini ya nyuru a nde yiikatighili. Me aambuono binduono bi we bibyi mufulu me, lo bye ka biileene o.» 19 Yiiisu ályele bo ndiri: «Eseene ki egwene a kana, tee nki matala me akala aankala ya be? Tee nki matala me aankuru mukolo mu be? Ligya a me nde ŋa!» 20 Bágyi a nde mwana. Mu matala ma ómonono mwana Yiiisu, mufulu wu mubi ányihini nde mu mpini. Nde ábwi ŋa nsie ya ákakinjimi, ya fulu líkapala nde mu muŋma. 21 Yiiisu áfwulu taara a mwana ti: «Obaana nki matala nde aakasa bu?» Nde ábvuhulu ndiri: «Obaana bugye bu nde. 22 Ya mansa malagha mufulu aakatsili nde ku mbaa ya mu madza mu odzwa nde. Lo kala we kughu ogyighili ndagha nga-mō, mono bihi nyiŋi ya baha bihi!» 23 Yiiisu ályele nde ndiri: «“Kala we kughu!” Munde wu aasa kana kughu ogyighili mandagha mwohonono.» 24 Ŋaana oŋo taara a mwana ákehe engubu ti: «Me nsi kana! Gya baha ogwene o kana o me!» 25 Yiiisu bu amono mpwumu a baara yi aakagya mu ntyini, áfyē mufulu wu mubi ályele nde bu: «Mufulu wu a nkini ya wu enkpa-matswi, me ngwi we litumu, pala mu mwana wu, ya ka afiriyasomo mu nde o!» 26 Mufulu wu mubi ákehe mingili ya ányihini mwana mu mpini ya ábulupala. Mwana áli ayi ti anga mbwuru wu aakpi. Mu obo baara balagha bákalyele ti nde aakpi. 27 Lo Yiiisu, bu akwara mwana mu kwogho, ásiili nde ya mwana átemene. 28 Mu matala ma obvughuru Yiiisu ku nzo, binduono bi nde bífwulu nde ŋa báli bo ngasighi ti: «Mu emakye bihi bameme liikuono obyini mufulu munde?» 29 Yiiisu ábvuhulu bo ti: «Yini a mu lisamana be likughu okapaha efa ki mufulu wu obo.» 30 Bu bamara oŋo,

Yiisu ya binduono bi nde basaghaba etsulu e nsie kii Ngilile, ya nde ka ákadzyi o ti baara bagyhaba ku áli nde. **31** Mu kuulu nde ákaluo binduono bi nde ya ákalyele bo ti: «Sa batyeghe Mwana a mbwuru ŋa myaã mi baara. Bo sa badzwa nde, ya bitsughu bitere ŋa mbihi a lipfu li nde, nde sa asighili ŋa kara li ba bákpi.» **32** Lo binduono ka bíkabaghala ndagha oyo o, ya bo báli a nzalamweë mu ofwulu nde. **33** Yiisu ya binduono bi nde báyanto ŋa bvulu lili Kaperenawume. Bu basomo mu nzo, Yiisu ábwi ofwulu bo ti: «Be mu nsa ndagha liikatsoho mu nzili?» **34** Lo bo ka bátsughu ndagha o, mu kuulu mu nzili, bo bákatsoho bo-a-bo mu osoolo nande mu bo bvulu mupfunu. **35** Mu obo Yiisu ábwi-nsini, áti Bakwumu ya buolo mbili ya ályele bo ti: «Kala mbwuru dzyi okala wu a nsomo, nde faana okala wu ensiele-mbihi mu baara bwohono ya musala a baara bwohono.» **36** Nde ágwolo muke-muke, átwulu nde ŋa kara li bo, ya bu abwumu nde, ályele bo ti: **37** «Munde wu aagyagha mu nkwwumu a me muke-muke ti anga wu, meme nde agyagha. Ya munde wu gyagha me, ka oli me nde agyagha o, lo munde wu aagweghe me nde agyagha.» **38** Dzã ályele nde ti: «Muluo, bihi liimono baghala mutsyini wu li mu okabyi mifulu mi mibi mu nkwwumu a we. Bihi liisagha nde okahaba mu osa obo, mu kuulu nde ka aakanama bihi-a-be o.» **39** Yiisu ábvuhulu ti: «Ka likahaba nde o, mu kuulu ka oli a mbwuru wuulu bu asi emaã mu nkwwumu a me, ŋaana oyo bwi obili bubi mu me o. **40** Mu kuulu, wu gwene bele bihi-a-be, li wu a bihi-a-be. **41** Ya munde wu akala aagwa be ebaha ki madza mu kuulu be lili baara ba Kriste, mu engajma me ndyele be ti, si okala ka bunu, nde ka apihili mufuru a nde o.» **42** «Lo, kala mbwuru bwihli mu masumu mumõ ŋa kara li bike-bike bi biikasa kana mu me bi, obvulu bubwe bakuru nde mu bolo limeë li linene li baakasighi bimburu ya batsili nde mu mubu. **43** Kala ti kwogho e we eekabwihli we mu masumu, tsyiri kye. Oluru bubwe kundaa we mu osomo mu laama ya ekee etsyini ya bu gyene ku mungele-a-mbaa ya bikee bi we binsa byele, ku mbaa yi aagwene okadzimi. [(Geenna g1067) **45** Kala ti kwulu e we eekabwihli we mu masumu, tsyiri kye. Oluru bubwe kundaa we mu osomo mu laama ekara ya bu batsili we ku mungele-a-mbaa ya myili mi we minsá myele. [(Geenna g1067) **47** Ya kala ti lihi li we lili mu okabwihli we

mu masumu, sorolo lo. Oluru bubwe kundaa we mu osomo mu Emfumu e Nzaami ya lihi litsyini, ya bu batsili we ku mungele-a-mbaa ya mihi minsá myele, (Geenna g1067) **48** oko bantuju ka baakakpa o, ya mbaa ka yiikadzimi o.» **49** «Mu kuulu sa bagyeele kana li nswe mbwuru mu mbaa, mpaala nswe mbwuru akala a esee ki mungba mu be. **50** Mungba li elogho ki ebwe. Lo kala ti mungba pihili makwene ma nde, mu nki elogho baabvurulu nde makwene? Likala a mungba mu beme, ya likala kunsá edzuunu be a be.»

10 Bu amara oyo, Yiisu ágyene ku etsulu e nsie kii Yude mu ngulu a mwele wu a Dzurdë. Mampwumu ma baara máfiriyaabvujunu ŋa bele a nde, ya bwunu a bu óli epfu e nde, Yiisu áfiribaana oluo bo. **2** Ba-Faridzyë báyaawulu nde, mu otsihi nde, kala ti baghala li a muswa mu obyí mukala a nde. **3** Yiisu ábvuhulu bo ti: «Nsa ndagha Moyidze átumu be?» **4** Bo bályele ti: «Moyidze ágwí baghala muswa wu osono mukaana wu odzwa bala ya obyí mukala a nde.» **5** Yiisu ályele bo ti: «Mu nkooro a mikolo ngyi mi be Moyidze ásono mukyene munde. **6** Lo ku ebaana ŋa ógyighili Nzaami bilogho byehene, nde ágyighili bo baghala ya mukaha. **7** Mu obo baghala sa asihi a taara ya ngughu a nde ya sa akala emõ ya mukala a nde. **8** Bo bansa buolo sa bakala nyuru mõ. Mu obo, ka bafiríkala baara buolo o, lo nyuru mõ. **9** Mbwuru anyaa okabala baara ba óbvughu Nzaami!» **10** ŋa bábvughuru bo ku nzo, binduono bi Yiisu si bífwulu nde ndagha oyo. **11** Nde ályele bo ti: «Mbwuru wu byi mukala a nde ya kie mukaha mukimi, nde si lisumu lili obvughu mbughu ya mukaha mukimi ŋa nkulu a mukala a nde wu a nsomo. **12** Ya kala ti mukaha byi mulumu a nde ya kie baghala mukimi, nde si lisumu lili obvughu mbughu ya baghala mukimi.» **13** Baara bágyi a bike-bike kundaa Yiisu mu kuulu nde abyeme bye. Lo binduono bi bífyë baara babo. **14** Yiisu bu amono obo, ákolo nkehe ya ályele kundaa binduono ti: «Linyaã bike-bike bigya kundaa me. Ka likahaba bo o, mu kuulu Emfumu e Nzaami eli kii babo ba bali ti anga bo. **15** Mu engajma me ndyele be ti, munde wu akala aagwene ogyagha Emfumu e Nzaami ti anga muke-muke akala ka somo mu kye o.» **16** ŋa mbihi oyo, Yiisu ábwumu bye, áseme bye mu okanaã bye myaã. **17** Yiisu bu abwi-nzili mu

ogye, baghala mutsyini ágyi kundaa nde mu ntyini ya ákunu mabuo mu nsie ña nkulu a nde. Nde áfwulu Yíisu ndiri: «Muluo wu mubwe, emakye me mfaana osa mu obagha laama lili mibvu ya mibvu?» (aiōnios g166) 18 Yíisu ályele nde ti: «Mu emakye we lyele ti me mbwuru wu mubwe? Ka oli a mbwuru wu mubwe o, yini a Nzaami li mubwe. 19 We soolo mikyene mi Nzaami: Ka dzwa o, ka bvughu mbughu ya mulumu bwunu we mukala a nganda-mbwuru o, ka turu o, ka sa bumpughulu bubu mpya o, ka sa mbwuru bubi o, gwa taara ya ngughu a we budziri.» 20 Baghala munde ábvuhulu ti: «Muluo, me aankebe mikyene mimye obaana bufulu bu me.» 21 Yíisu á тала nde ya ádz yi nde, ya ályele nde ndiri: «We gwene a elogho etsyini: Gye, tyeghe bilogho bi we byehene, gwa nzi kundaa bawe, ya we sa kala a busini mu mayulu. Ija mbihi oño, gya ya nama me!» 22 Lo nde bu agyughu obo, ámono mukolo mpara ya ágyene kuns a minyoõ, mu kuulu nde áli a busini bulagha. 23 Yíisu bu atala nkolo ya nkolo, ályele binduono bi nde ndiri: «Oli mpara kundaa bisini mu osomo mu Emfumu e Nzaami!» 24 Binduono bi nde bíkiñjimi mu mandagha mam o. Lo Yíisu áfirilyele ti: «Baana ba me, oli mpara mu osomo mu Emfumu e Nzaami! 25 Ka oli mpara kundaa nyama wu baakata ti syamo mu osomo mu lihi li ntuumu o, lo obvulu mpara kundaa esini mu osomo mu Emfumu e Nzaami.» 26 Binduono bífirikiñjimi ku oluru ya bikafulunu bo-a-bo: «Mu obo, nande kughu obvwughu?» 27 Yíisu á тала bo ya ályele ti: «Kundaa baara ndagha oyo ka yikughu okala o, lo ka kundaa Nzaami o, mu kuulu Nzaami kughu osa mandagha mwohon o.» 28 Piere ábwi-olyele nde ti: «Bihi, bihi liisihi byehene mu onama we.» 29 Yíisu ábvuhulu ti: «Me ndyele be engañma, kala oli a mbwuru wu sihi nzo a nde, banaana, bambwee, bankele, ngughu, taara, baana bwunu we manseghe ma nde mu nkooro a me ya Nsia yi Mbwe 30 ya wu gwene obagha mutala a manzo, banaana, bambwee, bankele, bangughu, baana ya manseghe nkama, ya kimini, mu matala ma maagya ya laama lili mibvu ya mibvu. (aiōn g165, aiōnios g166) 31 Balagha ba bali baba nsomo sa bakala binsiele-mbihi, ya binsiele-mbihi sa bikala baba nsomo.» 32 Bo báli mu nzili mu okakumu ku Yerusaleme, ya Yíisu átswama ku nkulu a binduono. Binduono bíli a enkwughu, ya ba bákanama nde báli

a nzalamweẽ. Yíisu áfirigye a Bakwumu ya buolo mu libee ya ábwi-olyele bo mandagha ma akala aabwana a nde ku nkulu: 33 «Bihi-a-be lili mu okakumu ku Yerusaleme. Sa batyeghe Mwana a mbwuru kundaa bakwuru ba bangaa ba Nzaami ya baluo-mikyene. Bo sa batsyiri nde mukakana wu lipfu, sa batyeghe nde kundaa baara baala ka bali ba-Dzwife o, 34 bo sa basa nde munsensehẽ, sa batswulu nde manteẽ, sa bakaha nde nswanswa ya sa badzwa nde. Lo ña mbihi a bitsughu bitere, nde sa asighili ña kara li ba bápki.» 35 Baana ba Nzebede buolo, Dzake ya Dzã, bályelele Yíisu ndiri: «Muluo, bihi lidzyi ti we sa bihi mimye mi liiluomo bihi we.» 36 Nde ályele kundaa bo ti: «Emakye be lidzyi ti me nsa mu be?» 37 Bo bályele ti: «Sa kuulu ti ña akala we kuns a nsia a we bihi libwansini, mumõ ku kwogho-a-kwogho e we, wu muke ku engbambogho e we kii bakaha.» 38 Yíisu ályele bo ti: «Be ka ligyahaba ndagha yi lili mu okaluomo be o. Be likughu oñma ebaha kii kimini ki aañma me bwunu we libogho li aambagha me?» 39 Bo bábvuhulu nde ndiri: «Bihi likughu.» Yíisu ábvuhulu bo ti: «Ebaha kii kimini aañma me, be sa liñma kye ya be sa libagha libogho li aambagha me. 40 Lo mu mi mitala obwa nsini ku kwogho-a-kwogho e me bwunu we ku engbambogho e me, ka me nkughu ogwa bibini bibye o. Bibini bibye bili bibi ndaa babo ba ogwaa Nzaami bye.» 41 Ija ógyughu binduono kwumu bibike obo, bye bíkolo Dzake ya Dzã nkehe. 42 Yíisu áti bo bwohon o mbili ya ályele ndiri: «Be lisoolo ti ba baakatumu ma nsie baakatumu mo ti anga bamfumu ya baara baba mupfunu baakasuo litumu li bo. 43 Ka oli bumõ ña kara li be o. Mbwuru wu dzyi okala mupfunu ña kara li be sa akala musala a be. 44 Ya munde wu dzyi okala wu a nsomo ña kara li be nde sa akala nkana a be. 45 Mu kuulu Mwana a mbwuru ka aagyi mu kuulu baara basalala nde o, lo mu osalala baara ya mu ogwa laama li nde mu ofiri ekolo mu baara balagha.» 46 Yíisu ya binduono bi nde báyanto ña bvulu lili Yeriko. Mu matala ma ókapala Yíisu mu Yeriko ya binduono bi nde mpwumu a baara yi nene, baghala mutsyini wu aakaluomo baara nzi wu áali enkpa-mihi, ábwi-nsini mu mukogho a nzili. Nkwumu a nde Baretime, mwana a Time wu baghala. 47 Nde ágyughu ti Yíisu musi Nadzarete áakaluru ya ábwi-okehe bingubu: «Yíisu Mwana a Dabvide,

mono me nyiil!» 48 Baara balagha bákaŷeē nde mpaala akala pii, lo nde áakakehe bingubu kuu oluru: «Mwana a Dabvide, mono me nyiil!» 49 Yiisu átemene ya ályele ndiri: «Lita nde mbili!» Báti enkpa-mihi mbili ya bályele nde ti: «Kala a bukyini, temene! Nde li mu okata we mbili.» 50 Enkpa-mihi etsili enkuru e nde, ékubu-mana étemene ya égyi kundaa Yiisu. 51 Yiisu áfwulu nde ti: «Emakye we dzyi me nsa mu we?» Enkpa-mihi ébvuhulu nde ndiri: «Muluo, nyaā me mfirmono!» 52 Yiisu ályele nde ti: «Gye, kana li we liibvwulu we.» Ŋaana oŋo, nde ábaana ofirimoŋo ya ábwi onama Yiisu mu nzili.

11 Mu matala ma báyabehene bo ya Yerusaleme, ku bele a mala mama Betefadze ya Betani, be-bele ya munguo wu a miti mi Olive, Yiisu ágweghe binduono byele. 2 Nde ályele bo ndiri: «Ligye ku bula ba buli ku nkulu a be. Ŋa liisaasomo be kunsu bo, be sa limono mwana a aane wu bákuru. Mbwuru nkini amaabwa-nsini ŋa yulu a nde o. Linyana nde ya ligya a nde. 3 Kala ti mbwuru fwulu be ti: “Mu emakye be lili mu okasa bubo?” Be libvuhulu nde bu: “Mfumu li ya nzala a nde”. Mu obo nde sa agweghe nde kunu maswa-maswa.» 4 Bo bágyene ya bámono mwana a aane wu bákuru ŋa mbala, ŋa bele a muŋma a nzo mutsyini mu munsagha. Bo básurulu nde. 5 Ndaama a baara mu ba báli oŋo bályele bo ti: «Be ema lili mu okasa? Mu emakye be lili mu okasurulu mwana a aane?» 6 Binduono bfbvuhulu bo bwunu a bu ólyele bo Yiisu. Mu obo bo bányaā bo bagye. 7 Bágyi a mwana a aane kundaa Yiisu, bágyala biko bi bo ŋa yulu a nde. Yiisu ábwi-nsini ŋa yulu a nde. 8 Baara balagha bágyala biko bi bo mu nzili, ya babake bágyala mampala ma miti ma mali a matsyiri ma bátsyiri munsu manseghe. 9 Ba báli ku nkulu ya ba bákanaŋa Yiisu báakehe bingubu: «Odzaana! Liseme kundaa munde wu li mu ogya mu nkumu a Mfumu! 10 Nyaā Nzaami aseme emfumu ki eli mu ogya, emfumu e Dabvide taara a bihi! Odzaana mu bibini bibi ku ensoō yulu!» 11 Yiisu ásono mu Yerusaleme, munsu nzo a Nzaami. Bu amana otala bibini byehene, ágyene ku Betani ya Bakwumu ya buolo mu kuulu áli ayi nkonkolo. 12 Mu etsughe ki énama, ŋa bákapala bo kunsu Betani, nzala yffuru Yiisu. 13 Bu ataala ku la mufinge wu áali ya matsyiri, Yiisu áyitala kala ti ákughe omono

liburu mu nde. Lo bu ayato, nde ámono yini a matsyiri, mu kuulu ka yili ndo yi a bafinge o. 14 Mu obo, nde ályele ti: «Mu matala mwohonon, mbwuru si mumō ka afiridza mburu a we ol!» Binduono bágyughe bu óbili Yiisu. (aiōn g165) 15 Bo báyanto ŋa Yerusaleme. Bu asomo mu nzo a Nzaami, Yiisu ábwi obyí minta-nkaala ya ba bákaswumu munsu nzo a nzaami, ápfumunu batabelu ba ba baakasohobo nzi ya bipehe bi minta-nkaala a mabeeme. 16 Ya nde ka anyaā baara bakabulubiri bilogho munsu nzo a nzaami o. 17 Nde ákaluo bo ya ákalyele bo ti: «Buta básono mu Mandagha ma Nzaami ti: “Nzo a me sa bata yo nzo yi a lisamana kundaa baara ba bikaana byehene”. Lo be liikirili yo ngala a bantwumu.» 18 Bakwuru ba bangaa ba nzaami ya baluo-mikyene bágyughe ndagha oyo. Bo bákasagha bunu-a-bo baadzwa nde. Bo báli a nzalamweē a nde mu kuulu mpwumu a baara yohono yíkakiŋimi ku olagha mu maluo ma nde. 19 Nkonkolo bu yito, Yiisu ya binduono bi nde bápala mu bvulu. 20 Mu epala, ŋa bákáluru bo, binduono bi nde bímono mufinge wu aakee tee ku midza. 21 Piere bu alilibi-mweē mandagha ma máluru, ályele Yiisu ndiri: «Muluo, tala, mufinge wu aabiili we epwolo aakee.» 22 Yiisu ályele bo ti: «Likala a kana mu Nzaami! 23 Mu enganyama me ndeyele be ti, mbwuru munde wu akala aalyele munguo wu ti: “Mara ŋa ya gye yibwa mu mubu”, gwene a okeŋe mu mukolo a nde o, lo si kana ti mandagha ma alyele nde sa makeele, nde sa amono mo. 24 Me mu obo me ndi mu olyele be ti: Nswe ndagha yi akala liiluomo be mu lisamana, lisa kana ti be liibagha yo ya sa bagwa be yo.» 25 «Ya, ŋa liikatemene be mu lisamana, kala ti be lili a ndagha ya mbwuru, lisa kolokolo, mpaala Taara a be wu li mu mayulu asa masumu ma behe si kolokolo [27 Yiisu ya binduono bi nde bábvughuru ku Yerusaleme. Mu matala ma ákabulugye nde munsu nzo a nzaami, bakwuru ba bangaa ba nzaami, baluo-mikyene ya bakwuru báyamono nde 28 mu ofwulu nde ti: «Mu nki litumu we li mu okagyighili mandagha ma? Ya na aagwi we litumu lilo?» 29 Yiisu ábvuhulu bo ti: «Me efwulu yini a etsyini aangwa be. Ligwa me mvuru, ya me sa ndeyele be mu nki litumu me ndi mu okasa mandagha ma. 30 Liboghoru li Dzā ku yulu lífi bwunu we kundaa baara? Ligwa me mvuru.» 31 Bo bágyili ofuhunu bo-a-bo bu: «Limana obvuhulu “ku yulu”, nde sa alyele ti:

“Mu emakye be liigwene osa kana mu nde?”
32 Ya kala bihi libvuhulu ti: “Kundaa baara”.
 Bo báli a nzalamweē a baara, mu kuulu baara
 bwohono bákatsimi ti Dzā ali mubighili wu a
 ngarjma.» **33** Mu obo, bo bábvuhulu Yiisu ti:
 «Bihi ka lisoolo o.» Ojo Yiisu ályele bo ndiri:
 «Mehe si ka ndyele be mu litumu li na me ndi
 mu okagyili mandagha ma o.»

12 Ŋa mbihi ojo, Yiisu ábwi obili ya bo mu
 mankumu bu: «Mbwuru mutsyini ákunu
 nseghe a bviini ya ási yo kunsu ekagha. Nde
 átsimi dzunu li baakakamana mburu a bviini ya
 átwu nzo yi mutele wu mula, ya Ŋa mbihi, nde
 ágwihiini ya binkamana bi bviini bákafiri nde
 nzi mu okasalala yo, ya ágyene midzye. **2** Matala
 mama oka mburu bu mato, nde ágweghe musala
 mutsyini kundaa binkamana bi bviini bibye, mu
 oyigwolo kaba li mburu a bviini yi báki bo. **3**
 Lo bo bu basyimi nde, badzwi nde mudzyighi
 ya babvurulu nde myaā mpē-a-mpē. **4** Nga-
 a-nseghe áfirigweghe musala mukimi kundaa
 bo, bo bákaha nde ku mutswi, ya bátwuhu nde
 budzwa. **5** Nde ágweghe musala mukimi, bo
 bádzwi nde. Ŋa mbihi ojo bo bádzwi basala
 balagha bakimi ba bágweghe mudzyighi, bwunu
 we bádzwi bo. **6** Nga-a-nseghe ásyili yini a ya
 mwana a nde wu mukolo. Nde ágweghe nde ku
 masini mu kuulu ákatsimi bu: “Sa bagwa mwana
 a me budziri.” **7** Lo basala babo báfuhunu bo-
 a-bo ti: “Wu me munde wu akala aagwolo pfa
 li taara a nde. Ligya, litswe lidzwa nde ya pfa
 sa likala lili ndaa bihi-a-be!” **8** Mu obo, bo
 básyimi nde, bádzwi ya bátsili nde ku mbala
 a ekagha e nseghe a bviini. **9** Emakye nga a
 nseghe a bviini akala aasa? Nde sa agya, sa
 adzwa basala ba nseghe a bviini, ya nde sa
 agwa nseghe a bviini kundaa baara bakimi.
10 Be nkini limaatala Bisono bi Nzaami bi o:
 “Limeē li ootsili mitwu-manzo me lo ayi li
 libvulu mupfunu Ŋa mutswunu. **11** Ndagha oyo
 yiifi kundaa Mfumu, yo yili ndagha yi okijimi
 Ŋa mihi mi bihi.”» **12** Bamfumu ba ba-Dzwife
 básagha osyimi Yiisu, lo bo báli a nzalamweē a
 mpwumu a baara. Mu kuulu bo bágghala ti mu
 bo Yiisu áti nkumu oyo. Bo bányaa nde agye. **13**
 Ŋa mbihi ojo bamfumu ba ba-Dzwife bágweghe
 ndaama a ba-Faridzyē ya baara baba emvujunu
 ki Erode kundaa Yiisu mpaala babwihi nde mu
 mwere mu mbiili a nde. **14** Bo báyalylele Yiisu ti:
 «Muluo, bihi ligyahaba ti we aakalyele ngarjma,

ya we ka aakabara mbwuru o, mu kuulu we ka
 li a munkaghaba o. We aakaluo nzili a Nzaami
 mu engarjma. Mu obo, bihi lili a muswa bwunu
 we pele mu ofiri mpagha kundaa Sedzare?»
15 Lo Yiisu bu asoolo ti bo báli bampibi, nde
 ábvuhulu bo ti: «Mu emakye be lili mu okatsihi
 me? Ligya a me mupara wu a denye mumō, me
 ntala nde!» **16** Bo bágyi a nde denye mumō ya
 Yiisu áfwulu bo ti: «Edzili ya bisono bi, bibi na?»
 Bo babvuhulu ndiri: «Bibi ndaa Sedzare.» **17** Mu
 obo Yiisu ályele bo ndiri: «Libvurulu kundaa
 Sedzare bibi ndaa Sedzare, ya kundaa a Nzaami,
 bibi ndaa Nzaami.» Bo bakiijimi ku olagha mu
 nkooro a Yiisu. **18** Ba-Saduseyē ba baakalyele
 ti osighili o baara Ŋa kara li ba bákpi ka oli
 o, bágyi kundaa Yiisu ya báfhwulu nde ti: **19**
 «Muluo, Moyidze ágwi bihi mukyene wu: “Kala
 ti mbwuru kpi wene a mwana ya sihi mupfiili,
 mwana a taara a nde sa agwolo mupfiili mpaala
 aburu sagha li mwana a taara a nde baana.” **20**
 Lo, óli a baana ba taara nsaama. Wu a nsomo
 ákie mukaha, ákpi ya ka ásihi mwana o. **21**
 Mbwee wu áanama nde ágwolo mukaha ya ákpi
 wene a osihi mwana. Bumō si mu wu batere.
22 Ya si mumō mu bo bansa nsaama ka áburu
 mwana o. Bo bwohono bu bakpi, mukaha si ákpi.
23 Mu matala ma akala oosighili baara bwohono
 Ŋa kara li ba bákpi, nde mukala a nande aakala?
 Mu kuulu bo bansa nsaama áli bákpie nde!» **24**
 Yiisu ábvurulu bo ti: «Bu me bu lili be kunsu
 nzi-nzimini, be ka lili mu okabaghalo o, ngu
 okala Bisono bwunu we lileene li Nzaami. **25** Mu
 kuulu, mu matala ma akala oosighili baara Ŋa
 kara li ba bákpi, baara ka bakie bakala bwunu
 we balumu o, lo sa bakala ti bangye-yulu mu
 mayulu. **26** Mu mi mitala osighili o baara Ŋa kara
 li ba bákpi, be ka lítaā mu mukaana a Moyidze
 o, mandagha ma ólyele nde Nzaami Ŋa bele a
 eti-ti: “Me ndi Nzaami a Abarahame, Nzaami a
 Idzake, ya Nzaami a Dzake!” **27** Nde ka li Nzaami
 a ba bákpi o, lo Nzaami a baba mweē. Be lili
 nkara ba bagwuŋumu ku olagha.» **28** Mumō
 mu baluo-mikyene, wu áagyughu bu bákatsiho
 bo ya bu ámono ti Yiisu ágwi bo mvuru yi
 mbwe, áyafwulu Yiisu ndiri: «Nsa mukyene wu
 li wu a nsomo mu mikyene myehene?» **29** Yiisu
 ábvuhulu ti: «Wu a nsomo me wu: “Ligyughu,
 be basi Isaraye! Mfumu Nzaami a bihi, Mfumu
 li mumō, **30** Ya we sa dzyi Mfumu, Nzaami a we,
 mu mukolo a we wohono, mu muwumunu a we
 ndehene, mu mayele ma we mwohono, ya mu

mpini a we yohono.” **31** Mukyene wu a buolo me: “We sa dzyi nganda-mbwuru ti budzyi we nyuru a weme.” Ka oli a mukyene mukimi wu luru mimye mu mupfunu o.» **32** Mu obo, muluo-mikyene ályele Yíisu ndiri: «Muluo, we aabili bubwe. We aalyele ngarjma ti Nzaami li mumõ, ya ka oli a Nzaami mukimi o ña yulu a yini a nde. **33** Ya ti odzyi nde mu mukolo wohono, mu mayele mwohono, mu makpa mwohono, ya odzyi nganda-mbwuru ti bu dzyi nyuru a weme, oluru bikaba bi biikadzighi byehene ya mikaba byehene.» **34** Yíisu bu amono ti nde ábili mu mayele, ályele nde ti: «We ka li la ya Empu e Nzaami o.» Ija mbihi orjo, mbwuru si mumõ ka áfiribagha bukyini mu ogwa nde bifwulu o. **35** Yíisu ákaluo munsa nzo a nzaami: «Bunu-abo baluo-mikyene baakalyele ti Kriste li mwana a Dabvide? **36** Dabvide ndeme, mu Mufulu a Ngili, ályele ti: “Mfumu aalyele kundaa Mfumu a me ti: Bwa-nsini ku kwogho-a-kwogho e me tee ña aantwulu me mitaara mi we ku nsini a myili mi we.” **37** Kala ti Dabvide ndeme ti nde Mfumu, bunu-abo Kriste akugghu okala mwana a nde?» Mpwumu a baara yi nene yi áali orjo yikagyugghu nde ya esee. **38** Yíisu ákaluo baara bu: «Lisa mayele mu baluo-mikyene. Bo badzyi okabuludzye ya binkuru bi bila. Bo badzyi ti baara bakagwa bo mamboro mu bibini bi ookabvunjunu baara bwohono. **39** Bo baakadzyi bibini bibi nsomo mu manzo mama lisamana ma ba-Dzwife, ya bibini bibi ku nkulu mu byiri bii odza. **40** Bo baakagwolo bilogho bi bapfiili, ya baakasa nsamana yi nda mu kuulu baara bakamono bo. Bo sa babagha masyeme ma maluru.» **41** Yíisu bu abwi-nsini ña nkulu a ebini ki baakalo bikaba, ákatala bu ókalo mpwumu a baara nzi yi mu boronze omo. Bisini bilagha bíkalo nzi yi alagha. **42** Mupfiili mutsyini wu muwele ágyi si, ya álo mana mipara myele mi mili a mutala wu luru osala. **43** Mu obo Yíisu áti binduono bi nde mbili ya ályele bo ndiri: «Mu engarjma me ndeyele be ti, mupfiili wu muwele wu aalo oluru baara bwohono ba baalo munsa ebini ki baakalo bikaba. **44** Mu kuulu bo bwohono baagwi nzi yi bagwene a bo esala, lo nde, kunsu maweene ma nde, aalo nzi yohono yi aakakala a yo, yohono yi akaasalala mu olaama.»

13 Mu matala ma ókapala Yíisu mu nzo a nzaami, enduono e nde etsyini élyele nde

ti: «Muluo, tala ati mameẽ ma, nzo yi bátwu yo bubwe!» **2** Yíisu ábvuhulu nde ti: «We li mu omono nzo yi nene yi? Ka osyili limeẽ ña yulu a limeẽ likimi o, sa batsala mo mwohono.» **3** Yíisu áli abwi-nsini ku yulu a Munguo wu a mi-Olibve wu áali nkolo ya nkolo ya nzo a nzaami. Piere, Dzake, Dzã ya Andere bábwí ogwa nde bifwulu ña engasighi: **4** «Malyele ati bihi, mu nki matala mandagha mamu maatswighi, ya nki elyimi eesuo masini ma bilogho byehene bibye?» **5** Mu obo Yíisu ábwi olyele bo ti: «Lisa mayele mbwuru anyaa opfiri be. **6** Baara balagha sa bagya ya basalala nkwumu a me, bu balyele ti: “Ngu me Kriste!” Ya sa bapfiri baara balagha. **7** Ija akala liigyugghu be baara mu okabili mu mamvulu ya mansia mama mamvulu, ka likala a nzalamweẽ o, mu kuulu mandagha mwohono mamu mafaana ogya. Lo mamu ka mali masini ma nsie o. **8** Mansie sa madzwana ya mansie, ya empu sa edzwana ya empu. Nsies sa yinyii mu mpini mu mambughu malagha, ya sa okala a minzyala. Ekye sa ekala ebaana ki misuo mii oburu.» **9** «Lisa mayele mu beme. Sa batyeghe be ña mambala ma miyala ya sa bakaha be nswanswa mu manzo mama lisamana ma ba-Dzwife. Sa bafwunu be ña nkulu a bampfumu ba bitsulu bi mansie ya mikogho mu nkooro a me. Be sa lisuo bampughulu kundaa bo. **10** Nsomo a nsomo, bafaana oluo baara ba mansie mwohono Nsia yi Mbwe. **11** Ija akala baabiri be ya baatyeghe be, ka likala a mikolo maã-maã mu mi liibili be o. Lo lilyele mi akala baagwa be mu matala maana mamu, mu kuulu ka oli be akala liibili o, lo Mufulu a Ngili.» **12** «Mwana a taara sa atyeghe mwana a taara mu lipfu, ya taara sa atyeghe mwana a nde. Baana sa babihi okala mu litumu li biburu bi bo, ya sa badzwa bo. **13** Baara bwohono sa babele be mu nkooro a nkwumu a me, lo munde wu akala aasa mukama tee ku masini sa abvwugghu.» **14** «Ija akala liimono be Ngugghu a bubi ba buukabyihi ña ebini kiili bo ka bufaana okala o – nyaã munde wu li mu otaã abaghala – orjo, baara ba baakala ku Yude babara ku minguo. **15** Mbwuru wu aakala ku yulu a see li nzo lili eyala, anyaa osughuru, anyaa osomo mu nzo mu ogwolo elogho munsa nzo a nde. **16** Ya munde wu aakala ku manseghe anyaa obvughuru ku nzo mu oyigwolo enkuru e nde. **17** Mu bitsugghu bibye, nyii yi alagha kundaa bakaha ba baakala a mayimi ya basuomol!» **18** Lisamana mu kuulu

mandagha mamō manyāā obwa mu ndo yi a mpie yi alagha! **19** Mu kuulu bitsughu bibye sa bikala bitsughu bibi mpara yi alagha, mpara yiili obaana ku ebaana e nsie yi ógyighili Nzaami tee mu matala ma, baara nkini bámaamono yo o. Ya si okala ka bunu, mpara yi obo ka yifirikala mu bitsughu bibi nkulu o. **20** Kala ti Mfumu ka ási kuulu bitsughu bibye bikala bipfi o, mbwuru si mutsyini ka ákaabvwughu o. Lo nde aasi bye bipfi mu nkooro a babo ba aasuolo nde. **21** «Mu obo, kala mbwuru lyele be ti: “Kriste li ŋa”, bwunu we “Kriste li kunii”, ka lisa kana mu nde o. **22** Mu kuulu bakeretyē baba mpya ya mibighili mimi mpya sa bagya. Bo sa basa bilyimi ya mandagha mama okiŋimi mu opfiri babo ba osuolo Nzaami kala ti okughu okala. **23** Likala yeelee! Me ntswama ndeyele be mandagha mwohonono.» **24** «Lo mu bitsughu bibye, ŋa mbihi a mpara yi alagha oyo, Tala sa lipyini, mwele wu a ngoono ka afirigwa otsyeme o nde o, **25** Baŋomaŋomo sa babwa ŋa nsie, ya lileene lili ku mayulu sa linyiji. **26** ŋa mbihi ogo baara sa bamono Mwana a mbwuru mu okagya ŋa yulu a bidzi ya lileene lili lagha ya nsia. **27** Ogo nde sa agweghe bangye-yulu ya sa abvughu mu manto ma nsie mansa mana, obaana ku ósini nsie tee ku ósini yulu, baara bwohonono ba ásuolo nde.» **28** «Nyaā nkumu yi a mufinge yiluo be: ŋa osaakadzughu mampala ma nde ya matsyiri maafulu, be liikasoolo ti dzwa liibehene. **29** Bumō behe si, ŋa akala liimono be mandagha mamō mu omorjono, lisoolo ti matala maabehene, mo ayi ŋa muŋma a nzo. **30** Mu engarŋma me ndeyele be, eseene ki ka eluru o, mandagha mwohonono ma sa mamorjono. **31** Yulu ya nsie sa biluru, lo mandagha ma me ka maluru o.» **32** «Mu mi mitala etsughu ya matala, mbwuru si mumō ka asoolo o, ngu okala bangye-yulu mu mayulu, bwunu we Mwana, lo yini a Taara soolo. **33** Lisa mayele, likahala mihi, mu kuulu be ka lisoolo ŋa ooto matala ma mo o. **34** Sa okala ti anga mbwuru munde wuulu bu agyene ku midzye, bulusihi nzo a nde, gwi litumu kundaa basala ba nde. Nde sa agwa esala kundaa nswe musala a nde, ya sa atumu nkyele a muŋma a nzo mu okahala mihi. **35** Mu obo, likahala mihi, mu kuulu be ka lisoolo ŋa akala oogya mfumu a nzo o. Nde kughu ogya mu nkonkolo, bwunu we mu kara-a-kara a mpyibi, bwunu we ŋa ookwolo nsuhu-a-nsomo, bwunu we mu epala. **36** Likala a nzalamweē ti

nde anyāā ogya ensihibi ya nde anyāā oyabagha be liigyomomo ensama. **37** Ndagha yi ndeyele me be, me ndeyele yo kundaa baara bwohonono: likahala mihi!»

14 Bitsughu byele bfiŋyili mu osomo mu kyiri kii Paake ya kii Mampa ma magwene a pfini. Bakwuru ba bangaa ba nzaami ya baluo-mikyene bákasagha bunu-a-bo baasyimi Yiisu mu mayele ya baadzwa nde. **2** Bo bákalylele ti: «Ka kunsu kyiri o, mfangolo okala a kyaā ŋa kara li baara.» **3** Yiisu áli ku Betani, mu nzo a Simō nga-a-buala – lo nde áli ádzughu – Mu matala ma ákadza nde ŋa tabele, mukaha mutsyini áyasomo mu nzo. Nde áli a mbwara yi a mu alabateri yi áalwulu mu mananaase mama nare mama nkara a tse-tse, mama ntala yi nene. Bu abulu mbwara, nde ágyiri mananaase ŋa yulu a mutswi a Yiisu. **4** Baara babake bákololo nkehe ya bábili bo-a-bo ti: «Mu emakye nde aasi mananaase ma mfini? **5** Ali bakughu otyeghe mananaase ma mu nkama-tere yi a badenye, ya ogwa nzi oyo kundaa bawele!» Ya bo bákololo mukaha munde nkehe. **6** Lo Yiisu ályele ndiri: «Linyaā nde! Mu emakye be liimwehē nde mukolo mpara? Nde aagyighili ndagha yimbwe mu me. **7** Mu kuulu, be sa likala a bawele mu nswe matala, ya be likughu osa bo bubwe ŋa lidzyi be. Lo me, be ka likala ya me mu matala mwohonono o. **8** Mukaha wu aasi mi aakughu nde, nde aatswaama ogyogho nyuru a me mananaase nsomo badzyighi yo. **9** Mu engarŋma me ndeyele be ti, nswe ebini ki akala baaluo Nsia yi Mbwe mu nsie nsyini, sa balyele si mu olibili mweē, mandagha ma oosi mukaha wu.» **10** Yuda Isikaryote, mumō mu Bakwumu ya Buolo, áyimono bakwuru ba bangaa ba nzaami mpaala atyeghe bo Yiisu. **11** Bo bu bagyughu nde, básomo kunsu esee, ya basiini ogwa nde nzi. Mu obo, Yuda ákasagha matala ma mafaana mu otyeghe Yiisu. **12** Mu etsughu kii nsomo kii kyiri kii Mampa ma magwene a pfini, etsughu ki bákadzwa mu mukaba mwana a endoomo wu baakadza mu Paake, binduono bi Yiisu bifwulu nde ndiri: «Kunu-ako we dzyi ti bihi liyigyighili we bi-odza bibi Paake?» **13** Nde ágweghe byele mu binduono bi nde ya ályele bye ti: «Ligye ku bvulu, baghala mutsyini sa ayabwana a be ya yughu li madza. Be linama nde **14** ya omo mu aasomo nde, lilyele kundaa mfumu a nzo bu: “Muluo bu aalyele: Ngwumu a nzo yi aandza me

kyiri kii Paake ya binduono bi me yini-ayo?” nzalamweē yi alagha ya mukolo maṅa-maṅa. **15** Nde sa asuo be ngwumu yi a ku yulu a nzo yi nene muulu bilogho byehene bikughu. Ngu omo be liigyighili bihi bilogho bibi kyiri.» **16** Binduono bígyene, bíto ṅa bvulu, bíbwana a mandagha ti bwunu a bu ólyele bo Yíisu ya bye bígyighili bi-odza bibi kyiri kii Paake. **17** Nkonkolo bu yito, Yíisu áyato ya Bakwumu a Buolo. **18** Mu matala ma báli bo ṅa tabele mu odza, Yíisu ályele ti: «Mu enganma me ndyele be, mumō ṅa kara li be, wu li mu okadza ya me, sa atyeghe me.» **19** Bantumumu bányoō, ya bábwí ofwulu nde mumō-mumō ti: «Me?» **20** Yíisu ábvuhulu bo ndiri: «Mumō mu Bakwumu a buolo, munde wu aalo kwogho mu ndoō emō ya me. **21** Mwana a mbwuru li mu ogye, bwunu a bu básono mu nde. Lo nyíi yi alagha kundaa mbwuru munde wu aakala nzili yi baatyeghe Mwana a mbwuru! Áli obvulu bubwe banyaā oburu mbwuru munde.» **22** Mu matala ma bákadza bo, Yíisu ágwolo limpa, bu amana olyele mandagha mama liseme, átsyiri lo ya ágwí bo lo ya ályele ndiri: «Ligwolo, yi nyuru a me.» **23** Ṽa mbihi orjo, Yíisu ágwolo ebaha, bu amana obvurulu matuono, ágwí bo kye ya bo bwohonon báṅmi kye. **24** Nde ályele bo ti: «Ma me makili ma me, makili mama ogwihini, ma maatsanama mu nkooro a baara balagha. **25** Mu enganma me ndyele be ti, me ka amfirinma bviini o tee mu etsughu ki amfirinma me lo, li linyaghara, wu Emfumum e Nzaami.» **26** Bo bu bamana ogyimi Nzaami bikwumu bibi masyighi, bo bágyene ku Munguo wu a mi-Olibve. **27** Yíisu ályele bo ndiri: «Kana li be bwohonon mu me sa libwa, mu kuulu básono ti: “Me sa nkaha munkala-bibuolo, ya bindoomo sa bitsanama.” **28** Lo ṅa mbihi a ṅa aansighili me ṅa kara li ba bákpí, me sa nswama be ku Ngalile.» **29** Piere ályele nde ndiri: «Ngu okala ti baara bwohonon sa babwa mu nkooro a we, lo me ka mbwa o.» **30** Yíisu ábvuhulu nde ndiri: «Mu enganma, me ndyele we, mu mpyibi yi a lolo li, nsomo mulumu a nsuhu akuolo nsa ywolo, we sa tunu me mu mansa matere.» **31** Lo Piere ási minkanana mi nyuru mu mpini ti: «Si okala ti me nfaana okpa ya we, me ka ntunu we o!» Ya binduono byehene bíbili bwunu obo. **32** Yíisu ya binduono bi nde báto ṅa ebini kii nkwwumu Ngetesemane. Nde ályele bo ndiri: «Libwa-nsini ṅa, mu matala ma aansamana me.» **33** Nde ábiri Piere, Dzake ya Dzā, ya ábaana omonon

34 Mu obo, nde ályele bo ti: «Me ndi a nyíi mu muwumunu a me tee ku lipfu. Likala ṅa ya likahala mihi!» **35** Bu asehe linku-nkulu eke, ábwí mu nsie ya ábuono Nzaami kala okughu okala ti matala ma mampara ma mamara ṅa busu bu nde. **36** Nde ákalyele ti: «Aba! Taara! We aakaleene mandagha mwohonon, maha ebaha kii mpara ki ṅa bele a me! Lo ka bwunu a bu ndzyi me o, lo bu dzyi we.» **37** Yíisu áyabvughuru ya áyabagha bo kunsan ensama. Mu obo nde ályele kundaa Piere ndiri: «Simō, we aagyonomo! We ka aaleene okahala mihi si mu tala litsiyini o! **38** Likahala mihi ya lisamana, mu kuulu be linyaā osomo kunsan bigyele. Mufulu li a mbaa, lo nyuru yikolo.» **39** Yíisu áfirigyē la ya bo ya ábuono Nzaami bwunu a bu ábuono nde nsomo. **40** Ya áyabvughuru ya nde áfiriyabaha bo bagyonomo ensama, mu kuulu mihi mi bo áli míleme mu ensama. Bo ka bábagha yi obvuhulu nde o. **41** Yíisu áfiriyabvughuru mu sa lili tere ya ályele bo ti: «Be nkini ensama lili, be nkini ogwumu liikagwumu! Mandagha mwohonon maakele. Matala maato, Mwana a mbwuru baatyeghe nde ṅa myaā mi banga-a-masumu. **42** Litemene, litswel! Munde wu aatyeghe me aayabehene.» **43** Ṽaana orjo, ṅaala nde nkini mu okabili, Yuda, mumō mu Bakwumu a buolo, áyapala ya mpwumu a baara yi áali a mapee ya mankwogho ba ógweghe bakwuru ba bangaa ba nzaami, baluo-mikyene ya bakwuru. **44** Munde wu áakatyeghe nde ágwí bo elyimi ki: «Mbwuru munde wu aanyuburu me, me nde. Lisyimi nde ya ligye a nde ya baara ba baagyili okebe nde.» **45** Yuda bu asaayato, ásele kundaa Yíisu ya ályele ndiri: «Muluo!» Ṽa mbihi orjo nde ányuburu Yíisu. **46** Orjo bo bábwirili Yíisu ya básyimi nde. **47** Mumō mu ba báli orjo ádzuru lipée li nde, átini musala a mukwuru a bangaa ba nzaami ya ákehe nde tswi. **48** Yíisu ályele bo ndiri: «Be liiyasyimi me ya mapee ya mankwogho, ti anga be liiyasyimi ntwumu! **49** Bitsughu byehene me aakankala ṅa kara li be ya aakanduo mu nzo a nzaami ya be ka liiyasyimi me o. Lo mu kuulu Bisonon bibi ngili bikeele.» **50** Mu obo binduono bi Yíisu byehene bínyaghala nde ya bíbara. **51** Munkuru-mbala mutsyini ákanama Yíisu. Nde ali álahan yini a nkpaā a eko yi a lino. Baara bu basagha osyimi nde, **52** nde ábulunyaā nkpaā a eko ya ábara mpene. **53** Bábiri Yíisu kundaa mukwuru a bangaa ba nzaami. Bakwuru ba

bangaa ba nzaami bwohono, bakwuru ya baluo-mikyene bábvujunu oko. **54** Piere ákanama Yíisu la-la tee munsa mbala a mfumu a bakwuru ba bangaa ba nzaami. Munsa omo, nde ábwinsini ya bankyele ba mfumu a bakwuru ba bangaa ba nzaami, ya ákagoro mbaa. **55** Bakwuru ba bangaa ba nzaami ya ekwuru ki ba-Dzwife kyehehe básagha bampughulu ba bámono Yíisu kunsu epfwumu mpaala badzwa nde, lo ka bábagha o. **56** Mu kuulu baara balagha baakasuo bumpughulu bubu mpya mu nde, lo bumpughulu bu bo ka búkagye mu nzili o. **57** Mu obo, ndaama a baara babake bátemene, ya báburulu nde ndagha yi: **58** «Bihi liigyughu nde mu okalyele ndiri: “Me sa ntsala nzo a nzaami yi yi ótwu myaã mi baara ya mu bitsughu bitere me sa ntwa nkimi yiili ka myaã mi baara miigyighili yo o.”» **59** Si okala mu ndagha oyo, bumpughulu bu baara ka bukagye nzili mó o. **60** Mu obo, mukwuru a bangaa ba nzaami átemene ña kara li mfwunu a baara bwohono áfwulu Yíisu ti: «We ka li a ndagha yi aabvuhulu o? Nki ndagha we lyele mu bumpughulu bu osuo baara ba mu we?» **61** Yíisu ka átsughu ndagha o, nde ka ábvuhulu ndagha o. Mukwuru a bangaa ba nzaami áfirifwulu nde ti: «Me we li Kriste, Mwana a Nzaami wu Liseme?» **62** Yíisu ábvuhulu ti: «Ngu me. Ya be sa limono Mwana a mbwuru ábwi-nsini ku kwogho-a-kwogho ki Lileene li Nzaami, ya ba aakagya nde ya bidzi bi mayulu.» **63** Mu obo, mukwuru a bangaa ba nzaami ákaghala binkuru bi ndeme ya ályele ndiri: «Bihi-a-be nzala a bampughulu liifirisiyili a yo?» **64** Be liigyughu bu aatsaala nde Nzaami. Bitsimi bi be bima?» Baara bwohono ágwi nde ebili ya bátsyiri nde mukakana wu lipfu. **65** Ndaama a baara ña kara li bo bábaana otswulu nde manteë. Báfughu nde busu, bákakaha nde minkono ya bákalyele ti: Bighili! Ya bankyele bágyagha nde ya bákaha nde mampala. **66** Mu matala ma óli Piere ku nsie, ña mbala, musala wu mukaha mumó mu basala ba mukwuru a bangaa ba Nzaami áyato oyo. **67** Nde bu amono Piere mu okagoro mbaa, ákala nde ya ályele ti: «Wehe si aakakala ya Yíisu musi Nadzarete.» **68** Piere átuwu bu ályele ti: «Me ka nsoolo o, me ka ndi mu obaghala mi dzyi we olyele o.» Ña mbihi oyo, nde ápala mu ogye ku nkulu a muñma a nzo. Mu matala mamo, nsuhu ákwolo. **69** Musala wu mukaha ámono nde ya áfirilyele kundaa ba báli oyo: «Wuhu si li mumó mu bo.» **70** Piere

áfiritunu Yíisu. Bu basi mana edzighi ebi, ba báli oyo báfirilyele Piere ti: «Mu engarjma, we li mumó mu baara ba, mu kuulu wehe si li musi Ngalile.» **71** Oyo nde ábwi olaba mikihi mu okabiili mpwoho mu ndeme ti: «Me ka nsoolo mbwuru wu lili mu okalyele be o.» **72** Yini a mu matala maana mamo, mulumu a nsuhu ákwolo mu sa lili muolo. Piere álibili mweë ndagha yi ólyele nde Yíisu: «Nsomo-a-nsomo nsuhu ákwolo nsa ywolo, we sa tunu me nsa tere.» Mu obo Piere ágwebulu elili.

15 Mu epala-epala, bakwuru ba bangaa ba nzaami, bákuru mfwunu ya bakwuru, baluo-mikyene ya ekwuru ki ba-Dzwife kyehehe. Bu bamana okuru Yíisu binkana, bábi nde ya ágwi nde kundaa Pilate. **2** Pilate áfwulu nde ti: «We, we li mukogho a ba-Dzwife?» Yíisu ábvuhulu nde ti: «Me we lyele yo.» **3** Bakwuru ba bangaa ba nzaami báburulu nde mandagha malagha. **4** Pilate áfirifwulu nde ti: «We ka bvuhulu ndagha o? Yughu ati mandagha ma bali mu okaburulu we!» **5** Lo Yíisu ka áfiribvuhulu ndagha o, obo Pilate ákinjimi. **6** Mu nswe kyiri kii Pake, Pilate ákapaha bo mbwuru mutsyini mu boloko, munde wu ókaluomo mpwumu a baara. **7** Mbawuru mutsyini, wu a nkhwumu Barabase, áli mu boloko ya banganda ba nde mu kuulu bo bádzwí mbwuru ña bákasa bo ngirini ya ba baakatumu bula. **8** Mpwumu a baara yígyene ku nzo a Pilate ya yibaana oluomo nde apaha bo mbwuru mutsyini mu boloko ti bu óli epfu e nde. **9** Pilate ábvuhulu bo ndiri: «Be lidzyi ti me nyaã be mukogho a ba-Dzwife?» **10** Mu kuulu nde ásoolo ti mu nkooro a mukolo bubi bakwuru ba bangaa ba nzaami bátyeghe nde Yíisu. **11** Lo bakwuru ba bangaa ba nzaami ágwi mpwumu a baara mutswi mpini mu kuulu baluomo Pilate apaha bo Barabase. **12** Pilate áfirilyele ti: «Emakye be lidzyi me nsa mu munde wu lili mu okata be ti mukogho a ba-Dzwife?» **13** Bo báfirikehe bingubu ti: «Komo nde ña kuruwa!» **14** Pilate ákalyele bo ndiri: «Bu nde nsa ndagha yi mbi aasi?» Lo bo báfirikehe bingubu bi biluru ti: «Komo nde ña kuruwa!» **15** Pilate ágwolo munkana wu ogwa mpwumu esee. Nde ányaã Barabase ya nde átuwu bakaha Yíisu nswanswa. Ña mbihi oyo nde ágwi bo nde mu kuulu bakomo nde ña kuruwa. **16** Bambumbulu bábi Yíisu ku kara-a-kara a mbala a nzo a Pilate ya bo báti

mpwumu a bambumbulu yohono mbili. **17** Bo bálaha Yíisu enkuru kii mungala, ya bátwulu ña yulu a mutswi a nde muburu wu mansiene. **18** Ña mbihi oño, bo bábwí ogwa nde mboro ndiri: «Mukogho a ba-Dzwífe, mboro a we!» **19** Bo bákakaha nde edzyara ña yulu a mutswi, bákatswulu nde manteë ya bákakunu mabuo mu nsie mu obuono nde. **20** Bu bamana osebe nde, bádzwulu nde enkuru kii mungala ya báfirilaha nde binkuru bi nde. Ña mbihi oño, bo bágyene a Yíisu mu oyikomo nde ña kuruwa. **21** Bambumbulu bákwighi baghala mutsyini wu áafi ku manseghe ya áakaluru mu obiri kuruwa li nde. Nkwumu a nde Simō, musi bvulu li Sirene, taara a Alesandere ya Rufuse. **22** Bo bábirí Yíisu ku ebini ki bakata nkwumu «Ngolongota», mbaala ti, «Ebini kii etyee ki mutswi». **23** Básagha ogwa Yíisu bviini li bábvughu ya miire, lo nde ábihi oñma lo. **24** Bákomo Yíisu ña kuruwa ya bambumbulu bu bati empa kii nga a bwehe me wu aagwolo, mpaala bakaba binkuru bi nde. **25** Mu tala lili matere ña mbihi a makya-mabwihi bo bákomo Yíisu ña kuruwa. **26** Bisono bi bíli a ebili ki lipfu li nde bíli a ndagha yi: «Mukogho a ba-Dzwífe.» **27** Ebini emō ya Yíisu bákomo ña kuruwa bantwumu buolo, mumō ku kwogho-a-kwogho, wu muke ku engbambogho. **28** [Obo me bu ótswughu bisono bi nzaami bi biikalyele ti: «Baasi nde mu muluo a baara ba babi.»] **29** Baara ba bákálaru mu nzili bákátughu Yíisu ya bákanyihí mitswi. Bo bákalyele ti: «Eé! We wu aatsala nzo a nzaami ya ofiritwu yo mu bitsughu bitere, **30** bvwuhu nyuru a we weme ya suguru ña kuruwa!» **31** Bakwuru ba bangaa ba nzaami si ya baluo-mikyene bákasebe bo-a-bo ya bákalyele ndiri: «Nde aabvwuhu babake, lo nde ka kughu obvwuhu ndeme o! **32** Nyaá Kriste, Mukogho a Isaraye, asuguru ña kuruwa mu matala ma, mu kuulu bihi limono ya lisa kana!» Ba bákomo ña yulu a makuruwa ya nde bákátughu nde si. **33** Mu matala ma ntaá a minsene, bwihi búsi mpyibi ña yulu a nsie yohono, tee mu matala mama matere ña mbihi a ntaá a minsene. **34** Mu matala mamó, Yíisu ákehe engubu: «Eli, Eli, lema sabakatani?» Mbaala ti, «Nzaami a me, Nzaami a me, mu emakye we aanyaghala me?» **35** Ndaama a baara ba bálí oño bágyughu nde, bo bákalyele ti: «Ligyughu, nde li mu okata Eli mbili!» **36** Mbwuru mumō ábara ntyini mu oyitsubu munsana mu bviini lili ñeë. Nde ákuru nde ku nto a edzyara mpaala

agwa Yíisu añma ya ályele ndiri: «Linyaá, litswe limono kala ti Eli sa ayasurulu nde ña kuruwa.» **37** Lo Yíisu ákehe engubu ki enene ya átaghaba. **38** Nkpara eko yi a mu nzo a Nzaami yikagha ña kara-a-kara, obaana ku yulu tee ku nsie. **39** Mfumu a ekuru ki bambumbulu nkama wu áali oño bu amono bu ótaghaba Yíisu ályele ndiri: «Nganñma baghala wu áli Mwana a Nzaami.» **40** Óli si a bakaha ba bákatala la-la. Ña kara li bo óli Mari musi bvulu lili Mangadala, Mari ngughu a Dzake wu mu Mumpala ya Dzodze, ya Salome. **41** Bo bákabulugye ya Yíisu ya bakasalala nde ña áli nde ku Ngálie. Óli si a bakaha bakimi ba bayakumu ya Yíisu ku Yerusalem. **42** Áli ayi nkonkolo, ya buulu áli etsughu ki baakabwehë Sabate (etsughu ki eekatswama etsughu kii Sabate), **43** Dzodzefe wu a bvulu lili Arimate, mbwuru wu bákagwa budziri mu mfwunu a ekwuru ki ba-Dzwífe, ágyi oko. Nde si ákakebe ogya ku Emfumu e Nzaami. Nde ási bukyini ágyene kundaa Pilate mu oluomo ebyimi e Yíisu. **44** Pilate ákijimi mu ogyughu ti Yíisu áli ayi ákpi. Mu obo nde áti mfumu a ekuru ki bambumbulu nkama mbili, ya áfwulu nde kala ti Yíisu edzighi elagha ákpi. **45** Mfumu a ekuru ki bambumbulu nkama bu alyele nde ti Yíisu aakpi, Pilate ágwi Dzodzefe nzili yi ogwolo ebyimi e Yíisu. **46** Dzodzefe áswumu embwunu ki eko kii lino ya ámaha ebyimi e Yíisu ña kuruwa, ádziñi kye kunsá embwunu ki eko ekye, ya álo kye munsá mpyeme yi bátsimi kunsá limeë. Ña mbihi oño, nde ákyi muñma a mpyeme mu limeë. **47** Mari musi Mangadala, ya Mari wu ngughu a Dzodze, bákatala ebini ki bádzighi Yíisu.

16 Sabate bu liluru, Mari musi Mangadala, Mari ngughu a Dzake, ya Salome báswumu malyimi mama mpihi yi mbwe mu osa mansagha mu ebyimi e Yíisu. **2** Mu etsughu ki limiñi kii nsomo, bo bágyene ku mpyeme epala-epala ña ookapala tala. **3** Bo bákalyele bo-a-bo ti: «Nande aakimini bihi-a-be limeë li liiki muñma a mpyeme?» **4** Lo bu baseene mihi, bo bámono ti limeë li líli li linene, áli ayi bákimini. **5** Bu basomo munsá mpyeme, bámono munkuru-mbala mumō ábwi-nsini mu kwogho-a-kwogho e bo ya álahe enkuru ki ela ya kii buñu. Bo bámono nzalamweë. **6** Nde ályele bo ti: «Ka likala a nzalamweë o! Be Yíisu musi Nadzarete wu baakomo ña kuruwa lili mu okasagha. Nde

aasighili ŋa kara li ba bákpi. Ka li ŋa o. Limono ebini ki ali baatwulu nde. 7 Lo liyilele binduono bi nde ya Piere ti: “Yiisu aatswama be ku Ngalile. Oko be liimono nde ti bu áli ályele nde be.”» 8 Bo bápala munsá mpyeme, bábára mu okateghere, báli a nzalamweē ya bákijimi. Ya bo ka bályele ndagha si mō kundaa mbwuru o mu kuulu bo báli a nzalamweē. 9 (note: The most reliable and earliest manuscripts do not include Mark 16:9-20.) [Yiisu bu asighili mu lipfu mu epala ki etsughu ki limiŋi kii nsomo, nde átswama moŋono kundaa Mari musí Mangadala, mu nde Yiisu áli ápaha mifulu mi mibi nsaama. 10 Mari áyitwoho nsia kundaa babo ba bákakala ya Yiisu mu matala ma báli bo kunsá pfiili ya bákálili. 11 Ŋa bágyughu bo ti Yiisu áli mweē, ya ti Mari ámono nde, bo ka bási kana o. 12 Ŋa mbihi oŋo, Yiisu ámoŋono mu efa ekimi kundaa binduono byele bi bíkagye ku bula. 13 Boho si báýabvughuru ya bágwi nsia kundaa binduono bibike. Lo binduono si ka bási bo kana o. 14 Ŋa nseele, Yiisu ámoŋono kundaa Bakwumu ya Mumō, mu matala ma bákadza bo, ya nde afyeē bo mu ebaghala mu kuulu bo ka bási kana o ya mikolo ngyi mi bo, mu kuulu bo ka bási kana mu ba bámono nde ŋa mbihi a ŋa ásighili nde ŋa kara li ba bákpi o. 15 Ŋa masini, nde ályele bo ndiri: «Ligye mu nsie nsyini ya litsala nsia a Nsia yi Mbwe kundaa baara bwohonono. 16 Munde wu akala aasa kana ya aabagha liboghoró sa abvwughu, lo munde wu akala aagwene osa kana sa abagha ebili. 17 Bi me bilyimi bibi okijimi bi akala biimoŋono kundaa babo ba akala baasa kana: Mu nkwumu a me, bo sa babyi mifulu mi mibi, bo sa babili mandiri ma manyaghara. 18 Bo sa bakwara bantaala, kala ti bo baŋmi mbagha, si okala ka bunu, bo ka bamono mpara o. Bo sa batwulu myaā ŋa yulu a babyele, ya babyele sa badzughu.» 19 Mfumu Yiisu, bu amana obili kundaa bo, bágyene a nde ku yulu ya nde ábwi-nsini ku kwogho-a-kwogho e Nzaami. 20 Ya binduono býitsala nsia yi mbwe mu bibini byehene. Mfumu ákasala ya bo ya akasa enyeme mu Ndagha mu bilyimi bibi okijimi bi bíkanama.]

Luke

1 Ta Teofile, baara balagha baagyelee osono mandagha ma máluru ña kara li bihi-a-be. **2** Bo básono mo bwunu a bu ólyele bihi bampughulu ba bámono mandagha mam oobaana mu ebaana, ya ba bágwi litumu lili oluo mandagha ma Nzaami. **3** Me mu obo, mehe si aansagha ogyighili ogyahaba mandagha mwohonon ma máluru oobaana ku ebaana, ya me aamono ti me mfaana osono mo ya bunkere. **4** Me ndi mu osa obo mu kuulu we baghala engañma ki mandagha ma báluo we. **5** Mu matala ma óli Erode mukogho wu a etsulu e nsie kii Yude, óli ya ngaa a Nzaami mutsyini nkwumu a nde Dzakari. Nde áli mumō ña kara li emvuñunu ki bangaa ba Nzaami baba dzumu li Abiya. Ya Elidzabete mukala a nde áli musi dzumu li Aarō. **6** Bo bansa buolo báli baara baba bunsumu ña busu bu Nzaami, ya bo bákagyighili onama mikyene ya mikele mi Mfumu myehene. **7** Lo bo ka báli a mwana o, mu kuulu Elidzabete áli etini, ya bo bansa buolo áli ayi biñmini. **8** Etsughu etsyini, Dzakari ákasala esala ki bungaa bu Nzaami munsan nzo a Nzaami yi nene mu kuulu bibye bíli bitsughu bibi mukubu a emvuñunu e bo mu osala. **9** Ti bu óli epfu ki bangaa ba Nzaami, bo báti empa ki nga-a-bwehe ya básuolo Dzakari mu osomo mu ngwumu a Mfumu yi a ngili mu oyitsughu malyimi mama mpihi yi mbwe. **10** Mpwumu a baara yohonon yñli ku mbala mu okasamana, mu matala mama otsughu malyimi mama mpihi yi mbwe. **11** Ngye-yulu a Mfumu ayamononon kundaan Dzakari, ya atemene mu kwogho kii babaghala, ña bele a ebini ki baakatsughu malyimi mama mpihi yi mbwe. **12** Bu amono ngye-yulu munde, nde ápanama ya ámono nzalamweē. **13** Lo ngye-yulu ályele kundaan nde ti: «Dzakari ka amono nzalamweē o! Nzaami aagyughu lisamana li we. Mukala a we Elidzabete sa aburu we mwana wu baghala. We sa gwa nde nkwumu Dzā. **14** We sa kala kunsan esee ki elagha ya baara balagha sa barjene mu oburu o nde, **15** mu kuulu nde sa akala mbwuru wu munene ña busu bu Mfumu. Nde akala ka añma bviini bwunu we mala ma maakolo o. Nde sa akala wu alwulu mu Mufulu a Ngili oobaana matala ma aakala nde munsan mweē a ngughu a nde. **16** Nde sa abvurulu basi Isarayelee balagha kundaan Mfumu, Nzaami a

bo. **17** Nde sa atswama ku nkulu, ña busu bu Nzaami, mu mufulu ya mu lileene li Eli. Mu obo nde sa abvurulu eyenē ña kara li bataara ya baana ba bo, ya osa kuulu ti babo ba baagwene okagyughu Nzaami babagha munzelee wu a baara banga-a-bunsumu. Obo nde sa asa kuulu ti baara bakala a dzyi li likughu mu okihi Mfumu.» **18** Mu obo Dzakari ályele kundaan ngye-yulu ti: «Bunu-abo me aangyahaba ti mandagha mam sa matswighi? Buulu me ayi enmini ya mukala a me si maañmini.» **19** Ngye-yulu ábvuhulu kundaan nde ti: «Me ndi Ngabiryelee, me ndi ña busu bu Nzaami mu osalala nde. Nde aatumu me mu oyabili ya we, ya oyagwa we Nsia yi Mbwe yi. **20** Buulu we aabihi osan kana mu mi aandyeele me we, we sa kala nkini ya we ka afiritsughu ndagha o tee matala ma ootswughu mandagha ma. Mandagha ma sa mamononon mu matala ma ógwaa Nzaami.» **21** Mu matala mamononon mpwumu a baara yíkakebe Dzakari yíkinjimi mu kuulu nde ákagyili munsan nzo yi a ngili. **22** Bu ayapala, nde ka áfirikaleene obili ya bo o, ya bo bábaghala ti nde ndagha ábwana a yo munsan nzo yi a ngili. Nde ákabili ya bo mu bilyimi ya ákala nkini. **23** Bitsughu bi nde bibi esala bu bikughu, Dzakari ábvughuru ku nzo a nde. **24** Ña mbihi onon, Elidzabete mukala a nde ákeghele. Mu obo nde ási bangoonon bataana baala nde ásweme. Nde ákabili bu: **25** «Litala ndagha yi oosi Mfumu mu me! Nde aamono ti ma matala ma omaha me budzwa ña mihi mi baara bwohonon.» **26** Ña óto yimi li Elidzabete mu bangoonon basemene, Nzaami ágweghe Ngye-yulu Ngabiryelee ku bvulu lili Nadzarete mu etsulu e nsie kii Ngalile, **27** kundaan mutughu mutsyini wu ógwi Dzodzelee, musi dzumu li mukogho Dabvide bilyimi. Nkwumu a nde Mari. **28** Ngye-yulu bu asomo munsan nzo a nde, ályele kundaan nde ti: «Kala ya esee, we li a bwehe, Mfumu li ya we!» **29** Mari ákinjimi ku olagha bu agyughu mandagha mamonon. Nde ka ábaghala bunu-a-bo mboron oyo yikadzyi olyeele o. **30** Ngye-yulu ályele kundaan nde ti: «Mari, ka monon nzalamweē o, mu kuulu we aabagha bwehe kundaan Nzaami. **31** We sa keghelee ya we sa buru mwana wu baghala, we sa gwa nde nkwumu Yiisu. **32** Nde sa akala mbwuru wu munene ya sa bata nde Mwana a Nzaami wu a Ensoō-Yulu. Nzaami sa agwa nde likubu li Dabvide, nkagha-kwuru a nde. **33** Nde sa akala mfumu a dzumu li Dzakobe mu mibvu ya mibvu.

Emfumu e nde ka ekala a masini o.» (aiññ 165) 34 Mari áfwulu kundaa ngye-yulu ti: «Me nkini aangyahaba babaghala o. Bunu-abo ndagha oyo yikughu okala?» 35 Ngye-yulu ábvuhulu kundaa nde ti: «Mufulu a Ngili sa agya mu we ya mpaana a Nzaami wu a Ensoñ-Yulu sa yifughu we ti edzwunu. Me mu obo mwana wu akala aaburu we sa akala wu a ngili, ya sa bata nde Mwana a Nzaami. 36 Ya mono, Elidzabete, musi dzumu li we edzi-dzighi sa aburu si mwana wu baghala munsa bujmini bu nde, nde wuulu baara baakalyele ti nde li etini, mu li yimi li nde ayi bangoono basemene, 37 buulu, Nzaami ka aakakuono a ndagha o.» 38 Ya Mari ályele ti: «Me ndi musala a Mfumu, nyañ myehene mikala kundaa me ti bwunu a bu lyele we.» Ña mbihi oño ngye-yulu ábulusihi nde. 39 Mu bitsughu bibye, Mari ágyene mu maswa-maswa ku bvulu limō lili etsulu e nsie kii minguo mimi Yude. 40 Bu ato oko, nde ásomo munsa nzo a Dzakari ya ágwi Elidzabete mboro. 41 Ña ogyughu Elidzabete mboro yi ógwi nde Mari, mwana a nde ányinji munsa mweē. Elidzabete álwulu mu Mufulu a Ngili, 42 ya ákehe engubu mu likyi lili mpini ti: «Mu bakaha bwohonon, Nzaami aabvulu oseme we, ya liseme li nde lili mu mwana wu aaburu we! 43 Me nande ndi mu kuulu ngughu a Mfumu a me agya kundaa me? 44 Mu matala ma aangyughu me mboro a we, mwana aanyinji mu esee munsa mweē a me. 45 Esee kundaa munde wu si kana ti mandagha ma oolyele Mfumu mu nde, sa makeele.» 46 Mu obo Mari ályele ti: «Endwu e me esyighi Mfumu. 47 Ya mukolo a me aalwulu mu esee mu nkooro a Nzaami, mubvwuhu a me. 48 Mu enganyma mu kuulu nde aakaala mihi mi nde kundaa me musala a nde wu gwene a mupfunu. Obaana mu matala ma, biseene byehene sa bilyele ti me nga-a-esee, 49 mu kuulu Nzaami nga a Lileene aagyighili mandagha ma manene kundaa me. Nkwumu a nde yili yi a ngili. 50 Nde aakamono babo ba baakagwa nde budziri nyii mu biseene ya biseene. 51 Nde aasala mu mpini a myaā mi nde, litumu li kwogho e nde ya aatsala baara ba bali a limpampana. 52 Nde aamaha mikogho mu bimfumu, ya akuhubu baara ba bagwene a limpampana. 53 Nde aaluhu bupfulu bulagha kundaa babo ba bali a nzala, ya aabvurulu bisini myaā-a-myaā. 54 Nde aayabaha baara ba Isarayelee basala ba nde, ya nde aalibili mweē mu osuo ngebe a nde, 55 Bwunu a bu

ályele nde kundaa bataara ba bihi, mu nkooro a Abarahame ya dzumu li nde mu matala nswe matala.» (aiññ 165) 56 Mari ási ku bele a bangoono batere mu nzo a Elidzabete. Ña mbihi oño, nde ábvughuru ku bula bu nde. 57 Matala ma ooburu Elidzabete máto, ya nde áburu mwana wu baghala. 58 Baara ba báli bitaa-taa bibye ya basi dzumu li nde bagyughu nsia yi a bubwe ba ósi nde Mfumu. Mu obo bákala mu esee ya nde. 59 Mwana bu akuhu bitsughu mpuomo, bo bágyi mu osohobo nde nzo a mbaa. Baara bwohonon bákadzyi ogwa nde nkwumu a taara a nde Dzakari. 60 Lo ngughu a nde ályele ti: «Pele, sa bagwa nde kwumu Dzā.» 61 Bo bályele nde ti: «Mu dzumu li we ka oli ya nkwumu oyo o.» 62 Mu obo bafwulu Dzakari mu bilyimi nsa nkwumu nde adzyi ogwa mwana a nde. 63 Dzakari bu aluomo mana baya, ásonon: «Nkwumu a nde Dzā.» Baara bwohonon bákijimi. 64 Ya ñaana oño, Dzakari áleene ofiribili ya nde ábwi oseme Nzaami. 65 Mu obo, baara bwohonon ba báli bitaa-taa bibye bámonon nzalamweē, ya mu etsulu e nsie kii minguo mimi Yude, baara bákabulubili mu mandagha mo mwohonon mamon. 66 Baara bwohonon ba bákagyughu ndagha oyo bákatsimi ya bákagwa bifwulu kunsu mukolon ti: «Mwana wu nande áakala? Mu enganyma, Mfumu li ya nde.» 67 Dzakari, taara a mwana, áli alwulu mu Mufulu a Ngili ya ábighili mandagha ma: 68 «Nyañ masyighi makala kundaa Mfumu, Nzaami a Isarayelee, mu kuulu nde aayabaha baara ba nde ya okwulu bo. 69 Nde aagwi bihi Mubvwuhu wu a mpini ña kara li bateghele ba mukogho Dabvide, musala a nde. 70 Ti bu átswama olyele nde mu matala ma makulu mu miñma mi mibighili mi nde mimi ngili. (aiññ 165) 71 Nde ali ágwi misiini ti sa ákwulu bihi-a-be ña myaā mi bataara ya ña myaā mi babo bwohonon ba baakabelee bihi-a-be. 72 Me mu obo nde aamonon bankagha ba bihi nyii ya aalibili ogwihini o nde kuu ngili mweē. 73 Mu enganyma Nzaami áli álaba mukihon kundaa Abarahame, nkagha a bihi-a-be, 74 ti sa akwulu bihi-a-be ña myaā mi bataara mpaala lisalala nde ku ogwene a nzalamweē. 75 Mu kuulu bihi likala baba bungili ya baba bunsumu ña mihi mi nde, mu bitsughu byehene bibi bumweē bu bihi. 76 Ya we, mwana a me, we sa kala mubighili a Wu a Nkara Yulu, mu kuulu we sa dzyara ña nkulu a Mfumu mu obwehē nzili a nde. 77 Ya mu osuo kundaa

baara ba nde bunu-a-bo bakughu obvwughu bu babagha kolokolo a masumu ma bo. **78** Mu nkooro a mukolo wu a nyii wu a Nzaami a bihi, otsyeme o nde sa osehene ŋa yulu a bihi, ti anga tala lili ku yulu, **79** mu otsehebe babo ba bali kunsu mpyibi, ya kunsu edzwunu kii lipfu ya mu obiri myili mi bihi-a-be mu nzili yi a edzuunu.» **80** Mwana ákakulu ya ákabagha mpini mu mufulu. Nde ákabulukala kunsu syehe tee mu matala ma áyapala nde ŋa busu bu basi Isarayeale.

2 Mu bitsughu bibye, Sedzare Ongusute ágwi litumu bataã mutala a baara bwohono ba bali ku nsie a emfumu e Rome. **2** Otaã mutala a baara oko kuu nsomo, bási ko mu matala ma óli Kirinyuse mfumu a etsulu e nsie kii Siiri. **3** Baara bwohono bá kayisono mankwumu ma bo, mbwuru mbwuru, mu bvulu li ndeme. **4** Dzodzeŋe si ámara ku bvulu lili Nadzarete mu etsulu e nsie kii Ngaliŋe ya ágyene ku Beteleeme, bvulu li báburu mukogho Dabvide mu etsulu e nsie kii Yude, mu kuulu nde áli musi dzumu li Dabvide. **5** Nde áyisono nkwumu a nde ya Mari, ndughu a nde wu ágwi nde bilyimi. Nde áli a yimi. **6** Ŋaala bo nkini ku Beteleeme matala ma oburu máto nde. **7** Nde áburu mwana wu baghala, mwana a nde wu a nsomo. Ádzyiŋi nde kunsu misyene mi biko ya álaŋa nde ŋa ebini ki baakatwulu bilogho bi ookadza banyama, mu kuulu mu nzo yi baakabwana bandzyi, bo ka bábagha ebini ki baagyereme o. **8** Mu etsulu e nsie ekye, óli a minkaala bibuolo mi mkaluhu mpyibi ku ebiri mu ókabulukebe bibuolo bi bo. **9** Ngye-yulu a Mfumu mutsyini ámoŋono ŋa nkulu a bo, ya otsyeme ku onene ófi kundaa Nzaami óyadzyi bo. Bo bámono nzalamweẽ yi alagha. **10** Lo ngye-yulu ályele kundaa bo ti: «Ka likala a nzalamweẽ o, mu kuulu me aayandyele be mukyene wu mubwe, wu akala aagwa etswumu e be kyehehe esee ki elagha. **11** Lolo li, mu bvulu lili Dabvide, baaburu mu nkooro a be, mubvwuhu. Nde me Kriste, Mfumu. **12** Ki me elyimi ki liigyahaba be nde: Sa limono mwana wu badzyiŋi kunsu mipa mi biko ya baalaha nde ŋa ebini ki ookadza banyama.» **13** Ŋaana oŋo mu ensihibi, mpwumu a bangye-yulu baba mikaã mi bambumbulu baba mayulu, yíyabvununu ya ngye-yulu munde. Ya bo bábwí osyighi Nzaami ti: **14** «Nsia kundaa Nzaami mu ensoo-yulu, ya edzuunu ŋa nsie, kundaa baara

ba adzyi nde.» **15** Bangye-yulu bu bábulusihi bo mu obvughuru ku yulu, minkaala bibuolo mĩbili bo-a-bo: «Litswe ku Beteleeme, mpaala liyitala mandagha ma maabwi, ma oolyele bihi-a-be Mfumu.» **16** Ya bo bágyene maswa-maswa ya bámono Mari, Dzodzeŋe ya emwa-mwana ki bálaŋa munsu ebini ki ookadza banyama. **17** Bu bamono nde, bo bályele mandagha mamu ma bályele kundaa bo mu nkooro a mwana munde. **18** Bo bwohono ba bágyughu mandagha ma ólyele minkaala bibuolo bákiŋimi ku olagha. **19** Mari ákabunu mandagha mo mwohono ma ya ákatsimi mo munsu mukolo a nde. **20** Ya minkaala bibuolo, mĩbvughuru, mikabulusyighi Nzaami ya ogwa nde baana, mu myehene mi bágyughu ya bámono bo, mu kuulu myehene mĩli bwunu a bu ólyele bo ngye-yulu. **21** Bitsughu mpuomo bu bikughu, matala mama osohobo mwana nzo a mbaa máto, bágwí nde nkwumu Yíisu, yi ólyele ngye-yulu, nsomo ngughu a nde akeghele. **22** Bitsughu bibi otsehebe nyuru bu bikughu, bwunu a bu ókatumu Mikyene mi Moyidze, bo bágyene a mwana ku Nzo a nzaami ku Yerusaleme mu osuo nde kundaa Mfumu. **23** Bwunu a bu básono mu Mikyene mi Mfumu ti: Nswe mwana wu a nsomo wu baghala wu baaburu sa bagwaghala nde kundaa Mfumu. **24** Ya bo bágwí ekaba, bwunu a bu ókalyele Mikyene mi Mfumu, bidzu-dzughu byele, bwunu we mabeeme mwolo, maala nkini ka maayeŋe o. **25** Ku Yerusaleme áli oli ya baghala mutsyini nkwumu a nde áli Simeo. Nde áli mbwuru wu bunsumu ya wu aakagwa Nzaami budziri, wu áakakebe obuono o Isarayeale, ya Mufulu a Ngili áli ŋa yulu a nde. **26** Mufulu a Ngili ályele kundaa nde ti nde ka kpa o tee ku aamono nde Kriste Mfumu. **27** Mu obo, Mufulu a Ngili ágyene a nde ku Nzo a nzaami, mu matala ma óyasomo taara ya ngughu a emwa-mwana e bo Yíisu mu Nzo a nzaami, mu osa mimye mi ókatumu Mikyene mu nkooro a nde, **28** Simeo ágwolo mwana, ásyighi Nzaami ya ályele ti: **29** «Mfumu, mu matala ma, nyaã musala e we agye mu edzuunu, ti bu áli alyele we. **30** Mu kuulu mihi mi me miimono obvwughu o we, **31** ku átswama ogyighili we ŋa busu bu baara bwohono. **32** Oko me otsyeme ku akala oosuo omoŋono kundaa bikaana, ya nsia kundaa baara ba we, Isarayeale.» **33** Taara ya ngughu a Yíisu bákiŋimi bu bagyughu mi ókalyele Simeo mu nde. **34** Simeo áseme bo, ya ályele kundaa Mari,

ngughu a Yiisu ti: «Mono, mwana wu li ŋa mu nkooro a obwa ya otemene kuu baara balagha mu Isaraye, ya mu okala elyimi kiili baara balagha akala baagwene odzyi kye. 35 Nde sa asuo mansweghe ma mali kunsu kara li mikolo mi baara balagha. Mu mi mitala weme, lipee sa litobolo we mukolo, mpaala mi ookatsimi baara balagha kunsu mikolo, baara basoolo mye.» 36 Óli si mubighili wu mukaha, nkwumu a nde Ane, mwana a Fanwele, mu dzumu lili Asere. Nde áli ayi enjini, ya bamvulu yini a nsaama ási ku bala. 37 Ŋa mbihi ogo, nde ásono bupfiili, tee ŋa áto nde bamvulu makwumu-mpuomo ya bana. Nde ka ákagye la ya Nzo a nzaami o. Nde ákasalala Nzaami mpyibi ya mwii, mu okakuru muswele mu bala ya mu okasamana. 38 Mu matala maana mamu, nde si áli ogo, mu okabvurulu matuono kundaa Nzaami, ya mu okabulubili mu mwana munde, kundaa bo bwohono ba báakebe okwulu o Yerusaleme. 39 Dzodzefe ya Mari bu bamana ogyighili myehene mi ookatumu Mikyene mi Mfumu, bo bábvughuru ku bvulu li bo ku Nadzarete, mu etsulu e nsie kii Ngalile. 40 Emwa-mwana ékakulu ya ékabagha mpini, ékalwulu mu bunsughu ya bwehe bu Nzaami búli mu kye. 41 Nswe mvulu, taara ya ngughu a Yiisu báakagye ku Yerusaleme ku kyiri kii Paake. 42 Yiisu bu ato bamvulu kwumu ya buolo, nde ágyene ya bo, bwunu a bu óli epfu e kyiri. 43 Bitsughu bi kyiri bu bifi, mu matala ma bákabvughuru bo, mwana Yiisu ábulusyili ku Yerusaleme, kuulu taara ya ngughu osoolo we. 44 Bo báakatsimi ti nde áli munsu mpwumu. Bu badzyara etsughu etsyini mu nzili, ya babaana okabulusagha nde kundaa basi dzumu li bo, ya kundaa ba basoolo bo. 45 Lo, bu bagwene omono nde, bo bábvughuru ku Yerusaleme mu okabulusagha nde. 46 Bitsughu bitere bu bikughu, bo báabagha nde mu Nzo a Nzaami, ábwi nsini ŋa kara-a-kara li baluo-mikyene, mu okagyughu bo ya mu okagwa bo bifwulu. 47 Baara bwohono ba báakagyughu nde báakajijimi mu mayele ma nde, ya mu mamvuru ma nde. 48 Taara ya ngughu bu bamono nde, bákinjimi, ya ngughu a nde ályele kundaa nde ti: «Mwana a me, mu emakye we aasi bihi bu? Mono ati, me ya taara a we liikpi mu okabulusagha we.» 49 Lo nde ábvuhulu kundaa bo ti: «Mu emakye be lili mu okabulusagha me? Bunu, be ka ligyahaba o ti me mfaana okanama mandagha ma Taara a me?» 50 Lo bo

ka bábaghala ndagha yi ályele nde kundaa bo o. 51 Ŋa nseele, nde ákumunu ya bo ku Nadzarete. Nde ákagyughu taara ya ngughu a nde. Ya ngughu a nde ákagyighili okebe mandagha mwohono mamu munsu mukolo a nde. 52 Ya Yiisu ákakulu mu bunsughu, mu nyuru ya mu bwehe ŋa nkulu a Nzaami ya ŋa nkulu a baara.

3 Mu mvulu wu a kwumu ya bataana wu a emfumu kii Tibere Sedzare mukogho wu a nsie yi a Rome, Ponse Pilate áli mfumu wu a etsulu e nsie kii Yude, Erode mfumu wu a etsulu e nsie kii Ngalile, Filipe mwana a taara a nde mfumu wu a etsulu e nsie kii Iture ya kii Tarakonitide, ya Lisanyase áli mfumu wu a etsulu e nsie kii Abilene. 2 Ane ya Kayife báli bakwuru ba bangaa ba nzaami baba nsomo. Me mu matala mamu Nzaami ályele mandagha ma nde kundaa Dzā, mwana a Dzakari, ku syehe. 3 Dzā ákadzye mu etsulu e nsie ki eli be-bele a mwele wu a Dzurudē. Nde ákabuluta mukwughu wu: «Ligyiji mayele, libagha obogho kuu ogyiji mayele mu kolokolo a masumu.» 4 Ti bu básono mu mukaana a mubighili Edzayi ti: «Likyi li munde wu li mu okakehe engumbu ku syehe: Ligyighili nzili a Mfumu, lisa mankwulu ma nde makala nsumu! 5 Nswe mbye sa badzyighi yo Nswe munguo ya nswe nkwichi sa bakirili bye bipere, Mafuru ma manzili sa basa mo nsumu, Manzili ma mali bikumu-bikumu sa basa mo elehe 6 Ya baara bwohono sa bamono obvwughu o Nzaami.» 7 Nde ákalyele kundaa mpwumu a baara yi áakagya kundaa nde mu oyabogho ndiri: «Etswumu kii bampili! Nande aasuo be bu obara nkehe a Nzaami yi li mu ogya? 8 Mu obo, lisuo bigyighili bi bifaana ya ogyiji mayele, ya ka libaana okabululyele mu beme o ti: “Taara a bihi Abarahame”, buulu me ndyele ti: mu mameē ma, Nzaami kughu otehebe baana kundaa Abarahame! 9 Ekwu ayi bamaatwulu ŋa yulu a midza mi muti: nswe muti wu gwene oburu bimburi bi bibwe, lo nde wu okpaa ya wu otsili ku mbaa.» 10 Mpwumu a baara yifwulu nde ti: «Lo bihi emakye lifaana osa?» 11 Nde ábvuhulu kundaa bo ti: «Munde wu li a binkuru byele, agwa etsyini kundaa munde wu gwene a kye, ya munde wu li a bi-odza, asa bumō si.» 12 Mintolo-mpagha si mígyi mpaala babogho bo, ya bályele kundaa nde ti: «Muluo, bihi emakye lifaana osa?» 13 Nde ábvuhulu kundaa bo ti: «Ŋa liikatolo mpagha, ka

likaluhu mutala wu bátumu o.» **14** Bambumbulu si báfwulu nde ti: «Lo bihi emakye lifaana osa?» Nde ályele kundaa bo ti: «Ka ligwohono kii mbwuru mu mpini o, ya ka lipfiri mpya o, lo liikakala a esee mu mufuru wu a ndaa-beme. Ya likala a esee mu nzi yi baakafiri be mu ngoono.» **15** Baara bákabulukebe ya bákabulugwa bifwulu kunsu mikolo mi bo mu nkooro a Dzā, ti ampe nde me Kriste. **16** Mu obo Dzā ábvuhulu kundaa bo bwohono ti: «Me ndi mu okabogho be mu madza, lo munde wu bvulu me, ya me ka nkughu onyana musyi a bikogho bi nde o. Nde sa abogho be mu Mufulu a Ngili ya mu mbaa. **17** Nde aakwara mukele mu kwogho e nde mu okabala bimburi ya nsele. Nde sa akwu bimburi kunsu etaghala e nde, lo nde sa atsughu nsele ku mbaa yi aagwene okadzimi.» **18** Mu maluo ma malagha mama ogwa mpama, Dzā ákabulutsala Nsia yi Mbwe kundaa baara. **19** Lo Dzā áfyee Erode, mfumu a etsulu e nsie, mu nkooro a Erodyade, mukala a mbwee a nde, ya mu mandagha mwohono ma mabi ma ási nde. **20** Ija yulu a mandagha mwohono, Erode ásyimi Dzā ya álo nde mu boloko. **21** Bu bamana obogho baara bwohono, Yiisu si bábogho nde. Mu matala ma ákabuono nde, yulu lídzubulu, **22** ya Mufulu a Ngili áyasughuru Ija yulu a nde mu efaana kii beeme, ya ndagha yídzumu mu yulu: «We li mwana a me wu mukolo, me aankamono esee mu we.» **23** Yiisu áli a bamvulu bele makwumu-matere Ija ábaana nde esala e nde. Nde áli bwunu a bu ókabulutsimi baara ti mwana a Dzodzefe, wu áali mwana a Eli, **24** Mwana a Matate, mwana a Lebvi, mwana a Meleki, mwana a Yanayi, mwana a Dzodzefe, **25** mwana a Matatyase, mwana a Amose, mwana a Nawume, mwana a Eseli, mwana a Nangayi, **26** Nangayi mwana a Maate, Maate mwana a Matatyase, Matatyase mwana a Semeyi, Semeyi mwana a Yoseke, Yoseke mwana a Yoda, **27** Yoda mwana a Dzāanane, Yowanane mwana a Resa, Resa mwana a Dzorobabele, Dzorobabele mwana a Salatyele, Salatyele mwana a Neri, **28** Neri mwana a Meleki, Meleki mwana a Adi, Adi mwana a Kosame, Kosame mwana a Elemadame, Elemadame mwana a Ere, **29** Ere mwana a Yiisu, Yiisu mwana Elyedzere, Elyedzere mwana a Yorime, Yorime mwana a Matate, Matate mwana a Lebvi, **30** Lebvi mwana a Simeō, Simeō mwana a Yuda, Yuda mwana a Dzodzefe,

Dzodzefe mwana a Yoname, Yoname mwana a Elyakime, **31** Elyakime mwana a Meleya, Meleya mwana a Mena, Mena mwana a Matata, Matata mwana a Natā, Natā mwana a Dabvide, **32** Dabvide mwana a Dzese, Dzese mwana a Obede, Obede mwana a Boadze, Boadze mwana a Sala, Sala mwana a Naasō, **33** Naasō mwana a Aminadabe, Aminadabe mwana a Adimine, Adimine mwana a Arani, Arani mwana a Eserō, Eserō mwana a Farese, Farese mwana a Yuda, **34** Yuda mwana a Dzakobe, Dzakobe mwana a Idzake, Idzake mwana a Abarahame, Abarahame mwana a Tera, Tera mwana a Nahore, **35** Nahore mwana a Seruke, Seruke mwana a Rangawu, Rangawu mwana a Faleke, Faleke mwana a Ebere, Ebere mwana a Sala, **36** Sala mwana a Kayiname, Kayiname mwana a Arafakade, Arafakade mwana a Seme, Seme mwana a Nowe, Nowe mwana a Lameke, **37** Lameke mwana a Matusaleme, Matusaleme mwana a Enoke, Enoke mwana a Yarede, Yarede mwana a Malelelele, Malelelele mwana a Kename, **38** Kename mwana a Enose, Enose mwana a Sete. Sete mwana a Adā, Adā mwana a Nzaami.

4 Mu matala ma ófi Yiisu ku Dzurudē, nde áli alwulu mu Mufulu a Ngili, ya Mufulu a Ngili biri nde ku syehe. **2** Mu bitsughu makwumu-mana Satana ágyeele nde. Nde ka ali áli elogho si etsyini o. Ija bihi a bitsughu bi bye, nzala yifuru nde. **3** Satana lyele kundaa nde ti: «Kala ti we li mwana a Nzaami, lyele kundaa limeē li likighiri limpa.» **4** Yiisu bvuhulu kundaa nde ti: «Basono bu, mbwuru ka li mweē mu yini a mampa o.» **5** Satana biri nde ku nkara a yulu, ya mu mana tala, suo nde bimfumu bi nsie byehene, **6** ya lyele kundaa nde ndiri: «Me sa ngwa we litumu lwohono li, ya nsia a lo, mu kuulu kundaa me bágwi bye, ya me nkughu ogwa bye kundaa munde wu ndzyi me bye ogwa. **7** Kala ti we kunu mabuo Ija nkulu a me, lo lwohono tumu likala lili we.» **8** Yiisu bvuhulu kundaa nde ti: «Basono bu: “Yini a Ija nkulu a Mfumu Nzaami a we, we faana okunu mabuo Ija nsie, ya yini a nde we faana osamana.”» **9** Ija nseele, Satana biri nde ku Yerusalem, twulu nde ku yulu a nzo a Nzaami ya lyele nde ti: «Kala ti we li mwana a Nzaami, bwa ku nsie», **10** mu kuulu básono ti: «Nde sa awa litumu kundaa bangye-yulu ba nde mu nkooro a we, Mpaala bo bakebe we. **11** Ya ti: Sa baseene we

mu myaā, Mpaala kwulu e we enyaā okubu kya mu limeē.» **12** Yiisu bvuhulu kundaa nde ti: «Básono si ti: “Ka gyele Mfumu Nzaami a we o”.» **13** Satana amana ogyeele Yiisu mu bifaana byehene, bulusihi nde mu mana matala. **14** Yiisu bvughuru ku Ngalile ya mpini a Mufulu a Ngili, ya nsia yitsajama mu etsulu e nsie kyehehe mu nkooro a nde. **15** Nde ákabululuo mu manzo ma ba-Dzwife mama lisamana, ya baara bwohono báka nde nsia. **16** Yiisu bvughuru ku bvulu li Nadzarete ku ákulu nde. Mu etsughu kii Sabate, nde somo nzo a lisamana a ba-Dzwife ti bu óli epfu e nde. Nde temene mu otala mandagha ma Nzaami. **17** Ya bagwi nde mukaana wu a mubighili Edzayi. Bu adzubulu nde, mono ebini ki básono ti: **18** «Mufulu a Mfumu li mu me, Buulu nde aakili me maala, Mu ogye a Nsia yi Mbwe kundaa bawe. Nde aaweghe me Mu ota mukwughu wu okwulu kundaa ba bali mu manzo ma boloko, Ya kundaa binkpa-mihi ti sa bamono, Obvuhulu kunsá bumpoholo babo ba bali kunsá kimini. **19** Ota mukwughu mu mubvu wu a bwehe bu Mfumu.» **20** Bu adzyi mukaana, bvurulu nde kundaa esala ya bwi nsini. Bo bwohono ba báli munsá nzo a lisamana babwi okatala nde. **21** Orjo nde baana oleye kundaa bo ti: «Lolo li, bisono bi bi liigyughu be, biikele.» **22** Baara bwohono báli bampughulu mu nde, ya bákañjimi mu mandagha mama bwehe ma mákapala mu muñma a nde, ya bákalyle ti: «Bunu, wu ka li mwana a Dzodzele o?» **23** Nde lyele kundaa bo ti: «Me ngayahaba ti be sa lita me nkumu yi: “Ngaa, saha nyuru a weme.” Ya be sa lifirileye me si ti: “Myehene mi liigyughu bihi mi aasi we ku Kaperenawume, yighili nye si mu etsulu e nsie e weme ki”.» **24** Ŋa mbihi orjo, nde firileye ti: «Mu engañma, me ndeyele be ti: Ka oli a mubighili ti mumō wu bákihi mu etsulu e nsie e ndeme. **25** Mu ngañma me ndeyele kundaa be ti: Bapfiili ba bakaha báli balagha mu matala ma Eli mu Isaraye, ŋa odzughubu yulu mu bamvulu batere ya bangoono basemene, ya munzyala ágyi mu nsie nsyini. **26** Lo ka bágweghe Eli kundaa mupfiili si mumo mu bo o, yini a ku Sarepeta, mu etsulu e nsie kii Sidō, kundaa mupfiili wu mukaha wu áali omo bágweghe nde. **27** Banga-a-buala si áli balagha mu Isaraye, mu matala mama mubighili Elidze, lo ka oli a si mumō mu bo o wu bátsehebe, ŋa yulu a yini a Naamane musi Siri.» **28** Bo bwohono ba báli munsá nzo a lisamana

bu bagyughu mandagha mamó, bakolo nkehe. **29** Batemene, bapaha nde ku mbala a bvulu ya babiri nde ku bele a mbye yi a munguo wu bátwu bvulu, mpaala batsili nde munsá mbye. **30** Lo Yiisu ábululuru ŋa kara-a-kara li bo, ágyene o nde. **31** Ŋa mbihi orjo, Yiisu ákumunu ku bvulu lili Kaperenawume mu etsulu e nsie kii Ngalile. Oko nde ákaluo baara mu etsughu kii Sabate. **32** Baara bákañjimi mu nduo-nduo yi ákaluo nde, mu kuulu nde ákaluo ti mbwuru wu li a litumu. **33** Mu nzo a lisamana óli ya baghala mutsyini wu áali a mufulu wu mubi. Nde ákehe engubu mu yulu ti: **34** «Aa! Nsa ndagha yili ŋa kara li bihi ya we, Yiisu musi Nadzarete? Bunu, we bu aagyi mu oyapfihili bihi? Me nsoolo we na nde li: We li wu a ngili wu oogweghe Nzaami!» **35** Yiisu áfulu mufulu munde epama ya ályele ti: «Kuru muñma a we, ya pala mu baghala wu!» Mufulu wu mubi ábwihi mbwuru munde mu nsie ŋa kara-a-kara li baara, ya ápala mu nde ku ogwene a omweē nde mpara. **36** Baara bwohono bámono nzalamweē ya bákabili bo-a-bo ti: «Yi nki ndagha? Mbwuru li mu okabili mu litumu ya mu lileene kundaa mifulu mi mibi, ya nye mili mu okapala!» **37** Ya nsia yitsajama mu nkooro a nde mu etsulu e nsie kyehehe. **38** Ŋa mbihi orjo, Yiisu bu apala mu nzo a lisamana, yene ku nzo a Simō. Oko, buko bu Simō wu mukaha áli a mukaama wu a mpini. Baara basyama kundaa Yiisu mu nkooro a nde. **39** Bu apfunumu ŋa bele a nde, Yiisu fulu mukaama epama ya mukaama pala mu nde. Ŋaana orjo, mukaha munde, temene, bwi osalala bo. **40** Bwihi bu buyili, baara bwohono ba báli a mabyele mama mawa-mawa, bayabiri mo kundaa Yiisu. Nde naā bo myaā ya dzuhu bo. **41** Mifulu mi mibi si mipala mu babyele balagha ya mu okabulukehe bingubu ti: «We me Mwana a Nzaami!» Lo Yiisu ákafulu nye bipama, ya ka ágyi nye muswa mu obili o, mu kuulu nye míyahaba ti nde me Kriste. **42** Bwihi bu buki, Yiisu bulupala mu bvulu ya yene ku syehe. Mpwumu a baara yibaana osagha nde tee bagyene ku áli nde. Bu bamono nde, bayeele osa myehene kuulu nde anyaa osihi bo. **43** Lo nde lyele kundaa bo ti: «Me mfaana oyiluo si Nsia yi Mbwe yi a Emfumu e Nzaami ku mabvulu ma make, kuulu me mu obo baaweghe me.» **44** Orjo nde yene mu okabululuo mu manzo ma lisamana mu etsulu e nsie kii Yude.

5 Yiiisu áli átemene mu mukogho a bana lili Ngenedzaret. Mpwumu a baara yiyasa nde mpiji mu ogyughu Ndagha a Nzaami. **2** Nde ámono mabwara mwolo ma bátwulu ña yulu a nseghe mu mukogho a bana. Ka óli a mbwuru mumo o, mu kuulu bilebe-banswi bísughuru ya bíkaswagha nkoho a bo. **3** Yiiisu ákumu mu bwara butsyini bu búli bu bundaa Simō, ya áluomo kundaa nde ti: «Sehe eke mu kara a madza.» Ya nde ábwi nsini ya ábaana oluo mampwumu ma baara. **4** Bu amana obili, nde ályele kundaa Simō ndiri: «Sehe a bwara ku oli madza yighi, ya litubu nkoho a be mu olebe banswi.» **5** Simō ábvuhulu nde ti: «Muluo, bihi liimono mpara mu mpyibi yi nsyini, lo ka liibagha elogho o. Lo buulu we lyele, me likoho aafirintubu.» **6** Bu batubu likoho mu madza, bábagha banswi balagha, ya likoho li bo líbaana okagha. **7** Bo bákoro banganda ba bo ba báli mu bwara bubuke mu oyabaha bo. Bo bágyi ya báluhu mabwara mansa mwolo, kuulu mo mábaana odzyama. **8** Simō Piere bu amono obo, ákumu mabuo mu nsie ña nkulu a Yiiisu ya ályele ti: «Mfumu, mara o we ña bele a me, mu kuulu me ndi mbwuru nga-a-masumu.» **9** Simō, ya bwohono ba báli ya nde bámono nzalamweē mu bubi ba bágyighili bo. **10** Óli bumō si kundaa Dzake ya Dzā, baana ba Nzebede, bambaala ba Simō. Yiiisu ályele kundaa Simō ti: «Ka amono nzalamweē o! Obaana lolo li, we sa kala elebe kii baara.» **11** Bu bayabvughuru a mabwara ña yulu a nseghe, mu bábulusihi bilogho byehene ya bánama Yiiisu. **12** Etsugbu nga-emō, Yiiisu áli mu bvulu litsyini. Omo óli ya baghala mutsyini wu áali a bubyele bu buala. Baghala munde bu amono Yiiisu, ábwi busu mu nsie ña nkulu a nde, ya ábuono nde bu: «Mfumu, kala we dzyi, we kughu otsehebe me.» **13** Yiiisu álabala kwogho, ábyeme nde ya ályele ti: «Me ndzyi, kala wu a tse-tse.» Ya ñaana oño, buala bu nde búfi. **14** Ña mbili oño, Yiiisu átswi nde mukele wu: «Ka lyele kundaa mbwuru si mumō o. Lo gye yimogono weme kundaa ngaa a nzaami, ya gwa ekaba kii otsyeme ki ótumu Moyidze, mpaala okala elyimi kii bumpughulu kundaa baara.» **15** Lo nsia a Yiiisu yíbvulu otsajama mu nkooro a nde, ya mampwumu ma baara malagha mákagya mu ogyugbu nde, ya mu kuulu madzugbu mu mabyele ma bo. **16** Lo nde, nde ágyene ku syehe ku ákabuono. **17** Etsugbu etsyini, Yiiisu bu ákaluo, ba-Faridzyē ya baluo-mikyene áli babwi nsini oño. Bo báfi mu mabvulu mwohono mama ku Ngálie, ku Yude ya bvulu lili Yerusalem. Lileene li Mfumu li líli mu nde, límogono mu libugbu. **18** Ya mono, baara bágyi a mbwuru mutsyini wu ópki binama ña yulu a mbugbu. Bo basagha bu baasohobo nde munsá nzo, ya bu otwulu nde ña nkulu a Yiiisu. **19** Lo bo ka bábagha bu baasohobo nde o, mu nkooro a mpwumu a baara. Bo bákumu ku yulu a see li nzo lili eyala, bátobolo see, ya básurulu nde mu mbugbu ña mihi mi baara bwohono ña nkulu a Yiiisu. **20** Yiiisu bu amono kana li bo, ályele kundaa baghala wu ópki binama ti: «Baghala, masumu ma we baasi mo kolokolo.» **21** Oño, baluo-mikyene ya ba-Faridzyē bábaana otsimi ya bályele ti: «Mbwuru wu aatsaala Nzaami wu, nde nande ali? Nande kughu osa masumu kolokolo kala ka oli yini a Nzaami o?» **22** Yiiisu bu abaghala bitsimi bi bo, ábvuhulu kundaa bo ti: «Mu emakye be lili a bitsimi bibye kunsá mikolo mi be?» **23** Nki ndagha yi gwene a mpara, olyele ti: «Masumu ma we baasi mo kolokolo», bwunu we: «Temene ya dzyara?» **24** Mu kuulu be ligyahaba ti Mwana a mbwuru li a litumu lii osa masumu kolokolo ña yulu a nsie – Nde ályele kundaa mbwuru wu ópki binama ti: «Temene, gwolo laba li we ya bvughuru ku nzo a we». **25** Ñaana oño, mbwuru munde átemene ña mihi mi bwohono, ágwolo mbugbu yi bálaha nde, ya ágyene ku nzo a nde, mu okabulusyighi Nzaami. **26** Baara bwohono bákinimi ku olagha ya bákasyighi Nzaami. Bo báli a nzalamweē ya bákabili bu: «Lolo liimono ndagha yi okinimi.» **27** Ña mbihi oño, Yiiisu ápala ya nde ámono muntolo-mpagha mutsyini wu ábwi nsini ña nzo a mpagha. Nkwumu a nde Lebvi. Yiiisu ályele kundaa nde ti: «Nama me!» **28** Lebvi átemene, ábulusihi bilogho byehene, ya ánama nde. **29** Lebvi ási Yiiisu kyiri ki enene mu nzo a nde. Mintolo-mpagha ya baara babake báli oño, ya bákadza emō ya bo. **30** Ba-Faridzyē ya baluo-mikyene ba báli omo bákangunu ya bályele kundaa binduono bi Yiiisu bu: «Mu emakye be lili mu okadza ya oñma emō ya mintolo-mpagha ya banga-a-masumu?» **31** Yiiisu ábvuhulu kundaa bo bu: «Ba bali nsiili ka bali a nzala a ngaa o, Lo babyele. **32** Me ka aangyi mu oyata baba bunsumu mbili o, lo banga-a-masumu mpaala bagyiñi mayele.» **33** Bo bályele kundaa nde ti: «Binduono bi Dzā biikakuru muswele mu bala matala mwohono ya biikabuono Nzaami,

binduono bi ba-Faridzyē bumō si. Lo bibi ndaa we yini a okadza ya okajma.» **34** Yiisu ábvuhulu bo ti: «Bunu, be likughu oluomo bandughu baba mulumu bakuru muswele mu bala, mu matala maala nde nkini li ya bo? **35** Lo bitsughu bili mu ogya, ya mbala-tsughu ŋa akala baamaha bo mulumu la ya bo, bo sa akala bakuru muswele mu bala.» **36** Yiisu áfirita bo nkumu yi: «Ka oli a mbwuru wu kughu okaghala mupa a eko mu enkuru ki enyaghara mu obaama enkuru ki ekulu o. Buulu, nde sa akaghala enkuru ki enyaghara, ya mupa enkuru wu aamaha nde mu kye, ka li nsihi ya enkuru ki ekulu o. **37** Bumō si, ka oli a mbwuru wu kughu oloŋono mala ma manyaghara mu nduru yi a mu ebaana kii nyama yi nkulu o, buulu mala ma manyaghara sa mabaala mamfulu. Lo mala sa matsanjama ya mamfulu sa mabyi. **38** Lo, mala ma manyaghara okaloŋono mu manduru mama mu bibaana bi banyama ma manyaghara. **39** Ya ka oli a mbwuru o wu kughu osa nzala a mala ma manyaghara, kala ti nde maanjama ma mayele. Buulu nde sa ályele ti: “Mala ma mayele mabvulu bubwe.”»

6 Ya mu etsughu etsyini kii Sabate, Yiisu ákaluru munsá manseghe mama bele. Binduono bi nde bíbwi okabuluka binsia bi mburu, bíkanyoŋ ya bíkadza yo. **2** Ba-Faridzyē babake bályele bo ti: «Mu emakye be lili mu okasa mandagha maala ka bágwí muswa mu etsughu kii Sabate o?» **3** Yiisu ábvuhulu bo bu: «Be ka liikataā ndagha yi ósi Dabvide o, mu matala ma ófuru nde nzala, nde ya ba báli ya nde? **4** Bunu nde ásomo mu nzo a Nzaami, ágwolo mampa mama ekaba, áli mo ya ágwí si kundaa ba báli ya nde. Mampa mamó, bo ka báli a muswa mu odza mó o, ŋa yulu a yini a bangaa ba nzaami.» **5** Nde áfirilyele kundaa bo ti: «Mwana a mbwuru li mfumu a Sabate.» **6** Mu etsughu ekimi kii Sabate, Yiisu ásomo mu nzo a lisamana a ba-Dzwífe, ya ábaana oluo. Óli a baghala mutsyini omo wu bágwolo kwogho. **7** Baluo-mikyene ya ba-Faridzyē bákabulutala Yiisu mu omono kala ti nde kughu odzuhu mubyele mu etsughu kii Sabate, mpaala bo babagha ndagha yi baafwunu nde. **8** Lo Yiisu bu ágyahaba bitsimi bi bo, ályele kundaa baghala munde wu bágwolo kwogho ti: «Temene ya kala ŋa kara-a-kara ŋa.» Nde átemene ya ákala mu mukiri. **9** Yiisu ályele kundaa bo ti: «Me mfwulu kundaa be kala ti oli muswa mu ogyighili ma

mabwe bwunu we ma mabi, mu obvwuhu bwunu we mu odzwa mbwuru mu etsughu kii Sabate?» **10** Yiisu átala ngulu ya ngulu, nde ályele kundaa baghala munde ti: «Labala kwogho e we!» Nde álabala kye, ya kwogho e nde ébvughuru bu éli nsomo. **11** Lo baluo-mikyene ya ba-Faridzyē bákolo nkehe yi alagha ya bákabili bo-a-bo, bunu-a-bo bakughu osa Yiisu. **12** Mu bitsughu bibye, Yiisu ágyene ku yulu a munguo mu oyisamana. Nde áluhu mpyibi yohono mu okasamana Nzaami. **13** Bwíhi bu buki, nde áti binduono bi nde mbili, ya ásuolo kwumu ya byele, ya ágwí bye nkumu yi bantumu. **14** Ma me mankwumu ma bo: Simō, wu ágwí nde nkumu yi a Piere, Andere mbwee a nde, Dzake, Dzā, Filipe, Baretelemi, **15** Matye, Toma, Dzake mwana a Alafe, Simō wu baakata ti mu-Nzelote, **16** Yuda mwana a Dzake, ya Yuda Isikaryote wu aatyeghe nde. **17** Bu akumunu munguo emō ya bo, Yiisu átemene ŋa epere, ŋa óli mpwumu yi nene yi a binduono bi nde, ya mpwumu yi nene yi a baara baba ku Yude Iwohono, baba ku Yerusaleme, baba ku mukogho a mubu, baba Tire ya baba Sidō. **18** Bo bwohono bágyi mu ogyughu nde ya mu kuulu nde adzuhu bo mu mabyele mabo. Babo ba ókamwehē mifulu mi mibi kimini badzughu. **19** Mpwumu a baara yohono yíkasagha obyeme nde mu kuulu lileene líkapala munde ya líkadzuhu bo bwohono. **20** Mu obo, Yiisu bu akaala mihi mi nde kundaa binduono bi nde, ályele ti: «Esee kundaa be bawele, Mu kuulu Emfumu e Nzaami eli Kii ndaa be. **21** Esee kundaa be ba lili mu okpa nzala mu matala ma, mu kuulu be sa ligyughuru. Esee kundaa be ba lili mu okalili mu matala ma, mu kuulu be sa lisebe. **22** Esee kundaa be, kala ti baara babele be, babihi be, batughu be ya balyele mandagha ma mabi mu be, mu nkooro a Mwana a mbwuru». **23** «Limono emiini mu etsughu ekye, ya likala kunsá muyayaā, mu kuulu embwaā e be eli ki enene mu yulu. Bwunu obo si bataara ba be bákasa kundaa mibighili.» **24** «Lo, nyíi kundaa be bisini, mu kuulu be limaabagha libuono li be! **25** Nyíi kundaa be ba lili kunsá bupfulu mu matala ma, mu kuulu mbala-tsughu be tumu likpa nzala. Nyíi kundaa be ba lili mu okasebe mu matala ma, etsughu eli ki liisomo be pfiili ya liilili. **26** Nyíi mu matala ma obili baara bwohono mu bubwe bu be, mu kuulu me obo si bataara ba be bákasa kundaa mibighili mimi mpya.» **27** «Lo kundaa

be ba lili mu okagyughu me, me ndyele be ti: Liikadzyi mitaara mi be, liikasa bubwe kundaa ba baakabele be. **28** Liikaseme babo ba baakabiili be bipwolo. Liikabuono Nzaami mu babo ba baakabuulu mpya mu be. **29** Kala ti mbwuru kaha we limpala mu tama, lo taama nde si tama lilike, ya kala ti nde gwohono we enkuru e we ki ela kii kobo, nyaã nde si agwolo enkuru kii mu ntulu. **30** Nswe munde wu aaluomo we elogho, lo gwa nde kye. Ya kala ti mbwuru gwohono elogho e we, ka firiluomo nde kye o. **31** Mandagha ma lidzyi be ti baara bagyighili be mo, behe si ligyighili bumō kundaa bo. **32** Kala ti be okadzyi babo ba baakadzyi be, lo mu emakye baatuono be? Banga-a-masumu si ti baakadzyi babo ba baakadzyi bo! **33** Mu kuulu, kala ti be bubwe okasa kundaa babo ba baakasa be bubwe, lo mu emakye baatuono be? Banga-a-masumu si ti baakasa bumō. **34** Kala ti be okasohobo kundaa babo ba lili a be bitsimi ti sa babvurulu, lo emakye baatuono be? Banga-a-masumu si ti baakasohobo kundaa banga-a-masumu, mpaala babvurulu bo bwunu obo si! **35** «Lo be, liikadzyi mitaara mi be, liikasa bubwe, ya liikasohobo wene a okala a etsimi kiili ti sa babvurulu be. Mufuru a be sa akala wu munene, ya be sa likala baana ba Nzaami wu a Ensoō-Yulu, mu kuulu nde li a mukolo mubwe kundaa ba baagwene okabvurulu matuono, ya kundaa banga-a-mukolo bubu. **36** Liikakala ya mukolo wu a nyii bwunu a bu oli a Taara a behe si mukolo wu a nyii.» **37** «Ka likalamana banganda o, mpaala banyaã olamana behe si. Ka likabwihi banganda o, mpaala banyaã obwihi behe si. Lisa babake kolokolo, ya sa basa behe si kolokolo. **38** Likakaba banganda, ya sa bakaba behe si. Sa batsogho bilogho bi biluru mu mankuru ma be, ya sa bakomo bye ku oluru. Mu kuulu, sa bakateese be mu eteese ekye ki liikateese be bambaala.» **39** Yiisu afirita bo nkumu yi: «Enkpa-mihi ka ekughu osuo nganda enkpa-mihi nzili o. Kala pele, bo bansa buolo sa bayibwa muns dzunu. **40** Enduono ka eluru muluo a kye o, ya nkana si mumō ka luru mfumu a nde o. Lo, nswe munde wu baaluo bubwe, nde sa akala ti muluo a nde. **41** Mu ema we li mu okatala mana lisele li lili mu lihi li nganda, ŋaala we li a mubaa a muti mu lihi li weme? **42** Bwunu we bunu-a-bo we kughu oleyele nganda ti: “Ngee a me, nyaã me maha we lisele mu lihi”, ŋaala we mubaa a muti wu li mu lihi li weme omono

we? We li mbwuru wu a bifa byele. Matswama maha a ti mubaa a muti wu li mu lihi li we. Ŋa mbihi oŋo, we sa gyighili omono bubwe mu omaha lisele mu lihi li nganda.» **43** «Muti wu mubwe ka kughu oburu bimburi bi bibi o, ya muti wu mubi ka kughu oburu bimburi bi bibwe o. **44** Nswe muti okagyahaba mu bimburi bi nde. Ka bakughu oka finge mu munsene-ansene o, ya ka bakughu oka bimburi bi bviini mu mungaama o. **45** Mbwuru wu mubwe li a bitsimi bi bibwe mu mukolo a nde. Mbwuru wu mubi li a bitsimi bi bibi mu mukolo a nde. Mu engarjma, muŋma a mbwuru okapaha mi milwulu kunsu mukolo a nde.» **46** «Mu emakye be liikata me “Mfumu, Mfumu”, lo be liigwene okagyighili mandagha ma aakandyele me be? **47** Me sa nsuo be efaana ki mbwuru wu gyi kundaa me, gyughu mandagha ma me ya salala mo. **48** Nde li efaana kii baghala wu aatwu nzo. Nde tsiimi miwaghala mi mila ya twu bitsini bi bibagha bi nzo ŋa yulu a limeē. Mvulu bu anoō, ndwuru yigyi mu mwele ya madza mayisiŋi mu nzo oyo ya eturu kyehehe, lo yo obwa we, mu buulu bágyighili otwu yo. **49** Lo munde wu gyughu mandagha ma me ya kuono osalala mo, nde li efaana kii baghala wu aatwu nzo mu yulu a dzyele, ku ogwene a bitsini bi bibagha. Mvulu bu anoō, ndwuru yigyi mu mwele ya madza mayisiŋi mu nzo ya eturu kyehehe, mabwihi nzo ya mabiri yo nkwu-nkwughu.»

7 Yiisu bu amana oleyele mandagha mwohonono mamu kundaa baara ba bákagyughu nde, nde ágyene ku Kaperenawume. **2** Oko óli a mfumu a ekuru ki bambumbulu ba Rome nkama. Nde áli a musala wu ákadzyi nde ku olagha. Musala me ábyele ya ákadzwana ya lipfu. **3** Mfumu munde bu agyughu ti Yiisu aayato ŋa Kaperenawume, nde ágweghe ndaama a bakwuru ba ba-Dzwife bayilyele Yiisu ayabvwuhu nkana a nde. **4** Bo bágyene kundaa Yiisu ya bábuono nde ku olagha ti: «Wu aagweghe bihi li mbwuru wu mubwe ya we faana obaha nde, **5** Mu kuulu nde dzyi baara ba nsie a bihi-a-be, ya me nde aatwuhu bihi nzo a lisamana.» **6** Mu obo Yiisu ágyene ya bo. Nde ato ŋa bele a nzo a mfumu munde, mfumu a bambumbulu ágweghe ndaama a bandughu ba nde kundaa Yiisu mu oleyele nde bu: «Mfumu, nyaã omono oko mpara yi ogya ku nzo a me! Me ka nkughu mu ogyagha we munsu nzo a me o. **7** Me obo me aamono si ti me ka mfaana

oyabwana a we o. Lo tsughu yini a ndagha, ya musala a me sa adzughu. 8 Me ndi mu litumu li bamfumu ba me, ya meme si ndi a bambumbulu ba aakantumu me. Kala me ndyele mutsyini ti: “Gye!” Nde sa agye. Kala me ndyele wu muke ndiri: “Gyal!” Nde sa agya. Kala me ndyele musala a me ti: “Sa bu!” Nde sa asa obo.» 9 Yiisu ayughu obo, nde ákijimi. Nde ákaghala kundaa baara ba báyanama nde, ya ályele bo ti: «Mu enganma, me ndyele kundaa be, ngu okala mu Isarayele, me nkini amaamono mbwuru wu li a kana li linene lili bu o.» 10 Bandughu ba mfumu a bambumbulu bábvughuru kundaa nde ya bámono musala wu áali mubelele ádzughu. 11 Ŋa mbihi oŋo, Yiisu ágyene ku bvulu lili Nayine. Binduono bi nde ya mpwumu a baara yi nene bágyene ya nde. 12 Mu matala ma ákasomo nde kunsu bvulu, nde ámono ebyimi ki bákyidzyighi ku mampyeme: Mwana nga mumō wu a baghala mu mweē ngughu a nde, ya ngughu a nde áli mupfiili. Mpwumu a baara baba bvulu lilo báli ya mupfiili. 13 Mfumu bu amono mupfiili munde, nde ámono nyii yi alagha. Mu obo nde ályele kundaa nde ti: «Ka lili o!» 14 Bu asele, Yiisu ábyeme lwana ya baara ba bákabiri lo bátemene. Nde átsughu ndagha ti: «Munkuru-mbala, me bu ndyele we, temene!» 15 Mvwumu ásigihili, ábwi nsini ya ábaana obili. Yiisu ágwi nde kundaa maama a nde. 16 Baara bámono nzalamweē. Bo básyighi Nzaami ya bákyele ti: «Nzaami aagweghe bihi mubighili wu munene!» Ya báfiribwehe ti: «Nzaami aayamongoŋo kundaa baara ba nde!» 17 Mu obo nsia a Yiisu yísaŋama mu etsulu e nsie kii Yude kyehene, ya mu bitsulu bi nsie bi bili be-bele a Yude. 18 Binduono bi Dzā Mubogho bilyele nde mandagha mwohono mamo. Mu obo, nde áti binduono bi nde byele mbili 19 ya ágweghe bye kundaa Yiisu mu ofwulu nde ti: «We me mbwuru wu liikakyele, bwunu we mukimi liikyele?» 20 Bo bato kundaa Yiisu bályele nde bu: «Dzā gweghe bihi mu ofwulu we, “kala we me mbwuru wu liikakyele, bwunu we mukimi liikyele?”» 21 Mu matala maana mamo, Yiisu ádzuhu babyele balagha, ya ba báli a mpara yi a mawa-mawa. Nde ábyi mifulu mi mibi mi mli ya bo, ya ádzubulu mihi mi babo ba áli ókpi mihi. 22 Ŋa mbihi oŋo, nde ályele kundaa baara ba ógweghe Dzā ti: «Ligye lilyele kundaa Dzā myehene mi liimono ya mi liigyughu be» «Binkpa-mihi bili mu omono,

bikara bili mu odzyara, bangaa buala ayi tse-tse, Binkpa-matswi bili mu ogyughu, Ba bakpi bali mu osighili mu lipfu, ya bawele bali mu ogyughu Nsia yi Mbwe. 23 Esee kundaa munde wu aagwene obwihi kana li nde mu nkooro a me!» 24 Ŋa bihi a ŋa óbvughuru baara ba ógweghe Dzā, Yiisu ábaana obili mu nyuru a Dzā kundaa mpwumu a baara. Nde ályele bo ti: «Emakye be liiyitala ku syehe? Libanana li okanyihii efulu? 25 Bu lo be emakye liiyitala? Mbwuru wu aalaha binkuru bibi ntala? Lo, ba baakalaha binkuru bibi ntala ya ba bali kunsu busini okakala mu manzo ma mikogho. 26 Lo emakye be liiyitala? Mubighili? Heē, me ndi mu olyele be, nde bvulu mubighili». 27 Mu kuulu Dzā me munde Bisono biikalyele ti: «Me sa ntswahaba ntumu a me ku nkulu a we. Mu ogyighili we nzili.» 28 «Me ndyele be bu: Ŋa kara li baara bwohono ba báburu mu bakaha, ka oli ya mbwuru wu bvulu Dzā o. Lo munde wu bvulu nde busala mu Emfumu e Nzaami bvulu nde bukwuru. 29 Ya baara bwohono ba bagyughu nde, ya mintolo-mpagha, bo bábaghala ti Nzaami li wu a bunsumu, ya bákihi ti Dzā aboghoŋo bo. 30 Lo ba-Faridzyē ya Baluo-mikyene bu babihi mi okadzyi Nzaami osa mu bo, bábihi ti Dzā aboghoŋo bo.» 31 Yiisu áfirilyele ti: «Ya na me aambvughu baara baba eseene ki? Bo efaana kii na bali? 32 Bo bafaana ya bike-bike bi biibwi nsini ŋa ebini ki ookabvunŋu baara bwohono, ya bali mu okalyele mu yulu kundaa babake ti: “Bihi liifulu mamvulu-a-mvulu, lo be ka liikini o! Bihi liigyimi bikwumu bibi minyoō, lo be ka liilili o.”» 33 «Dzā Muboghoŋo aagyí, nde ka ákadza mampa ya ka ákaŋma mala o. Mu obo, be liilyele ti: “Nde li a mifulu wu mubi.” 34 Mwana a mbwuru aagyí. Nde li mu okadza ya okanma, ya be lili mu okalyele ti: “Mbwuru wu ki agyahaba nde yini a odza ya oŋma mala. Nde li mbaala a mintolo-mpagha ya banga-a-masumu.” 35 Lo bunsughu bu Nzaami buumongoŋo bubu bunsumu kundaa baana ba nde.» 36 Mu-Faridzyē mutsyini áti Yiisu mbili mu oyidza ya nde, ya Yiisu ágyene ku nzo a nde ya ábwi nsini mu odza. 37 Ŋa bula bubo óli a mukaha mutsyini nga-a-masumu. Ŋa ágyughu nde ti Yiisu ákadza mu nzo a Mu-Faridzyē munde, nde áli a mbwara yi alwulu mu mananaase. 38 Nde ágyene ŋa myili mi Yiisu, ábaana olili ya ábwoho myili mi Yiisu mu mansaŋa ma nde. Ŋa mbihi oŋo, nde

akakwono nye mu mfu a nde. Nde ákanyuburu myili mi Yíisu, ya ákagyogho nye mananaase. **39** Mu-Faridzyē wu áati Yíisu mbili amono obo, nde ábili kunsá mukolo a nde ti: «Kala ti mbwuru wu mubighili ali, mu engañma, nkini nde aagyahaba ti mukaha wu li mbwuru nga-a-masumu.» **40** Ŋa mbihi oŋo, Yíisu ályele kundaa mu-Faridzyē munde ti: «Simō, me ndi a ndagha yi aandyele we.» Simō ábvuhulu nde ti: «Bili o we Muluo!» **41** Yíisu átsugghu ndagha ndiri: «Baara buolo áli basomo nzi kundaa wu aakasohobo nzi. Mutsyini mipara nkama, ya wu muke mipara makwumu mataana.» **42** Buulu bo bansa buolo ka báleene ofiri ebyimi ekye o, nde ányaghala bo ebyimi kyehene. Mu we, ŋa kara li bo buolo, nande aabvulu dzyi nde?» **43** Simō ábvuhulu nde bu: «Mu bitsimi bibi me, munde wu ányaghala nde ebyimi ki eluru olagha.» Yíisu ályele nde ti: «We aabili ku bwe.» **44** Ŋa nseele, nde bu akaghala mihi kundaa mukaha munde, ályele kundaa Simō ti: «We aamono mukaha wu? Me aayansomo mu nzo a we ya we ka aagwi me madza ma oswagha myili o. Lo nde aabwoho me nye mu mansaŋa ma nde, ya aakwono nye mu mfu a nde. **45** We ka aanyuburu me o, lo, obaana bu aayansomo me mu, nde ka aakolo mu okanyuburu myili mi me o. **46** We ka aagyirili me maala ku yulu a mutswi o, lo nde aagyirili mananaase mu myili mi me. **47** Me mu obo, me ndi mu olyele we ti: Buulu nde aasuo dzyi li lilagha, mu olyele ti Nzaami aasi masumu ma nde ma malagha kolokolo. Lo munde wu baasi masumu ma nde ma masala kolokolo aakasuo si dzyi li lisala.» **48** Ŋa mbihi oŋo, Yíisu ályele kundaa mukaha munde ndiri: «Masumu ma we baasi mo kolokolo.» **49** Baara ba bákadza ya Yíisu bábwí okabili mu bomo ti: «Mbwuru wu nande ali mu osa masumu ma baara kolokolo?» **50** Lo Yíisu ályele mukaha munde ndiri: «Kana li we liibvwuhu we. Gye mu edzuunu.»

8 Ŋa mbihi oŋo, Yíisu ágyene mu mabvulu ya mala mu okabulutsala nsia yi a Emfumu e Nzaami ya okabululuo. Bantumú ba nde kwumu a buolo bákakala ya nde emō **2** ya ndaama a bakaha ba ádzuhu ya ba ábyi nde mifulu mi mibi mu bo. Óli Mari wu baakata ti musi Mangadala, wu óbyi Yíisu mifulu nsaama mi mibi, **3** Dzaane mukala a Syudza wu ali musala a Erode, Sudzane ya bakaha balagha bakimi. Bo

bwohono bákasalala bilogho bi bo mu obaha Yíisu ya binduono bi nde. **4** Mu obo mpwumu a baara yi nene yígyi kundaa Yíisu, ya nde áti bo nkumu yi: **5** «Etsugghu etsyini, mbwuru mutsyini ágyene ku manseghe mu oyinyahala mburu. Mu matala ma ákabulunyahala nde yo, ndaama yíbwí mu mukogho a nzili. Baara bádzyara yo ya baŋmini báli yo. **6** Ndaama yinke yíbwí mu nsie yi a mameē. Bu yilughubu, yo yíkee mu kuulu oŋo nsie ka yíli a madza o. **7** Ndaama yinke yíbwí mu nsie yi áli a mingaama. Mingaama bu mílughubu, míkulu emō ya mburu oyo, mísi mburu mpiŋi. Yo yíkwono okulu. **8** Ndaama yinke yíbwí mu nsie yi mbwe. Yo yíkulu, yíkulu, ya nswe liburu líburi mburu nkama.» Bu amana obili obo, Yíisu áfiribili mu mpini ti: «Nyaā wu li a matswi, agyughu!» **9** Ŋa mbihi oŋo, binduono bi Yíisu bífwulu nde ti nkumu oyo bunu-a-bo yidzyi olyele. **10** Nde ágwi bo mvuru yi: «Nzaami aasuo kundaa be mansweghe ma Empu e Nzaami. Lo kundaa baara babake, myehene okaluru mu mankumu, mu kuulu, “si bapana mihi, banyaā omono. Si bagyughu, banyaā obaghala.”» **11** «Nkumu oyo bu yidzyi olyele: mburu me Ndagha a Nzaami. **12** Baara ba báli mu mukogho a nzili, me baara ba baakagyughu Ndagha a Nzaami, ŋa mbihi dyabulu gyi yamaha yo mu mikolo mi bo mu kuulu banyaā osa kana, ya banyaā obvwughu. **13** Baara ba bali mu nsie yi a mameē yi obwi mburu, me babo baala bu bagyughu Ndagha a Nzaami, bakihi yo ya esee. Lo ka bali a midza o. Bo baakasa kana mu mana a matala. Ŋa ookagya bigyele, bo baakabwa. **14** Ndaama yi aakabwa ŋa kara li mingaama, me babo baala bu bagyughu Ndagha a Nzaami, bagyene ya banyaā minyoō ya bisee bi nsie bisi yo mpiŋi, ya bimburu bi yo ka biikakulu o. **15** Mburu yi aakabwa mu nsie yi mbwe, me baara babo baala bu bagyughu Ndagha a Nzaami, bakebe yo mu mukolo wu a bunsumu ya wu mubwe, ya baakakwara yo ya baakaburu bimburu ya mukama.» **16** «Ka oli ya mbwuru wu aakanahaba mwindi mu ofughu nde nkuru o, bwunu we mu otwulu nde ku nsini a mbugghu. Lo mu otwulu nde ŋa yulu a ebini ki baakatwulu nde, mu kuulu baara ba baasomo mu nzo bamono otsyeme. **17** Mandagha mwohono ma máswe me sa magyighili omorjono, ya mansweghe mwohono sa bagyighili ogyahaba mo ya opaha mo ku mbala. **18** Mu obo, lisa mayele mu ngyu-nyughu a be! Mu kuulu sa

babwehe elogho kundaa munde wu li a kye, lo kundaa munde wu aagwene a elogho o, sa bamaha ki aakatsimi nde ti li a kye.» **19** Ija mbihi oyo, ngughu ya bambwee ba Yiiisu báyatála nde, lo bo ka báleene oto ŋa áli nde o mu nkooro a mpwumu a baara. **20** Mbwuru mutsyini ályele nde ndiri: «Ngughu ya bambwee ba we bali ku mbala. Bo bali ya nzala a we.» **21** Lo Yiiisu ágwí bo mvuru yi: «Ngughu a me ya bambwee ba me, me babo ba baakagyughu Ndagha a Nzaami, ya ba baakasalala yo.» **22** Etsughu etsyini, Yiiisu ásono munsá bwara ya binduono bi nde, ya ályele bo ti: «Litswe lisaghába mu ngulu a mubu.» Mu obo, bo bágyene. **23** Bu bákadzughu bwara, Yiiisu ábwi tolo. Mu matala maana mamó, efulu kii mpini ébaana osa mu yulu a madza ma bana, ya bwara búbaana olwulu mu madza. Mu obo, lipfu lígyele bo. **24** Binduono bísiili Yiiisu ya bílyele nde ti: «Mfumú! Mfumú! Bihi-a-be lifi ekulu!» Yiiisu bu asighili, áfyee efulu ya mimpáŋa mi madza mu mpini. Efulu éfi ya edzuunu éyabvughuru. **25** Ija mbihi oyo nde áfwulu bo ndiri: «Kana li be kunu lili?» Enkwughu ésughuru bo ya bákiniimi. Bo bábili bo-a-bo ti: «Wu nsa mbwuru wu aakatumu efulu ya madza, ya bye biikagyughu nde?» **26** Yiiisu ya binduono bi nde bápala mu ngulu a bana ya básomo mu etsulu e nsie kii ba-Ngerasenyee, ki eli nkolo ya nkolo ya Ngaliile. **27** Ija ópala Yiiisu munsá bwara, baghala mutsyini wu áali musi bvulu áyabwana a nde. Baghala munde áli a mifulu mi mibi. Edzighi nde áli átsili binkuru. Nde ka áli a nzo o, lo kunsá mampyeme ákabulugyonomo. **28** Bu amono Yiiisu, nde ákehe mungili, ákunu mabuo ŋa nkulu a nde, ya ályele mu mpini yohono ti: «Nsa ndagha yili ŋa kara li me ya we Yiiisu Mwana a Nzaami Wu Ensoó-Yulu? Yoboo, ka mwehé me mpara o!» **29** Nde ábili obo mu kuulu Yiiisu ákalyele mufulu wu mubi ndiri: «We, mufulu wu mubi, pala mu baghala wu!» Nsa alagha mufulu ákasomo mu nde, ya bákakuru nde myaa mu bukolo ya bákátwulu nde myili munsá edzu, lo nde ákatsyiri bye. Mufulu wu mubi ákabulubiri nde kunsá syehe. **30** Yiiisu áfwulu nde ndiri: «Nkwumu a we na?» Nde ábvuhulu ndiri: «Mpwumu». Mu kuulu mifulu mi mibi milagha míisomo mu nde. **31** Mifulu mi mibi míbuono Yiiisu bu: «Ka tumu bihi ligye ku nsini a mbie yi a nda yi a laŋa-laŋa o.» (Abyssos g12) **32** Ija bele oyo óli a mukaá a

bangubulu wu munene wu áakabuludza ŋa yulu a munguo. Mifulu mi mibi míbuono Yiiisu agwa bo muswa wu oyisomo mu bangubulu. Nde ágwí bo muswa munde. **33** Mu obo, mifulu mípala mu baghala munde, míyisomo mu bangubulu. Bangubulu bwohonó bákumunu ku nsini a munguo, báybwa mu bana ya báfi ekulu. **34** Baara ba bákabulukebe bo bámono mi miluru. Mu obo bo bábara ya báyitsala nsia yi a ndagha oyo kunsá bvulu ya mu mala. **35** Baara báyatála mi míluru. Ija báyto bo ku óli Yiiisu, bámono baghala wu áali a mifulu mi mibi ábwi nsini ŋa myili mi Yiiisu. Nde álaŋa ku obwe ya embwuru éyabvughuru nde. Nzalamweé yfbagha bo. **36** Baara ba bámono mi miluru balyele bo bunu-a-bo baghala munde ábvuwughu. **37** Ija mbihi oyo baara bwohonó ba báli mu etsulu e nsie kii ba-Ngerasenyee bályele Yiiisu ndiri: «Mara mu nsie a bihi!» Bo bályele obo mu kuulu báli a nzalamweé yi alagha. Mu obo Yiiisu si ásono mu bwara ya ágyene. **38** Baghala wu áali a mifulu mi mibi áluomo Yiiisu muswa wu okala ya nde. Lo Yiiisu ábihi ya ályele nde ti: **39** «Bvughuru ku nzo a we, ya yilyele baara mandagha mwohonó ma oogyighili Nzaami mu we.» Nde ágyene ya átsala nsia munsá bvulu lwohonó yi a mi ósi Yiiisu mu nde. **40** Ija óyabvughuru Yiiisu mu ngulu a bana, mpwumu a baara yíbwana a nde mu kuulu bo bwohonó bákakebe nde. **41** Ija mbihi oyo, mu kwuru mutsyini wu a nzo a lisamana yi a ba-Dzwife áyto. Nkwumu a nde áli Dzayiruse. Nde ákunu mabuo mu nsie ŋa nkulu a Yiiisu ya ábuono nde agye ku nzo a nde. **42** Nde áli a mwana wu mukaha mumó wu a mvulu kwumu ya ywolo. Nde ákadzwana ya lipfu. Yiiisu bu ákagye, mpwumu a baara yínama nde ya yísi nde mpini. **43** Ija nsa mpwumu a baara oyo óli a mukaha mutsyini. Nde áli a ebye kii okapala makili ki ési mvulu kwumu ya ywolo. Nde ámana nzi a nde yohono kundaa bangaa-libughu, lo mbwuru si mumó ka ási ti nde amono bubwe o. **44** Bu agyi ku mbihi a Yiiisu, ábyeme mubele a enkuru e nde ya makili másaakajama. **45** Mu obo Yiiisu áfwulu ndiri: «Nande byeme me?» Baara bwohonó bátunu ya Piere ályele ti: «Mfumú, we li mu omono ti mpwumu a baara yiidzyi we ya yili mu osa we mpiji.» **46** Lo Yiiisu ályele bu: «Mbwuru aabyeme me, mu kuulu me mono ti mpini yiipala mu nyuru a me.» **47** Ija ómono mukaha munde ti Yiiisu agyhaba ndagha oyo, nde áyabwa ŋa

myili mi Yiiisu ya enkwughu kyehene. Ŋa mbihi oŋo, nde áleyele ŋa mihi mi baara bwohono mu emakye nde aabyeme enkuru e Yiiisu, ya bu aadzughu nde mu matala maana mamu. **48** Yiiisu áleyele kundaa nde ndiri: «Ma mwana, kana li we liibvwuhu we. Gye mu edzuunu!» **49** Ŋaala Yiiisu nkini mu okabili, mbwuru mutsyini wu áafi ku nzo a Dzayiruse, mfumu a nzo a lisamana a ba-Dzwife áleyele nde ti: «Mwana a we aakpi. Muluo ka li a ki aafiriya oko o.» **50** Lo Yiiisu bu agyughu obo, áleyele Dzayiruse ndiri: «Ka kala a nzalamweē o, sa yini a kana, nde sa adzughu.» **51** Yiiisu bu áyato ŋa nzo a Dzayiruse, nde ka ágwi baara muswa wu osomo ya nde o. Yini a Piere, Dzake, Dzā, taara ya maama a mwana báasomo ya nde. **52** Baara bwohono bákálili ya bákanyoō mu nkooro a lipfu li mwana. Mu obo Yiiisu áleyele ndiri: «Ka lili o! Nde ka aakpi o, lo nde ogyoŋomo aagyŋomo.» **53** Bo bákasebe nde mu kuulu bo bágyahaba ti mwana aakpi. **54** Lo, Yiiisu bu akwara mwana mu kwogho, áleyele kundaa nde mu mpini ndiri: «Mwana, temene!» **55** Mu matala maana mamu, ewumu e mwana éyabvughuru, ya maswa-maswa nde átemene. Yiiisu áleyele bo bagwa nde bi-odza. **56** Taara ya maama a mwana bákijimi ku olagha. Lo Yiiisu átswi bo mukele banyaā oleye mbwuru ndagha oyo.

9 Yiiisu áti bantumumu ba nde kwumu ya buolo mbili ya ágwi bo emfumu ya mpaana yi obyimi fulu mi mibi ya odzuhu babyele. **2** Ŋa nseele, nde ágweghe bo bayitsala nsia yi a Emfumu e Nzaami, ya badzuhu babyele. **3** Nde áleyele kundaa bo ti: «Ka libiri elogho si emō mu nzili o, ngu okala mukaana, empogholo, bi-odza, nzi, bwunu we enkuru kii byele. **4** Mu nswe nzo yi bagyagha be, likala omo tee matala ma liimara be oŋo. **5** Kala ti baara babihi be ogyagha, lipala mu bvulu lilo, ya likubulu lifufunu mu myili mi be mpaala okala bumpughulu mu bo.» **6** Bantumumu bágyene, bátsala nsia yi a Emfumu e Nzaami mu bula nswe bula, ya bádzuhi babyele mu bibini byehene. **7** Erode, mfumu a etsulu e nsie kii Ngali, ágyughu myehene mi mikaluru, nde ka ábagha yi obili o, mu kuulu bana bákalyele ti: «Munde ngu Dzā Mubogho aasighili mu lipfu.» **8** Babake bákalyele ti: «Munde ngu Eli aayabvughuru. Ya babake si ti: «Mumō ŋa kara li mibighili mi mikulu aasighili mu lipfu.» **9** Lo Erode áleyele ndiri:

«Me aantumu bakehe Dzā bolo. Lo mbwuru wu li mu okabulusa mandagha ma ndi mu ogyughu me nande?» Mu obo nde ákasagha omono Yiiisu. **10** Bantumumu kwumu ya buolo bu bayabvughuru, báleyele Yiiisu myehene mi bási bo. Yiiisu ábiri bo ku ebini ki egwene a baara, mu nkolo yi a bvulu lili Betesayida. **11** Baara balagha bagyughu ti Yiiisu ákagye ku bvulu lilo, bo bánama nde. Nde ágyagha bo, áluo bo mu mi mitala Empu e Nzaami, ya ádzuhu babyele. **12** Bwihi bu bugyili, bantumumu ba Yiiisu kwumu ya buolo bágyi kundaa nde ya báleyele ti: «Lyele baara bagye ku mala ma masala ya ma manene ma mali bitaa-taa bi mu kuulu bayisagha bi-odza ya ebini ki ogyoŋomo. Bihi-a-be ŋa kara-a-kara a syeheli lili.» **13** Lo Yiiisu áleyele bo bu: «Ligwa bo bi-odza beme.» Lo bo bábvuhulu nde bu: «Bihi bi lili a bye yini a mampa mataana ya banswi buolo. We budzyi ti bihi ligye liswumu bilogho bi okughu odza mpwumu a baara yi?» **14** Mutala a babaghala ba báli oŋo áli ku bele a mapfwunu mataana. Yiiisu áleyele kundaa binduono bi nde ndiri: «Libwihi baara nsini mu makaba mama baara makwumu mataana.» **15** Binduono bi nde bísi obo, ya bíleyele baara bwohono babwa nsini. **16** Ŋa mbihi oŋo, Yiiisu ágwolo mampa mataana ya banswi buolo, átalaku yulu, ábvurulu matuono kundaa Nzaami, ákehe mampa ya banswi, ágwi kundaa binduono bi nde mu kuulu bakaba bye kundaa baara. **17** Baara bwohono báli ya bágyughuru. Binduono bítolu bitsulu bi mampa ya ndaama a banswi bi bísyili, ya bálulu bitubu kwumu a byele. **18** Etsughu etsyini Yiiisu ákasamana ŋa ebini kiili baara we, ya binduono bi nde bíli ya nde. Nde áfwulu bo ti: «Mu mbiili a baara, me nande ndi?» **19** Bye bíbvuhulu nde bu: «Bitsimi bi baara bana ti we li Dzā Mubogho, babake ti we li Eli, babake si ti we li mumō ŋa kara li mibighili mi mikulu wu aasighili mu lipfu.» **20** Yiiisu áleyele kundaa bo ti: «Lo, mu be, me nande ndi?» Piere ábvuhulu ti: «We li Kriste a Nzaami.» **21** Yiiisu átswi bo mukele banyaā oleye mbwuru ndagha oyo. **22** Yiiisu áfirileye kundaa binduono bi nde ti: «Mwana a mbwuru faana omono mpara yi alagha. Bakwuru, bakwuru ba bangaa ba Nzaami ya Baluo-mikyene sa babihi nde. Sa badzwa nde, ya bitsughu bitere biluru, nde sa asighili mu lipfu.» **23** Ŋa mbihi oŋo, Yiiisu áleyele kundaa baara bwohono ti: «Kala ti mbwuru dzyi onama me, nde faana otunu nyuru a ndeme. Lo

nde faana obiri kuruwa li nde nswe etsughu ya onama me. **24** Mu kuulu wu dzyi obvwuhu laama li nde, sa apfihili lo. Lo munde wu aapfihili lo mu nkooro a me, sa abvwuhu lo. **25** Nsandaana mbwuru aabagha kala ti bagha bupfulu bu nsie nsyini, lo pfihili laama li nde? **26** Nswe munde wu akala aamono budzwa mu me ya mu mandagha ma me, Mwana a mbwuru sa amono nde budzwa ŋa ayabvughuru nde kunsu nsia a nde, nsia a Taara a nde, ya yi a bangye-yulu. **27** Mu enganjma, me ndyele be, ndaama a baara mu ba bali ŋa ka bakpa o, nsomo-a-nsomo bamono Emfumu e Nzaami.» **28** Bitsughu mpuomo bu biluru ŋa mbihi a ŋa ályele nde mandagha mamo, Yiiisu ágwole Piere, Dzã ya Dzake, ya ákumu ku yulu a munguo mu oyisamana. **29** Mu matala maala nde mu okasamana, busu bu nde búkighiri ya biko bi nde bígyighili opeŋeme kuu oluru. **30** Mu matala maana mamo, babaghala buolo, Moyidze ya Eli, bákabili ya Yiiisu. **31** Bo báypala kunsu nsia ya bámono ya Yiiisu mu mi mitala bunu-a-bo nde ali afaana omana esala e nde mu oyikpa ku Yerusaleme. **32** Piere ya bantum buolo babake bábwi mukaba a tolo, lo bu babulusighili, bámono nsia a Yiiisu ya babaghala buolo ba báli ya nde. **33** Mu matala ma óbaana Moyidze ya Eli ogye, Piere ályele Yiiisu ndiri: «Muluo, bubwe buulu bihi lili ŋa. Bihi bibvulu bitere liitwu: Etsyini kii we, etsyini kii Moyidze ya etsyini kii Eli.» Piere ka ákasoolo mi ákabili nde o. **34** Ŋaala nde nkini mu okabili obo, edzi égyi ya edzyimi-a-dzyimi ekye éfughu bo. Nzalamweé yíbagha bantum ŋa básomo bo kunsu edzi. **35** Ŋa mbihi oŋo, likyi lífi kunsu edzi lídzumu ti: «Wu me mwana a me, wu aansuolo me, ligyughu nde.» **36** Bu bamana ogyughu ndagha oyo, bantum bámono yini a Yiiisu ngasighi. Bo ka bátsughu ndagha o mu myehene mimye, ya mu matala mamo, bo ka bályele mbwuru mi bámono bo o. **37** Etsughu etsyini bu eluru, Yiiisu ya binduono bi nde bitere bákumunu ku nsie a munguo, ya mpwumu a baara yi nene yíabwana a Yiiisu. **38** Ŋa kara li mpwumu a baara, baghala mutsyini ákehe engubu ndiri: «Muluo, yoboo, mono mwana a me nyii! Yini a mumō wu me ndi a nde. **39** Nswe matala, mufulu wu mubi aakasomo mu nde. Mu obo, mu matala maana mamo, mwana agwolo baana okehe mingili. Nde bwi elogho, ya fulu lipala mu muŋma. Mufulu munde li mu osuo nde kimini ya ka dzyi onyaa nde o. **40**

Me aambuono binduono bi we bibyi mufulu munde, lo bye ka biileene o.» **41** Yiiisu ágwi mvuru yi: «Ekaana ki egwene a kana, ya ki egwunumu! Tee nki matala me aankala ya be? Ya tee nki matala me aankuru mukolo mu be?» Mu obo Yiiisu ályele baghala munde ndiri: «Yabiri mwana a we ŋa!» **42** Mu matala ma ókayabehene mwana kundaa Yiiisu, mufulu wu mubi ábwihili nde mu nsie ya ányihili nde mu mpini yohono. Lo Yiiisu áfulu mufulu wu mubi epama, ádzuhu mwana ya ábvurulu nde kundaa taara a nde. **43** Baara bwohono bákiniimi mu omono mpaana a Nzaami. Ŋaala baara nkini mu okakiniimi mu mandagha ma ókasa Yiiisu, nde ályele kundaa binduono bi nde ndiri: **44** «Be, ligyighili otyeghe matswi mu mandagha ma: Bafaana otyeghe Mwana a mbwuru ŋa myaa mi baara.» **45** Lo binduono bi nde ka bábaghala ndagha oyo o. Nzaami átwulu bo kunsu nzi-nzimini mu kuulu banyaá ogyahaba mambaala ma ndagha oyo, ya bye bíbara nzalamweé mu ofwulu Yiiisu. **46** Binduono bísoho bo-a-bo mu ogyahaba nande luru bunene ŋa kara li bo. **47** Lo Yiiisu bu agyahaba bitsimi bi bo, ágwole muke-muke, átwulu nde ŋa bele a nde **48** ya ályele bo ndiri: «Nswe mbwuru wu gyagha muke-muke wu, mu nkwwu a me, meme nde agyagha. Ya nswe mbwuru wu gyagha me, wu aagweghe mehe si nde agyagha. Mu kuulu munde wu luru busala ŋa kara li be bwohono, me munde bvulu bunene.» **49** Ŋa mbihi oŋo, Dzã ályele Yiiisu ndiri: «Muluo, bihi liimono baghala mutsyini wu li mu okabyi mifulu mi mibi mu nkwwu a we. Bihi liisagha okahaba nde mu kuulu nde ka li mu okanama we ya bihi o.» **50** Lo Yiiisu ályele nde ndiri: «Ka likahaba nde o, mu kuulu munde wu gwene bele be, ya be ali.» **51** Yiiisu ámono ti matala maa osihi nsie mu ogye ku yulu maabehene. Nde ágwole munkana wu ogye ku Yerusaleme. **52** Nde átwahaba baara ba bágyene ku bula butsyini baba etsulu e nsie kii Samari mu ogyighili nde ebini kii ogyonomo. **53** Lo baara ba bula bubo bábihi ogyagha nde, mu kuulu bagyahaba ti nde ku Yerusaleme ákagye. **54** Bu bágyughu obo, binduono bi nde byele, Dzake ya Dzã bályele ti: «Mfumu, we dzyi ti bihi liluomo mbaa yi mayulu yisughuru yiyadzwa bo?» **55** Yiiisu ákaghala kundaa bo ya áfyee bo. **56** Mu obo, Yiiisu ágyene ku bula bukimi ya binduono bi nde. **57** Ŋa báli bo mu nzili, baghala mutsyini ályele Yiiisu ti: «Me sa nama we ku

nswe ebini ki aagye we.» 58 Yīisu ályele nde ndiri: «Mibagha mili a miñma, ya bajmini bali a manzo, lo Mwana a mbwuru ka li a ebini kii ogwumu bwunu we kii ogyoñomo o.» 59 Nde ályele kundaa baghala mukimi ti: «Nama mel!» Lo baghala munde ábvuhulu nde ti: «Mfumu, nyaã me manswana oyidzyighi taara a me.» 60 Yīisu ágwi nde mvuru yi: «Nyaã ba bákpi badzyighi bo-a-bo. Lo we gye yitsala Nsia yi a Emfumu e Nzaami.» 61 Baghala wu muke ályele ndiri: «Mfumu, me sa nama we, lo nsomo-a-nsomo nyaã me ngye yingwa basi dzumu li me mboro yi masini.» 62 Yīisu ábvuhulu nde ti: «Mbwuru wu kwara teme mu obaana osala nseghe, ya tala ku mbihi ka li a esala o mu mi mitala Emfumu e Nzaami.»

10 Ña mbihi oño, Mfumu ásuolo babaghala makwumu-nsaama ya buolo bakimi ya ágweghe buolo-buolo mu nswe bvulu ya nswe ebini ki ágwa nde ogye. 2 Nde ályele bo ndiri: «Esala kii otolo bimburu mu manseghe elagha, lo baara ba baasala basala. Liluomo kundaa Mfumu a nseghe agweghe basala bakimi mu otolo bimburu. 3 Ligye! Me ndi mu ogweghe be ti anga baana ba bindoomo ña kara li bango. 4 Ka libiri nzi, empogholo, bwunu we bikogholo o. Ka liluhu matala mu nzili mu okabulugwa baara mamboro o. 5 Nswe nzo yi liisomo be, nsomo lilyele ndiri: “Nyaã edzuunu ekala mu nzo yi!” 6 Kala mbwuru wu edzuunu li omo, edzuunu e be sa ekala ya nde. Kala pele, kye sa ebvughuru kundaa beme. 7 Mu obo, likala mu nzo oyo, lidza ya lijma nswe elogho ki baagwa be, mu kuulu musala faana obagha mufuru mu esala e nde. Ka lipala mu nzo oyo mu oyigyoñomo mu nzo nswe nzo o. 8 Kala ti be lisomo mu bvulu litsyini ya baara bagyagha be, lidza bi baagwa be. 9 Lidzuhu babyele ba bali mu bvulu lilo, ya lilyele baara ndiri: “Emfumu e Nzaami eeyabehene ya be.” 10 Lo, kala be lisomo mu bvulu litsyini ya baara babihi ogyagha be, ligye mu minsagha ya lilyele ti: 11 “Bihi likubulu si lifufunu li bvulu li be li liinabara mu myili mi bihi. Lo ligyahaba yo ti Emfumu e Nzaami ali eeyabehene ya be.” 12 Me ndi mu olyele be engañma, mu etsughu ki oosa Nzaami muyala a basi nsie, masyeme ma basi Sodome sa maluru osala ya mama bvulu lilo.» 13 «Nyĩ mu be, baara ba bvulu lili Koradzine, ya behe si baba bvulu lili Betesayida! Kala ti bimamaã bi oosi Nzaami

mu mabvulu ma be, ku mama Tire ya Sidō nde ási bye, baara baa oko nkini edzighi ekye ali bakaagyiñi mayele, bakaalaha mangooro, ya bakaagyoñho lifuru a mbaa mu nyuru mu osuo ti bo baagyiñi mayele. 14 Mu obo, mu etsughu ki oosa Nzaami muyala a basi nsie, masyeme ma oobagha Tire ya Sidō sa maluru osala ya ma liibagha be. 15 Behe si, baara baba bvulu lili Kaperenawume! Be bu liikatsimi ti Nzaami sa akuhubu be tee ku mayulu? Pele, be sa libwa ku nsini a ebini ki oli mu okakebe ba bákpi masyeme.» (Hadēs 986) 16 Yīisu áfirilyele binduono bi nde ti: «Nswe mbwuru wu gyughu be, me agyughu. Nswe wu bihi be, me abihi, ya nswe mbwuru wu bihi me, mbwuru wu aagweghe me abihi.» 17 Binduono makwumu-nsaama ya byele bíyabvughuru ya esee kyehehe ya bílyele ti: «Mfumu, si okala mifulu mi mibi miikagyughu bihi, ña liikatumu bihi mye mipala mu baara mu nkumu a we!» 18 Yīisu ágwi bo mvuru yi: «Me áli aankamono ña ófi Satana ku yulu ya ábwi ti bu ookabwa ngayulu. 19 Ligyughu! Me aangwi be mpaana yi odzyara mu yulu a bantaala ya bangie, ya mu odzyara lileene lwohono li mutaara, ya ka oli a elogho ki ekughu osa be bubi o. 20 Lo ka lijene mu kuulu mifulu mi mibi mili mu okagyughu be o. Likala a esee mu kuulu mankwumu ma be baasono mo mu mayulu.» 21 Mu matala mamō, Mufulu a Ngili áluhu Yīisu mu esee ki elagha, mu obo Yīisu ályele ti: «Taara, Mfumu a yulu ya nsie! Me mvurulu we matuono, mu kuulu we aasweghe mandagha ma kundaa banga-a-munzeele ya banga-a-mayele, lo we aasuo mo kundaa bike-bike. Mu engañma, Taara, weme aadzyi ti okala obo. 22 Taara a me, we aatwulu bilogho byehene ña myaã mi me. Ka oli a mbwuru wu gyahaba Mwana nande ali o, kala ka oli yini a Taara o, ya ka oli a mbwuru wu gyahaba Taara nande ali o, kala ka oli Mwana. Mwana dzyi osuo bo Taara mu kuulu boho si basoolo nde.» 23 Ña nseele, Yīisu ákaghala kundaa binduono bi nde ya ályele yini a kundaa bo ti: «Esee mu be ba lili mu okamono mandagha ma! 24 Mu engañma, me ndi mu olyele be, mimono ya mikogho milagha miikadzyi omono mi lili mu okamono be, lo ka miimono mye o. Boho si báli a nzala ogyughu mi lili mu okagyughu be, lo ka baagyughu mye o.» 25 Muluo-mikyene mutsyini ágyi kundaa Yīisu mu osagha obwihi nde, nde átsughu ndagha ti: «Muluo! Emakye

me mfaana osa mu obagha laama lii mibvu ya mibvu?» (aïónios g166) 26 Yïisu ágwí nde mvuru yi: «Bunu-abo básono mu mikyene mi Nzaami? We bunu-a-bo li mu obaghala mye?» 27 Baghala munde ábvuhulu bu: «Dzyi Mfumu Nzaami a we mu mukolo a we wohono, mu muwumu a we wohono, mu mpini a we yohono ya mu bitsimi bi we byehene. Ya Dzyi nganda-mbwuru ti budzyi we nyuru a weme.» 28 Mu obo, Yïisu ályele nde ti: «We aagwi mvuru yi mbwe. Sa obo, ya we sa bagha laama.» 29 Lo baghala munde bu ádzyi osuo ti efwulu e nde éli mu nzili, nde áfwulu Yïisu ndiri: «Nande li nganda-mbwuru a me?» 30 Yïisu ábvuhulu bu: «Etsughu etsyini baghala mutsyini ámara Yerusalemé ya ákakumunu ku Dzeriko. Mu nzili, bantwumu bábwirili nde, bátwulu nde mpene, bágwyini a nde mpaana, átaghaba ngaama ya bo bábulusihi nde. 31 Ngaa a nzaami mutsyini áluru mu nzili oyo. Bu amono baghala munde, nde ábululuru o nde mu mukogho a nzili wu muke. 32 Ija mbihi oyo, mu-Lebuite áyato oyo. Bu amono baghala munde, nde he si áluru mu mukogho a nzili wu muke. 33 Lo musi Samari mutsyini áluru si mu nzili oyo. Bu amono baghala munde, nyí yíbagha nde. 34 Mu obo, nde ásele ña bele a nde, ási nde maala ya bviini mu mambaala ya ákuru mo. Ña mbihi oyo, nde ákuhubu nde ña yulu a syevale a nde, ábiri nde ku nzo a banzyi, ya ábughu nde. 35 Bwihi bu buki, nde ágwolo badenye buolo, ágwí kundaa musala a nzo a banzyi, ya ályele nde ti: “Gyighili oyabughu nde, ya ña ayamvughuru me, me sa mvurulu we nzi yi aagyehe we mu nde ña yulu.”» 36 Yïisu áfirilyele nde ndiri: «Ña kara li baara batere babo, nande li nganda-mbwuru a baghala munde wu ogwyini a bantwumu mpaana?» 37 Muluo-mikyene ábvuhulu ti: «Me mbwuru munde wu aamono nde nyíi». Mu obo Yïisu ályele ti: «Gye, ya wehe si sa bumō». 38 Mu matala maala Yïisu áli mu nzili ya binduono bi nde, nde ásono mu bula butsyini, mukaha mutsyini wu a nkwumu Marete agyagha nde mu nzo a nde. 39 Nde áli a mbwee wu mukaha, nkwumu a nde Mari. Nde áyibwa nsini ña myili mi Mfumu ya ákagyughu maluo ma nde. 40 Bisala bi nzo áli bígwolo Marete nyuru. Mu obo nde ásele ña ndaa Yïisu ya ályele nde ti: «Mfumu, we ka li mu otsimi ti mbwee a me bubi aasi mu onyaa me ngasighi ya esala kyehehe ki o? Lyele nde ayabaha me.» 41 Mfumu ábvuhulu

nde bu: «Marete, Marete, we li mu onyoŋ ya omono mukolo mpara mu mandagha malagha. 42 Lo yini a elogho etsyini eli a mupfunu. Mari aasuolo kaba li libwe, ya ka oli ya mbwuru wu aagwohono nde lo o.»

11 Etsughu etsyini, Yïisu ákasamana ña ebini etsyini. Bu amana, mumō ña kara li binduono bi nde ályele nde ti: «Mfumu, luo bihi bu lifaana osamana, ti bu óluo Dzā binduono bi nde». 2 Yïisu ályele bo ndiri: «Ña liikasamana be, liikalyele bu: “Taara, nyaā nkwumu a we yikala yi a ngili, nyaā Emfumu e we egya! 3 Gwa bihi bi-odza bibi faana mu nswé etsughu. 4 Sa masumu ma bihi kolokolo, mu kuulu bihi si liikasa babo ba baakasa bihi bubi kolokolo. Ya ka atala bihi libwa mu bigyele o.”» 5 Yïisu áfirilyele bo ndiri: «Kala mumō ña kara li be gyene yitala ndughu a nde kara-a-kara a mpyibi mu olyele nde ti: “Ndughu a me, sohobo me mampa matere. 6 Mu kuulu me mumō mu bandughu ba me wu li mu dzwe maayato ku nzo a me, ya me ka ndi a elogho ki aangwa nde o.” 7 Kala ti ndughu a we wu li muna nzo bvuhulu: “Nyaā me pii, me nzo aankuru ofi, ya me ya baana ba me liigyongomo. Me ka nkughu ofirisighili mu ogwa we mampa o.” 8 Me ndi mu olyele be yo: “Si kala ti nde ka sighili o ya ogwa we mampa mu kuulu we li ndughu a nde, nde sa asighili ya sa agwa we byehene bi li a we nzala bye, mu kuulu we ka aabara budzwa o mu oluomo ya we aasi epini.” 9 Mu obo, me ndyele be ti: “Liluomo, ya sa bagwa be, lisagha, ya sa libagha, likoboro, ya sa badzubulu be. 10 Mu engarjma, munde wu luomo sa bagwa nde, munde wu sagha, sa abagha, ya sa badzubulu kundaa munde wu aakoboro. 11 Nki Taara wu kughu ogwa mwana a nde ntaala kala ti mwana luomo nde nswi? 12 Bwunu we ngie, kala ti mwana luomo nde bi? 13 Kala ti be baara ba babi lisoolo ogwa bilogho bi bibwe kundaa baana ba be, lo Taara a be wu li ku mayulu, bunu akughu ogwene ogwa Mufulu a Ngili kundaa babo ba baaluomo nde nde?”» 14 Etsughu etsyini, Yïisu ábyi mufulu wu mubi wu áasi ti mbwuru akala nkini. Mufulu munde bu apala, baghala munde ábaana obili ya mpwumu a baara yíkiyimi ku olagha. 15 Lo baara bana bályele ti: «Me mu nkwumu a Beledzebule, mukwuru a mifulu mi mibi nde ali mu okabyi mifulu mimye.» 16 Ya babake, bu bádzzyi ogyeele Yïisu, báluomo

nde asa elyimi ki eefa ku yulu. **17** Lo Yiiu bu ágyahaba bitsimi bi bo, ályele ndiri: «Nswé nsie yiili baara bali kunsá etaara ka yilaama o, ya manzo ma yo sa maakabwa mana ŋa yulu a mamake. **18** Mu obo, kala Satana li mu osa ti baara ba nde badzwana bo-a-bo, bunu-a-bo emfumu e nde eelaama? Be lili mu okalyele ti me Beledzebule li mu okagwa me mpaana yi obyí mifulu mi mibi. **19** Kala ti Beledzebule li mu okagwa me lileene lii obyí mifulu mi mibi, lo baana ba be nande aakagwa me lileene lii okabyi mye? Mu obo, bo bomó sa balyele ti be ligyahaba ndagha. **20** Lo, kala mu lileene li Nzaami me ndi mu okabyi mifulu mi mibi, oli mu osuo ti Emfumu e Nzaami ayi emaayato kundaa be.» **21** «Ŋa ookakebe baghala ŋa a mpini wu li a bidzwana bi bikughu nzo a nde, bilogho bi nde byehene biikakala kunsá ekagha. **22** Lo, kala mbwuru wu luru nde mpini yadzwana ekyini ya nde, mbwuru munde sa agwohono bidzwana bi nde byehene bi aakasa nde kana, ya sa akaba bilogho bi nde byehene.» **23** «Nswé munde wuulu ka li emó ya me o, li mutaara a me, ya nswe munde wu aagwene okavughu ya me, nde aakatsala.» **24** «Ŋa ookapala mifulu wu mubi mu nyuru a mbwuru, nde aakayisagha ebini kii ogwumu ku syehe. Kala ti ka bagha kye o, nde sa atsimi bu: “Nyaá me mbvughuru ku nzo ku aamfi me.” **25** Mu obo nde sa abvughuru ya sa ayabagha nzo bakuomo ya yifaana. **26** Ŋa mbihi ojo, nde sa apala ayigwolo mifulu mi mibi mikimi nsaama mi miluru nde bubi. Mye sa miyasomo ya sa mikala omo. Mu obo, mbwuru sa amono mpara yiluru oyo yi áli a nde nsomo.» **27** Yiiu bu amana obili obo, mukaha mutsyini wu áli kunsá mpwumu a baara átsughu ndagha ti: «Esee kundaa mukaha wu aaburu ya aarŋmihi we mabyene!» **28** Lo Yiiu ágwi mvuru yi: «Lo esee kundaa baara ba bali mu okagyughu Ndagha a Nzaami ya ba bali mu okasalala yo.» **29** Ŋa ósi mpwumu a baara Yiiu ŋa kara, nde ályele bo ndiri: «Baara baba eseene kii lolo ki bali babi! Bo bali mu oluomo elyimi. Lo ka bamono elyimi o, kala ti ka yini a kii Dzonase o. **30** Mu kuulu, bwunu a bu óli Dzonase elyimi mu basi Ninibve, Mwana a mbwuru si sa akala elyimi mu baara baba eseene ki. **31** Mu etsughu ki osa Nzaami mumfwunu a basi nsie, Ngasa a nsie yi a Sude sa atemene ŋa nkulu a baara baba eseene ki, ya sa agwa bo masyeme, mu kuulu nde aamara bula bu nde ba buli la mu oyagyughu maluo mama bunsughu ma ookaluo Salomó. Lo ŋa oli ya mbwuru wu bvulu Salomó. **32** Mu etsughu kii mumfwunu a basi nsie, basi Ninibve sa batemene ŋa nkulu a baara baba eseene ki, ya sa bagwa bo masyeme mu kuulu bo baagyinji mayele ŋa baagyughu bo mukwughu wu ooti Dzonase. Lo, ŋa oli ya mbwuru wu bvulu Dzonase.» **33** «Ka oli ya mbwuru wu aakanahaba mwindi mu osweghe nde bwunu we mu ofughu nde nkuru o, lo ŋa yulu ebini ki baakatwulu kunsá otsyeme. **34** Lihi li we lili ti mwindi a nyuru a we. Kala nta-ntala a we li yi mbwe, nyuru a we yohono sa yikala kunsá otsyeme. Lo, kala nta-ntala a we li yi mbi, nyuru a we yohono sa yikala kunsá mpyibi. **35** Mu obo, we faana osa mayele mu kuulu otsyeme ku oli mu we onyaá okala mpyibi. **36** Kala nyuru a we yohono yili kunsá otsyeme, ku ogwene a esighi si etsyini kunsá mpyibi, yo yohono sa yikala kunsá otsyeme ti ŋa ookatsehebe we mwindi.» **37** Yiiu bu amana obili, mu-Faridzyé mutsyini ályele nde ayidza ku nzo a nde. Mu obo Yiiu ásomó mu nzo ya ábwi nsini mu odza. **38** Mu-Faridzyé munde ákinjimi mu omonó ti Yiiu ka áswagha myaá o, nsomó-a-nsomó abaana odza ti bu óli ekulu ki ba-Dzwife. **39** Mu obo, Mfumu ályele nde ti: «Be ba-Faridzyé, be lili a epfu ki okatsehebe bibaha ya mandonjô ma be ku mbihi, lo mu kara be lili a nzala a pfyibi ya mandagha mama nkehe. **40** Be mayele we! Nzaami wu aagyighili bilogho bi biikamonoŋo, me nde si aagyighili mukolo a mbwuru. **41** Mu obo ligwa baweile bilogho bi bili mu bibaha ya mandonjô ma be, ya bilogho bi be byehene sa bikala bibi tse-tse.» **42** «Lo nyii mu be ba-Faridzyé! Be liikagwa Nzaami kaba lili kwumu lili bilogho bi liikakunu be, ti bu oli mampihi-a-mpihi ya miswoho mimi bifa-bifa. Lo be liikadzinimi bunsumu ya dzyi li Nzaami. Mamo mandagha ma lifaana okasa be, ya ogwene odzinimi bibike nsimi.» **43** «Nyii mu be ba-Faridzyé! Be liikadzyi okabwa nsini mu biphe bibi ku nkulu mu manzo ma lisamana, ya be liikadzyi ti baara bakagwa be mamboro mama budziri mu bibini bi ookavugunu baara. **44** Nyii mu be! Be lili efaana kii mampyeme ma magwene a elyimi, maala baara bali mu okadzyara mo ku ogwene a ogyahaba.» **45** Mumó ŋa kara li baluo-mikyene ályele nde ndiri: «Muluo, ŋa bili we obo, we aatughu bihi si!» **46** Yiiu ábvuhulu nde ti:

«Nyii si mu be baluo-mikyene! Be liikagwa baara matsulu mama leme mu obiri, lo be ka liikabaha bo si eke o. 47 Nyii mu be! Mu kuulu be liikatwu mampyeme ma mibighili, lo bankagha ba be báadzwi mye. 48 Mu obo, be lili mu okasuo bumpughulu ti be liikakihi bigyighili bi ósi bankagha ba be, mu kuulu bo bádzwi mibighili, ya be liikatwu bo mampyeme. 49 Lo Nzaami mu mayele ma nde mwohono ályele bu: “Me sa ngweghe mibighili ya bantum. Bo sa badzwa bana ya sa bamwehē babake kimini.” 50 Mpaala baara baba eseene ki babagha masyeme mu nkooro a makili ma mibighili myehene mi bádzwi obaana ebaana e nsie, 51 obaana lipfu li Abele tee mu lili Dzakari wu bádzwi ŋa kara li ebini ki baakatsughu Nzaami bikaba ya nzo a Nzaami yi nene. Me ndi mu olyele be, baara baba eseene ki sa babagha masyeme mu nkooro a makili ma bo.» 52 «Nyii mu be baluo-mikyene, mu kuulu be liimaha bvungulu li nzo yi aakagwa baara ligyahaba, be beme ka liisomo omo o, ya lili mu okakahaba babo ba badzyi osomo omo.» 53 Mu matala ma ómara Yiiu ŋa ebini ekye, baluo-mikyene ya ba-Faridzyē bábaana okolo nde nkehe yi mbi ya okagwa nde bifwulu mu mandagha malagha. 54 Bo bákasagha osomo nde mu mweē nkini-a-nki nde ákughu opaha ndagha yi mbi.

12 Mu matala mamo, mapfwunu ma baara mayabvurunu, mu obo babake bákadzyara myili mi banganda. Yiiu ábaana olyele kundaa binduono bi nde ti: «Lisa mayele mu pfini lili ba-Faridzyē, li lili mandagha mama fughuru-fughuru. 2 Etsughu eli kiili mandagha mwohono ma másweme sa magyighili omoŋono, ya mansweghe mwohono sa bagyahaba mo. 3 Mu obo, mandagha mwohono ma liibili be kunsu mpyibi, sa bagyughu mo mu nkara a mwii, ya mandagha ma liilele be mu mamfwunu munsu mangwumu ma manzo, sa bata mo mukwughu ku yulu a see li nzo lili eyala.» 4 «A baana-abo, me bu ndyele be: Ka libara baara baala yina a nyuru bakughu odzwa o, lo ka bakughu osa elogho ekimi o. 5 Me be aansuo nande be lifaana obara. Mbwuru wu lifaana obara be, munde wuulu ŋa mbihi ŋa aamaha nde mbwuru muwumu, nde li a lileene lili otsili nde ku mungele-a-mbaa. Me ngyighili olyele be yo, me nde be lifaana obara. (Geenna g1067)

6 Ka baakatyeghe binswini-a-nswini bitaana

mu mana a mipara myele o? Lo Nzaami ka aakadzimini si emō mu bye nsimi o. 7 Ngu okala mfu a be yi a ku mutswi, Nzaami gyahaba mutala a yo. Mu obo ka likala a nzalamweē o. Ŋa mihi mi Nzaami, be liluru mupfunu ya binswini-a-nswini bilagha!» 8 «Me ndyele be bu, nswe mbwuru wu aakihi me ŋa mihi mi baara, Mwana a mbwuru si sa akihi nde ŋa mihi mi bangye-yulu ba Nzaami. 9 Lo munde wu aatunu ŋa mihi mi baara ti nde ka gyahaba me o, Mwana a mbwuru sa abih nde si ŋa mihi mi bangye-yulu ba Nzaami. 10 Nswe mbwuru wu tughu Mwana a mbwuru kughu obagha kolokolo, lo munde wu aatsaala Mufulu a Ngili ka kughu obagha kolokolo o. 11 Ŋa akala baabiri be mu manzo mama lisamana ma ba-Dzwife mu osa be muyala, bwunu we kundaa bamfumu ya ba baakatumu, ka likala a mikolo maā-maā mu mandagha ma liibvuhulu be bo o, bwunu we mu mandagha ma akala liibili be. 12 Mu kuulu mu matala mamo Mufulu a Ngili sa asuo be mandagha ma lifaana obili be.» 13 Mbwuru mutsyini ŋa kara li ba báli oŋo ályele Yiiu ti: «Muluo, lyele naana a me akaba ya me pfa li oosihi taara bihi.» 14 Yiiu ágwi nde mvuru yi: «Ta baghala, nande aatwulu me nsughu a lamana a be bwunu we mbwuru wu aakaba pfa li be?» 15 Ŋa mbihi oŋo nde ályele bo ndiri: «Lisa mayele linyaā okala a ntono a nzi, mu kuulu mbwuru ka kughu obagha laama lili nganma mu nkooro a bilogho bi ali a bye o, si kala ti nde li a bye kyele.» 16 Mu obo nde áti bo nkumu yi: «Esini etsyini éli a manseghe ma máburu ku olagha. 17 Nde ákatsimi ti: “Bunu-abo me aansa? Me ka aafirinsyili a ebini kii olwunu bimburu byehene bi aantolo me mu nseghe o.” 18 Mu obo, nde ályele ti: “Me bu aansa: Me sa mbwihi bitaghala bi me ya me sa ntwu bibaā bi biluru bunene, ya me sa ntwulu mburu a bele a me ya bilogho bi me omo. 19 Ŋa mbihi oŋo sa ndyele muwumunu a ti: We aabunu bilogho bilagha bi bikughu osa bamvulu balagha. Gwumu o we, dza, ŋma ya kala mu esee!” 20 Lo Nzaami ályele nde ti: “We ewulu! Mu mpyibi yi yi we kpa aakpa. Lo bilogho byehene bi aalwunu we, nande aabyala bye?”» 21 Yiiu áfiribwehe bu: «Bumō kundaa munde wu aakakwu busini mu nkooro a ndeme, lo nde ka li esini ŋa nkulu a Nzaami o.» 22 Ŋa mbihi oŋo, Yiiu ályele binduono bi nde ndiri: «Me mu obo me ndyele be ti: Ka limono mukolo mpara mu nkooro a

bi-odza bi bifaana mu laama li be o, bwunu we mu binkuru bi bifaana mu manyuru ma be o. **23** Mu kuulu, laama liluru bi-odza, ya nyuru yiluru binkuru. **24** Litala bangankwaā: Bo ka baakakunu o, ka baakatolo o, ka bali a bibaā bwunu we mangwumu ma baakalwunu bimburu o, lo Nzaami aakaburjunu bo. Ligyahaba ti be liluru bajmini mupfunu. **25** Nande ŋa kara li be kughu obwehe etsughu mu laama li nde mu nkooro a minyoō mi nde? **26** Kala be ka likughu osa enda-ndagha kii obo o, mu emakye be lili a minyoō mu bilogho bibike? **27** Litala bu ookamene bifulu mu ebiri, bye ka biikasala o, bye ka biikatwu o, lo me ndyele be ti, si kala Salomō, mbwuru wu āali a nsia yi alagha, ka ālaha bubwe oluru efulu emō mu bye o. **28** Kala ti Nzaami aakalaha obo lolo nsele yili mu ebiri ya yiili mbala sa batsili yo ku mbaa, lo bunu-abo nde akala aangwene olahe be obo, be baara banga-a-kana li lisala? **29** Lo be, ka likasagha bilogho bi liidza bwunu we bi liijma, ya mikolo mi be minyaā okala mu yulu mu okatsimi mandagha mamō. **30** Mu kuulu, yini a babo baala ka bali ba-Dzwife o baakasughu mukolo mu bilogho byene bibye. Lo Taara a be gyahaba ti be lili a nzala a bilogho bibye. **31** Nsomo-a-nsomo be lifaana osagha Emfumu e Nzaami, ya sa bagwa be bilogho bibike bibye.» **32** «Mukaā a bindoomo wu asala, ka kala a nzalamweē o, mu kuulu Taara a be aamono ti oli bubwe nde agwa be Emfumu e nde. **33** Lityeghe bilogho bi lili a be ya ligwa nzi kundaa bawele. Likala a bimpogholo bi nzi bi biigwene okakagha, lilwunu mu mayulu busini bu buugwene okafa, mu kuulu oko muturu ka kughu oturu bo o, ya bansiele ka bakughu odza bo o. **34** Mu kuulu ebini ki okala busini bu be, me oŋo ŋa okala mikolo mi behe si.» **35** «Likala yeelee, likuru nswele mu bala ya lisa kuulu ti miindi mi be mikala mi minama. **36** Behe si, likala ti anga baara ba bali mu okakebe mfumu a bo, wu aagyene ku kyiri kii mabala, mpaala badzubulu nde nzo maswa-maswa ŋa ayabvughuru nde ya ŋa aakoboro nde muŋma a nzo. **37** Esee kundaa bisala bi ooyabagha mfumu a bo ŋa aagya nde mu okakahala mihi! Mu engajma, me ndyele be, nde sa alaha binkuru bi nde bii esala, sa abwihi bo nsini ŋa tabele, ya nde ndeme sa agwa bo bi-odza. **38** Ngu okala ti nde gyi kara-a-kara a mpyibi bwunu we ku ookya bwihi, ya nde ayabagha bo mu okakahala mihi, bo sa bakala kunsā esee ki elagha. **39** Limatsimi ati. Kala ti nga-a-nzo aakasoolo matala ma okagya muturu, nde nkini aakasa myehene mu kuulu banyaā obulu nzo a nde. **40** Behe si likala yeelee, mu kuulu Mwana a mbwuru kughu ogya mu matala maala be ka lili a si bitsimi bi mo o.» **41** Mu obo Piere āfwulu nde ti: «Mfumu, we yini a mu bihi aati nkumu oyo, bwunu we mu baara bwohono?» **42** Mfumu ābvuhulu nde ndiri: «Nande li musala wu aakakebe ya aakasalala bilogho bi mfumu a nde wu mayele ya wu bakughu osa kana mu nde, wu ootwulu mfumu mukwuru a basala ba nde, mu kuulu akagwa bo bi-odza mu matala ma mafaana? **43** Esee kundaa musala munde kala ti mfumu a nde yabvughuru ya yabagha nde mu okasala esala ekye! **44** Mu engajma me ndyele be, mfumu munde sa agwa bilogho bi nde byehene ŋa myaā mi nde, mu kuulu nde akatala bye. **45** Lo kala ti musala munde tsi mi bu: “Mfumu a me li mu ogyili”. Ya kala nde baana odzwa basala babake baba babaghala ya baba bakaha nkubu, kala ti nde bwi mu odza, oŋma ya okolo mala, **46** mfumu a musala munde sa ayabvughuru ensihibi mu etsughu ya matala maala nde ka agyahaba o. Nde sa agwini a nde nkubu yi luru, sa abagha masyeme mamō ya baara ba bagwene a kana. **47** Musala wu gyahaba mi okadzyi mfumu a nde, lo kwono ogyighili dzyi li nde, sa bakaha nde nswa-nswa yi alagha. **48** Lo munde wu gwene gyahaba mi okadzyi mfumu a nde ya gyighili mandagha ma makughu osa ti bakaha nde nswa-nswa, ka badzwa nde nkubu yi alagha o. Sa basagha bi bilagha kundaa munde wu baagwi bi bilagha. Sa baluomo bi biluru kundaa munde wu baagwi bi bibvulu.» **49** «Me aayantsili mbaa ŋa yulu a nsie. Me āli ndzyi omono mbaa oyo yimaalughulu. **50** Oli a liboghorō li mfaana me obagha, ya mukolo a me li a mbaa mu obaabagha lo! **51** Be bu litsimi ti me edzuunu aayangwa ŋa nsie? Pele! Me bu ndyele be: Me aangyi mu okabala baara. **52** Mu kuulu, obaana etsughu kii lolo dzumu lili baara bataana sa likaghaba, nkolo mō baara batere, nkolo yinke baara buolo: **53** Munkaghaba sa akala ŋa kara li taara ya mwana a nde wu baghala, ŋa kara li mwana wu baghala ya taara a nde, ŋa kara li ngughu ya mwana a nde wu mukaha, ŋa kara li mwana wu mukaha ya ngughu a nde, ŋa kara li bako ba bakaha bo-a-bo.» **54** Yiisu āfirilyele kunda mpwumu a baara bu: «Ŋa liikamono be

edzi kii epyini ku ookadzyama tala, mu matala maana mambo be likalyele ti: “Mvulu sa anoō”. Ya ookakala obo. **55** Ya ŋa liikamono be efulu ki eekafa ku Sude, be likalyele: “Lolo mwii sa agyighili obala”. Ya ookakala obo. **56** Be baara ba lili fughuru-fughuru! Be ligyahaba okabaghala mandagha ma liikamono ku yulu ya ŋa nsie ŋa. Mu emakye liikuono obaghala mandagha ma mali mu oluru mu matala ma?» **57** «Mu emakye be beme liikakuono obaghala mandagha mama bunsumu? **58** Mu matala ma li mu okagye we kundaa nsughu a lamana ya mutaara a we, sa myehene mu ogwihini ya nde ŋaala be nkini mu nzili. Kala pele, mbwuru munde sa abiri we kundaa nsughu a lamana, ya nsughu sa agwa we ku myaā mi bambumbulu mu kuulu balo we mu boloko. **59** Me ndyele be, we ka pala mu boloko o, kala ti we ka mana ofiri ebyimi kyehehe o.»

13 Mu matala maana mambo, ndaama a baara báyaliele Yiiisu mi mibwi mu basi Ngalile ba ódzwi Pilate, mu matala ma báakatsughu bo bikaba. **2** Yiiisu ábvuhulu bo ti: «Be bu litsimi ti basi Ngalile babo bámono mpara oyo, mu kuulu bo bábvulu a masumu mu baara bwohono baba mu Ngalile? **3** Pele! Lo me ndyele be, kala ti be ka ligyini mayele o, be bwohono sa likpa ti bu bákpí bo. **4** Lo baara kwumu a mpuomo ba bákpí ŋa óbwi nzo yi mutele yi a Silowe ŋa yulu a bo, be bu litsimi ti bo báloru baara bwohono babake baba Yerusaleme bubi? **5** Pele! Lo me ndyele be, kala ti be ka ligyini mayele o, be bwohono sa likpa ti bu bákpí bo.» **6** Yiiisu áfirita nkumu yi: «Baghala mutsyini áli ákunu mufinge mu nsege a nde yi a bviini. Etsughu etsyini nde áyasagha bimburu, lo ka ábagha elogho o. **7** Mu obo nde ályele kundaa musala a nsege a bviini ti: “Mibvu ayi mitere mi ndi mu okayasagha me bimburu mu mufinge wu, lo ka ndi mu okabagha elogho o. Kpaā nde! Mu emakye nde ali mu okakala nsie kuu bwunu?” **8** Lo musala ábvuhulu kundaa nde ti: “Mfumu, mafirinyaā nde mubvu wu. Me sa nsimi nde mu bele-a-bele, ya me sa ndo nde mbwoho, **9** nkini-a-nki buru bimburu mu bitsughu bi biigya. Kala pele, sa kpaā o we nde.”» **10** Mu etsughu kii sabate, Yiiisu ákaluo mu nzo a lisamana a ba-Dzwife. **11** Omo óli a mukaha mutsyini wu áali a mufulu wu mubi wu áagwi nde epfwumu, mu bamvulu kwumu a mpuomo. Ebughu e nde éli ekorono ya nde ka ákakughu otemene nsumu

o. **12** Yiiisu bu amono nde, áti nde mbili ya ályele kundaa nde ti: «Mukaha, baakwulu we mu epfwumu e we». **13** Ŋa mbihi oŋo nde ánaā nde myaā. Mu matala maana mambo, mukaha átemene nsumu ya ábwi okasyighi Nzaami. **14** Lo mukwuru a nzo a lisamana a ba-Dzwife ákolo nkehe mu kuulu Yiiisu ádzuhu mbwuru mu etsughu kii sabate. Mu obo, nde ályele kundaa mpwumu a baara ti: «Bihi-a-be bitsughu bisemene lili a bye bibi esala. Liikayasagha libughu mu bitsughu bibye, lo ka mu etsughu kii sabate o.» **15** Mfumu ábvuhulu kundaa nde ndiri: «Be lili baara baba bifa byele! Mu etsughu kii sabate, nande ŋa kara li be aagwene okanyana ngoomo bwunu we aane a nde swe ŋa ebini ki aakadza nde mu oyigwa nde madza aŋma? **16** Ya mwana a Abarahame wu mukaha wu, bamvulu kwumu a mpuomo bamaaluru, obaana bu ókuru nde Satana minkana. Mu obo, bubi mu bu aanyana me nde minkana mimye mu etsughu kii sabate?» **17** Ŋaala nde mu okabili obo, mitaara mi nde mímono budzwa, lo mpwumu a baara yímono esee mu mandagha ma manene ma mabwe ma ókasa Yiiisu. **18** Mu obo, Yiiisu áfirilyele ti: «Mu nki efaana Emfumu e Nzaami eli, ya emakye me nkughu obvughu kye? **19** Kye efaana ya liburu li mutaade li ókunu mbwuru mu ebwa e nde. Bu lilughubu, likulu ya likighiri muti, mu obo baŋmini baba yulu báyatwu manzo mu mampala ma nde.» **20** Yiiisu áfirilyele ti: «Ya emakye me nkughu obvughu ya Emfumu e Nzaami? **21** Kye efaana ya pfini li ólo mukaha mutsyini ya ábvughu lo ya makaba matere mama farine. Mu obo nkpaŋa yohono yíkumu.» **22** Ŋa ókagye Yiiisu ku Yerusaleme, nde ákabulusomo mu mabvulu ya mu mala, ya ákabululuo. **23** Mbwuru mutsyini áfwulu nde ndiri: «Mfumu, yini a mana ndaama a baara akala baabvwughu?» Yiiisu ágwi bo mvuru yi: **24** «Lisa makpa lisomo mu muŋma a nzo wu a sala. Mu kuulu, me ndyele be yo, balagha akala baasagha osomo lo bo ka baleene o.» **25** «Etsughu eli mu ogya, kiili nga-a-nzo sa atemene ya sa akuru yo. Mu obo be sa likala ku mbala, sa libaana okoboro nzo ya olyele ndiri: “Mfumu, dzubulu bihi nzo!” Lo nde sa abvuhulu be bu: “Me ka ngyahaba ku liifi be o!” **26** Mu obo be sa lilyele nde: “Bihi ali liikadza ya okanma emō ya we, ya we aakaluo mu minsagha mi bihi!” **27** Lo nde sa abvuhulu kundaa be bu: “Me ka ngyahaba ku liifi be o! Ligye la ya me,

be bwohono ba lili mu okasa bubu!” 28 Oko sa okala a bilili ya nkerene a myini, mu matala ma liimono be Abarahame, Idzake ya Dzakobe ya mibighili myehene, babwi nsini mu Emfumu e Nzaami, lo be bapaha be ku mbala. 29 Baara balagha baafa ku esete ya ku wesete, ku nore ya ku sude, sa basomo kunsu malagha ma odza mu Emfumu e Nzaami. 30 Ya mono, baara babake ba bali binsiele-mbihi sa bakala baba nsomo, ya ba bali baba nsomo sa bakala binsiele-mbihi.» 31 Mu matala maana mamu, ndaama a ba-Faridzye yígyi kundaa Yíisu ya yílyele nde ti: «Mara ŋa, gye o we, mu kuulu Erode dzyi odzwa we.» 32 Lo Yíisu ágwí bo mvuru yi: «Ligye liyílyele mubagha munde bu: “Mono, me ndi mu obyí mifulu mi mibi ya odzuhu babyele lolo, ya mbala, ya etsughu kii bitere, esala e me sa efa”. 33 Lo me mfaana osa esala e me lolo, mbala ya mbaala ŋa epala, mu kuulu yini a ŋa Yerusalem bafaana odzwa mubighili, ka oli nkolo nkimi o.» 34 «Yerusalem, Yerusalem! We wu aakadzwa mibighili ya wu aakadzwa mu mamee babo ba ookagweghe Nzaami kundaa we. Lo mu nswe matala, me aakansagha obvughu baana ba we ti bu ookavughu nsuhu baana ba nde kunsu mapaba. Lo be ka liikadzwi o. 35 Mono, Nzaami sa atyeghe nzo a be ebughu. Me ndyele be yo, be ka lifirimono me o, tee matala ma liílyele be ti: Liseme likala mu munde wu li mu ogya mu nkhwumu a Mfumu.»

14 Mu etsughu emō kii sabate, Yíisu áli áyadza ku nzo a mukwuru ba-Faridzye mutsyini. Ba-Faridzye bákgayighili otala nde. 2 Mbwuru mutsyini wu áli a bubyele baba bituru ágyi ŋa nkulu a Yíisu. 3 Yíisu áfwulu baluo-mikyene ya ba-Faridzye ti: «Bunu, oli a muswa wu odzuhu mbwuru mu etsughu kii sabate, bwunu we pele?» 4 Lo bo ka bábvuhulu ndagha o. Mu obo, Yíisu ákwara mubyele, ádzuhu nde ya ályele nde abvughuru ku nzo. 5 Ŋa mbihi oŋo, Yíisu ályele kundaa bo ti: «Nande mu be wuulu kala ti mwana a nde wu baghala, bwunu we ngoomo a nde bwi munsu dzunu li madza mu etsughu kii sabate, ka apaha nde maswa-maswa o?» 6 Bo ka bákgughu ogwa nde mvuru mu ndagha oyo o. 7 Yíisu bu amono ti baara ba óti mu-Faridzye mbili mu oyadza bákasuolo bibini bibi nsomo, nde ályele kundaa bo ti: 8 «Kala ti mbwuru ti we mbili mu ogye ku mabala, ka ayibwa nsini ŋa ebini kii nsomo o. Nkini-a-

nki baati mbwuru mukimi wu luru we bunene mbili. 9 Ya mbwuru wu aati be bansa buolo mbili anyaa oyalyele we ndiri: “Gwa nde ebini ki”. Mu obo, we sa mono budzwa mu oyibwa nsini ŋa ebini kii masini. 10 Lo, kala ti bati we mbili, gye yibwa nsini ŋa ebini kii masini, mu kuulu mu matala ma ogya munde wu aati we mbili, nde sa alyele kundaa we ti: “Ndughu a me, kumu ŋa yulu ŋa!” Mu obo, we sa kala a budziri ŋa mihi mi baara bwohono ba bali mu odza ya we. 11 Mu kuulu, munde wu aasagha osejene mu endeme, sa babvurulu nde linsie, ya munde wu aabvughuru linsie, sa baseene nde.» 12 Yíisu ályele si kundaa munde wu áati nde mbili ndiri: «Ŋa aakadza we mu mwíi, bwunu we mu nkonkolo, ka akata bandughu ba we mbili o, si okala banaana ya bambwee ba we, taara ya ngughu a we, bisini bi bili bitaataa ya we o, mu kuulu boho si sa babvurulu we mi aagyighili we bo. 13 Lo, kala we dzyi odza malagha, ta bawele, banga-a-bipfwumu, bikara ya binkpa-mihi mbili. 14 Mu obo, we sa kala a esee mu kuulu bo ka bali a elogho ki baabvurulu we o. Yini a Nzaami akala aabvurulu we bye, mu matala ma oosighili baba bunsumu mu lipfu.» 15 Bu amana ogyughu mandagha mamu, mbwuru mutsyini wu áabwi nsini ya Yíisu ályele kundaa nde ti: «Esee kundaa munde wu akala aadza mu malagha mama Emfumu e Nzaami!» 16 Yíisu ályele kundaa nde ndiri: «Mbwuru mutsyini ási malagha ya áti baara balagha mbili. 17 Matala ma odza bu mato, nde ágweghe musala a nde mu oyílyele bo bu: “Ligya, mu kuulu bilogho byehene biikughu”. 18 Lo bo bwohono mu etsimi emō, bábaana ogwa mabwu. Wu a nsomo ályele nde ti: “Me aanswumu nseghe ya me mfaana oyitala yo. Me mbuono we, sa me kolokolo”. 19 Mukimi ályele nde ndiri: “Me mfi ku oswumu bangoomo kwumu, ya me ndi mu nzili mu oyigyele bo. Me mbuono we, sa me kolokolo”. 20 Ya mukimi si ályele ti: “Me bu bu nkie, mu obo, me ka nkughu ogya o.” 21 Musala munde ábvughuru kundaa mfumu a nde ya ályele nde myehene mimye. Mu obo mfumu ákolo nkehe ya ályele kundaa musala a nde ti: “Sa maswa, gye mu bibini bi ookavugunu baara bwohono, ya mu minsagha mimi munsu bvulu, gya a me ŋa bawele, ba banga-a-bipfwumu, binkpa-mihi ya bikara.” 22 Musala ályele kundaa nde ti: “Mfumu! Me aansu bu aatumu we, lo nkini ya bibini mu

nzo.” **23** Mu obo, mfumu ályele kundaa nde bu: “Gye mu manzili ya kunsá bibolo, sa myehene, tsiini baara basomo mu nzo a me mu kuulu yo yilwulu.” **24** Me ndyele be bu, mu baara ba aanti me mbili nsomo, si mumō mu bo ka adza bilogho mu kyiri e me o.» **25** Mu kuulu mampwumu ma baara mákanama Yíisu, nde ákaghala ya ályele kundaa bo ti: **26** «Mbwuru wu dzyi ogya kundaa me, ka kughu okala enduono e me o kala ti nde ka bele taara ya ngughu, mukala, baana, bambwee ya banaana ba nde ba bakaha ya ba babaghala, ya laama li ndeme o. **27** Ya munde wu bihi obiri kuruwa li nde ya onama me, ka kughu okala enduono e me o. **28** Mu kuulu, ŋa kara li be mbwuru wu dzyi otwu nzo yi mutele, emakye aatswama okasa? Nsomo-a-nsomo, nde sa abwa nsini, ya sa atsimi mu mutala a nzi wu a faana, ya mu otala kala ti nde kughu omana yo. **29** Kala pele, kala ti nde baana bitsini bi bibagha bi yo, ya kwono omana yo, baara bwohono ba baamono yo sa basebe nde ya balyele ndiri: **30** “Mbwuru munde aabaana otwu nzo, lo aakwono omana yo”. **31** Bumō si kundaa mukogho wu li a bambumbulu mafwunu kwumu, kala ti dzyi odzwana mvulu ya mukogho mukimi wu li a bambumbulu mafwunu makwumu muolo, ema aatswama osa? Nsomo-a-nsomo, nde sa abwa nsini ya atsimi kala ti nde kughu oyibwana a munde wu aayabaana nde mvulu. **32** Kala nde mono ti ka akughu o, nde sa agweghe nde ntumu buulu bagwihini mu osa eyeye, ŋaala wu muke nkini la. **33** Mu obo, nswe mbwuru ŋa kara li be ka kughu okala enduono e me o, kala ti nde ka asihí bilogho bi nde byehene o.» **34** «Mungba li elogho ki ebwe, lo kala ti ntyere a nde yifi, bunu-a-bo bakughu ofiribvurulu nde yo? **35** Nde ka aafirisyili a esala o, ngu okala mu nsie, bwunu we mu mbwoho. Lo baakatsili nde ku mbala. Nyaā munde wu li a matswi mu ogyughu, agyughu!»

15 Etsughu etsyini, mintolo-mpagha ya banga-a-masumu bá kayabehene bo bwohono kundaa Yíisu mu ogyughu nde. **2** Ba-Faridzyē ya baluo-mikyene bákanjununu ya bá kalyele ndiri: «Mbwuru wu li mu okagyagha banga-a-masumu ya li mu okadza ya bo.» **3** Lo Yíisu áti bo nkumu yi: **4** «Nande ŋa kara li be kala ti nde li a bindoomo nkama, ya kala ti etsyini edzimini, nde ka abulusihí makwumu-

wa ya wa bibike ku syehe mu oyisagha emō ekye ki eedzimini tee ŋa aayimono nde kye o? **5** Kala ti nde mono kye, nde sa akala a esee, sa atwulu kye ŋa yulu a bisanama bi nde. **6** Ya bu ayabvughuru ku nzo, nde sa ata bandughu ba nde mbili ya ba bali bitaa-taa bibye, ya sa alyele kundaa bo ti: “Ligya likala mu esee ya me, mu kuulu me aamono endoomo e me ki ali eedzimini.” **7** Me ndyele be ti mu mayulu si bumō, kala mbwuru yini a mumō gyiní mayele, sa bamono esee ki eluru ki baakamono mu baara makwumu-wa ya wa ba bali bunsumu ba bagwene a nzala a ogyiní mayele.» **8** «Bwunu we, kala ti mukaha li a mipara mimi bisyeē kwumu, ya mupara mutsyini dzimini, lo nde ka anahaba mwindi, ka akwomo nzo ya okabulusagha nde ya bunkere tee ŋa aamono nde mupara mu nde o? **9** ŋa aamono nde mupara, sa ata bandughu ba nde mbili ya ba bali bitaa-taa bibye, ya olyele bo ndiri: “Liyakala mu esee ya me, mu kuulu me aamono mupara a me wu ali aadzimini.” **10** Bumō si, me ndi mu olyele be, bangye-yulu ba Nzaami baakamono esee mu yini a nga-a-masumu mutsyini wu gyiní mayele.» **11** Yíisu áfirilyele bu: «Baghala mutsyini áli a baana buolo ba babaghala. **12** Mbwee ályele kundaa taara a nde ti: “Taara, gwa me kaba lili busini lili ndaa me”. Mu obo taara ákaba bo busini bu nde. **13** Mana bitsughu bu biluru, mwana wu baghala wu a sala átole byehene bi áli a bye ya ágyene ku nsie yi a la. Oko nde ábyihí busini bu nde mu laama lili bisee. **14** Bu agyehe nzi a nde yohono, nde ásyili myaā-a-myaā. Ewala ki enene égyi mu nsie oyo, ya nde ábaana okpa nzala. **15** Mu obo, nde áyisagha esala kundaa musi nsie oyo mutsyini. Nde ágweghe nde ku ebiri mu okabulukebe bangubulu. **16** Mu nkooro a nzala, nde ádzyi ogyughuru mu bi-odza bi bangubulu, lo ka óli a mbwuru wu aagwa nde bye o. **17** Mu obo, nde ábaana otsimi ya obili bu: “Basala ba taara a me bwohono baakadza bu badzyi, lo me ŋa ndi mu okakpa nzala. **18** Me sa ntemene, sa ngye kundaa taara a me, ya sa ndyele nde bu: Taara, me aansí masumu kundaa Nzaami ya kundaa we. **19** Ka bafaana ofirita me mwana a we o, gwolo me ti mumō ŋa kara li basala ba we.” **20** Nde átemene ya ágyene kundaa taara a nde.» «ŋaala nde nkini la, taara a nde, átaala nde, nyí yíbagha nde. Ábara ntyini, áyibwumu nde ya ányuburu nde.

21 Mwana ályele kundaa nde ti: “Taara a me, me aansa masumu kundaa Nzaami ya kundaa we, ka bafaana ofirita me mwana a we o”. 22 Lo taara ályele kundaa basala ba nde ti: “Lisa maswa, liyabiri me enkuru ki eluru bubwe ya lilaha nde kye. Lilaha nde mulwu mu mulyeme, ya bikoghoru mu myili. 23 Ligya a pulu li ngoomo lili maala, lidzwa lo. Litswe lidza ya likala kunsá esee. 24 Mu kuulu mwana a me wu áli ákpi, lo aasighili mu lipfu, áli ádzimini, lo aafirimojono”. Ya bábaana osa kyiri.» 25 «Mu matala mamó, mwana wu mukwuru áli munsá nseghe. Nde bu ayabvughuru, áyabehene ya nzo, ya nde ágyughu nkele a bikwumu ya makini. 26 Nde áti musala mutsyini mbili ya áfwulu ndiri: “Nki ndagha yili mu okaluru mu nzo?” 27 Musala munde ábvuhulu nde bu: “Mbwee a we aayabvughuru, ya taara a we aatumu badzwa pulu li ngoomo lili maala bu aamono nde ti nde aagi bunsili”. 28 Nde ákolo nkehe ya ábihi osomo mu nzo. Taara a nde ápala mu obuono nde asomo mu nzo. 29 Lo nde ábvuhulu kundaa taara a nde bu: “Mono, bamvulu balagha me ndi mu okasalala we. Me nkini ámaambihi osa litumu li we o. Lo we nkini ámaagwa me si mwana a ntaba mu osa kyiri ya bandughu ba me o. 30 Lo mu matala ma oyabvughuru mwana a we wu wu aamana busini bu we bwohonó mu okabulutaama ya bakaha banga-a-enkwunu, we aatumu badzwa pulu li ngoomo lili maala mu nkooro a nde!” 31 Taara ályele kundaa nde ti: “Mwana a me, we li ya me matala mwohonó. Bilogho bi me byehene bili bibi ndaa we. 32 Ali lifaana okala kunsá kyiri ya esee, mu kuulu mbwee a we áli ákpi, ya aasighili mu lipfu, nde áli ádzimini, ya aafirimojono.”»

16 Yíisu ályele si kundaa binduono bi nde ti: «Óli a esini etsyini ki éli a musala wu aakakebe ya aakasalala bilogho bi mfumu a nde. Báyalyle nde ti musala a nde ákabyihi busini bu nde. 2 Mu obo, Mfumu áti nde mbili ya ályele kundaa nde ti: “Mamo nki mandagha me ndi mu okagyughu mu nyuru a we? Suo me bu aasi we esala e we, mu kuulu we ka kughu ofirikala musala wu aakakebe ya aakasalala bilogho bi me o.” 3 Musala munde átsimi mu mukolo a nde ndiri: “Bunu-abo me aansa, buulu mfumu a me me aamaha mu esala? Me ka ndi a makpa mu osala esala kii manseghe o. Ya okabululuomo

nzi kundaa baara, me sa mono budzwa! 4 Aa! Me ngyahaba emakye me aansa, mu kuulu baara bagyagha me mu manzo ma bo mu matala ma baamaha me mu esala.” 5 Mu obo, bu ati mbwuru-mbwuru mbili mu ba báli a ebyimi ya mfumu a nde, nde áfwulu wu a nsomo bu: “Ebyimi kii kpe we li a kye ya mfumu a me?” 6 Mbwuru munde ábvuhulu nde ti: “Batono nkama baba maala”. Musala ályele nde ndiri: “Ma mukaana a we wu a ebyimi, bwa nsini mu maswa ya sono: Batono makwumu mataana.” 7 Ija mbihi oyo, nde ályele kundaa wu muke ndiri: “Lo we, ebyimi kii kpe we li a kye”? Nde ábvuhulu nde bu: “Me ebyimi kii basaake nkama baba bimburi bi bele”. Musala ályele kundaa nde ti: “Ma mukaana a we wu a ebyimi ya sono bu: basaake makwumu mpuomo”. 8 Mfumu ásyighi musala munde wu mubi mu nkooro a mayele ma nde. Mu engarjma basi nsie baluru mayele mu mandagha ma bo ya ba bali kunsá otsyeme.» (aiōn g165) 9 Ya me bu ndyele kundaa be: «Nzi yiikapfiri baara balagha, lo be lisalala yo mu kuulu likala a bandughu. Mpaala mu matala ma oofa nzi oyo, sa bagyagha be mu manzo mu bamvulu ya bamvulu. (aiōnios g166) 10 Mbwuru wu aakagyughu mfumu a nde mu mandagha ma masala, aakagyughu nde si mu mandagha ma manene, wu aagwene okagyughu nde mu mandagha ma masala, ka akala aagyughu nde si mu mandagha ma manene o. 11 Mu obo kala ti be ka lili a yughu o mu busini baba gwene a bunsumu, nande aasa kana mu be mu busini baba engarjma? 12 Ya kala ti be ka lili a yughu mu bilogho bi mbwuru mukimi o, nande aagwa be bibi ndaa beme? 13 Ka oli a musala wu kughu osalala bamfumu buolo o. Kala pele, nde sa abele mutsyini ya sa adzyi wu muke, bwunu we sa anabara mu mumō ya sa abele wu muke. Be ka lifaana osalala Nzaami ya nzi o.» 14 Ba-Faridzyē ba baakadzyi nzi, bu bagyughu myehene mimye, bo bákasa Yíisu munsensehē. 15 Yíisu ályele kundaa bo ndiri: «Be lili mu okasa mandagha mpaala limojono ti be lili bunsumu ŋa mihi mi baara, lo Nzaami gyahaba mikolo mi be, mu kuulu mandagha ma ookamono baara ti mali ma manene, mali mandagha ma maluru bubi ŋa mihi mi Nzaami.» 16 «Mikyene ya mibighili mikala tee mu matala mama Dzā. Obaana oyo, bali mu otsala Nsia yi Mbwe yi a Emfumu e Nzaami, ya nswe mbwuru li mu osa makpa mu osomo mu Emfumu ekye. 17 Yulu ya

nsie bikughu oluru, lo ŋa kara li Mikyene, si mpiri nsyini ka yimara o.» **18** «Nswē baghala wu dzwi bala ya mukala a nde ya kie mukaha mukimi, nde si bukala, ya nswē baghala wu kie mukaha wu aadzwi bala ya mulumu a nde, si bukala.» **19** «Áli oli a baghala mutsyini wu esini. Nde ákalaha biko bi bibwe ya bibi ntala. Nswē etsughu nde ákasa malagha. **20** Óli si ya muwele mutsyini wuulu áli ágyoŋomo ŋa muŋma a ekagha e nzo a esini, nkumu a nde áli Ladzare, ya nyuru a nde áli yílwlulu mu biboó. **21** Ya nde ákadzyi otolo yini a mpfi-mpfihini a bi-odza yi áakabwa ku nsie a tabele li esini ekye. Ya bambwa si bákalayere biboó bi nde. **22** Muwele ákpi ya bangye-yulu bábiriri nde kundaa Abarahame. Esini si ékpi ya bádzighi kye. **23** Ya ku nsie a ba bákpi, nde ákamono kimini li lilagha. Bu asiili mihi, átaala Abarahame ku la, ya Ladzare ŋa nkara a nde. (Hadēs g86) **24** Nde ákehe engubu ndiri: “Abarahame, taara me, mono me nyii, ya gweghe Ladzare atsubu mbunu a mulyele a nde mu madza ya abwoho me nzalisogho, mu kuulu me ndi mu okamono kimini lilagha munsa mbaa yi.” **25** Abarahame ábvuhulu nde ti: “Mwana a me, libili mweé ti we áali a busini bulagha mu bumweé bu we, ya Ladzare áli kunsá kimini. Mu matala ma, bali mu obuono nde kunu, lo we li mu omono kimini. **26** Gyahaba ti, mu matala ma oli ya mbie yi nene ŋa kara li bihi-a-be. Mpaala baara ba badzyi omara kunu mu ogya kundaa be ka baleene o, ya ba bali kundaa be ka baleene si osaghaba yo mu ogya kunu o.” **27** Esini élyele ndiri: “Taara, me mbuono we, gweghe Ladzare agye ku nzo a taara a me, **28** mu kuulu me ndi a bambwee bataana. Nde agye ayilyele bo mpaala bo si banyaá ogya ku ebini kii kimini ki.” **29** Abarahame ábvuhulu nde bu: “Bo bali a Moyidze ya mibighili. Bafaana ogyughu bo!” **30** Ya esini ébvuhulu nde ndiri: “Pele, taara Abarahame. Kala ti mbwuru wu ákpi gyene kundaa bo, bo sa bagyiŋi mayele.” **31** Lo Abarahame ábvuhulu kundaa nde bu: “Kala ti bo ka bagyughu Moyidze ya mibighili o, si okala ti mbwuru wu ákpi sighili mu lipfu, bo akala ka bagyughu nde si o.”»

17 Yiisu ályele kundaa binduono bi nde ti: «Mandagha ma maakasa ti baara babwa mu lisumu ka makughu ogwene o. Lo nyii kundaa munde wu aakala mpeene yi maagya mo! **2** Ali oluru bubwe kundaa nde bakwighi nde

limeé li linene mu bolo ya batsili nde mu mubu, ya bu abwihi mu lisumu mumó ŋa kara li bike-bike bi. **3** Be beme lisa mayele. Kala ndughu mu kana bwi mu lisumu, fyeé nde. Kala ti nde gyiŋi mayele, sa nde kolokolo. **4** Ya kala ti nde si we bubi nsa nsaama mu etsughu, ya kala ti mu nsa nsaama oyo nde gyi mu olyele we ti: “Me aanyoó bu aansí we bubi”, sa nde kolokolo.» **5** Bantumú bályele kundaa Yiisu ti: «Mfumu gwa bihi kana lili ngo lo.» **6** Mu obo Mfumu ályele kundaa bo ndiri: «Kala ti be lili a kana ti liburu li mutaade, be likughu olyele kundaa muti wu a sikomore ti: “Tuŋumu ya midza mi we ya gye yibwa mu mubu!” Ya nde sa agyughu be.» **7** «Nande ŋa kara li be kughu olyele kundaa musala a nde wu aakasala mu manseghe ma nde, bwunu we wu aakakebe mikaá mi nde, ŋa aafa nde ku manseghe bu: “Gya maswa-maswa, bwa nsini, ya dza?” **8** Pele! Lo nde bu aalyele kundaa nde: “Nana me bi-odza, laha biko bibi esala ya gwa me bi-odza. Me mana odza ya oŋma, ŋa mbihi oŋo we kughu odza ya oŋma.” **9** Lo liimaamono ti mfumu bvurulu matuono kundaa musala a nde mu kuulu aakagyighili mi aakatumu nde? **10** Behe si bumó, ŋa liimana osa myehene mi baatumu be osa, lilyele bu: “Bihi lili basala ba bagwene a mupfunu, bihi liigyighili yini a mamó ma lifaana ogyighili.”» **11** Ŋaala Yiisu mu okagye ku Yerusaleme, nde áluru mu milili mi etsulu e nsie kii Samari ya kii Ngálie. **12** Ŋa ákasomo nde munsa bula butsyini, banga-a-buala kwumu báyabwana a nde. Bátemene la-la **13** ya bákehe engubu: «Yiisu, Muluo, mono bihi nyii!» **14** Bu amono bo, nde ályele kundaa bo ti: «Ligye liyisuo manyuru kundaa bangaa ba nzaami.» Ŋa báli bo nkini mu okagye, bo bámono ti bo baadzughu. **15** Mumó ŋa kara li bo bu amono ti nde aadzughu, áyabvughuru ya ákasyighi Nzaami mu yulu. **16** Nde ápfumunu busu mu nsie ŋa myili mi Yiisu ya ábvurulu nde matuono. Baghala munde áli musi Samari. **17** Yiisu áfwulu ti: «Bunu, bo bansa kwumu ka baadzughu o? Bu wa babake kunu bali? **18** Yini a munzyi wu aayabvughuru mu ogwa Nzaami masyighi?» **19** Ŋa mbihi oŋo Yiisu ályele kundaa nde ti: «Temene, gye, kana li we liibvwuhu we!» **20** Ba-Faridzyé báfwulu nde ti nsa matala Emfumu e Nzaami eegya, nde ábvuhulu kundaa bo ti: «Emfumu e Nzaami ka eegyi ti anga elogho ki bakughu omono mu mihi o. **21** Banyaá olyele be ti: “Limono, ŋa eli”, bwunu we: “Eli

kunil!” Limono, Emfumu e Nzaami eli ŋa nsa kara li be.» 22 Ŋa mbihi oŋo, Yiisu ályele kundaa binduono bi nde ti: «Bitsughu sa bigya, bi likala a be nzala a omono Mwana a mbwuru, ti mu etsughu etsyini, lo akala ka liimono nde o. 23 Sa akala balyele kundaa be ti: “Nde ŋa ali”, bwunu we: “Kunii ali”. Ka ligye o, ya ka libara ntyini o. 24 Mu kuulu, ti bu ookasehene mvulu ya bu aakatsehebe nde yulu nkolo ya nkolo, me obo si bu ookala Mwana a mbwuru mu etsughu e nde. 25 Lo nde faana oswama omono mpara yi alagha, ya baara ba eseene ki sa babihi nde. 26 Mi mluru mu matala mama Nowe sa miluru mu etsughu ki oogya Mwana a mbwuru. 27 Baara bákadza, bákajma, bákakie ya bákakwehe tee mu etsughu ki ósomo Nowe munsá bwara ba bunene. Ndwuru yígyi mu nsie nsyini, ya baara bwohonó báfi ekulu. 28 Bumó si mu matala mama Lote. Baara bákadza, bákajma, bákaswumu ya bákatyeghe, bákakunu ya bákátwuhu manzo. 29 Lo etsughu ki ópala Lote munsá bvulu lili Sodome, Nzaami ánohó mvulu wu a mbaa ya wu makele ma maakalughulu mbaa, wu áyadzwa baara bwohonó. 30 Sa okala bumó mu etsughu ki oyamono Mwana a mbwuru.» 31 «Mu etsughu ekye, mbwuru wu li ku yulu a see li nzo lili eyala, asughuru, anyáá osomo munsá nzo mu ogwolo bilogho. Wu aakala ku manseghe, anyáá si obvughuru ku bula. 32 Litsimi mi mibwi mu mukala a Lote. 33 Munde wu aasagha obvwuhu laama li nde sa apfihili lo. Munde wu aakihi okpa, sa akala mweé. 34 Me bu ndyele kundaa be: mu mpyibi oyo, mu baara buolo ba baakala ku yulu a mbughu mó, sa babiri mutsyini ya sa basihi wu muke. 35 Mu bakaha buolo ba bali mu okasighi bimburu, sa bagwolo mutsyini ya sa basihi wu muke. 36 [Mu babaghala buolo ba baakala munsá nseghe, sa bagwolo mutsyini ya sa basihi wu muke.]] 37 Binduono bíbvuhulu nde ti: «Mfumu, mandagha mamó kunu-ako akala maaluru?» Yiisu ágwi bo mvuru yi: «Ku ookala ebyimi, me oko ku oyabvunjunu bango-mbimi.»

18 Yiisu áti bo nkumu nsyini mu osuo bo ti bafaana okasamana Nzaami matala mwohonó ku ogwene okolo. 2 Mu obo, nde ályele kundaa bo ti: «Óli a nsughu-a-lamana mutsyini mu bvulu litsyini. Nde ka ákabara Nzaami o, ya ka ákagwa si mbwuru mutsyini

budziri o. 3 Óli si a mupfiili mutsyini wu mukaha oko, wu ákalyele kundaa nde ti: “Tsyiri ndagha yi li ŋa kara li me ya mutaara a me.” 4 Matala malagha nsughu-a-lamana munde ábihi. Lo ŋa mbihi oŋo, nde ábili bu mu mukolo a nde: “Si okala ti me ka aakambara Nzaami o, bwunu we me ka aakangwa mbwuru si mumó budziri o, 5 lo me ndagha a mupfiili wu aantisyiri, mu kuulu nde ka li mu okanyaá me pii o. Kala pele, nde sa akayaluhu me nkele bitsughu byehene.” 6 Mfumu áfirilyele bu: «Be liigyughu mbiili a nsughu-a-lamana munde wu mubi. 7 Lo Nzaami ka kughu otsyiri mandagha ma babo ba ásuolo nde o, ba bali mu okasyama kundaa nde mpyibi ya mwii? Ya nde ka asa maswa mu obaha bo o? 8 Me bu ndyele be, Nzaami sa atsyiri mandagha ma bo maswa-maswa. Lo ŋa oogya Mwana a mbwuru, nde sa ayamono kana ŋa yulu a nsie?» 9 Yiisu áfiritá bo nkumu yi mu ogwa maluo kundaa baara ba baakatsimi ti bo bali kunsá bunsumu ya ba baakatsaala babake. 10 «Babaghala buolo bákumu ku nzo a Nzaami yi nene mu osamana. Mumó áli mu-Faridzyé, ya wu muke áli muntolo-mpagha. 11 Mu-Faridzyé átemene ya ásamana kunsá mukolo bu: “Nzaami, me mbvurulu we matuono mu kuulu me ka ndi ti baara babake o. Bo bali banga-a-pfyibi, ba bagwene a bunsumu, ba baakabvughu mbughu ya mukala bwunu we mulumu a nganda-mbwuru, ti anga muntolo-mpagha wu. 12 Me aankankuru nswele nsa iyo wolo mu liminjí, me aakangwa kaba lili kwumu mu byehene bi aakambagha me.” 13 Muntolo-mpagha áli átemene la, ya ka ábagha si bu aasiili mihi ku yulu o. Nde ákakoboro ntulu ya ákalyele ti: “Nzaami mono me nyii, me ndi nga-a-masumul!” 14 Me ndyele be, muntolo-mpagha munde ábvughuru ku nzo a nde ya Nzaami ákirili nde mbwuru wu bunsumu, lo ka mu-Faridzyé wu o, mu kuulu munde wu aaserjene mu endeme, sa basurulu nde linsie, ya munde wu li linsie, sa baseene nde.» 15 Baara bágyi a baana ba basala kundaa Yiisu mu kuulu nde abyeme bo. Lo binduono bi nde bu bimono obo, bífyéé baara babo. 16 Mu obo, Yiisu áti baana mbili ya ályele ti: «Linyaá baana ba basala bagya kundaa me, ya ka likahaba bo o, mu kuulu Emfumu e Nzaami eli kii ba bafaana ya bo. 17 Me ndyele be mu engajma, nswe munde wu gwene okihi Emfumu e Nzaami ti mwana wu asala, ka asomo omo o.» 18 Mfumu a ba-Dzwife

mutsyini áfwulu Yíisu ti: «Muluo wu mubwe, emakye me mfaana osa mu obagha laama lili mibvu ya mibvu?» (aiōnios g166) **19** Yíisu ályele kundaa nde ti: «Mu emakye we li mu olyele ti me mbwuru wu mubwe? Ka oli a mbwuru wu mubwe o, kala ka yini a Nzaami o. **20** We gyahaba mikyene: Ka bvughu mbughu ya mukala bwunu we ya mulumu a nganda-mbwuru o, ka dzwa o, ka turu o, ka kala mpughulu wu a mpya mu nganda-mbwuru o, gwa taara ya ngughu a we budziri.» **21** Mbwuru munde ábvuhulu bu: «Obaana bumwana bu me, me aankebe myehene mimye.» **22** Bu amana ogyughu nde, Yíisu ályele kundaa nde ti: «Elogho etsyini we gwene a kye: Tyeghe byehene bi li a bye, kaba nzi kundaa bawele, ya we sa kala a busini mu mayulu. **23** Lo bu agyughu obo, mbwuru munde ányoō ku olagha, mu kuulu nde áli a busini bulagha. **24** Yíisu bu amono minyoō mi nde, ályele ti: «Mpara kundaa bisini mu osomo mu Emfumu e Nzaami! **25** Mu kuulu, ka oli mpara o kundaa nyama wu baakata ti syamo mu osomo mu lihi li ntuumu, lo mpara kundaa esini mu osomo mu Emfumu e Nzaami.» **26** Baara ba bákagyughu mandagha mamō bályele ti: «Mu obo, nande kughu obvwughu?» **27** Yíisu ábvuhulu bu: «Miili baara ka bakughu osa o, Nzaami kughu osa mye.» **28** Piere ályele ti: «Tala, bihi liisihi bilogho bi liili a bye ya liinama we.» **29** Mu obo Yíisu ágwi bo mvuru yi: «Me ndi mu olyele be nganjma, nswe munde wu sihi nzo, mukala, banaana ya bambwee, taara ya ngughu, bwunu we baana ba nde, mu nkooro a Empu e Nzaami, **30** nde sa abagha mi miluru mu matala ma, ya laama lili mibvu ya mibvu mu bitsughu bi biigya.» (aiōn g165, aiōnios g166) **31** Yíisu bu akogho ŋa bele a nde bantumū ba nde kwumu a buolo, nde ályele kundaa bo ti: «Mono! Bihi-a-be ku yulu a Yerusaleme lili mu ogye. Oko myehene mi ósono mibighili mu Mwana a mbwuru sa mikeele. **32** Sa batyeghe nde ŋa myaā mi baara ba bagwene osoolo Nzaami, sa basa nde munsighi, sa batsaala nde, sa batswulu nde manteē, **33** ya bu bamana okaha nde nswa-nswa, sa badzwa nde. Ya etsughu kii bitere, nde sa asighili mu lipfu.» **34** Lo bantumū ba nde ka bábaghala ndagha si mō o. Bo báli kunsā nzi-nzimini. Ka bákagyahaba o bunu-a-bo mandagha mamō mákadzyi olyele. **35** Mu matala ma óyabehene Yíisu ŋa bvulu lili Dzeriko, enkpa-mihi etsyini

ébwī nsini mu mukogho a nzili mu okaluomo baara nzi. **36** Bu agyughu mpwumu a baara yi áakaluru, nde áfwulu nki ndagha áakaluru. **37** Bályele nde ti: «Yíisu musi Nadzarete li mu okaluru.» **38** Mu obo, nde ákehe engubu mu yulu ti: «Yíisu, Mwana a Dabvide, mono me nyiī!» **39** Ba báli ku nkulu báfyēē nde ya bályele nde akuru muŋma, lo nde ákehe bingubu bi biluru: «Mwana a Dabvide, mono me nyiī!» **40** Yíisu bu atemene, átumu bagya a nde kundaa nde. Nde bu ayabehene, Yíisu áfwulu nde ti: **41** «Emakye we dzyi me nsa mu we?» Nde ábvuhulu bu: «Mfumu, sa kuulu me firimono!» **42** Mu obo, Yíisu ályele kundaa nde ti: «Firimono o we! Kana li we liibvwuhu we!» **43** Mu ena kyini ekye, nde ábaana omono, ya ábwi onama Yíisu mu okabulusyighi Nzaami. Baara bwohonon bu bamono obo, básyighi Nzaami.

19 Yíisu ásomo mu Dzeriko ya áluru kunsā bvulu lilo. **2** Mbwuru mutsyini áli oko, nkumu a nde Dzasye. Nde áli mfumu a mintolompagha ya áli esini. **3** Nde ákasagha omono Yíisu, lo nde ka ákughu o, mu kuulu nde áli mutele mupfi, ya mpwumu a baara yíkyi Yíisu. **4** Mu obo, nde ábara ku nkulu ya ákumu ku yulu a muti wu a sikomoro mu omono Yíisu, mu kuulu oyo nzili yi ákaluru nde. **5** Yíisu bu ayato ŋa ebini ekye, ásiili mihi ku yulu, ya ályele kundaa nde ti: «Dzasye, suguru mu maswa, mu kuulu me mfaana ogyonomo mu nzo a we lolo li.» **6** Dzasye ási maswa ásughuru, ya ágyagha nde ya esee. **7** Mu obo, baara bwohonon ba bámonon mandagha mamō bákayurunu ya bákalyele ti: «Nde aayigyonomo kundaa nga-amasumu.» **8** Lo Dzasye bu atemene ŋa nkulu a Mfumu, ályele nde ndiri: «Mfumu, tala: me nkaba bilogho bi me ŋa kara-a-kara mu ogwa ndaama kundaa bawele. Ya kala ti me aampfiri mbwuru mu ogwolo nzi yiluru kundaa nde, me sa mbvurulu nde yo nsa na.» **9** ŋa mbihi oŋo, Yíisu ályele bu: «Lolo li baara ba baakakala mu nzo yi baabvwughu, mu kuulu wuhu si li musi dzumu lili Abarahame. **10** Mu kuulu Mwana a mbwuru aagyī mu osagha ya obvwuhu baara ba bádzimini.» **11** Yíisu áfirita baara ba bákagyughu nde nkumu nkimi, mu buulu nde áto ŋa bele a Yerusaleme, ya baara bákatsimi ti Emfumu e Nzaami mu matala mamō ékaamonono. **12** Mu obo Yíisu ályele kundaa bo ti: «Mbwuru mutsyini wu budziri ágyene ku nsie yi a la mu

oyibyalá emfumu kii mukogho ya áyabvughuru. 13 Nsomo agye, nde áti basala kwumu mbili ña kara a basala ba nde. Nde ágwi ña kara a nswe musala mupara mutsyini wu a mu oore, ya ályele bo ti: “Lita nkaala mu nzi yi tee ku aayambvughuru me.” 14 Lo baara baba nsie a nde bákabele nde. Mu obo, bágweghe baara ña mbihi a nde mu oyilyele ku ákagye nde bu: “Bihi ka lidzyi ti nde akala mukogho a bihi o.” 15 Bu amana obyala emfumu, nde áyabvughuru. Nde áti basala ba ágwi nde nzi mbili mu ogyahaba ndaana yi bábagha bo mu nkaala. 16 Wu a nsomo ágyi ya ályele ti: “Mfumu! Mupara a we aaburu mipara kwumu.” 17 Mfumu ályele nde ti: “Bubwe, we li musala wu mubwe. Mu kuulu we aasi waa li me mu bilogho bi bisala, me ntwulu we mfumu a mabvulu kwumu.” 18 Wu a buolo ágyi ya ályele ti: “Mfumu, mupara a we aaburu mipara mitaana.” 19 Mfumu ályele nde ndiri: “Me ntwulu wehe si mfumu a mabvulu mataana.” 20 Mukimi ágyi ya ályele ti: “Mfumu, mupara a we ndindi. Me ali aandwunu nde kunsá mupa a eko. 21 Me aakankala a nzalamweé a we, mu kuulu we li mbwuru wu a mukolo wu a kubu. We aakagwolo bilogho bi aagwene okamono we mpara, ya we aakatolo bimburi bi aagwene okakunu we.” 22 Mukogho ályele nde ti: “We li musala wu mubi! Me muyala a we aansa mu mandagha ma paha weme. We gyahaba ti me ndi a mukolo wu a kubu, me aakangwolo bilogho bi aangwene okamono me mpara, ya aakantolo bimburi bi aangwene okakunu me. 23 Mu emakye we aagwene oyitwulu mupara a me kundaa ba baakabunu nzi? Bu ayambvughuru me bu, me ali aankughu obagha ndaana mu nde.” 24 Ña mbihi oño nde ályele kundaa ba báli oño ti: “Ligwohonó nde mupara munde ya ligwa nde kundaa wu li a mipara kwumu.” 25 Bo bályele nde ti: “Mfumu, ta nde li a mipara kwumu mimi oore!” 26 Nde ábvuhulu bo ti: “Me ndyele be, sa babwehe kundaa munde wu li a bye, lo wu gwene a bye, sa bagwohonó si okala mana a ndaama yi ali a nde. 27 Ña yulu oño, liyabiri mitaara mi me ña, mi miibihi ti me nkala mukogho a mye, ya lidzwa mye ña mihi mi me.”» 28 Bu amana obili obo, Yíisu átswama ña nkulu a mpwumu a baara mu okumu ku Yerusaleme. 29 Mu matala ma ábehene a nde ña bula baba Betefadze ya bvulu lili Betani, ña bele a Munguo wu a mi-Olibve, Yíisu ágweghe binduono bi nde byele 30 ya ályele bye ti: «Ligye

ku bula ba buli ku nkulu. Ña liisomo be oko, sa limono mwana a aane bákuru ña muti, ya wuulu si mbwuru mutsyini nkini ámaabwa nsini ña yulu a nde o. Linyana nde ya ligya a nde. 31 Kala mbwuru fwulu be ti: “Mu emakye be lili mu onyana nde?” Lilyele nde bu: “Mfumu li a nzala a nde.”» 32 Binduono bibye bígyene ya bímono mandagha mwohonó ti bu ólyele Yíisu. 33 Ña bákanyana bo mwana a aane, banga-a-nde báfwulu bo mu emakye bo bákanyana mwana a aane munde. 34 Bo bábvuhulu bo ti Mfumu li a nzala a nde. 35 Ña mbihi oño bággyene a mwana a aane kundaa Yíisu. Bággyala biko bi bo ña yulu a nde ya bákuhubu Yíisu ña yulu a nde. 36 Ña ókagye Yíisu, baara bákaggyala biko bi bo mu nzili. 37 Ña áli nde ña bele Yerusaleme mu okumunu Munguo wu a mi-Olibve, mpwumu a binduono bi nde yísomo kunsá esee ya yíbaana osyighi Nzaami mu yulu mu nkooro a bimaá bi bámono bo. 38 Bo bu bákalyele: «Liseme kundaa Mukogho, munde wu li mu ogya mu nkumu a Mfumu! Edzuunu ekala ku yulu, ya nsia yikala kundaa Nzaami!» 39 Ndaama a ba-Faridzyé yi áli ña kara li mpwumu a baara yílyele Yíisu ndiri: «Muluo, tumu binduono bi we binyaá nkele.» 40 Nde ágwi bo mvuru yi: «Me ndi mu olyele be, kala bye binyaá nkele, mameé sa makehe bingubu!» 41 Ña óto Yíisu ña bele a Yerusaleme, nde álili mu nkooro a bvulu lilo, ña ámono nde lo. 42 Nde ályele ti: «Yerusaleme, kala wehe si, we aabaghala mandagha ma makughu ogwa we edzuunu mu matala ma! Lo mu matala ma, mo mali ma másweme ña mihi mi we. 43 Bitsughu bili mu ogya, mitaara mi we sa mitsimi miwaghala mu odzwana a we. Mye sa midziñi we ya sa miswehé we nkolo ya nkolo. 44 Sa mitsala we, ya sa midzwa baara ba we bwohonó. Mye ka misihi si limeé litsiyini ña yulu a limeé o, mu kuulu we ka aagyahaba matala ma oogya Nzaami kundaa we o.» 45 Yíisu ásomo mu Nzo a nzaami yi nene ya ábaana obyí ba bákata nkaala omó. 46 Nde ákalyele bo bu: «Bisono bi Nzaami bili mu olyele bu: “Nzo a me sa yikala nzo yi a lisamana”, lo be liikirili yo ngala yi ookasweme mituru.» 47 Nde ákaluo mu Nzo a nzaami yi nene bitsughu byehene. Bakwuru ba bangaa ba nzaami, baluo-mikyene ya bakwuru ba ba-Dzwife bákasagha mayele ma odzwa nde. 48 Lo ka bággyahaba bu baasa o, mu kuulu baara bwohonó bakagyighili ogyughu nde.

20 Etsughu etsyini, Yiisu ákaluo baara mu nzo a Nzaami yi nene, ya ákatsala Nsia yi Mbwe. Bakwuru ba bangaa ba nzaami, baluo-mikyene, ya bakulu bágyi. **2** Bo báfwulu nde ti: «Lyele ati bihi, we nki emfumu li a kye mu osa mandagha ma? Ya nande aagwi we muswa munde?» **3** Yiisu ágwi bo mvuru yi: «Mehe si be aangwa efwulu. **4** Lilyele me, oboghoru o Dzā kuu yulu bwunu we kuu baara?» **5** Lo bo bátsoho bo-a-bo bu: «Kala libvuhulu ti Nzaami aatumu nde, nde sa afwulu bihi-a-be mu emakye liibihi osa kana mu mandagha ma nde? **6** Ya kala lilyele ti kundaa baara, baara bwohono sa bakaha bihi-a-be mameē, mu kuulu bo bwohono bákihi ti Dzā mubighili áali.» **7** Mu obo, bágwí nde mvuru ti bo ka bagyahaba o. **8** Ya Yiisu ályele ti: «Mehe si ka andyele be o, mu nsa litumu me ndi mu okagyighili mandagha ma.» **9** Ija mbihi ojo, Yiisu áti baara nkumu yi: «Mbwuru mutsyini ákunu nseghe a bviini, ágwihihi ya ba bákasala mu yo, ya ágyene ya ásihi nsie a nde, ási matala malagha oko. **10** Matala ma otolo bimburu bu máto, nde ágweghe musala mumō kundaa ba bákasala mu nseghe a bviini, mpaala bagwa kaba li bviini lili nde. Bo bágwini a nde mpaana, ya bábvurulu nde myaā a myaā. **11** Nde áfirigweghe musala mukimi. Baara babo bágwini a nde mpaana, ya babvurulu nde myaā a myaā. **12** Nde áfirigweghe wu batere, bádzwaha nde mabogho ya babyi nde. **13** Mu obo, mfumu a nseghe a bviini ábili bu: “Me bunu-a-bo aansa? Me mwana a me wu mukolo aangweghe, nkini-a-nki bo bagwi nde budziri.” **14** Lo baara babo bu bamono nde, bábili bu bo-a-bo: “Wu me mbwuru wu aabyala pfa. Litswe lidzwa nde, mu kuulu pfa likala lili ndaa bihi bameme.” **15** Mu obo, bátsili nde ku mbala a nseghe a bviini ya bádzwi nde. Ija mbihi ojo, nga a nseghe a bviini ema aasa bo? **16** Nde sa agya, adzwa baara babo, ya sa agwa nseghe a bviini kundaa baara bakimi.» Ija ógyughu baara mandagha mamó, bo bályele ti: «Mandagha mamó ka makughu okala o!» **17** Lo bu atala bo, Yiisu ályele ti: «Limatsimi ati, Ndagha yi básono mu Mukaana a Nzaami yi bunu-a-bo yidzyi olyele?» «Limeē li ootsili ba baakatwu nzo, lo ayi lili lili ngughu Ija mutswunu a nzo», **18** «Nswe mbwuru wu aabwa Ija yulu a lo, sa abwogho, ya kala ti lo libwi Ija yulu a mbwuru, sa lipwene nde.» **19** Bakwuru ba bangaa ba nzaami ya baluo-mikyene básagha bu baasyimi Yiisu mu ena kyini ekye, mu kuulu bo bábaghala ti nkumu oyo mu bo nde áti yo. Lo bo bábara nzalamweē a baara. **20** Mu obo, bábaana ogyighili okatala Yiisu. Bo ágweghe bankere ba bákamono ti bo bali baba bunsumu, mu kuulu bagyeele obwihi Yiisu mu mandagha ma ndeme. Ya Ija mbihi ojo, batyeghe nde Ija myaā mi mfumu a etsulu e nsie kii Yude. **21** Baara babo bágwí nde efwulu ki: «Muluo, bihi ligyahaba ti we aakabili ya aakaluo ya bunsumu. We ka aakatala bifa bi baara o, lo we aakaluo nzili a Nzaami mu enganma. **22** Lyele ati bihi: mikyene mi bihi-a-be miikagwa bihi-a-be muswa wu ofiri mpagha kundaa Sedzare, bwunu we pele?» **23** Lo Yiisu ábaghala mayele ma bo ma mabi ya ágwi bo mvuru yi: «Lisuo me mupara mutsyini. **24** Edzili ya bisono bi, bibi nande?» Bo bábvuhulu nde ti: «Bibi ndaa Sedzare.» **25** Mu obo Yiisu ályele bo ti: «Libvurulu bibi Sedzare kundaa Sedzare, ya bibi Nzaami kundaa Nzaami.» **26** Bo ka bákuughu omono Yiisu epfwumu mu mandagha mamó Ija mihi mi baara o. Bo bákiñimi mu mvuru a Yiisu ya bákurú miñma. **27** Ndaama a ba-Saduseyē, baara babo ba baakalyele ti osighili o baara mu lipfu ka oli o, báyabehene ya bágwí Yiisu efwulu ki: **28** «Muluo, Moyidze ágwi bihi mukyene wu: “Kala ti naana a mbwuru kpi, sihi mupfiili gwene a mwana, mbwee a nde faana ogwolo mupfiili munde, mu kuulu aburu naana a nde baana.” **29** Óli a babaghala nsaama Ija bula bumō, bo bwohono maama mumō, taara mumō. Wu a nsomo kie mukaha, nde yakpa, mwana we. **30** Wu a buolo kie mupfiili, ya kpi si mwana we. **31** Wu batere si kie mupfiili ya kpi. Bo bansa nsaama bumō si, bákpí ku ogwene oburu mwana. **32** Ija mbihi a bo, mupfiili si kpi. **33** Lo Ija akala oosighili baara bwohono mu lipfu, nande aakala mulumu a nde, buulu bo bansa nsaama bákie nde?» **34** Yiisu ágwi bo mvuru yi: «Basi nsie bali mu okie bakala ya balumu, (aiñ g165) **35** lo baara ba oomono Nzaami ti bakughu osighili mu lipfu, ya bagyagha nde mu bula bu bunyaghara, ka bakie bakala bwunu we balumu o. (aiñ g165) **36** Bo ka bafirikpa o, mu kuulu sa bakala ti bangye-yulu, ya sa bakala baana ba Nzaami mu ku baasighili bo Ija kara li ba bákpí. **37** Moyidze ágyighili osuo ti ba bákpí sa basighili mu lipfu. Mu emojo kii eti-ti ki ékalughulu mbaa lo odzighi we, bályele ti: “Mfumu li Nzaami a Abarahame, Nzaami a Idzake ya Nzaami a Dzakobe.” **38** Nzaami ka li

Nzaami a ba bákpi o, lo wu a baba mweē. Mu kuulu kundaa nde, baara bwohono bali baba mweē.» **39** Ndaama a baluo-mikyene bábvuhulu bu: «Muluo, we aabili ku obwe.» **40** Mu obo, bo ka báfiribagha bukyini mu ogwa nde bifwulu o. **41** Yíisu ályele kundaa bo ti: «Bunu-abo bakughu olyele ti Kriste li mwana a Dabvide? **42** Dabvide ndeme ásono mu Mukaana wu Bikwumu ti: “Mfumu aalyele kundaa Mfumu a me: Bwa nsini ku kwogho-a-kwogho e me, **43** tee ña aansa me kuulu mitaara mi we mikala nkara a myili mi we.”» **44** «Kala ti Dabvide aakata nde Mfumu, lo bunu-a-bo nde akughu ofirikala mwana a Dabvide?» **45** Ñaala baara bwohono mu okagyughu nde, Yíisu ályele kundaa binduono bi nde ndiri: **46** «Lisa mayele mu baluo-mikyene. Bo badzyi okabuludzie ya binkuru bi bila. Badzyi ti baara bakagwa bo mamboro mu bibini bi ookabvunjunu baara bwohono. Bo baakasuolo bibini bibi ku nkulu mu manzo mama lisamana mama ba-Dzwife, ya bibini bibi ku nkulu mu malagha. **47** Baakagwohono bilogho mu manzo ma bapfiili, ya baakasa nsamana yi nda mu kuulu baara bakamono bo. Mu obo, sa babagha masyeme ma maluru.»

21 Yíisu bu aseene mihi, ámono bisini bi bíkalo bikaba munsá elogho ki baakagwa bikaba. **2** Nde ámono si mukaha mutsyini wu mupfiili wu áli muwele mu olo mana mipara myele. **3** Mu obo Yíisu ályele ti: «Me ndi mu olyele be engarña, ekaba kii mupfiili wu muwele wu eluru kii baara bwohono. **4** Mu kuulu, bo bwohono baalo nzi yi bagwene a yo esala, lo nde kunsá buwele bu nde, aalo nzi yohono yi aakakala a yo mu olaama.» **5** Baara babake bákabili mu mi mitala Nzo a Nzaami yi nene, ya mu bu bátwu yo mu mameē ma mabwe, ya mu bilogho bi okagwa baara Nzaami bikaba. Mu obo Yíisu ályele: **6** «Etsughu eli kiili mu myehene mi lili mu okamono be, ka osyili si limeē litsyini ña yulu a limeē likimi o. Nzo yohono sa yibwa mu nsie.» **7** Bo báfswulu nde: «Muluo, mu nki mitala mandagha mamo maatswighi, ya nki elyimi eesuo ti myehene sa mikala?» **8** Yíisu ábvuhulu bu: «Lisa mayele, mbwuru anyaaŋ opfiri be. Mu kuulu, baara balagha akala baagya mu nkwumu a me ya olyele ti: “Wu me Kriste wu lili mu okakebe be!” Ya “Matala maato!” Ka linama bo o. **9** Ña liigyughu be nsia yi a mamvulu ya mandagha

mama mpaatsala, ka likala a nzalamweē o. Mandagha mamo mafaana otswama ogya, lo masini ma nsie ka magya maswa-maswa o.» **10** Ña mbihi oŋo nde ályele bo ti: «Ekaana e baara etsyini sa edzwana ya ki eke, nsie a mukogho mutsyini sa yidzwana ya yi a mukogho mukimi. **11** Nsie sa yinyiŋi mu mpini yohono, ya nkolo ya nkolo bifulu bibi mabyele sa bibiri baara mu lipfu, ya biwala sa bigya. Mandagha ma maagwa baara nzalamweē yi alagha sa makala, ya bilyimi bi binene sa bimoŋono mu mayulu. **12** Lo, nsomo-a-nsomo, sa basyimi be, ya sa bamwehē be kimini. Sa basa be muyala mu manzo mama lisamana ma ba-Dzwife ya sa batsili be mu boloko. Sa babiri be kundaa mikogho ya bamfumu mu nkooro a nkwumu a me. **13** Mu obo be sa libagha mpeene yi okala bampughulu ba me. **14** Ka limono mukolo mpara o mu mi liibili be ña baasa be muyala, **15** mu kuulu meme sa ngwa be mayele mama obili ya munzele bi biisa ti bataara ba be bwohono ka bakughu okemene mandagha ma be bwunu we obwihi be o. **16** Si okala basyana ya bangughu ba be, baana ba ngughu ya baana ba taara, badzighi ya bandughu ba be sa batyeghe be, ya sa badzwa babake ña kara li be.» **17** «Baara bwohono sa babele be mu nkooro a nkwumu a me. **18** Lo si lifu li be litsyini ku mutswi ka lipfighili o. **19** Mu nkooro a mukama a be sa libagha laama.» **20** «Ña liimono be mampwumu ma bambumbulu mu odzyi Yerusaleme, ligyahaba ti matala masala maasyili mpaala bvulu litsarjama. **21** Mu obo baara ba baakala ku etsulu e nsie kii Yude bafaana obara ku yulu a minguo, ba baakala ña nsa Yerusaleme bapala, ya ba baakala ku bibiri banyaāŋ oyasomo kunsá bvulu. **22** Bitsughu bibye sa bikala bitsughu bibi masyeme ma Nzaami, mu kuulu myehene mi básono mu Mukaana a Nzaami mitswighi. **23** Mu bitsughu bibye, nyiŋ mu bakaha ba baakala a mayimi ya basuomo! Mu kuulu nsie yohono sa yisomo kunsá mpara yi alagha, ya Nzaami sa asuo nkehe a nde mu baara baba nsie yi. **24** Mitaara sa midzwa baara balagha mu mapee, sa babiri bo kunsá bunkana ku mansie mwohono, ya baara baala ka bali ba-Dzwife o sa badzyara Yerusaleme tee ku ookughu matala ma bo.» **25** «Bilyimi sa bimoŋono kunsá tala, kunsá ngoono ya kunsá banomanomo. Ña yulu a nsie baara bwohono sa bateghere. Nkele yi aafa ku mubu ya mimpagha mi madza sa bigwa baara nzalamweē. **26** Baara

sa bakpa mu nzalamweē ŋa baatsimi bo mi mili mu ogya mu nsie nsyini, mu kuulu tala, ngoono ya baŋomaŋomo sa binyiŋi. **27** Ŋa mbihi oŋo baara sa bamono Mwana a mbwuru mu ogya ŋa yulu a edzi, mu lileene ya nsia yohono. **28** Ŋa obaana omoŋono mandagha mamō, litemene ya litala ku yulu mu kuulu obvwughu o be oobehene.» **29** Ŋa mbihi oŋo Yiisu áti bo nkumu nsyini: «Litala mufinge ya miti myehene. **30** Ŋa liikamono be ti mye mibaana omyehe masagha ma manyaghara, be liikasoolo ti mvulu a nsomo aabehene. **31** Behe si bumō, ŋa liimono be mandagha mamō, ligyahaba ti Emfumu e Nzaami eebehene. **32** Mu engarjma me ndyele be ti baara baba eseene ki bo bwohono ka basomo mu lipfu o obaana mandagha mamō mamōŋono. **33** Yulu ya nsie sa biluru, lo mandagha ma me ka maluru o.» **34** «Lisa mayele! Mikolo mi be minyaā obyī mu byiri, mu okolo mala, bwunu we mu mpara a nsie, kala pele etsughu ekye sa ebwa be ensihibi, **35** mu kuulu sa ebwa ŋa yulu a baara bwohono ba bali ŋa yulu a nsie ti likoho. **36** Mu obo likahala mihi ya lisamana matala mwohono, mu kuulu likala a makpa ma olughulu ŋa nkulu a myehene mi mili mu ogya, ya lileene otemene ŋa nkulu a Mwana a mbwuru.» **37** Bitsughu byehene mu nkara-a-mwiī, Yiisu ákaluo mu Nzo a nzaami yi nene, ya ákayiluhu mpyibi ku yulu a Munguo wu a mi-Olibve. **38** Mu obo baara, bwohono bákaŋya kundaa nde epala-epala ku Nzo a nzaami yi nene mu ogyughu nde.

22 Kyiri kii mampa ma magwene a pfini, ki baakata Paake, ébehene. **2** Bakwuru ba bangaa ba Nzaami ya Baluo-mikyene bákasagha bu baadzwa Yiisu, lo bo báli a nzalamweē a baara. **3** Ankoho Satana ásono mu mukolo a Yuda wu bákata Isikaryote. Nde áli mumō ŋa kara li bantumu kwumu a buolo. **4** Nde ágyene ayigwihini ya bakwuru ba bangaa ba Nzaami ya bakwuru ba baakakebe Nzo a nzaami yi nene, mu mi mitala bunu nde akughu otyeghe Yiisu kundaa bo. **5** Bo básomo kunsá esee ya bagwihini ti bagwa nde nzi. **6** Yuda ákihi ya ábaana osagha mpeene yi faana mu otyeghe Yiisu ku ogwene a mpwumu a baara ogyahaba. **7** Etsughu kii mampa ma magwene a pfini éto. Kye áli etsughu ki baakadzwa mwana a endoomo mu ogwa mukaba, mu odza kyiri kii Paake. **8** Mu obo, Yiisu ágweghe Piere ya Dzā, ya ályele

kundaa bo ti: «Ligye ligyighili bilogho bi liidza bihi-a-be kyiri kii Paake.» **9** Bo báfwulu nde ti: «Kunu-ako we dzyi ti bihi ligyighili bye?» **10** Yiisu ágwi bo mvuru yi: «Mono, ŋa liisomo be munsá bvulu, be sa libwana a baghala mutsyini ya yughu li madza. Linama nde tee mu nzo yi aasomo nde, **11** ya lilyele nga a nzo bu: “Muluo bu afwulu we: Ngwumu a nzo yi aanda me kyiri kii Paake ya binduono bi me yini a yo?” **12** Nde sa asuo be ngwumu yi nene yi a ku yulu ku oli bilogho byehene mukughu. Me omo be liigyighili bilogho bi-odza mu kyiri kii Paake.» **13** Bo bágyene ya bámono mandagha mwohono ti bu ólyele bo Yiisu, ya bagyighili bi-odza bi kyiri kii Paake. **14** Matala mama odza bu mato, Yiisu ábwi nsini ya bantumumu. **15** Nde ályele kundaa bo ti: «Me aandyi ku olagha odza kyiri kii Paake ki ya be, nsomo-a-nsomo me mono mpara! **16** Mu kuulu me ndi mu olyele be yo, me ka aafirindza kye o, tee matala ma ootswighi kye mu Emfumu e Nzaami.» **17** Ya bu agwolo ebaha, nde ábvurulu matuono ya ályele ti: «Ligwolo ebaha ki, ya likaba kye be a be, **18** mu kuulu, me ndi mu olyele be, me ka afirirjma mala ma bviini o, tee mu matala ma oogya Emfumu e Nzaami.» **19** Ŋa mbihi oŋo, nde ágwolo limpa, bu abvurulu matuono, nde átsyiri lo, ágwi bo lo ya ályele ti: «Yi me nyuru a me yi bágwi mu be. Liikasa bu mu okalibili me mweē.» **20** Bumō si mu ebaha, bu bamana odza, nde ágwi bo kye ya ályele ti: «Ebaha ki eli ogwihini ku onyaghara mu makili ma me ma matsaŋama mu be.» **21** «Lo litala! Kwogho kii munde wu aatyeghe me eli emō ya me ŋa yulu a tabele. **22** Mu engarjma, Mwana a mbwuru faana ogye ti bu ogwaa Nzaami. Lo nyiī kundaa munde wu aatyeghe nde!» **23** Mu obo, bo bábaana ofwulu bo-a-bo, nande ŋa kara li bo aagyighili ndagha oyo. **24** Binduono si bíbaana otsoho bye-a-bye mu ogyahaba nande bvulu babake bukwuru. **25** Yiisu ályele bo ti: «Mikogho mi mansie miikatumu mansie ma bo, ya babo ba bali a litumu ŋa yulu a mo, baakata bo ba baakasa mi mibwe. **26** Lo ka oli bubo o mu be, ka lisa obo o. Ŋa kara li be, mbwuru wu bvulu bukwuru, akala ti wu bvulu bungagye, ya munde wu li mu okatumu, akala ti musala. **27** Nande bvulu bukwuru ŋa kara li munde wu aalabala myili mu odza ya munde wu li mu okasalala? Ka oli munde wu aalabala myili mu odza o? Lo ŋa kara li be, me ndi munde wu li mu okasalala.» **28** «Be lili babo ba baasi mukama

ya me kunsu bigyeele. **29** Me mu obo, bu ógwi me Taara Emfumu, me obo si me aangwi be kye. **30** Mpaala be lidza ya lijma emō ya me ŋa tabele mu Emfumu e me. Ya be sa libwa nsini ŋa makubu mu olamana madzumu kwumu ya muolo ma Isarayelee.» **31** «Simō, Simō, Satana aaluomo we mu onyihl we ti bu baakakele bimburi bi bele, **32** Lo me aambuono Nzaami mu nkooro a we, mpaala kana li we linyaā obwa, ya mu matala ma akala aafiriyabvughuru we kundaa me, we gwa bambaala ba we bukyini.» **33** Piere ályele nde ti: «Mfumu, me aankughu mu osomo boloko ya mu okpa ya we.» **34** Yíisu ábvuhulu nde ti: «Piere, me ndyele we: Mu mpyibi yi a lolo yi, nsomo nsuhu akwolo, we sa tunu nsa tere ti we ka gyahaba me o.» **35** Yíisu áfirilyele kundaa bo ti: «Mu matala ma ángweghe me be ku ogwene obiri nzi, ku ogwene a empogholo, ku ogwene a bikogholo, be áli liigweene a elogho?» Bo bábvuhulu nde ti: «Ti elogho we!» **36** Ya, nde ályele kundaa bo ti: «Lo mu matala ma, wu li a nzi, agwolo yo, bumō si mu munde wu li a empogholo, agwolo kye, ya wu gwene a lipée atyeghe enkuru ya aswumu lipée limō. **37** Me ndi mu olyele be ti, mandagha ma básono mu Mukaana a Nzaami mafaana otswighi mu me: Baatwulu nde mu muluo a baara ba babi. Mandagha mamu sa mamogono edzi-dzighi mu me.» **38** Bantumú bályele kundaa nde ti: «Mfumu, mapee mwolo mama.» Nde ábvuhulu bo ti: «Ookughu!» **39** Yíisu ápala ya ágyene ku Munguo wu a mi-Olibve ti bu óli epfu e nde. Binduono bi nde bínama nde. **40** Bu ato oko, nde ályele bo: «Lisamana mpaala be linyaā obwa mu bigyeele.» **41** Ŋa mbihi oŋo, nde ábulusihi bo ya ágyene mu etiiri ki bakughu otubu limeē, ákunu mabuo mu nsie ya ásamana. **42** Nde ályele bu: «Taara, kala we dzyi, maha me ebaha ki. Lo ka bu ndzyi me o, lo bu dzyi we.» [**43** Mu obo ngye-yulu áfi ku yulu mu ogwa nde bukyini. **44** Yíisu ámono mpara yi alagha kunsu mukolo, ya áfirisamana mu mpini yi luru. Tsughuru li nde líli ti mabere ma makili ma mali mu okatsolo mu nsie.] **45** Bu amana osamana, átemene ya ágyene ku oli binduono bi nde. Nde áyabaha bye bigyogomo tolu mu nkooro a nyíi. **46** Yíisu ályele bye ti: «Mu emakye be liigyogomo? Litemene, ya lisamana, mpaala linyaā obwa mu bigyeele.» **47** Ŋaala Yíisu nkini mu okabili, mpwumu a baara yígyi. Yuda, mumō ŋa kara li bantumú kwumu a buolo,

áyabiri mpwumu oyo. Nde áyasele ŋa bele a Yíisu mu onyuburu nde. **48** Yíisu ályele nde ti: «Yuda, me mu onyuburu we tyeghe Mwana a mbwuru!» **49** Ŋa omono binduono bi Yíisu mandagha ma mali mu ogya, bye bífwulu nde: «Mfumu, lidzwana mu mapee?» **50** Ya mumō ŋa kara li bo ákaha musala a Mukwuru a bangaa ba nzaami ya atsyiri nde tswi lili kwogho-a-kwogho. **51** Lo Yíisu átsughu ndagha ti: «Linyaā! Lisa bwunu!» Mu obo, ábyeme tswi li mbwuru munde ya ádzuhu nde. **52** Ŋa mbihi oŋo, Yíisu ályele bakwuru ba bangaa ba Nzaami, bakwuru baba bankyele ba Nzo a nzaami yi nene ya bakwuru ba ba-Dzwife ba bágyi mu oyasyimi nde bu: «Be liigyi a mapee ya mimpagha, ti be liiyasyimi ntwumu, **53** bitsughu byehene, me aakankala ya be mu Nzo a nzaami yi nene, ya be ka liisyimi me o. Lo li me tala lili ndaa be ya lili lileene lili mpyibi.» **54** Mu obo, básyimi Yíisu, bábiiri nde ya bágyene a nde ku nzo a mukwuru a bangaa ba nzaami. Piere ákanama bo la la. **55** Bábvughu mbaa ŋa kara-a-kara a mbala ya bábwí nsini. Piere ágyene ayibwa nsini ya baara ba bákagyo mbaa. **56** Musala mutsyini wu mukaha wu áamono nde abwi nsini ŋa nkwi-a-mbaa, átuunu nde mihi ya ályele ti: «Baghala wuhu si aali ya nde.» **57** Lo Piere átuunu ya ályele: «Ma mwana, me ka ngyahaba nde o.» **58** Mana matala bu maluru, mbwuru mukimi ámono nde ya ályele ti: «Wehe si li mumō ŋa kara li baara ba bo.» Lo Piere ábvuhulu nde: «Pele ta baghala, ka oli me o.» **59** Tala litsiyini bu liluru, mbwuru mukimi ágyighili onyeme: «Mu enganjma baghala wu ya nde aali mu kuulu nde li musi Ngálie.» **60** Lo Piere ágwí mvuru yi: «Me ka ngyahaba mi dzyi we olyele o.» Mu ena kyini ekye, ŋaala Piere nkini mu okabili, nsuhu ákwolo. **61** Mfumu ákaghala ya ákala Piere. Piere álibili mweē ndagha yi áli olyele nde Mfumu: «Mu mpyibi yi a lolo nsomo nsuhu akwolo, we sa tunu nsa tere ti we gyahaba me.» **62** Mu obo, Piere ábulupala ya ágwubulu mukaba a elili. **63** Baara ba bákakebe Yíisu bákasebe nde ya bákakaha nde. **64** Báfughu nde mihi ya bályele nde ti: «Bighili, nande aakaha we.» **65** Bo bákatsyala nde bitughu ku oluru. **66** Bwíhi bu buki, ekwuru ki ba-Dzwife, bakwuru ba bangaa ba Nzaami ya baluo-mikyene bábvurunu ebini emō. Bo bátumu bayabiri Yíisu kundaa ekwuru ki ba-Dzwife. **67** Bo bályele Yíisu ti: «Lyele bihi, kala we li Kriste.» Yíisu ábvuhulu bo ti: «Kala

me ndyele be, be ka lisa kana o, **68** ya kala me mfwulu be, be ka ligwa me mvuru o. **69** Lo, obaana matala ma, Mwana a mbwuru sa abwa nsini ku kwogho-a-kwogho e Nzaami Nga-a-Mpwũ.» **70** Bo bwohono báfwulu nde ti: «We me Mwana a Nzaami?» Nde ábvuhulu bo ti: «Beme lilyele ti me ndi nde.» **71** Mu obo, bo bályele ti: «Bihi-a-be ka liifirisiyili a nzala a bampughulu o. Bihi bameme liigyughu mi míipala mu muḡma a nde.»

23 Baara bwohono bátemene ya bábirí Yíisu ḡa nkulu a Pilate. **2** Bábaana oburulu nde mandagha bu: «Bihi liimono mbwuru wu mu okagwa baara ba bihi mutswi mpini, ya olighi bo banyaá ofiri mpagha kundaa Sedzare. Ya aalyele ti nde li Kriste ya Mukogho.» **3** Pilate ágwi nde efwulu ki: «We me mukogho a ba-Dzwife?» Yíisu ábvuhulu nde ti: «Weme lyele obo!» **4** Pilate ályele kundaa bakwuru ba bangaa ba Nzaami ya kundaa mpwumu a baara ti: «Me ka mono ndagha yi mbi yi oosi baghala wu o.» **5** Lo bo bányeme ya bályele ti: «Nde li mu okagwa baara mutswi mpini mu maluo ma nde, mu kuulu bakolo nkehe. Aabana ku Ngálike, aabululuru ku Yude Iwohono, mu matala ma aagyi kunu.» **6** ḡa ógyughu Pilate mandagha mamó, nde áfwulu bo kala ti Yíisu musi Ngálike ali. **7** Ya bu agyughu ti Yíisu áli mbwuru wu a bula baba emfumu e Erode, Pilate ágweghe nde kundaa Erode wu áali si ḡa Yerusalemé mu bitsughu bibye. **8** ḡa ómono Erode Yíisu, nde ámono esee ki elagha. Mu kuulu edzighi nde ákasagha omono nde mu nkooro a mi ágyughu nde mu Yíisu, ya nde ákadzyi ti Yíisu asa emamaá ḡa busu bu nde. **9** Nde ágwi nde bifwulu bilagha, lo Yíisu ka ágwi nde mvuru si nsyini o. **10** Bakwuru ba bangaa ba Nzaami ya baluo-mikyene báli oḡo ya bákaburulu nde mandagha mu nzurḡu. **11** Erode ya bambumbulu ba nde bási nde munkulu. Bu bamana otsaala nde, bálaha nde enkuru ki ebwe ya babvurulu nde kundaa Pilate. **12** ḡa nsomo, Pilate ya Erode báli mitaara, lo mu etsughu kyini ekye, bo bákala bandughu. **13** Pilate bu abvughu bakwuru ba bangaa ba Nzaami, bamfumu ya baara bwohono, **14** nde ályele bo ti: «Be liigyí a me baghala wu ya liilyele ti nde li mu okagwa baara mutswi mpini. Litala, me aangwi nde bifwulu ḡa mihi mi be, ya me ka aamono nde epfwumu mu mandagha ma lili mu okakwighi

be nde o. **15** Erode si ka aamono nde epfwumu o, mu kuulu nde aabvurulu nde kunu. Mu olyele ti baghala wu ka aasi ndagha yi bakughu otsyiri nde lipfu o. **16** Mu obo, me otumu aantumu bakaha nde yini a nswa-nsua, ḡa mbihi oḡo, me nde aanyaá agye o nde.» **17** [Mu nswe kyiri, Pilate ákapaha mbwuru mutsyini mu boloko.] **18** Lo bo bwohono mu emvuḡunu bákehe bingubu ya bályele ti: «Dzwa baghala wu, ya paha bihi Barabase mu boloko.» **19** Barabase munde áli ásono boloko mu nkooro a baara ba bábihi litumu li bamfumu ba bvulu, ya mbwuru wu bádzwi. **20** Mu kuulu nde ákadzyi onyaa Yíisu agye, Pilate áfiribili ya bo, **21** lo bo bákehe bingubu ti: «Komo nde ḡa kuruwa! Komo nde ḡa kuruwa!» **22** Pilate áfirilyele bo mu sa li li tere ti: «Bu nde nsa ndagha yi mbi aasi? Me ka aamono epfwumu mu nde o ki ekughu osa ti badzwa nde. Mu obo, me otumu aantumu bakaha nde nswa-nsua, ḡa mbihi oḡo me nde aanyaá agye.» **23** Lo bo báfirikehe bingubu bi biluru, ya báluomo bakomo nde ḡa kuruwa. Pilate ágyughu bingubu bibo. **24** Mu obo, nde átsyiri ndagha bu bákadzyi bo. **25** Nde ápaha mbwuru wu báluomo bo mu boloko, munde wu áasomo boloko mu nkooro a baara ba bábihi litumu li bamfumu ba bvulu, ya ku bádzwi mbwuru, ya ágwi Yíisu ḡa myaa mi bo mu kuulu basa nde mi bákadzyi bo. **26** ḡa ókabiri bambumbulu Yíisu, bábwana a musi Sirene mutsyini, nkhwumu a nde áli Simō. Nde ku manseghe áfi. Bákwichi nde mu obiri kuruwa ḡa mbihi a Yíisu. **27** Mpwumu a baara yi nene ya bakaha bakanama Yíisu. Bakaha bákabeere bitulu ya bákagwobolo bilili mu nkooro a nde. **28** Yíisu ákaghala, ályele bo ti: «Batughu ba Yerusalemé, ka lilili mu me o, lo lilili mu beme ya mu baana ba be. **29** Mu kuulu, mu bitsughu bi bili mu ogya sa akala balyele ti: “Esee kundaa bitini, kundaa ba bagwene oburu, ya ba bagwene osomo busuomo!” **30** Mu matala mamó, baara sa babaana olyele kundaa minguo mi minene: “Libwa ḡa yulu a bihi!” Ya kundaa minguo mi misala ti: “Lifughu bihi!” **31** Mu kuulu, kala basi mandagha ma kundaa muti wu mubihi, ema akala baasa kundaa muti wu akee?» **32** Mu matala maana mamó bákabiri si bantwumu buolo mu oyidzwa bo emō ya Yíisu. **33** ḡa báto bo ḡa ebini ki bákata ti «Etyeghe kii mutswi», bákomo Yíisu ḡa kuruwa ya bantwumu buolo babo, mutsyini ku kwogho-a-kwogho, ya wu

muke ku engbambogho. **34** [Yiisu ályele bu: «Taara, sa bo kolokolo, mu kuulu bo ka bali mu ogyahaba mi bali mu okagyighili o.»] Bati empa kii nga a bwehe, ya bákaba biko bi nde. **35** Baara bátemene oŋo ya bákatala. Bamfumu bákasa Yiisu munkulu ya bályele ti: «Nde aabvwuhu baara babake, abvwuhu nyuru a ndeme, kala ti ngan̄ma nde li Kriste wu ósuolo Nzaami!» **36** Bambumbulu si bákasa nde munkulu. Báyasele ku bele a nde, bágwi nde bvini lili ŋeē **37** ya bályele ti: «Kala ti we li mukogho a ba-Dzwife, bvuwu nyuru a we weme!» **38** Ŋa yulu a kuruwa li nde básono bu: «Wu me Mukogho a ba-Dzwife.» **39** Mumō mu bantwumu ba bákomo ŋa kuruwa, átughu nde ya ályele bu: «We ka li Kriste o? Bvwuhu nyuru a weme, ya bvuwu bihi!» **40** Lo wu muke áfyee nde ya ályele ti: «We ka aakabara Nzaami o, we wu baatsyiri lipfu limō ti nde?» **41** Lipfu li lifaana mu bihi a we bansa buolo mu nkooro a bigyighili bi bihi a we bi bibi, lo nde ka aasi ndagha yi mbi o.» **42** Ŋa mbihi oŋo, nde ályele kundaa Yiisu ti: «Yiisu, tsimini me mu matala ma ayabvughuru we kunsu emfumu e we.» **43** Yiisu ágwi nde mvuru yi: «Mu engan̄ma me ndeyele we, lolo li we sa kala ya me ku paradise.» **44** Matala máto ku bele a mbihi a ntaā a minsene, ya mpyibi yíbwí ŋa yulu a nsie yohono tee mu matala mama matere ŋa mbihi a ntaā a minsene. **45** Tala lípyini, ya nkpaŋa a eko yi áli mu Nzo a nzaami yi nene yíkagha ŋa kara-a-kara. **46** Yiisu ákehe engubu ki enene: «Taara, me mbvurulu mufulu a me ŋa myaā mi we!» Nde abili obo, átaghaba. **47** Ŋa ómono mfumu a ekuru ki bambumbulu nkama mi míluru, nde ásyighi Nzaami ya ályele ti: «Ngan̄ma, mbwuru wu, mbwuru wu a bunsumu áakakala.» **48** Baara bwohonono ba bágyi mu mampwumu mu oyamono nde, bu bamono mandagha ma máluru, bási myaā ŋa yulu a mitswi ya bábvughuru. **49** Baara ba básoolo Yiisu ya bakaha ba bakanama nde obaana Ngalile, bátemene la la, ya bákatala mi míkáluru. **50** Óli a mbwuru mutsyini wu a ekwuru ki ba-Dzwife, nkwwu a nde Dzodzefe. Nde áli mbwuru wu mubwe ya wu bunsumu. **51** Nde ka áli kunsu mfwunu yi ósi babake mu odzwa Yiisu o. Nde áli musi Arimate, bvulu li ba-Dzwife, ya ákakebe Emfumu e Nzaami. **52** Nde ágyene kundaa Pilate ya áluomo nde ebyimi e Yiisu. **53** Bu amaha kye ŋa yulu a kuruwa, ádzin̄i kye kunsu eko kii lino ya átwulu kye kunsu mpyeme yi bátsimi kunsu

limeē, mpyeme yiili nkini ka bámaadzyighi mbwuru o. **54** Kye áli etsughu ki bákagyighili mi mitala etsughu kii Sabate, mu kuulu etsughu kii Sabate áli ayi mu obaana. **55** Bakaha ba bánama Yiisu obaana ku Ngalile, bágyene nzili mō ya Dzodzefe, bámono mpyeme ya bu bádzyighi ebyimi e Yiisu. **56** Ŋa mbihi oŋo, bo bábvughuru, bágyighili mananaase ya maala, ya bágwumu mu etsughu kii Sabate, bwunu a bu óli mikyene.

24 Ya mu etsughu kii nsomo mu liminjí, bakaha bágyene epala-epala ku mpyeme. Babiri mananaase ma bágyighili. **2** Bámono ti limeē li baakakyi mpyeme baakimini lo la ya mpyeme. **3** Ya bu basomo, bo ka bámono nyuru a Mfumu Yiisu o. **4** Ya mu kuulu bo ka básoolo bu baasa o mu mi mitala ndagha yi, mono, babaghala buolo báyamonoŋo ŋa nkulu a bo ya binkuru bi biikasehene. **5** Bo bábagha nzalamweē, bápfununu masu mu nsie, ya babaghala babo bályele bo ti: «Mu emakye be lili mu okasagha munde wu li mweē ŋa kara li baara ba bákpi? **6** Nde ka ali ŋa o, nde aasighili mu lipfu. Litsimi nsa mandagha nde ákalyele be, ŋaala nde nkini ali ku Ngalile. **7** Nde bu ákalyele ti: «Bafaana otyeghe Mwana a mbwuru ŋa myaā mi banga-a-masumu. Sa bakomo nde ŋa kuruwa, lo ŋa mbihi a bitsughu bitere, nde sa asighili mu lipfu.» **8** Bo bálibili mweē mandagha ma ókalyele bo Yiisu. **9** Bámara ŋa mpyeme ya bályelele mandagha mwohonono mamu kundaa bantumu kwumu ya mumō ya binduono bibike byehene. **10** Mu bo óli Mari musi Mangadala, Dzaane, Mari maama a Dzake, ya bakaha babake ba báli ya bo. Bo bályele kundaa bantumu, **11** lo bantumu bámono ti mandagha ma ólyele bo bakaha máli bigwobolo. Mu obo, bo ka bási mo kana o. **12** Lo Piere átemene ya ágyene mu ntyini ku mpyeme. Bu apfunjumu, nde ámono yini a bisili bi bili mu nsie. Ŋa mbihi oŋo, nde ábvughuru ku nzo a nde, ya ákinimi ku olagha mu mi miluru. **13** Ya mono, mu etsughu kyini ekye, binduono byele bíkagye ku bula butsyini bubu nkwwu a Emawuse. Etiiri ŋa kara a Yerusalem ya bula bubo ekughu okala ampe bakilometere kwumu ya mumō. **14** Bo bákabulubili mu mandagha mwohonono ma máluru. **15** Ŋaala bo mu okabulubili ya mu okabulutsoho, Yiisu áyasele ya ábvughu nzili ya bo. **16** Bo bámono nde, lo bo ka bákagyahaba ti munde áli nde o. **17** Yiisu áfwulu bo ti: «Be

nsa ndagha lili mu okabulutsoho mu nzili?» Bo bátemene ya bámono nyĩ yi alagha. **18** Mumō ŋa kara li bo, nkwwu a nde Keleopase ágwi nde mvuru yi: «Ŋa kara li baara bwohono ba bali ŋa Yerusaleme, yini a we dzimini mandagha ma maaluru bitsughu bi?» **19** Yiisu áfwulu bo ti: «Emakye?» Bo bábvuhulu nde ti: «Mandagha ma maabwi mu Yiisu musi Nadzarete. Nde ali mubighili mumō wu munene ŋa mihi mi Nzaami ya mimi baara, mu nkooro a bigyighili bi nde ya maluo ma nde. **20** Bakwuru ba bangaa ba Nzaami ya bakwuru ba bihi baasi nde muyala, baatsyiri nde lipfu, ya baakomo nde ŋa kurruwa. **21** Bihi ali liikakala a bitsimi ti me nde aakwulu Isarayeke kunsu bunkana. Lo, lolo bitsughu bitere biiluru, obaana bu ooluru mandagha mamu. **22** Mu enganyama, ndaama a bakaha ŋa kara li bihi baalyele bihi mandagha mama okinjimi. Bo baagyene ku mpyeme epala-epala, **23** lo ka baamono nyuru a nde o. Baayabvughuru ya baalyele bihi ti bo baamono bangye-yulu ba baalyele bo ti Yiisu li mweē. **24** Ndaama a baara ba baakakala ya bihi baagyene ku mpyeme, ya baamono mandagha mwohono ti bu oolyele bakaha, lo nde ka baamono nde o.» **25** Mu obo Yiisu ályele bo ti: «Be lili baara ba bagwene a mayele. Ya be lili a mikolo mimi maleme mu osa kana mu mandagha ma ólyele mibighili. **26** Lo, áli ofaana ti Kriste amono mpara mu mandagha mwohono mamu ya asomo mu nsia a nde?» **27** Ŋa mbihi oŋo, nde ábaala bo mandagha mwohono ma básono mu nde mu Mukaana a Nzaami, obaana mu mi ósono Moyidze, tee mu mi ósono mibighili. **28** Ŋa báto bo ŋa bele a Emawuse, Yiisu ási ti nde aaluru bula bu bo. **29** Lo bo bályele kundaa nde ti: «Agye o, kala ŋa ya bihi. Bwihi buugyili, ya mpyibi edzi-dzighi yibwi.» Mu obo, nde ásono mu nzo mu okala ya bo. **30** Ŋa bábwu bo nsini mu odza, nde ágwolo limpa, abvurulu matuono, átsyiri lo ya ágwu bo lo. **31** Mu matala maana mamu, mihi mi bo midzubulu, ya bo bábaghala ti munde áli Yiisu, lo nde ádzimini ŋa mihi mi bo. **32** Bo bábili bo-a-bo ti: «Ŋa aakabili nde ya bihi a we mu nzili ya osuo bihi a we bunu-a-bo Mukaana a Nzaami adzyi olyele, bihi ka ali liimono esee ki eluru mu mikolo o?» **33** Yini a mu mutala maana mamu, bo bátemene ya bábvughuru ku Yerusaleme. Bo báybaha bantumu kwumu ya mumō bábvuhunu ya binduono bibike, **34** bo bályele ti: «Nganyama! Mfumu aasighili mu

lipfu, nde aayamongo kundaa Simō.» **35** Bo bályele bo mi baabwana a bo mu nzili, ya bunu-a-bo baagyahaba Yiisu mu matala ma aakatsyiri nde limpa. **36** Ŋaala bo nkini mu okabili obo, Yiisu ndeme áyamongo ŋa kara li bo, ya ályele bo ti: «Edzuunu ekala ya be!» **37** Bo bábagha nzalamweē yi alagha, mu kuulu bátsimi ti munde mupfu baamono. **38** Lo Yiisu ályele bo ti: «Mu ema be lili a mikolo maā-maā, ya mu ema be lili a mikeme?» **39** Litala myaā ya myili mi me, me me mu enganyama. Libyeme me be, mu matala maala me nkini áli ya be: «Myehene mi básono mu mikyene mi Moyidze, mikaana mi mibighili, ya mu Bikwumu mifaana otswighi.» **40** Mu obo, Yiisu ágwi bo mayele mpaala babaghala Mukaana a Nzaami. **41** Nde ályele bo bu: «Mu obo, básono ti Kriste faana omono mpara ya sa asighili mu lipfu etsughu kii bitere. **42** Ya bafaana si otsala nsia a nde, obaana ŋa Yerusaleme tee ku mansie mwohono, mu kuulu baara bagyini mayele ya babagha kolokolo lili masumu mu nkwwu a nde. **43** Be lili bampughulu ba mandagha mwohono. **44** Me be aangweghe Mufulu a Ngili wu ósi Taara a me misiini. Lo be, limakala ŋa Yerusaleme ŋa, tee matala ma liilaha be lileene lili ku yulu.» **45** Ŋa mbihi oŋo, Yiisu ábiri bo tee ku bele a Betani. Bu aseene myaā ku yulu, nde áseme bo. **46** Mu matala ma ákaseme nde bo, nde ákaghaba ya bo ya bágyene a nde ku yulu. **47** Bo bu bamana obuono nde, bábvughuru ku Yerusaleme kunsu esee kii elagha. **48** Bitsughu byehene, bo bákasighi ya bákaseme Nzaami mu Nzo a nzaami yi nene.

Dzã

1 Ku ebaana óli Ndagha, Ndagha yíli ya Nzaami, Ndagha yíli Nzaami. **2** Nde áli ya Nzaami ku ebaana. **3** Nzaami ásalala Ndagha mu ogyighili bilogho byehene, ya ka oli ya elogho si emō o ki eli ki bágwene ogyighili mu ndagha oyo. **4** Mu Nde óli a bumweē, ya bumweē búli otsyeme o baara, **5** otsyeme ookasehene kunsu opyini, lo opyini ka ogyagha otsyeme o. **6** Áli oli a mbwuru wu ógweghe Nzaami, nkwumu a nde áli Dzã. **7** Nde ágyi ti anga mpughulu, mu osuo bumpughulu bu otsyeme, mu kuulu mu nde baara bwohono basa kana. **8** Ka óli nde áali otsyeme o, lo nde ágyi mu osuo bumpughulu bu otsyeme. **9** Ndagha yíli otsyeme kuu nganma, otsyeme ku ookatsehebe nswe mbwuru, yo yígyi ŋa nsie. **10** Ndagha yíli mu nsie, ya nsie bágýighili yo mu Nde, lo nsie ka yísoolo Nde o. **11** Nde ágyi kundaa baara ba ndeme, lo baara ba ndeme ka bágýagha Nde o. **12** Lo kundaa babo ba báagyagha nde, babo ba baakasa kana mu nkwumu a nde, nde aagwi muswa mu okala baana ba Nzaami. **13** Baara babo ka báburu bo bu baakaburu baara o, bwunu we mu waa lili baghala ya mukaha, lo mu waa li Nzaami. **14** Ya Ndagha yiikighiri mbwuru, nde aayakala ŋa kara li bihi, ya bihi liimono nsia a nde, nsia oyo yi ookagyagha Mwana wu a mbunu kundaa Taara. Nde álwulu mu bwehe ya mu enganjma. **15** Dzã li mu osuo bumpughulu mu nde ya aati mukwughu ti: «Wu me mbwuru wu áli andeyele me ti “Munde wu li mu ogya ku mbihi a me bvulu me mu mupfunu, mu kuulu nde áli nsomo me nkala.”» **16** Ya mu olwulu o nde mu bwehe, bihi bwohono líibagha liseme ŋa yulu a liseme. **17** Mu obo, Nzaami ágyi bihi Mukyene mu Moyidze, lo bwehe ya enganjma biigyí mu Yíisu-Kriste. **18** Mbwuru nkini ámaamono Nzaami o. Lo munde wu áasuo baara nde, me Nzaami Mwana wu a mbunu, wu li ŋa likara li Taara. **19** Bu me bumpughulu bu Dzã, mu matala ma ógweghe bamfumu ba ba-Dzwife bangaa ba Nzaami ya ba-Lebvite ba báli ku Yerusaleme mu oyifwulu Dzã ti: «We nande li?» **20** Ya Dzã ka ábihi ogwa mvuru o, nde ákihi ya ályele epankala ti: «Me, me ka ndi Kriste o.» **21** Bo báfirifwulu nde ti: «Lo we nande li? We me Eli?» Nde ábvuhulu ndiri: «Me ka ndi Eli o». Bo báfirifwulu nde ti: «Bunu, we me Mubighili?»

Nde ábvuhulu ti: «Pele.» **22** Mu obo, bo bályele kundaa nde ti: «Lo we nande li? We nki ndagha lyele mu weme? Mu kuulu bihi liyigwa mvuru kundaa babo ba baagweghe bihi.» **23** Nde ályele ti: «bwunu a bu ólyele mubighili Edzayi Me ndi likiyi li munde wu li mu okakehe engubu ku syehe, lisa nzili a Mfumu nsumu.» **24** Ŋa kara li baara babo ba bágweghe kundaa Dzã, óli ya ba-Faridzyē. **25** Bo báfwulu nde ti: «Kala ti we ka li Kriste o, we ka li Eli o, we ka li Mubighili o, lo mu emakye we li mu okaboghoru baara?» **26** Dzã ábvuhulu kundaa bo ti: «Me ndi mu okaboghoru baara mu madza. Lo ŋa kara li be oli a mbwuru wu ligwene osoolo be. **27** Nde li mu ogya ku mbihi a me ya me ka nkughu onyana misiyi mi bikoghoru bi nde o.» **28** Mandagha ma máluru ku Betani, ku ngulu a mwele wu a Dzurudē, ku ókaboghoru Dzã baara. **29** Ŋa mbihi a etsughu ekye, Dzã bu amono Yíisu wu áakagya kundaa nde, ályele ti: «Limono Mwana a endoomo e Nzaami wu aakamaha masumu ma nsie nsyini. **30** Me mu nde me áakandeyele ti: “Oli a mbwuru wu li mu ogya ku mbihi a me, wu bvulu me mu mupfunu, mu kuulu nde áli nsomo me nkala.” **31** Ya meme si ka áakansoolo nde o, lo kala ti me aangyi mu oboghoru baara mu madza, mu kuulu basoolo nde mu Isaraye.» **32** Dzã áasuo mpughulu bu: «Me aamono Mufulu mu efaana kii beeme, wu fi ku yulu, yakumunu ya yakala mu nde. **33** Ya me ka áakansoolo nde o, lo munde wu áagweghe me mu oboghoru baara mu madza, me nde áalyele me ti: “Munde wu akala aamono we Mufulu yakumunu ya yakala mu nde, me nde akala aaboghoru baara mu Mufulu a Ngili.” **34** Ya meme aamono ya ndi mu osuo bumpughulu ti mbwuru wu li Mwana a Nzaami.» **35** Ŋa mbihi a etsughu kii byele, Dzã áfirigya ŋa ebini ekye ya byele mu binduono bi nde. **36** Bu ámono Yíisu wu áakaluru, nde ályele ti: «Limono Mwana a endoomo e Nzaami.» **37** Binduono binsa byele bu bigyughu nde mu obili obo, bínama Yíisu. **38** Yíisu bu akaghala, ámono ti bo bákayanama nde ya nde áfwulu bo ti: «Be emakye lili mu okabulusagha?» Bo bábvuhulu ti: «“Rabi”, mbaala ti, “Muluo”, we kunu-ako aakakala?» **39** Nde ályele kundaa bo ti: «Ligya ya be sa limono.» Bo bágýene ya bámono ŋa ákakala nde ya bákala ya nde etsughu ekye. Áli oli ku bele a tala lili mana ŋa mbihi a embehe. **40** Mumō mu bo buolo ba bágýughu mandagha ma ókalyele Dzã ya ba bánama Yíisu áli Andere,

mbwee a Simō-Piere. **41** Nde átswama omono mwana a taara a nde Simō ya ályele nde ti: «Bihi liimono Mesi!» Mbaala ti, «Kriste». **42** Nde ábiri Simō kundaa Yíisu. Yíisu bu atala nde ályele ti: «We me Simō, mwana a Dzā, sa bakata we mu nkhwu yi a “Sefase”, mbaala ti “Piere”». **43** Ŋa mbihi a etsughu ekye, Yíisu ágwolo munkaana mu ogye ku etsulu e nsie kii Ngálie. Nde ábwana a Filipe ya ályele kundaa nde ti: «Nama me!» **44** Ankoho Filipe áli musi Betesayida, bvulu li Andere ya Piere. **45** Filipe ábwana a Natanayeleye ya ályele nde ti: «Bihi liimono munde wu básono mu Mukyene a Moyidze ya mu mikaana mi mibighili: Me Yíisu musi Nadzarete, mwana a Dzodzefe.» **46** Natanayeleye ályele kundaa nde ti: «Bunu, ku Nadzarete okughu opala elogho kii mubwughu?» Filipe ábvuhulu nde ti: «Gya ya mono.» **47** Yíisu bu amono Natanayeleye wu aakagya kundaa nde ályele mu nde ti: «Limono nkara a musi Isarayeleye, mu nde ka oli a mpya o.» **48** Natanayeleye áfwulu kundaa Yíisu ti: «We kunu-ako soolo me?» Ya Yíisu ábvuhulu nde ndiri: «Nsomo Filipe ata we mbili, ŋaala we nkini áli ŋa nsini a muti a finge, me áamono we.» **49** Natanayeleye áfirilyele ti: «Muluo, me we li Mwana a Nzaami, me we li mukogho a Isarayeleye.» **50** Yíisu ábvuhulu kundaa nde ti: «We busi kana mu nkooro a ku ndyele me we ti: “Me aamono we ŋa nsini a muti a finge?” We sa firimono mandagha ma mabvulu ma mu bunene!» **51** Yíisu áfirilyele kundaa bo ti: «Mu engarjma me ndyele kundaa be, be sa limono yulu bwaha ya bangye-yulu ba Nzaami mu okakumu ya okasughuru ŋa yulu a Mwana a mbwuru.»

2 Ya mu etsughu kii bitere, óli a mabala ku bvulu lili Kaana mu etsulu e nsie kii Ngálie. Ngughu a Yíisu áli oŋo. **2** Bágwi si Yíisu ya binduono bi nde mpighi a mabala mammo. **3** Mu matala ma ófi bviini, ngughu a Yíisu ályele kundaa nde ti: «Bo ka baafirisiyili a bviini ol!» **4** Lo Yíisu ábvuhulu nde ti: «Maama, we ya me ndagha ma? Matala ma me nkini maakughu o.» **5** Ngughu a nde ályele kundaa basala ti: «Ligyighili nswe ndagha yi aalyele nde be.» **6** Ŋa ebini ekye óli a mayughu masemene mama mu mameē ma ókasalala ba-Dzwife mu okatsehebe manyuru. Mu oluhu nswe yughu, báfaana olo mbyeē mpuomo bwunu we kwumu ya ywolo. **7** Yíisu ályele kundaa basala ti: «Liluhu mayughu

ma mu madza». Ya bo báluhu mayughu tee mu mibiili. **8** Yíisu ályele kundaa bo ti: «Mu matala ma, liloŋono ya libiri mo kundaa mfumu a kyiri.» Bo bábiri nde mo. **9** Mfumu a kyiri ályini madza ma mákighiri bviini. Nde ka ásoolo ku máfi mo o, lo basala ba báloŋono madza áli basoolo. Mfumu a kyiri áti baghala wu áakakie mbili **10** ya ályele kundaa nde ti: «Nswē mbwuru aatswama okataba baara bviini li libwe, ya baara bamana okolo mala, ŋa nseele nde aakapaha bviini liili ka lili nkara a li libwe o. Lo we, we aabunu bviini li libwe tee sonali!» **11** Obo me bu óbaana Yíisu osa bilyimi bii okijimi, mu elyimi ki ási nde ku Kaana lili Ngálie. Nde ásuu nsia a nde, ya binduono bi nde bísi kana mu nde. **12** Ŋa mbihi oŋo, Yíisu ákumunu ku bvulu lili Kaperenawume, emō ya ngughu a nde, bambwee ya binduono bi nde. Lo bo ka bási bitsughu bilagha oko o. **13** Kyiri kii Paake li ba-Dzwife bu ebehene, Yíisu ákumu ku Yerusaleme. **14** Mu mbala a nzo a Nzaami nde ámono baara ba bákatyeghe bangoomo, bindoomo ya mabeeme, ya babo ba baakasobo nzi ba bábwi nsini. **15** Yíisu bu abvughu misyi mi básyere, agyighili nswa-nsua, ábwi obyí baara bwohonu mu mbala a nzo a Nzaami, bindoomo ya bangoomo, ya átsala mipara mi ba baakasobo nzi ya ápfumunu batabele ba bo. **16** Ya nde ályele kundaa ba bákatyeghe mabeeme ti: «Limaha bilogho byehene bi ŋa ya linyaā osa nzo a Taara a me nzo a nkaala.» **17** Binduono bi nde bílibili mweē ti básono bu: «Dzyi li lilagha li ndi a me mu nzo a we sa lidzihi me ti anga mbaa.» **18** Lo ba-Dzwife báfwulu nde ti: «Nsa elyimi kii okijimi we aasa mu osuo bihi ti we li a muswa mu ogyighili mandagha ma?» **19** Yíisu ábvuhulu bo ti: «Litsala nzo a Nzaami yi, ya mu bitsughu bitere, me sa firintehebe yo.» **20** Ba-Dzwife bályele ti: «Nzo a Nzaami yi bátwu yo mu bamvulu makwumu-mana ya basemene, lo we mu bitsughu bitere, we sa firintehebe yo?» **21** Lo nzo a Nzaami yi ákalyele nde me nyuru a ndeme. **22** Mu obo, mu matala ma ósighili Yíisu mu lipfu, binduono bi nde bílibili mweē ti obo me bu ákabili nde. Ya bo bási kana mu Bisono bi Nzaami ya mu mandagha ma ólyele bo Yíisu. **23** Mu matala ma óli Yíisu ku kyiri kii Paake ku Yerusaleme, baara balagha bási kana mu nkhwu a nde ŋa bámono bo bilyimi bibi okijimi bi ákasa nde. **24** Lo Yíisu ka ákasa emiini mu bo o, mu kuulu nde ákasoolo bo

bwohono. **25** Ya nde ka áli a nzala a kuulu ti basuo nde bumpughulu mu mbwuru o. Yĩisu ndeme ákagyighili osoolo mi mili mu mukolo a mbwuru.

3 Ankoho ña kara li ba-Faridzyē, óli a mumō mu bamfumu ba ba-Dzwife, nkwumu a nde Nikodeme. **2** Mu mpyibi, nde áyamonu Yĩisu ya ályele nde ti: «Muluo, bihi lisoolo ti we li muluo mumō wu aafi kundaá Nzaami, mu kuulu ka oli a mbwuru wu kughu osa bilyimi bibi okĩjimi bi li mu okasa we, kala ti Nzaami ka li ya nde o.» **3** Yĩisu ábvuhulu kundaá nde ti: «Mu engañma, me ndyele we yo: Mbwuru si mumō ka kughu omonu Emfumu e Nzaami o, kala ti ka bafiriburu nde o.» **4** Nikodeme áfwulu nde ti: «Bunu-abo bakughu oburu mbwuru wuulu ayi ermini? Nde kughu ofirisomo munsu mweē a ngughu a nde ya bafiriburu nde?» **5** Yĩisu ábvuhulu nde ti: «Mu engañma, me ndyele we yo: Mbwuru si mumō ka kughu osomo mu Emfumu e Nzaami o, kala ti ka baburu nde mu madza ya mu Mufulu o. **6** Wu báburu mu musunu li musunu, ya wu báburu mu Mufulu li mufulu. **7** Ka kĩjimi o kala me aandyele we ti: “Bafaana ofiriburu we”. **8** Lipwubu liikafulu ku lidzyi lo, ya we aakagyughu likyi li lo, lo we ka akasoolo o nki nkoló lo liikafa ya kunu-ako lo liikagye. Oboho si oli kundaá nswe munde wu baaburu mu Mufulu.» **9** Nikodeme áfwulu nde ti: «Ndagha oyo bunu-abo yi kughu okala?» **10** Yĩisu ábvuhulu nde ti: «We li muluo mumō mu Isarayeleya ya we ka soolo mandagha mamu o! **11** Mu engañma me ndyele kundaá we ti: Bihi-a-be liikabili mu mandagha ma lisoolo, ya lili bumpughulu mu mandagha ma liikamono. Lo be ka lili mu okasa kana mu bumpughulu ba lili mu okasuo bihi o. **12** Kala ti be ka lisi kana mu me o ña aandyele me be mandagha mama ña nsie, bunu-abo be liisa kana mu me kala ti me ndyele be mandagha mama ku yulu? **13** Mu kuulu mbwuru si mumō nkini ámaakumu ku yulu o, kala ti ka oli yini a munde wu áafi ku yulu o, Mwana a mbwuru. **14** Ya bwunu a bu óseene Moyidze ntaala mu yulu ku syehe, oboho si bafaana oseene Mwana a mbwuru, **15** mpaala nswe mbwuru wu aasa kana, abagha laama lili mibvu ya mibvu mu nde. (aiōnios g166) **16** Mu obo, Nzaami bu ábvulu dzyi nsie, ágwi Mwana a nde wu a mbunu, mpaala nswe mbwuru wu aasa kana mu nde anyaa okpa,

lo abagha laama lili mibvu ya mibvu. (aiōnios g166) **17** Mu kuulu Nzaami ka ágweghe Mwana a nde ña nsie mu oyalamana nsie o, lo mu kuulu nsie yibvwughu mu nde. **18** Mbwuru wu aasa kana mu nde, ka balamana nde o. Lo munde wu aagwene osa kana, ayi bamaalamana nde, mu kuulu nde ka aasi kana mu nkwumu a Mwana a Nzaami wu a mbunu o. **19** Mumfwunu me ngu wu: Otsyeme oogyi mu nsie, lo baara baabvulu odzyi opyini ña ebini kii otsyeme, mu kuulu bigyighili bi bo bili bi bibi. **20** Mu kuulu, mbwuru wu aakasa bubi aakabele otsyeme ya ka kughu ogya ku otsyeme o, nde li a nzalamweē ti mara bigyighili bi nde bi bibi bimoñono. **21** Lo mbwuru wu aakasalala engañma aakagya ku otsyeme, mpaala bigyighili bi nde bimoñono ti bye bili nsumu ya waa li Nzaami.» **22** Ña mbihi oño, Yĩisu ágyene ya binduono bi nde ku etsulu e nsie kii Yude. Nde ákala mana bitsughu oko ya bo, ya nde ákaboghoru baara. **23** Dzā si ákaboghoru baara ña bula bubu Enone, la we ya bula bubu Salime, mu kuulu oño óli a madza malagha. Baara áakagya kundaá nde ya nde ákaboghoru bo. **24** Mu matala mamu, nkini áli bálo Dzā mu boloko o. **25** Lo mumbañana ábwi ña kara li binduono bi Dzā ya mu-Dzwife mumō mu nkooro a muswagha wu a otsehebe manyuru. **26** Bo báyamonu Dzā ya bályele nde ti: «Muluo, mbwuru munde wu aali ya we ku ngulu a mwele wu a Dzurdē, munde wuulu we aasuo bumpughulu mu nde, mono, nde li mu okaboghoru, ya baara bwohono bali mu okagye kundaá nde.» **27** Dzā ábvuhulu kundaá bo ti: «Mbwuru okagyagha yini a ki ookagwa nde yulu. **28** Be, beme lili bumpughulu ba me ña ándyele me ti: “Me ka ndi Kriste o, lo me ndi munde wu ágweghe ku nkulu a nde.” **29** Nga-a-mukala me mulumu, lo ndughu a mulumu li ña bele a nde. Ndughu a mulumu aakagyughu nde ya likyi li nde liikaluhu nde mu esee. Ekye ngu esee e me, kye eli kii mukughu. **30** Nde faana okulu mu mupfunu, ya me mfaana okughulu.» **31** «Wu fi ku yulu li ña yulu a byehene. Wu a ña nsie li wu a nsie ya likyi li nde lili lili nsie. Wu fi ku mayulu li ña yulu a byehene, **32** ya li mpughulu mu mi aamono ya mu mi aagyughu nde. Lo mbwuru ka li mu okihi bumpughulu bu nde o. **33** Munde wu aakihi bumpughulu bu nde li mu osuo ti mi oolyele Nzaami mili mimi ngañma. **34** Mbwuru wu ógweghe Nzaami ályele mandagha ma Nzaami, mu kuulu Nzaami

ágwi nde Mufulu a nde mukughu. **35** Taara dzyi Mwana ya nde aagwi bilogho byehene ŋa myaā mi nde. **36** Munde wu aasa kana mu Mwana li a laama lili mibvu ya mibvu. Munde wu aagwene osa kana mu Mwana ka abagha laama o, lo nkehe a Nzaami sa yikakala ŋa yulu a nde.» (aiōnios g166)

4 Yiisu bu ásoolo ti ba-Faridzyē bágyughu ti nde ábvulukabagha ya okaboghoru binduono ku oluru Dzā, **2** (Ngu okala ti Yiisu ndeme ka ákaboghoru o, lo binduono bi nde bfiikaboghoru), **3** nde ámara ku etsulu e nsie kii Yude ya ábvughuru ku Ngalele. **4** Mu obo, nde áli faana obululuru mu nsie yi a Samari. **5** Me obo nde áyato ŋa Sisya, bvulu limō li lili mu etsulu e nsie kii Samari, ŋa bele a nseghe yi ógwi Dzakobe kundaa mwana a nde Dzodze. **6** Oŋo óli a dzunu li madza li Dzakobe. Yiisu bu akolo mu dzwe, ákarabwa nsini ŋa mukogho a dzunu li madza. Áli oli ku bele a tala lili embehe. **7** Mukaha mutsyini wu a musi Samari áyatyeghe madza. Yiisu ályele kundaa nde ti: «Gwa me madza mama oŋma.» **8** Binduono bi nde bígyene ku bvulu mu oyiswumu bi-odza. **9** Lo mukaha wu a musi Samari ályele nde ti: «Bunu-abo we wu li mu-Dzwife kughu oluomo madza mama oŋma kundaa me wu ndi musi Samari?» Mu kuulu, ba-Dzwife bákabihi okala emō ya basi Samari. **10** Yiisu ábvuhulu kundaa nde ti: «Kala ti we áli soolo ekaba e Nzaami, ya nande li mbwuru wu aalyele kundaa we ndiri: “Gwa me madza mama oŋma”, me we nkini kaaluomo nde mo, ya nde kaagwa we madza mama bumweē.» **11** Mukaha ályele ti: «Mfumu, we ka li a elogho o ki ogwolo madza, ya dzunu li madza lili lila. Kunu we aabagha madza mamō mama bumweē? **12** Bunu! We bvulu taara a bihi, mukwuru a bihi Dzakobe? Me nde áasihi bihi dzunu li madza li, ya ndeme si áŋmi madza ma lo, bumō si kundaa baana ya bibuolo bi nde.» **13** Yiisu ábvuhulu kundaa nde ti: «Nswē munde wu aarjma madza ma sa afiribagha nyoro. **14** Lo munde wu akala aarjma madza ma akala aangwa me nde, nde ka afiribagha nyoro o. Ya madza ma akala aangwa me nde sa makala mu nde mukele wu aakapaha madza mama laama lili mibvu ya mibvu.» (aiōn g165, aiōnios g166) **15** Mukaha ályele kundaa nde ti: «Mfumu, gwa me madza mamō mpaala me nyaā ofiribagha nyoro, ya me nyaā ofirikayatyghe madza ŋa.» **16** Yiisu ályele

kundaa nde ti: «Gye, yita mulumu a we mbili ya yabvughuru ŋa.» **17** Mukaha ábvuhulu nde ti: «Me ka ndi a mulumu o.» Yiisu ályele kundaa nde ndiri: «We li a bwuu bu lyele ti: “Me ka ndi a mulumu o”. **18** Mu kuulu we aali a babaghala bataana ya munde wu li ya we mu matala ma ka li mulumu a we o. Mu obo we lyele ngarjma.» **19** Mukaha ályele kundaa nde ti: «Mfumu, me mono ti we, we li mubighili. **20** Bataara ba bihi bákasamana ku yulu a munguo wu, ya be liikalyele ti ebini ki efaana mu okasamana eli ku Yerusaleme.» **21** Yiisu ályele kundaa nde ti: «Mukaha, sa kana mu ma aandyele me, matala mali mu ogya maala be akala ka liisamana Taara ku yulu a munguo wu o, ngu okala ku Yerusaleme. **22** Be, basi Samari liikasamana wu ligwene osoolo. Bihi, ba-Dzwife liikasamana wu lisoolo bihi, mu kuulu obvwughu ógyi mu ba-Dzwife. **23** Lo matala mali mu ogya, ya mu bu mo mamaato, maala ba baakasamana baba ngarjma sa basamana Taara mu mufulu ya mu engarjma. Baara ba baakasamana obo, me ba ookasagha Taara. **24** Nzaami li Mufulu, mu obo, ba baakasamana nde bafaana okasamana mu mufulu ya mu engarjma.» **25** Mukaha ályele kundaa nde ti: «Me nsoolo ti Mesi sa agya, munde wu baakata ti Kriste. ŋa akala aagya nde, nde sa alyele bihi mandagha mwohonon.» **26** Yiisu ályele kundaa nde ti: «Me ndi Mesi, me wu li mu okabili ya we.» **27** Mu matala mamō binduono bi nde býato ya bye bfiinjimi mu omono Yiisu mu okabili ya mukaha. Lo mbwuru si mumō ka áfwulu nde o ti: «Emakye we li mu okasagha?» Bwunu we «Nsa ndagha we li mu okabili ya nde?» **28** Oŋo mukaha ábulusihi yughu li nde, ágyene ku bvulu ya ályele kundaa baara ti: **29** «Ligya limono mbwuru wu aalyele me mandagha mwohonon ma aansī me. Nde ka li Kriste o?» **30** Bo bápala mu bvulu ya bágyi kundaa nde. **31** Mu matala mamō, binduono bífabuono nde ya bífalyele ti: «Muluo, dza!» **32** Lo nde ályele bo ti: «Me sa ndza bi-odza biili be ka ligyahaba bye o.» **33** Mu obo, binduono bífwi ofuhunu bye-a-bye ti: «Bunu, mbwuru aayabiri nde bi-odza?» **34** Yiisu ályele kundaa bo ti: «Bi-odza bi me, ngu osa waa li munde wu aagweghe me ya omana esala e nde. **35** Bunu, be beme ka liikalyele o ti: “Bangoono bana basyili ya matala mama otolo bimburu sa magya”? Lo me bu ndyele be ti: Liseene mihi ya litala manseghe: bimburu biigyele ya biifaana

mu otolo! **36** Mbawuru wu aakatolo bimburu maabagha mufuru a nde, ya li mu okakwu bimburu mu laama lili mibvu ya mibvu, mpaala munde wu aakunu ya munde wu aatolo bakala emō mu esee. (aiōnios g166) **37** Mu kuulu nkumu yi aakalyele ti: “Mumō wu aakunu, wu muke wu aatolo” yili yi a nganma. **38** Me aangweghe be mu oyitolo bimburu biili be ka liimono mpara mu osala bye o. Bakimi báasala bye, ya be liigy mu otolo bimburu bi esala e bo.» **39** Basi Samari balagha baba bvulu lilo bási kana mu Yiiisu mu nkooro a bumpughulu bu mukaha wu ályele ti: «Nde aalyele me mandagha mwohonono ma aansie me.» **40** Ya basi Samari bu bayato ŋa áli nde, bo báluomo nde mu okala ya bo. Ya nde áluhu bitsughu bye ya bo. **41** Baara balagha báfirisa kana mu nkooro mandagha ma ákalyele ndeme. **42** Ya bo bályele kundaa mukaha ti: «Ka oli yini a mu nkooro a mi aalyele we bihi, bihi liisi kana o, mu kuulu bihi liigyughu nde bihi bameme ya bihi lisoolo ti, nganma wu me Mubvwuhu a nsie.» **43** Ŋa mbihi a bitsughu bye bibye, Yiiisu ámara ŋa bvulu lilo, ya ágyene ku Ngalile. **44** Mu kuulu ndeme áli ályele ti ka baakagwa mubighili budziri mu nsie a ndeme o. **45** Lo nde bu ayato ku Ngalile, basi Ngalile bábwana a nde bubwe, mu kuulu boho si báli ku Yerusaleme ku kyiri kii Paake, ya bomo si áli bámono mandagha ma ágyighili nde. **46** Mu obo, Yiiisu áfiriyabvughuru ku Kaana mu etsulu e nsie kii Ngalile ku ákirili nde madza bviini. Óli ya mfumu a bambumbulu ba mukogho mumō wu áali a mwana wu baghala wu mubyele ku Kaperenawume. **47** Nde bu agyughu ti Yiiisu aafi ku etsulu e nsie kii Yude mu ogye ku etsulu e nsie kii Ngalile, nde áyimono Yiiisu ya ábuono nde akumunu mpaala adzuhu mwana a nde wu baghala wu áakadzwana ya lipfu. **48** Mu obo Yiiisu ályele kundaa nde ti: «Kala ti be ka limono bilyimi bibi okinjimi ya bimaā o, si okala a bunu be ka lisa kana o!» **49** Mfumu a bambumbulu ályele kundaa nde ti: «Mfumu, kumunu nsomo mwana a me akpa!» **50** Yiiisu ályele kundaa nde ti: «Gye, mwana a we li mweē.» Baghala munde ási kana mu ndagha yi ólyele nde Yiiisu ya ágyene. **51** Nde áli nkini mu okakumunu ŋa óyabwana a nde basala ba nde ba bályele kundaa nde ti: «Mwana a we wu baghala li mweē!» **52** Nde áfwulu bo ti: «Mu nsa matala mwana aamono bubwe?» Bo bábvuhulu ti: «Matsighi, tala limō ŋa mbihi a

embehe, mukaama aafi nde.» **53** Oŋo taara a mwana ábaghala ti me mu tala lyini lilo Yiiisu ályele kundaa nde ti: «Mwana a we wu baghala li mweē!» Obaana oŋo, nde ya baara ba nzo a nde bwohonono bási kana. **54** Ekye éli elyimi kii okinjimi kii bye ki ósi Yiiisu ku Ngalile, mu matala ma áfi nde ku Yude.

5 Ŋa mbihi oŋo, mu matala mama kyiri emō kii ba-Dzwife, Yiiisu ákumu ku Yerusaleme. **2** Ankoho, ku Yerusaleme ŋa bele a muŋma a nzo a Bindoomo, óli a edzyi ki madza ki baakata mu eebele ti Betesata. Kye éli a biluru bitaana. **3** Ku nsie a biluru bibye, óli a mpwumu a babyele yi agyogomo: Binkpa-mihi, banga a mitele myele, ba onejene binama. **4** [Mu kuulu mu matala ma make, ngye-yulu a Mfumu ákakumunu munsá edzyi ya ákanyihí madza. Ŋa okanyihí madza, mbwuru wu a nsomo wu áakabwa munsá edzyi, ákadzughu mu ebye nswe ebye.] **5** Oŋo, óli a mbwuru mumō wu áasi bamvulu makwumumaterere ya mpuomo kunsá obyele. **6** Yiiisu ámono nde ágyogomo ya bu asoolo ti nde ási matala malagha kunsá obyele, áfwulu nde ti: «We dzyi odzughu?» **7** Mubyele ábvuhulu kundaa nde ti: «Mfumu, me ka ndi a mbwuru wu aalo me mu edzyi o mu matala ma ookanyihí madza. Ŋa aakansagha me osughuru omo, agwolo mbwuru mukimi aakatswama osughuru ŋa nkulu a me.» **8** Yiiisu ályele kundaa nde ti: «Temene, gwolo laba li we ya gye.» **9** Ŋaana oŋo baghala munde ádzughu, ágwolo laba li nde ya ábwi odzyara. Ankoho etsughu ekye éli etsughu kii Sabate. **10** Mu obo, bakwuru ba ba-Dzwife bályele kundaa mbwuru munde wu áadzughu ti: «Lolo etsughu kii Sabate, we ka li a muswa mu obiri laba li we o.» **11** Nde ábvuhulu kundaa bo ti: «Mbwuru munde wu aadzuhu me, me nde aalyele me ti: “Gwolo laba li we ya dzyara.”» **12** Bo báfwulu nde ti: «Baghala wu aalyele we ti: “Gwolo laba li we ya dzyara” nande ali?» **13** Lo munde wu áadzughu ka ákasoolo nande baghala munde áli o, mu kuulu Yiiisu ásono kunsá mpwumu a baara yi áali ŋa ebini ekye. **14** Ŋa nseele, Yiiisu ámono mbwuru munde munsá nzo a Nzaami, ályele kundaa nde ti: «Mono we ayi nsiili! Ka firisa masumu o, mara ndagha yibvulu bubi yibwi mu we!» **15** Mbawuru munde áyilyele kundaa bakwuru ba ba-Dzwife ti áli Yiiisu áadzuhu nde. **16** Mu obo, ba-Dzwife bábaana oswehē Yiiisu mu kuulu nde ágyighili ndagha oyo mu etsughu

kii Sabate. 17 Lo Yiiisu ábvuhulu kundaa bo ti: «Tee sonali Taara a me li mu okasala, ya mehe si ndi mu okasala.» 18 Mu nkooro a ndagha oyo, bakwuru ba ba-Dzwife bákabvulu osagha nde odzwa, mu kuulu nde ka yini a bungili bu etsughu kii Sabate ákatsumunu o. Lo nde ákalyele si ti Nzaami li Taara a ndeme. Mbimbili oyo yíkasuo ti nde li nsihi ya Nzaami. 19 Yiiisu ábvuhulu kundaa bo ti: «Mu enganjma me ndyele be ti, Mwana ka kughu ogyighili ndagha si mō mu endeme o, lo nde akagyili yini a mandagha ma aakamono nde Taara mu ogyighili. Ma ookagyighili Taara, me maana mamō si Mwana aakagyighili. 20 Buulu Taara dzyi Mwana ngu aakasuo nde mandagha mwohonon ma aakasa nde. Nde sa afirisuo nde bigyighili bi bibvulu bunene, mpaala be likinjimi. 21 Bwunu a bu ookasiili Taara baara ba bákpi ya aakagwa bo bumweē, bwunu obo si Mwana aakagwa bumweē kundaa munde wu adzyi nde. 22 Ya Taara ka aakalamana mbwuru o, lo nde aagwi litumu lwohonon lili okalamana kundaa Mwana, 23 mpaala baara bwohonon bagwa Mwana budziri ti bwunu a bu baakagwa Taara budziri. Mbwuru wu aagwene ogwa Mwana budziri, nde ka li mu ogwa si Taara wu aagweghe nde budziri o.» 24 «Mu enganjma, me ndyele be ti: Mbwuru wu gyughu ndagha a me ya si kana mu munde wu aagweghe me, nde li a laama lili mibvu ya mibvu. Nde ka agya ku mumfwunu o, lo nde aamara ku lipfu ya aaluru ku bumweē. (aiōnios g166) 25 Mu enganjma, me ndyele be ti: Lo matala mali mu ogya, ya mu bu mo mamaato, maala ba bákpi sa bagyughu likyi li Mwana a Nzaami ya babo ba akala baagyughu lo sa bakala baba mweē. 26 Mu kuulu, bwunu a bu oli a Taara bumweē mu ndeme, oboho si bu aagwi nde Mwana mu okala a bumweē mu ndeme. 27 Ya nde aagwi nde litumu lili olamana mu kuulu nde li Mwana a mbwuru. 28 Nyaā ka likinjimi o mu mandagha mwohonon ma! Matala mali mu ogya maala baara bwohonon ba bali munsā mampyeme sa bagyughu likyi li nde, 29 ya bo sa bapala. Babo ba bási mandagha ma mabwe sa bapala ya basighili mu lipfu mu okala baba mweē. Babo ba bási mandagha ma mabi, sa basighili mu lipfu mu osomo mu mumfwunu. 30 Me, me ka nkughu ogyighili ndagha mu ememe o. Me aakandamana bwunu a bu oli mandagha ma aakangyughu me, ya olamana o me oli nsumu, mu kuulu me ka aakansagha waa li

meme o, lo waa li munde wu aagweghe me.» 31 «Kala ti me, me ndi mpughulu mu meme, bumpughulu bu me ka buli bubu nganjma o. 32 Lo mbwuru mukimi aakala mpughulu mu me, ya me nsoolo ti bumpughulu bu nde mu me buli bubu nganjma. 33 Me be liigweghe baara kundaa Dzā, ya nde li mu osuo bumpughulu bu enganjma. 34 Mu me, me ka ndi a nzala a bumpughulu bu mbwuru o, lo me mbili obo mpaala be libvwughu. 35 Dzā áli mwindi wu bānahaba ya wu li mu okasehene. Ya be liidzyi okala mu esee kunsā otsyeme o nde mu mana matala.» 36 «Lo me ndi a bumpughulu bu bubvulu bunene ya bubu Dzā: Ngu mandagha ma aakangyighili me, ma ootumu me Taara ogyighili. Mandagha ma aakangyighili me, mali bumpughulu bu me ti Taara aagweghe me. 37 Ya Taara wu aagweghe me ndeme si aasuo bumpughulu mu me. Lo be nkini límaagyughu likyi li nde o, nkini límaamono edzili e nde si o. 38 Ya ndagha a nde ka yili mu be o, mu kuulu be ka liisi kana mu munde wu aagweghe nde o. 39 Be liikakeene Bisono mu kuulu be liikatsimi obagha laama lili mibvu ya mibvu mu bye. Ankoho, me bisono bibye byeme biikasuo bumpughulu mu me. (aiōnios g166) 40 Ya be ka lidzyi ogya kundaa me mu obagha laama o.» 41 «Me ka aakansagha nsia yi aafa kundaa baara o. 42 Lo me nsoolo be, be ka lili a dzyi li Nzaami mu be o. 43 Me aangyi mu nkwwu a Taara a me, ya be ka lili mu ogyagha me o. Lo kala ti mbwuru mukimi gyi mu nkwwu a ndeme, munde be sa ligyagha nde! 44 Bunu-abo be likughu osa kana, be ba liikagwa be a be nsia, ya ba liikuono okasagha nsia yi aakafa yini a kundaa Nzaami? 45 Ka litsimi o ti me akala aanfwunu be ŋa nkulu a Taara. Ngu Moyidze akala aafwunu be, mu kuulu mu nde be liisi emiini. 46 Kala ti be liikasa kana mu Moyidze, likaasa kana mu mehe si, mu kuulu nde ásonon mu mi mitala me. 47 Lo kala ti be ka lisi kana mu bisonon bi nde o, bunu-a-bo be liisa kana mu mi aandyele me?»

6 Ŋa mbihi oyo, Yiiisu ágyene ku ngulu yinke yi a mubu wu a Ngaliile, wu baakata si mubu wu a Tiberyade. 2 Mpwumu a baara yi nene yíkanama nde mu kuulu baara bákamono bilyimi bibi okinjimi bi ákasa nde mu babyele. 3 Yiiisu ákumu ku yulu a munguo ya ábwi nsini oyo ya binduono bi nde. 4 Paake, kyiri ki ba-Dzwife áli ébehene. 5 Yiiisu bu asiili busu, ámonon

mpwumu a baara yi nene yi ákagya kundaa nde. Nde áfwulu kundaa Filipe ti: «Kunu-ako liiswumu mampa mpaala baara ba badza?» 6 Nde ályele obo mu otsihi nde, mu kuulu nde ndeme áli asoolo ma ákaagyighili. 7 Filipe ábvuhulu kundaa nde ti: «Ngu okala ti liswumu mampa mama nkama ywolo yi a badenye, mu kuulu nswe mbwuru abagha mana etsulu ki limpa, ka makughu o.» 8 Andere, mwana a taara a Simō-Piere, mumō mu binduono bi nde, ályele nde ti: 9 «Oli a mumpala ŋa wu li a mampa mataana mama mu mburu a oredze ya binswi-nswi byele, lo bibye sa bikughu mu mpwumu a baara yi?» 10 Ŋa ebini ekye óli a nsele alagha yi a mǎŋeē. Yiiisu ályele ti: «Libwihi bo mansini.» Bo bábwi mansini. Mutala a babaghala ba báli oŋo áli ku bele a mapfwunu mataana. 11 Yiiisu ágwolo mampa, bu abvurulu matuono kundaa Nzaami, ákaba mo kundaa baara ba báli oŋo. Nde ási bwunu obo si mu banswi, ya bágwi bo bye ti bwunu a bu óli nzala a nswe mbwuru. 12 Bu bagyughuru, Yiiisu ályele kundaa binduono bi nde ti: «Litolo bitsulu bi biisyili mpaala binyaá odzimini.» 13 Bo bábvughu bye ya báluhu bitubu kwumu ya byele mu bitsulu bi bísyili mu mampa mataana mama mu oredze ma óli baara. 14 Baara bu bamono elyimi kii okinjimi ki ósi Yiiisu, bo bályele ti: «Ngaŋma, mbwuru wu li mubighili wu faana ogya ŋa nsie.» 15 Lo Yiiisu, bu asoolo ti baara bákaayagwolo nde mu mpini mu obaha nde mukogho, nde ákaghala ya bo ya áfirigye ku munguo ngasighi. 16 Nkonkolo bu yito, binduono bi Yiiisu bikumunu tee ku mukogho a mubu. 17 Bo básomo mu bwara bu bunene ya bábwi ogye ku Kaperenawume, ku ngulu a mubu yinke. Mpyibi áli yimaabwa, ya Yiiisu nkini áli ka ayato ŋa báli bo o. 18 Efulu kii mpini ékafulu ya madza ma mubu makateeme ku olagha. 19 Bo bu badzughu bwara mu etiiri ki bakilometere bataana bwunu we basemene, bo bámono Yiiisu mu okayadzyara ŋa yulu a madza ma mubu ya ákayabehene ya bwara. Bo bábagha nzalamweē. 20 Lo Yiiisu ályele bo ti: «Wu me, ka likala a nzalamweē o!» 21 Bo bákasagha osohobo nde mu bwara, lo ŋaana-oŋo bwara búkulu mu nsie ŋa ebini ki bákagye bo. 22 Ŋa mbihi a etsughu ekye, mpwumu a baara yi áasyili ku ngulu a mubu yinke, yíbaghala ti oŋo óli a yini a bwara bumō, ya Yiiisu ka áli ágyene mu bwara ya binduono bi nde o. Bo áli bágylene bo ngasighi. 23 Mabwara ma make ma máfi ku bvulu lili Tiberyade máyato ŋa bele a ebini ekye ŋa báli bo mampa ŋa mbihi a ŋa óbvurulu Mfumu matuono. 24 Mpwumu a baara bu yimono ti, ngu okala Yiiisu, ngu okala binduono bi nde, ka báli oŋo o, baara básomo mu mabwara ya bágylene ku Kaperenawume mu okabulusagha Yiiisu. 25 Baara bu bamono Yiiisu ku ngulu yinke yi a mubu, bo báfswulu nde ti: «Muluo, we munsá matala aayato kunu?» 26 Yiiisu ábvuhulu ti: «Mu engaŋma me ndyele be, ka mu nkooro a bilyimi bibi okinjimi bi liimono be lili mu okasagha me o, lo mu nkooro a bu liili be mampa ya liigyughuru. 27 Ka likasala mu obagha bi-odza biili sa bipfighili o, lo liikasala mu bi-odza biili sa bilaama mu mibvu ya mibvu. Bi-odza bibye me bi akala oogwa be Mwana a mbwuru, buulu me nde, Taara wu li Nzaami, ágwi enyeme kii litumu.» (aiōnios g166) 28 Mu obo, bo báfswulu nde ti: «Emakye bihi lifaana osa mu okuhu bigyighili bi Nzaami?» 29 Yiiisu ábvuhulu bo ti: «Bigyighili bi Nzaami me mu osa kana mu munde wu aagweghe ndeme.» 30 Mu obo bo báfswulu kundaa nde ti: «Bu we, nki elyimi kii okinjimi we aasa mpaala bihi limono ya lisa kana mu we? Nsa bigyighili we aasa? 31 Ku syehe, bataara ba bihi áli báli maane ti bu básono: Nde ágwi bo limpa li lífi ku yulu mu odza.» 32 Lo Yiiisu ályele bo ti: «Mu engaŋma, me ndyele be, ka oli Moyidze áagwi be limpa lili ku yulu o, lo me Taara a me gwi be nkara limpa lili yulu. 33 Mu kuulu limpa li Nzaami, lili lilo li lífi ku yulu liiyakumunu ŋa nsie ya liikagwa nsie bumweē.» 34 Bo bályele nde ndiri: «Mfumu, aakagwa bihi limpa lilo matala mwohonon!» 35 Yiiisu ályele bo ti: «Ngu me ndi limpa lili bumweē. Munde wu aagya kundaa me ka afirifuru nzala o, munde wu aasa kana mu me, ka afiribagha nyoro a madza o.» 36 «Lo me aandyele be ti: Be liimono me, lo be ka liisi kana o. 37 Bo bwohonon ba oogwa me Taara, bo sa bagya kundaa me, ya wu aagya kundaa me, me akala ka ambyi nde agye ku mbala o. 38 Mu kuulu me aamfi ku yulu aayankumunu ŋa nsie ka mu osa waa li meme o, lo mu osa waa li munde wu aagweghe me. 39 Waa li munde wu aagweghe me lili ti me nyaá odzihibi mbwuru mumō mu babo ba ágwi nde me, lo me nsiili bo mu lipfu mu etsughu kii masini. 40 Waa li Taara a me ti nswe munde wu aamono Mwana ya si kana mu nde sa abagha laama lili mibvu ya mibvu. Ya me, me sa nsiili nde mu lipfu mu etsughu kii masini.» (aiōnios g166)

41 Ba-Dzwife bábaana onjũunu mu nkooro a nde buulu nde ályele ti: «Me ndi limpa li liifi ku yulu liiyakumunu ŋa nsie.» 42 Ya bo bákalyele ti: «Bunu, wu ka li Yĩisu mwana Dzodzeŋe o, wuulu bihi lisoolo taara ya ngughu a nde? Bunu nde akughu olyele mu matala ma ti: “Me aamfi ku yulu aayankumunu ŋa nsie?”» 43 Yĩisu ábvuhulu kundaa bo ti: «Linyaá miŋũunu ŋa kara li be! 44 Mbwuru ka kughu ogya kundaa me kala ti Taara wu aagweghe me ka ati nde mbili o, ya me, me sa nsiili nde mu lipfu mu etsughu kii masini. 45 Básono bu mu mikaana mi mibighili: Nzaami sa aluo bo bwohonon. Nswe munde wu aagyughu mi miifa kundaa Taara ya kihi maluo ma nde, nde gyi kundaa me. 46 Mu kuulu mbwuru nkini ka ámaamono Taara o, kala ti ka yini a munde wu aafi kundaa Nzaami o. Munde aamono Taara. 47 Mu engan̄ma me ndyele be, munde wu aasa kana li a laama lili mibvu ya mibvu. (aiōnios g166) 48 Me ndi limpa lili bumweē. 49 Ku syehe bataara ba be báli maane, ya bo bápki. 50 Li me limpa li liifi ku yulu liiyakumunu ŋa nsie, nswe mbwuru wu aadza lo ka akpa o. 51 Me me ndi limpa lili bumweē li liifi ku yulu liiyakumunu ŋa nsie. Wu aadza limpa li, sa akala mweē mu mibvu ya mibvu. Limpa li akala aangwa me, ngu nyuru a me yi akala aangwa me mpaala nsie yibagha laama.» (aiōn g165) 52 Mu obo ba-Dzwife bábaana obañana bo-a-bo ya bákalyele ti: «Bunu-abo nde akughu ogwa bihi nyuru a nde odza?» 53 Yĩisu ályele bo ti: «Mu engan̄ma, me ndyele be, kala be ka lili nyuru a Mwana a mbwuru o ya kala ti be ka liŋmi makili ma nde o, be ka likala a laama mu be o. 54 Nswe munde wu aadza nyuru a me ya on̄ma makili ma me li a laama lili mibvu ya mibvu, ya me sa nsiili nde mu lipfu mu etsughu kii masini. (aiōnios g166) 55 Buulu nyuru a me yili bi-odza bibi ngan̄ma, ya makili ma me mali mala mama ngan̄ma. 56 Nswe munde wu aadza nyuru a me ya on̄ma makili ma me, nde sa akala mu me ya me mu nde. 57 Taara wu áagweghe me li mweē ya me ndi mweē mu Taara. Mu obo, nswe munde wu aadza me sa akala mweē mu me. 58 Li me limpa li liifi ku yulu li liiyakumunu ŋa nsie. Lo ka lili ti anga limpa li óli bataara ba be o. Bo bwohonon bápki, lo nswe munde wu aadza limpa li sa akala mweē mu mibvu ya mibvu.» (aiōn g165) 59 Mamo mandagha ma óluo Yĩisu ku Kaperenawume, mu nzo a lisamana a ba-Dzwife. 60 Ŋa mbihi

a ŋa bágyughu bo mandagha ma Yĩisu mamo, balagha mu binduono bi Yĩisu báalyele ti: «Mandagha ma maluru mpini! Nande kughu okihi mo?» 61 Lo, Yĩisu bu asoolo ti binduono bi nde bíkan̄ũunu mu nkooro a mandagha mamo, nde áfwulu bo ti: «Mandagha ma kya mali kundaa be? 62 Ya kala ti be limono Mwana a mbwuru mu okumu ku áli nde nsomo? 63 Me mufulu aakagwa bumweē, nyuru ka yiikagvighili ndagha o. Mandagha ma áandyele me be mali mufulu ya bumweē. 64 Lo baara babake ŋa kara li be ka baakasa kana o.» Mu kuulu obaana ku ebaana, Yĩisu áli asoolo baara babo ba baagwene okasa kana, ya nande áali munde wu akala aatyeghe nde. 65 Ya nde ábwehe: «Me mu obo me áandyele be ti: “Mbwuru ka kughu ogya kundaa me kala Taara ka gwi nde muswa o.”» 66 Obaana matala mamo, balagha mu binduono bi nde báabvughuru mbihi ya báanyaá ofirikagye ya nde. 67 Mu obo Yĩisu ályele kundaa Kwumu ya Buolo ti: «Lo be, behe si lidzyi ogye?» 68 Simō-Piere ábvuhulu kundaa nde ti: «Mfumu, kundaa na bihi liigye? We li a mandagha mama laama lili mibvu ya mibvu. (aiōnios g166) 69 Ya bihi, bihi liisi kana ya bihi lisoolo ti we li Wu-a-Ngili a Nzaami.» 70 Yĩisu ábvuhulu kundaa bo ti: «Ka oli me áansuolo be, be bansa Kwumu ya Buolo o? Lo ŋa kara li be, mumō li dyabulu!» 71 Nde ákabili obo mu Yuda, mwana a Simō musi Isikaryote, mu kuulu me nde, mumō mu Kwumu ya Buolo, wu akala aatyeghe nde.

7 Ŋa mbihi on̄o, Yĩisu ákabuludzye mu etsulu e nsie kii Ngilile. Nde ka ákadzyi ogye ku Yude o, mu kuulu ba-Dzwife bákasagha nde odza. 2 Lo kyiri ki ba-Dzwife kii Bidzwama ébehene. 3 Bambwee ba Yĩisu bályele nde ti: «Mara ŋa ya gye ku Yude mpaala binduono bi wehe si bimonon bigyighili bi li mu okasa we. 4 Mbwuru ka aakasala mu ensweghe o kala nde dzyi ti baara ba nsie basoolo nde. Buulu we aagyighili mandagha mama obo, sa kuulu ti baara bwohonon basoolo we!» 5 Bambwee ba nde bomo si ka bákasa kana mu nde o. 6 Yĩisu ályele bo ti: «Matala mama ndaa-me nkini maato o, lo mu be, matala mwohonon mali ma mabwe. 7 Nsiek ka yikughu be obele o, lo me, yo yili mu okabele me mu kuulu me aankasuo bumpughulu ti bigyighili bi yo bili bi bibi. 8 Be, likumu o be ku kyiri. Me, me ka nkumu ku kyiri ekye o, mu kuulu matala mama ndaa-me nkini maakughu

o.» 9 Nde ámana obili obo, ásyili ku Ngalile. 10 Lo mu matala ma ógyene bambwee ba nde ku Kyiri, ndehe si ábwí nzili mu ogye, lo ti anga mu ensweghe, ku ogwene a nyuru osuo kundaa baara. 11 Kunsá kyiri, ba-Dzwífe bákasagha nde ya bákafulu ti: «Bu nde kunu ali?» 12 Kunsá mpwumu baara, balagha báakarununu mu nde. Babamó bákalaye ti: «Nde li mbwuru wu mubwe». Ba bake ti: «Pele, nde li mu okadzihibi mpwumu a baara.» 13 Lo mbwuru si mumó ka ákabili epankala mu nkumu a nde o, mu nkooro a nzalamwee a bamfumu ba ba-Dzwífe. 14 Kara-a-kara li bitsughu bi kyiri, Yíisu ákumu ku nzo a Nzaami ya ábwí oluo. 15 Ba-Dzwífe bu bágyughu mandagha ma ákaluo nde, bo bákinjimi ya bákalaye ti: «Bunu-abo nde akughu osoolo Bisoño bu, nde wuulu ka ágyighi o?» 16 Yíisu ábvuhulu bo ti: «Maluo ma me ka mafi kundaa me o, lo mo mafi kundaa munde wu aagweghe me. 17 Kala ti mbwuru dzyi ogyighili waa li Nzaami, nde sa asoolo kala ti maluo ma kundaa Nzaami mafi bwunu-we kala ti me mu nkumu a meme ndi mu okabili. 18 Munde wu aakabili mu nkumu a ndeme, aakasagha nsia yi a ndeme. Lo munde wu aakasagha nsia yi a wu aagweghe nde li wu a ngarjma, ya mpya ka yili mu nde o. 19 Wu áagwi be Mukyene ka Moyidze o? Lo mbwuru si mumó mu be ka aakasalala nde o. Mu ema be lili mu okasagha me odzwa?» 20 Mpwumu a baara yíbvuhulu nde ti: «We li a mufulu wu mubi! Nande li mu okasagha odzwa we?» 21 Yíisu ábvuhulu ti: «Me ndagha yini a mó aangyighili ya be bwohono liikinjimi. 22 Moyidze ágwí be litumu lili okasohobo baana ba be ba babaghala nzo a mbaa. Litumu lilo ka lífi kundaa Moyidze o, lo kundaa bankagha-kwuru ba bihi. Ya be liikasohobo ba babaghala nzo a mbaa mu etsughu kii Sabate. 23 Kala ti be liikasohobo baghala nzo a mbaa mu etsughu kii Sabate mu onyaa otsala Mukyene a Moyidze, mu emakye be liikolo me nkehe bu aandzuhu me mbwuru mu etsughu kii Sabate? 24 Linyaá okalamana baara mu yini a mi liikamono be, lo liikalamana bo mu bunsumu!» 25 Ndaama a baara baba Yerusaleme bákaagwa bifwulu ti: «Wu ka me mbwuru wu bali mu okasagha bo odzwa o? 26 Limono, nde li mu okabili epankala na nkulu a baara bwohono, lo bo ka bali mu obvuhulu nde ndagha o! Bunu-abo, bamfumu ba bihi bamaakihi mu engarjma ti ngu nde li Kriste? 27 Bu gyughu, na akala oogya Kriste, mbwuru si mumó ka asoolo o kunu-ako nde aafa, lo wu, bihi lisoolo ku aafi nde.» 28 Yíisu bu ákaluo munsá nzo a Nzaami ábili mu likyi lili mpini: «Be lisoolo me! Be lisoolo ku aamfi me! Lo me ka aangyi mu ememe o. Munde wu aagweghe me li wu a ngarjma, munde wu ligwene osoolo be. 29 Me, me nsoolo nde mu kuulu me aamfi kundaa nde ya me nde aagweghe me.» 30 Bo báasagha osyimi Yíisu, lo mbwuru si mumó ka ákwara nde o, mu kuulu matala ma nde nkini áli ka mákughu o. 31 Munsá mpwumu, baara balagha bási kana mu nde ya bákalaye ti: «Ija akala oogya Kriste, nde sa asa bilyimi bii okinjimi bi biluru bi ali mu okasa nde?» 32 Ba-Faridzyé bágyughu bu ókarununu baara mu Yíisu. Bakwuru ba bangaa ba Nzaami ya ba-Faridzyé bátumu bankyele ba Nzo a nzaami mu oyisyimi nde. 33 Yíisu ályele ti: «Me nkini ndi ya be mu mana matala, ya me sa ngye kundaa munde wu aagweghe me. 34 Be sa lisagha me, lo be ka limono me o, mu kuulu be ka likughu ogya na ebini ekye ki akala aankala me o.» 35 Ojo ba-Dzwífe bákabili bo-a-bo ti: «Kunu-ako nde aagye kuulu bihi ka lifirimono nde o? Nde kundaa ba-Dzwífe ba bátsarjama na kara li ba-Ngereke aagye? Nde ba-Ngereke aayiluo? 36 Ndagha yi aalyele nde yi: “Be sa lisagha me, lo be ka limono me o”, ya “mu kuulu be ka likughu ogya na ebini ekye ki akala aankala me o” mbaala a yo ma?» 37 Mu etsughu kii masini kii kyiri, ki eli etsughu ki enene mu kyiri, Yíisu átemene ya áti mukwughu wu: «Kala ti mbwuru li a nyoro a madza, lo nde agya kundaa me ya nde arjma. 38 “Munde wu aasa kana mu me, manzala mama madza mama laama sa mapala munsá nde”, ti bwunu a bu oli Bisoño». 39 Yíisu ákabili mu Mufulu a Ngili wu akala oogyaagha babo ba baasa kana mu nde, mu kuulu Nzaami nkini áli ka ágwí Mufulu kundaa ba baakasa kana o, ya Yíisu nkini áli ka ábagha nsia o. 40 Ija kara li mpwumu a ba bágyughu mandagha mamó, bana bákalaye ti: «Ngarjma, mbwuru wu me Mubighili!» 41 Babake bákalaye ti: «Me nde li Kriste!» Babamó bákalaye ti: «Kriste kughu ofa ku Ngalile? 42 Bisoño ka biikalaye o ti Kriste sa akala mu dzumu li Dabvide, ya nde sa afa ku Beteleeme, bula bu busala ku ókakala Dabvide?» 43 Mpwumu yíkaaghaba mu nkooro a nde. 44 Ija kara li bo, baara babake bákasagha osyimi nde, lo mbwuru si mumó ka ákwara nde o. 45 Bankyele ba nzo a Nzaami báabvughuru

kundaa bakwuru ba bangaa ba Nzaami ya ba-Faridzyē bāfwulu bo ti: «Mu emakye be liigwene oyabiri nde?» 46 Bo bābvuhulu ti: «Mbwuru si mumō nkini ka āmaabili ti bu oli mu okabili baghala munde o.» 47 Ba-Faridzyē bālyele bo ti: «Behe si liikihi ti badzihibi be? 48 Ŋa kara li bamfumu bwunu we ŋa kara li ba-Faridzyē, oli a si mbwuru mutsyini wu āasi kana mu nde? 49 Lo mpwumu a baara yi ka yisoolo Mikyene o, baara ba bālogho!» 50 Lo Nikodeme, mumō mu ba-Faridzyē, munde wu āayimono Yīisu, ālyele ti: 51 «Mikyene mi bihi-a-be miikagwa mbwuru ebili kala ti ka batswama ogyughu nde o ya ka basoolo mandagha ma aagyighili nde o?» 52 Bo bābvuhulu nde ti: «Wehe si li mbwuru wu a Ngalile? Yighili otala mu Bisono ya we sa mono ti ku Ngalile ka ookapala mubighili o.» [53 Ŋa mbihi oŋo, mbwuru-mbwuru āgyene ku nzo a nde.

8 Yīisu āgyene ku Munguo wu a mi-Olibve. 2 Etsughu ki enema mu minkya-nkya, nde āyabvughuru ku Nzo a nzaami. Buulu baara bwohonon bākagya kundaa nde, nde ābwi nsini ya ābaana oluo. 3 Baluo-Mikyene ya ba-Faridzyē bāyabiri nde mukaha wu bāsyimi bukala ya bāsuhi nde ŋa kara li baara bwohonon. 4 Bo bālyele nde ti: «Muluo, mukaha wu baasyimi nde bukala. 5 Moyidze, mu Mikyene, āgwi litumu ti bafaana odzwa bakaha baba bu mu mameē. Lo, we bunu lyele?» 6 Bo bākabili obo mu oleghebe nde mwere mpaala babagha ndagha yi baafwunu nde. Lo Yīisu bu apfujumu, ābwi osono mu mulyeme ŋa nsie. 7 Buulu bo bāfirikagwa nde bifwulu, Yīisu āsiili busu ya ālyele bo ti: «Nyaā mbwuru wuulu ka ali a masumu o, akala wu a nsomo mu okaha nde limeē.» 8 Nde āfiripfujumu ya āfiribaana osono ŋa nsie. 9 Bo bu bagyughu ndagha oyo, bābaana ogye mumō-mumō, obaana mu ba babvulu bukwuru. Ya mukaha āsyili nde ngasighi oŋo ŋa nkulu a Yīisu. 10 Yīisu āsiili mutswi ya ālyele kundaa nde ti: «Mukaha, bo kunu-ako bali? Ka oosyili a mbwuru si mumō ŋa wu aalyele ti bafaana otsyiri we mukakana wu lipfu o?» 11 Nde ābvuhulu ti: «Mbwuru we, Mfumu». Ya Yīisu ālyele kundaa nde ti: «Mehe si ka ntisyiri we mukakana wu lipfu o. Gye, lo ka afirisa masumu o.» 12 Yīisu āfirilyele kundaa bo ti: «Me ndi otsyeme o nsie. Munde wu aanama me ka adzyara kunsa opyini o, lo nde sa abagha

otsyeme kuu laama.» 13 Oŋo ba-Faridzyē bālyele kundaa nde ti: «We li mu osuo bumpughulu mu weme, bumpughulu bu we ka buli bubu ngarjma o!» 14 Yīisu ābvuhulu ti: «Ngu okala ti me ndi mu osuo bumpughulu mu meme, bumpughulu bu me buli bubu ngarjma, mu kuulu me nsoolo ku aamfi me ya ku ndi mu okagye me. Lo be, be ka lisoolo ku aamfi me ya ku ndi mu okagye me o. 15 Be liikalamana mu embwuru. Me ka ndamana mbwuru o. 16 Kala ti me ndamana, olamana o me sa okala kuu ngarjma, mu kuulu me ka ndi ngasighi o, oli si ya munde wu aagweghe me. 17 Munsa Mikyene mi be bāsono ti bumpughulu bubu baara buolo buli bubu ngarjma. 18 Me ndi mu osuo bumpughulu mu meme, ya Taara wu aagweghe me li mu osuo si bumpughulu mu me.» 19 Ba-Faridzyē bāfwulu nde ti: «Taara a we, kunu-ako ali?» Yīisu ābvuhulu ti: «Be ka lisoolo me o ya be ka lisoolo Taara a me o. Kala ti be āli lisoolo me, be likaasoolo si Taara a me.» 20 Yīisu ālyele mandagha mamu mu matala ma ākaluo nde mu Nzo a nzaami, ŋa bele a elogho ki baakagwa bikaba. Mbwuru si mumō ka āsyimi nde o, mu kuulu matala ma nde nkini āli ka mātō o. 21 Yīisu āfirilyele kundaa bo ti: «Me ndi mu ogye, be sa lisagha me, lo be sa likpa mu nkooro a masumu ma be. Oko ku aangye me, be ka likughu ogye oko o.» 22 Ba-Dzwife bu bagyughu ndagha oyo, bo-a-bo bākagwa bifwulu ti: «Nde nyuru aadzwa bu alyele ti: “Ku aangye me, be ka likughu ogye oko o?”» 23 Yīisu ābvuhulu bo ti: «Be lili baba ku nsie, me, me ndi wu a ku yulu. Be lili baba mu nsie yi, me, me ka ndi wu a mu nsie yi o. 24 Me mu obo me āandyele be ti be sa likpa mu nkooro a masumu ma be. Kala ti be ka lisi kana o ti me “Me Ndi”, be sa likpa munsa masumu ma be.» 25 Mu obo bo bāfwulu nde ti: «We nande li?» Yīisu ābvuhulu kundaa bo ti: «Yi ndi mu okalyele me be obaana ku ebaana. 26 Me ndi a mandagha malagha ma aandyele me mu mi mitala be ya ma aandamana me be, lo munde wu aagweghe me li ngarjma, ya mandagha ma aangyughu me kundaa nde, me mo me ndi mu okalyele kundaa baara ba nsie.» 27 Lo bo ka bābaghala o ti ngu mu Taara Yīisu ākabili a bo. 28 Oŋo Yīisu ālyele kundaa bo ti: «Mu matala ma akala liibarjana be Mwana a mbwuru ŋa yulu a kuruwa, be akala lisoolo ti me, “Me Ndi”, ya me ka aankansa ndagha si mō mu ememe o: Me aankandyele mandagha ma

ogyihi me Taara. 29 Munde wu aagweghe me li ya me: Nde ka aanyaã me ngasighi o, mu kuulu matala mwohonon me aankansa mandagha ma maakagwa nde esee.» 30 Yiisu bu abili obo, baara balagha bási kana mu nde. 31 Ya Yiisu ályele kundaa ba-Dzwife ba bási kana mu nde ti: «Kala ti be linabara mu mandagha ma aandyele me be, be sa likala binduono bi me bibi ngan̄ma, 32 be sa lisoolo engan̄ma, ya engan̄ma sa egwa be bumpoholo.» 33 Bo bábvuhulu kundaa nde ti: «Bihi lili mimburi mi mweẽ a Abarahame ya mbwuru nkini ka ámaasa bihi mu bunkana o, bunu-abo we kughu olyele ti bihi sa likala baara baba bumpoholo?» 34 Yiisu ábvuhulu kundaa bo ti: «Mu ngan̄ma me ndyele be ti, munde wu aasa masumu, li nkana a masumu. 35 Nkana ka aakakala man̄kulu mu dzumu o, lo mwana wu baghala, nde li man̄kulu mu dzumu. (aiõn g165) 36 Mu obo, kala ti Mwana wu baghala gwi be bumpoholo, be sa likala baara baba bumpoholo bubu ngan̄ma. 37 Me nsoolo ti be lili mimburi mi mweẽ a Abarahame, lo be lili mu okasagha odzwa me mu kuulu be ka lili mu okakihi mandagha ma aandyele me be o. 38 Me aakandyele mandagha ma áamono me kundaa Taara a me. Lo be, be liikasa mandagha ma liikagyughu be kundaa taara a be!» 39 Bo bábvuhulu kundaa nde ti: «Taara a bihi me Abarahame.» Yiisu ályele kundaa bo ti: «Kala ti be lili baana ba Abarahame, nkini be likaakasa bigyighi bi ókasa Abarahame. 40 Lo be lili mu okasagha odzwa me, we wu ndi mu okalyele be engan̄ma ki aangyughu me kundaa Nzaami. Abarahame ka ási obo o. 41 Lo be, be liikasa bigyighili bi taara a be.» Bo bábvuhulu kundaa nde ti: «Bihi ka lili baana ba báburu mu enkwunu o, bihi lili a Taara yini a mumõ, Nzaami!» 42 Yiisu ályele kundaa bo ti: «Kala ti Nzaami ali Taara a be, nkini be likaadzyi me, mu kuulu kundaa Nzaami me aamfi ya me aangyi. Me ka aangyi mu litumu li meme o, lo me nde aagweghe me. 43 Mu emakye be lili mu ogwene okabaghala mbiili a me? Mu kuulu be ka lidzyi ogyughu ndagha a me o.» 44 «Be lili ti anga taara a be dyabulu, ya be lidzyi okasa dzyi li taara a be. Obaana ku ebaana, nde li munde wu aakadzwa baara, ya nde ka áli munsá engan̄ma o, mu kuulu mu nde ka oli a engan̄ma o. Ña aakapfiri nde mpya, nde aakabili mu mi mili mu ndeme, mu kuulu nde li nga-a-mpya ya taara a mpya. 45 Lo me, buulu

me aakandyele engan̄ma, be liikakuono osá kana mu mi aakandyele me. 46 Nande mu be kughu osuo ti me aansí masumu? Kala ti me ndi mu okalyele engan̄ma, mu emakye be liigwene okasa kana mu mi aakandyele me? 47 Munde wu li wu a Nzaami aakagyughu mandagha ma Nzaami. Lo be, kala ti be ka lili mu okagyughu o, mu kuulu be ka lili baba Nzaami o.» 48 Ba-Dzwife bábvuhulu kundaa nde ti: «Bihi ka lili a bwu o mu olyele ti we musí Samari ya we li a mufulu wu mubi?» 49 Yiisu ábvuhulu bo ti: «Pele, me ka ndi a mufulu wu mubi o, lo me Taara a me ndi mu okagwa budziri. Ya be, be lili mu okagwa me bupfiri! 50 Me ka akansagha o ti baara bagwa me nsia. Lo oli a mumo wu aakasagha yo mu nkooro a me, ya wu akalamana mu bunsumu. 51 Mu engan̄ma me ndyele be yo, kala ti mbwuru kebe mandagha ma me, nde akala ka akpa o.» (aiõn g165) 52 Ba-Dzwife bályele kundaa nde ti: «Mu bu bihi lisoolo ti we li a mufulu wu mubi! Abarahame ya mibighili bákpí, lo we, we lyele ti: “Kala mbwuru kebe mandagha ma me, nde akala ka akpa o”. (aiõn g165) 53 Bunu, we bvulu taara a bihi Abarahame, wu áakpi? Ya mibighili sí míkpi. Lo we bu tsimi ti we nande li?» 54 Yiisu ábvuhulu bo ti: «Kala ti me ngwi nyuru a meme nsia, nsia a me yili yi a bwunu. Me Taara a me li mu okagwa me nsia, munde, wu liikalyele be ti, nde li Nzaami a be. 55 Ya be ka lisoolo nde o, lo me, me nsoolo nde. Kala me ndyele be ti me ka nsoolo nde o, me sa nkala mbwuru nga-a-mpya ti anga be. Lo me nsoolo nde ya me aakankebe mandagha ma nde. 56 Taara a be Abarahame álwulu mu esee mu etsimi kii omono etsughu kii ogya o me. Nde ámono kye ya álwulu mu esee.» 57 Ba-Dzwife bályele nde ti: «We nkini aakuhi bamvulu makwumu-mataana o, lo we lyele ti we áamono Abarahame!» 58 Yiisu ábvuhulu bo ti: «Mu engan̄ma me ndyele be, nsomo-a-nsomo báburu Abarahame, “me ndi”.» 59 Ojo ba-Dzwife bátolo mameẽ mu okaha nde mo, lo Yiisu ásweme ya ápala mu Nzo a nzaami.

9 Yiisu bu akaluru mu nzili, ámono mbwuru wu áali enkpa-mihi kii emburu-ngughu. 2 Binduono bi nde bífwulu nde ndiri: «Muluo, nande áasi masumu mpaala baburu nde enkpa-mihi, ndeme, bwunu we biburu bi nde?» 3 Yiisu ábvuhulu bo ti: «Ka oli mu nkooro a masumu ma nde bwunu we mama biburu bi nde o?

Lo mu kuulu bigyighili bi Nzaami bimoŋono mu nde! 4 Ŋaala bwihi nkini buki, bihi lifaana osala esala ki munde wu aagweghe me. Mpyibi yili mu ogya yiili mbwuru si mumō ka kughu osala esala o. 5 Ŋaala me nkini ndi ŋa nsie, me ndi otsyeme o nsie.» 6 Yiisu ámana obili obo, átswulu manteē ŋa nsie, ápworo toro mu mō ya ákili lo mu mihi mi enkpa-mihi. 7 Ya Yiisu ályele kundaa nde ti: «Gye yiswagha busu mu edzyi kii Silowe», mbaala ti, «wu bágweghe». Enkpa-mihi égyene, éswagha busu, ya ékayamono ŋa ékayabvughuru kye. 8 Baara ba bákakala ya nde kara lilo, ya babo ba bátswama okamono wu aakaluomo nzi, bályele ti: «Wu ka li mbwuru wu aakabwa nsini mu okaluomo nzi o?» 9 Baara babamō bákalyele ti: «Me nde!» Babake ti: «Pele, mbwuru wu bali efa emō ya nde.» Lo ndeme ákalyele ti: «Ngu me.» 10 Mu obo bo báfswulu nde ti: «Bunu-abo mihi mi we miisi mu odzughu?» 11 Nde ábvuhulu ti: «Mbwuru wu a nkumu a Yiisu aapworo toro, aakili me lo mu mihi ya aalyele me ti: «Gye yiswagha busu mu edzyi kii Silowe». Me obo me aangyene, me aanswagha busu ya me aambwi omono.» 12 Bo báfswulu nde ti: «Nde kunu-ako ali?» Nde ábvuhulu ti: «Me ka nsoolo o.» 13 Baara bábiri mbwuru wu áali enkpa-mihi kundaa ba-Faridzyē. 14 Ankoho ekye eli etsughu kii sabate ki ópworo Yiisu toro ya ádzuhu mihi mi mbwuru munde. 15 Ba-Faridzyē si báfswulu nde bunu-abo nde aabaana omono. Nde ábvuhulu bo ti: «Nde aakili me toro mu mihi, me aanswagha busu, ya me aambwi omono.» 16 Ŋa kara li ba-Faridzyē, babamō bákalyele ti: «Mbwuru wu ka aafi kundaa Nzaami o, mu kuulu nde ka li mu ogwa etsughu kii sabate budziri o.» Lo babake bákalyele ti: «Bunu-abo mbwuru nga-a-masumu akughu ogyighili bilyimi bii okinjimi bibi bu?» Ya ba-Faridzyē bákaghaba. 17 Bo báfirifswulu mbwuru wu áli enkpa-mihi ti: «Ya we, we bunu lyele mu mbwuru munde wu aadzuhu we mihi?» Nde ábvuhulu kundaa bo ti: «Nde li mubighili.» 18 Lo bamfumu ba-Dzwife bábibi osa kana ti, mbwuru wu li mu okamono wu áli enkpa-mihi aakakala. Mu obo, bo báti ba báburu nde mbili, 19 ya báfswulu bo ti: «Baghala wu li mwana a be? Nganma nde áli enkpa-mihi ŋa líburu be nde? Ya mu bu, bunu-abo nde aasi mu omono?» 20 Ba báburu nde báfswulu ti: «Bihi lisoolo ti wu mwana a bihi ya nde áli enkpa-mihi ŋa líburu bihi nde, 21 lo bihi ka lisoolo o bunu-abo nde aasi mu omono ya nande aadzuhu nde mihi. Be lifswulu ndeme, buta nde li mbwuru wu akulu, nde ndeme kughu ogwa mvuru mu mi mitala nde!» 22 Ba báburu nde bábili obo mu nkooro a nzalamweē a bamfumu ba-Dzwife ba áli bagwolo mukakana wu opaha mu nzo a lisamana a ba-Dzwife, nswe munde wu aalyele ti Yiisu me Kriste. 23 Me mu obo ba báburu nde bályele ti: «Nde li mbwuru wu akulu, lifswulu ndeme.» 24 Ba-Faridzyē báfirita mbwuru munde wu áli enkpa-mihi mbili, ya bo bályele kundaa nde ti: «Gwa nsia kundaa Nzaami! Bihi lisoolo ti mbwuru munde li nga-a-masumu.» 25 Nde ábvuhulu kundaa bo ti: «Me ka nsoolo o kala ti nde nga-a-masumu ali. Lo me yi nsoolo me ndagha yini a mō: Me áandi enkpa-mihi, mu bu me ndi mu okamono!» 26 Bo báfswulu nde ti: «Nde emakye aasi we? Bunu-abo nde aadzubulu we mihi?» 27 Nde ábvuhulu ti: «Me maandyele be yo, lo be ka liigyughu me o! Mu emakye be lidzyi yo ofirigyughu mu sa likimi? Behe si nzala a kuulu ti likala binduono bi nde?» 28 Ba-Faridzyē bábwi otughu nde ya bályele kundaa nde ti: «Me we li enduono e nde! Bihi, bihi lili binduono bi Moyidze. 29 Bihi lisoolo ti Nzaami ábili kundaa Moyidze. Lo mbwuru wu, bihi ka lisoolo ku aafi nde o!» 30 Baghala ábvuhulu bo ti: «Yi ndagha yi okinjimi: Nde aadzubulu me mihi, lo be ka lisoolo ku aafi nde o! 31 Baara bwohonu basoolo ti Nzaami ka aakagyughu banga-a-masumu o, lo nde aakagyughu mbwuru wu aakagwa nde budziri ya aakasa waa li nde. 32 Kaala bihi nkini límaagyughu ti mbwuru ámaadzubulu mihi mi munde wu báburu enkpa-mihi o. (aiōn g165) 33 Kala mbwuru wu ka áfi kundaa Nzaami o, nde ka aakaagyighili ndagha si mō o.» 34 Ba-Faridzyē báfswulu nde ti: «We wu li kunsu masumu obaana bu báburu we, me we kughu oluo bihi!» Ya bo bábyi nde ágye ku mbala. 35 Yiisu agyughu ti bo baabyi mbwuru munde. Nde áyimono nde ya áfswulu nde ti: «We aasi kana mu Mwana a mbwuru?» 36 Nde ábvuhulu ti: «Mfumu, nde nande ali mpaala me nsa kana mu nde?» 37 Yiisu ábvuhulu nde ti: «We aamono nde! Me munde wu li mu okabili ya we.» 38 Mbawuru munde ábvuhulu nde ti: «Mfumu, me nsi kana!» Ya nde ákunu mabuo mu nsie ŋa nkulu a nde. 39 Yiisu áfirilyele ti: «Me aangyi mu nsie mu oyasa muyala, mpaala ba baagwene okamono bamono, ya ba baakamono bakala

binkpa-mihi.» 40 Ndaama a ba-Faridzyē ba báli oño bágyughu mandagha mamó ya báfwulu nde ti: «Bihi si lili binkpa-mihi?» 41 Yíisu ábvuhulu bo ti: «Kala ti be áli binkpa-mihi, be ka likaakala a masumu o. Lo mu matala ma lili mu okalyele be ti: “Bihi lili mu omono”, masumu ma be mali nkini ya be».

10 Yíisu áfirilyele kundaa ba-Faridzyē ti: «Mu enganjma me ndyele be ti, mbwuru wuulu ka somo mu etyi ki bindoomo ŋa mu muŋma o, lo nde kumu kye ŋa ebini ekimi mu osomo, munde li muturu ya ntwumu. 2 Lo munde wu aasomo ŋa muŋma a etyi li munkaala-bibuolo. 3 Nkyele a etyi aakadzubulu nde kye, ya bindoomo biikagyughu likyi li munkaala-bibuolo. Nde aakata bindoomo bi nde mbili, nswe endoomo mu nkumu a kye, ya aakapaha bye ku mbala. 4 Mu matala ma aakamana nde opaha bindoomo byehene, nde aakagye ŋa nkulu, ya bye biikanama nde ŋa mbihi, mu kuulu bye bisoolo likyi li nde. 5 Si okala ka bunu, bye ka biikanama mbwuru wu bagwene osoolo o, lo bye sa bibara nde mu kuulu bye ka bisoolo likyi li baara ba bagwene osoolo o.» 6 Yíisu áti bo nkumu oyo, lo bo bákwono obaghala yo. 7 Yíisu áfirilyele ti: «Mu enganjma, me ndyele be, me ndi muŋma a etyi ki bindoomo. 8 Bo bwohonó ba bátswama nsomo me nya bali banga-a-pfyibi ya bantwumu, lo bindoomo ka bígyughu bo o. 9 Me ndi muŋma a etyi, kala mbwuru somo mu me, nde sa abvwughu, nde sa asomo ya ayapala, ya sa abagha bi-odza. 10 Nga-a-pfyibi aakagya yini a mu oyaturu, mu oyadzwa ya mu oyapfihili. Lo me, me aangyi mpaala baara babagha laama ya babagha lo lili bufulu.» 11 «Me ndi munkaala-bibuolo wu mubwe. Munkaala-bibuolo wu mubwe aakagwa laama li nde mu bindoomo bi nde. 12 Lo mbwuru wu baakafiri nzi mu okakebe bibuolo, wuulu ka li munkaala-bibuolo o, ya bindoomo ka bili bibi ndaa nde o, mu matala ma aakamono nde ngo, nde aakabara ya aakasihí bindoomo. Ngo aakabwirili bindoomo ya aakatsala bye. 13 Mu kuulu baghala munde yini a mu nkooro a nzi aakasala, nde ka li a nyí mu bindoomo o.» 14 «Me ndi munkaala-bibuolo wu mubwe, me nsoolo bindoomo bi me, ya bye bisoolo me, 15 ti bwunu a bu osoolo me Taara ya ti bu nsoolo me Taara. Me sa ngwa laama li me mu bindoomo bi me. 16 Me ndi a bindoomo bikimi biili ka bili

bibi etyi ki o. Bibye, me mfaana obiri bye si, bye sa bigyughu likyi li me ya sa bikala mukaá a bibuolo mumō ya sa bikala a munkaala-bibuolo mumō. 17 Taara aakadzyi me mu kuulu me ndi mu ogwa laama li me ya me sa firimbagha lo. 18 Mbwuru ka amaha me lo o, lo meme ngwi lo mu waa li me. Me ndi a lileene lili ogwa lo ya lili ofirigwolo lo. Lilo me litumu li ógwi me Taara a me.» 19 Mu nkooro a mandagha mamó, ba-Dzwífe báfirikaghaba. 20 Balagha ŋa kara li bo báakalyele ndiri: «Nde li a mufulu wu mubi, nde li nga-a-lala. Mu emakye be lili mu okagyughu nde?» 21 Lo babake báakalyele bu: «Mbwuru nga-a-mufulu wu mubi ka kughu obili bu o. Mufulu wu mubi kughu odzubulu mihi mi enkpa-mihi?» 22 Ku Yerusalemé óli a kyiri kii ndibili a mweé a etsughu ki báseme nzo a Nzaami. Áli oli mu ndo yi a mpie yi a alagha. 23 Mu mbala a nzo a Nzaami, Yíisu ákabulugye, ku nsie a eluru kii Solomō. 24 Ba-Dzwífe bádzyi nde ya báfwulu nde ti: «Tee nki matala we aasa ti bihi likala kunsá bitsimi ogwimi? Kala ti we li Kriste, saalyele epankala!» 25 Yíisu ábvuhulu bo ti: «Me aandyele be yo lo be ka lili mu osa kana o. Bigyighili bi ndi mu okasa me mu nkumu a Taara me, bili mu osuo bumpughulu mu me. 26 Lo be liibihí osa kana mu me, mu kuulu be ka lili bindoomo bi me o. 27 Bindoomo bi me biikagyughu likyi li me, me nsoolo bye ya bye biikanama me. 28 Ya me aakangwa laama lili mibvu ya mibvu kundaa bindoomo bi me. Bye ka bikughu opfighili o ya mbwuru si mumō ka kughu ogwohonó me bye ŋa ekee o. (aíōn g165, aiónios g166) 29 Taara a me wu aagwi me bye, bvulu byehene mu bunene ya mbwuru si mumō ka kughu ogwohonó elogho ŋa ekee e Taara o. 30 Me ya Taara lili mbwuru mumō.» 31 Ba-Dzwífe báfirítolo mameé mu odzwa nde mu mó. 32 Lo Yíisu áfirilyele ti: «Me aansuo be bigyighili bi bibwe bi bifi kundaa Taara. Mu nki egyighili be lidzyi odzwa me mu mameé?» 33 Ba-Dzwífe bábvuhulu nde ti: «Bihi ka lidzyi odzwa we mu mameé mu nkooro a egyighili ki ebwe ki aasi we o, lo mu nkooro a ku aatsaala we Nzaami, mu kuulu we wu li mbwuru, we li mu olyele ti we li Nzaami.» 34 Yíisu ábvuhulu bo ti: «Mu Mikyene mi be básono bu: “Me aandyele, be lili banzaamil” 35 Ankoho mbwuru ka kughu osobo mibasono mu Bisono bibi Ngili o. Mu kuulu mu Mikyene agwolo baakata baara babo, ba bágyughu ndagha a Nzaami, banzaami. 36 Lo

be lili mu okalyele, kundaa munde wu ótwulu Nzaami mu libee mu osalala nde ya wu ágweghe nde mu nsie ti: “We li mu okatsaala Nzaami”, mu kuulu me aandyele ti me ndi Mwana a Nzaami. **37** Kala ti me ka ndi mu okasa bigyighili bi Taara a me o, ka lisa kana mu me o! **38** Lo kala ti me ndi mu okasa bye, ngu okala ti be libihi osa kana mu me, be lifaana osa kana mu bigyighili bibye, mpaala be lisoolo ya libaghala ti Taara li mu me ti anga bu ndi me mu Taara.» **39** Ojo bo báfirisagha osyimi nde, lo nde ábulumara ŋa kara li bo. **40** Yiisu ábvughuru ku ngulu a mwele wu a Dzurudé, ŋa ebini ki áli obaana Dzā baara oboghoŋo ya nde ákala oko. **41** Baara balagha bákagya kundaa nde ya bákalyele ti: «Dzā ka aasi elyimi kii okiŋimi si emō o, lo mandagha mwohonon ma áalyele nde mu mbwuru wu máli mama ngan̄ma.» **42** Ya ŋa ebini ekye, baara balagha bási kana mu Yiisu.

11 Mbwuru mumo wu a nkwumu Ladzare áli mubeyle. Nde áli musi Betani, bula bu ókakala Mari ya naana a nde Marete. **2** Mari me mukaha munde wu áli aagyiri Yiisu maala mama mpihi yi mbwe ya wu ágyala myili mi Mfumu mu mfu a nde. Me nkele a nde Ladzare áli mubeyle. **3** Bankele bansa buolo bágweghe mukyene kundaa Yiisu ti: «Mfumu, ndughu a we wu mukolo li mubeyle.» **4** Mu matala ma ógyughu Yiisu nsia oyo nde ályele ti: «Bubeyle ba ka bubiri ku lipfu o, lo bo buli mu ogwa nsia kundaa Nzaami. Mu nkooro a bubeyle bubo, sa basyighi Mwana a Nzaami.» **5** Ankoho, Yiisu ákadzyi Marete, mbwee a nde ya Ladzare. **6** Mu matala ma ágyughu nde nsia ti Ladzare áli mu okabeyle, nde áfiriluhu bitsughu byele ŋa ebini ekye ki áli nde. **7** Ya ŋa mbihi oyo nde áyalyele kundaa binduono bi nde ti: «Litswe libvughuru ku etsulu e nsie kii Yude.» **8** Binduono bi nde bílyele nde ti: «Muluo, ka oli edzighi o, ba-Dzwife baakasagha odzwa we mu mameē, ya we dzyi ofiribvughuru oko?» **9** Yiisu ábvuhulu ti: «Ka oli a matala kwumu ya mwolo mama otsyeme mu etsughu o? Kala ti mbwuru li mu okadzyara mu mwī, nde ka kughu okubu kya o mu kuulu nde li mu okamono otsyeme ku nsie yi. **10** Lo kala ti mbwuru li mu okadzyara mu mpyibi, nde sa akubu kya mu kuulu otsyeme ka oli mu nde o.» **11** Bu amana olyele mandagha mamo, nde ábwehe ti: «Ndughu a bihi-a-be Ladzare

aagyon̄omo, lo me nde áayinsiili.» **12** Binduono bílyele ndiri: «Kala ti nde yini a ogyon̄omo aagyon̄omo, nde sa adzughu.» **13** Ankoho, Yiisu mu lipfu li Ladzare ákadzyi obili, lo bo bákatsimi ti nde mu ensama kii tolo ákabili. **14** Mu obo Yiisu ásaalyele bo epankala ti: «Ladzare aakpi. **15** Ya me ndi a esee elagha mu be, buulu me ka aakankala oko o, mu kuulu be lisa kana mu me. Lo litswe ligye ku ali nde!» **16** Mu obo Toma, munde wu baakata ti Mbu, ályele kundaa binduono bibike ti: «Litswe, mpaala bihi-a-be si, likpa emō ya nde.» **17** Mu matala ma óyito Yiisu oko, bályele nde ti Ladzare maasa bitsughu bina munsá mpyeme. **18** Bula bubu Betani búli be-bele ya Yerusalem mu etiiri kii bakilometere batere. **19** Mu obo ba-Dzwife balagha bágyi kundaa Marete ya Mari mu ogwa bo bukyini mu nkooro a lipfu li nkele a bo Ladzare. **20** Marete bu ágyughu ti Yiisu aayabehene ya bula, nde áyibwana nde. Lo Mari ásyili ku nzo. **21** Marete ályele kundaa Yiisu ti: «Mfumu, kala ti we ali ŋa aakakala, nkini li nkele a me ka aakpi o. **22** Lo me nsoolo ti, ngu okala mu bu, nswe ndagha yi aaluomo we kundaa Nzaami, Nzaami sa agyighili we yo.» **23** Yiisu ályele kundaa nde ti: «Nkele a we sa asighili mu lipfu.» **24** Marete ábvuhulu nde ti: «Me nsoolo ti nde sa asighili mu lipfu mu etsughu kii masini, etsughu kii osighili mu lipfu.» **25** Yiisu ályele kundaa nde ti: «Me ndi osighili mu lipfu ya laama. Munde wu aasa kana mu me, ngu okala ti nde kpi, sa akala mweē. **26** Ya nswe munde wu li mweē ya si kana mu me, nde akala ka akpa o. We si kana mu ndagha oyo?» (aiōn g165) **27** Marete ábvuhulu ti: «Eē! Mfumu, me nsi kana ti we li Kriste, Mwana a Nzaami wu básuololo mu ogya mu nsie.» **28** Bu amana obili obo, Marete áyita mbwee a nde Mari mbili ya ályele nde mu mamfwunu ti: «Muluo li ŋa, ya nde we aakata mbili.» **29** Mari bu agyughu obo, átemene mu maswa ya ágyene kundaa Yiisu. **30** Yiisu áli nkini ka ásono munsá bula o. Nde áli nkini ŋa ebini ekye ki óbwana a nde Marete. **31** Ba-Dzwife ba báli munsá nzo ya Mari mu okagwa nde bukyini, bu bamono nde apala munsá nzo mu maswa, bo bánama nde. Mu kuulu bo bákatsimi ti nde ku mpyeme ákagye mu oyilili. **32** Mari bu ayato ŋa ebini ki óli Yiisu ya bu amono nde, nde ábwi ŋa myili mi nde ya ályele kundaa nde ti: «Mfumu, kala ti we ali ŋa aakakala, nkini li nkele a me ka aakpi o.» **33** Yiisu bu amono Mari

mu okalili, ya ba-Dzwife ba bakanama nde si mu okalili, nde anyoō ku olagha mu mukolo ya endwu e nyuru épala nde. **34** Nde áfwulu bo ti: «Kunu-ako be liisuhu nde?» Bo bábvuhulu nde ti: «Mfumum, gya yamono.» **35** Yiisu áli. **36** Ya ba-Dzwife bábwí oleye ti: «Limono, nde áakadzyi nde ku olagha!» **37** Lo babake ŋa kara li bo bákalye ti: «Nde wu aadzuhu mihi mi enkpa-mihi, mu emakye nde aakwono okahaba lipfu li Ladzare?» **38** Yiisu áfirinyoō ku olagha ya ágyene ku mpyeme. Mpyeme oyo áli ngala yi bákyi mu limeē li linene. **39** Yiisu álye ti: «Limaha limeē li.» Marete, nkele a wu ákpi álye kunda nde ti: «Mfumum, nde aabaana otsuru mpihi, mu kuulu lolo ayii kii etsughu kii bina obaana bu baadzyighi nde.» **40** Lo Yiisu álye ndiri: «Me ka aandyeye we o ti, kala we si kana, we sa mono nsia a Nzaami?» **41** Bu bamaha limeē, Yiisu ákala ku yulu ya álye ti: «Taara, me mvurulu we matuono mu kuulu we aagyughu me. **42** Me nsoolo ti we aakagyughu me mu matala mwohonon, lo me bu mbili obo mu nkooro a mpwumu a baara yi aadzyi me yi, mpaala bo basa kana ti we aagweghe me.» **43** Bu amana obili obo, nde ábili mu likyi lili mpini ndiri: «Ladzare, pala!» **44** Ladzare wu áapki, ápala, myili ya myaá bádzyi bisili, edzili báfughu mu mupa a eko. Yiisu álye kunda baara ti: «Linyana nde bisili ya linyaá nde agye!» **45** Ba-Dzwife balagha ba bágyi kunda Mari ya bámonon mi ogyighili Yiisu, bási kana mu nde. **46** Lo babake ŋa kara li bo bágyene kunda ba-Faridzyē ya bálye bo mi ógyighili Yiisu. **47** Mu obo, bakwuru ba bangaa ba Nzaami ya ba-Faridzyē bábvuhunu mu mfwunu a ekwuru ki ba-Dzwife ya bálye ndiri: «Emakye bihi-a-be liisa? Mbwuru wu li mu okasa bilyimi bilagha bi okijimi. **48** Kala ti bihi-a-be linyaá nde akasa bilyimi bi okijimi bu, baara bwohonon sa basa kana mu nde, ya ba-Romē sa bayatsala ebini e bihi kii Ngili ya nsie a bihi yohonon.» **49** Mumō ŋa kara li bo, wu a nkumu a Kayife, wu áali mukwuru a bangaa ba Nzaami mu mubvu munde álye ti: «Be ka lili mu obaghala o! **50** Be ka lili mu obaghala o ti bubwe kunda be mbwuru mutsyini akpa mu nkooro a baara bwohonon, ya nsie a bihi yi nyaá opfighili?» **51** Nde ka álye mandagha mamon mu endeme o, lo mu kuulu nde áli mukwuru a bangaa ba Nzaami mu mubvu munde. Me mu obo, nde ábighili ti áli bubwe Yiisu akpa mu nkooro a

nsie a ba-Dzwife. **52** Ya ka oli yini a mu obo o, lo mu obvughu si emō baana ba Nzaami bwohonon ba bátsanama mu nsie nsyini. **53** Me mu etsughu ekye bamfumum ba-Dzwife bágwolon munkaana wu odzwa Yiisu. **54** Mu obo, mu midzye mi nde, nde ka áfirikamonon kunda ba-Dzwife o. Nde ágyene ku etsulu e nsie ki éli bele ya syehe, mu bvulu lili Efarayime. Nde ákala oko ya binduonon bi nde. **55** Kyiri kii Paake ki ba-Dzwife ébehene. Mu obo baara balagha bákamara mu mala ya bákagye ku bvulu lili Yerusalem mu oyitsehebe manyuru ma bo nsomo basomo kyiri. **56** Bo bákasagha Yiisu, ya munsa nzo a Nzaami mu báli bo, bo bákalye bo-a-bo ti: «Be bunu litsimi? Nde ka agya ku kyiri o?» **57** Bakwuru ba bangaa ba Nzaami ya ba-Faridzyē bátswi baara mukele ti nswe mbwuru wu aasoolo ku oli Yiisu, faana oleye mpaala basyimi nde.

12 Bitsughu bisemene áli biisyili nsomo kyiri kii Paake eto. Yiisu ágyene ku Betani, bula bu Ladzare, wu ásiili nde mu lipfu. **2** Oko áli bananŋa Yiisu bi-odza. Marete ákakaba bo bi-odza, ya Ladzare áli emō ya ba bákadza ŋa tabele. **3** Mari ágwolon etsulu e litere ki mananaase mama nare mama ntala yi alagha, ágyiri mo mu myili mi Yiisu ya ábwi ogyala mo mu mfu a nde ya nzo yohonon yfwulu mu mpihi a mananaase. **4** Mu obo Yuda Isikaryote, mumō mu binduonon bi nde, wu akala aatyeghe nde, álye ndiri: **5** «Mu emakye liigwene otyeghe mananaase ma mu nkama-tere yi a denali mpaala ligwa nzi oyo kunda bawele?» **6** Yuda ka álye obo mu nkooro a nyii a bawele o, lo mu kuulu nde áli nga-a-pfyibi. Me nde áakakebe empogholon e nzi ya nde ákaturu nzi yi bákalo mu kye. **7** Lo Yiisu álye kunda nde ti: «Nyaá nde! Nde aasi obo mu nkooro a etsughu ki akala baadzyighi me. **8** Bawele, be sa likala ya bo mu matala mwohonon. Lo me ka ankala ya be mu matala mwohonon o.» **9** Mpwumu a ba-Dzwife yi nene yigyughu ti Yiisu áli mu Betani. Mu obo, bo ka bágyi yini a mu nkooro a Yiisu ndeme o, lo mu omonon si Ladzare wu ásiili nde ŋa kara li ba bákpi. **10** Bakwuru ba bangaa ba Nzaami bágwolon si munkaana wu odzwa Ladzare, **11** mu kuulu me mu nkooro a nde matala a ba-Dzwife wu alagha ákapala mu emvuhunu e bo ya abwi okasa kana mu Yiisu. **12** Iŋa mbihi a etsughu ekye, mpwumu a baara yi nene yi áagyí ku kyiri,

yígyughu ti Yíisu aakayabehene ya Yerusaleme. **13** Bo bágwolo matswene ma maba ya bápala mu oyibwana a nde. Bo bákakehe bingubu ti: «Odzaana! Liseme kundaa munde wu li mu ogya mu nkumu a Mfumu, mukogho a Isaraye!» **14** Yíisu ágwolo mwana nyama wu a nkumu aane ya nde ábwi nsini ŋa yulu a nde, bwunu a bu básono ti: **15** «Mutughu wu a Siyoni, akala a nzalamweé o! Mukogho a we li mu ogya, ya nde aakumu ŋa yulu a mwana a aane.» **16** Ku ebaana, binduono bi nde ka bíkabaghala mandagha ma mákaluru o. Lo ŋa óbagha Yíisu nsia, bo bálibili mweé ti mandagha mamu mu nkooro a Yíisu áli básono mo, ya me bwunu obo si bási mu nde. **17** Mpwumu a baara ba báli ya Yíisu ŋa ápaha nde Ladzare mu mpyeme ya ŋa ásiili nde nde ŋa kara li ba bákpi, yísuo bumpughulu mu nde. **18** Mpwumu a baara yíyabwana nde mu nkooro a bu bágyughu bo ti me nde ási elyimi ekye. **19** Ba-Faridzyé bákabili bo-a-bo ndiri: «Limono, be ka liileene ndagha si mó o. Baara bwohono bali mu okanama nde!» **20** ŋa kara li baara ba bákumu ku Yerusaleme ku oyisamana Nzaami ku kyiri, óli a ndaama ba-Ngereke. **21** Bo báyabehene kundaa Filipe, musi Betesayida, mu etsulu e nsie kii Ngaliile, ya báluomo nde ti: «Mfumu, bihi lidzyi omono Yíisu.» **22** Filipe áyilyele kundaa Andere, ya bo bansa buolo báyilyele kundaa Yíisu. **23** Yíisu ábvuhulu kundaa bo ti: «Matala maato ma bafaana osa Mwana a mbwuru nsia. **24** Mu enganma me ndyele be ti, kala ti liburu li bele li liibwi ŋa nsie ka likpi o, lo sa likala ngasighi. Lo kala ti lo likpi, lo sa likala ya bimburu bilagha. **25** Munde wu dzyi laama li nde, nde sa apfihili lo, ya munde wu áabele laama li nde mu nsie yi, nde sa akebe lo mu mibvu ya mibvu. (aiōn g166) **26** Kala ti mbwuru dzyi osalala me, nyaá nde anama me, ya oŋo ŋa ndi me, oŋo si musala a me akala aakala. Kala ti mbwuru salala me, Taara sa asa kuulu bagwa nde budziri.» **27** «Mu matala ma, muwumunu a me li maá-maá. Ya mayo me aandeye? Taara, bvuwu me mu tala lili mpara li? Lo, me mu nkooro a tala lili mpara li me aangyi. **28** Taara, sa kuulu ti nkumu a we yikala a nsia!» Mu obo, likyi líbili ku yulu ya lílyele ndiri: «Me aansii yo nsia, ya me sa firinsa yo nsia.» **29** Mpwumu a baara yi áli oŋo yígyughu ya yílyele ti: «Ekye edzumu e mvulu!» Ba bake ti: «Munde ngye-yulu bili kundaa nde!» **30** Ya Yíisu ályele kundaa bo ti: «Likyi lilo ka mu nkooro a me libili o, lo mu nkooro a be. **31** Ma me matala ma mumfwunu a nsie. Me mu matala ma bali mu obyí mfumu a nsie yi ku mbala. **32** Lo, ŋa akala báseene me ŋa yulu nsie, me sa nsa kuulu ti baara bwohono bagya kundaa me.» **33** Mu mbiili oyo, nde ásuu mu nki lipfu nde akala aakpa. **34** Mpwumu a baara yíbvuhulu kundaa nde ti: «Bihi líimono básono mu Mikyene ti Kriste faana okala mu mibvu ya mibvu. Lo bunu-abo we li mu okalyele ti bafaana oseene Mwana a mbwuru? Mwana a mbwuru munde nande?» (aiōn g165) **35** Yíisu ábvuhulu bo ti: «Otsyeme oli nkini ŋa kara li be mu mana a matala. Lidzyara mu matala ma lili be kunsá otsyeme, mpaala mpyibi yinyaá obwa ŋa kara li be ensihibi. Mu kuulu mbwuru wu aakadzyara kunsá mpyibi ka akasoolo ku ali mu okagye o. **36** Mu matala ma lili be kunsá otsyeme, lisa kana mu munde wu aakagwa otsyeme, obo be sa likala baana ba otsyeme.» Bu amana obili obo, Yíisu ámara ŋa kara li bo ya ágyene kuulu bo ka bákughu nde omono o. **37** Si buulu ti Yíisu ási bilyimi bilagha ŋa mihi mi bo, bo ka bási kana mu nde o, **38** mpaala ndagha yi ólyele mubighili Edzayi yikeele: «Mfumu, na aasi kana mu mandagha ma liilyele bihi? Kundaa nande Mfumu aasuo lileene li nde?» **39** Bo bákwno osa kana, ti bu olyele Edzayi: **40** «Nde aadzwi bo mihi ya nde aagwi bo mikolo mimi ngyi, mpaala banyaá omono mu mihi mi bo, banyaá obaghala mu mikolo mi bo, ya banyaá ogyinji mayele, ya mpaala me ndzuhu bo!» **41** Edzayi ábili obo mu kuulu nde ámono nsia a Yíisu, ya ábili mu Nde. **42** Lo, ŋa kara li bomu bamfumu ba ba-Dzwife, balagha bási kana mu Yíisu. Lo mu nkooro a ba-Faridzyé, bo ka bákakihi nde ŋa mihi mi baara bwohono o, mpaala banyaá obyí bo mu nzo a lisamana a ba-Dzwife. **43** Bo bákabvulu odzyi nsia yi ookagwa bo baara, lo ka li oyo yi aakafa kundaa Nzaami o. **44** Mu obo Yíisu ábili mu likyi lili mpini ndiri: «Nswe munde wu aasa kana mu me, ka mu me nde asi kana o, lo mu munde wu aagweghe me. **45** Ya mbwuru wu mono me, nde mono si munde wu aaweghe me. **46** Me aangyi ŋa nsie ti anga otsyeme, mpaala nswe munde wu áasa kana mu me, anyaa okala kunsá mpyibi. **47** Kala ti mbwuru gyughu mandagha ma me ya bihi mo okebe, me ka ndamana nde o, buulu me ka aangyi mu oyalamana nsie o, lo me aangyi mu oyabvwu nsie. **48** Nswe munde wu aabihi me ya bihi okihi mandagha ma me, nde li a nsughu

alamana a nde: Me ndagha yi aandyele me akala aalamana nde mu etsughu kii masini. **49** Mu kuulu, me ka aambili mu litumu li meme o, lo Taara wu áagweghe me áatumu me mandagha ma mfaana olyele me ya bu mfaana oluo me. **50** Ya me nsoolo ti litumu li nde liikagwa laama lili mibvu ya mibvu. Mandagha ma ndyele me, me ndyele mo ti bwunu a bu ólyele me Taara mo.» (aiōnios g166)

13 Nsomo basomo kyiri kii Paake, Yiisu bu asoolo ti matala ma nde mama omara ŋa nsie mu ogye kundaa Taara maato, nde wu áakadzyi baba nde ba bali mu nsie, nde ádzyi bo tee ku masini. **2** Mu matala mama nkonkolo, Yiisu ákadza ya binduono bi nde, dyabulu áshobobo etsimi kii otyeghe Yiisu mu mukolo a Yuda, mwana a Simō Isikaryote. **3** Yiisu ásoolo ti Taara ágwi byehene ŋa myaā mi nde, ya nde kundaa Nzaami áfi, ya li mu obvughuru kundaa Nzaami. **4** Yiisu átemene, ádzwulu enkuru e nde kii ŋa yulu, ya ásyere eko ki baakagyala madza mu bala. **5** Nde álo madza mu ndoŋo, ábaana oswagha myili mi binduono bi nde, ya ábwi ogyala mye mu eko ki baakagyala madza ki ásyere nde mu bala. **6** Bu ato ŋa nkulu a Simō-Piere, Simō-Piere áfwulu nde ti: «Mfumu, me we aaswagha me myili?» **7** Yiisu ábvuhulu nde ti: «Mu matala ma, we ka kughu osoolo ndagha yi ndi mu okagyighili me o, lo mbala-tsughu, we sa baghala yo.» **8** Piere ályele nde ndiri: «Si okala ka bunu, we ka kughu oswagha me myili o!» Yiisu ábvuhulu kundaa nde ti: «Kala ti me ka nswagha we myili o, lo we ka akala emo ya me o.» (aiōn g165) **9** Simō-Piere ályele kundaa nde ti: «Mfumu, mu obo ka swagha me yini a myili o, lo swagha me myaā ya mutswi si!» **10** Yiisu ábvuhulu kundaa nde ti: «Mbwuru wu maagyogho madza, li a yina nzala oswagha myili, mu kuulu nyuru a nde yohono yili tse-tse. Be lili baba tse-tse, lo ka be bwohono o.» **11** Yiisu ásoolo mbwuru wu akala aatyeghe nde, mu obo nde ályele ti: «Be bwohono ka lili baba tse-tse o.» **12** Mu matala ma ámana nde oswagha bo myili, nde áfirilaha enkuru e nde kii yulu, ábvughuru ábwi-nsini ŋa tabele ya áfwulu bo ti: «Be liibaghala ndagha yi aangyighili me be? **13** Be liikata me mu “Muluo” ya “Mfumu”, mu oyo be lili a bwu, mu kuulu me ndi Muluo ya Mfumu. **14** Mu obo, kala ti me aanswagha be myili, me wu ndi Mfumu ya

Muluo, behe si lifaana okaswagha myili be a be. **15** Me nsuo be bu lifaana osa. Bu aansie me kundaa be, behe si lisa obo kundaa babamō. **16** Mu engañma me ndyele be ti, Nkana ka bvulu mfumu a nde mu mupfunu o, bwunu we ntumu ka bvulu munde wu aagweghe nde mupfunu o. **17** Be bu lisoolo ndagha yi, be sa likala a esee kala ti, be lisalala yo. **18** Me ka ndyele ndagha yi mu nkooro a be bwohono o, me nsoolo babo ba aansuolo me. Lo ndagha oyo yi básono mu Mikaana mi Nzaami yifaana okeele: “Munde wu líikadza limpa emō ya me, ayi mutaara a me”. **19** Mu matala ma, me ndyele be ndagha yi aabwa nsomo yo yibwa, mpaala ŋa akala oobwa ndagha me, be lisa kana ti “Me Ndi”. **20** Mu engañma me ndyele be ti, nswe munde wu aagyagha munde wu ngweghe me, me agyagha, munde wu gyagha me, gyagha wu áagweghe me.» **21** Bu abili obo, endwi e nyuru épala Yiisu ya nde ályele ti: «Mu engañma me ndyele be, mumō ŋa kara li be sa atyeghe me.» **22** Binduono bíkala bambaala ya bíkafwulu ti nde mu nande ákabili. **23** Mumō ŋa kara li binduono, munde wu ókadzyi Yiisu, áli abwi-nsini ŋa bele a nde. **24** Simō-Piere ákoro enduono ekye mu kuulu kye efwulu Yiisu, mu nande nde ákabili obo. **25** Enduono ekye bu esini ŋa etulu e Yiisu, éfwulu nde ti: «Mfumu, na munde?» **26** Yiisu ábvuhulu ndiri: «Me munde wu aangwa me ekele ki limpa ki àantsubu me mu ndoŋo.» Yiisu ágwolo ekele ki limpa ki átsubu nde mu ndoŋo ya ágwi kye kundaa Yuda, mwana a Simō Isikaryote. **27** Yuda bu agyagha ekele ki limpa ekye, Satana ásono mu nde. Yiisu ályele kundaa nde ti: «Ndagha yi dzyi we ogyighili, gyighili yo mu maswa-maswa.» **28** Mbwuru si mumō mu ba báli oŋo, ka ábaghala o mu emakye nde ábili obo. **29** Buulu Yuda aakakwara empogholo e nzi, babake bátsimi ti Yiisu nde áatumu mu oyiswumu bilogho bi báli a nzala a bye mu kyiri, bwunu we mu oyigwa bilogho kundaa bawele. **30** Bu amana agyagha ekele ki limpa ekye, ŋaana oŋo, nde ápala. Mpyibi áli yi maabwa. **31** Yuda bu apala, Yiisu ályele ndiri: «Mu matala ma, Mwana a mbwuru maabagha nsia, ya Nzaami aabagha nsia mu nde. **32** Kala ti Nzaami bagha nsia mu nde, Nzaami ndeme si sa agwa Mwana a nde nsia, ya edzi-dzighi, nde sa agwa yo. **33** Baana ba me, me ndi ya be mu mana matala. Be sa lisagha me. Ya ti bwunu a bu aandyele me kundaa ba-Dzwife ti: “Ku aangye me, be ka

likughu ogye oko o.” Mu matala ma, me ndyele obo kundaa behe si. **34** Me ngwi be mukyene wu munyaghara: Liikakala a dzyi be a be. Bwunu a bu aandzyi me be, behe si liikadzyi be a be. **35** Kala ti be likala a dzyi be a be, baara bwohonono sa basoolo ti be lili binduono bi me.» **36** Simō-Piere áfwulu nde ti: «Mfumu, we kunu aagye?» Yiiisu ábvuhulu nde ti: «Oko ku aangye me, we ka kughu onama me mu matala ma o. Lo ku nkulu, we sa nama me.» **37** Piere ábvuhulu nde ti: «Mfumu, mu emakye me ka nkughu onama we mu matala ma o? Me aankughu mu ogwa laama li me mu nkooro a we!» **38** Yiiisu ábvuhulu ndiri: «We aakughu mu ogwa laama li we mu nkooro a me! Mu enganma, me ndyele we ti mu mansa matere we sa tunu me, nsomo mulumu a nsuhu akuolo.»

14 Yiiisu ályele kundaa binduono bi nde ti: «Mikolo mi be ka mikala maã-maã o. Lisa kana mu Nzaami, lisa si kana mu me. **2** Mu nzo a Taara a me oli a bibini bilagha. Kala pele, me ka aakandyele be ti me sa yingyighili be ebini o. **3** Me yingyighili be ebini, me sa yamvughuru mu ogwolo be, mpaala ŋa ebini ki akala aankala me, behe si likala oŋo. **4** Oko ku ndi mu ogye me, be lisoolo nzili yi baakagye oko.» **5** Toma ályele nde ti: «Mfumu, bihi ka lisoolo ku li mu ogye we o, lo bunu bihi liisoolo nzili yi baakagye oko?» **6** Yiiisu ályele nde ti: «Me ndi nzili, enganma ya laama. Ka oli a mbwuru wu kughu ogye kundaa Taara o kala ti nde ka luru mu me o. **7** Kala ti be liisoolo me, be liikaasoolo si Taara a me. Ya mu matala ma, be liisoolo nde ya be liimono nde.» **8** Filipe ályele nde ti: «Mfumu, suo bihi Taara, ya obo okughu mu bihi.» **9** Yiiisu ábvuhulu ti: «Filipe, edzighi e lagha me ndi ya be, lo we ka soolo me! Munde wu mono me, Taara amono. Mu emakye we lyele ti: “Suo bihi Taara?” **10** We ka li a kana o ti me ndi mu Taara ya Taara li mu me? Mandagha ma aakandyele me be, ka meme aakambagha mo o, lo Taara wu li mu me, aakakuhi bigyighili bi nde ndeme. **11** Lisa kana mu me, ti me ndi mu Taara ya Taara li mu me. Kala pele, lisa kana yini mu nkooro a bigyighili bi.» **12** «Mu enganma, me ndyele be: Munde wu aasa kana mu me, ndehe si sa asa bigyighili bi aakangyighili me. Nde sa asa bi bibvulu bunene ya bi aanso me, mu kuulu me ndi mu ogye kundaa Taara. **13** Mandagha mwohonono ma akala liiluomo be mu nkhwumu a me, me sa ngyighili

mo, mpaala Taara abagha nsia mu Mwana. **14** Kala ti be liluomo elogho mu nkhwumu a me, me sa ngyighili obo.» **15** «Kala ti be lidzyi me, likebe Mikyene mi me. **16** Me sa nduomo kundaa Taara agweghe be Mubaha mukimi wu áayakala ya be mu matala mwohonono. (aiōn g165) **17** Nde me Mufulu wu enganma, munde wuulu baara ba nsie ka bakughu okihi o, mu kuulu bo ka bakughu omono ya ka bakughu osoolo nde o. Lo be, be lisoolo nde, mu kuulu nde li ŋa kara li be, ya nde sa akala mu be. **18** Me akala ka ansihi be bisyana o, me sa yambvughuru kundaa be. **19** Matala masala masyili, nsie ka yifirimono me o. Lo be sa limono me, mu kuulu me ndi mweē, ya behe si sa likala mweē. **20** Mu etsughe me ekye, be sa libaghala ti, me ndi mu Taara a me, anga bu lili be mu me, ya me ndi mu be. **21** Munde wu dzyi me, me munde wu li a Mikyene mi me ya wu aakanama mye. Mu obo munde wu dzyi me, Taara a me sa adzyi nde, mehe si sa ndzyi nde ya sa me moŋono kundaa nde.» **22** Mu obo, Yuda wuulu ka wu a musi Isikaryote o, áfwulu nde ndiri: «Mfumu, mu emakye we akala aamoŋono yina kundaa bihi, lo ka kundaa basi nsie o?» **23** Yiiisu ábvuhulu nde ti: «Kala ti mbwuru dzyi me, nde sa anama mandagha ma me, ya Taara a me sa adzyi nde. Mu obo, bihi sa ligya kundaa nde ya sa likala mu nde. **24** Munde wu gwene dzyi me, ka aakanama mandagha ma me o. Ndagha yi lili mu okagyughe be, yo ka yifi kundaa me o, lo kundaa Taara wu aagweghe me. **25** Me aandyele be mandagha ma mu matala ma ndi me nkini ŋa kara li be. **26** Lo me Mukala, Mufulu a Ngili wu akala oogweghe Taara mu nkhwumu a me, sa aluo be mandagha mwohonono ya sa alibili be mweē mu mandagha mwohonono ma ándyele me be.» **27** «Me nsihi be edzuunu, me ngwi be edzuunu e me. Me ka ngwi be kye ti anga bu ookagwa baara ba nsie o. Mikolo mi be minyaã okala maã-maã ya minyaã okala a nzalamweē. **28** Be áli liigyughe ti me áandyele be ndiri: “Me ndi mu ogye, ya me sa yamvughuru kundaa be”. Kala ti be áli liikadzyi me, be likaakala mu esee mu ogye o me kundaa Taara, mu kuulu Taara bvulu me mupfunu. **29** Me ndyele be mandagha mamu mu matala ma, nsomo mo mabwa, mu kuulu ŋa akala maabwa mo, be lisa kana. **30** Me ka afirimbili ku olagha ya be o, mu kuulu mfumu a nsie yi li mu ogya. Nde ka li a litumu ŋa yulu a me o. **31** Lo baara ba nsie bafaana osoolo ti me ndzyi Taara ya

me aakansa mandagha ma aakatumu nde me. Litemene, litswe limara ŋa ebini kil»

15 «Me ndi muti a bviini wu a ngan̄ma ya Taara a me li munde wu aakasala mu nseghe a bviini oyo. **2** Nswe mpala yi li mu me, yiili ka yiikaburu mburu o, nde aakamaha yo. Ya nde aakatebe mampala ma maakaburu mburu mu kuulu mo maburu mburu yi alagha. **3** Be, be lili tse-tse mu nkooro a mandagha ma aandyele me be. **4** Likala ba banabara mu me ti bu ánabara me mu be! Mpala si mō ka yikughu oburu mburu yomo o, kala ti yo ka yili yinabara mu muti a bviini o. Bumō si kundaa be, kala ti be ka likala ba banabara mu me o, be ka liburu mburu o. **5** Me ndi muti a bviini, be lili mampala. Munde wu akala wu aanabara mu me, ti bwunu a bu ndi me wu aanabara mu nde, nde sa aburu mburu yi alagha. Lo kala ti me we, be ka likughu ogyighili ndagha si mō o. **6** Kala ti mbwuru ka kala wu anabara mu me o, sa batsili nde ku mbala ti anga mpala, ya yo sa yikee. Ya mampala ma makee baakatolo mo, baakatubu mo ku mbaa, ya mo maakadzighi. **7** Kala ti be likala ba banabara mu me, ya mandagha ma me makala manabara mu be, liluomo nswe elogho ki liidzyi be ya be sa libagha kye. **8** Bu ngu bu okamonono nsia a Taara a me: be liburu mburu yi alagha ya likala binduono bi me. **9** Me aakandzyi be ti bu ódzyi me Taara. Likala ba banabara mu dzyi li me. **10** Kala ti be linama Mikyene mi me, be sa likala ba banabara mu dzyi li me, ti bwunu a bu aankebe me Mikyene mi Taara a me ya me ndi wu anabara mu dzyi li nde.» **11** «Me ndyele be mandagha ma mu kuulu esee e me ekala mu be, ya esee e be ekala kii mukughu. **12** Wu me mukyene wu ngwi me be: Liikakala a dzyi be a be ti bu aakandzyi me be. **13** Ka oli a dzyi li libvulu bunene ti lili munde wu aagwa laama li nde mu ba adzyi nde o. **14** Be lili bandughu ba me, kala ti be liikasa mandagha ma aakantumumu me be. **15** Me ka firinta be basala o, mu kuulu musala ka soolo mandagha ma ookayighili mfumu a nde o. Lo be, me nti be bandughu ba me, mu kuulu me aansuo be mandagha mwohonono ma aangyughu me kundaa Taara a me. **16** Ka oli be liisuolo me o, lo me aansuolo be ya me aando be mu esala kii ogye, mu oyiburu mburu, mburu yi aagyili. Mu obo, Taara sa agwa be byehene bi akala liiluomo be kundaa nde mu nkwumu

a me. **17** Mukyene wu ngwi me be ngu wu: Liikakala a dzyi be a be.» **18** Yiisu afrilyele ndiri: «Kala ti baara ba nsie babele be, lisoolo ti bo bátswama bele me nsomo ya be. **19** Kala ti be áli baara ba nsie, nkini nsie yikaadzyi be, mu kuulu be likakala baba nde. Lo me áansuolo be ya áampaha be ŋa kara li baara ba nsie. Be ka lili baara ba nsie o, me mu obo nsie yili mu okabele be. **20** Litsimi mu mandagha ma aandyele me be: “Nkana ka bvulu mfumu a nde mu mupfunu o”. Kala bo baamwehē me kimini, bo sa bamwehē behe si kimini. Kala bo baakebe mandagha ma me, lo bo sa bakebe mandagha ma behe si. **21** Lo bo sa bamwehē be kimini mu nkooro a nkwumu a me, mu kuulu bo ka basoolo munde wu aagweghe me o. **22** Kala ti me ka ángyi o, ya kala ti me ka ándyele bo o, bo ka baakakala a masumu o. Lo mu matala ma, bo ka bali a bwuu li baagwa o. **23** Nswe munde wu bele me, nde bele si Taara a me. **24** Kala ti me ka áansi mandagha mama okinjimi ŋa kara li bo o, mandagha maala mbwuru mukimi nkini ka ámaasa mo o, bo ka bakaakala a masumu o. Lo mu matala ma maala bo baamono mo, bo baabele bihi, me ya Taara a me. **25** Mu kuulu mandagha ma, ma básono mu Mikyene mi bo makee: “Bo baabele me ku ogwene a bwu”». **26** «Mu matala ma akala oogya Mubaha wu aangweghe me be ŋa aankala me kundaa Taara, Mufulu wu engan̄ma wu aafa kundaa Taara, nde ndeme akala aasuo bumpughulu mu me. **27** Ya behe si sa lisuo bumpughulu mu me, mu kuulu be lili ya me obaana ku ebaana.»

16 «Me aandyele be mandagha mwohonono ma mpaala kana li be linyaã obwa. **2** Mu kuulu sa bapaha be mu manzo ma lisamana ma ba-Dzwife. Ya bitsughu bili mu ogya biili, babo ba akala baadzwa be sa batsimi ti obo Nzaami bo bali mu osalala. **3** Bo sa basa obo, mu kuulu bo kaala ka básoolo Taara o, ya kaala ka básoolo me o. **4** Lo me aandyele be mandagha mwohonono ma, mpaala ŋa ooto matala mamo, be lilibili mweē ti me áli áandyele be mo. Ku ebaana, me ka aandyele be mo o, mu kuulu me aandi ya be.» **5** «Ya mu matala ma me ndi mu ogye kundaa munde wu aagweghe me, ya mbwuru si mumō mu be ka aafwulu me o ti: “Kunu we gyene”? **6** Mu kuulu me aandyele be mandagha mamo, mikolo mi be miilwulu mu minyoō. **7** Mu engan̄ma me ndyele be ti:

ali obvulu bubwe kundaa be ti me ngye. Mu kuulu, kala ti me ka ngyene o, Mubaha ka agya kundaa be o. Lo kala ti me ngyene, me sa ngweghe be nde.» 8 «Mu matala ma aagya nde, nde sa asuo emwehẽ kundaa basi nsie mu mi mitala masumu, bunsumu ya muyala: 9 mu ndagha yitala masumu, mu kuulu bo ka baasi kana mu me o. 10 Mu ndagha yitala bunsumu, mu kuulu me ndi mu ogye kundaa Taara, ya be ka lifirimono me o. 11 Mu ndagha yitala mumfwunu, mu kuulu mfumu a nsie yi bamaalamana nde.» 12 «Me nkini ndi a mandagha malagha ma aandyele me be, lo mu matala ma, be nkini ka lili a mikolo mi okebe mo o. 13 Ŋa akala oogya Mufulu wu enganyma, nde sa abiri be kunsu enganyma kyehene. Mu kuulu nde akala ka abili mu litumu li ndeme o, lo nde sa alyele be mandagha ma akala aagyughu nde, ya nde sa alyele be mandagha mwohonu ma maagya ku nkulu. 14 Nde sa agwa me nsia, mu kuulu nde sa agyagha mandagha ma aandyele me nde, ya nde sa atuoho mo kundaa be.» 15 «Bilogho bi Taara byehene bili bibi ndaa me. Mu obo me aandyele ti nde sa atuoho kundaa be mandagha ma aagyagha nde kundaa me.» 16 «Matala masala masyili, be ka lifirimono me o, ya mana matala masyili, be sa lifirimono me.» 17 Binduono bi nde bibike bĩbwi obili bye-a-bye ndiri: «Nsa ndagha nde adzyi olyele bihi mu mbiili yi: “Matala masala masyili, be ka lifirimono me o, ya mana matala masyili, be sa lifirimono me”, bwunu we: “Me ndi mu ogye kundaa Taara?”» 18 Bo báfiribwehe ti: «“Matala masala” bunu odzyi olyele? Bihi ka lili mu obaghala ndagha yi adzyi nde olyele o!» 19 Yiisu bu asoolo ti bo bákadzyi ogwa nde bifwulu, nde alyele kundaa bo ti: «Be a be lili mu okasagha mbaala a ndagha a me yi: “Matala masala masyili, be ka lifirimono me o, ya mana matala masyili, be sa lifirimono me.” 20 Mu enganyma me ndyele be ti: Be sa lilili ya sa lisyama, lo basi nsie sa bakala kunsu esee. Be sa linyoõ, lo ŋa mbihi, minyoõ mi be sa mikighiri esee. 21 Mu matala mama oburu, mukaha akasomo kunsu minyoõ mu kuulu tala li nde lili omono mpara liikughu. Lo nde bu amana oburu mwana, dzimini mpara a nde nsimi. Nde somo kunsu esee mu kuulu nde aaburu mwana. 22 Mu matala ma, behe si lili kunsu minyoõ. Lo mu matala ma akala aamfirimono me be, mikolo mi be sa mikala

kunsu esee. Ya esee ekye, mbwuru si mumõ ka aleene ogwohono be kye o.» 23 «Mu etsughu ekye, be ka lifirigwa me efwulu mu ndagha si mõ o. Mu enganyma, me ndyele kundaa be: Mandagha mwohonu ma liluomo be kundaa Taara mu nkumu a me, nde sa agwa be mo. 24 Tee mu matala ma, be nkini liluomo elogho mu nkumu a me o. Liluomo, sa bagwa be, mpaala esee e be ekala kii mukughu.» 25 «Me aandyele be mandagha mwohonu ma mu mankumu, lo matala mali mu ogya maala me ka firimbili kundaa be mu mankumu o. Lo me sa ndyele be mandagha ma matala Taara a me ŋa tse-tse. 26 Mu etsughu ekye, be sa liluomo kundaa Taara mu nkumu a me. Lo me ka ndyele be o ti me sa mbuono Taara mu nkooro a be. 27 Mu kuulu Taara ndeme dzyi be mu nkooro a ku liidzyi be me ya ku liisi be kana ti me kundaa Nzaami aampfi. 28 Me aampfi kundaa Taara ya me aangyi ŋa nsie. Lo mu matala ma, me ndi mu osihi nsie, ya ndi mu obvughuru kundaa Taara.» 29 Binduono bi nde bilyele kundaa nde ti: «Mu matala ma, we li mu obili ŋa tse-tse, ya we aanyaã mbiili a we yi a mu mankumu. 30 Mu matala ma, bihi lisoolo ti we soolo mandagha mwohonu ya we ka li a nzala a ti bagwa we bifwulu mu mõ o. Mu obo, bihi lisi kana ti we kundaa Nzaami aafi.» 31 Yiisu ábvuhulu bo ti: «Mu matala ma be lisi kana? 32 Limono, matala maabehene, ya mo mamaato, maala sa batsala be, nswe mbwuru sa abara ku áfi nde, ya be sa lisihi me ngasighi. Lo me ka ndi ngasighi o, mu kuulu Taara li emõ ya me. 33 Me aandyele be mandagha ma mu kuulu be likala a edzuunu mu me. Mu nsie yi be sa limono kimini, lo likala a bukyini! Me aandughulu lileene li nsie!»

17 Yiisu bu amana obili obo, ákala ku yulu ya ályele ti: «Taara, matala maato, sa Mwana a we nsia, mpaala mwana a we asa we nsia. 2 We aagwi nde emfumu ŋa yulu a baara bwohonu, buulu nde agwa laama lili mibvu ya mibvu kundaa bo bwohonu ba aagwi we nde. (aiōnios g166) 3 Ya laama lili mibvu ya mibvu lili ti bo basoolo we, we Nzaami mumõ wu a nganyma, ya basoolo Yiisu-Kriste, munde wu aagweghe we. (aiōnios g166) 4 Me aansu we nsia ŋa yulu a nsie, ya me aamana esala ki aagwi we me osa. 5 Ya mu matala ma, Taara, sa me nsia ŋa li we, nsia oyo yi ándi a me ŋa ándi me kundaa we, nsomo we gyighili nsie.» 6 «Me aansu kuulu ti baara ba

ágwolo we mu nsie yi basoolo we, babo ba ágwi we me. Bo báli baba ndaa we, we aagwi me bo ya bo baakebe ndagha a we. 7 Mu matala ma bo basoolo ti byehene bi ágwi we me kundaa we bífi, 8 ya me aantwoho kundaa bo mandagha mamo ma ágwi we me. Bo baakihi mo, ya bo baasoolo mu enganyma ti me kundaa we aampfi, ya bo baasi kana ti we aagweghe me.» 9 «Me nduomo kundaa we mu nkooro a bo. Me ka nduomo we mu nkooro a baara ba nsie o, lo mu babo ba aagwi we me, buulu bo bali baba ndaa we. 10 Byehene bibi me bili bibi we, ya byehene bibi we bili bibi me. Ya nsia a me yili mu okamohonono mu bo. 11 Me ka afirinkala ja nsie o, lo bo bali mu osyili ja nsie, mu kuulu me ndi mu ogya kundaa we. Taara wu a ngili, kebe bo mu nkumu a we, nkumu yi aagwi we me, mpaala bo bakala emō ti anga bu lili bihi a we emō. 12 Ja aandi me ya bo, me aakankebe bo mu nkumu a we yi ágwi we me. Me aakankala bo ya si mumō mu bo ka aadzimini o, ja yulu a yini a munde wu áafaana odzimini, mpaala mamo ma básono mu Bisono makeele.» 13 «Mu matala ma, me ndi mu ogya kundaa we ya me ndyele mandagha ma ja ndi me nkini ja nsie, mpaala bo bakala a esee e me mu bo, esee kii mukughu. 14 Me aanduo bo ndagha a we, ya nsie yiibebo bo, mu kuulu bo ka bali baara ba nsie o, ti anga me, me ka ndi mbwuru a nsie o. 15 Me ka nduomo we mu omaha bo ja nsie o, lo we kebe bo mu Wu Mubi. 16 Bo ka bali baara ba nsie o, ti anga me, me ka ndi mbwuru a nsie o. 17 Sa kuulu ti bo bakala baara ba we mu nzili a enganyma: Ndagha a we yili enganyma. 18 Bwunu a bu aagweghe we me mu nsie, me ngweghe boho si mu nsie. 19 Ya me meme ngwi we bumweē bu me mu nkooro a bo, mpaala boho si bakala baara ba we mu enganyma.» 20 «Me ka nsamana yini a mu bo o, lo mu babo si ba akala baasa kana mu me mu nkooro a maluo ma bo. 21 Me nsamana si mu kuulu bo bwohonono bakala mbwuru mumō ti bu li we Taara mu me, ya me mu we. Boho si bakala mu bihi, mpaala baara ba nsie basa kana ti we aagweghe me. 22 Ya me aansii bo nsia yi áasi we me, mpaala bakala mbwuru mumō ti anga bu lili bihi a we mbwuru mumō. 23 Me nkala mu bo ya we kala mu me. Obo bo bakala mbwuru mumō mu nganyma, ya mpaala baara ba nsie basoolo ti we aagweghe me ya we aakadzyi bo ti bwunu a bu aakadzyi we me.» 24 «Taara, me ndzyi ti babo

ba aagwi we me, bakala si ya me oño ja akala aankala me, ya bo bamono nsia a me, nsia yi aasi we me, mu kuulu we áadzyi me nsomo we gyighili nsie. 25 Taara wu a nsumu, baara ba nsie nkini bámaasoolo we o, lo me aansoolo we, ya binduono bi me bi biisoolo ti we aagweghe me. 26 Me aansii kuulu ti bo basoolo nkumu a we, ya me sa firinsa obo, mpaala dzyi li li a we mu me likala mu bo, ya me nkala mu bo.»

18 Yiisu bu amana olyele mandagha mamo, ápala ya binduono bi nde ya ágyene ku ngulu a emwe-mwele kii Sederō. Oko óli a ebwa ki miti, ya Yiisu ásomo omo ya binduono bi nde. 2 Yuda wu áatyeghe Yiisu, ákasoolo ebini ekye, mu kuulu Yiisu ya binduono bi nde báli a epfu kii okayibvuhunu oko. 3 Yuda ábiri mpwumu a bambumbulu ya bankyele ba nzo a Nzaami ba ógwi bakwuru ba bangaa ba nzaami ya ba-Faridzyē. Bo básomo kunsu ebwa ki miti ya bitsyi bi mbaa, miindi ya bidzwana. 4 Buulu Yiisu ali ásoolo mandagha mwohonono ma maagya mu nde, ásele kundaa bo ya ályele ti: «Be nande lili mu okasagha?» 5 Bo bábvuhulu nde ti: «Yiisu, musi Nadzarete.» Nde ályele bo ti: «Me me.» Yuda wu áatyeghe nde áli ja kara li bo. 6 Ja ólyele bo Yiisu ti: «Me me», bo bábvughuru limbi-mbihi ya bábwu mu nsie. 7 Yiisu áfirifwulu bo ti: «Be nande lili mu okasagha?» Bo bábvuhulu nde ti: «Yiisu, musi Nadzarete.» 8 Yiisu ábvuhulu bo ti: «Me aandyele be ti, me me. Kala ti ngu me be lili mu okasagha, linyaá baara ba bagye.» 9 Obo me bu okeele ndagha yi ályele nde ti: «Me ka aandzihibi si mumō mu babo ba aagwi we me o.» 10 Simō-Piere wu áali a lipee, ádzuru lo mu likuru, ya bu akaha musala e mukwuru a bangaa ba Nzaami, átsyiri nde tswi lili ku kwogho kii babaghala. Nkwumu a musala munde áli Malekuse. 11 Lo Yiisu ályele kundaa Piere ti: «Bvurulu lipee li we munsu likuru li lo! We bu tsimi ti me ka nkughu onya ebaha kii kimini ki ti bu ootumu me Taara o?» 12 Mu obo, mpwumu a bambumbulu, mfumu a bo ya bankyele ba bamfumu ba ba-Dzwife básyimi Yiisu ya bákuru nde bibolo. 13 Bo bábiri nde nsomo kundaa Aane, buko bu Kayife munde wu áali mukwuru a Bangaa ba Nzaami mu mubvu munde. 14 Ngu Kayife áagwi ba-Dzwife luo ti: «Bubwe mbwuru mutsyini akpa mu nkooro a baara bwohonono». 15 Simō-Piere ya enduono ekimi bákanama Yiisu.

Buulu Mukwuru a bangaa ba nzaami ákasoolo enduono e Yĩisu ekye, kye ésomo ya Yĩisu mu mbala a nzo a Mukwuru a bangaa ba nzaami. 16 Piere átemene ku mbala ŋa bele a muŋma a nzo. Enduono ekye ki ósoolo Mukwuru a bangaa ba nzaami épala, ébili ya mukaha wu áali nkyele a muŋma a nzo ya nde ásohobo Piere. 17 Mu obo, musala wu mukaha wu áali nkyele a muŋma a nzo ályele kundaa Piere ndiri: «Wehe si ka li mumō ŋa kara li binduono bi mbwuru wu o?» Piere ábvuhulu ti: «Pele, me ka ndi enduono e nde o!» 18 Buulu óli a mpie, basala ya bankyele bábvughu mbaa ya báakagyoro. Piere si átemene ya bo ya ákagyoro mbaa. 19 Mukwuru a bangaa ba nzaami ábwi ogwa Yĩisu bifwulu mu binduono bi nde ya mu maluo ma nde. 20 Yĩisu ábvuhulu nde ti: «Me aakambili epankala ŋa nkulu a baara bwohonono. Mu matala mwohonono me aakanduo mu manzo mama lisamana ma ba-Dzwife ya mu nzo a Nzaami yi nene, mu ookabvuŋunu ba-Dzwife bwohonono. Me ka aandyele ndagha si mō mu ensweghe o. 21 Mu emakye we li mu ogwa me bifwulu? Mandagha ma aandyele me, fwulu mo kundaa babo ba báakagyughu me. Bo bagyighili osoolo mandagha ma aandyele me.» 22 Yĩisu bu abili obo, nkyele mumo wu áali oŋo ákaha Yĩisu limpala ya ályele nde ti: «Oyo mvuru yi kughu ogwa we kundaa Mukwuru a bangaa ba nzaami?» 23 Yĩisu ábvuhulu nde ti: «Kala ti me bubi mbili, suo me bubi bubo. Lo kala ti me bubwe mbili, mu emakye we kaha me?» 24 Oŋo Ane ágweghe Yĩisu ya bibolo kundaa Kayife, Mukwuru a bangaa ba nzaami. 25 Mu matala ma ókagyoro Simō-Piere mbaa oŋo, báfwulu nde ti: «Wehe si ka li mumō mu binduono bi baghala wu o?» Piere átuŋu ya ályele ti: «Pele, me ka ndi enduono e nde o!» 26 Musala a Mukwuru a bangaa ba nzaami mumō, wu áali musi dzumu li munde wu ótsyiri Piere tswi ályele nde ti: «Ka oli we me aamono ku ebwa ki miti ya Yĩisu o?» 27 Piere áfiritunu nde, ya ŋaana oŋo, mulumu a nsuhu ákwolo. 28 Mu obo, mu minkya-nkya, bámara a Yĩisu kundaa Kayife, ya bábiŋi nde ku nzo a emfumu ki ba-Romē mu etsulu e nsie ekye. Babo ba bákabiri nde bábihi osomo munsu nzo oyo, mu kuulu banyaá osuŋumu ya mpaala badza kyiri kii Paake. 29 Mu obo, Pilate wu áali mfumu a etsulu e nsie ekye ágyabagha bo ku mbala ya áfwulu bo ti: «Mu nki ndagha be liifwunu mbwuru wu?» 30 Bo bábvuhulu nde

ti: «Kala ti mbwuru wu ka aasi bubi o, bihi ka likaatyeghe nde kundaa we o!» 31 Pilate ályele bo ti: «Ligwolo nde ya lilamana nde be beme ti bwunu a bu oli Mikyene mi be.» Ba-Dzwife bábvuhulu nde ti: «Bihi ka lili a muswa wu otsyiri mbwuru mukakana wu lipfu o!» 32 Obo me bu ófaana ookeele ndagha yi ólyele Yĩisu, ŋa ásuu nde mu nsa lipfu nde afaana okpa. 33 Pilate ábvughuru munsu nzo, áti Yĩisu mbili ya áfwulu nde ti: «Ngu we li mukogho a ba-Dzwife?» 34 Yĩisu ábvuhulu nde ti: «Mi lyele we mimye weme bagha mye, bwunu we baara bakimi baalyele we obo mu me?» 35 Pilate ábvuhulu nde ti: «Me, mu-Dzwife ndi? Baara ba weme ya Bakwuru ba bangaa ba nzaami baagyatyeghe we kundaa me! Nki ndagha we aasi?» 36 Yĩisu ábvuhulu nde ti: «Emfumu e me ka eli kii nsie yi o. Kala ti emfumu e me áli kii nsie yi, nkini basala ba me baakadzwana mpaala banyaá ogwa me ŋa myaá mi bamfumu ba ba-Dzwife. Lo, emfumu e me ka eli kii ŋa nsie ŋa o.» 37 Pilate áfwulu nde ti: «We ankoho mukogho li?» Yĩisu ábvuhulu nde ti: «We lyele ti me ndi mukogho. Me báburu me ya kala ti me áangyi mu nsie me mu okala mpughulu a enganma. Nswe munde wu li wu a enganma nde aakagyughu mandagha ma me.» 38 Pilate áfwulu nde ti: «Enganma emakye?» Pilate bu amana obili obo, áfiriyimono ba-Dzwife ku mbala ya ályele bo ti: «Me ka mono epfwumu ki oosi baghala wu o, mu kuulu me ntsyiri nde mukakana wu lipfu. 39 Lo, mu buulu epfu e be eli ti mu nswe kyiri kii Paake, me mfaana onyaá be mbwuru a boloko mutsyini, be lidzyi ti me nyaá be mukogho a ba-Dzwife?» 40 Mu obo bo bwohonono bábiŋi okehe bingubu ti: «Pele, ka munde o! Lo Barabase!» Lo Barabase munde áli ntwumu.

19 Mu obo, Pilate ágwi litumu ti babiri Yĩisu ya bakaha nde nsuwa-nsuwa. 2 Bambumbulu bátwu kagha lili mu mansiene, bákwighi nde lo mu mutswi ya bálaha nde enkuru kii mungala. 3 Bo báayabehene ya nde ya bákalylele nde ti: «Mboro a we, mukogho a ba-Dzwife!» Ya bákalaha nde mampala. 4 Pilate áfiripala ku mbala ya ályele kundaa ba-Dzwife ti: «Ligyughu, me nde aayambiri be ku mbala, mu kuulu be lisoolo ti me ka aambagha ebili mu nde o, mu kuulu me ntsyiri nde mukakana wu lipfu.» 5 Mu obo, bápala a Yĩisu ku mbala. Nde áli álahu

kagha lili mu mansiene ya enkuru kii mungala. Pilate ályele bo ti: «Limono mbwuru me!» 6 Lo bakwuru ba Bangaa ba Nzaami ya bankyele bu bamono Yiisu, bo bákafulu bingubu: «Komo nde ŋa kuruwa! Komo nde ŋa kuruwa!» Pilate ályele bo ti: «Ligwolo nde ya likomo nde beme ŋa kuruwa. Mu kuulu, me ka aambagha ebili mu nde o ki bakughu otsyiri nde mukakana wu lipfu.» 7 Ba-Dzwife bábvuhulu nde ti: «Bihi lili a mukyene, ya mu bu ookasuo mukyene munde, nde faana okpa, mu kuulu nde aalyele ti nde li Mwana a Nzaami!» 8 Ŋa ógyughu Pilate ndagha oyo, nde áfirimono nzalamweé kuu oluru. 9 Nde áfirisomo munsá nzo ya áfwulu Yiisu ti: «We kunu-a-ko áfi?» Lo Yiisu ka ágwi nde mvuru o. 10 Mu obo, Pilate ályele nde ti: «Mu emakye we li mu okatsurulu me? We ka soolo o ti me ndi a litumu lili onyáá we, bwunu we lili osa ti bakomo we ŋa kuruwa?» 11 Lo Yiisu ábvuhulu nde ti: «We ka ákaakala a litumu ŋa yulu a me o, kala ti Nzaami mu mayulu ka ágwi we lo o. Me mu obo, lisumu lili munde wu aatyeghe me kundaa we libvulu lili we mu bunene.» 12 Obaana oŋo, Pilate ákasagha bu aanyaá Yiisu, lo ba-Dzwife bákakehe bingubu ya bákalyele ti: «Kala ti we nyaá nde, lo we ka li ndughu a Sedzare o! Mu kuulu nswe munde wu aalyele ti nde li mukogho, nde li mutaara a Sedzare.» 13 Mu matala ma ógyughu Pilate ndagha oyo, nde ábiri Yiisu ku mbala ya ábwi nsini ŋa epehe kii muyala, ki baakata ti ebini ki bágyala mameé, mu Eebele baakalyele ti Ngabata. 14 Ku bele a tala lili embehe mu etsughu ki ékatswama nsomo ya etsughu kii kyiri kii Paake, Pilate ályele kundaa ba-Dzwife ti: «Limono mukogho a be!» 15 Lo bo bákakehe bingubu ti: «Dzwa nde! Dzwa nde! Komo nde ŋa kuruwa!» Pilate áfirilyele ti: «Be lidzyi me nkomo mukogho a be ŋa kuruwa?» Bakwuru ba bangaa ba Nzaami bábvuhulu nde ti: «Bihi ka lili a mukogho mukimi o kala ka yini a Sedzare o.» 16 Mu obo, Pilate ágwi bo Yiisu mpaala bakomo nde ŋa kuruwa. Me obo, bo bábiri Yiisu. 17 Yiisu ákabiri kuruwa li nde ndeme, ápala mu bvulu ya ágyene ku ebini kii nkumu etyee ki mutswi a mbwuru, mu Eebele baakalyele ti Ngolongota. 18 Me oŋo bo bákomo nde ŋa kuruwa. Bo bákomo baara buolo bakimi ngulu ya ngulu, ya Yiisu ŋa kara. 19 Pilate átumu basono bisono mu mana baya ya batwulu lo ŋa yulu a kuruwa. Bu me bu básono: «Yiisu musi Nadzarete, mukogho a ba-Dzwife.» 20 Ba-Dzwife balagha báakataá bisono bibye, mu kuulu ebini ki bákomo Yiisu ŋa kuruwa éli be-bele ya bvulu. Ya básono bisono bibye mu Eebele, mu Laté ya mu Engereke. 21 Bakwuru ba bangaa ba Nzaami báilyele kundaa Pilate ti: «Banyaá osono ti “mukogho a ba-Dzwife”, lo basono ti: “mbwuru wu aalyele ti: Me ndi mukogho a ba-Dzwife.”» 22 Pilate ábvuhulu bo ti: «Mamo ma aansono me, mafaana okala bwunu.» 23 Bambumbulu bu bamana okomo Yiisu ŋa kuruwa, bágwolo binkuru bi nde ya báti bye makaba mana, nswe mbwuru ya kaba li nde. Bo bágwolo enkuru e nde ki ela ki baakalaha ŋa yulu, ki bágwene obaama. Kye éli mu nkpaá mó obaana ku yulu tee ku nsie. 24 Bambumbulu bábili bo-a-bo ti: «Linyaá okaghala kye! Litswe lita empa kii ŋa a bwehe me wu aagwolo mu osuolo wu aagwolo kye». Obo bu ókeele mandagha ma básono mu Mukaana a Nzaami: «Bo baakaba binkuru bi me, ya enkuru e me ki ela ki baakalaha ŋa yulu, bo baati kye empa kii ŋa a bwehe me wu aagwolo». Obo me bu ósi bambumbulu. 25 Ngughu a nde, naana a ngughu a nde, Mari mukala a Kolopase ya Mari musi Mangadala bátemene ŋa bele a kuruwa li Yiisu. 26 Yiisu bu amono ngughu a nde ŋa bele a enduono ki ákadzyi nde ku olagha, ályele kundaa ngughu a nde ti: «Maama, mono mwana a we.» 27 Ŋa nsele nde ályele kundaa enduono ndiri: «Mono ngughu a we.» Ya obaana tala lilo, enduono ekye égwolo nde mu okala mu nzo a nde. 28 Ŋa nsele, mu kuulu Bisono bi Nzaami bikeele, Yiisu bu asoolo ti mandagha mwohono maakughu, ályele bu: «Me ndi a nyoro». 29 Oŋo óli a mfulu yi alwulu mu mala mama ŋeé. Bambumbulu bágwolo nsana, bábvwighi yo mu mala mama ŋeé, bákuru yo ku nto a muti wu a nkumu a idzope ya bási yo ŋa muŋma a Yiisu. 30 Bu aŋmi mala mama ŋeé, Yiisu ályele ti: «Myehene miikughu!» Ya, bu apfumunu busu ku nsie, nde átaghaba. 31 Lo, buulu ekye éli etsughu ki ekatswama nsomo a etsughu kii sabate, bamfumu ba ba-Dzwife ka bákadzyi o ti bibyimi bikala ŋa makuruwa tee mu etsughu kii sabate. Etsughu e sabate ekye éli etsughu ki enene. Mu obo, bo báluomo kundaa Pilate babogholo bo myili ya bamaha bo ŋa makuruwa. 32 Bambumbulu bágyi, bábogholo myili mi babo ba bákomo ŋa makuruwa ebini emó ya Yiisu, mimi mbwuru wu a nsomo ya mimi wu a buolo. 33 Bo bu bato ŋa ndaa Yiisu, bámono ti nde ali

ayi ákpi. Mu obo, bo ka bábogholo nde myili o. **34** Lo mbumbulu mumō átoobolo Yíisu libee mu lisuo, makili ya madza mápala mu nde. **35** Mbwuru wu áamono mandagha mamō, me nde li mu okalyele mo, ya bumpughulu bu nde buli bubu nganma. Nde soolo ti nde enganma asuo, mpaala behe si lisa kana. **36** Mandagha mwohonon ma mamonon mu kuulu Bisono bi Nzaami bibikeele: «Ka akala babogholo muwehe a nde si mumō o.» **37** Óli si ya ndagha nkimi mu Bisono bi Nzaami yi aakalyele bu: «Bo sa batala kundaa munde wu bátobolo bo libee.» **38** Ŋa mbihi onjo, Dzodzeze musi Arimate, áluomo muswa kundaa Pilate mu omaha nyuru a Yíisu ŋa kuruwa. Mu nkooro a nzalamweē a bamfumu ba ba-Dzwife, nde áli enduono e Yíisu mu ensweghe. Pilate ágwi nde muswa, ya Dzodzeze áyimaha nyuru a Yíisu ŋa kuruwa. **39** Nikodeme munde wuulu áli áyimonon Yíisu mu mpyibi ágyi ya nde. Nde áyabiri mananaase mama miire ma bábvughu ya alowese. Mo máli ku bele bakilo makwumu-matere. **40** Bo bágwolo nyuru a Yíisu, bádzyi yo mu bisili, bási mansagha mu mananaase, ti bwunu a bu ókadzyighi ba-Dzwife bamvwumu. **41** Ŋa ebini ki bákomo Yíisu ŋa kuruwa óli ya ebwa. Munsu ebwa ekye óli a mpyeme yi nyaghara yiili nkini ka bálo mbwuru omo o. **42** Me munsu omo bo bátwulu ebyimi e Yíisu, mu kuulu mpyeme oyo áli yibehene ya ŋa báli bo. Ya mu kuulu ekye éli si etsughu ki ékatswana nsomo a etsughu kii sabate li ba-Dzwife.

20 Mu etsughu kii liminji, mu minkya-nkya, ŋaala bwihi nkini ogyaghala we, Mari musi Mangadala ágyene ku mpyeme. Nde ámonon ti limeē li líkakyi mpyeme baamaha. **2** Nde ábara ntyini, áyibagha Simō-Piere ya enduono ki eke, ki ókadzyi Yíisu, ya ályele kundaa bo ti: «Baamaha Mfumu munsu mpyeme, ya bihi ka lisoolo ku baayitwulu nde o.» **3** Piere ya enduono ki eke bábulupala ya bágyene ku mpyeme. **4** Bo bansa buolo bákabara ntyini ŋa emō, lo enduono ki eke éloru Piere mu ntyini ya kye éyito nsomo ku mpyeme. **5** Kye égyimini munsu mpyeme ya émonon bisili bi áli bádzyi Yíisu ŋa nsie, lo kye ka ésomo omo o. **6** Simō-Piere wu áakayanama nde bu ayato, ásomon munsu mpyeme. Nde ámonon bisili bi áli bádzyi Yíisu onjo **7** ya mupa eko wu áli bádzyi nde mu mutswi. Mupa eko munde ka áli ebini emō ya

bisili o, lo bágyighili ofughuru nde mu libee, ŋa ebini ekimi. **8** Me onjo enduono ki éyato nsomon ésomon munsu mpyeme si. Nde ámonon ya ási kana. **9** Mu kuulu, bo áli nkini ka bákabaghala Bisono bi Nzaami o, bi biikalyele ti Yíisu faana osighili ŋa kara li ba bákpi. **10** Ŋa mbihi onjo, binduono bibye bíbvughuru ku bíkakala bye. **11** Mari ali ásyili ku mbala ŋa bele a mpyeme, mu okalili. Kunsu elili, nde ápfunumun ya ákagyimini munsu mpyeme. **12** Nde ámonon bangye-yulu buolo ba bálaha binkuru bibi bunu, ba bábwi nsini ŋa ebini ki áli bátwulu nyuru a Yíisu, mumō ku mutswi, wu muke ku myili. **13** Bo báfwulu nde ti: «Mukaha, mu emakye we li mu okalili?» Nde ábvuhulu bo ti: «Baamaha Mfumu a me, ya me ka nsoolo ku baayitwulu nde o.» **14** Bu amana obili obo, nde ákaghala ya ámonon Yíisu átemene onjo, lo nde ka ákasoolo o ti munde me Yíisu. **15** Yíisu áfwulu nde ti: «Mukaha, mu emakye we li mu okalili? Nande we li mu okasagha?» Mari bu ákatsimi ti munde áli mbwuru wu aakasala munsu ebwa, ályele nde ti: «Mfumul! Kala ti we aamaha nde lyele me ku aatwulu we nde, ya me sa yingwolo nde.» **16** Yíisu áti nde mbili ti: «Mari!» Mari áfirikaghala ya ályele nde mu ndinji yi a Eebele ndiri: «Rabuni!» Mbaala ti, «Muluo». **17** Yíisu ályele nde ti: «Ka kwara me o, mu kuulu me nkini ka aankumun kundaa Taara a me o. Lo we gye yilyele kundaa baana ba taara a me ti me ndi mu okumun kundaa Taara a me wu li Taara a behe si, kundaa Nzaami a me wu li Nzaami a behe si.» **18** Mu obo, Mari musi Mangadala áyilyele binduono ti: «Me aamonon Mfumul!» Ya nde átuoho kundaa bo mandagha mwohonon ma ólyele nde Yíisu. **19** Mu nkonkolo yi a etsughu kyini ekye, etsughu kii liminji, binduono bi Yíisu áli bibvughunu munsu nzo. Mu nkooro a nzalamweē a bamfumu ba ba-Dzwife, bo bágyighili okuru munjma a nzo. Lo Yíisu ágyi, áteme ŋa kara li bo ya ályele bo ti: «Nyaā edzuunu ekala ya be.» **20** Bu amana obili obo, nde ásuon bo myaā ya libee li nde. Binduono bu bimono Mfumun, bíli kunsu a esee. **21** Mu obo, Yíisu áfirilyele bo ti: «Nyaā edzuunu ekala ya be! Ti bwunu a bu ógweghe me Taara, mehe si ngweghe be.» **22** Bu abili obo, nde áfulu muwuele ŋa yulu a bo ya ályele bo ti: «Ligyagha Mufulu a Ngili. **23** Babo baliisa be masumun ma bo kolokolo, sa basa bo mo kolokolo. Babo baliibihi be masumun ma bo osa kolokolo, ka basa

bo mo kolokolo o.» **24** Toma, wu bákata ti mbu, mumō mu binduono kwumu ya byele, ka áli ya bo o mu matala ma ómoṛoṇo Yīisu kundaa bo. **25** Mu obo, binduono bibike bílyele nde ti: «Bihi liimono Mfumu!» Lo nde ábvuhulu bo ti: «Kala ti me ka mono bilyimi bibi mansere mu myaā mi nde o, kala ti me ka nsohobo mulyeme mu mambaala mamo o, ya kala ti me ka nsi ekee ṅa libee li nde o, me ka nsa kana ti nde li mweē o!» **26** Ṽa mbihi a bitsughu mpuomo, binduono bífiribvujunu munsu nzo, ya Toma áli ya bo. Bo áli bágyighili okuru bidzughubu byehene, lo Yīisu ágyi, átemene ṅa kara li bo ya ályele bo ti: «Nyaā edzuunu ekala ya be!» **27** Ṽa mbihi, nde ályele Toma ndiri: «Gya, lo mulyeme a we ṅa, ya mono bikee bi me. Gya a ekee e we ya sa kye ṅa libee li me. Nyaā mikeme ya sa kana!» **28** Toma ábvuhulu nde ti: «We li Mfumu a me ya Nzaami a me!» **29** Yīisu ályele nde ti: «We busi kana bu mono me! Esee kundaa babo baala ka baamono o lo baasi kana!» **30** Yīisu áfirisa bilyimi bibi okijimi bilagha ṅa mihi mi binduono bi nde biili ka básono bye mu mukaana wu o. **31** Lo mandagha ma, básono mo mu kuulu be lisa kana ti Yīisu li Kriste, Mwana a Nzaami, ya mu kuulu, bu lisi kana, be libagha laama mu nkumu a nde.

21 Ṽa mbihi oṅo, Yīisu áfirimoṇo kundaa binduono mu mukogho a mubu wu a Tiberyade. Bu me bu ámoṇoṇo nde. **2** Simō-Piere, Toma wu baakata ti Mbu, Natanaye wu a bvulu lili Kaana mu Ngalile, baana ba Dzebede ba babaghala ya binduono byele bikimi, báli emō. **3** Simō-Piere ályele bo ti: «Me ngyene ku osyama banswi.» Bo bályele nde ti: «Bihi si, ya we liigye.» Bo bápala ya básomo mu bwara. Lo mu mpyibi oyo, bo ka bábagha si nswi mumō o. **4** Mu minkya-nkya, Yīisu ágyi ya átemene ṅa mukogho a mubu, lo binduono ka bíkasoolo o ti nde áali. **5** Yīisu áfwulu bo ti: «Baana ba me! Be ka lili a nswi wu odza o?» Bo bábvuhulu nde ti: «Pe!» **6** Nde ályele bo ti: «Litubu likoho ku ngulu yi a kwogho kii babaghala yi a bwara ya be sa libagha banswi.» Mu obo, bo bátubu likoho, ya ka bákaleene opaha lo mu madza o, mu kuulu banswi ba bákogholo áli balagha. **7** Enduono ki ókadzyi Yīisu ku olagha élyele Piere ti: «Munde me Mfumu!» Simō-Piere bu agyughu ti munde me Mfumu, ásyere mu bala enkuru e nde kii ṅa yulu ki áli amaha nde, mu kuulu

nde áli mpene, ya ábwi mu madza. **8** Binduono bibike bíyavughuru ya bwara ku mukogho a madza, ya bákayadzuru likoho li lílwulu mu banswi, mu kuulu bo ka báli la ya mukogho a madza o, yini a ku bele a mankpā nkama. **9** Bo bu bapala mu bwara, bámono ṅa ebini ekye mbaa yi makala, nswi ṅa yulu a mo ya limpa. **10** Yīisu ályele bo ti: «Ligya a ndaama a banswi mu babo ba liibagha be.» **11** Simō-Piere áfirikumu munsu bwara ya ádzuru likoho ṅa nsie. Likoho áli lílwulu mu banswi, nkama ya makwumu-mataana ya batere ma banswi ba banene. Lo, si buulu ti banswi áli balagha, likoho ka líkagha o. **12** Yīisu ályele bo ti: «Liyadza». Enduono si emō ka ébagha bukyini o mu ofwulu nde ti «We nande li?» Mu kuulu bo bákasoolo ti nde me Mfumu. **13** Yīisu ásele ṅa báli bo, ágwolo limpa ya ágwi bo lo, nde ási bwunu obo si mu nswi. **14** Lilo líli sa lili tere li óyamoṇoṇo Yīisu kundaa binduono bi nde, ṅa mbihi a ṅa ásigihili nde ṅa kara li ba bákpi. **15** Bo bamana odza, Yīisu áfwulu Simō-Piere ti: «Simō, mwana a Dzā, we dzyi me ku obvulu babake ba?» Nde ábvuhulu nde ti: «Eē, Mfumu, we soolo ti me ndzyi we.» Mu obo Yīisu ályele nde ti: «Kebe baana ba bindoomo ba me.» **16** Mu sa lili ywolo, Yīisu áfirifwulu Piere ndiri: «Simō, mwana a Dzā, we dzyi me?» Piere ábvuhulu nde ti: «Eē, Mfumu, we soolo ti me ndzyi we.» Yīisu ályele nde ti: «Kala munkaalaa bindoomo bi me.» **17** Mu sa lili tere, Yīisu áfirifwulu Piere ti: «Simō, mwana a Dzā, we dzyi me?» Piere ányoō mu kuulu Yīisu áfwulu nde mu sa lili tere ti: «We dzyi me?» Ya nde ábvuhulu ti: «Mfumu, we wu soolo mandagha mwohonu, we gyighili osoolo ti me ndzyi we.» Yīisu ályele nde ti: «Kebe bindoomo bi me. **18** Mu enganyama me ndyele we ti: ṅa áli we munkuru-mbala, we áakakuru musyi a bala a we weme ya áakagye ku ákadzyi we. Lo ṅa akala aanyini we, we sa gyalaa myaā ya mbwuru mukimi akala aakuru we musyi a bala, ya obiri we ku akala aagwene dzyi we.» **19** Yīisu ábili obo mu osuo bu akala lipfu li Piere liigwa Nzaami nsia. Ṽa mbihi oṅo, Yīisu ályele nde ti: «Nama me.» **20** Piere bu akaghala ku mbihi, ámono enduono ki ókadzyi Yīisu mu okayanama bo. Me nde áli aasiṅi ṅa etulu e Yīisu, ṅa bákadza bo, ya ályele ti: «Mfumu, na munde aatyeghe we?» **21** Piere bu amono nde, áfwulu Yīisu ti: «Mfumu, nde bunu akala aabwana?» **22** Yīisu ábvuhulu nde ti: «Kala me ndzyi ti nde akala mweē tee

mu matala ma aayamvughuru me, ṛana yitala we? We, nama me!» 23 Mu ndagha oyo, nsia yitsajama ṛa kara li binduono ti enduono ekye ka ekpa o. Mu engarṛma Yiisu ka ályele Piere o ti Dzã ka akpa o, lo nde ályele bu: «Kala me ndzyi ti nde akala mweẽ tee mu matala ma aayamvughuru me, ṛana yitala we?» 24 Me enduono ekye kyeme eli mu osuo bumpughulu mu mandagha mamó mwohonó ya aasonó mó, ya bihi lisoolo ti bumpughulu bu nde buli bubu ngarṛma. 25 Yiisu áfirisa mandagha ma malagha makimi. Kala ti ali basono nsyini-nsyini mu mó, me aantsimi ti, nkini nsie nsyini ka yikaabagha ebini o kii otwulu mikaana myehene mimye mi bakaasono.

Bigyighili

1 Ndughu a me Tofile, mu mukaana a me wu a nsomo, me aandyele mandagha mwohonu ma óbaana Yíisu osa ya oluo, **2** tee mu etsughu ki áserjene nde mu okumu ku yulu, ña mbihi a ña ámana otswa nde mikele mu Mufulu a Ngili, kundaa bantumu ba ásuolo nde. **3** Ña mbihi a mpapa yi ámono nde, nde ákamorono kundaa bo ya mu bilyimi bilagha, nde ákasuo kundaa bo ti nde li mweé. Mu bitsughu makwumu-mana, nde ákabulumorono kundaa bo ya ákabulubili mu mi mitala Empu e Nzaami. **4** Etsughu nga-emó, nde bu ákadza emó ya bo, nde átswi bo mukele wu: «Ka limara mu Yerusaleme o, lo likebe mi oosiini a be Taara, mimye mi liigyughu be kundaa me **5** ti: Dzā aaboghoru mu madza, lo be, mu mana bitsughu sa baboghoru be mu Mufulu a Ngili.» **6** Obo me buulu, babo ba bábvununu, báfwulu kundaa nde ti: «Mfumu, ngu mu matala ma we aabvurulu Emfumu e Isarayele?» **7** Nde ábvuhulu kundaa bo ti: «Ka yili ndagha a be o mu osoolo matala ya ena bi ókuru Taara mu litumu li ndeme, **8** lo be sa ligyagha lileene ña akala oogya Mufulu a Ngili mu be, ya be sa likala bampughulu ba me mu Yerusaleme, [mu] Yude lwohono, mu Samari, tee ku osughu nsie.» **9** Bu amana obili obo, nde áserjene mu okumu ku yulu ñaala bo bwohonu mu okamono nde, ya edzi éfughu nde ña mihi mi bo. **10** Ñaala bo áli nkini mu okatala ku yulu, ku ákagye nde, babaghala buolo ba bálaha binkuru bi bipeneme bágyi ña bele a bo, **11** ya bályele kundaa bo ti: «Basi Ngilile, mu emakye be liitemene oño mu okatala ku yulu? Yíisu wu, wu oogyene a Nzaami ku yulu ña mihi mi be, sa ayabvughuru si ti bwunu a bu liimono be nde mu ogye ku yulu.» **12** Mu obo, bantumu bábvughuru ku Yerusaleme, obaana ku Munguo wu a mi-Olibve, wu li ña bele a Yerusaleme, mu etiiri ki bágwí muswa mu odzyara etsughu kii Sabate. **13** Bo bu bayabvughuru, básomo mu ngwumu yi a ku yulu, omo mu báli a bo epfu ki okabvununu. Mu bo óli a Piere, Dzā, Dzake ya Andere, Filipe, Toma, Baretelemi, Matye, Dzake mwana a Alafe, Simó mu-Nzelote ya Yuda mwana a Dzake. **14** Bo bwohonu babo, bási mukama mu mukolo mumó mu okasamana, emó ya bakaha, ya Mari ngughu a Yíisu, ya bambwee ba Yíisu ba babaghala. **15** Mu bitsughu

bibye, mpwumu a banga-a-kana yi áali ña ebini ekye yíli ku bele a nkama ya makwumu-muolo ma baara. Piere átemene ña kara li bo ya ályele ti: **16** «Baana ba taara a me, áli bubwe ti, mandagha ma áli olyele Mufulu a Ngili mu Mukaana a Nzaami mu muñma a Dabvide mu nkooro a Yuda makeele, nde wu ákighiri mumbiri a babo ba básyimi Yíisu. **17** Nde aali mumó ña kara li bihi, ya nde aabagha kaba lili esala ki. **18** Nde bu abagha mufuru wuulu ka li wu a nsumo o, nde swumu nseghe. Nde aabwi kii mapfumunu, bala li nde liibughulu ya biini bi nde biitsanjama. **19** Ya baara bwohonu baba Yerusaleme basoolo ndagha oyo. Mu obo, bo baakata nseghe oyo mu ndiri yi bula bu bo ti: «Akeledama», mbaala ti, «nseghe yi makili». **20** Ankoho, básomo mu mukaana wu Bikwumu ti: «Nyaã nzo a nde yikala mukajana, ya mbwuru anyaa okala munsa yo!» «Ya báfiri sono ti: «Nyaã mbwuru mukimi asala esala e nde».» **21** «Mu obo, bafaana osuolo mbwuru mukimi ña kara li baara ba bákabulugye ya bihi, mu matala mwohonu maala Mfumu Yíisu ákabulugye ña kara li bihi, **22** obaana ña óboghoru nde Dzā, tee mu etsughu ekye ki bámaha nde ña kara li bihi. Mbwuru munde, emó ya bihi, faana okala mpughulu mu osighili o Yíisu ña kara li ba bákpi.» **23** Básuo baara buolo: Dzodzele wu bákata Barasabase, wu bálughu Yusutuse, ya Matiasse. **24** Ya bo bwohonu básamana ya bályele ti: «Mfumu, we wu soolo mikolo mi baara bwohonu, suo bihi mu bo bansa buolo ba, nande we áasuolo, **25** mpaala agwolo ebini mu esala ki buntumu ki, ki oosihi Yuda mu ogye ku ebini kii ndaa nde.» **26** Ña nseele, bo báti empa kiili nga-a-bwehe me wu aagwolo, ya eti ébwi ña ndaa Matiasse, ya básohobo nde mu kaba li bantumu kwumu ya mumó.

2 Etsughu kii Pantekote bu eto, bo bwohonu bábvununu ña ebini emó. **2** Ya ensihibi, nkele yífi ku yulu ti anga nkele a efulu kii mpini, yíluhu nzo yohono mu bábwi bo nsini. **3** Bo bámono manzalisogho mu efaana ki mile mi mbaa, mi mikakaghaba ya mikabwa ña yulu a nswe mbwuru mu bo. **4** Bo bwohonu bálwulu mu Mufulu a Ngili ya bábwi obili mu mandiri makimi, bwunu a bu ókatumu bo Mufulu obili. **5** Ankoho ku Yerusaleme óli a ba-Dzwife ba bali a enzaama kii nganma, baara ba báfi mu bitsulu bi mansie byehene. **6** Bu bagyughu nkele oyo,

bo bábvununu mu mpwumu, ya bo bwohono bákinjimi ku olagha, mu kuulu nswe mbwuru ákagyughu bo mu okabili mu ndiŋi a ndeme. 7 Bo bákinjimi ku olagha, bágwuu ya bákalyele ti: «Bunu, baara bwohono ba bali mu okabili ba, bo ka bali baara ba etsulu e nsie kii Ngalile o? 8 Lo bunu-a-bo mbwuru-mbwuru mu bihi ali mu okagyughu bo mu okabili mu ndiŋi yi bula bu nde? 9 Ŋa kara li bihi oli a baara ba nsie yi a ba-Parete, nsie yi a Mede, nsie yi a Elame ya ba baakakala ku Medzopotami, ku Yude, ku Kapadose, ku Pō ya ku Adzi, 10 ku Firingi, ku Pamfili, ku Edzipite ya ba bali mu bitsulu bi nsie bibi ku Libi lili Sirene ya ba bali ku bvulu lili Rome, 11 ba-Dzwife ya baara ba básomo Nzaami a bo, basi Kerete ya basi Arabi, bihi lili mu okagyughu bo mu okabili mu mandinji ma bihi, bigyighili bi Nzaami bi binene!» 12 Bo bwohono bágwuu ya mayele máfi bo, bákalyele bo-a-bo ti: «Bu yi ma?» 13 Lo babake bákasa bo munsensehē ya bákalyele ti: «Buta mala baakolo!» 14 Mu obo, Piere átemene ya bantum kwumu ya mumō, ábili mu likyi lili mpini kundaa mpwumu ya ályele kundaa bo ti: «Basi Yude, ya be bwohono ba lili ŋa Yerusaleme, ligyughu mandagha ma aandyele me, libaghala ti, 15 baara ba ka mala baakolo o ti bu lili mu okatsimi be, mu kuulu, li nkini tala lili wa mu epala. 16 Lo bu me bu oli mu okeele ndagha yi ólyele mubighili Dzowe.» Nde ályele ti: 17 «Mu bitsughu bibi masini, bu ólyele Nzaami, me sa nsurulu Mufulu a me ŋa yulu a mbwuru-mbwuru, ya baana ba be ba babaghala ya baba batughu sa babighili, Nzaami sa asa kuulu ti bampala ba be bamono mandagha ma manyaghara ya biŋmini bi be sa biluoro manzolo. 18 Eē, mu bitsighu bibye, me sa nsurulu Mufulu a me ŋa yulu a basala ba me baba babaghala, ya baba bakaha. Ya bo sa bakala mibighili, 19 ku yulu me sa ngvighili mandagha mama okinjimi mu yulu, ya ku nsie bilyimi bibi mpaana ŋa yulu nsie: Makili, mbaa ya bidzi bibi lwuu. 20 Tala sa likighiri mpyibi, ya ngoono sa abie ti makili. Myehene mimye sa mimonono nsomo ya ogya ku etsughu e Mfumu, etsughu ki enene ya kii nsia. 21 Oŋo nswe munde wu akala aatarjana nkwumu a Mfumu sa abvwughu.» 22 «Basi Isaraye, ligyughu mandagha ma: Yiiisu wu a ku Nadzarete, mbwuru munde wu oosuo Nzaami kundaa be mu bimaā, mandagha mama okinjimi ya mu bilyimi bi ási nde ŋa kara li be,

ti bwunu a bu lisoolo be beme yo, 23 mbwuru munde, wu bátyeghe ti bwunu a bu oli bitsimi bi otswama ogyahaba Nzaami, be liigwi nde ŋa myaā mi baara ba bagwene osoolo Nzaami, ba baadzwi nde bu baakomo nde ŋa kuruwa. 24 Lo Nzaami aasiili nde, bu aakwulu nde mu mpara a lipfu, buulu ka okughu okala o ti lipfu lidzarala nde. 25 Mu kuulu, mu nde Dabvide ályele ti: Mu nswe matala, me áakamono Mfumu ŋa nkulu a me, nde li ŋa kwogho e me kii babaghala, mpaala me nyaā otighiri mu nzalamweē.» 26 «Me mu obo mukolo a me ali kunsu esee, muŋma a me aalwulu mu munyungu ya nyuru a me yili kunsu emiini, 27 mu kuulu we ka nyaghala muwumunu a me ku nsie a ba bákpi o, we ka nyaā wu a we Wu a Ngili abolo o. (Hadēs g86) 28 We aasuo me mankwulu mama laama, we buli ŋa nkulu a me, we sa luhu me mu esee.» 29 «Baana ba taara a me, linyaā me bu ndi a muswa, me ndyele be mu kana lwohono mi mitala nkagha-kwuru Dabvide ti: nde ákpi, bádzyighi nde, ya mpyeme a nde yili tee lolo ŋa kara li bihi-a-be. 30 Lo nde áli mubighili ya nde ásoolo ti mu mukihi, Nzaami ágwi misiini kundaa nde ti mumō mu bateghele ba nde sa akiri ŋa likubu li nde. 31 Mu limono, Dabvide bu átswama otaala mi mitala osighili o Kriste ŋa kara li ba bákpi, nde ályele ti: “Ka baanyaghala nde ku nsie a ba bákpi o, ya ka baanyaā nyuru a nde yibolo o.” (Hadēs g86) 32 Me Yiiisu munde Nzaami aasiili ŋa kara li ba bákpi, ya bihi bwohono lili bampughulu mu ndagha oyo. 33 Nzaami bu aakuhubu Yiiisu ku kwogho e nde kii babaghala, Yiiisu aagyagha kundaa Taara Mufulu a Ngili wu áli bagwi misiini, ya nde aasurulu nde ŋa yulu a bihi. Mimye me mi lili mu okamono ya lili mu okagyughu be lolo li. 34 Mu kuulu, Dabvide ndeme ka ákumu ku mayulu o, lo nde ályele ti: “Mfumu aalyele kundaa Mfumu a me ti: Yabwa-nsini ku kwogho e me kii babaghala, 35 tee mu matala ma akala aansa me mitaara mi we mikala edzyara e myili mi we.” 36 “Nyaā ti basi Isaraye bwohono bagyighili osoolo mu ngarŋa ti: Nzaami aasi ti Yiiisu wu liikomo be ŋa kuruwa akala Mfumu ya akala Kriste!” 37 «Bu bamana ogyughu mandagha mamu, mikolo mi bo midzwala, ya bályele kundaa Piere ya kundaa bantum ti: “Baana ba taara, emakye bihi lifaana osa?”» 38 Piere ábvuhulu kundaa bo ti: «Ligyiŋi mayele ya baboghoru nswe mbwuru mu be mu nkwumu a

Yiisu-Kriste. Mpaala Nzaami asa masumu ma nde kolokolo ya be sa ligyagha kaba li Mufulu a Ngili. **39** Mu kuulu misiini mi, Nzaami ási mye kundaa be, kundaa baana ba be ya kundaa babo ba bali ku la, bo bwohono ba akala oota Mfumu Nzaami a bihi mbili.» **40** Mu mandagha makimi ma malagha, Piere ákapeene a bo ya ákagwa bo mpama, ña ákalyele nde kundaa bo ti: «Ligyagha obvwughu ya be sa lipala mu eseene ki ebi ki!» **41** Ya babo ba bákihi mandagha ma nde, bábohoro bo, ya mu etsughu ekye, ba báyasomo mu kaba li ba bákasa kana, báli ku bele a mapfwunu-matere ma baara. **42** Bo bwohono bási mukama mu maluo ma ókaluo bantum, mu okala ti baana baba taara mumō, mu okakaba limpa ya mu okasamana Nzaami. **43** Nswe mbwuru áli a nzalamweē, mu nkooro a mandagha mama okijimi ya bilyimi bi bilagha bi ókasa bantum. **44** Babo bwohono ba bási kana báli bumō, ya byehene bi báli a bye, bíli bibi ebvughu. **45** Bo bákatyeghe mansie ma bo ya byehene bi báli a bye, ya bákakaba nzi kundaa baara bwohono, bwunu a bu óli nzala a nswe mbwuru. **46** Nswe etsughu mu mukama, bo bákwagihini mu okagye ku nzo a nzaami, mu okakaba limpa munsu manzo, ya bákadza bilogho bi bo mu esee ya mu mukolo wu okughulu. **47** Bo bákasuyighi Nzaami ya baara bwohono bákasuo bubwe kundaa bo. Ya nswe etsughu, Mfumu ákabwehe mu kaba li bo, ba bákabvwughu.

3 Etsughu nga-emō, Piere ya Dzā bákakumu ku nzo a nzaami mu oyisamana, mu tala lili matere ña mbihi a embehe. **2** Oko, nswe etsughu, baara bákagya a baghala mumō wu báburu ekara, ya bákawulu nde ña muñma a nzo a nzaami, wu bákata ti Muñma a Nzo Wu Mubwe, mu kuulu nde akaluomo nzi kundaa babo ba bákasomo mu nzo a nzaami. **3** Nde bu amono Piere ya Dzā ba bákagye mu osomo munsu nzo a nzaami, nde áluomo bo nzi. **4** Piere ya Dzā batuuu nde mihi, ya Piere ályele kundaa nde ti: «Tala bihi!» **5** Mbwuru munde ágyighili otala bo, ya ákakebe mu ogyagha elogho ki eefa kundaa bo. **6** Piere ályele kundaa nde ti: «Me ka ndi a nzi ya oore o, lo ki ndi a me, me ngwi we kye: Mu nkwumu a Yiisu-Kriste musi Nadzarete, temene ya dzyara!» **7** Bu akwara nde mu kwogho kii babaghala, átehebe nde. Ñaana oño bitaama bi nde ya maseē ma myili ma nde

bíbagha mpini. **8** Bu adzuñumu mankagha, nde átemene ya ábwi odzyara. Nde ásono ya bo munsu nzo a nzaami, ákadzyara, ákadzuñumu ya ákasuyighi Nzaami. **9** Baara bwohono bámono nde mu okadzyara ya mu okasuyighi Nzaami. **10** Ya baara básoolo ti me nde wu áakabwansini ña Muñma a nzo a nzaami wu baakata ti Muñma wu Mubwe mu okaluomo nzi. Bo bámono nzalamweē yi alagha, ya bákiñimi mu mi mibwi mu nde. **11** Buulu mbwuru munde ka ákanyaá Piere ya Dzā o, baara bwohono bákiñimi ya bágyi mu ntyini kundaa bo, ña eluru kii nzo a nzaami ki baakata ti Eluru kii Salomō. **12** Piere bu ámono obo, nde áfwulu kundaa baara ti: «Basi Isaraye, mu emakye be lili mu okakiñimi mu ndagha yi? Mu emakye be lili mu okatala bihi ti anga áli mu lileene li bihi bameme, bwunu-we mu enzaami e bihi, bihi liisi kuulu ti baghala wu adzyara?» **13** Nzaami a Abarahame, a Idzake, a Dzakobe, Nzaami a bankagha ba bihi, aagwi musala a nde Yiisu nsia, nde wu liityeghe be ya wu liibihi be ña nkulu a Pilate, wu áamono ti áli bubwe mu onyáá nde. **14** Be liibihi Wu a Ngili ya Wu bunsumu, ya be liiswolo banyaá be wu aakadzwa baara. **15** Be liidzwi Mfumu a bumweē. Lo Nzaami aasiili nde ña kara li ba bákpi. Bihi, bihi lili bampughulu mu ndagha oyo. **16** Me mu lileene li nkwumu a Yiisu, mu nkooro a kana mu nde, baghala wu lisoolo ya wu lili mu okamono be wu, aabagha mpini. Me kana mu Yiisu liisi ti nde asaadzughu, bwunu a bu likughu omono be bwohono nde.» **17** «Mu obo, baana ba taara a me, me nsoolo ti kunsu odzimini be ya bamfumu ba be liigyighili mandagha mamu. **18** Mandagha ma ótswama olyele Nzaami mu miñma mi mibighili myehene maatswighi. Mandagha mamu me ma: “Kriste a nde sa akala amono mpara”. **19** Mu obo, ligyiñi mayele, libvughuru kundaa Nzaami, mu kuulu nde amaha masumu ma be, **20** ya mu kuulu matala ma ogwumu ma oogwi Mfumu magya, ña akala aagweghe nde Yiisu, Kriste munde wu átswama osuolo nde mu be. **21** Lo mu matala ma, nde faana okala ku yulu, tee mu matala ma akala oobvurulu Nzaami bilogho byehene, ti bu ályele nde mu miñma mi mibighili mimi ngili mimi nsi-nkulu. (aiōn g165) **22** Mu kuulu Moyidze ályele ti: “Mfumu Nzaami a be sa apaha mu nkooro a be, ya ña kara li ekaana e be mibighili ti anga me. Be lifaana ogyughu mandagha mwohono ma akala aalyele nde be.

23 Nswe mbwuru wu akala aagwene ogyughu mubighili munde, sa akala bamaha nde mu ekaana, nde sa akpa.” 24 Ya Mibighili myehene, obaana Samwele ya myehene mi mígyi ŋa mbihi a nde, mǐbili mu mi mitala bitsughu bi. 25 Be, be lili baana ba mibighili ya baana ba ogwihini ku ósi Nzaami ya bataara ba be ŋa ályele nde kundaa Abarahame ti: “Me sa nseme bikaana byehene bibi ŋa yulu a nsie mu nzili a musyi a dzumu li we”. 26 Nsomo, mu be Nzaami átehebe musala a nde, wu átswama ogweghe nde mu oseme be, mu kuulu mbwuru-mbwuru mu be asihi bigyighili bi nde bi bibi.»

4 Piere ya Dzā bǎli nkini mu okabili kundaa baara, ŋa ógyi bangaa ba nzaami, mfumu a bankyele ba nzo a nzaami ya ba-Saduseyē. 2 Bo bǎli a nkehe mu kuulu Piere ya Dzā bǎkaluo baara ya bǎkalyele ti bwunu a bu ósighili Yǐisu ŋa kara li ba bǎkpi, obo si baara ba bǎkpi akala baasighili mu lipfu. 3 Bo bǎsyimi Piere ya Dzā ya bǎlo bo mu boloko tee mbala, buulu áli ayi nkonkolo. 4 Lo mu ba bǎkagyughu ndagha, balagha áli baasi kana. Ya mutala a bo áli ku bele a mapfwunu-mataana. 5 Mbala, bamfumu ba ba-Dzwife, bakwuru ya baluo-mikyene bǎbvũgunu ku Yerusaleme. 6 Mu bo óli a Ane mukwuru a bangaa ba nzaami, Kayife, Dzā, Alekandere ya baara bwohono baba musyi a dzumu li bamfumu ba bangaa ba nzaami. 7 Bo bǎgyi a Piere ya Dzā ŋa nkulu a bo ya bǎfwulu bo ti: «Mu lileene li nande bwunu we mu nkwmu a nande be liigyighili ndagha yi?» 8 Me mu obo, Piere wu áalwulu mu Mufulu a Ngili, ályele kundaa bo ti: 9 «Bamfumu ba ekaana ya bakwuru, lolo li bali mu ofwulu bihi mu nkooro a bubwe bu liisi bihi kundaa mbwuru nga a epfwumu, ya bunu-a-bo nde aabvwughu. 10 Be bwohono ya ekaana kyehene kii Isarayelee, ligyighili osoolo yo ti, me mu nkwmu a Yǐisu-Kriste wu a ku Nadzarete, wu liikomo be ŋa kururu ya wu oosiili Nzaami ŋa kara li ba bǎkpi, me mu nde wu aatemene ŋa nkulu a be wu ali nsiili.» 11 Me Yǐisu li: «Limeē lili be bantwu manzo, liitsaala, Lo, lo ayi limeē lili ngughu ŋa mutswunu.» 12 «Obvwughu ka oli mu mbwuru mukimi o, mu kuulu ka oli a nkwmu nkimi o ŋa yulu a nsie yi bǎgwi kundaa baara, yiili mu yo bihi libvwughu.» 13 Bo bu bamono kana li Piere ya Dzā, bǎkijimi, mu kuulu bo bǎbaghala ti baara ba ka bǎli a mupfunu o, bo ka bǎgyighi o. Bo

básoolo ti bo ba bǎkakala emō ya Yǐisu. 14 Lo bo bu bamono baghala wu adzughu átemene ŋa bele a bo, bǎkuono a yi baalyele kundaa Piere ya Dzā. 15 Oŋo bo bǎgwi litumu bapaha bo ŋa kara li ekwuru ki ba-Dzwife, ya bo-a-bo bǎsyili mu okuru mfwunu, 16 bǎkalyele ti: «Emakye liisa mu baara ba? Buulu baara bwohono baba mu Yerusaleme basoolo mu nganma elyimi ki baagyighili bo, ya bihi ka likughu obihi kye o. 17 Lo mu osa kuulu ndagha yi yinyaā otsanama ku olagha ŋa kara li baara, litswe litswa bo mukele mu ebaghala, banyaā ofiribili mu nkwmu oyo kundaa mbwuru si mumō.» 18 Bu bati bo mbili, bǎtswi bo mukele mu ebaghala mu onyaā ofiribili ya ofiriluo mu nkwmu a Yǐisu. 19 Piere ya Dzā bǎbvuhulu kundaa bo ti: «Lilamana beme: Nsa ndagha yili bunsumu ŋa mihi mi Nzaami, osa litumu li be, bwunu we osa litumu li Nzaami? 20 Bihi, ka lileene okuru miŋma mu mandagha ma liimono ya ma liigyughu o.» 21 Bo bǎfirijaana bo ya banyaā bo. Bo ka bǎbagha nzili yi baasyeme bo o, mu nkooro a baara. Mu kuulu baara bwohono bǎkasyighi Nzaami mu ndagha yi áabwi. 22 Baghala munde wu áadzughu mu elyimi kii okijimi ekye, áli aluru bamvulu makwumumana. 23 Bu banyaā bo, Piere ya Dzā bǎgyene kundaa baba ndaa bo ya bǎtwoho bo mandagha mwohono ma ólyele bo bamfumu ba bangaa ba nzaami ya ekwuru ki ba-Dzwife. 24 Boho si, bu bamana ogyughu, bǎgwihini mu bitsimi bimō, bǎbuono Nzaami mu likyi lili mpini ya bǎlyele ti: «Mfumu, we wu áagyighili yulu, nsie ya mubu, ya bilogho byehene bi bili omo, 25 me we áalyele mu Mufulu a Ngili mu muŋma a taara a bihi Dabvide, musala a we.» Nde ályele ti: «Mu emakye mansie mali kunsu yanǵa-yanǵa, ya bikaana bili mu osa mamfwunu ma magwene a mupfunu? 26 Mikogho mi nsie mili yeelee mu odzwana mvulu, ya bamfumu baatemene mu emō mu odzwana a Mfumu ya mu odzwana a Kriste a nde.» 27 «Mu enganma, Erode ya Ponse Pilate baabvwununu mu bvulu li. Ya emō ya baala ka bali ba-Dzwife o, ya ekaana kii Isarayelee, bo baabvwununu mu odzwana a musala a we wu a ngili Yǐisu, wu ámaana we. 28 Bo baasi ti myehene mi ótswama otsyiri kwogho ya bitsimi bi we mikeele. 29 Ya mu matala ma Mfumu, mono miŋaana mu bihi, ya gwa basala ba we kana lwohono mu otsala nsia a ndagha a we. 30 Labala kwogho e we mpaala baara

badzughu ya bilyimi ya mandagha maa okijimi bimogono mu nkumu a Yisus, musala a we wu a ngili.» **31** Bu bamana osamana Nzaami, ebini ki bábvununu bo ényinjí. Nzaami áluhu bo bwohono mu Mufulu a Ngili ya bo bábwí otsala nsia a ndagha a Nzaami ya kana. **32** Mpwumu a ba bási kana yíli mukolo mumó ya muwumunu mumó. Ka óli a mbwuru wu áakalye ti bilogho bi nde bibi ndaa ndeme o, byehene bi báli a bo bíli bibi ebvughu. **33** Mu lileene li linene, bantumu bákasa esala kii bumpughulu mu osighili o Mfumu Yisus mu lipfu, ya bwehe bu bunene búli ña yulu a bo bwohono. **34** Ña kara li bo, ka óli a mbwuru wu áakagwene a elogho o. Mu kuulu, bo bwohono ba báli a manseghe bwunu-we manzo, bákatyeghe mo, bákagya a nzi yi a bi bákatyeghe, **35** ya bákawulu yo ña nkulu a bantumu. Ya bákakaba kunda nswe mbwuru-mbwuru bwunu a bu oli nzala a nde. **36** Dzidzefe mu-Lebviite wu a bvulu lili Syipere, wu ókata bantumu «Baranabase», mbaala ti, «wu aakagwa bukyini», **37** átyeghe nseghe yi áli a yo ya áyagwa nzi yi ábagha kundaa bantumu.

5 Lo baghala mumó, wu a nkumu Ananyase, emó ya Safira mukala a nde, bátyeghe ndaama a nsie a bo. **2** Nde ágwiini ya mukala a nde mu osweghe ndaama a nzi mu yi bábagha bo, ábiri ndaama yi ásyili ya ágwi yo kundaa bantumu. **3** Piere ályele kundaa nde ti: «Ananyase, mu emakye we aanyaá Satana asomo mu mukolo a we, mpaala we pfiri Mufulu a Ngili ya we sweghe ndaama a nzi yi a aatyeghe we ndaama a nsie? **4** Nsomo we tyeghe ndaama a nsie yo yiili yi a ndaa we. Ña aatyeghe we yo, we aali a bumpoholo mu osalala nzi a we bu dzyi. Bu bunu-a-bo we aabagha bitsimi bi bibi bi? We ka aapfiri baara o, lo Nzaami we aapfiri.» **5** Ananyase bu agyughu ndagha oyo, ábwí ya ákpi. Bo bwohono ba bágyughu ndagha oyo bábagha nzalamweé yi alagha. **6** Bampala bu batemene, bádzyi ebyimi, bábirí kye mu oyidzyighi. **7** Ña mbihi-a-bele a matala matere, mukala a Ananyase áyasomo omo, gwene osoolo ndagha yi áabwí. **8** Piere áfwulu nde ti: «Lyele me, yi me nzi yi liityeghe be ndaama a nsie?» Nde ábvuhulu ti: «Eé, me yo!» **9** Piere ályele kundaa nde ti: «Bunu-abo be likughu ogwiini mu otsihi Mufulu a Mfumu? Gyughu, ba baafi ku odzyighi mulumu a we ayi ña murjma a nzo, ya bo bali mu obiri wehe si!» **10** Ñaana orjo, nde ábwí ña

myili mi Piere ya ákpi. Bampala bu basomo, bámono nde ákpi, bábirí nde mu oyidzyighi nde ña bele a mulumu a nde. **11** Libwunu li Nzaami lwohono ya bo bwohono ba bágyughu mandagha mamo bábagha nzalamweé yi alagha. **12** Bantumu bákasa bilyimi ya mandagha maa okijimi malagha ña kara li baara. Banga-a-kana bwohono bu bagwiini, bo bákabvununu ña eluru e nzo a nzaami ki baakata ti kii Salomó. **13** Mu baara baala nkini ali ka bási kana o, ka óli a mbwuru si mumó wu áabagha bukyini mu osomo mu kaba li banga-a-kana o, ngu okala ti baara bákabili bubwe mu bo. **14** Lo ña yulu orjo, mampwumu ma babaghala ya mama bakaha ba bákasa kana mu Mfumu mákapfiri. **15** Baara bákapaha babyele mu minsagha, ya bákalahá bo ña yulu a bikala ya ña yulu a malaba, mpaala ña ooluru Piere, edzyimi-a-dzyimi e nde ebuluberene a si mumó mu bo. **16** Mampwumu ma baara mákafa mu mabvulu ma mábehene ya Yerusaleme, mákayabiri babyele ya ba báli a mifulu mi mibi. Ya bo bwohono bákadzughu. **17** Mfumu a bangaa ba nzaami ya ba báli emó ya nde, kaba li ba-Saduseyé bátemene mu ogyighili ndagha. Bo áli balwulu mu musogho. **18** Bo básyimi bantumu ya bálo bo mu boloko lili baara bwohono. **19** Lo mu mpyibi, ngye-yulu a Mfumu ádzubulu bidzughubu bi boloko, ápaha bo ku mbala ya ályele kundaa bo ti: **20** «Ligye, ya bu litemene munsá nzo a nzaami, liluo baara mandagha mwohono mama bumweé bu bunyaghara ba.» **21** Bo bu bagyughu obo, epala-epala básomo mu nzo a nzaami ya bábwí oluo. Mu obo, mfumu a bangaa ba nzaami ya babo ba báli ya nde, báti ekwuru ki ba-Dzwife mbili ya mfwunu a baana ba Isarayelee, ya bágweghe baara ku boloko mu oyigwolo bantumu. **22** Lo basala bu bayito ku boloko, bo ka bámono bo omo o, ya bu bayabvughuru, bátwoho nsia, **23** ya bályele ti: «Bihi liiyibagha boloko li bágyighili okuru, ya bankyele ba batemene ña bidzughubu bi lo. Lo bu lidzubulu lo, bihi ka liimono si mbwuru mu kara o.» **24** Mfumu a bankyele ba nzo a nzaami ya bamfumu ba bangaa ba nzaami, bu bagyughu ndagha oyo, bákijimi ku olagha ya bábwí obili ti yi nsa ndagha? **25** Mbwuru mumó áyalyele kundaa bo ti: «Ligyughu! Baara ba liilo be mu boloko bali munsá nzo a nzaami ya bali mu okaluo baara.» **26** Mu obo, mfumu a bankyele ba nzo a nzaami ágyene, emó ya

bambumbulu ba nde, mu oyigwolo bantumu. Báyabiri bo, lo ka mu mpini o, buulu bo báli a nzalamweē a baara, mfangolo bakaha bo mameē. **27** Bu bayabiri bo, bálamana bo ŋa nkulu a ekwuru ki ba-Dzwife. Mfumu a bangaa ba nzaami ábwi ogwa bo bifwulu, **28** nde ályele kundaa bo ti: «Bihi ka liitswi be mikele mu onyaa ofiriluo mu nkwumu yi o? Ya limono, be liiluhu Yerusaleme mu maluo ma be ya be lidzyi otwulu lipfu li mbwuru munde ŋa yulu a mitswi mi bihi!» **29** Piere ya bantumu babake bábvuhulu ti: «Bihi lifaana osa litumu li Nzaami, lo ka lili baara o. **30** Nzaami a bataara ba bihi aasiili Yiiisu wu liidzwi be, bu liikomo nde ŋa yulu a muti. **31** Nzaami aaseene nde mu lileene li nde, mpaala akala Mfumu ya Mubvwuhu, mu kuulu baara ba Isarayeleye bagyiŋi mayele, ya babagha kolokolo a masumu ma bo. **32** Ya bihi lili bampughulu mu mandagha mamo, bihi ya Mufulu a Ngili wu oogwi Nzaami kundaa babo ba baakasa litumu li nde.» **33** Ekwuru ki ba-Dzwife bu egyughu mandagha mamo, kye élwulu mu nkehe ya ésagha odzwa bantumu. **34** Lo mumō mu ba-Faridzyē, nkumu a nde Ngamalyele, muluo mikyene wu ookagwa baara bwohono budziri, bu atemene ŋa kara li ekwuru, áluomo ti bapaha bantumu ku mbala mu mana matala, **35** ya nde ályele kundaa bo ti: «Baara ba Isarayeleye, lisa mayele mu ma lidzyi be ogyighili kundaa baara ba! **36** Buulu, ka oli edzighi o, mbwuru wu a nkumu Tewudase aayapala. Nde aakamoŋono ti nde mbwuru wu bvulu mupfunu, ya mutala a baara ba baakanama nde ali ku bele a nkama-na. Lo mu matala ma baadzwi nde, baara bwohono ba baakanama nde baatsanama ya emvununu ekye eekpi. **37** ŋa mbihi a nde, Yuda musi Ngalile, aayamoŋono mu bitsughu bibi osono mankwumu mu osoolo mutala a baara. Baara balagha baakanama nde. Lo ndehe si aakpi, ya baara bwohono ba baakanama nde baatsanama. **38** Mu matala ma, me ndeyele kundaa be ti: Ka linama mandagha ma baara ba o, ya linyaā bo bagye. Mu kuulu, kala ti ndagha yi ya esala ki kundaa baara biifi, lo sa bidzimini. **39** Lo kala ti bye kundaa Nzaami biifi, be ka likughu odzihibi bye o. Ka lisagha odzwana ya Nzaami o!» Emvununu ki ekwuru ki ba-Dzwife égyughu Ngamalyele. **40** Bu bati bantumu mbili, bákubu bo nswanswa ya bálighi bo mu ofiribili mu nkumu a Yiiisu, ya bányaā bo. **41** Bantumum bámará ŋa nkulu a ekwuru

ki ba-Dzwife, bágyene mu esee, buulu Nzaami ámono ti bo áli bakughu mu omono mpara mu nkooro nkumu a Yiiisu, **42** ya nswe etsughu mu nzo a nzaami ya munsá manzo, bo bákáluo Nsia yi Mbwe yi a Yiiisu-Kriste, ku ogwene okolo.

6 Mu bitsughu bibye, mutala a binduono ápfini ku olagha. Ba-Dzwife ba bákabili ndiŋi yi a ba-Ngereke bábwí orŋununu mu ba-Dzwife baba mu Isarayeleye ba bákameŋene bapfiili ba bo ba bakaha mu matala ma bákakaba bi-odza bibi nswe etsughu. **2** Bantumum kwumu ya buolo bábvughu mpwumu a binduono yohono, ya bályele kundaa bo ndiri: «Ka oli bubwe o ti bihi linyaā okáluo ndagha a Nzaami mu osala esala kii okakaba bi-odza. **3** Mu obo baana ba taara, liswolo ŋa kara li be babaghala nsaama ba bali a bumpughulu bu bubwe, ba bálwulu mu Mufulu ya bunsughu, bihi sa ligwa bo esala ekye. **4** Lo bihi sa lisa mukama mu okabuono ya mu okasala esala kii oluo mandagha ma Nzaami.» **5** Mpwumu a baara yohono yíkíhi etsimi ekye. Básuolo Etiene, baghala wu áli a kana ya álwulu mu Mufulu a Ngili, Filipe, Porokore, Nikanore, Timō, Paremenase ya Nikola munde wu a ku Antyose, wu áasomo Nzaami a ba-Dzwife. **6** Bágyi a bo ŋa nkulu a bantumum. Bantumum básamana mu bo ya bánanŋa bo myaa. **7** Ndagha a Nzaami yíkabvulu otsanama, ya mutala a binduono ákapfíni ku olagha ku Yerusaleme, ya mpwumu a bangaa ba nzaami yi nene yíkasa kana mu Yiiisu. **8** Etiene áli alwulu mu bwehe ya mu lileene. Nde ákasa mandagha maa okijimi ya bilyimi bii okijimi ŋa kara li baara. **9** Ndaama a baara baba nzo a lisamana a ba-Dzwife yi baakata ti Nzo a bankana ba bali bunya-nyaā, baba ku Sirene, baba ku Aledzandiri ya baba ku Silisi lili Adzi, bábwí osa munsoho ya Etiene. **10** Lo bo ka bákakughu otemene o ŋa nkulu a mandagha mama bunsughu ma ókagwa nde Mufulu mu obili. **11** Mu obo, bo bágwí baara nzi mpaala balyele ti: «Bihi liigyughu nde mu okatswagha Moyidze ya Nzaami.» **12** Bo bátyihi baara, bakwuru ba babaghala ya baluo-mikyene. Bo bu bayato, básyimi Etiene ya babiri nde ŋa nkulu a Mfwunu a ekwuru ki ba-Dzwife. **13** Bo bátehebe bampughulu baba mpya ba bályele ti: «Baghala wu ka li mu okakolo o mu okalyele bubi mu ebini kii ngili [ki] ya mu mikyene mi Moyidze. **14** Bihi liigyughu nde mu okalyele ti Yiiisu wu, wu a ku Nadzarete sa atsala ebini ki

ya sa osobo ekulu ki ósihi bihi Moyidze.» **15** Bo bwohono ba bábwí-nsini mu Mfwunu a ekwuru, bu batuunu nde mihi, bámono edzili ki Etiene éli ti anga kii ngye-yulu.

7 Mfumu a bangaa ba nzaami áfwulu Etiene ti: «Mandagha mamó mali mama ngajma?» **2** Etiene ábvuhulu ti: «Baana ba taara a me ya bataara ba me, ligyughu! Nzaami wu a nsia ámoŋono kundaa Abarahame taara a bihi, ŋa áli ku Medzopotami, nsomo nde ayikala ku Arane. **3** Ya nde ályele kundaa Abarahame ti: “Pala mu nsie a we, sihi dzumu li we, ya gye ku nsie oyo yi akala aansuo me we”. **4** Mu obo, nde ápala mu nsie yi a Bakaledge, átwu ku Arane. ŋa mbihi a lipfu li taara a nde, Nzaami ábiri nde ku nsie oyo, mu lili mu okakala be mu matala ma. **5** Nzaami ka ágwi nde pfa si limó mu nsie yi o, si ebini kii otwulu bitaama o, lo ásiini a nde mu ogwa nde nsie yi, ya musyi a dzumu li nde mpaala yikala pfa li bo. Mu matala mamó, Abarahame nkini ka áli a mwana o. **6** Nzaami ályele kundaa nde ndiri: “Musyi a dzumu li we sa ayikala mu nsie yi bunzyi, oko sa bakirili bo bankana ya sa bamwehē bo kimini mu nkama-na yi mibvu”. **7** Nzaami áfirilyele ti: “Me, me sa ndamana ekaana ekye ki eekirili bo bankana. ŋa mbihi oŋo, bo sa bapala, ya sa bakabuono me ŋa ebini ki”. **8** Nzaami áti endughu ya nde mu elyimi ki áshohobo nde nzo a mbaa, ya mu matala ma áburu nde Idzake, nde áshohobo nde nzo a mbaa mu etsughu kii mpuomo, ya Idzake ási bumó kundaa Dzakobe, ya Dzakobe kundaa bankagha-kwuru kwumu ya buolo.» **9** «Bankagha-kwuru bámono Dzidzeŋe mukolo mubi, ya bátyeghe nde kundaa baara, ya baara babo bábiri nde ku Edzipite. Lo Nzaami áli ya nde. **10** Nzaami ákwulu Dzidzeŋe mu mpara a nde yohono, ya ágwi nde bwehe ya bunsughu ŋa nkulu a Faraó, mukogho a Edzipite, wu áatwulu nde mfumu wu munene mu Edzipite, ya mu nzo a nde yohono. **11** Munzyala ásono mu Edzipite yohono ya mu Kaana. Mpara yíli yilagha, ya bataara ba bihi ka báfirikabagha bi-odza o. **12** Dzakobe bu agyughu ti ku Edzipite óli a bele, nde ágweghe bataara ba bihi mu mukubu wu a nsomo. **13** Mu mukubu wu a myele, Dzidzeŋe ásuu nyuru kundaa banaana ba nde, ya Faraó ásoolo dzumu li nde. **14** Dzidzeŋe ágweghe bayigwolo taara a nde Dzakobe ya dzumu li nde lwohono. Bo báli baara makwumu-nsaama ya bataana. **15**

Dzakobe ákumunu ku Edzipite, ákpi oko, bumó si ya bataara ba bihi. **16** Bábiri miwehe mi bo ku bula bubu Sisýeme ya bádzýighi mye mu mpyeme yi óswumu Abarahame mu nzi kundaa baana ba Emore ku Sisýeme.» **17** «Buulu matala ma ookeele misiini mi ósi Nzaami kundaa Abarahame máyabehene, ekaana e bihi épfini ya éburunu mu Edzipite, **18** tee mu matala ma óbyala mukogho mukimi [mu Edzipite] wuulu ka ásoolo Dzidzeŋe o. **19** Mukogho munde ápfiri ekaana e bihi, ámwēhē bataara ba bihi kimini. Nde átu mu bo mu mpini bakatsili baana babo ba babwili, mu kuulu banyaá obaŋa. **20** Me mu ena ekye áburu Moyidze, nde áli mubwe ŋa mihi mi Nzaami. Bátsyaha nde mu bangoono batere mu nzo a taara a nde. **21** Ya bu batsili nde, mwana a Faraó wu mukaha átolo nde, ya ákwuhu nde ti anga mwana wu áburu ndeme. **22** Moyidze ágyighi maluo mama bunsughu bwohono mama basi Edzipite. Ya áli a lileene mu mbiili ya mu bigyighili bi nde. **23** ŋa ákuhu nde bamvulu makwumu-mana, nde ábagha bitsimi mu oyimono baana ba taara a nde, baana ba Isaraye. **24** Nde ámono musi Edzipite wu ákamwehē mumó mu basi Isaraye mpara. Nde ábaha ya ákala musi Isaraye ya ádzwi musi Edzipite. **25** Nde ákatsimi ti baana ba taara a nde sa babaghala ti mu nde Nzaami aabvwuhu bo. Lo bo ka bábaghala o. **26** ŋa mbihi a etsughu ekye, Moyidze áyimono baara buolo ba bákadzwana. Nde ásaŋa obvurulu egyeé ya edzuunu ŋa kara li bo ya ályele kundaa bo ti: “Mu emakye be lili mu okasa bubi be a be? Buta be lili baana ba taara mumó!” **27** Munde wu ákamwehē nganda mpara ábihi ogyughu Moyidze ya ályele kundaa nde ti: “Nande aatwulu we mfumu ya nsughu-a-lamana mu bihi? **28** We me dzyi odzwa ti bu aadzwi we musi Edzipite matsighi?” **29** Moyidze bu agyughu ndagha oyo, ábara ya áyikala ku nsie yi a Madyane, oko nde áburu baana buolo ba babaghala.» **30** «Mibvu makwumu-mana bu mikughu, ngye-yulu ámoŋono kundaa nde munsu mule a mbaa wu eti-ti, ku syehe lili munguo wu a Sinayi. **31** Moyidze ákiŋimi mu mandagha ma ámono nde, ya bu ayabehene mpaala agyighili otala, nde ágyughu likyi li Mfumu li lílyele kundaa nde ti: **32** “Me ndi Nzaami a bataara ba we, Nzaami a Abarahame, Idzake ya Dzakobe”. Kunsu enkughu, Moyidze ka áleene otala o. **33** Ya Mfumu ályele kundaa nde ti: “Maha mapaapa mu myili mi we, mu kuulu

ebini ki aatemene we, eli ebini kii ngili. **34** Me aamono kimini li ekaana e me ku Edzipite, me aangyughu misyama mi bo. Ya me aankumunu mu okwulu bo. Mu matala ma, gye, me ngweghe we ku Edzipite». **35** «Wu me Moyidze wu bábihi bo ŋa áli bályele ti: “Nande aatwulu we mfumu ya nsughu-a-lamana?” Lo me nde Nzaami ágweghe ti mfumu ya mukwulu. Nzaami átumu nde mu nzili a ngye-yulu wu ámonono kunda nde mu eti-ti. **36** Me nde áapaha bo mu nsie yi a Edzipite mu mandagha mama okinjimi ya bilyimi, ŋa Mubu wu a Bie ya ku syehe, mu mibvu makwumu-mana. **37** Me nde, Moyidze áalyele kunda baana ba Isaraye ti: “Nzaami sa apaha mu nkooro a be, ŋa kara li baana ba taara a be, mubighili mumō ti anga me”. **38** Mu matala ma óli emvugunu ku syehe, me nde áli aatemene mu okagyughu ya bataara ba bihi mi ókalyele ngye-yulu ku yulu a munguo wu a Sinayi. Nde ágyagha mandagha mama bumweē mu ogwa mo kunda bihi. **39** Lo bataara ba bihi ka bákihi osa litumu li nde o, bo bábihi nde ya mikolo mi bo mfbvughuru ku Edzipite. **40** Bo bályele kunda Aarō ti: “Gyighili bihi banzaami ba baadzyara ŋa nkulu a bihi mu kuulu bihi ka lisoolo o bu oobwana Moyidze wu, nde wu aapaha bihi mu nsie yi a Edzipite”. **41** Mu bitsughu bibye bo bátsulu etyeghe mu efaana kii pulu li ngoomo. Ya bádzwí nyama mu ogwa mukaba kunda kye ya bási kyiri mu nkooro a etyeghe ekye ki ótsulu myaā mi bo. **42** Nzaami átyeghe bo mbihi ya ányaā bo bakasamana mikāā mimi mayulu, bwunu a bu básono mu mukaana a mibighili ti: “Nzo a Isaraye, mu mibvu makwumu-mana, kunda me be lígwi banyama ya mikaba ku syehe? **43** Be líibiri ebvulu e Molo, ya ŋomaŋomo a Rayifā, nzaami a be, bityeghe bibye bi lígyighili be mu okasamana bye. Mu obo, me sa mbiri be ku bunkana ku mbihi a Babilone”. **44** «Ku syehe, bataara ba bihi báli a ebvulu kii bumpughulu baa ogwihini, bwunu a bu ótumu munde wu áabili kunda Moyidze, ti agyighili ebvulu mu efaana ki ásuu kunda nde. **45** Bataara ba bihi bu bakihi kye, básohobo kye mu litumu li Dzodzuwe mu nsie yi ógwi bo Nzaami, ŋa mbihi a ŋa ábyi nde bikaana bibye ŋa mihi mi bo, tee mu matala ma Dabvide. **46** Nde ábagha bwehe ŋa busu bu Nzaami ya áluomo muswa wu obagha nzo yi a nzaami a Dzakobe. **47** Lo me Salomō áatwu nzo a nzaami. **48** Lo Wu Ensoō-yulu ka aakakala

mu manzo ma ótwu myaā mi baara o.» Obo me bu ólyele mubighili ti: **49** «Yulu lili likubu li me, ya nsie yili nkara a myili mi me. Nki nzo be liitwu me, bu olyele Mfumu, ya ŋa nki ebini me akala aangwumu? **50** Bunu, ka oli myaā mi me mígyighili bilogho byehene bibye o?» **51** «Be lili baara banga a mutswi-mpini, banga a mikolo ngyi ya matswi-nkyihi. Mu matala mwohonu, be liikabihi Mufulu a Ngili, be lili ti anga bataara ba be! **52** Nki mubighili bataara ba be bágwene omwehē kimini? Bo bádzwí ba bátswama oyatwoho nsia a ogya o Wu-a-Nsumu, munde wu liityeghe ya liidzwi be mu matala ma. **53** Be ba lígyagha Mikyene mu nzili a bangye-yulu, lo be ka liikasalala mye o.» **54** Baara ba mfwunu a ekwuru ki ba-Dzwife bu bagyughu mandagha mamu, bo bábagha nkehe yi alagha ya bákadza myini mu nkooro a nde. **55** Lo Etiene bu áli wu aalwulu mu Mufulu a Ngili, áta ku yulu ya ámono bunkiri bu Nzaami ya Yiiisu mu mukiri ŋa ngo-kwogho e Nzaami. **56** Nde ályele ti: «Ligyughu! Me ndi mu okamono mayulu bwaha, ya Mwana a mbwuru átemene ŋa ngo-kwogho e Nzaami.» **57** Bo bákehe bingubu bi binene, bákyi matswi ma bo, ya mu emvughu bo bwohonu bágyighiri mu nyuru a Etiene. **58** Bo bápaha nde mu bvulu ya bádzwí nde mu mameē. Ya bampughulu básuhu binkuru bi bo ŋa myili mi mumpala mumō, nkwwumu a nde Sawule. **59** Mu matala ma bákakaha nde mameē, Etiene ákabuono bu: «Mfumu Yiiisu, gyagha mufulu a mel!» **60** Ya bu akunu mabuo ŋa nsie, nde ákehe engubu ti: «Mfumu, Mfumu, sa bo kolokolo mu lisumu li!» Bu alyele obo, ewumu ésughu ya nde ákpi.

8 Sawule áli mumō mu babo ba bámono ti lipfu li Etiene ndagha yi mbwe. Mu etsughu kyini ekye, bámwehē Libwunu li Nzaami lili Yerusaleme kimini li lilagha. Ya bo bwohonu ba báli mu Libwunu li Nzaami bátsajama, bágyene ku Yude ya ku Samari. Yini a bantumu baasyili mu Yerusaleme. **2** Lo baara banga-a-enzaami kii engarjama bádzyighi Etiene ya bálili nde ku olagha. **3** Ya Sawule ákabulutsala Libwunu li nzaami, nde ákabulusomo mu manzo, ákabulusyimi babaghala ya bakaha, ya ákayilo bo mu boloko. **4** Babo ba bátsajama bákabulutsala Nsia yi Mbwe yi a ndagha a Nzaami omo mwohonu mu bákabulubara bo. **5** Obo me buulu, Filipe ákumunu mu bvulu limō

lili mu Samari, nde ábwí otsala nsia a Kriste. 6 Emō, mampwumu ma baara mákatyeghe matswi mu mandagha ma ókaluo Filipe, ɲa bákagyughu ya bákamono bo bilyimi bii okiɲimi bi ákasa nde. 7 Mu engañma, mifulu mi mibi milagha mi mɪli mu baara, mɪkapala mu okabulukehe mingili. Balagha ba ókpi binama ya banga-a-bipfwumu mu myili bákadzughu. 8 Mu obo, baara baba mu bvulu lilo, báli kunsá esee ki elagha. 9 Ankoho, áli oli a baghala mumō mu bvulu lili Samari, nkwumu a nde Simō. Nde átswama okakala munsá bvulu lilo. Nde áli ngaa-mpaana, ya baara baba mu Samari bákakiɲimi mu mi ákagyighili nde. Ya ndeme ákatsimi ti nde mbwuru wu munene. 10 Ya baara bwohono, obaana bakwuru tee bike-bike, bákasa kana mu nde, ya bákalye ti: «Baghala wu me lileene li Nzaami, li baakalye ti “Lileene li Linene”.» 11 Ya bo bákasa kana mu nde, mu kuulu mana edzighi, nde ákabulugyighili mandagha maa okiɲimi mu mpaana a nde. 12 Lo bu basí kana mu Filipe wu ákaluo Nsia yi Mbwe yi a empu e Nzaami ya nkwumu a Yíisu-Kriste, babaghala ya bakaha bákakihi oboghoró. 13 Simō ndeme si ási kana ya báboghoró nde. Nde ákanama Filipe ya ákiɲimi, bu ákabulumono bilyimi ya bimaá bii okiɲimi bi ókabulusa Filipe. 14 Bantumu ba básyili ku Yerusaleme bu bagyughu ti basí Samari baakihi ndagha a Nzaami, bágweghe Piere ya Dzā kundaá bo. 15 Bu bato oko, básamana mu basí Samari mpaala bagyagha Mufulu a Ngili. 16 Mu engañma, Mufulu a Ngili nkini ali ka ámaabwa mu mbwuru si mumō mu bo o, yini a oboghoró báboghoró bo mu nkwumu a Mfumu Yíisu. 17 Oɲo, Piere ya Dzā bánaá bo myáá ɲa yulu a mitswi, ya bo bágýagha Mufulu a Ngili. 18 Simō bu amono ti bantumu bákagwa Mufulu mu onaá myáá ɲa yulu a mutswi, nde ágwi bo nzi, 19 ya álye ti: «Ligwa mehe si lileene lilo, mpaala nswe munde wu aaná me myáá ɲa yulu a mutswi, nde agyagha Mufulu a Ngili.» 20 Lo Piere álye ti kundaá nde ti: «Nyaá we ya nzi a we lipfighili! Mu kuulu we aatsimi ti we kughu oswumu mu nzi ekaba ki ookagwa Nzaami ku o bwunu. 21 Mu ogyighili otala, we ka li wu a kaba li bihi o, ya we ka li a pfa mu esala ki o. Mu kuulu mukoló a we ka li nsumu ɲa nkulu a Nzaami o. 22 Mu obo, gyiɲi mayele mu bubi bu we, ya samana Mfumu, nkini-a-nki bakughu osa we kolokoló mu bitsimi bi biigyi we ɲa mukoló. 23 Mu engañma, me

ndi mu omono ti we li a bubi bubu nkala mu mukoló, ya we li nkana a masumu.» 24 Simō ábvuhulu ti: «Be beme lisamana Mfumu mu nkooro a me, mpaala mandagha ma liileye be manyáá obwa mu me.» 25 Piere ya Dzā, bu bamana osuo bumpughulu bu Mfumu ya otsala nsia a ndagha a Nde, bábvughuru ku Yerusaleme. Mu nzili, bo bákabulutsala Nsia yi Mbwe mu mala malagha mu Samari. 26 Ngye-yulu a Mfumu álye ti kundaá Filipe ti: «Temene, ya gye ku nkolo yi a ku Sude, mu nzili yi aakamara ku Yerusaleme ya yiikakumunu ku Ngadza. Baara ka baafirikaluru mu nzili oyo o.» 27 Bu atemene, nde ágyene. Ankoho, baghala mumō wu bágwogholo, wu a ku Etyopi, musala wu munene wu a Kandase, mfumu a busini bwohono bu ngasa a basí Etyopi, áli agyi ku Yerusaleme mu oyabuono Nzaami. 28 Nde áli ayi mu okabvughuru. Nde ábwí-nsini munsá syare li nde, mu okabulutaá mukaana a mubighili Edzayi. 29 Mufulu a Ngili álye ti kundaá Filipe ti: «Gye yibagha syare lilo.» 30 Bu abara ntyini tee oɲo, Filipe ágyughu nde mu okataá mukaana a mubighili Edzayi, ya nde áfwulu nde ti: «Bunu, we li mu okabaghala mi li mu okataá we?» 31 Nde ábvuhulu ti: «Bunu-abo me aambaghala kala ti mbwuru ka gwi me mbaala a mo o?» Ya nde álye ti Filipe akumu ya abwa-nsini ɲa bele a nde. 32 Etsulu e ndagha a Nzaami ki ákabulutaá nde me ki: «Nde áli ti endoomo ki bali mu okabiri ku ebini bi baakadzwa bibuoló, ya ti anga mwana a endoomo wu gwene a likyi, ɲa nkulu a wu li mu okakye nde mfu, nde ka aadzubulu muɲma o! 33 Kunsá okughulu o nde, baasi nde muyala, nde ka aabagha bwuu o, nande akala aabili mu eseene e nde? Mu kuulu baamaha laama li nde ɲa nsie.» 34 Musala wu munene wu a Etyopi munde, áfwulu Filipe ti: «Kolokoló a we, lyele me, mubighili mu na ali mu okabili obo? Mu ndeme bwunu we mu mbwuru mukimi?» 35 Mu obo, Filipe ábaana mu mi básono mu Mukaana wu a Ngili, áluo nde Nsia yi Mbwe yi a Yíisu. 36 Bu bákagye mu nzili, báto ɲa mbughu yi áali a madza, ya Musala wu munene wu a Etyopi álye ti: «Mono madza moɲo! Emakye eekahaba me mu obagha liboghoró?» [37 Filipe álye ti kundaá nde ti: «Kala ti we si kana mu mukoló a we ndehene, we kughu obagha liboghoró». Musala wu munene ábvuhulu ti: «Me ndi a kana ti Yíisu-Kriste li mwana a Nzaami.»] 38 Nde átehebe syare, bo

bansa buolo básughuru mu madza, ya Filipe áboghoro nde. **39** Bu bapala mu madza, Mufulu a Mfumu ábulubiri Filipe ya musala wu munene wu a Etyopi ka áfirimono nde o. Lo nde ánama bula bu nzili a nde mu esee. **40** Filipe áyipala ku Adzote mu okabulutsala Nsia yi Mbwe mu mabvulu mwohonono ma áluru nde, tee bu áyito nde ku Sedzare.

9 Mu matala mamo, Sawule wu áakaŋaana odzwa binduono bi Mfumu, áyiluomo kundaa mfumu a bangaa ba nzaami, **2** mikaana mimi manzo mama lisamana ma ba-Dzwife mama mu bvulu lili Damase. Oko, kala ti nde mono baara ba baakanama nzili a Mfumu, babaghala bwunu we bakaha, nde akuru bo minkana, ya ayabiri bo ku Yerusaleme. **3** Bu ákagye mu nzili, nde ábehene ya bvulu lili Damase. Ensihibi, otsyeme ku ófi ku yulu óbwi mu nde ya odzyi nde. **4** Nde ábwi ŋa nsie, ágyughu likyi li líkalyele nde ti: «Sawule, Sawule, mu emakye we li mu okamwehē me kimini?» **5** Nde áfwulu ti: «Mfumu, we nande?» Likyi líbvuhulu ti: «Me ndi Yiiisu, ngu me we li mu okamwehē kimini. **6** Lo temene, somo munsu bvulu, ya sa balyele we mandagha mafaana we ogyighili.» **7** Baara ba bákadzye ya nde, bátemene ya bákwnono otsughu ndagha mu nzalamweē. Bo bákagyughu likyi, lo ka bákamono wu áakabili o. **8** Sawule átemene ya ádzubulu mihi, lo nde ka áfrikamono elogho si emō o. Baara ba bákagye ya nde, bákwnara nde mu kwogho ya básohobo nde mu bvulu lili Damase. **9** Oko nde ási bitsughu bitere biili nde omono we, odza we ya oŋma we. **10** Ku Damase óli a enduono etsyini, nkwnumu a nde Ananyase. Mu limono Nzaami áti nde mbili: «Ananyase!» Nde ábvuhulu ti: «Mfumu, me ndindi!» **11** Mfumu ályele kundaa nde ti: «Gye mu munsagha wu baakata ti Wu a Nsumu, ya fwulu munsu nzo a Yuda, baghala wu a nkwnumu Sawule musi Tarese. Nde li omo mu okasamana, **12** ya mu bantaala, nde aamono baghala mutsyini, nkwnumu a nde Ananyase wu áasomo mu nzo ya wu áanaā nde myaā ŋa yulu mutswi mpaala nde afirimono.» **13** Ananyase ábvuhulu ti: «Mfumu, me áakangyughu baara balagha mu okabili mu baghala munde ya mu bubi bwohonono bu aakasa nde kundaa baba ngili ba we mu Yerusaleme. **14** Ya bamfumu ba bangaa ba nzaami bágwi nde litumu lili osyimi baara bwohonono ba baakasamana we.»

15 Lo Mfumu ályele ti: «Gye kundaa mbwuru munde, mu kuulu nde li elwee ki aansuolo mu oyitsala Nsia a Nkwumu a me kundaa bikaana bibi gwene osoolo me, kundaa mikogho ya kundaa basi Isaraye. **16** Me, meme sa nsuo nde mpara yi afaana omono nde mu nkoooro a nkwnumu a me.» **17** Ananyase ágyene, áasomo munsu nzo. Ya bu anaā nde myaā ŋa yulu a mutswi, ályele kundaa nde ti: «Sawule, mwana a taara a me, Mfumu gweghe me, Yiiisu munde wu aamono kundaa we mu nzili yi aakagya we, mu kuulu we firimono ya we lwulu mu Mufulu a Ngili.» **18** ŋaana oŋo, bilogho bi bifaana ti anga makala ma nswi bíkoghono mu mihi mi nde ya nde ábaana ofirimono. Nde átemene ya báboghoro nde. **19** Ya bu amana odza, Sawule ábagha mpini mu nyuru. Sawule áluhu mana bitsughu ya binduono bi Mfumu ku Damase. **20** ŋaana oŋo, nde ábwi okabululuo mu manzo mama lisamana ma ba-Dzwife ti: Yiiisu li Mwana a Nzaami. **21** Baara bwohonono ba bákagyughu nde bákakijimi ya bákalyele ti: «Ka oli nde wu áakamwehē ba baakasamana mu nkwnumu a Yiiisu kimini ku Yerusaleme o? Ya nde ka aagyi kunu mu osyimi bo ya obiri bo mu binkana kundaa bamfumu ba bangaa ba nzaami o?» **22** Lo Sawule ákagwama ku oluru, ba-Dzwife baba ku Damase ka bákabagha yi baabili ŋa nkulu a nde o, ya nde ákasuo ti Yiiisu me Kriste. **23** Bitsughu bilagha bu biluru, ba-Dzwife bákuru mfwunu yi odzwa nde. **24** Mpyibi ya mwii, bo bákakebe mu mijma mi ekagha kii bvulu kuulu badzwa nde. Lo Sawule ágyahaba mfwunu a bo. **25** Mu obo, mu mpyibi, binduono bi Sawule, bílo nde mu nkuru ya bísurulu nde ku ngulu a ekagha kii bvulu. **26** Bu ato ku Yerusaleme, Sawule ásagha osomo mu kaba lili binduono, lo bo bwohonono báli a nzalamweē a nde, ya ka bákasa kana o ti nde áli ayi enduono. **27** Baranabase ábiri nde kundaa bantumu ya ályele bo bu óbwana a Sawule Mfumu mu nzili a Damase, ya bu ábili nde kundaa Sawule. Ya bunu-a-bo, obaana ku Damase, nde ákabili ya kana lwohonono mu nkwnumu a Yiiisu. **28** Obaana matala mamo, Sawule ákabulugye mu bibini byehene ya bo mu Yerusaleme, ya ákabulubili mu nkwnumu a Mfumu ya kana. **29** Nde ákabili ya ákatsoho ya ba-Dzwife ba baakabili Engereke. Lo bo bákasagha odzwa nde. **30** Bandughu mu kana bu basoolo ndagha oyo, bábiri nde ku Sedzare, ya oko bo bágweghe nde ku Tarese.

31 Libwunu líli kunsá edzuunu mu bitsulu bi nsie byehene bibi Yude, Ngálibe ya Samári. Mu libaha lí Mufulu a Ngili, lo líkakulu mu mufulu, líkadzyara kunsá budziri bu Mfumu ya líkakulu mu mutala a baara. 32 Obo me buulu Piere, wu áakabuludzie mu bitsulu byehene, ákumunu si kundaa baba ngili ba báli mu bula bubu Lida. 33 Nde ámono baghala mutsyini wu ónejene binama. Baghala munde ágyonjomo ña yulu a ekala mu mibvu mpuomo. Nkwumu a nde Ene. 34 Piere ályele kundaa nde ti: «Ene, Yíisu-Kriste aadzuhu we. Temene, ya fughuru ekala e we weme!» Mu líkpa lyini lilo, nde ásaatemene. 35 Baara bwohono baba mu Lida ya baba ku elehe kii Syarone bu bamono obo, bo bási kana mu Mfumu. 36 Mu bvulu lili Yope, óli a enduono kii mukaha. Nkwumu a nde Tabita, mu Engereke «Dorokase», mbaala ti, «nsa». Nde ákagyighili mi mibwe ya ákabaha bawe. 37 Mu bitsughu bibye, nde ábyele ya ákpi. Bu baswagha ebyimi e nde, báiyitwulu kye mu ngwumu a nzo yi a ku yulu. 38 Buulu Lida áli libehene ya Yope, binduono bigyughu ti Piere áli oyo, bígweghe babaghala buolo mu oyibinjini nde ya bíbuono nde ti: «Sa maswa, gya kundaa bihi!» 39 Mu maswa Piere ágyene ya bo. Bu ato oko, bo bákuhubu nde ku ngwumu a nzo yi a ku yulu. Bapfiili bwohono ba bakaha bátemene ña nkulu a nde ya bábuulu elili, bákasuo nde binkuru bi bila ya binkuru bi baakalaha ña yulu bi ókatwu bo Dorokase ña aali nde mweé. 40 Piere ápaha baara bwohono ku mbala, ya bu akunu mabuo mu nsie, nde ábwi osamana. Ña mbihi, nde ákaghala ku óli ebyimi ya ályele ti: «Tabita, temene!» Tabita ádzubulu mihi, ya bu amono Piere, nde ásigihili ábwi-nsini. 41 Piere ákwara nde mu kwogho ya átehebe nde. Ña nseele, nde áti baba ngili ya bapfiili mbili ya nde ásu bo Dorokase wu a mweé. 42 Yope lwohono lígyughu ndagha oyo ya baara balagha bási kana mu Mfumu. 43 Piere áluhu bitsughu bilagha ku Yope, mu nzo a Simó, wu áakasa esala ki okagyighili bibaana bi banyama.

10 Ku bvulu lili Sedzare óli a baghala mutsyini, nkwumu a nde Koroneye, mfumu a mpwumu a bambumbulu nkama, yi baakata ti «mpwumu yi a Itali». 2 Nde áli mbwuru wu bunsumu ña nkulu a Nzaami ya ákagwa nde budziri, emó ya baara ba nzo a nde bwohono. Nde ákabaha bawele ba ba-Dzwife ku olagha

ya ákasamana Nzaami matala mwohonono. 3 Etsughu nga-emó, mu tala lili matere ña mbihi a embehe, nde ágyighili omono mu limono ngye-yulu a Nzaami wu áyasomo mu nzo a nde ya wu áati nde mbili ti: «Koroneye!» 4 Koroneye bu atala nde ku edzili, ábagha nzalamweé ya ábvuhulu nde ndiri: «Mfumu! Nki ndagha?» Ngye-yulu ályele kundaa nde ti: «Nsamana a we ya bikaba bi aakagwa we kundaa bawe, biito kundaa Nzaami, ya nde aalibili mweé mu we. 5 Mu matala ma, gweghe bambinjini ku Yope, buulu bayabiri we Simó wuulu nkwumu yi obili Piere. 6 Nde li mu nzo a Simó mukimi, munde wu áakasa esala ki okagyighili bibaana bi banyama ya aakakala ku mukogho a mubu.» 7 Mu matala ma ágyene ngye-yulu wu ákabili ya nde, Koroneye áti basala ba nzo a nde buolo mbili ya mbumbulu mumó wu áali a enzaami kii nganma, wuulu edzighi ákasala kunsá litumu li nde. 8 Ya bu alyele bo mandagha mwohonono ma ábwana a nde, nde ágweghe bo ku Yope. 9 Ña mbihi a etsughu ekye, ñaala bo nkini ali mu okanama bula bu nzili a bo, bo bábehene ya bvulu, ya ku bele a matala mama embehe, Piere ákumu ku yulu a see li nzo lili eyala mu oyisamana. 10 Lo nzala bu yifuru nde, nde ásagha bi-odza. Mu matala ma bákanaá nde bi-odza, nde ábagha limono. 11 Nde ámono yulu bwaha: Elogho etsyini ékayakumunu. Kye éli ti anga mupa a eko wu munene wu bákware mu manto mansa mana wu áyabwa ña nsie. 12 Ña yulu a nde óli a banyama baba mawama: Banyama baba myili mina, ba baakagye mu etulu ya banjini. 13 Ya likyi lílyele kundaa nde ti: «Piere, temene, dzwa ya dza!» 14 Piere ábvuhulu ti: «Mfumu! Si kala ka bunu! Mu bumweé bu me, me nkini ámaandza elogho kii nyara ya ki bási ngili o.» 15 Likyi líbili kundaa nde mu sa lili ywolo ti: «Bi ootsehebe Nzaami, we, we ka kughu olyele ti bye bili bibi nyara o!» 16 Ndagha oyo yímonjono kundaa nde mansa matere, ya ña nseele, elogho ekye ésaabvughuru ku yulu. 17 Piere ndeme ákasagha obaghala ndagha oyo yi ámono nde, lo nde ka ákakughu o. Mu matala maana mamo, baara ba ógweghe Koroneye, ba bákabulufwulu ku oli nzo a Simó, báyanto ña muñma a nzo a nde. 18 Bo báti nde mbili ya báfwulu kala ti Simó wu baakata ti Piere áli munsá nzo oyo. 19 Piere áli nkini mu okatsimi ndagha yi aamono nde, ya Mufulu a Ngili ályele kundaa nde ti: «Oli a babaghala

batere ku ba bali mu okasagha we. **20** Mu obo, kumunu lili, bvughu nzili ya bo ku ogwene a okeje, mu kuulu, me aangweghe bo.» **21** Piere ákumunu, ábvuhunu ya baara babo. Nde ályele kundaa bo ti: «Me ndindi. Mbwuru wu lili mu okasagha be ngu me. Mu nki ndagha be liiyatala me?» **22** Bo bábvuhulu ti: «Koroneye, mfumu a mpwumu a bambumbulu nkama, mbwuru wu a bunsumu, wu aakagwa Nzaami budziri ya wuulu ba-Dzwife bwohono bali a bumpughulu bu bubwe mu nde, aagweghe bihi. Ngye-yulu wu a ngili aasuo kundaa nde ti nde ali faana ota we mbili ku nzo a nde mpaala agyughu mandagha ma aalyele we.» **23** Ojo Piere ágwi bo ebini kii ogyonjomo. Ija mbihi a etsughu ekye, nde ágyene ya bo nzili mo. Ndaama a baara ba bakanama nde mu Yope bágyene ya nde. **24** Etsughu etsyini kii bye, bo báyto ku Sedzare. Koroneye wu áakakebe bo, áli ayi áti baara ba dzumu li nde ya bandughu ba nde mbili. **25** Mu matala ma óyto Piere, Koroneye áyibwana a nde ya ákunu mabuo ija nsie a myili mi nde mu ogwa nde mboro yi a budziri. **26** Lo Piere átehebe nde ya ályele ti: «Temene! Buta mehe si yini a mbwuru ndi.» **27** Nde ásono munsu nzo mu okabulubili ya nde. Omo, nde ámono baara balagha ba bábvuhunu, **28** ya nde ályele kundaa bo ti: «Be ligyighili osoolo ti mu mikyene mi ba-Dzwife, mu-Dzwife ka li a muswa wu osa endughu ya munzyi bwunu we ogyagha nde mu nzo a nde o. Lo kundaa me, Nzaami aayasuo me ti ka lifaana omono ti mbwuru wu li a nyara bwunu we nde aatsumunu ngili. **29** Me mu obo, we bu aatumu me ngya, me aangyi kwono ku makeje osa. Lo mu bu, me ndzyi osoolo mu nki ndagha be litumu me ngya.» **30** Koroneye ágwi nde mvuru yi: «Bitsughu yini a bitere bimaaluru, mu tala lili matere ija mbihi a embehe, me aakansamana Nzaami munsu nzo a me. Ensihibi, mbwuru mutsyini wu áalaha binkuru bi bikasehene, áyamonjono ija nkulu a me, **31** ya ályele kundaa me ti: «Koroneye! Nzaami aagyughu osamana o we ya nde ka aadzimini bikaba bi aakagwa we kundaa baweke nsimi o. **32** Me mu obo, gweghe bambijini ku Yope mpaala bayabiri we Simó wuulu nkwumu yi obili Piere. Nde li mu okakala mu nzo a Simó wu aakasala esala ki okagyighili bibaana bi banyama ya aakakala ku mukogho a mubu.» **33** Mu maswa, me aangweghe bambijini bayagwolo we, ya we aasi bubwe mu ogya kundaa bihi. Mu matala ma, bihi bwohono lili ija nkulu a Nzaami mu ogyughu mandagha ma oolyele we Mfumu mu oyatwoho kundaa bihi.» **34** Mu obo, Piere átsughu ndagha ya ályele ti: «Mu engajma, me aambaghala ti Nzaami ka li a munkabala o, **35** ya ti mu bikaana byehene, nde aakakihi nswe munde wu aakagwa nde budziri ya aakasala bunsumu bu nde. **36** Nde ágweghe Ndagha a nde kundaa basi Isaraye, Nsia yi Mbwe yi a edzuunu mu Yisu-Kriste, wu li Mfumu a baara bwohono. **37** Be lisoolo ndagha yi aabwi, nsomo ku Ngilile, ija nseele mu Yude lwohono, ija mbihi a liboghoru li ókaluo Dzã. **38** Be lisoolo bunu-a-bo Nzaami ásughu lileene li Mufulu a Ngili mu Yisu wu a ku Nadzarete. Nde aakabulusa bubwe omo mwohono mu ákaluru nde, nde ákadzuhu bwohono ba ósi dyabulu kunsu bunkana, mu kuulu Nzaami áli ya nde. **39** Ya bihi ba lili bampughulu mu esala e nde kyehehe mu etsulu e nsie ki ba-Dzwife ya ku Yerusaleme. Munde wu baadzwi bo mu obanjana ija yulu a kuruwa. **40** Lo Nzaami aasiili nde ija kara li ba bákpi mu etsughu kii bitere, ya aagwi nde muswa mu omorjono **41** kundaa bampughulu ba ótswama osuolo Nzaami, kundaa bihi ba liikadza ya liikajma ya nde, ija mbihi a osighili o nde ija kara li ba bákpi. Lo ka kundaa baara bwohono o. **42** Nde aagwi bihi litumu mu otsala nsia kundaa baara ya mu okala bampughulu ba ndagha yi: Me nde Nzaami aasuolo mu okala nsughu-a-lamana a baara baba mwee ya ba bákpi. **43** Me mu nde mibighili myehene mikabili ti: Nswe munde wu aasa kana mu nde, mu nkwumu a nde, sa abagha kolokolo a masumu ma nde.» **44** Piere áli nkini mu okabili, Mufulu a Ngili ábwi ija yulu a bo bwohono ba bákagyughu ndagha a Nzaami. **45** Ba-Dzwife ba bákasa kana ba bánama Piere, bákijimi mu omono ti ekaba ki Mufulu a Ngili ki oogwi Nzaami, eetsanjama tee kundaa bikaana bibi banzyi. **46** Mu kuulu, bo bákagyughu baara ba mu okabili mu mandiji ma bagwene osoolo bo ya okasyighi bunene bu Nzaami. Piere áfirilyele ti: **47** «Baara ba baagyagha Mufulu a Ngili ti anga bihi-a-be, mbwuru kughu okahaba ti ka baboghoru bo mu madza o?» **48** Nde ágwi litumu ti baboghoru bo mu nkwumu a Yisu-Kriste. Ya bo báluomo kundaa nde afiriluhu mana bitsughu ya bo.

11 Bantumu ya bandughu mu kana ba báli ku Yude bágyughu ti baara baala ka bali ba-Dzwife o, baakihi si Ndagha a Nzaami. **2** Piere bu akumu ku Yerusaleme, ba-Dzwife ba bási kana mu Yíisu báyakumunu nde **3** ya bályele kundaa nde ti: «We aasomo mu nzo a ba bágwene osomo nzo a mbaa, ya we aali ya bo!» **4** Obo me buulu Piere ásuu bo mandagha mwohono, bwunu a bu máluru: **5** «Nja aandi me mu bvulu lili Yope, mu matala ma aakansamana me, me ámbagha limono, me áamono elogho éfi ku yulu ya ékayakumunu tee kundaa me. Kye éli ti anga mupa a eko wu munene wu bákware mu manto mansa mana. **6** Me bu aangyili okehene kye, me aamono banyama ba nsie baba myili mina, banyama baba musuru, ba baakagye mu etulu ya ba baakapujumu mu yulu. **7** Ya me áangyughu likyi li lílyele kundaa me ti: «Piere temene, dzwa ya dza!» **8** Me áambvuhulu ti: «Pele Mfumu! Si kala ka bunu. Mu kuulu mu bumweé bu me, elogho kii nyara ya ki bási ngili nkini ka émaasomo mu mujma a me o.» **9** Mu mukubu wu a buolo, likyi lífiribili ku yulu ti: «Elogho ki oosi Nzaami kii tse-tse, we ka lyele o ti kye eli kii nyara!» **10** Ndagha oyo yímonono kundaa me mu mansa matere. Nja mbihi oyo, elogho ekye ébvughuru ku yulu. **11** Mu matala maana mamu, babaghala batere ba báfi ku Sedzare mu oyagwolo me, báyanto nja nzo yi líli bihi. **12** Mufulu a Ngili ályele me bu: «Gye ya bo, ka keje o.» Bandughu mu kana basemene ba baagyi ya me nja áli bagyene ya me. Ya bihi bwohono lífiso mu nzo a Koroneye. **13** Nde ályele me bu ámono nde ngye-yulu wu áyamonono munsa nzo a nde ya ályele nde ti: «Gweghe bambijini ku Yope mpaala bayabiri Simó wu baakata ti Piere. **14** Nde sa alyele we mandagha ma maabvwuhu we ya nzo a we yohono.» **15** Me bu mbaana obili, Mufulu a Ngili ásughuru nja yulu a bo ti bu ásughuru nde nja yulu a bihi mu ebaana. **16** Oyo, me ándibili-mweé mu ndagha yi ali olyele Mfumu ti: «Dzā áboghoro mu madza, lo be, be sa baboghoro be mu Mufulu a Ngili.» **17** Kala ti Nzaami aagwi baara ba ekaba emó kyini-ekye ki ágwi kundaa bihi, nja lísi bihi kana mu Mfumu Yíisu-Kriste, lo me na, buulu me ali nkahaba dzyi li Nzaami?» **18** Bu bagyughu mandagha mamu, mikolo mi bo myehene midzuunu ya bo básyighi Nzaami ti: «Mu enganyama Nzaami aagwi si kundaa bikaana biili ka bili ba-Dzwife o bwehe buu ogyini mayele ya obagha bumweé.» **19** Nja mbihi a lipfu li Etienne, bábwí omwehé banga-a-kana mu Kriste kimini. Mu obo, bo bátsanama manto ya manto. Bo bágyene tee ku Fenisi, ku Syipere ya ku Antyose. Lo bo bákabululuo Ndagha a Nzaami yini a kundaa ba-Dzwife. **20** Ankoho, baara babake nja kara li bo, basi Syipere ya basi Sirene, bu bato ku Antyose, bábwí okatsala si Nsia yi Mbwe yi a Mfumu Yíisu kundaa baara ba baakabili ndini yi a Engereke. **21** Kwogho e Mfumu éli ya bo, ya mutala a baara ba bákasa kana mu Mfumu ya ba bákagyiini mayele ákapfina ku olagha. **22** Nsia oyo yito kundaa Libwunu li Nzaami lili ku Yerusaleme, ya bo bágweghe Baranabase ku Antyose. **23** Nde bu ato ya bu amono bwehe bu Nzaami, ámono esee ki elagha, ya nde ágwi bo bwohono bukyini ya ályele bo banama Mfumu mu mukolo mumó. **24** Baranabase áli mbwuru wu mubwe, wu áalwulu mu Mufulu a Ngili ya mu kana. Me mu obo baara balagha bási kana mu Mfumu. **25** Nja mbihi, Baranabase ágyene ku Tarese mu oyisagha Sawule. **26** Bu amono nde, áyabiri nde ku Antyose. Bo bansa buolo bálulu mu mubvu mumó ya Libwunu li Nzaami mu okaluo mpwumu a baara yi alagha. Me ku Antyose mu sa lili nsomo báti binduono mu nkumu yi a bakriste. **27** Mu bitsughu bibye, mibighili mifi ku Yerusaleme ya mikumunu ku Antyose. **28** Mu lileene li Mufulu a Ngili, mumó mu bo wu a nkumu Angabuse, átemene ya ályele ti munzyala sa agya mu nsie nsyini. Ya munzyala munde ágyi mu matala ma óli Kolode Mukogho. **29** Mu obo, binduono bígwolo munkana wu ogweghe libaha kundaa bandughu mu kana ba báli ku Yude, bwunu a bu óli bupfulu bu nswe mbwuru. **30** Bo bási obo, bágweghe bikaba bibye kundaa bakwuru. Bo bágwi bye nja myaá mi Baranabase ya Sawule.

12 Mu matala mamu, mukogho Erode ábaana omwehé ndaama mu baara ba Libwunu li Nzaami kimini. **2** Mu litumu li nde, bádzwi Dzake, naana a Dzā mu lippee. **3** Nde bu amono ti ndagha oyo yíkagwa ba-Dzwife esee, nde áfirigwa litumu basyimi Piere mu bitsughu bibi kyiri kii mampa ma magwene a pfina. **4** Bu basyimi ya balo nde mu boloko, Erode ási bikuru bina bibi bambumbulu bana-bana mu okakebe Piere. Dzyi li Erode áli ti nde asa Piere muyala nja mihi mi baara bwohono nja mbihi a kyiri

kii Paake. 5 Piere áli mu boloko, lo Libwunu li Nzaami líkasamana matala mwohonu mu nkooro a nde. 6 Mu mpyibi yi oto mu etsughu ki ókaasa Erode Piere muyala, Piere ágyorjomo ensama ña kara li bambumbulu buolo. Bákuru nde misyi mimi bisyeë, ya bankyele ba boloko bátemene ña muñma a nzo. 7 Lo ngye-yulu a Mfumu áyapala ya otsyeme kuu mpini ómorjono munsá boloko. Nde ákaha Piere mu mbambaha a mbee, ásiili nde ya ályele ti: «Saana, temene!» Misyi mimi bisyeje mi bákuru nde mífwi. 8 Ngye-yulu ályele kundaa nde ti: «Kuru muswele a we mu bala ya kuru misyi mi mapaapa ma we!» Ngye-yulu áfiribwehe ti: «Laha enkuru e we ki ela kii kobo ya nama me.» 9 Piere ápala ña mbihi a nde. Nde ka ákasoolo o ti mandagha ma ókasa ngye-yulu áli mama ngarjma. Nde bu ákatsimi ti lilo áli limono. 10 Bo báluru bankyele baba nsomo, ña mbihi baba buolo, ya báto ña muñma a nzo wu a esyeje wu aakapaha kunsá bvulu. Muñma a nzo ádzubulu ndeme ña nkulu a bo. Bu bato ku mbala, bo bágyene ku nto a nkulu, ya ensihibi, ngye-yulu ásihi Piere. 11 Orjo embwuru bu eyabvughuru Piere, nde ályele ti: «Mu matala ma me nsoolo mu engarjma ti me Mfumu aagweghe ngye-yulu a nde mu kuulu akwulu me ña myaá mi Erode ya mu mandagha mwohonu ma ookeene ekaana ki ba-Dzwife osa mu me.» 12 Bu abaghala ndagha oyo, nde ágyene ku nzo a Mari, ngughu a Dzã, wu baakata ti Mareke. Baara balagha áli babvuñunu omo mu okasamana. 13 Piere bu akoboro ña muñma a nzo, musala mutsyini wu mutughu, nkulumu a nde Rode, ágyi mu oyagyulu. 14 Nde bu agyughu likyi li Piere, mu esee, nde ka ádzubulu edzughubu e nzo o, lo nde ábara ya áyilyele kundaa bana ndiri, Piere li ña muñma nzo. 15 Bo bályele kundaa nde ti: «We lala byele!» Lo nde ágyighili onyeme ti ngarjma, nde áli ña muñma a nzo. Ya bo bábvuhulu ti: «Lo munde ngye-yulu a nde.» 16 Piere ási enziini mu okakoboro. Bo bákarayadzubulu, ya bákinjimi ku olagha mu omono nde. 17 Nde ákahaba bo banyaá osa nkele, ályele kundaa bo bu oopaha nde Mfumu mu boloko ya áfiribwehe bu: «Liyitwoho nsia kundaa Dzake ya kundaa bandughu mu kana babake.» Ya nde ámara orjo, ágyene nto nkimi. 18 Bwihi bu buki, mpaatsala yíbwi ña kara li bambumbulu, bo bákabili bo-a-bo ti: «Bu Piere bunu aabwana?» 19 Erode ásagha ti bayabiri nde Piere, lo ka bámono nde o. Báfwulu bankyele ya

bágwi litumu ti badzwa bo. Ña nseele, Erode ákumunu ku Yude, ágyene ku Sedzare ya áluhu mana bitsughu oko. 20 Erode áli a nkehe yi alagha ya baara baba mabvulu mama Tire ya Sidõ. Baara babo bágwihini mu oyimorjono ña nkulu a nde. Bo bápeene a Balasito, musala a mukogho mu mi miikatala ngwumu a nde, bo baluomo edzuunu kundaa Erode, mu kuulu mansie ma bo mákabagha bi-odza ku nsie a nde. 21 Etsughu ki bási lagha bu eto, Erode wu álahá enkuru e nde kii bukogho, ábwi-nsini ña ebini kii muyala ya ábwi obili mu likyi lili mpini kundaa bo ña nkulu a baara bwohonu. 22 Baara bábwí ofulu miluulo ti: «Likyi li, likyi li nzaami, lo ka lili lili mbwuru o!» 23 Ñaana orjo, ngye-yulu a Mfumu ákaha Erode, mu kuulu nde ka ágwi nsia kundaa Nzaami o. Ya misere míli Erode, nde ákpi. 24 Nsia a Ndagha a Nzaami yíkatsarjama ya ba bákasa kana bákapfini. 25 Lo Baranabase ya Sawule bu bamana esala e bo osa mu nkooro a baara baba Yerusaleme, bábvughuru. Bo bábiri Dzã wuulu nkulumu yi obili Mareke.

13 Mu Libwunu li Nzaami li líli ku Antyose, óli a mibighili ya miluo: Baranabase, Simeõ wu baakata ti Ndoomo, Lusiyuse musi Sirene, Manahene wu bákwhu emõ ya Erode, mfumu a etsulu e nsie, ya Sawule. 2 Etsughu nga-emõ, bo bu bákasamana Mfumu ya bákuru nswele mu bala, Mufulu a Ngili ályele kundaa bo ti: «Litwulu, mu nkooro a me, mu libee Baranabase ya Sawule mu esala ki ánti me bo mbili.» 3 Orjo, bu bamana osamana ya okuru nswele mu bala, bo bánaá bo myaá ña yulu a mutswi ya bányaá bo bagye. 4 Mufulu a Ngili bu agweghe bo, bo bákumunu ku bvulu lili Selesi ku bágwolo bo bwara bu bunene mu ogye ku elyi kii Syipere. 5 Bu bato ña bvulu lili Salamine, bo bátsala nsia a ndagha a Nzaami munsá manzo mama lisamana ma ba-Dzwife. Dzã-Mareke áli ya bo mu okabulubaha bo. 6 Bu bamana osaghaba elyi kyehene tee ku bvulu lili Pafose, bo bábwana a mu-Dzwife mumõ nga-a-mpaana, mubighili wu a mpya, nkulumu a nde Bare-Yiisu. 7 Nde áli emõ ya ba bali mpini ya Serengyo Poole, mfumu a elyi, mbwuru nga-a-mayele. Nde áti Baranabase ya Sawule mbili, mu kuulu nde áli a nzala a ogyughu ndagha a Nzaami. 8 Lo Elimase, nga-a-mpaana, mu kuulu oyo me mbaala a nkulumu a nde, ákasagha okahaba bo mu kuulu nde ka

ákadzyi o ti mfumu Serengyo Poole asa kana mu ndagha a Nzaami. 9 Mu obo Sawule, wu bákata si ti Poole, wu áalwulu mu Mufulu a Ngili, átuunu Elimase mihi 10 ya ályele kundaa nde ti: «We aalwulu mu mpya ya mu mayele mama pfyibi, mwana a dyabulu, mutaara a bunsumu. We ka nyaã okagwini manzili ma Mfumu ma mali nsumu o? 11 Mu matala ma, gyughu: Mfumu we áasyeme. We sa kala enkpa-mihi mu mana matala, we ka afirimono tala o.» Njaana ogo libwi a mpyibi yi a laja-laja bíbwi mu nde, ya nde ábwi okadzenene mu osagha mbwuru wu akwara nde mu kwogho ya osuo nde nzili. 12 Mu matala ma ómono mfumu Serengyo mandagha ma mábwi, nde ási kana ya ákijimi ku olagha mu maluo ma Mfumu. 13 Poole ya bandughu ba nde básomo bwara nja Pafose, bo bágyene ku bvulu lili Perenge mu etsulu e nsie kii Pamfili. Oko, Dzā-Mareke ákaghaba ya bo ya ábvughuru ku Yerusaleme. 14 Lo Poole ya Baranabase, bu bamara Perenge, bánama nzili a bo ya báto ku bvulu lili Antyose lili mu etsulu e nsie kii Pisidi. Mu etsughu kii sabate, bo básomo mu nzo a lisamana a ba-Dzwife ya bábwi nsini. 15 Bu bamana otaã mikaana mi Mikyene mi Moyidze ya mimi Mibighili, bamfumu ba nzo a lisamana a ba-Dzwife bályele kundaa bo ti: «Bandughu mu kana, kala ti be lili a ndagha yi ogwa baara bukyini, lo libili mu matala ma!» 16 Poole bu atemene, áseene kwogho, ya ályele ti: «Basi Isaraye, ya be babake ba liikagwa Nzaami budziri, ligyughu me! 17 Nzaami a ekaana kii Isarayele ásuolo bataara ba bihi. Nde ási ti ekaana ephini mu matala ma éli kye ku nsie a Edzipite. Ya nde ápaha kye omo mu lileene li kwogho e nde. 18 Mu mibvu ku bele a makwumu-mana, nde ábuɣunu bo. 19 Nja mbihi, nde bu amana odzwa baara baba mansie nsaama ba báli ku Kaana, nde ágwi bo mansie mamu ti pfa. 20 Mandagha mwohonu mamu mágyili ku bele a bamvulu nkama na ya makwumu-mataana.» «Nja mbihi, Nzaami ágwi bataara ba bihi bansughu-a-lamana ba ekaana tee mu matala ma mubighili Samwele. 21 Nja nseele, bo báluomo mukogho, ya Nzaami ágwi bo Sawule, mwana a Kise, mu dzumu li Benzamē. Nde átuunu mu bamvulu makwumu-mana. 22 Ya Nzaami bu amaha nde, ábyaha Dabvide mu okala mukogho a bataara ba bihi. Me kundaa nde Nzaami ásuu bumpughulu ba: «Me aansuolo Dabvide, mwana a Yese, mbwuru

wu li mu okadzyara bu ookadzyi mukolo a me. Nde sa agyighili mandagha mwohonu ma aangwaa me». 23 Me mu musyi a dzumu li nde, Nzaami ápaha Yiisu, Mubvwuhu a Isaraye, ti bwunu a bu óli misiini mi nde. 24 Nsomo Yiisu agya, Dzā ákata mukwughu kundaa basi Isarayele bwohonu mu obagha liboghoro lili ogyiji mayele. 25 Ya mu matala ma ákagye nde ku omana esala, nde ályele ti: «Mu bitsimi bi be, me nande ndi? Pele, me ka ndi munde wu lili mu okakebe be o! Lo ligyughu, nde li mu ogya ku mbihi a me, me ka nkughu onyana misyi mi bikoghoro bi nde o»». 26 «Bandughu ba me mu kana, baana ba musyi a dzumu li Abarahame, ya be ba lili nja kara li bihi ba baakagwa Nzaami budziri, me kundaa bihi-a-be bágweghe ndagha yi obvwughu yi. 27 Mu engajma, baara ba Yerusaleme ya bamfumu ba bo ka baabaghala ti Yiisu nande ali o, bu baasi nde muyala, obo me bu baakuhu mandagha ma mibighili ma baakataã mu etsughu kii sabate. 28 Si buulu bo ka bábagha ebili kii odzwa nde o, lo bo báluomo kundaa Pilate ti badzwa nde. 29 Bo bámana okuhu mandagha mwohonu ma básono mu nde, básurulu nde nja kuruwa ya bátwulu nde munsu mpyeme. 30 Lo Nzaami ásiili nde nja kara li ba bákpi. 31 «Mu bitsughu bilagha, nde ákamogono kundaa babo ba bákumu ya nde obaana ku Ngalile tee ku Yerusaleme. Mu bu, bo bali bampughulu ba nde nja nkulu a baara. 32 Ya bihi, bihi lili mu oluo Nsia yi Mbwe oyo: Misiini mi bágyi kundaa bataara ba bihi, 33 Nzaami aagyighili okuhu mye kundaa bihi, baana ba bo, mu matala ma aasiili nde Yiisu nja kara li ba bákpi, ti bwunu a bu básono mu Ekwumu kii bye ti: «We li Mwana a me wu baghala, Me me aamburu we, etsughu kii lolo»». 34 «Nzaami ásiili nde nja kara li ba bákpi, mu kuulu anyaa obolo, obo me bu ályele nde ti: «Me sa ngwa be bibi ngili bi bafaana osa kana mu bye, bi ánsiini a me Dabvide»». 35 «Me mu obo, nde áfirilyele nja ebini ekimi ti: «We ka nyaã Wu a ngili a we abolo o»». 36 «Ankoho, mu eseene e nde, Dabvide ákasalala mandagha ma ókadzyi Nzaami. Nja mbihi ogo, nde ákpi, bádzighi nde nja bele a bataara ba nde ya nde ábolo. 37 Lo munde wu oosiili Nzaami mu lipfu, ka aabolo o.» 38 «Bandughu mu kana, lisoolo ti, me mu nde baagwi be nsia a kolokolo a masumu ya mandagha mwohonu maala Mikyene mi Moyidze ka mísi be baba bunsumu o. 39 Lo

nswe munde wu aasa kana mu nde sa akala wu bunsumu. **40** Mu obo, lisa mayele, mu kuulu mandagha ma ósono mibighili manyaã obwa mu be.» Mandagha mammo me ma: **41** «Litala, be ba lili a ligwagha, likinjimi ya lidzimini! Mu kuulu me sa ngyighili ndagha mu bitsughu bi bumweë bu be, ndagha yiili be ka likughu osa kana mu yo o, kala ti mbwuru lyele be yo!» **42** Ija ópala ba Poole ya Baranabase mu nzo a lisamana a ba-Dzwife, bábuono bo mu ofiriyabili mu mandagha maana mammo mu etsughu kii sabate kii yulu. **43** Ija mbihi a ña bábvununu bo, ba-Dzwife balagha ya ba baakasamana Nzaami a bo bánama Poole ya Baranabase. Bo bákamoro ya bo, ya bákagwa bo bukyini mu onabara bwehe bu Nzaami. **44** Etsughu kii sabate bu eto, baara ba bvulu lwohono bábvununu mu ogyughu Ndagha a Mfumu. **45** Ba-Dzwife bu bamono mpwumu a baara oyo, bálwulu mu musogho ya báwbi okaala mandagha ma ókaluo Poole embihi ya bákaturghu nde. **46** Poole ya Baranabase mu kana, bályele kundaa bo ti: «Kundaa be bákaatswama otuoho Ndagha a Nzaami! Mu kuulu be lili mu okabihi yo, ya lili mu okalamana beme ti, be ka likughu obagha laama lili mibvu ya mibvu o. Mu matala ma bihi sa ligye kundaa baala ka bali ba-Dzwife o. (aiōnios g166) **47** Mu kuulu, Mfumu aagwi bihi litumu ti: “Me aansuolo we mu okala otsyeme o mansie mwohono, mpaala we biri obvwughu tee ku osughu nsie.”» **48** Baala ka bali ba-Dzwife o bu bagyughu mandagha mammo, bálwulu mu esee ya báwbi osyighi ndagha a Mfumu. Ya babo ba básuolo mu obagha laama lili mibvu ya mibvu bási kana. (aiōnios g166) **49** Ndagha a Mfumu yítarjama mu etsulu e nsie kyehe. **50** Lo ba-Dzwife bákatsiini bakaha baba budziri ba baakabuono Nzaami, ya baara baba mupfunu mu bvulu lilo, basa ngirini. Bo bási obo mu kuulu bamwehë Poole ya Baranabase kimini, ya babyi bo mu nsie a bo. **51** Bo bu bakubulu lifufunu li myili mi bo, bágyene ku bvulu lili Ikonyome. **52** Lo binduono bibi mu Antyose bílwulu mu esee ya mu Mufulu a Ngili.

14 Ku Ikonyome, Poole ya Baranabase bágyene ku nzo a lisamana a ba-Dzwife. Oko, bo báluo Ndagha a Nzaami mu eteese kiili mpwumu a ba-Dzwife ya ba-Ngereke yi alagha yísi kana. **2** Lo ba-Dzwife ba bábihi osa kana, bátsiini ba bagwene osoolo Nzaami mu osa bandughu mu

kana bubi. **3** Lo, Poole ya Baranabase bálulu matala malagha oko. Bo bákabili ya kana mu mi mitala Mfumu. Mfumu ákagwa bo lileene lili ógyighili mandagha maa okinjimi ya bilyimi. Obo me bu ákasuo nde ti, mandagha ma bákalyele bo mu mi mitala bwehe bu nde máli ngarjma. **4** Mpwumu a baara ba bvulu yíkaghaba mu mawa muolo: Ba bamo ku ngulu yi a ba-Dzwife, babake ku ngulu yi a bantumu. **5** Baara baala ka bali ba-Dzwife o ya ba-Dzwife, emō ya bamfumu ba bo, bábagha bitsimi bii omwehë Poole ya Baranabase kimini ya odzwa bo mu mameë. **6** Bo bu basoolo bitsimi bibye, bábara ku mabvulu mama Lisitere ya Derebe mu etsulu e nsie kii Likawoni, ya mu mala ma máli bitaataa bibye. **7** Oko si, bo bákatsala Nsia yi Mbwe. **8** Ku Lisitere óli a baghala mumō wu ókpi myili, wu áabwi nsini. Epfwumu e nde ekye éli emburu-ngughu ya nde áli nkini ka ámaadzyara o. **9** Etsughu nga-emō, nde ákagyughu Poole mu okabili. Poole bu atuunu nde mihi, ya bu amono ti nde áli a kana mu obvwughu, **10** nde ályele mu likyi lili mpini ti: «Temene nsumu mu myili mi we!» Nde ádzurghu, ya ábwi odzyara. **11** Mampwumu ma baara bu mamono ndagha yi ógyighili Poole, mályele mu mpini mu ndií yi a Likawoni ti: «Banzaami baakighiri baara ya baayasughuru kundaa bihi.» **12** Bo bákata Baranabase mu nkwumu yi a Dzeese ya Poole mu nkwumu yi a Eremese, mu kuulu me Poole áakabili mu nkwumu a bo bansa buolo. **13** Nzo a lisamana yi a ngaa a nzaami a Dzeese yíli ku baakayasomo bvulu. Nde ágwolo balumu ba bangoomo ya álaaha bo bibara bibi bifulu. Emō ya mpwumu a baara, bo bákadzyi odzwa bo mu ogwa mukaba kundaa Poole ya Baranabase. **14** Lo bantumu Poole ya Baranabase bu bagyughu ndagha oyo, bákaghala binkuru bi bo, básomo mu ntyini ña kara li mpwumu mu okarjã **15** ya bákalyele ti: «Bandughu, be yi nsa ndagha lili mu okagyighili? Bihi si lili baara ti anga be! Nsia yi Mbwe yi lili mu okatsala bihi kundaa be, yili mu oluomo be lisihi mandagha ma magwene a mupfunu ma, mu okaghala kundaa Nzaami wu a mweë wu aagyighili yulu, nsie, mubu, ya byehene bi bili omo. **16** Me nde wuulu mu biseene bi bíluru, ágwí muswa kundaa bikaana byehene bikagyighili bu bidzyi bye. **17** Lo, nde aakagyighili ma mabwe kundaa be, mu kuulu mu yulu, nde aakanohō bamvulu ya aakagwa mando ma maakaburu be bimburu bi

bilagha, mpaala be libagha bi-odza ya mikolo mi be milwulu mu esee.» **18** Lo, si mu mbiili a bo oyo, mu mpara Poole ya Baranabase báleene okahaba mpwumu a baara mu ogwa bo mukaba. **19** Ba-Dzwife ba báfi ku Antyose ya ku Ikonyome bu bágyi, bápeene a mpwumu a baara mu bitsimi bi bo. Bo bákaha Poole mameē, bákwole ya bápaha nde ku mbala a bvulu, mu kuulu, bo bátsimi ti nde ákpi. **20** Lo binduono bu bibvuḡunu, bídzyi Poole, nde átemene ya ábvughuru munsá bvulu. Ŋa mbihi a etsughu ekye, nde ya Baranabase bágyene ku bvulu lili Derebe. **21** Bu bamana otsala Nsia yi Mbwe munsá bvulu lili Derebe, ya bu babagha binduono bilagha omo, bo bábvughuru ku Lisitere, Ikonyome ya Antyose. **22** Poole ya Baranabase bákagwa binduono mpama ya bákaluomo bo bakala a mukama mu osa kana, ya bákalyele ti: «Bihi lifaana omono mpara yi alagha mu osomo mu Emfumu e Nzaami.» **23** Mu nswe Libwunu, Poole ya Baranabase básuolo bakwuru. Bu bakuru nswele mu bala, básamana Nzaami ya bágwi bo ŋa myaā mi Mfumu munde wu bási bo kana. **24** Ŋa nsele, bo báluru mu etsulu e nsie kii Pisidi ya báto ku etsulu e nsie kii Pamfili, **25** bátsala nsia a Ndagha a Nzaami ku Perenge, ya bákumunu ku bvulu lili Atali. **26** Bu bamara oko, bo básomo bwara mu ogye ku Antyose, oko ku báluomo mu bo bwehe bu Nzaami, mu esala ki bákuhu bo ki. **27** Bu bayato ku Antyose, bo bábvughu Libwunu ya bályele mandagha mwohono ma ógyighili Nzaami mu bo, ya bu ádzubulu nde nzili a kana kundaa babo baala ka bali ba-Dzwife o. **28** Bo báluhu matala ma malagha ya binduono.

15 Ndaama a baara baba ku Yude, bákumunu ku bvulu lili Antyose, bákalu Libwunu, ya bákalyele ti: «Kala ti ka basohobo be nzo a mbaa o, ti bwunu a bu ookatumu Mikyene mi Moyidze, be ka likughu obvwughu o.» **2** Poole ya Baranabase bábihi ogyughu baara babo ba bágyi, ya mumbajana wu a mpini ábwi ŋa kara li bo. Bo bákuru etsimi ti Poole, Baranabase ya mana a babaghala babake ba bágyi, bákumu ku Yerusaleme kundaa bantumu ya bakwuru ba Libwunu, mu mi mitala ndagha a mumbajana munde. **3** Libwunu lígwi bo bilogho bi baabiri. Bu baluru mu nsie yi a Fenisi ya yi a Samari, bo bákabululyele bunu-a-bo baala ka bali ba-Dzwife o bákagyiṅi mayele. Ya bandughu mu

kana bwohono báli kunsá esee ki elagha. **4** Bo bu bato ku Yerusaleme, bandughu mukana bwohono, bantumu ya bakwuru bábwana a bo. Ya bo bágwi bo nsia a mandagha mwohono ma ókabulugyighili Nzaami mu bo. **5** Lo ndaama a baara ba báli mu emvuḡunu ki ba-Faridzyē nsomo basa kana, bátemene ya bályele ti: «Bafaana osohobo baala ka bali ba-Dzwife o nzo a mbaa ya otumu bo bakakebe Mikyene mi Moyidze». **6** Bantumu ya bakwuru bábvuḡunu mu otala ndagha oyo. **7** Buulu mumbajana áli ayi wu a mpini, Piere átemene ya ályele kundaa bo ti: «Bandughu ba me mu kana, be lisoolo ti edzighi Nzaami ásuolo me ŋa kara li be, mu kuulu me ntsala Nsia yi Mbwe kundaa baala ka bali ba-Dzwife o, mpaala bo basa kana. **8** Ya Nzaami wu gyahaba mikolo mi baara, li mpughulu a bo, bu aagwi Mufulu a Ngili kundaa bo ti bwunu a bu ágwi nde bihi, **9** ku ogwene osa lisoghobo ŋa kara li bo ya bihi-a-be. Nde aatsehebe mikolo mi bo mu kuulu bo baasi kana. **10** Mu matala ma, mu emakye be lidzyi otsihi Nzaami bu liikwighi binduono leme, liili ngu okala bataara ba bihi, ngu okala bihi bameme, ka liibagha mpini yi obiri lo o? **11** Lo bihi lili a kana ti bihi sa libvwughu mu bwehe bu Mfumu Yiisu, bumō si kundaa bo!» **12** Baara bwohono bákala pii ya bákagyughu Baranabase ya Poole ba bákabili mu bilyimi ya mandagha mama okinjimi bi ógyighili Nzaami mu esala e bo ŋa kara li babo baala ka bali ba-Dzwife o. **13** Bo bu bamana obili, Dzake ályele ti: «Bandughu ba me mu kana, ligyughu me! **14** Simeō aalyele bihi-a-be bunu obaana mu ebaana, Nzaami ási ŋa kara li bikaana biili ka bíli ba-Dzwife o mu osuolo bye bikala baara ba bandaa nde. **15** Ya mandagha ma, mali mu ogye mu mana ya mandagha ma mibighili.» Mu kuulu básono ti: **16** «Ŋa mbihi a mamo, me sa yambvughuru, me sa firintwu ebvulu e Dabvide ki eebwi, me sa firingyiili bibwa bi kye, ya sa me firimbvurulu kye mu mutele. **17** Mu obo, baara babake ba basyili basagha Mfumu, ya bumō si kundaa bikaana byehene bi aanti me mbili mu okala bibi ndaa me. Obo me bu olyele Mfumu, wu aakagyighili mandagha mwohono. **18** Ma basoolo, obaana edzighi.» (aiōn g165) **19** «Me mu obo me ntsimi ti bubwe mu onyaā omwehē mpara baala ka bali ba-Dzwife o ba baasi kana mu Nzaami. **20** Lo lisono bo mukaana ti banyaā osunumu mu odza tuo li banyama ba

baagwi mikaba kundaa banzaami baba bityeghe, banyaā okasa enkwunu, ya banyaā odza tuo lili banyama ba baakpi mbiili o. Bo ka bafaana odza si makili o. **21** Mu kuulu, obaana mu biseene bi bikulu, mu nswe bvulu oli a ba baakaluo Mikyene mi Moyidze. Bo baakatala mye mu nswe etsugghu kii sabate mu manzo ma lisamana ma ba-Dzwife.» **22** Oŋo, bantumumu ya bakwuru, ya Libwunu lwohonon, bágwihini mu osuolo baara ŋa kara li bo, ba baagweghe ku Antyose emō ya Poole ya Baranabase. Bo básuolo Yuda, wu baakata ti Baranabase ya Silase, baara baba budziri ŋa kara li bandugghu mu kana. **23** Bágwi bo mukaana wu básono ti: «Bantumumu, bakwuru ya bandugghu mu kana bagwi mboro kundaa baala ka bali ba-Dzwife o, ba bali ku Antyose, ku Siri ya ku Silisi. **24** Bihi liigyugghu ti baara bana ŋa kara li bihi, baala bihi ka liigwi bo litumu o, baayasa be mikolo maŋa-maŋa ya baagwi be nzalamweē mu mbiili a bo. **25** Me mu obo bihi bwohonon liikuru mfwunu ya liimono ti ali bubwe bihi lisuolo baara ba liigweghe bihi kundaa be, nzili mō ya bandugghu ba bihi baba mukolo Baranabase ya Poole, **26** babo ba bágwi laama li bo mu osalala nkwwumu a Mfumu a bihi Yiisu-Kriste. **27** Mu obo, bihi liigweghe be Yuda ya Silase mu kuulu bo bayalyele be mandagha ma liisono bihi mu mukaana. **28** Mufulu a Ngili ya bihi bameme si, liimono ti ali bubwe mu onyāā okwighi be maleme makimi, ŋa yulu a yini a mandagha maala ka makugghu ogweene o. **29** Mandagha mamō me ma: Ka likadza banyama ba baagwi mikaba kundaa banzaami baba bityeghe o. Ka likadza makili o, ka likadza banyama ba baakpi mbiili o, ya ka likasa enkwunu o. Kala ti be liikakebe manyuru ma be, lo be liikasa bubwe. Likala bubwe!» **30** Banyaā babo ba básuolo mu okumunu ku Antyose bagye, ya bo bágyene. Oko, bo bábvugghu libwunu ya bágwi bo mukaana. **31** Bu bataā mukaana, bo bámono esee mu nkooro a mpama yi ákagwa nde bo. **32** Yuda ya Silase, ba báli bomō mibighili, bábili ku olagha ya bágwi bo mpama ya mpini. **33** Ya bu baluhu mana matala oko, bandugghu mu kana bábvurulu bo mu edzuunu kundaa ba bágweghe bo. **34** [Lo, Silase ámono ti ali bubwe nde asyili oko.] **35** Poole ya Baranabase básyili ku Antyose. Emō ya baara balagha babake, bo bákalu ya bákatsala nsia yi mbwe yi a ndagha a Mfumu. **36** ŋa mbihi a mana bitsighu, Poole ályele kundaa Baranabase

ti: «Tswē libvughuru liyitala bandugghu mu kana mu mabvulu mwohonon, mu líitsala bihi a we nsia a Ndagha a Mfumu, mu kuulu limono bu bali mu okadzyara bo.» **37** Baranabase ákadzyi obiri ya bo Dzā wu baakata Mareke. **38** Lo Poole ámono ti ali bubwe mu ogwene ogwolo nde emō ya bo, mu kuulu nde áli akaghaba ya bo ku Pamfili ya ka ágyene nzili mo ya bo o mu oyisa esala. **39** Mumbaŋana wu a mpini ábwi ŋa kara li bo ya bo bákaghaba. Baranabase ágwolo Mareke, básomo mu bwara bu bunene ya bágyene ku Syipere. **40** Poole ásuolo Silase ya bo bágyene. Lo nsomo bagye, bandugghu mu kana báluomo ti bwehe bu Mfumu bukala ya bo. **41** Ya nde áluru mu mansie mama Siri ya Silisi, mu okabulugwa mabwunu mpini.

16 Poole áyito ku Derebe, ŋa nseele nde ágyene ku Lisitere. Oŋo óli a enduono emō kii nkwwumu Timote, mwana a mukaha wu mu-Dzwife, wu áasi kana mu Mfumu. Lo taara a nde áli mu-Ngereke. **2** Bandugghu mu kana baba mu mabvulu mama Lisitere ya Ikonyome bákasuo bumpughulu bu bubwe mu nde. **3** Poole ákadzyi obiri nde. Ya bu agwolo nde, ásohobo nde nzo a mbaa, mu nkooro a ba-Dzwife ba báli mu bitsulu bi nsie bibye, mu kuulu bo bwohonon áli basoolo ti taara a nde áli mu-Ngereke. **4** Ya mu mabvulu ma bákalu bo, Poole ya Silase bákatuoho kundaa bandugghu mu kana mandagha ma ókuru bantumumu ya bakwuru ba libwunu lili ku Yerusalem. Ya bo bákaluomo kundaa banga-a-kana mu onama mo. **5** Mabwunu mákagwama mu kana, ya nswe etsugghu, mo mákapfini mu mutala a baara. **6** Buulu Mufulu a Ngili, ákahaba bo banyaā otsala nsia a Ndagha a Nzaami mu etsulu e nsie kii Adzi, Poole ya Silase bábululuru mu bitsulu bi nsie bibi Firingi, ya bibi Ngilate. **7** Bo bu babehene ku etsulu e nsie kii Misi, bo básagha ogye ku etsulu e nsie kii Bitini, lo Mufulu a Yiisu ka ágwi bo muswa o. **8** Mu obo, bo bábululuru mu etsulu e nsie kii Misi, ya bákumunu ku mbwuu yi a mu bvulu lili Torowase. **9** Etsugghu nga-emō mu mpyibi, Poole ámono mu limono, musi Masedwane átemene ya ákabuono nde ti: «Bululuru mu etsulu e nsie kii Masedwane, ya baha bihi!» **10** ŋa mbihi a limono li Poole lilo, bihi líisagha obaagye ku Masedwane, mu kuulu bihi líili a kana ti Nzaami áakata bihi mbili mu oyitsala Nsia yi Mbwe oko. **11** Bu

lisomo mu bwara ŋa Torowase, bihi lígyene nsumu ku elyi kii Samotarase. Ya etsugghu kii énama ŋa mbihi, bihi lígyene ku bvulu lili Neyapolise. **12** Ya bu limara oŋo, bihi lígyene ku Filipe, bvulu li libvulu mupfunu mu etsulu e nsie kii Masedwane, ki éli kunsu litumu li ba-Romē. Bihi lílulu mana bitsugghu munsu bvulu lilo. **13** Mu etsugghu kii sabate, bihi lípala mu bvulu. Ya bu liluono mukogho a mwele, bihi líiyito ŋa ebini emō ki líkatsimi bihi ti ebini kii lisamana. Bu libwi-nsini, bihi lílibili ya bakaha ba bábvugghu oŋo. **14** Ŋa kara li bo óli a mukaha mumō wu a nkwwu a Lidi. Nde áli musi bvulu lili Tyatire. Nde ákatyeghe biko bibi mungala ya ákabuono Nzaami. Nde ákagyugghu bihi ya Mfumu ádzubulu mukolo a nde mu kuulu agyighili okanama mandagha ma ókalye Poole. **15** Ya ŋa mbihi a ŋa bábvoggho nde, emō ya baara ba nzo a nde, nde ábuono bihi ti: «Kala be liimono ti me aakansa kana mu Mfumu, lo liyakala mu nzo a me.» Nde ási enkwili buulu bihi likihi. **16** Etsugghu etsyini, mu matala ma líkagye bihi ku ebini kii lisamana, musala mutsyini wu mukaha áyabwana a bihi. Nde áli a mufulu wu mubi, wu áakasa ti nde akataala mandagha ma maagya ku nkulu, ya mu buntaala bu nde, bamfumu ba nde bákabagha nzi yi alagha. **17** Nde ákayanama Poole ya bihi. Nde ákabiili bingubu ti: «Baara ba bali basala ba Nzaami wu Ensoō-Yulu! Kunda be, bo bali mu okatsala nsia a nzili yi obvwugghu». **18** Nde ákasa obo bitsugghu bilagha. Etsugghu etsyini Poole ákolo nkehe, ya bu akaghala, ályele kunda mufulu munde ti: «Mu nkwwu a Yíisu-Kriste, me ntumu we, pala mu mukaha wu!» Ya ŋaana oŋo, mufulu ápala. **19** Bamfumu ba nde, bu bamono ti bo ka bakugghu ofirisalala nde mu obagha nzi o, básyimi Poole ya Silase, bákwole a bo tee ŋa ebini ki ókabvugghu baara ba bvulu lwohono, ŋa nkulu a bamfumu. **20** Bábiro bo ŋa nkulu a bansugghu-a-lamana ba báli ba-Romē ya bályele bo ndiri: «Baara ba bali ba-Dzwife. Bo bali mu okasa ligyuu munsu bvulu li bihi. **21** Ya bo bali mu okalu baara bipfu bi binyaghara, biili bihi ba-Romē ka lili a muswa mu okihi o, bwunu we mu onama.» **22** Mpwumu a baara yíkaghala bo mfulu, bansugghu-a-lamana bágyi litumu badzwulu bo binkuru ya bakaha bo nswanswa. **23** Ya bu bamana okaha bo nswanswa, bálo bo mu boloko ya bádzuru nkyele a boloko matswi mu ogyighili okebe bo. **24** Nkyele a

boloko bu agyugghu litumu lilo, nde álo bo kunsu ngwumu yi a mu kara, ya álo bo myili mu bidzu. **25** Mu kara-a-kara li mpyibi, Poole ya Silase bákasamana ya bákagyimi bikwumu mu osyighi Nzaami. Baara ba boloko babake bákagyugghu bo. **26** Ensihibi, nsie yínyini mu mpini mu eteese kii onyih bitsini bi bibagha bi boloko. Bidzugghu bi boloko byehene bísaanya ya misyi mimi bisyeē myehene mi bákuru baara ba boloko mísugghu. **27** Nkyele a boloko ábulusighili kunsu ensama, ya bu amono bidzugghu bi boloko bwaha, nde ápaha lipee mu kuulu adzwa nyuru. Nde ákatsimi ti baara ba báli mu boloko báfi obara. **28** Lo Poole ágyamana nde ti: «Ka sa nyuru a we mfini o! Bihi bwohono lili ŋa». **29** Oŋo nkyele a boloko áluomo mwinda, ya mu embwa-mbwa nde ásono mu báli bo, mu enkwugghu kyehene áyibwa ŋa nkulu a Poole ya Silase. **30** Nde ápaha bo ya áfwulu bo ti: «Bataara! Emakye me aansu kuulu me mbvwugghu?» **31** Bo bábvuhulu nde ti: «Sa kana mu Mfumu Yíisu, ya we sa bvwugghu, we ya baara ba nzo a we.» **32** Bo báluo nde ndagha a Mfumu, nde ya baara ba nzo a nde bwohono. **33** Mu matala maana mamo, nkyele a boloko ábiri Poole ya Silase ku nzo a nde, áswagha bo mambaala, ya bo básaaboggho nde ya baara ba nzo a nde bwohono. **34** Nde ásohobo bo munsu nzo a nde ya ágyi bo bi-odza. Nde ya baara ba nzo a nde bwohono, bákugghu mu esee, mu kuulu, bo bási kana mu Nzaami. **35** Bwihi bu buki, bansungghu-a-lamana bágyeghe babaakasala ya bo bayilyele kunda nkyele a boloko ti: «Nya baara babo bagye!» **36** Nkyele a boloko átwoho nsia oyo kunda Poole ti: «Bansungghu-a-lamana baagweghe mukyene ti me nya be. Mu obo, lipala ya ligye mu edzuunu!» **37** Lo Poole ábvuhulu bo ti: «Bo baatumu bakaha bihi nswanswa ŋa mihi mi baara bwohono, gwene a otswama osa bihi muyala, bihi ba lili ba-Romē! Ŋa nseele bo baalo bihi mu boloko. Ya mu matala ma bo badzyi opaha bihi mu ensweghe? Pele, ka okugghu okala obo o! Nya bomu bayapaha bihi!» **38** Babaakasala ya bansugghu-a-lamana báytwoho mvuru oyo kunda bansungghu-a-lamana. Bo bu bagyugghu ti Poole ya Silase báli ba-Romē, bo bábagha nzalamweē, **39** ya bályuomo bo kolokolo. Bo bápaha bo mu boloko ya báluomo bo bamara mu bvulu. **40** Poole ya Silase bu bapala mu boloko, bágyene kunda Lidi. Bo

bámoŋono ya bandughu mu kana, bágwi bo mpama, ya bo bágyene.

17 Bu baluru mu mabvulu mama Amfipoli ya Apoloni, Poole ya Silase báyanto ŋa Tesalonike. Oŋo, óli a nzo a lisamana a ba-Dzwife. **2** Ti bwunu a bu óli epfu e nde, Poole ásono mu nzo a lisamana a ba-Dzwife. Nde ákabili ya bo mu mi mitala Mandagha ma Nzaami, mu bitsughu bi sabate bitere. **3** Nde ákabaala ya ákasuo bo ti Kriste áfaana omono mpara ya osighili ŋa kara li ba bákpi, ya ákalyele bu: «Kriste, me Yiisu wu ndi mu okagwa me be nsia.» **4** Bo bápeene a ndaama a ba-Dzwife ba báyabvununu ya bo. Ba-Ngereke balagha ba baakasyighi Nzaami ya bakaha balagha ba banene boho si, bási bumō. **5** Lo ba-Dzwife bana bámono mukolo mubi ya báti baara ba babi ba baakabwa nsini mu manzili mbili. Bu babvughu bo, bátumu bo mu osa ngirini munsu bvulu. Bo báyibvununu ŋa nzo a Yasone, ákasagha Poole ya Silase mu kuulu babiri bo ŋa nkulu a baara bwohono. **6** Bu bakwono omono bo, bo bábiri Yasone ya ndaama a bandughu mu kana babake ŋa nkulu a bamfumu ba bvulu, ya bákabuluta mukwu ti: «Baara ba báanyih nsie nsyini, bamaato kunu mu matala ma. **7** Yasone aagyagha bo ku nzo a nde. Bo ka bali mu okanama litumu li Mukogho Sedzare o, ya bali mu okabululele si ti oli a mukogho mukimi, nkumu a nde Yiisu.» **8** Ndagha oyo yímwehē bakwuru ba bvulu ya mpwumu a baara mpara. **9** Bo bákehe Yasone ya babake ekolo ki ofuru ŋa nseele bányaā bo bagye. **10** Mpyibi bu yibwi, bandughu mu kana bágweghe Poole ya Silase ku Bere. Bo bu bato oko, básomo mu nzo a lisamana a ba-Dzwife. **11** Ba-Dzwife baba ku Bere báli a mikolo mi mibwe ku obvulu baba ku Tesalonike. Bo bágyagha Ndagha a Nzaami mu esee ki elagha mu okagyighili okeene yo nswe etsughu, mu kuulu basoolo kala ti mandagha ma ókaluo bo Poole máli mama ngarjma. **12** Baara balagha mu bo bási kana, bumō si ya bakaha baba ba-Ngereke ba banene mu bvulu ya babaghala balagha. **13** Lo ba-Dzwife baba ku Tesalonike bu basoolo ti Poole ákabulutsala si nsia a Ndagha a Nzaami ku Bere, bo bágyene oko si mu kuulu basa ngirini ya mu otihi mampwumu ma baara. **14** Mu maswa, bandughu mu kana bási ti Poole abara ku mukogho a mubu. Lo Silase ya Timote básyili ku Bere. **15** Ba bákagye ya Poole, bábiri

nde tee ku bvulu lili Atene. Mu matala ma bákabvughuru bo, Poole átumu bo bályele kundaa Silase ya Timote bagye mu maswa ku áli nde. **16** Mu matala ma okakebe Poole Silase ya timote ku Atene, nde ákanyoō ku olagha bu ákamono ti bvulu lilo áli lilwulu mu banzaami baba bityeghe ba ókasyighi baara. **17** Mu obo, mu nzo a lisamana a ba-Dzwife, nde ákamono ya ba-Dzwife ya babo baala ka báli ba-Dzwife o ba baakasamana Nzaami. Ya nswe etsughu, nde ákamono ya baara bwohono ba ákabwana a nde ŋa ebini ki ookabvununu baara bwohono. **18** Óli si ya banga-a-mayele ba baakata ba-Epikuryē ya ba-Sitoyisyē ba bákamono ya nde. Bana bákalyele ti: «Nsa ndagha Nga-a-nkele wu adzyi olyele?» Babake bákalyele ti: «Ti anga nde li mu okabili mu banzaami baba bunzyi.» Bo bákalyele obo mu kuulu Poole ákaluo Nsia yi Mbwe yitala Yiisu ya osighili o ba bákpi mu lipfu. **19** Mu obo, bo bágwolo Poole ya bábiri nde ŋa nkulu a mfumu a bamfumu ba bvulu yi baakata Ayeropadze. Bo báfumu nde ti: «We kughu olyele bihi nsa maluo ma manyaghara we li mu okabulugwa baara?» **20** Mu kuulu we li mu okalo mu matswi ma bihi mandagha ma manyaghara ya bihi lidzyi ogyahaba mambaala ma mo.» **21** Mu engarjma, baara ba bvulu lili Atene ya banzyi ba báli munsu bvulu lilo, bákaluha matala ma bo yini a mu okabili bwunu we mu okagyughu bitsimi bi binyaghara. **22** Mu obo, Poole bu atemene ŋa nkulu a baara ba bábvununu mu mfumu a Ayeropadze, átsughu ndagha ti: «Baara ba bvulu lili Atene, me ndi mu omono ti mu mandagha mwohono, be lili baara banga a enzaami nkara kii elagha. **23** Mu kuulu, mu matala ma ákabulundzye me munsu bvulu li be, me aamono bityeghe bi liikasamana be, ya me aamono ebini emō ki baakagwa bikaba. ŋa yulu a kye básono ti: “Kundaa nzaami wu bagwene ogyahaba”. Me aayangwa be nsia a Nzaami munde wu liikasamana be, gwene a osoolo nde. **24** Me Nzaami munde áagyighili nsie yohono ya bilogho byehene bi bili mu yo, nde li Mfumu a yulu ya nsie. Nde ka aakakala mu bibini bibi lisamana bi ógyili myaā mi baara o. **25** ŋa yulu oŋo, nde ka li a nzala a kuulu ti myaā mi baara misalala nde o ti anga nde li a nzala a elogho. Mu kuulu nde aakagwa bumweē, ewumu, ya bilogho byehene kundaa baara bwohono. **26** Mu mbwuru mutsyini, nde ágyighili bikaana bi baara byehene mu kuulu

bye bikala ŋa yulu a nsie yohono. Nde ákuru mando ya ási milili mu mansie ma baakala bo. 27 Nzaami ási obo mu kuulu baara bakasagha nde, si kala ti bo baakamono mpara mu okasagha nde, bo sa bamono nde. Mu enganyma, nde ka li la ya nswe mbwuru mu bihi o. 28 Mu kuulu me mu nde bihi lili mweē, liikabuludzyara, ya bihi lili, ti bu ólyele banga-a-liteere li obili ba be babake ti: “Bihi si lili baana ba nde.” 29 Mu obo, buulu bihi lili baana ba Nzaami, bihi ka lifaana otsimi o ti Nzaami li mu efafaana ki etyeghe ki bátsulu mu oore, mu ngele, bwunu we ki bágwala mu limeē, ki bágwala ya bunkere mu mayele ya bitsimi bi mbwuru. 30 Ankoho Nzaami ka aafirikatata matala maala baara báli kunsá nzi-nzimini o. Lo mu matala ma, nde li mu okalyele kundaa baara bwohono mu mansie mwohono ti bagyiŋi mayele. 31 Mu kuulu nde ákuru etsughu ki akala aalamana nde nsie nsyini mu bunsumu mu mbwuru wu ásuolo nde. Nde áasuo kundaa baara bwohono elyimi, ki bakughu osa kana, bu áasiili mbwuru munde ŋa kara li ba bákpi.» 32 Bo bu bagyughu ndagha yi osighili o baara ŋa kara li ba bákpi, baara bana bábwi osebe nde, babake bákalyele ti: «Mu ndagha oyo, bihi sa ligyughu we mu matala makimi!» 33 Mu obo, Poole ábulusihi bo. 34 Lo ndaama a baara mu bo yínama nde ya yísi kana. Mu bo óli Denise, mumō mu mfwunu a Ayeropadze, ya mukaha mutsyini wu a nkwwmu Damarise ya baara bakimi.

18 Ŋa mbihi oyo, Poole ámara ku Atene ya ágyene ku Korēte. 2 Oko, nde ábwana mu-Dzwife wu a nkwwmu Akila, wu áfi ku etsulu e nsie kii Pō. Ka oli edzighi o, nde áfi ku Itali ya mukala a nde Pirisika, mu kuulu Mukogho Kolode ágwi litumu ti ba-Dzwife bwohono bafaana opala mu bvulu lili Rome. Poole ágyene kundaa Akila ya Pirisile. 3 Ya buulu nde esala emō ákasa ya bo, bo báli bantwu bibvulu, Poole ákala emō ya bo, ya bákasala ya bo. 4 Mu nswe etsughu kii sabate, Poole ákabili mu nzo a lisamana a ba-Dzwife ya ákasagha opeene a ba-Dzwife ya ba-Ngerere basa kana. 5 Mu matala ma ófi Silase ya Timote ku Masedwane ya báyanto ku Korēte, Poole ábaana okaluhu matala ma nde mwohono mu okaluo Ndagha a Nzaami. Nde ákalyele kundaa ba-Dzwife ti nganyma Yiisu li Kriste. 6 Lo ba-Dzwife bátemene a Poole nsumu ya bákátughu nde. Mu obo, nde

ákubulu lifufunu li binkuru bi nde ya ályele bo ti: «Nyaā makili ma be mabwa ŋa yulu a mitswi mi beme! Me ka ndi a ebili mu mo o. Obaana lolo, me kundaa baala ka bali ba-Dzwife o aangye.» 7 Poole bu amara ŋa ebini ekye, ágyene kundaa baghala mumō wu áakasamana Nzaami. Nkwumu a nde Tituse Yusutuse, ya nzo a nde yíli ŋa bele a nzo a lisamana a ba-Dzwife. 8 Kirisipuse, mfumu a nzo a lisamana a ba-Dzwife, ási kana mu Mfumu, nde ya baara ba nzo a nde bwohono. Ya baara baba ku Korēte, ba bákagyughu Poole, bási kana ya bábogho bo. 9 Etsughu nga-emō mu mpyibi, mfumu áyamogono kundaa Poole mu limono ya ályele nde ti: «Ka kala a nzalamweē o, sa mukama mu okabili, ka kuru muŋma o! 10 Buulu me ndi ya we, ka oli a mbwuru wu kughu osyimi we mu omwehē we kimini o. Munsa bvulu li, me ndi a baara balagha.» 11 Poole ási mvulu mumō ya bangoono basemene ku Korēte mu okaluo Ndagha a Nzaami. 12 Mu matala ma óli Ngalyō mfumu a Rome, mu etsulu e nsie kii Akayi, ba-Dzwife bágwihini mu okala a etaara mu Poole, ya bábiri nde ŋa mbala a muyala. 13 Bo bályele ti: «Mbwuru wu li mu okatumu baara bakasamana Nzaami mu okakaala mikyene embihi.» 14 Mu matala ma ókaabili Poole, Ngalyō ágwi mvuru yi kundaa ba-Dzwife: «Kala ti ali ndagha yi baadzwi mbwuru bwunu we bigyighili bi bibi, me kaankihi oluhu matala ma me mu ogyughu be ba-Dzwife. 15 Lo buulu mumbanjana a be li mu nkooro a mbili, mankwumu ya mikyene mi be, ndagha oyo yitala be beme! Me ka nkughu okala nsughu-a-lamana a be o.» 16 Ya nde ápaha bo ku mbala a nzo a muyala. 17 Mu obo, bo bwohono básyimi Sometene, mfumu a nzo a lisamana a ba-Dzwife, bádzwí nde nkubu ŋa mbala a nzo a muyala. Lo Ngalyō ka átsughu si ndagha o. 18 Poole áfiriluhu bitsughu bilagha ŋa Korēte. Ŋa mbihi, nde ábulusihi bandughu mu kana ya ásomo mu bwara mu ogye ku Siiri, nzili mō ya Pirisile ya Akila. Lo nsomo, bási nde nkulu ŋa Senkere mu kuulu nde ágwi misiini kundaa Nzaami. 19 Bu bato ŋa Efedze, nde ásihi Pirisile ya Akila oyo. Nde ágyene ku nzo a lisamana a ba-Dzwife ya ákamogho ya ba-Dzwife. 20 Bo báluomo nde mu oluhu bitsughu bilagha oko, lo nde ábihi, 21 nde ábulusihi bo ya ályele ti: «Kala Nzaami dzyi, me sa firiyambvughuru kundaa be mu sa likimi.» Ŋa nsele nde ásomo mu bwara ya ásihi bvulu lili Efedze. 22 Bu ato

ḡa bvulu lili Sedzare, Poole átswama okumu ku Yerusalemu mu ogwa libwunu li Nzaami mboro. Ḥa mbihi, nde ákumunu ku Antyose. **23** Nde áluhu mana bitsughu, ya ásihi bvulu lilo. Nde ábululuru mu mabvulu mama Ngalate ya Firingi, mu okabulugwa binduono byehene mpama mu kana. **24** Mu-Dzwife mumō, wu a nkwumu Apolose, wu áafi ku bvulu lili Aledzandiri, áyato ḡa Efedze. Nde áli a liteere li obili ya áli asoolo Bisono bi Nzaami bubwe. **25** Nde ágyighi nsia a nzili a Mfumu, ya nde bu áli a mukolo mbaa, ákaluo ya ákagyihí mu bunsumu Nsia yi mbwe yitala Yiisu. Lo nde ákagyahaba yini a liboghoru li Dzā. **26** Mu obo, nde ákaluo ya bukyini bwohonu munsu nzo a lisamana a ba-Dzwife. Lo bu bamana ogyughu nde, Pirisile ya Akila bágwolo nde mu okala emō ya bo, mu ofirigyighili osuo nde nzili a Nzaami. **27** Buulu Apolose áli a etsimi kii ogye ku Akayi, bandughu mu kana bákihi etsimi ekye ya básono mukaana kundaa binduono mu kuulu babwana a nde bubwe. Nde bu áyato, mu bwehe bu Nzaami, nde áli a mupfunu kundaa babo ba bási kana. **28** Mu engarḡma, mu mbiili a nde, nde ákabwihí mu ebaghala kyehene bitsimi bi ba-Dzwife ḡa mihi mi baara bwohonu, bu akasuo mu libaha li Bisono bi Nzaami ti Yiisu ḡu Kriste.

19 Mu matala ma óli Apolose ku Korēte, Poole wu ábululuru mu etsulu e nsie kii minguo mimi Adzi áto ku Efedze. Oko, nde áyibagha ndaama a binduono. **2** Ya nde áfwulu bo ti: «Mu matala ma lísi be kana mu Mfumu, be líigyagha Mufulu a Ngili?» Bo bábvuhulu nde ti: «Bihi nkini lígyughu ti oli a Mufulu a Ngili o!» **3** Mu obo, Poole áfwulu bo ti: «Bu nsu liboghoru be líbagha?» Bo bábvuhulu ti: «Liboghoru lili Dzā.» **4** Poole áfirilye bo ti: «Dzā ákaboghoru baara ba bákagyihí maye ya nde ákaluomo kundaa bo mu osa kana mu munde wu akala aagya ḡa mbihi a nde. Mbwuru munde, me Yiisu.» **5** Bu bamana ogyughu nde, báboghoru bo mu nkwumu a Mfumu Yiisu. **6** Poole ánaā bo mu myaā ḡa yulu a mitswi ya Mufulu a Ngili ábwi mu bo. Bo bábwi obili mu mandī mama bunzyi ya okabighili. **7** Mutala a bo bwohonu áli ku bele a baara kwumu ya buolo. **8** Nswe matala, Poole ákagye ku nzo a lisamana a ba-Dzwife, ya mu bangoono batere, nde ákabili ya kana lwohonu, ya ákaluo mu mi mitala Empu e Nzaami. Nde ákasa mukama mu opeene a

baara ba bákagyughu nde mu kuulu bo basobo bitsimi. **9** Lo baara babake ḡa kara li bo, bákuru mikolo, bábihi osa kana ya bákatswagha maluo ma matala nzili a Mfumu ḡa nkulu a libwunu lwohonu. Mu obo, Poole ábulusihi bo. Nde ágwolo binduono ya ágyene a bye, ya nswe etsughu, nde ákaluo bye munsu nzo a Tiranose yi a maluo. **10** Nde ási mukama mu okaluo bo tee mu bamvulu buolo. Me obo baara bwohonu baba mu etsulu e nsie kii Adzi, ba-Dzwife ya ba-Ngereke bágyughu Ndagha a Mfumu. **11** Nzaami ákasa bimaā bii okijimi mu Poole. **12** Mu obo, bákayinahaba biko bwunu we mipa mi biko mi miberene a nyuru a nde kundaa babyele. Babyele bákadzughu, ya mifulu mi mibi mikapala mu bo. **13** Ndaama a ba-Dzwife ba baakabulugye nto ya nto mu okabulubyi mifulu mi mibi, bákatanḡana si nkumu a Mfumu Yiisu ya bákalyele kundaa mifulu mi mibi ti: «Mu nkumu a Yiisu wu oli mu okabululuo Poole, me ntumu be, lipala!» **14** Obo me bu ókasa baana nsama ba mukwuru a bangaa ba nzaami a ba-Dzwife wu a nkumu Seva. **15** Lo etsughu nga-emō, mufulu wu mubi ábvuhulu kundaa bo ti: «Yiisu, me ngyahaba nde, ya me nsoolo nande Poole ali. Lo be, be bana lili?» **16** Ya mbwuru wu áali a mufulu wu mubi ábwi ḡa yulu a bo, ábvulu bo mu mpini ya ámwehē bo bwohonu mpara mu nzuḡu yi alagha. Bo bábulupala mu nzo oyo mu ntyini, mpene ya mambaala mu manyuru. **17** Baara bwohonu mu bvulu lili Efedze, ba-Dzwife ya ba-Ngereke bágyughu ndagha oyo. Bo bwohonu bámono nzalamweē ya bákasyighi bunene bu nkumu a Mfumu Yiisu. **18** Ḥa kara li baara ba bási kana, balagha báakakihi bigyighili bi bo bi bibi ḡa mihi mi baara bwohonu. **19** Baara balagha báyabiri mikaana mi bo mimi mpaana, ya bátsughu mye mbaa ḡa mihi mi baara bwohonu. Bu batala ntala a mikaana mimye, bábagha mafwunu kwumu ma mipara mimi bisyeē. **20** Me mu obo, mu lileene li Mfumu, Ndagha a Nzaami yíkatsanḡama ya yíkaku mu manto mwohonu. **21** Ḥa mbihi a mandagha mamu, mu Mufulu, Poole ábagha bitsimi bii ogye ku Yerusalemu, mu obululuru mu bitsulu bi mansie bibi Masedwane ya Akayi. Nde ákalyele ti: «Ḥa aamara me oko, me mfaana ogye si ku Rome.» **22** Mu obo, nde ágweghe baara buolo mu mimbaha mi nde ku Masedwane, Timote ya Erasite. Lo nde-ndeme áfiriluhu mana bitsughu mu etsulu

e nsie kii Adzi. **23** Me mu matala mamo baara bási ngirini yi nene mu nkooro a nzili a Mfumu. **24** Demeteryuse, muntsulu bisyee, ákagyighili binzo-nzo bibi lisamana mu ngele mu efaana e nzo a nzaami a Aretemise, nzaami wu mukaha. Nde ya ba bákasa esala emō ya nde bákabagha ndaana yi alagha. **25** Nde ábvughu bo ya baara ba baakasala bisala bikimi bibi myaā bi bifaana ya kii bo, ya ályele kundaa bo ndiri: «Bandughu ba me, be lisoolo ti me mu esala ki bihi-a-be liikabagha busini. **26** Lo be lili mu omono ya lili mu ogvughu ti Poole li mu okalyele ti banzaami ba lili mu okagyighili mu myaā mi bihi-a-be ka bali banzaami baba ngan̄ma o. Nde aaleene opeene a mampwumu ma baara mu osobo bo bitsimi. Ka oli yini a mu Efedze bali mu okalyele obo o, lo mu etsulu e nsie kyehene kii Adzi. **27** Ka oli yini a esala e bihi-a-be bali mu okatswagha o, lo bali mu okatsaala si nzo a nzaami a Aretemise, nzaami wu munene wu mukaha. Ya edzi-dzighi nde sa apfihili nsia a nde yi nene, nde wu li nzaami wu baakasamana mu etsulu e nsie kii Adzi ya mu nsie nsyini.» **28** Bo bu bagyughu obo, bákolo nkehe ya bábwi ofulu bingubu ti: «Aretemise wu a Efedze li nzaami wu mukaha wu munene!» **29** Ngirini yíbwí mu bvulu lwohono. Bo bwohono mu mpwumu bágyene ku nzo a bimpa, bábulusyimi ya bábiri Ngayuse ya Arisitarake, basi Masedwane ba bákabulugye ya Poole. **30** Poole ákadzyi oyimojono ŋa nkulu a mpwumu a baara, lo binduono bíkahaba nde. **31** Bandughu ba nde babake ba báli bamfumu mu etsulu e nsie kii Adzi bágweghe nde si baara mu obuono nde mu kuulu anyaa ogye ku nzo a bimpa. **32** Bana bákakehe bingubu mu ndagha yi, babake bákakehe bingubu mu ndagha nkimi. Mpaatsala yíbwí ŋa nsa emvuŋunu. Ya baara balagha ŋa kara li bo ka bákasoolo o mu emakye bo bábvuŋunu. **33** Munsa mpwumu, ndaama a baara yígwí nsia kundaa Alekandere wu ótwulu ba-Dzwífe ŋa nkulu. Nde áseene ekee mu obili mu kuulu akala nyuru a nde ŋa nkulu a mpwumu a baara. **34** Lo bu babaghala ti nde li mu-Dzwífe, baara bwohono bákakehe bingubu mu likyi limō, mu matala muolo ti: «Aretemise wu a Efedze li nzaami wu mukaha wu munene!» **35** Munsono mikaana wu a bvulu áleene ogwuhubu mpwumu a baara ya ályele ti: «Baara ba Efedze, nande dzimini ti bvulu li Efedze lili nkyele a nzo a nzaami a Aretemise wu munene ya wu a etyeghe e nde ki éfi ku

yulu? **36** Buulu ka oli a mbwuru wu kughu osa mikeme mu ndagha oyo o, be lifaana odzuunu ya ka lisa buwulu o. **37** Be liiyabiri babaghala ba ŋa. Lo bo ka baaturu bilogho bi nzo a nzaami o ya bo ka baatswagha nzaami a bihi wu mukaha o. **38** Kala ti Demeteryuse ya basala ba nde bali a ndagha ya mbwuru, bitsughu bibi miyala bili, bansunghu-a-lamana si bali. Lo nyaā bo bayifwunu! **39** Ya kala ti be lili a mandagha makimi ma liifwunu, emvuŋunu ki eekanama mikyene sa egyighili mo. **40** Mu engan̄ma, bakughu ofwunu bihi-a-be ti bihi liitemene nsumu ya emfumu e bvulu mu mi miiluru lolo. Mu kuulu ka oli a bwuu li likughu ogwa kundaa bamfumu ba bvulu mu emvuŋunu ki o.» Nde bu amana obili obo, ábvurulu baara.

20 Ngirini oyo bu yifi, Poole áti binduono bi nde mbili ya ágwi bo bukyini. Bu agwi bo mboro yi munkaghaba, nde ágyene ku Masedwane. **2** Nde abululuru mu etsulu e nsie ekye ya ákabulugwa ba bási kana bukyini bulagha. Ŋa nseele, nde áyito ku nsie a ba-Ngereke. **3** Nde áluhu bangoono batere oko. Mu matala ma ákasomo nde bwara mu ogye ku Siiri, nde ágyughu ti ba-Dzwífe bákuru ewaa mu odzwa nde. Mu obo, nde ágwolo mukakana wu obvughuru mu nzili yi a Masedwane. **4** Sopatere mwana a Piruse musi Bere, Arisitarake ya Sekunduse basi Tesalonike, Ngayuse musi Derebe, Timote, Tisike ya Torofime baara baba etsulu e nsie kii Adzi, bágyene ya nde. **5** Bo bátswama ku nkulu ya báyikebe bihi ŋa bvulu lili Torowase. **6** Ya ŋa mbihi a kyiri kii mampa ma magwene a pfunu, bihi líisomo bwara ŋa Filipe. Ŋa mbihi a bitsughu bitaana, bihi líiyibagha bo ŋa bvulu lili Torowase ya lílulu bitsughu nsaama oŋo. **7** Mu etsughu kii bisemene mu nkonkolo, bihi líibvuŋunu mu okaba limpa. Ya Poole ákamoō ya bihi. Mu kuulu nde mbala ákagye, nde ádzuru emoō tee kara-a-kara a mpyibi. **8** Bihi áli líibvuŋunu mu ngwumu yi a ku yulu. Omo óli a miindi milagha. **9** Mu matala ma ókabiri Poole emoō ela-ela, mumpala mumō wu a nkwumu Elike áli abwi-nsini ŋa etse e nzo ya ákpi mukaba a ensama. Kunsá ensama, nde alighibi ku yulu a muya a nzo wu mitere ya ábwi ku nsie. Bu basagha otehebe nde, bámono ti nde ákpi. **10** Poole bu asughuru, ápfuŋumu, ágwolo nde ya ályele ti: «Ka likala maŋa-maŋa o, nde mweē ali!» **11** Bu abvughuru ku yulu a

nzo, Poole átsyiri limpa áli. Nde áfiribiri emoó ela-ela tee ku oki bwihí, ya ábwí nzili ágyene. 12 Bábirí mumpala munde wu a mweé, ya bo bwohono bábagha bukyini bulagha. 13 Bihi líitswama nkulu ya líiyisomo bwara bu bunene mu ogye ku Asose. Oko bihi líkaabulugwolo Poole, wu áagyene oko mu myili ti bu oli waa li nde. 14 Mu matala ma áyabagha nde bihi ña mbwuu yi a Asose, nde ásomo mu bwara li líli bihi ya líigyene bihi bwohono ku bvulu lili Mitilene. 15 Bu limara oño, bihi líigwolo nzili yi a mubu. Ya mu etsughu ki nsomo, bihi líiyito ña elyi kii Kiyó. Mbala bihi líipala ku elyi kii Samose. Ya muyiri-mbala bihi líiyito ña mbwuu yi a bvulu lili Mile. 16 Poole ágwa mu oluru mikiñi bvulu lili Efedze, mu kuulu bihi linyaá ofiriluhu matala mu etsulu e nsie kii Adzi. Nde ákabiniñi oyito ku Yerusaleme mu etsughu kii Pantekote. 17 Poole bu ato ku Mile, ágweghe bambiniñi ku Efedze mu oyita bakwuru ba libwunu li Nzaami mbili. 18 Bo bu bayato kundaa Poole, nde ályele bo ti: «Be ligyhaba, bu áakankala me ya be matala mwohono, obaana mu etsughu kii nsomo ki áyanto me ku Adzi. 19 Me aansalala Mfumu kunsá okughulu kwohono, mu mansáa ya mu makimini ma óokasa me ba-Dzwife mamfwunu. 20 Be lisoolo ti me ka ákansweghe be ndagha si mó yi kughu okala mupfunu kundaa be o. Lo me áakanduo ya áakangyihi be mye ña mihi mi baara bwohono ya mu manzo. 21 Me áakanduomo kundaa ba-Dzwife ya baala ka bali ba-Dzwife o bagyiñi mayele, bagya kundaa Nzaami ya basa kana mu Mfumu a bihi Yíisu.» 22 «Mu matala ma, me ndi mu okagye ku Yerusaleme bwunu a bu oli mu okatumu me ya epini Mufulu a Ngili. Me ka nsoolo o, nsa ndagha me aambwana a yo oko. 23 Lo mu engañma, Mufulu a Ngili li mu okalyele kundaa me ti, mu nswe bvulu, mindala ya kimini bili mu okakebe me. 24 Lo mu me, laama li me ka lili a mupfunu o. Ndagha yi li mupfunu kundaa me, oto ku masini ma esala ya osala esala ki ógwi me Mfumu Yíisu, mu okala mpughulu a Nsia yi Mbwe yi a bwehe bu Nzaami.» 25 «Me áakankala ña kara li be mu okaluo be mu mi mitala Emfumu e Nzaami. Lo obaana lolo, me nsoolo ti be ka lifirimono edzili e me o. 26 Mu obo, etsughu kii lolo me ndyele kundaa be ti: Kala ti be lidzimini, me ka ankala a ebili mu be bwohono o. 27 Mu engañma, me aandyele be bitsimi bi Nzaami

byehene, me ka aansweghe be ndagha si mó o. 28 Likahala mihi mu beme ya mu mukaá a bindoomo wohono wu oogwi be Mufulu a Ngili mu okebe. Ligyighili okebe libwunu li Nzaami, li aabagha nde mu makili ma mwana a nde.» 29 «Me nsoolo ti ña mbihi a ña aangye me, baara ba bali ti bango sa bapala. Ya bo ka babvwuhu mukaá a bindoomo o. 30 Ña kara li be, sa okala a baara ba baalyele mandagha mama mpya, mu kuulu binduono bigwunumu ya binama bo. 31 Mu obo, likala yeelee, ya liikalibili mweé ti mu bamvulu batere, mpyibi ya mwií, ngu okala ti kunsá mansáa, me ka aandzimini ogyehe nswe mbwuru ña kara li be o.» 32 «Lo mu matala ma, me ngwaghala be ña myaá mi Nzaami ya kunsá ndagha a nde yi a bwehe. Nde wu li a lileene mu osa ti be likulu mu kana ya mu ogwa pfa kundaa baba ngili bwohono. 33 Me ka áansughu mukolo mu nzi, mu oore, bwunu we mu binkuru bi mbwuru o. 34 Myaá mi lilomono be mi, be beme lisoolo ti me aankasala mu obagha bibye bi lilili a bihi nzala bye, me ya ba baakabulugye ya me. 35 Mu mandagha mwohono, me áakansuo be ti, me mu okasala obo be lifaana obaha babo ba bagwene a mpini, ya mu okalibili mweé mandagha ma ólyele Mfumu Yíisu ndeme ti: “Esee kii wu aakagwa ebvulu kii munde wu aakagyagha.”» 36 Bu amana olyele mandagha mamó, nde ya bo bwohono bákuñu mabuo ña nsie ya nde ábuono Nzaami. 37 Baara bwohono bábuulu elili, ya bákabwumu Poole mu ogwa nde mboro yi a masini. 38 Bo bányoó ku olagha mu nkooro a bu ályele nde kundaa bo ti, bo akala ka bafirimono nde o. Ya bo báytwulu nde tee ña bwara.

21 Bu likaghaba ya bo, bihi líisomo mu bwara ya líigyene nsumu ku elyi kii Kose. Mu etsughu ki énama, bihi líigyene ku elyi kii Rode, ya bu limara oko, líigyene ku bvulu lili Patara. 2 Oko, bihi líimono bwara bu búkagye ku nkolo yi a nsie yi a Fenisi, bihi líisomo omo ya líigyene. 3 Bu lito ña bele a elyi kii Syipere, bihi líisihi kye ku engbambogho, ya líinama nzili yi a madza ku nto yi a nsie yi a Siri. Bihi líipala mu bwara ña mbwuu yi a Tire, mu kuulu me oño bákasurulu bilogho bi bíli mu bwara. 4 Oño, bihi líimono binduono ya líiluhu bitsughu nsaama emó ya bo. Mu litumu li Mufulu, bo bályele kundaa Poole anyaa okumu ku Yerusaleme. 5 Ña mbihi a bitsughu nsaama bibye, bihi líitemene mu

ogye. Ya bo bwohono, bakaha ya baana ba bo, báiyitwulu bihi tee ku nto a bvulu. Bu lito ŋa mukogho a mubu, bihi bwohono lífikunu mabuo ŋa nsie, ya líisamana Nzaami. **6** Ŋa masini, bu ligwihini a mamboro mama okaghaba, bihi líisomo munsá bwara ya bo bábvughuru ku manzo ma bo. **7** Bihi líimana dzwe mu mubu, bu libaana ku Tire, líiyisughu ŋa Petolemayise. Oŋo bihi líigwi bandughu mu libwunu mamboro, ya lílulu etsyughu etsyini ya bo oŋo. **8** Mu etsyughu ki énama, bihi líigyene ya líiyito ku Sedzare. Oko bihi líigyene ku nzo a Filipe, Muluo a Nsia yi Mbwe. Nde áli mumō mu babaghala nsaama ba básuolo ku Yerusaleme mu obaha bantumú. Ya bihi lílulu mana a bitsughu kundaa nde. **9** Nde áli a batughu bana baba minkyini ya báli mibighili. **10** Bihi áli limaaluhu bitsughu bilagha oŋo, mu matala ma óyato mubighili mumō wu áafi ku Yude, nkwwmu a nde Angabuse. **11** Nde bu agyi kundaa bihi, ágwolo muswele a Poole, ákuru myili ya myaá mi ndeme ya ályele ndiri: «Mufulu a Ngili li mu okalyele bu: Ba-Dzwife baba ku Yerusaleme me bu akala baakuru mbwuru nga-a-muswele wu misyi, ya akala baagwa nde ŋa myaá mi baala ka bali ba-Dzwife o.» **12** Bihi ya baara baba bvulu lili Sedzare bu ligyughu mandagha mamó, líibuono Poole anyaa okumu ku Yerusaleme. **13** Lo nde ábvuhulu ti: «Mu emakye be lili mu okalili ya omwehē mukolo me mpara? Me aankughu mu ogwa nyuru a me, ka oli yini a mu kuulu bakuru me misyi o, lo ya mu okpa si ku Yerusaleme mu nkooro a nkwwmu a Mfumu Yíisu.» **14** Buulu bihi ka líkakughu opeene a nde o, bihi líinyaá ya líilyele ti: «Nyaá okala bu oli dzyi li Mfumu!» **15** Ŋa mbihi a bitsughu bibye, bihi líikuru matsulu ya líikumu ku Yerusaleme. **16** Binduono bibike bibi ku Sedzare bi bíkagye nzili mó ya bihi, bíbiri bihi ku nzo a Menasō, wuulu obaana edzighi áli enduono. Nde áli musi Syipere. **17** Mu matala ma lito bihi ku Yerusaleme, bandughu mu libwunu bábwana bihi mu esee. **18** Mu etsyughu ki énama, Poole ábiri bihi kundaa Dzake, ku ókabvugunu bakwuru ba libwunu bwohono. **19** Poole ágwi bo mboro, ya ábwi olyele kundaa bo myehene mi ógyighili Nzaami ŋa kara li baala ka bali ba-Dzwife o, mu musala a nde. **20** Bo bu bamana ogyughu mandagha mamó, bábwí osyighi Nzaami. Ya bo bályele kundaa Poole ti: «Ndughu a bihi mu kana, mono mafwunu ya mafwunu ma ba-Dzwife ma maasi

kana, ya bo bwohono bali mu okanama mikyene ya dzyi li lilagha. **21** Ankoho bo baagyughu ti we li mu okaluo ba-Dzwife bwohono baba mansie mama banzyi ti basihi Mikyene mi Moyidze, banyaá ofirikasohobo baana ba bo nzo a mbaa ya banyaá ofirikanama ekulu ki ba-Dzwife. **22** Lo emakye liisa? Bo sa bagyughu ti we aagyi. **23** Mu obo, we faana ogyighili mandagha ma líilyele bihi we. Ŋa kara li bihi oli a babaghala bana ba bágwi Nzaami misiini mu bomo. **24** Gye ya bo, sa mansagha mama otsehebe nyuru a we emō ya bo, ya we firi nzi mu kuulu basa bo mankulu. Obo, baara bwohono sa basoolo ti mandagha mwohono ma báakabili bo mu nyuru a we mali mama mpya, ya ti wehe si aakasalala Mikyene mi Moyidze. **25** Lo kundaa baara baala ka bali ba-Dzwife o, ba baasi kana, bihi liisono mukaana mu olyele bo mandagha ma líikuru bihi. Mandagha mamó me ma: Banyaá odza tuo li banyama ba baagwi mukaba kundaa banzaami baba bityeghe. Banyaá oŋma makili ya odza tuo li banyama ba baakpi mbibili ya banyaá osa enkwunu.» **26** Mu etsyughu ki énama, Poole ágwolo babaghala babo, ási mansagha mama otsehebe manyuru emō ya bo. Ŋa mbihi oŋo, bo básomo mu nzo a Nzaami mu ogwalagha li baamana bo mansagha mama otsehebe manyuru ya nswe mbwuru mu bo áagwa ekaba. **27** Ku bele a masini ma bitsughu nsaama bibi mansagha mama otsehebe manyuru, ba-Dzwife ba báfi ku Adzi bámono Poole mu nzo a Nzaami yi nene. Bo bátsini mpwumu a baara mu osa ngirini ya bo básyimi nde. **28** Bo báakehe bingubu ti: «Basi Isaraye, liyabaha bihi! Limono mbwuru me wu li mu okabululuo kundaa baara bwohono ya mu bibini byehene maluo ma mali mu okakabyihi embwuru ki ekaana e bihi-a-be, Mikyene ya ebini ki. Ya mu matala ma, nde aasohobo si baara baala ka bali ba-Dzwife o munsá nzo a Nzaami, ya aatsaala bungili bu ebini kii ngili ki.» **29** Buulu bo áli batswana omono nde ya Torofime musi Efedze munsá bvulu, bo bátsimi ti Poole nde aasohobo munsá nzo a Nzaami yi nene. **30** Mpaatsala yíbwi mu bvulu lwohono ya baara bágyi mu mampwumu. Bo básyimi Poole ya bákwolo nde ku mbala. Ya básaakuru bidzughubu bi nzo a Nzaami. **31** Mu matala ma bákasagha bo odzwa Poole, nsia yi yíto kundaa mukwuru a pfwunu li bambumbulu lili ba-Romē ti mpaatsala yíibwi mu bvulu lili

Yeruseleme lwohono. **32** Mu maswa-maswa, nde ábvughu bamfumu ba bikuru bi bambumbulu nkama ya bambumbulu ba bo, ya bágyene ku óli mpwumu a baara. Baara bu bamono mukwuru a bambumbulu ya bambumbulu ba nde, bo bányaá ofirikaha Poole. **33** Mu obo, mukwuru a pfwunu li bambumbulu bu ayabehene, ágwi litumu básyimi Poole ya bakuru nde misyi myele mimi bisyeé. **34** Lo kunsu mpwumu a baara, bana bákakehe bingubu mu ndagha yi, babake bákakehe bingubu mu ndagha nkimi. Buulu oli a nkele yi alagha, mukwuru a pfwunu li bambumbulu ka áleene osoolo kumu li ndagha o. Mu obo, nde ágwi litumu babiri Poole kunsu ekagha ku ookakala bambumbulu. **35** Mu matala ma óli Poole **36** Baara bwohono bákana ma óli Poole **37** Mu matala ma bákasohobo Poole kunsu ekagha ku ookakala bambumbulu, nde ályele kundaa mukwuru a pfwunu li bambumbulu ti: «Me nkughu oyele we ndagha nga-mō?» Mfumu a bambumbulu ábvuhulu ti: «We soolo obili engereke?» **38** We ka li musi Edzipite wu aayasohobo mpaatsala mu bitsughu bi biiluru bi, ya wu aabiri mapfwunu mana ma bantwumu ba baakadzwa baara ku syehe o?» **39** Poole ábvuhulu ti: «Me, me ndi mu-Dzwife, musi Tarese, bvulu lili nsia, mu etsulu e nsie kii Silisi. Kolokolo a we, gwa me muswa me mbili kundaa baara ba.» **40** Mukwuru a bambumbulu bu agwi nde muswa, Poole átemene **41** Baara bwohono bákala pii ya nde ábili kundaa bo mu ndi yi a Eebere ti:

22 «Baana ba taara ya bataara ba me, mu matala ma ligyughu mandagha ma aandyele me be mu okala nyuru a me.» **2** Bo bu bagyughu Poole mu okabili kundaa bo mu Eebere, báfirikala pii ku olagha. **3** Nde ályele bo ti: «Me ndi mu-Dzwife, wu báburu ku Tarese, mu nsie yi a Silisi, lo me mu bvulu li nkulu, mu Yeruseleme ya me áangyighili ogyighi bwunu a bu ofaana Mikyene mi bataara ba bihi **4** Me áamkamwehé baara ba bákana ma nzili a Mfumu kimini tee ku lipfu. Me áakankuru babaghala ya bakaha minkana, ya me áakando bo mu manzo ma boloko. **5** Mukwuru a bangaa ba Nzaami ya mfwunu a bakwuru bali bampughulu mu mi ndi mu okabili me. Me bo báagwi me mikaana mi óyisyimi bandughu mu kana baba ku Damase mu matala ma ángyene me oko. Bo báagwi me litumu lii oyisyimi ya oyabiri baara ku Yeruseleme buulu basyeme bo.» **6** «Me áli mu nzili mu okagye, ku bele a ntaá a minsene, me áambehene ya bvulu lili Damase. Ya ensihibi, otsyeme kuu mpini ófi ku yulu ya ótsehebe ebini ki ándi me. **7** Me áambwi **8** Me áamfwulu ti: «Mfumu, we na?» Likyí líbvuhulu ti: «Me ndi Yiisu, musi Nadzarete. Me me we li mu okamwehé kimini.» **9** Baara ba báli ya me bákana ma óli Poole **10** Mu matala ma bákasohobo Poole kunsu ekagha ku ookakala bambumbulu, nde ályele kundaa mukwuru a pfwunu li bambumbulu ti: «Me nkughu oyele we ndagha nga-mō?» Mfumu a bambumbulu ábvuhulu ti: «We soolo obili engereke?» **38** We ka li musi Edzipite wu aayasohobo mpaatsala mu bitsughu bi biiluru bi, ya wu aabiri mapfwunu mana ma bantwumu ba baakadzwa baara ku syehe o?» **39** Poole ábvuhulu ti: «Me, me ndi mu-Dzwife, musi Tarese, bvulu lili nsia, mu etsulu e nsie kii Silisi. Kolokolo a we, gwa me muswa me mbili kundaa baara ba.» **40** Mukwuru a bambumbulu bu agwi nde muswa, Poole átemene **41** Baara bwohono bákala pii ya nde ábili kundaa bo mu ndi yi a Eebere ti:

lili mu okasala be lolo bu. **4** Me áamkamwehé baara ba bákana ma nzili a Mfumu kimini tee ku lipfu. Me áakankuru babaghala ya bakaha minkana, ya me áakando bo mu manzo ma boloko. **5** Mukwuru a bangaa ba Nzaami ya mfwunu a bakwuru bali bampughulu mu mi ndi mu okabili me. Me bo báagwi me mikaana mi óyisyimi bandughu mu kana baba ku Damase mu matala ma ángyene me oko. Bo báagwi me litumu lii oyisyimi ya oyabiri baara ku Yeruseleme buulu basyeme bo.» **6** «Me áli mu nzili mu okagye, ku bele a ntaá a minsene, me áambehene ya bvulu lili Damase. Ya ensihibi, otsyeme kuu mpini ófi ku yulu ya ótsehebe ebini ki ándi me. **7** Me áambwi **8** Me áamfwulu ti: «Mfumu, we na?» Likyí líbvuhulu ti: «Me ndi Yiisu, musi Nadzarete. Me me we li mu okamwehé kimini.» **9** Baara ba báli ya me bákana ma óli Poole **10** Mu matala ma bákasohobo Poole kunsu ekagha ku ookakala bambumbulu, nde ályele kundaa mukwuru a pfwunu li bambumbulu ti: «Me nkughu oyele we ndagha nga-mō?» Mfumu a bambumbulu ábvuhulu ti: «We soolo obili engereke?» **38** We ka li musi Edzipite wu aayasohobo mpaatsala mu bitsughu bi biiluru bi, ya wu aabiri mapfwunu mana ma bantwumu ba baakadzwa baara ku syehe o?» **39** Poole ábvuhulu ti: «Me, me ndi mu-Dzwife, musi Tarese, bvulu lili nsia, mu etsulu e nsie kii Silisi. Kolokolo a we, gwa me muswa me mbili kundaa baara ba.» **40** Mukwuru a bambumbulu bu agwi nde muswa, Poole átemene **41** Baara bwohono bákala pii ya nde ábili kundaa bo mu ndi yi a Eebere ti:

mu me o.” 19 Me áambvuhulu ti: “Mfumu, bo basoolo ti me me áakabulungye mu manzo ma ba-Dzwife mama lisamana mu okabululo mu maboloko ya okabulukaha nswanswa babo ba baakasa kana mu we. 20 Ya ŋa bátsala makili ma Etiene, wu áali mpughulu a we, me áandi oŋo. Me áankihi bitsimi bi ba bákadzwa nde ya me áakankebe binkuru bi bo.” 21 Lo Mfumu ályele kundaa me ti: “Gye, mu kuulu me sa ngweghe we ku la, kundaa baala ka bali ba-Dzwife o.” 22 Ba-Dzwife ba bákagyughu Poole tee ŋa ályele nde mandagha mamu, bábwi okabiili bingubu: «Limaha mbwuru wu a bu ŋa yulu a nsie, nde ka afaana ofirikala mweé ol!» 23 Bo bákagyighili ofiribiili bingubu, bákatsili binkuru bi bo ya bákaseene lifufunu mu yulu. 24 Mukwuru a bambumbulu ágwi litumu basohobo Poole kunsu ekagha ku ookakala bambumbulu, ya bakakubu nde nswanswa ŋa bàagwa nde bifwulu, mpaala basoolo mu nsa ndagha baara bákakehe bingubu bibye mu nde. 25 Bu bakuru nde minkana mpaala bakaha nde nswanswa, Poole ályele kundaa Mukwuru a ekuru ki bambumbulu nkama wu áli oŋo ti: «Bunu, be lili a muswa wu okaha mu-Romē nswanswa, ŋaala be nde nkini muyala osa we?» 26 Mukwuru a ekuru ki bambumbulu nkama bu ágyughu obo, nde áyilyele kundaa mukwuru a ekuru ki bambumbulu pfwunu ti: «Bunu-abo we áasa? Mbwuru wu li musi Rome!» 27 Mukwuru a ekuru ki bambumbulu pfwunu ágyene ya áyifwulu Poole ti: «Lyele me, mu nŋaŋma we li musi Rome?» Nde ákihi: «Heē». 28 Mukwuru a ekuru ki bambumbulu pfwunu áfirilyele ti: «Me áangyehe nzi yi alagha mu okighiri musi Rome.» Poole ábvuhulu kundaa nde ti: «Me, me ndi musi Rome wu emburu ngughu.» 29 Mu matala maana mamu, babo ba bákasagha ogwa nde bifwulu bányaá nde. Lo mukwuru a ekuru ki bambumbulu pfwunu ábagha nzalamweé ŋa ábaghala nde ti mu-Romē nde átuumu bakuru minkana. 30 Mu etsughu ki ékanama, mukwuru a ekuru ki bambumbulu pfwunu bu áli a nzala ogyighili ogyahaba ndagha yi mubwughu yi ófwunu ba-Dzwife Poole, átuumu banyana nde minkana. Ya nde ábvughu bakwuru ba bangaa ba Nzaami ya mfwunu a ekwuru ki ba-Dzwife yohono. ŋa nseele, nde ápaha Poole, átwulu nde ŋa nkulu a bo, mpaala bo bagyughu nde.

23 Poole bu atala mfwunu a ekwuru ki ba-Dzwife pii, ályele ti: «Baana ba taara a me, munsu mukolo a me, me bu nsoolo ti, me áakandzyara mu bunsumu ŋa busu bu Nzaami, tee mu etsughu kii lolo.» 2 Lo Ananyase, mukwuru a bangaa ba Nzaami átuumu ba báli ŋa bele a Poole bakaha nde mu muŋma. 3 Mu obo Poole ályele kundaa nde ti: «Mu mukubu wu a we, Nzaami sa akaha we, ebagha ki básyili mpeeme! We aabwi-nsini ŋa mu olamana me ti bwunu a bu ookatumu Mikiyene. Lo we oŋo Mikiyene li mu osalala bu li mu ogwa litumu ti bakaha me?» 4 Ba báli oŋo bályele kundaa nde ti: «We aatughu Mukwuru a bangaa ba Nzaami!» 5 Poole ábvuhulu ti: «Baana ba taara a me, me ka aakansoolo o ti nde me Mukwuru a bangaa ba Nzaami. Mu enganyama básono ti: “We ka tughu mfumu a nsie a we o.”» 6 Nde bu asoolo ti kunsu mfwunu a ekwuru ki ba-Dzwife babake báli ba-Saduseyē ya ba bamo ba-Faridzyē, Poole ákehe engubu ŋa kara li bo ti: «Baana ba taara a me, me ndi mu-Faridzyē, mwana a mu-Faridzyē, mu nkooro a kana li bihi mu osighili o baara mu lipfu bali mu okalamana me.» 7 Nde bu amana obili obo, mumbaŋana ábwi ŋa kara li ba-Faridzyē ya ba-Saduseyē, ya emvuŋunu ékaghaba mu makaba muolo. 8 Mu kuulu ba-Saduseyē baakalyele ti osighili o baara mu lipfu ka oli o, bangye-yulu ka bali o, Mifulu si ka mili o. Lo ba-Faridzyē baakasa kana mu mandagha mwohonu mamu. 9 Nkele yífiriluru. Ndaama a baluo-mikiyene mimi kaba lili ba-Faridzyē bátemene ya bákabili mu mpini ti: «Bihi ka liimono ebili mu mbwuru wu o. Nkini a nki mifulu, bwunu we ngye-yulu aabili kundaa nde!» 10 Buulu mumbaŋana ákabvulu mpini, mukwuru a ekuru ki bambumbulu pfwunu, bu amono nzalamweé ti bo bakughu okaghala Poole mu bipa, nde átuumu bambumbulu basughuru, bapaha nde ŋa kara li bo ya babiri nde kunsu ekagha ku ookakala bambumbulu. 11 Mu mpyibi yi áanama, Mfumu ámoŋono kundaa Poole ya ályele nde ti: «Kala a bukyini! Mu kuulu, bwunu a bu aakala we mpughulu a me mu Yerusaleme, bumō si we faana okala mpughulu a me ku Rome.» 12 Bwihi bu buki, ba-Dzwife bákuru mfwunu, báli mukakana ya bályele ti bo ka badza o ya ka baŋma o tee mu matala ma baadzwa bo Poole. 13 Ba-Dzwife ba bákuru mfwunu oyo áli baluru makwumu-mana ma baara. 14 Bo báyimono bakwuru ba bangaa ba

nzaami ya bakwuru ba ekaana. Bályele kundaa bo ti: «Bihi lilili mukakana ti bihi ka lidza o ya ka lijma o tee mu matala ma liidzwa bihi Poole. 15 Mu obo, ligwihini ya mfwunu a bakwuru ba ba-Dzwife, mu oyilyele mukwuru a ekuru ki bambumbulu ti bagya a be Poole mu mpere yiili be ligyighili okeene ndagha a nde embe. Bihi me baala sa liyikehele nde ya lidzwa nde, nsomo nde ayato nja.» 16 Lo mwana a nkele a Poole wu baghala ásoolo mfwunu oyo, ágyene ku ekagha ku ookakala bambumbulu, ásono omo ya ályele ndagha oyo kundaa Poole. 17 Poole áti mumō mu bakwuru ba bikuru bi bambumbulu nkama mbili, ya ályele kundaa nde ti: «Biri mumpala wu kundaa mukwuru a ekuru ki bambumbulu pfwunu, nde li a ndagha yi aalyele nde.» 18 Mukwuru a ekuru ki bambumbulu nkama ábiri nde kundaa mukwuru a ekuru ki bambumbulu pfwunu ya ályele ti: «Poole wu lililo mu boloko aati me mbili, ya aatumu me yambiri mumpala wu kundaa we. Nde li a ndagha yi aalyele we.» 19 Mukwuru a ekuru ki bambumbulu pfwunu ákwara nde mu kwogho, ágyene a nde mu libee ya áfwulu nde ti: «We nsa ndagha li a yo yi aalyele me?» 20 Mumpala ábvuhulu nde ti: «Ba-Dzwife baagwihini mu oluomo kundaa we ti mbala we biri Poole nja nkulu a mfwunu a bo. Bo sa balyele we ti bo badzyi ogyighili okeene ndagha a nde embe. 21 Lo we me wuulu ka akihi bitsimi bi bo o. Mu kuulu oli a makwumu-mana ma baara nja kara li bo ba baayikehele nde. Bo baali mukakana ti, bo ka badza o ya ka barjma o, tee mu matala ma baadzwa bo Poole. Mu matala ma bo bali yeelee, yini a mvuru a we bali mu okakebe.» 22 Mukwuru a ekuru ki bambumbulu pfwunu ábvuhulu mumpala ya átswi nde mukele ti: «Ka lyele mbwuru ti we aasuo me mfwunu oyo o.» 23 Mukwuru a ekuru ki bambumbulu pfwunu áti buolo mu bakwuru ba bikuru bi bambumbulu nkama mbili, ya ályele bo ti: «Likala yeelee mu ogye ku Sedzare, mu tala lili wa mu mpyibi. Ligwolo nkama ywolo yi a bambumbulu, makwumu-nsaama mama ba baakabiri basyevale ya nkama ywolo yi a bambumbulu ba bali a magyuo. 24 Ligyighili si basyevale ba baabiri Poole wu mukughu ya mweē kundaa Felikise, mfumu a etsulu e nsie.» 25 Nde ásono bu mu mukaana: 26 «Kundaa we Felikise, mfumu wu budziri, mboro a we! Me Kolode Lisyase, ndi mu osono. 27 Mbwuru wu ngweghe me we, ba-Dzwife baasyimi nde ya

baadzyi odzwa nde. Me bu aangyughu ti nde li musi Rome, me aangylene ya mpwumu a bambumbulu ba me mu okwulu nde. 28 Me bu aandzyi osoolo ebili ki baafwunu nde, me aambiri nde nja nkulu a mfwunu a bakwuru ba bo. 29 Me aamono ti mandagha ma bali mu okafwunu nde matala mumbanjana mu mikylene mi bo. Ka oli a ndagha yi bakughu odzwa nde o, bwunu we olo nde mu boloko. 30 Me bu aangyughu ti bo baakuru mfwunu mu odzwa mbwuru wu, me ngweghe we nde mu maswaswaswa. Ya me aanduomo kundaa ba bali mu okafwunu nde, bayalyele nja mihi mi we ebili ki baabagha bo mu nde.» 31 Bambumbulu bágyene a Poole ya bábiri nde mu mpyibi nja bvulu lilili Antipatirise ti bwunu a bu óli litumu li bágwi bo. 32 Etsughu ki énama, bambumbulu ba bákagye mu myili, bábvughuru ku ekagha ku ookakala bambumbulu, ba bákabiri basyevale bánama nzili ya Poole. 33 Bu bato ku Sedzare, bambumbulu ba baakabiri basyevale bágwi mukaana kundaa mfumu a etsulu e nsie, ya básuo nde si Poole. 34 Mfumu a etsulu e nsie átaā mukaana ya áfwulu Poole munsa etsulu e nsie nde áfi. Poole ályele nde ti ku Silisi. 35 Nde ályele kundaa Poole ti: «Me sa ngyughu we mu matala ma ookala ba baafwunu we nja nkulu a me.» Nde ágwi litumu bakebe Poole mu nzo a emfumu yi ótwu Erode.

24 Nja mbihi a bitsighu bitaana, Ananyase, Mukwuru a bangaa ba nzaami ákumunu ku bvulu lilili Sedzare nzili mō ya ndaama a bakwuru ba ba-Dzwife, ya Teretuluse, nsughu a bo. Bo báfwunu Poole kundaa mfumu a etsulu e nsie. 2 Bu bati Poole mbili, Teretuluse ábaana okwighi nde mandagha bu: «Mfumu wu munene, bihi lilili kunsu edzuunu ki enene mu nkooro a we, ya mu mandagha mwohonono mama lisobo maasi we mu Ekaana ki. 3 Felikise wu a nkara budziri! Mu matala mwohonono ya mu bibini byehene, bihi liikabvurulu matuono ma malagha mu mandagha ma mabwe mwohonono ma aakagyighili we. 4 Lo mu ogwene oluhu we matala, me mbuono we, ya mu bubwe bu we, magyughu bihi. 5 Bihi liimono ti mbwuru wu nkara a mubi. Nde aakatsubu ngirini nja kara li ba-Dzwife bwohonono baba nsie nsyini. Ya nde li mukwuru a emvurunu ki basi Nadzarete. 6 Nde aagyeele otsaala bungili bu nzo a Nzaami, me mu obo bihi liisiyimi nde. [Bihi liidzyi olamana

nde ti bwunu a bu oli mikyene mi bihi, 7 lo Lisyase, mukwuru a bambumbulu, áyagwohono bihi nde mu mpini. 8 Ya aagwi litumu kundaa ba baafwunu nde mu ogya ɗa nkulu a we]. We kughu ofwulu baghala wu weme, ya we sa mono ti mandagha ma lili mu okasa bihi nde mumfwunu mali mama ngarɗma.» 9 Ba-Dzwife básyighi mandagha ma ólyele Teretuluse, ti mo máli mama ngarɗma. 10 Mfumu a etsulu e nsie ágwi nde muswa mu obili, ya Poole ábvuhulu ti: «Me nsoolo ti obaana bamvulu balagha, we aakalamana baara ba ekaana ki mu bunsumu. Me mu obo me ndi a kana mu okala nyuru a me. 11 Bitsughu kwumu ya byele nkini biiluru o, obaana bu áankumu me ku Yerusaleme mu oyibuono Nzaami. We kughu ofwulu ndagha oyo. 12 Mbwuru si mumō ka aamono me mu okatsoho ya mbwuru o, bwunu we mu okatihi mpwumu a baara. Ngu okala mu Nzo a nzaami, ngu okala mu manzo ma lisamana ma ba-Dzwife, ngu okala munsu bvulu. 13 Baara ba, ka bakughu osuo we o ti ndagha yi bali mu okasa me mumfwunu mu matala ma yili yi a ngarɗma. 14 Mono ndagha yinsoolo me: Me aakambuono Nzaami a bataara ba bihi mu nzili a Mfumu yi bali mu okata bo ti Emvumvugunu. Me aakansa kana mu mi básono mu Mikyene ya mu mibighili. 15 Kana li aakansa me mu Nzaami ti sa okala a osighili o baara baba nsumu ya ba bagwene a bunsumu mu lipfu, me lyini lilo si bo bali a lo. 16 Me mu obo meme si aakansa mpini mu matala mwohonu mu omogono mbwuru wu gwene a bitsimi bi okughu osyeme Nzaami ya baara. 17 ɗa mbihi a bamvulu balagha baala me ka ándi ya be o, me aayamvughuru ku Yerusaleme mu oyabiri libaha kundaa ekaana e me, ya mu ogwa bikaba kundaa Nzaami. 18 Me mu matala mamu bo baamono me munsu Nzo a nzaami ɗa mbihi a mansagha mama otsehebe nyuru a me. Ka ókakala a mpwumu a baara o, ya ka ókakala a kyaá o. 19 Lo ba-Dzwife babake baba ku Adzi, ba bákakala oɗo, me bo bakaafwunu me kundaa we, kala ti boho si baamono ndagha yi mbi mu me. 20 Bwunu we, nyaá baara ba balyele ndagha yi mbi yibaamono bo mu me, ɗa baalamana me ɗa nkulu a mfwunu a ekwuru ki ba-Dzwife. 21 Bunu, yini a mu nkooro a ndagha yi aankehe me engubu mu mutele ɗa kara li bo ti: “Mu osighili o ba bákpi mu lipfu bali mu okalamana me lolo li ɗa nkulu a be?”» 22

Felikise wu áakagyighili osoolo mi mitala nzili a Mfumu, ábvurulu bo ya ályele ndiri: «Me sa ndamana ndagha a be ɗa ooyakumunu Lisyase Mfumu a ekuru ki bambumbulu pfwunu ɗa.» 23 Nde ágwi litumu kundaa mfumu a ekuru ki bambumbulu nkama mu okebe Poole mu boloko ya mana bumpoholo, ya anyaá bandughu ba nde bumpoholo mu okabaha nde. 24 ɗa mbihi a mana bitsughu, Felikise ya Durusile, mukala a nde wu mu-Dzwife, bágyi. Nde átumu bayibinjini Poole ya nde ágyughu nde mu okabili mu kana mu Yiisu-Kriste. 25 Lo mu matala ma óbwi obili Poole mu mi mitala bunsumu, okebe nyuru ya mumfwunu wu akala aagya, Felikise ábagha nzalamweé ya ályele kundaa nde ti: «Mu matala ma, magye! Me sa nta we mbili mu sa likimi.» 26 Felikise áli a kana ti Poole sa agwa nde nzi. Mu obo nde ákata nde mbili matala malagha mu okamoó ya nde. 27 ɗa mbihi a bamvulu buolo, Porosiyuse Fesetuse ákiri Felikise ɗa emfumu. Buulu Felikise ákasagha ogwa ba-Dzwife esee, nde ányaghala Poole mu boloko.

25 Fesetuse áto mu etsulu e nsie kii Yude. ɗa mbihi a bitsughu bitere nde ámara ku Sedzare ya ákumu ku Yerusaleme. 2 Bakwuru ba bangaa ba nzaami ya ba-Dzwife baba mupfunu báyimono Fesetuse ya báfwunu Poole kundaa nde. Bo bási enziini, 3 mu obuono Fesetuse abvurulu Poole ku Yerusaleme. Mu engarɗma, bo áli bakuru mfwunu yi okehele nde mu nzili mu kuulu badzwa nde. 4 Lo Fesetuse ábvuhulu kundaa bo ti Poole áli mu boloko lili ku Sedzare, ya edzi-dzighi ndeme ákabvughuru oko. 5 Nde áfirilyele ti: «Nyaá bamfumu ba be bakumunu nzili mó ya me ku Sedzare, ya bo bafwunu nde oko, kala ti nde li a ebili.» 6 Fesetuse áluhu bitsighu mpuomo bwunu we kwumu ku Yerusaleme, ɗa mbihi nde ákumunu ku Sedzare. Mu etsughu ki énama, nde bu abwinsini ɗa ebini kii muyala, átumu bayabiri nde Poole. 7 Poole bu ayato, ba-Dzwife ba báfi ku Yerusaleme bádzýi nde ya bábwi okaburulu nde mandagha ma malagha ya mama mpara. Lo bo ka bákakughu osuo engarɗma ki mandagha mamu o. 8 Poole ákala nyuru a nde ya ályele ti: «Me ka aansu bubi o, ngu okala ɗa nkulu a Mikyene mi ba-Dzwife, ngu okala mu nzo a nzaami, ngu okala mu mi mitala mukogho Sedzare.» 9 Fesetuse bu ákadzyi ogwa ba-Dzwife esee áfwulu Poole ti: «We dzyi okumu ku

Yerusalem mu kuulu balamana ndagha a we yi oko ɲa nkulu a me?» **10** Lo Poole ábvuhulu ti: «Me ndi ɲa mbala a muyala a mukogho Sedzare, me ɲa ebini ki bafaana olamana me. Ti bwunu a bu gyighili osoolo weme, me ka aansii ndagha yi mbi kundaa ba-Dzwife o. **11** Kala ti me ka ndi a bwuu o ya kala ti me aansii bubi buulu bafaana odzwa me, lo me ka nkughu obihi lipfu o. Lo kala ti mandagha ma oli mu okaburulu me baara ba mali mama bwunu, lo mbwuru ka li a muswa mu otyeghe me ɲa myaã mi bo o. Me nduom mukogho Sedzare alamana ndagha a me.» **12** Fesetuse bu afi ku mfwunu ya bansughu-alamana, ágwi nde mvuru yi: «We aaluomo ti mukogho Sedzare alamana ndagha a we, we sa gye ɲa nkulu a Sedzare!» **13** Mana bitsughu bu biluru, mukogho Angiripa ya Berenise báyanto mu bvulu lili Sedzare ya báygwa Fesetuse mboro. **14** Buulu bo bákaluhu bitsughu bilagha oko, Fesetuse ágwi nsia yi a ndagha a Poole kundaa mukogho ya ályele ti: «ɲa oli a mbwuru mumō wu oosihi Felikise mu boloko. **15** Mu matala ma aandi me ku Yerusalem, bakwuru ba bangaa ba nzaami ya bakwuru ba ba-Dzwife baafwunu nde, ya baakaluomo ti me ngwa nde ebili. **16** Me aamvuhulu kundaa bo ti ba-Romē ka bali a epfu kii otyeghe mbwuru wu baafwunu ɲa myaã mi baara o, kala ti ka batswana ogyughu mabwuu ma bo o. Nsomo bafaana ogwa wu baafwunu matala mu okala nyuru a nde. **17** Me mu obo bo bwohonoo baagyí ɲa, gwene a ogwa me lagha. Bwihi bu buki, me aambwini mu nzo a muyala, ya aantumu bagya a mbwuru munde. **18** Bu baagyí, ba baafwunu nde baabili, lo ka oli a ndagha si mō yi a mpara o, ti bu aakansimi me. **19** Bo yini a munsohobo baasi mu mi mitala osamana o bo, emvulu ngughu ndagha yitala mbwuru mumō wu áakpi, nkhwumu a nde Yíisu. Poole li mu okabululeye ti nde li mweē. **20** Buulu me ka aakansoolo bu aansa o, me aamfwulu Poole kala ti nde dzyi ogye ku Yerusalem buulu balamana ndagha a nde oko. **21** Lo Poole aaluomo ti mukogho wu a Rome alamana ndagha a nde. Me mu obo me aantumu ti bakebe nde mu boloko tee mu matala ma aangweghe me nde kundaa Sedzare.» **22** Angiripa ályele kundaa Fesetuse ti: «Mehe si, ndzyi ogyughu mbwuru munde!» Fesetuse ábvuhulu kundaa nde ti: «Mbala we sa gyughu nde.» **23** Bwihi bu buki, Angiripa ya Berenise bágyi kunsá nsia. Bo básomo munsá nzo a

muyala, nzili mō ya bakwuru ba bambumbulu, ya baara baba budziri baba mu bvulu. Fesetuse ágwi litumu bayabiri Poole. **24** Fesetuse ályele ti: «Mukogho Angiripa ya be bwohonoo ba lili ɲa ya bihi, limono mbwuru wu. Mu nkooro a nde, mpwumu a ba-Dzwife yígyi kundaa me ku Yerusalem ya ɲaha si, ya yili mu okaluomo kunsá bingubu ti nde ka faana ofirikala wu a mweē o. **25** Me ka aamono mu nde ebili ki bakughu otsyiri nde mukakana wu lipfu o. Lo buulu ndeme aaluomo ti ndagha a nde olamana yo mukogho a Rome, me aangwolo munkana wu ogweghe nde kundaa Sedzare. **26** Me bu aankwono obagha ngughu a ndagha yi osonoo kundaa mukogho a Rome mu mi mitala mbwuru wu, me aayambiri nde ɲa nkulu a be, ɲa nkulu a we mukogho Angiripa, mu kuulu ɲa mbihi a bifwulu bi aagwa we nde, me mbagha mi aansono me mu nde. **27** Mu engayma, me aamono ti oli buwulu mu ogweghe mbwuru a boloko kundaa mukogho a Rome, gwene a osuo bubi bu baafwunu nde.»

26 Angiripa ályele kundaa Poole ti: «We li a muswa wu obili mu okala nyuru a we!» Poole álabala kwogho ya ábili bu mu okala nyuru a nde: **2** «Mukogho Angiripa! Me ndi a nkara esee mu etsughu kii lolo mu obili mu okala nyuru a me ɲa nkulu a we, mu mandagha mwohonoo ma oli mu okaburulu me ba-Dzwife. **3** Mu kuulu we gyighili osoolo ekulu ki ba-Dzwife kyehehe ya mandagha ma baakabulubanjana bo. Yoboo, me mbuono we, ka kolo o mu ogyughu me!» **4** «Ba-Dzwife bwohonoo basoolo bumweē bu me, obaana matala ma ándi me munkurumbala, ɲa kara li ekaana e me ku Yerusalem. **5** Bo basoolo me edzighi, kala ti bo badzyi, bo bakughu olyele engayma mu me ti me áli mbwuru a emvujunu ki ebvulu a mpini mu enzaami e bihi, emvujunu kii ba-Faridzyē. **6** Ya kala ti bali mu olamana me lolo, mu nkooro a kana li me mu misiini mi ósi Nzaami kundaa bataara ba bihi, **7** ya madzumu ma bihi kwumu ya muolo si maakasa kana ti misiini mimye sa mikeele ya maakabuono Nzaami mpyibi ya mwíi mu mbaa yi alagha. A mukogho! Me mu nkooro a kana lilo ba-Dzwife baafwunu me. **8** Mu emakye be ba-Dzwife liikagwene osa kana ti Nzaami kughu osiili ba bákpí? **9** Meme si áakansimi odzwana a nkhwumu a Yíisu musi Nadzarete mu manzili mwohonoo. **10** Mamo me

mandagha ma ákangyighili me ku Yerusaleme. Mu litumu li ógwi me bakwuru ba bangaa ba nzaami. Meme áakando baba ngili balagha mu maboloko ya me áakankihi ti bakadzwa bo. **11** Me aakubulungye mu manzo mama lisamana ma ba-Dzwife mwohono mu okasyeme bo ya me áakansiini bo bakatswagha nkwumu a Nzaami. Mu nkehe a me yi a mpini, me áakamweë bo kimini tee mu mabvulu mama bunzyi.» **12** «Etsughu nga-emō me ákangye ku Damase ya litumu lwohono ya esala ki ógwi me bakwuru ba bangaa ba nzaami. **13** A mukogho! Me ándi mu nzili, ku bele a matala mama embehe, me áamono otsyeme ku obvulu tala mu osehene, ku ófi ku yulu, ya óyabwa mu me ya ba bákagye nzili mō ya me. **14** Bihi bwohono líibwi ŋa nsie, ya me áangyughu likyi li líkalyele kundaa me mu Eebere ti: “Sawule, Sawule, mu emakye we li mu okamwehē me kimini? Mpara yi a bwunu kundaa we bu gwene okihi, ti anga ngoomo wu li mu okasa ngyi ŋa bali mu okakulu nde munkumu!” **15** Ya me áamfwulu ti: “Mfumu, we na?” Mfumu ábvuhulu me ti: “Me ngu Yiisu, ngu me we li mu okamwehē kimini. **16** Lo sighili ya temene mu myili mi we. Me aamojono kundaa we mu osa kuulu we kala musala a me ya mpughulu a me mu mi áamono we mu me, ya mu mi áansuo me we ŋa áamfirimojono me kundaa we. **17** Me sa akala nkwulu we ŋa myaā mi baara ba, ya mimi baala ka bali ba-Dzwife o. Me kundaa baala ka bali ba-Dzwife o me aangweghe we, **18** buulu we dzubulu bo mihi, bapala ku mpyibi a nswi mu ogya ku otsyeme, bapala mu litumu li Satana mu osomo mu lili Nzaami. Bo babagha kolokolo a masumu ya babagha kaba lili pfa li baba ngili, mu nzili yi a kana mu me.”» **19** «Mu obo, mukogho Angiripa, me ka ánsi nkyini mu limono lili mayulu lilo o. **20** Lo me áanduo nsomo kundaa baara baba Damase, tumu kundaa baba Yerusaleme, mu etsulu e nsie kii Yude, ya kundaa bikaana biili ka bili ba-Dzwife o. Me áanduomo bo bagyiŋi mayele, babvughuru kundaa Nzaami, ya basuo bigyighili bi bifaana ya ogyiŋi mayele. **21** Me mu obo ba-Dzwife baasyimi me mu nzo a nzaami ya baakasagha odzwa me. **22** Lo Nzaami li mu okakebe me, ya tee mu etsughu kii lolo, me ndi mpughulu kundaa bike-bike ya kundaa bakwuru, kwono ku ndagha obwehe ŋa yulu a mi ólyele mibighili ya Moyidze, ti mandagha mamō mafaana okeele. **23** Mandagha mamō

me ma: Kriste faana omono mpara ya nde li wu a nsomo mu osighili ŋa kara li ba bákpi. Nde faana otsala nsia a otsyeme kundaa ba-Dzwife ya kundaa baala ka bali ba-Dzwife o.» **24** Poole ákabili mu okala nyuru a nde ya bu alyele ndagha oyo, Fesetuse ábili mu likyi lili mpini: «Poole we lala li a lo! Mayele mwohono ma li a we maagwi we lala!» **25** Lo Poole ábvuhulu ti: «Fesetuse, wu a nkara budziri! Me ka aambyele lala o! Lo mandagha ma ndyele me mama ngan̄ma ya mama bunsumu. **26** Mu kuulu mukogho soolo mandagha mamō mwohono, ya me nkughu obili ŋa nkulu a nde ya kana lwohono. Me ngyighili osoolo ti nde ka dzimini si ndagha mō mu mo o, mu kuulu mandagha mamō ka máluru mu ensweghe o. **27** A mukogho Angiripa! We aakasa kana mu mibighili? Me nsolo ti we aakasa kana mu mye.» **28** Angiripa ábvuhulu kundaa Poole ti: «Osyili eki-kiri we peene a me mu kuulu me nkala mukriste!» **29** Poole ályele kundaa nde ti: «Ngu okala eki-kiri, bwunu we matala malagha, kala ti Nzaami dzyi, ka okala yini a we o, lo ya baara bwohono ba bali mu okagyughu me lolo li. Nyaā be likala ti anga me, lo gwene a minkana mimi mu bisyee mi!» **30** Mukogho, mfumu a etsulu e nsie, Berenise ya babo bwohono ba bábwi-nsini, bátemene. **31** Bo bágyene ku mfwunu, báfuunu bo-a-bo ti: «Mbwuru wu ka aagyighili ndagha si mō o yi bakughu odzwa nde bwunu we olo nde mu boloko.» **32** Angiripa ályele kundaa Fesetuse ti: «Mbwuru wu ali wu onyaā, kala ti nde ka aaluomo Sedzare alamana ndagha a nde o.»

27 Mu matala ma bágwolo munkaana ti bihi lisomo mu bwara mu ogye ku Itali, bágwi Poole ya baara ba boloko babake ŋa myaā mi mfumu a ekuru ki bambumbulu nkama wu a nkwumu Yulyuse. Nde áli mu mpwumu a bambumbulu yi baakata ti Mpwumu yi a Onguste. **2** Bihi líisomo mu bwara bubu bvulu lili Adaramite bu búkagye ku mambwuu mama Adzi ya bihi lígyene mu nzili a mubu. Bihi líili ya Arisitarake, musi Masedwane wu a ku Tesalonike. **3** Mu etsughu ki éluono, bihi líito ŋa bvulu lili Sidō ya líigwumu oŋo. Yulyuse wu áakagwolo Poole mu embwuru, ágwi nde muswa mu oyimono bandughu ba nde buulu bo babaha nde. **4** Bu limara oŋo, bihi líinama mu mukogho-mukogho a elyi kii Syipere mu kuulu libara efulu ki ékaghala mfulu kundaa

bihi. **5** Bihi líipala mubu mbembehe li bitsulu bi nsie bibi Silisi ya Pamfili, ya bihi líisughuru ja bvulu lili Mire mu etsulu e nsie kii Lisi. **6** Orjo, mfumu a ekuru ki bambumbulu nkama bu amono bwara bubu bvulu lili Aledzanderi bu búkagye ku Itali, ásohobo bihi omo. **7** Mu bitsughu bilagha bihi líikagye buke-buke mu bwara, ya mu mpara bihi líiyito ja nkulu a bvulu lili Kinide. Buulu efulu ékakahaba bihi mu ogye linkulu, bihi líiluru minkini ja nto a elyi ki baakata Salemono ya líigyene mukogho-mukogho mu ngulu yi a elyi kii Kerete. **8** Bwara búkagye mu mpara yi alagha mu mukogho a madza ya bihi líiyito ja ebini emó ki baakata ti Mambwuu ma Mabwe, ja bele a bvulu lili Lasaya. **9** Matala malagha máluru bihi orjo, ya osomo mu bwara ya ogye mu madza áli oli ndagha yi a mpara, mu kuulu matala mama okuru nswele mu bala áli ayi máluru. Poole ágyehe bo ya ályele ti: **10** «Bandughu ba me, me ndi mu omono ti dzwe li sa likala li libi. Bilogho ya bwara bikughu opfighili, ya bihi-meme si likughu opfihili bumweé bu bihi.» **11** Lo mfumu a ekuru ki bambumbulu nkama ábvulu okasa kana mu mbwuru wu aakabiri bwara ya mu nga-a-bwara. Nde ka ádzyi ogyughu Poole o. **12** Lo buulu mbwuu ka yíli a bu oluhu ndo yi a mpie yi alagha o, ba balagha bákihi etsimi kii omara orjo. Bitsimi bi bo áli ti, bo bákughu oto ku Fenikise, mbwuu mó yi a Kerete. Yo yíli bwaha ku Sude-Este ya ku Nore-Weste. **13** Mana efulu ki edzuunu ki eekafa ku Sude bu etemene, bo bámono ti bakughu onama etsimi e mfwunu a bo, ya bu basohobo enkulu ki eekatehebe bwara mu madza, bo bágyene mukogho-mukogho a elyi kii Kerete. **14** Lo ja mbihi a mana matala, efulu e nkiri ki baakata ti efulu ki Nore-Esete, ki eekafa ku minguo mimi elyi, ébwi ofulu mu mpini. **15** Efulu ébiri bwara, ya buulu bihi ka líli a bu ofirisa o, bwara búkabulugye a bihi magye-agye. **16** Bu líkaluru ja bele a elyi-lyi kii Koda, ki ékakyi bihi efulu, bihi líisi mpini mu osomo mu bwara bu busala baba libaha. **17** Ba baakasala mu bwara, básohobo bwara bu busala bubu libaha munsa bwara bu bunene. Bo bádzyi bwara bu bunene misyi, ya bu bamono nzalamweé ti mara bakwogho a bihi tee ku dzyele lili mukogho a mubu wu a Libi, bo bátubu mu madza enkulu kii endehé ki eekatehebe bwara. Ya bányaá efulu ékagye a bihi magye-agye. **18** Etsughu ki éluono, buulu

efulu ékanyihí bihi mu mpini, bo bátsili pa li matsulu mu mubu, **19** ya mu etsughu kii bitere, bo bomo bátsili mu mubu nkpaá a eko yi aakasa ti bwara bukagye ya muti wu aakakwara yo. **20** Mu bitsughu bilagha, tala ya banjomajomo ka bifirikamajono o, efulu ka édzunu si eke o, ya bihi ka lífirisyili a emiini kii obvwughu o. **21** Bitsughu bilagha bíiluru biili bo ka báli o. Ya Poole bu atemene ja kara li bo ályele ti: «Bandughu ba me, kala ti be ali líigyughu me, ti linyaá omara ja Kerete, nkini ka likaabwana a efulu ki enene ki ya opfihili bilogho byehene bi o. **22** Lo mu matala ma, me nduomo be mu okala a bukyini. Mu kuulu ka oli a mbwuru si mumó mu be wu aapfihili laama li nde o, yini a bwara buubyi. **23** Mu kuulu mu mpyibi yi, ngye-yulu a Nzaami, Nzaami wu aabagha me ya wu aakansalala me, aayamajono kundaa me **24** ya aalyele me ti: “Poole, ka kala a nzalamweé o, mu kuulu bafaana olamana we ja nkulu a Sedzare. Nzaami aagwi we bwehe ya mu nkooro a we, banganda ba we baba midzye sa bakala mweé.” **25** Me mu obo bandughu ba me likala a bukyini! Me ndi a kana mu Nzaami ti mandagha ma aalyele nde me sa makeele. **26** Bwara bu bihi-a-be sa buyitsajama ja yulu a elyi emó.» **27** Mpyibi oyo áli yi a kwumu ya na yi líkabulugye bihi magye-agye mu mubu wu a Adiryatike. Mu kara-a-kara a mpyibi, ba baakabulusala mu bwara bábaghala ti bihi líito be-bele a nsie. **28** Bo bágyeele muyighi madza, ya bábagha mankpaá makwumu-matere ya nsaama. Bu bafirisele ja nkulu, báfirigyeele ya bábagha mankpaá makwumu-muola ya mataana mama muyighi. **29** Bu bamono nzalamweé ti mara bayikaghara ku yulu a mameé, bo básurulu binkulu bina bi biikatehebe bwara mu madza ku mbihi a bwara, ya bo bákasughu mukolo ti bwihi bu baakya. **30** Lo buulu ba baakasala mu bwara bákasagha obara, bo básurulu bwara bu busala buu libaha mu mubu, ya bási mpere yi oyitere binkulu bi biikatehebe bwara mu madza, ku nkulu a bwara bu bunene. **31** Poole ályele kundaa mukwuru a ekuru ki bambumbulu nkama ya bambumbulu ti: «Kala ti baara ba ka bakala munsa bwara o, lo be ka libvwughu o!» **32** Bambumbulu bátsyiri misyi mi bwara bu busala buu libaha ya bányaá bo bugye mu madza. **33** Bu bákakebe ti bwihi bukya, Poole ábwono baara bwohonono ti badza, ya ályele ti: «Etsughu kii lolo me kii kwumu ya bina ki lili mu okakebe be, ya kiili be elogho

odza we. **34** Mu obo, me mbuono be mu odza mu kuulu be lili a nzala a bi-odza mu obvwughu. Mu enganyama, mbwuru si mumō mu be ka apfihili si lifu li mutswi a nde limō o.» **35** Bu amana obili, nde ágwolo limpa, bu abvurulu matuono kundaa Nzaami ŋa nkulu a bo bwohonono, átsyiri lo ya ábwí odza. **36** Bo bwohonono bábagha bukyini ya boho si bágwolo bilogho báli. **37** Munsá bwara bihi lílil nkama-ywolo ya makwumu-nsaama ya baara basemene. **38** Bu bagyughuru, bo bátsili matsulu mama mburu a bele mu mubu mpaala bwara buleē. **39** Bwihi bu buki, ba baakasala mu bwara ka báfirikasoolo nsie yi bámono bo o. Lo bo bátaala furu li mubu li líli a dzyele lilagha. Bo bágwolo munkaana wu obiri bwara tee oŋo, kala ti bakughu oleene. **40** Mu obo, bo bányana binkulu bi biikatehebe bwara mu madza ya bányaá bye mu mubu. Bo bányana si misyi mi mankaba ma maakabiri bwara. ŋa mbihi, bo bakuhubu nkpaá eko yi nene ku nkulu a bwara mpaala efulu etsiini bo ya ebiri bo ku mukogho a mubu. **41** Lo bo bábvuuulu ekumu e dzyele munsá mubu. Mutswi a bwara ákaghara mu dzyele ya bwara ka búfirikanyíi o. Etsulu kii mbihi étsanyama mu nkooro a mampo ma mubu ma mákagya mu mpini. **42** Bambumbulu bágwolo munkaana wu odzwa baara ba boloko. Mu kuulu bo báli a nzalamweē ti mfangolo mumō mu bo abwa mu madza, bara mu otsaba. **43** Lo mfumu a ekuru ki bambumbulu nkama ákahaba bo mu kuulu nde ákasagha obvwuhu Poole. Nde ágwi litumu kundaa ba basoolo otsaba mu obwa nsomo mu madza ya bapala ŋa nseghe. **44** Ba bake báfaana onama bo mu okumu mu yulu a mabaya, bwunu we bipa bi bwara. Obo me bu óbvughu baara bwohonono ya báto ŋa yulu a nseghe mukughu, gwene a epfwumu.

28 Bu libvwughu baba mukughu ya mweē, bihi líigyughu ti nkwumu a elyi ekye Malate. **2** Baara ba baakakala ŋa elyi ekye bábwana a bihi mu embwuru ki elagha. Bo bábvughu mbaa yi nene, báti bihi mbili mu oyagoro, mu kuulu mvulu ákanoō ya óli a mpie. **3** Poole átoló byeghe li nkwi ya átuubu lo ku mbaa. Mpili ásuru munsá byeghe lilo mu nkooro a kyanana, ánabara nde ŋa ekee. **4** Baara baba elyi bu bamono ntaala wu áakatsyi ŋa ekee e nde bábili bo-a-bo ti: «Nganyama, mbwuru wu baara aakadzwa! Nde aabvwughu

mu mubu, lo bunsumu bu Nzaami ka buli mu ogwa nde muswa mu okala mweē o.» **5** Poole ákubulu ntaala kunsá mbaa, lo nde ka ámono mpára o. **6** Baara báakebe omono bu oobyimi nyuru a nde, bwunu we ku aakpa nde nkaá. Bo bákebe edzighi elagha ya ka bámono ndagha yi a mpára yi áabwi mu nde o. Mu obo, bo básobo bitsimi, bábwí okabili ti nde li nzaami. **7** Bitaa-taa bibye, óli a mansie ma mfumu a elyi ekye. Nkwumu a nde áli Pubiliyuse. Nde ábwana a bihi kundaa nde ti anga bandughu ba nde, ya bihi lílulu bitsughu bitere ku nzo a nde. **8** Taara a Pubiliyuse áli a mukaama ya mumweē wu makili ákaluru nde. Poole áyitala nde ŋa mbughu ŋa ágyoŋomo nde, bu asamana, ánaá nde myaá, ya ádzuhu nde. **9** ŋa mbihi a mandagha mamo, baara bwohonono baba elyi ba báli a mabyele bágyi si kundaa nde, ya nde ádzuhu bo. **10** Bo bágwí bihi budziri bu bulagha ya mu matala ma lísomo bihi bwara mu ogye, bo bágwí bihi bilogho bi líli a bihi nzala a bye. **11** ŋa mbihi a bangoono batere, bihi lílgwolo bwara bu búluhu ndo yi a mpie yi alagha ŋa elyi. Bwara bubo búfi ku bvulu lili Aledzanderi, nkwumu a bo «Dyosokure», mbaala ti, «banzaami ba bali bambu». **12** Bihi lílito ŋa bvulu lili Sirakuse, ya lílulu bitsughu bitere oŋo. **13** Bu limara oŋo, bihi líinama mukogho a mubu, ya líiyito ku Rengyo. ŋa mbihi a etsughu emō, efulu kii ku Sude ébwi ofulu ya bihi líiyipala ku bvulu lili Punzolo mu bitsughu bye, **14** oko bihi límonono bandughu mu kana ba bábuono bihi mu oluhu bitsughu nsáama ya bo. Obo me bu líyato bihi ku Rome. **15** Bandughu mu kana baba ku Rome bu bagyughu mandagha ma líbwana a bihi, bágyi tee ŋa yu lili Apiyuse ya ŋa ebini ki baakata ti Manzo matere mu oyabwana a bihi. Poole bu amono bo, ábvurulu matuono kundaa Nzaami ya ábagha bukyini. **16** Mu matala ma líto bihi ku Rome, bágwí Poole muswa mu okala mu nzo yi a nde ngasighi ya bágwí nde mbumbulu wu áakabulukebe nde. **17** ŋa mbihi a bitsughu bitere, Poole áti bakwuru ba ba-Dzwife baba ku Rome mbili ku nzo a nde. Bu babvugunu, nde ályele kundaa bo ti: «Baana ba taara a me, me ka aangyighili ndagha si mó yi mbi kundaa baara ba bihi ya kundaa bipfu bi ekulu ki bataara ba bihi o, lo baasyimi me ku Yerusalemé ya baatyeghe me ŋa myaá mi ba-Romē. **18** Bo bu bamana ogwa me bifwulu, bo baakadzyi onyaá me, mu kuulu bo ka baabagha ebili ki

baadzwa me o. **19** Lo ba-Dzwife ka baakadzyi o, ya me aakaranduomo ti mukogho Sedzare alamana ndagha a me, gwene a okala a etsimi kii ofwunu baara ba ekaana e me. **20** Me mu obo me aanduomo omorono ya omoō ya be. Mu ngan̄ma, mu nkooro a kana li Isarayelee me ndi mu minkana mimi bisyeē mi.» **21** Bo bályele kundaa nde ti: «Bihi ka liigyagha mukaana si mumō wu aafi ku Yude mu nkooro a we o. Ka oli a mbwuru si mumō o mu bandughu mu kana wu aagwi bihi nsia bwunu we wu aalyele bihi mandagha ma mabi mu we. **22** Lo bihi lidzyi ti weme lyele bihi bitsimi bi we. Mu kuulu bihi ligyighili osoolo ti mu mambughu mwohonono, baara bali mu okatemene nsumu emvuvunu ki li mu okanabara we.» **23** Bo bási lagha li baafiribvuvunu ya Poole. Etsughu ekye bu eto, baara bágyi balagha ku nzo yi ákakala nde. Obaana epala tee nkonkolo, Poole ákaluo ya ákabaala mandagha mwohonono ma matala Emfumu e Nzaami. Nde ákasagha bu aapeene a bo mu kuulu bakihi mandagha ma ákalyele nde bo mu mi mitala Yiisu, obaana mu Mikyene mi Moyidze, tee mu mibighili. **24** Baara bana bákihi mandagha ma ákalyele nde bo, babake bábihi osa kana. **25** Mu matala ma bákabvughuru bo, bo-a-bo nkini áli ka bákagwihini o, ya Poole ábwehe ndagha yi: «Mufulu a Ngili ábili bubwe kundaa bataara ba be mu mubighili Edzayi.» **26** Nde ályele ti: «Gye yilyele kundaa baara babo: Be sa ligyighili ogyughu, lo ka libaghala o. Be sa ligyighili otala, lo ka limono o. **27** Mu kuulu mikolo mi baara ba ayi miikubu. Bo baakyihi matswi ma bo. Bo baadzwi mihi mi bo, mpaala banyaã omono mu mihi mi bo, banyaã ogyughu mu matswi ma bo, banyaã obaghala mu mikolo, mu obo, banyaã ogyiji mayele, mpaala me ndzuhu bo.» **28** «Be lifaana osoolo ti Nzaami aagweghe si nsia yi a obvwughu kundaa baala ka bali ba-Dzwife o. Bo, sa bagyughu!» [**29** Poole bu amana obili obo, ba-Dzwife bábvughuru mu okabulubanjana bo-a-bo]. **30** Poole áluhu bamvulu buolo mu nzo yi ofuru. Nde ákabwana baara bwohonono ba bákayamono nde. **31** Nde ákatsala nsia a Emfumu e Nzaami ya ákaluo mu kana lwohonono ya mu bumpoholo bwohonono mandagha ma matala Mfumu Yiisu-Kriste.

Rome

1 Me Poole, musala a Yiisu-Kriste, wu báti mbili mu okala ntumu ya wu básuolo mu otsala Nsia yi Mbwe yi a Nzaami. **2** Nzaami ágwi misiini mimi Nsia yi Mbwe yi kundaa mibighili mi nde mu Bisono bibi Ngili. **3** Yo yitala Mwana a nde, wuulu mu musunu li mu musyi a dzumu li Dabvide. **4** Baatwulu Yiisu-Kriste Mfumu a bihi Mwana a Nzaami ya lileene, bwunu a bu oli Mufulu wu bungili, mu nkooro a osighili o nde ŋa kara li ba bákpi. **5** Me mu nde, me aabagha bwehe baa okala ntumu mu obiri bitswumu byehene mu okala a bintamana bibi kana, mu nsia a nkumu a nde. **6** Behe si lili bamo mu baara ba bo, be ba ooti Yiisu-Kriste mbili. **7** Me nsono mukaana wu kundaa be bwohono ba lili mu bvulu lili Rome, be ba ookadzyi Nzaami mu mukolo ya ba áti nde mbili mu okala baba ngili: Nyaã bwehe ya edzuunu, bi bifi kundaa Nzaami Taara a bihi ya kundaa Mfumu Yiisu-Kriste bikala ya be. **8** Nsomo, me mbvurulu matuono kundaa Nzaami a me mu Yiisu-Kriste mu nkooro a be bwohono, mu kuulu bali mu okabili mu kana li be mu nsie nsyini. **9** Nzaami, wu aakansalala me mu mukolo mumō mu Nsia yi Mbwe yi a Mwana a nde, li mpughulu a me ti me aakantsimi mu be matala mwohono ma aakantsamana me. **10** Mu nsamana a me, me aakanduomo waa li Nzaami, mpaala me mbagha mpeene yi ogya kundaa be. **11** Mu kuulu me ndi a nzala a omono be ku olagha, mpaala me ngyaha be ekaba kii mufulu, ekaba kii bwehe mu kuulu be ligwama. **12** Bwunu we mpaala, kundaa be, bihi bwohono libagha bukyini, nswe mbwuru mu kana lili ndaa wu muke. **13** Bandughu ba me mu kana, me ndzyi be lisoolo ti matala malagha me aakantsimi ogya kundaa be, mu obagha mana bimburu kundaa be ya kundaa bitswumu bibike. Lo tee sonali, bali mu okakahaba me. **14** Me ndi a ebyimi kundaa ba-Ngereke ya kundaa banzyi, kundaa bansughu ya kundaa ba bagwene soolo mandagha. **15** Mu obo me ndi a maangu nzala a otsala Nsia yi Mbwe kundaa behe si ba lili ku Rome. **16** Mu kuulu me ka ndi a budzwa bu Nsia yi Mbwe o, mu kuulu yo yili lileene li Nzaami mu obvwughu o nswe munde wu aasa kana, nsomo mu-Dzwife, ŋa nseele mu-Ngereke. **17** Mu kuulu, me yo yiikasuo bu ookasa Nzaami

baara bunsumu mu nzili a kana ya mu nkooro a kana, ti bwunu a bu básono ti: «Munde wuli wu a nsumu mu nkooro a kana sa akala wu a mweē.» **18** Mu obo, obaana ku yulu, nkehe a Nzaami yili mu okamoŋono kundaa baara ba bagwene a enzaami ya ba bagwene a bunsumu, ba baakasweghe engarŋma kunsu ogwene a bunsumu. **19** Mu kuulu mandagha ma bakughu osoolo mu Nzaami mali mu okamoŋono ŋa kara li bo. Me Nzaami aasuo bo mo. **20** Mu obo, mandagha ma maagwene okamoŋono kundaa nde, mbaala ti, lileene li nde lili mibvu ya mibvu ya bunzaami bu nde, maagyighili okamoŋono obaana ku bágyighili nsie, mu matala ma ookasa mayele lisobo mu bigyighili bi nde. Me mu obo bo ka bakughu obagha obvwughu o, (aídios g126) **21** mu kuulu bu basoolo Nzaami, bo ka baasyighi nde ti anga Nzaami o, ya ka baabvurulu nde matuono o. Lo bo bágwuŋumu kunsu bitsimi bi bigwene a mupfunu ya mikolo mi bo mi migwene a mayele miisomo kunsu mpyibi yi a laŋa-laŋa. **22** Bu batsimi ti bo bali bansughu, bo ayi banga-a-lala, **23** ya bo baasobo nsia a Nzaami wu aagwene okakpa mu bidzili a dzili bi bili efaana e mbwuru wu aakakpa, kii banjmini, kii banyama ba bali a myili mina ya kii banyama ba baakagye mu etulu. **24** Me mu obo Nzaami anyaghala bo mu okala kunsu mandagha mama osuŋumu mu dzyi li mikolo mi bo, mpaala bo-a-bo banyaã ogwa manyuru ma bomu budziri. **25** Bo baasobo engarŋma e Nzaami mu mpya, ya baakabuono bilogho bi ógyighili Nzaami, bu baakasamana bye ŋa ebini e ndeme. Masyighi kundaa nde mu mibvu ya mibvu! «Aamene!» (aiōn g165) **26** Me mu obo Nzaami aatyeghe bo mu dzyi li mandagha ma maakatwuhu budzwa. Mu obo, bakaha ba bo ka baafirikabvughu mbughu ya babaghala o, lo baakabvughu mbughu ya bambaala bakaha. **27** Bumō si kundaa babaghala, bu banyaã ofirikabvughu mbughu ya bakaha, bo baalughulu mu mbaa a dzyi li okabvughu mbughu bo-a-bo, mu okagyighili mandagha mama bupfiri babaghala ya babaghala, ya bo baabagha mu manyuru ma bo masyeme ma mafaana ya ogwuŋumu o bo. **28** Mu kuulu bo baatsimi ti ka oli bubwe mu osoolo Nzaami o, Nzaami aatyeghe bo ku mayele ma bo ma magwene a bansughu. Me mu obo bo baakagyighili mandagha ma magwene ofaana. **29** Bo balwulu mu mandagha mama mawamawa ma magwene a bunsumu, mu mokolo

bubi, mu ntono a nzi, mu okagyighili mandagha ma mabi, bo balwulu mu musogho, mu odzwa baara, mu mumbanjana, mu bintwaã, mu bipfu bi bibi, mu okaburulu banganda mandagha, 30 mu okabili bubi mu banganda, mitaara mi Nzaami, banga a enjma, banga a ligwagha, banga a mubili a nyuru, banga a bitsimi bubi, ba baakabihi litumu li ba báburu bo. 31 Bo ka bali a mayele o, ka baakanama mukih wu bálabá o, ka bali a nyií o, ka bali a ngebe o. 32 Ya ngu okala ti bo basoolo ti Nzaami ákehe baara ba baakagyighili mandagha mama obo lipfu, bo ka yini a ogyighili baakagyighili mo o, lo bo baakakihi si ba baakagyighili mo.

2 We, nswe ka nande we li, we wu aakalamana baara, ka bakughu osa we kolokolo o. Mu kuulu, we wu aakalamana babake, ya weme si aakagyighili mandagha maana mamo, we nyuru a weme aakasyeme. 2 Ankoho bihi lisoolo ti olamana o Nzaami oli kuu nganjma kundaa baara ba baakagyighili mandagha mama obo. 3 We wu aakalamana ba baakagyighili mandagha mama obo, ya weme si aakagyighili mo, we bunu tsimi, ti we sa bvwughu mu mumfwunu a Nzaami? 4 Bwunu we, we wu aakatsaala busini bubu bubwe bu Nzaami, mukolo a nde wu munene okuru mukolo a nde mu okebe, we ka soolo o ti bubwe bu Nzaami bufaana obiri we ku ogyinji mayele? 5 Mu nkooro a mutswi mpini a we, we li mu okabihi ogyinji mayele. Me mu obo we li mu okakuw njá yulu a weme nkehe yi nene mu etsughu ki akala oomono nkehe ya mumfwunu a Nzaami wu bunsumu, 6 wu «akala aabvurulu kundaa nswe mbwuru bwunu a bu oli bigyighili bi nde». 7 Nzaami sa agwa laama lili mibvu ya mibvu kundaa babo baala mu mukama a bo wu okasa bubwe, bo baakasagha nsia, budziri ya bumweé bu buugwene okafa. (aiónios g166) 8 Lo Nzaami sa asyeme mu nkehe yi alagha babo ba baakanama bitsimi bi bomo, baakabihi enganjma ya bali kunsá litumu li mandagha ma magwene a bunsumu. 9 Mpara ya minyoó kundaa nswe mbwuru wu aakasa mandagha ma mabi, nsomo kundaa mu-Dzwife, ya kundaa mu-Ngereke si. 10 Lo Nzaami aakagwa nsia, budziri ya edzuunu kundaa nswe munde wu aakasa bubwe, nsomo kundaa mu-Dzwife, njá nseele kundaa mu-Ngereke. 11 Mu kuulu Nzaami ka ali a munsuulo mu baara o. 12 Baara bwohono ba baasi masumu gwene a Mikyene osoolo,

sa bapfighili si gwene a Mikyene. Ya baara bwohono ba baasi masumu kunsá Mikyene, sa balamana bo mu Mikyene. 13 Mu kuulu, ka oli baara ba baakagyughu Mikyene bali baba nsumu njá busu bu Nzaami o, lo babo ba baakasala Mikyene baakala baba bunsumu. 14 Mu matala maala baara baala ka bali ba-Dzwife o, ba bagwene soolo Mikyene, baakasala mi ookatumu Mikyene, mono ti anga bo bali a Mikyene mu mikolo mi bo, ankoho bo ka basoolo Mikyene o. 15 Bo baakasuo ti bigyighili bi ookatumu Mikyene básono bye munsá mikolo mi bo. Embwuru e bo eekasuo si bumpughulu mu bo, bumó si ya bitsimi bi bo biili matala mana biikafwunu bo ya matala ma make biikakala bo. 16 Mandagha mamo sa mamono mu etsughu ki oolamana Nzaami mansweghe ma baara mu Yisú-Kriste, ti bwunu a bu oli Nsia yi Mbwe yi aakansala me. 17 Lo kala ti we wu li a nkwwumu yi a mu-Dzwife, we aasinji mu Mikyene ya li a mutwunu mu Nzaami a we, 18 we wu soolo waa li nde, Mikyene miiluo we bu osuulo bubwe bu ofaana osa mbwuru, 19 we wu aakatsimi ti we li mumbiri a binkpa-mihi, otsyeme o ba bali kunsá mpyibi yi a laja-laja, 20 muluo a ba bagwene a ligyhaba ya muluo a bike-bike, mu kuulu we akatsimi ti mu Mikyene we li a ligyhaba ya enganjma. 21 Lo we, wu aakalu babake, we ka li mu okalu weme o! We wu aakalu ti ka bafaana oturu o, we li mu okaturu! 22 We wu aakalighi ti ka bafaana obvughu mbughu ya mukala bwunu we mulumu a nganda-mbwuru o, we li mu okabvughu mbughu ya mukala bwunu we mulumu a nganda-mbwuru! We wu aakabele bityeghe, we aakagwolo bilogho bi bili mu bibini bi baakasamana bye! 23 We wu li a mutwunu mu Mikyene, we ka aakagwa Nzaami budziri o, bu aagwene okasalala Mikyene! 24 Mu kuulu básono ti: «Me mu nkooro a be bikaana bi banzyi biikatsaala nkwwumu a Nzaami.» 25 Mu enganjma, osomo nzo a mbaa oli mupfunu kala ti we aakasala Mikyene. Lo kala ti we aakatsumunu Mikyene, we li ti anga mbwuru wu áagwene osomo nzo a mbaa. 26 Kala ti mbwuru wu áagwene somo nzo a mbaa aakasala litumu li Mikyene, Nzaami ka kughu otala nde ti anga mbwuru wu áasomo nzo a mbaa o? 27 Mbwuru wu áagwene osomo nzo a mbaa mu nyuru a nde, wu aakasala Mikyene, ka akala alamana we o, we wu aakatsala mye, ngu okala ti we li a mukaana a Mikyene ya aasomo nzo a mbaa?

28 Mu-Dzwife wu a nganjma ka oli munde wu aakamono mu mihi o, ya osomo nzo a mbaa kuu nganjma ka oli eliyimi ki baakamono mu nyuru o. 29 Lo mu-Dzwife wu a nganjma me munde wu li mu-Dzwife kunsu mansweghe. Osomo nzo a mbaa o nde oli kuu mukolo ku ookagwa Mufulu a Nzaami, lo ka oli kuu mukaana wu básono o. Mu-Dzwife wu a nganjma munde ka aakabagha masyighi ma maakafa kunda baara o, lo ma maakafa kunda Nzaami.

3 Mu obo, mu emakye okala mu-Dzwife obvulu bitswumu bibike? Mupfunu wu osomo nzo a mbaa njana-ajo ali? 2 Mupfunu li wu munene mu mandagha malagha! Mu kuulu, nsomo, kunda ba-Dzwife Nzaami ágwi Ndagha a nde okebe. 3 Lo emakye? Kala ti ba-Dzwife babake bagwene a kana, ogwene a kana o bo okughu osa kuulu ti Nzaami anyaa okebe mukih wu álaba nde? 4 Si okala ka bunu! Nyaá Nzaami akala wu a nganjma ya nswe mbwuru akala nga-a-mpya, ti bwunu a bu básono ti: «Mpaala bamono we wu bunsumu mu mandagha ma we», «ya we lughulu nj baakasa we muyala». 5 Lo kala ti ogwene a bunsumu bu bihi-a-be buukasuo empakala bunsumu bu Nzaami, mayo bihi liileye? Nzaami ka li a bunsumu o nj aakakolo nde nkehe? Me mu embwuru ndi mu okabili. 6 Si okala ka bunu! Kala pele, lo bunu a bo Nzaami akala aalamana nsie? 7 Lo kala ti mu mpya a me enganjma e Nzaami eli mu okakulu mu nkooro a nsia a nde, lo mu emakye bali mu ofirilamana me ti anga nga-a-masumu? 8 Ya mu emakye ligwene oleye ti anga bu ookatsimi ba baakapfiri mpya ndiri bihi liikaluo ti: «Bihi-a-be litswe likasa o bihi bubi mpaala bubwe bumono mu bo!» Baara baba obo bafaana osyeme bo. 9 Lo bunu odzyi oleye? Bihi-a-be ba-Dzwife libvulu bikaana bibike? Komo pele! Mu kuulu bihi liitswama osuo ti: baara bwohono, ba-Dzwife ya ba-Ngereke, bali kunsu litumu li masumu. 10 Bwunu a bu básono ti: «Ka oli a mbwuru wu a nsumu o, ka oli a si mumō o, 11 Ka oli a mbwuru si mumō wu li a mayele o, ka oli si mumō wu aakasagha Nzaami o. 12 Bo bwohono baagwujumu, mu emvughu bo ayi baara ba baagwene okasa dzyi li Nzaami, ka oli a si mbwuru mumō wu aakasa bubwe o, ka oli a si mumō o. 13 Miguolo mi bo mili ti mpyeme yi a bwaha, bo baakasalala manzalisogho mabo mu okapfiri mpya, mu bibolo bi bo oli a misuo

mi mpili, 14 mijma mi bo milwulu mu bipwolo ya mu mandagha mama nkala. 15 Myili mi bo mileje mu okabulutsala makili, 16 mu manzili mwohono ma baakaluru bo, bo baakatsala bilogho byehene ya baakasihi nyii, 17 bo nkini ka bamaagyahaba nzili yi a edzuunu o. 18 Budziri bu Nzaami ka buli nj mihi mi bo.» 19 Ankoho bihi lisoolo ti mandagha mwohono ma ookalyele Mikyene, mye miikalyele mo kunda baara ba bali kunsu litumu li Mikyene, mpaala nswe mujma akala wu a nkunkuru, ya nsie yohono yikala a ebili nj busu bu Nzaami. 20 Me mu obo ka oli a mbwuru wu aakala wu a nsumu nj nkulu a Nzaami mu bigyighili bi Mikyene o, buulu Mikyene yini a ligyahaba li masumu miikagwa. 21 Lo mu matala ma, gwene a mikyene, Nzaami aasuo bihi-a-be bu aakasa nde bihi-a-be baba nsumu nj nkulu a nde. Mikaana mi Mikyene ya mibighili miikasuo bumpughulu mu yo. 22 Baara bwohono ba baakasa kana Nzaami aasi bo bunsumu mu nkooro a kana li bo mu Yiiisu-Kriste. Mu kuulu ka oli a lisobo nj kara li bo o: 23 Mu kuulu bo bwohono baasi masumu, ya baagwene obagha nsia a Nzaami. 24 Lo gwene a ofiri nzi, baasi bo baara baba bunsumu mu bwehe bu Nzaami, mu nzili a okwulu ku oli mu Yiiisu-Kriste. 25 Nzaami aasuolo nde ti anga ekaba kii ofughu masumu mu makili ma nde, mu nzili a kana, mu osuo bunsumu bu nde. Mu kuulu nde ka ásyeme masumu ma ósi baara mu nsi-nkulu o 26 mu kuulu nde li a mukolo wu munene. Nzaami aadzyi osuo bunsumu bu nde mu matala ma, nde li wu a nsumu, bu atwulu munde wu si kana mu Yiiisu nsumu. 27 Ndagha yi okasa mutwunu njana yili? Pele, yo ka yifaana okala o! Mu nki mikyene? Mu mikyene mi bigyighili? Pele, lo mu mikyene mi kana. 28 Mu kuulu bihi litsimi ti Nzaami aakasa mbwuru akala wu bunsumu mu kana, gwene a osalala mi mikyene. 29 Bwunu we, Nzaami li yini a wu a ba-Dzwife? Nde ka li si Nzaami a baala ka bali ba-Dzwife o? Eē, nde li si Nzaami a baala ka bali ba-Dzwife o, 30 kala ti oli nganjma ti Nzaami li yini a ngamumō: Me nde aasa ba básomo nzo a mbaa ya ba ágwene osomo nzo a mbaa bakala baara baba bunsumu mu kana. 31 Mu obo, limaha oko Mikyene mu nkooro a kana? Si okala ka bunu! Lo bihi ligyighili onyeme ti Mikyene mikala.

4 Mu obo, bihi emakye liilyele mu Abarahame, a nkagha-kwuru a bihi mu musunu? Nde emakye ábagha? **2** Mu kuulu, kala mu bigyighili Nzaami ási ti Abarahame akala wu bunsumu, nde kughu okala a mutwunu. Lo ña nkulu a Nzaami ka oli obo o! **3** Mu kuulu, Bisoño emakye biikalyele? «Abarahame ási kana mu Nzaami, me mu lo Nzaami ákala nde ti anga mbwuru wu bunsumu.» **4** Ankoho kundaa munde wu si esala, ka bakughu otala mufuru a nde ti anga bwehe o, lo mufuru a nde li ti anga ebyimi ki bafaana ofiri nde. **5** Lo kundaa munde wuulu ka aasi esala o, lo si kana mu Nzaami wu aakasa ti nga-a-masumu akala wu bunsumu, Nzaami aakatala nde ti anga mbwuru wu bunsumu mu nkooro a kana li nde. **6** Me mu obo si, Dabvide ali mu okabili mu esee kii mbwuru, wuulu Nzaami aakakihi nde ti anga wu bunsumu gwene a otala bigyighili bi nde: **7** «Esee kundaa babo ba oosi Nzaami bubi bu bo kolokolo ya ba aamaha nde masumu ma bo! **8** Esee kundaa mbwuru munde wuulu Mfumu ka aakatala masumu ma nde o!» **9** Esee ekye eli yini a kii ndaa baara ba básomo nzo a mbaa, bwunu we kii ba bagwene osomo si nzo a mbaa? Mu kuulu bihi lilyele ti: Kana li Abarahame lísi ti Nzaami atala nde ti anga mbwuru wu bunsumu. **10** Mu nki matala Nzaami ákala nde ti anga nde mbwuru wu bunsumu? Nsomo a nsomo, bwunu we ña mbihi a ña ásono nzo a mbaa o? Pele, ka ña mbihi o, lo nsomo nde ásono nzo a mbaa! **11** Abrahame ágyagha elyimi kii osomo nzo a mbaa ti anga enyeme kii bunsumu bu ábagha nde mu kana, mu matala maala nde nkini ka áli asomo nzo a mbaa o. Mu obo, nde li taara a baara bwohonon babo ba bali a kana wene a osomo nzo a mbaa, mu kuulu batala boho si ti anga baara baba bunsumu. **12** Nde li si taara a ba básomo nzo a mbaa – ka oli yini a ba básomo nzo a mbaa o, lo ba baakadzyara mu bitaama bi kana li óli a Abarahame, taara a bihi, mu matala maala nde nkini áli ka ásono nzo a mbaa o. **13** Mu obo, ka mu nzili a Mikyene Nzaami ásiini a Abarahame, bwunu we musyi a dzumu li nde, mu ogwolo pfa li nsie o, lo mu nzili a bunsumu bu kana. **14** Mu kuulu, kala ti ba baakagwolo pfa baakagwolo lo mu nzili a Mikyene, lo kana ka lifirisyili a mubwughu o ya misiini ka mifirisyili a mupfunu o. **15** Mu kuulu, Mikyene miikatubulu nkehe a Nzaami, ya ña ebini kiili Mikyene we, ka oli ya otsala ku Mikyene o. **16** Mu obo, me mu nkooro

a kana baakagwolo pfa, mpaala bukala bwehe ya misiini mikala mimi bwohonon ba bali mu musyi a dzumu li Abarahame. Ka yini a mu nkooro a babo ba baakasala mikyene o, lo si mu nkooro a ba baakasa kana ti bu ósi Abarahame kana, taara a bihi bwohonon, **17** bwunu a bu básono ti: «Me aansie we taara a bikaana bilagha.» Nde li taara a bihi, ña nkulu a munde wu ási nde kana, Nzaami wu aakagwa bumweé kundaa baara ba bákpí ya wu aakasa ti bilogho biili ka bili o, bikala. **18** Nde ási emiini ñaala ka bakughu osa emiini o, nde ási kana ya mu obo nde ayi taara a bikaana bilagha, ti bwunu a bu bályele ti: «Obo bu ookala musyi a dzumu li we.» **19** Nde ka ányaá osa kana o, nde ámonon nyuru a nde ti anga yo ayi yiikpi – ngu okala ti nde áli ku bele a bamvulu nkama – ya mweé a Sara ka ali afirisyili a mbaa o. **20** Lo ña nkulu a misiini mi Nzaami, nde ka ási makeñe o, mu ogwene osa kana, lo nde bu ábagha lileene mu kana ágwi masyighi kundaa Nzaami. **21** Nde áli a kana lili mukughu ti, mi ookasiini a nde Nzaami, Nzaami li a lileene lii ogyighili mye. **22** Me mu obo bátala nde ti anga mbwuru wu bunsumu. **23** Lo ka yini a mu nkooro a nde ngasighi básono o ti: «Me mu obo bátala nde ti mbwuru wu bunsumu,» **24** lo mu nkooro a bihi si, bihi baala kana li bihi sa batala lo, kundaa bihi ba liikasa kana mu munde wu ásiili Mfumu a bihi Yiisu ña kara li ba bákpí. **25** Yiisu, wu bátyeghe mu nkooro a bubi bu bihi ya básili nde ña kara li ba bákpí mpaala bihi likala baara baba bunsumu.

5 Me mu obo, bu lili baara baba bunsumu mu nkooro a kana, bihi-a-be lili mu edzuunu ya Nzaami mu Mfumu a bihi Yiisu-Kriste. **2** Me mu nde bihi liibagha nzili mu kana mu ogyagha bwehe bubo bu lili bihi munsa bo, ya bihi liisi mutwunu a bihi mu emiini kii nsia a Nzaami. **3** Ña yulu oño, bihi liikasa mutwunu mu mpara a bihi, bu lisoolo ti mpara yiikaburu nkaá, **4** nkaá yiikasa ti mbwuru akebe mukihi wu alaba, ngu okala ti nde li kunsá bigyele, okebe mukihi wu alaba ookagwa emiini. **5** Ankoho, emiini ka eekagwa bupfiri o, mu kuulu baagyirili dzyi li Nzaami mu mikolo mi bihi mu Mufulu a Ngili wu baagwi bihi. **6** Mu kuulu, ñaala bihi áli nkini mpini we, Kriste ákpí mu nkooro a banga-a-masumu mu matala ma ókuru Nzaami. **7** Oli mpara ti mbwuru akihi lipfu mu nkooro a mbwuru wu a nsumu, ampe mbwuru kughu

obagha bukyini mu okpa mu nkooro a mbwuru wu mubwe. **8** Lo limono, bu oosuo Nzaami dzyi li nde mu bihi-a-be: Kriste ákpi mu nkooro a bihi-a-be ñaala bihi-a-be áli nkini banga-a-masumu. **9** Ya mu matala ma, maala bihi-a-be ayi lili baara baba bunsumu mu makili ma nde, oli nganma ti Yiisu sa abvwuhu bihi-a-be mu nkehe a Nzaami. **10** Mu kuulu, kala ti ña lili bihi-a-be mitaara mi Nzaami, Nde ábvurulu ogwihini o nde ya bihi-a-be mu lipfu li Mwana a nde, lo bunu bihi-a-be ligwene obvwughu mu bumweé bu mwana a nde, bu liibvurulu ogwihini ya nde. **11** Ña yulu orjo, bihi liikasa mutwunu a bihi mu Nzaami, mu Mfumu a bihi Yiisu-Kriste. Mu nde bihi liigyagha obvurulu ogwihini mu matala ma. **12** Me mu obo, bwunu a bu oosomo lisumu mu nsie mu nzili a mbwuru mumō, ya mu nzili a lisumu lipfu liisomo mu nsie, bwunu obo si lipfu liisomo mu baara bwohono, mu kuulu bwohono baasi masumu... **13** Mu kuulu, tee mu matala ma oli Mikyene, masumu máli mu nsie, lo ka baakatala masumu o ñaala Mikyene mye we. **14** Lo komo, obaana Adā tee Moyidze, lipfu lili a litumu, ngu okala ña yulu a ba bágwene osa masumu mu nzili a otsumunu ngili ti anga bu ósi Adā, nde wu li efaana ki munde wu faana ogya. **15** Lo ekaba kii bwehe ebvulu bubi bu ósi Adā mu mupfunu. Mu kuulu, kala ti mu bubi bu mbwuru mutsyini lipfu lisomo mu mampwumu ma baara, lo bwehe bu Nzaami ya ekaba kii bwehe ki bágwi mu bu mbwuru mutsyini, Yiisu-Kriste, épfini ku obvulu olagha ña yulu a mampwumu ma baara. **16** Lo ekaba ki ka eli bwunu a bu oli lisumu li mbwuru mutsyini o. Mu kuulu, mu nkooro a lisumu li mbwuru mutsyini mumfwunu áyafa mu masyeme, lo ekaba kii bwehe bu Nzaami mu nkooro a masumu ma malagha ekaba e bwehe égyi ya émaha masyeme. **17** Mu kuulu, kala ti mu nkooro a bubi bu mbwuru mutsyini lipfu likatumu mu nde ngasighi, lo mu Yiisu-Kriste ngasighi bihi liibagha ku obvulu: Bwohono ba baakagyagha bwehe bu Nzaami ba bulagha ya ekaba kii bunsumu, sa bakala bumweé ya bakatumu yini a mu Yiisu-Kriste. **18** Me mu obo, buulu mu bubi bu mbwuru mutsyini masyeme mábwi mu baara bwohono, me obo si mu egyighili emō kii bunsumu, ki ekughu osa mbwuru wu a bunsumu, égyi mu ogwa laama kundaa baara bwohono. **19** Mu kuulu, bwunu a bu óbwi mampwumu ma baara mu masumu

mu nkyini a mbwuru mutsyini, bwunu obo si mu bintamana bi mbwuru mutsyini, sa basa mampwumu ma baara makala mama nsumu. **20** Ankoho Mikyene mígyi mpaala bubi bupfini, lo ña ebini ki oopfini masumu, ñaana-orjo si bwehe buubvulu opfini. **21** Mpaala, bwunu a bu ookatumu masumu mu lipfu, bwunu obo si bwehe buukatumu mu bunsumu, mu laama lili mibvu ya mibvu mu Yiisu-Kriste, Mfumu a bihi. (aiōnios g166)

6 Bihi nki ndagha liilyele? Bihi lifaana okakala munsu masumu mpaala bwehe bupfini? **2** Si okala ka bunu! Buulu bihi-a-be lili ba bákpi mu masumu, bunu-abo likughu ofirilaama munsu masumu? **3** Be ka lisoolo o ti bihi-a-be bwohono báboghoru bihi mu okala emo mu Yiisu-Kriste? Mu obo, me mu okala emo mu lipfu li nde báboghoru bihi-a-be. **4** Mu liboghoru, baadzyighi bihi mu okala emō ya nde mu lipfu li nde, mpaala bwunu a bu oosighili Kriste ña kara li ba bákpi mu lileene li nsia a Taara, bwunu obo si bihi-a-be liikabuludzyara munsu bumweé bu bunyaghara. **5** Mu kuulu, kala ti Nzaami aasi bihi-a-be likala ti anga Yiisu mu lipfu li nde, nde sa asa kuulu ti bihi-a-be likala si ti anga Yiisu mu osighili o nde mu lipfu. **6** Bihi-a-be lifaana osoolo ti mbwuru wu mukulu wu áli mu bihi-a-be baakomo nde ña kuruwa ya Kriste, mpaala Nzaami amana mpini a nyuru yi masumu yi, ya bihi-a-be liinyaá ofirikala bankana ba masumu. **7** Mu kuulu, munde wu aakpi baakwulu nde mu masumu. **8** Ankoho kala ti bihi-a-be liipki emō ya Kriste, bihi lisi kana ti bihi-a-be sa likala mweé ya nde, **9** bu lisoolo ti Kriste bu ásighili ña kara li ba bákpi ka akala afirikpa o. Lipfu ka lifirisiyili a litumu mu nde o. **10** Mu kuulu, kala ti nde aakpi, me mu nkooro a masumu ma baara nde aakpi sa limō. Ya mu matala ma nde li mweé, nde li mweé mu nkooro a Nzaami. **11** Bumo si mu be, be likala ti anga be liipki mu nkooro a masumu ya be likala mweé mu Yiisu-Kriste, mu nkooro a Nzaami. **12** Mu obo, masumu manyaá ofiritumu manyuru ma be ma maakakpa. Ka likala a bintamana mu okasa dzyi li manyuru ma be o. **13** Ka ligwa manyuru ma be mu osalala masumu ti anga edzwana mu osalala bubi o. Lo be beme ligwa manyuru ma be kundaa Nzaami ti anga baara baba mweé ba basighili ña kara li ba bákpi, ya lisa manyuru ma be makala ti anga edzwana

mu osalala bunsumu. **14** Mu kuulu, masumu ka mafirikala a litumu ŋa yulu a be o, mu kuulu be ka lili kunsu litumu li Mikiyene o, lo kunsu litumu li bwehe. **15** Bihi nki ndagha liilyele? Likasa o bihi masumu mu kuulu ka lili kunsu litumu li Mikiyene o, lo kunsu litumu li bwehe? Si okala ka bunu! **16** Be ka lisoolo o ti kala ti be likihi osalala mbwuru ti anga bankana, mu okala a bintamana mu nde, be ayi bankana ba mbwuru munde wu liikihi be bintamana osa? Bankana ba masumu ma maakabiri ku lipfu, bwunu we bankana ba bintamana bi biikabiri ku bunsumu? **17** Lo matuono kundaa Nzaami, ŋa mbihi a ŋa liili be bankana ba masumu, mu matala ma, be liisi bintamana mu mikolo mi be myehene mu maluo ma baagwi be. **18** Bu baakwulu be mu masumu, be ayi lili bankana ba bunsumu. **19** Me mu embwuru ndi mu okabili, bu nsoolo ti be ka liibakabaghala mandagha o: Mu kuulu, bwunu a bu ligwi be manyuru ma be mwohonono kunsu bunkana mu osalala osunjumu ya bubi, mu osini mu bubi bu bubvulu, bwunu obo si mu matala ma, litwulu manyuru ma be mwohonono kunsu bunkana bu bunsumu mu osini mu laama li liikagwa Nzaami esee. **20** Mu kuulu, mu matala ma lili be bankana ba masumu, be lili bunya-nyaā ŋa nkulu a bunsumu. **21** Nsa mufuru be libagha mu matala mamu? Mandagha maala be lili a bupfiri mu mo lolo li, mu kuulu masini ma mo me lipfu. **22** Lo mu matala ma, bu baakwulu be mu masumu, be ayi bankana ba Nzaami, bimburu bi lili a be me laama li liikagwa Nzaami esee ya masini ma be me laama lili mibvu ya mibvu. (aiōnios g166) **23** Mu kuulu mufuru a masumu li lipfu. Lo ekaba kii bwehe, ekaba e Nzaami me laama lili mibvu ya mibvu mu Yiisu-Kriste, Mfumu a bihi. (aiōnios g166)

7 Bandughu ba me mu kana, me kundaa baara ba basoolo Mikiyene me ndi mu okabili. Be ka lisoolo o ti Mikiyene mili a litumu ŋa yulu a mbwuru, mu matala mwohonono ma ali nde mweē? **2** Mu obo, mukala li a munama ya mulumu a nde mu mikiyene mi mabala mu matala mwohonono maala mulumu a nde li mweē. Lo kala ti mulumu a nde kpi, mukaha ka afirisyili kunsu mikiyene mi mabala mi miikabvughu nde munama ya mulumu a nde o. **3** Kala ti mu matala maala mulumu a nde li mweē, baghala mukimi firikie nde, baghala munde faana ofiri

bukala mu kuulu nde aabvughu mbughu ya mukala a nganda-mbwuru. Lo kala ti mulumu a nde kpi, nde ka afirisyili kunsu Mikiyene o. Mu obo, nde ka aabvughu mbughu ya mulumu a nganda-mbwuru o kala ti nde ayi mukala a baghala mukimi. **4** Mu obo, bandughu ba me mu kana, behe si bádzwi be mu mi mitala Mikiyene mu kuulu be lili emo ya Kriste mu lipfu li nde. Mu bu, be lili baba ndaa mbwuru mukimi, munde wu áasighili ŋa kara li ba bápki, mu kuulu bihi-a-be likagyighili mandagha ma maakagwa Nzaami esee. **5** Mu kuulu, mu matala ma lili bihi-a-be kunsu litumu li musunu, bihi-a-be lili a dzyi li okasa masumu mu nzili a mikiyene, ya dzyi lilo, likasala mu manyuru ma bihi mwohonono. Ya bihi-a-be likasa mandagha ma maakabiri ku lipfu. **6** Lo mu matala ma, bihi-a-be ka lifirisyili kunsu litumu li Mikiyene o. Ngu okala ti bihi-a-be lili bankana, ka mu litumu li likulu, lili Mikiyene mi basono o. Lo bihi-a-be lili bankana mu litumu li linyaghara lili Mufulu Ngili. **7** Bihi nki ndagha liilyele? Mikiyene mili masumu? Si okala ka bunu! Lo yini a mu nzili a Mikiyene me aansoolo masumu. Mu obo, me ka ákaansoolo sughu li mukolo o, kala ti Mikiyene ka mikalyele o ti: «We ka sughu mukolo o.» **8** Mu obo, masumu bu mabagha mpeene, maaburu mu me mu nzili a mukiyene, sughu li mukolo lili mawa-mawa. Mu kuulu, wene a Mikiyene, masumu maakpi. **9** Mu matala ma makulu, me áandi mweē wene a Mikiyene. Lo mikele bu migyi, masumu mabagha bumweē, **10** ya me, me aankpi. Mu obo, mukele wu aakabiri ku laama, aatsiini me ku lipfu. **11** Mu kuulu, mu mikele, masumu maabagha mpeene yi opfiri me, ya mu mye, masumu maadzwi me. **12** Obo me buulu, Mikiyene mili mimi ngili ya mikele mili mimi ngili, mimi nsumu ya mi mibwe. **13** Mu obo, kundaa me bubwe ayi lipfu? Si okala ka bunu! Obo me bu oosuo lisumu maangu-efa e lo, lo liisalala bubwe mu obiri me mu lipfu. Mpaala mu mukele, lisumu limorjono mu lileene li lo lwohonono. **14** Mu kuulu, bihi-a-be lisoolo ti Mikiyene mili mufulu. Lo me, me ndi mbwuru wu li a nyuru yi musunu, wu bátyeghe kundaa masumu. **15** Mu kuulu, me ka ndi mu okabaghala mandagha ma ndi mu ogyighili me o. Ndagha yi ndzyi me, me ka ndi mu okagyighili yo o. Lo yi aangwene okadzyi me, me yi ndi mu okagyighili me. **16** Lo kala ti ndagha yi aakangyighili me ngu yi aangwene

okadzyi me, me ndi bitsimi bimō ya mikyene, mu olyele ti mye mili mi mibwe. **17** Mu matala ma, ka ofirisiyili me meme ndi mu okagyighili mandagha mamō o, me lisumu li lili mu me li li mu okatumu me mo okagyighili. **18** Me nsolo yo ti mu me ka oli a ndagha yimbwe o, ma mbaala ti munsā nyuru a me. Mu kuulu mu me, me nkughu okala a bitsimi bii osa bubwe, lo me ka ndi a mpini mu osa bo o. **19** Me ka aakansa bubwe bu aakandzyi me o, lo me aakansa bubi bu aangwene okadzyi me. **20** Kala ti me ngyighili ndagha yiili me ka ndzyi yo o, ka me ndi mu ofirikagyighili yo o, lo lisumu li lili mu me lili mu okagyighili yo. **21** Mu obo, me wu ndzyi osa bubwe me aabaghala mukyene wu: Ndagha yi nkughu me osa yina bubi. **22** Mu kuulu, munsā mukolo a me, me aankamono esee mu Mikyene mi Nzaami, **23** lo munsā nyuru a me yohono me aakamono mukyene mukimi wu aakadzwana ya munde wu li emo ya mayele ma me. Nde aakasa me nkana a mukyene a lisumu li lili mu nyuru a me. **24** Nyī mu me! Nande akala aakwulu me mu nyuru yi, yi aakabiri me ku lipfu? **25** Matuono kundaā Nzaami mu Yīisu-Kriste Mfumu a bihi-a-be! Me mu obo, mu embwuru e me, me ndi nkana a Mikyene mi Nzaami, lo mu nyuru a me, me ndi nkana a mikyene mi lisumu.

8 Obo me buulu, mu matala ma, ka ofirisiyili a masyeme kundaā ba bali mu Yīisu-Kriste o. **2** Mu kuulu, mikyene mi Mufulu mi miikagwa laama mu Yīisu-Kriste miikwulu we mu mikyene mi lisumu ya mimi lipfu. **3** Mu kuulu Nzaami bu agweghe Mwana a ndeme mu efafaana kii nyuru yi embwuru, mu nkooro a masumu, nde aasyeme masumu mu nyuru a mwana a nde. Mikyene ka mikughu ogyighili obo o, mu kuulu nyuru yiimana nde mpini. **4** Mu kuulu bunsumu bu ookaluomo Mikyene bukughu mu bihi-a-be ba liigwene okadzyara mu embwuru, lo mu Mufulu. **5** Mu obo, babo ba bali kunsā litumu lili embwuru bali a bitsimi bimō ya bu ookadzyi nyuru, lo babo ba bali kunsā litumu li Mufulu, bali a bitsimi bimō ya bu ookadzyi Mufulu. **6** Ankoho dzyi li nyuru liikabiri ku lipfu, dzyi li Mufulu, liikabiri ku laama ya ku edzuunu. **7** Mu kuulu dzyi li nyuru liikabiri mbwuru mu okala mutaara a Nzaami, nde ka ali kunsā litumu li Mikyene mi Nzaami o, nde ka kughu si onama mye o. **8** Babo ba bali kunsā litumu li dzyi li nyuru, ka bakughu ogwa Nzaami esee o. **9** Lo

kundaā be, be ka lili kunsā litumu li dzyi li nyuru o, lo be lili kunsā litumu li Mufulu, kala oli ngajma ti Mufulu a Nzaami aakakala mu be. Ya kala ti mbwuru ka li a Mufulu a Kriste o, lo nde ka li wu a ndaa Kriste o. **10** Ankoho kala ti Kriste li mu be, mu engajma nyuru a be yiikpi mu nkooro a masumu, lo Mufulu li bumweē mu nkooro a bunsumu. **11** Ya kala ti Mufulu a munde wu aasiili Yīisu ŋa kara li ba bākpī li mu be, munde wu aasiili Kriste ŋa kara li ba bākpī sa akala agwa si laama kundaā manyuru ma be ma maakakpa mu Mufulu a nde wu li mu be. **12** Me mu obo, bandughu ba me mu kana, bihi-a-be lili a ebyimi, lo ka kundaā nyuru yi embwuru o mu okala mweē ti bu oli dzyi li nyuru. **13** Mu kuulu, kala ti be liikanama nzya-nzyara a nyuru, be sa likpa. Lo kala ti mu Mufulu, be lidzwi bigyighili bi nyuru, be sa lilaama. **14** Mu kuulu, baara bwohono ba baakadzyara kunsā Mufulu a Nzaami bali baana ba Nzaami. **15** Be ka līgyagha mufulu wu bunkana o, mufulu wu aafirikagwa be nzalamweē. Lo be līgyagha Mufulu mumō wu aakakirili bihi nkara a baana ba Nzaami, mu nde bihi-a-be liikakehe engubu ti: «Aba!» Mbaala ti, «Taara!» **16** Mufulu ndeme li mu okasuo bumpughulu kundaā mufulu a bihi ti bihi-a-be lili baana ba Nzaami. **17** Ankoho, kala ti bihi-a-be lili baana, bihi-a-be lili si ba baakasyili a pfa: Ba baasyili a pfa li Nzaami, ba baasyili a pfa emō ya Kriste, kala oli ngajma ti bihi-a-be liikamono mpara ya nde mu obagha nsia emō ya nde. **18** Mu obo me ntisimi ti, mpara yi matala mama lolo ka yikughu okala embehe ya nsia yi akala aamōgono mu bihi-a-be o. **19** Mu kuulu byehene bi ōgyighili Nzaami bili mu okakebe ya mukolo mbāa, omōgono o nsia a baana ba Nzaami. **20** Mu kuulu, byehene bi ōgyighili Nzaami bili kunsā litumu li mandagha ma magwene a mupfunu, ka mu dzyi li byeme o lo mu nkooro a munde wu aasi bye kunsā litumu li nde, ya emiini: **21** Sa bakwulu bye mu bunkana ya mu lileene li liikabyihi bye, mpaala bye bikala munsā bunya-nyāa ya kunsā nsia a baana ba Nzaami. **22** Ankoho bihi-a-be lisoolo ti, tee mu matala ma, nsie yohono yili mu okasyama ya yili mu okamono mpara a misuo mi oburu. **23** Bihi-a-be si ba lili a bimburu bi Mufulu bibi nsomo, bihi-a-be si liikasyama kunsā mikolo mi bihi-a-be, bu liikakebe matala ma oosa bihi Nzaami maa ngu baana ba nde, ya ma baakwulu manyuru ma bihi-a-be. **24** Mu

kuulu, me munsu emiini baabvwuhu bihi-a-be. Lo ankoho, emiini ki liikamono ka eefirikasyili emiini o: Elogho ki baakamono, bakughu ofirisa emiini mu kye? **25** Lo kala ti bihi-a-be liikasa emiini mu elogho ki liigwene okamono, bihi-a-be liikakebe kye ya mukama. **26** Bumō si, Mufulu akayabaha bihi ba liikagwene a makpa, mu kuulu bihi ka liikasoolo mandagha ma lifaana oluomo mu nsamana a bihi o. Lo Mufulu ndeme aakasamana mu bihi, mu misyama miili ka bakughu obagha bu baalyele mye o. **27** Ya munde wu aakagyighili okehene mikolo soolo bitsimi bi Mufulu. Nde aakasamana mu baba ngili ti bwunu a bu ookadzyi Nzaami. **28** Bihi lisoolo si ti mandagha mwohonono maakasala mu bubwe bu babo ba baakadzyi Nzaami, babo ba áti nde mbili ti bwunu a bu oli bitsimi bi ákuru nde. **29** Mu kuulu, babo ba átswama osuolo nde, nde átswama ogwolo si munkana wu osa bo bakala embehe ya efaana e Mwana a nde, mpaala nde akala mwana wu a nsomo ŋa kara li mpwumu a baana ba taara. **30** Ya babo ba átswama osuolo nde, nde áti boho si mbili. Babo ba áti nde mbili, nde ási boho si baba bunsumu, ya babo ba ási nde baba bunsumu, nde ágwi boho si nsia. **31** Mu obo, nki ndagha bihi liifirilyele mu ndagha oyo? Kala ti Nzaami li ku engulu kii ndaa bihi, nande aakala mutaara a bihi? **32** Nde wu aatyeghe Mwana a ndeme mu nkooro a bihi bwohonono, bunu-abo, mu nzili a bwehe, akughu ogwene ogwa bihi si byehene emō ya Mwana a nde? **33** Nande akala aafwunu babo ba ósuolo Nzaami? Me Nzaami aakasa ti baara bakala baba bunsumu! **34** Nande aagwa bo ebili? Me Yiisu-Kriste aakpi! Ŋa yulu orjo, nde aasighili mu lipfu, nde li ŋa kwogho-a-kwogho e Nzaami ya aakasamana mu okala bihi-a-be! **35** Nande aakabala bihi-a-be ya dzyi li Kriste? Nyiĩ, minyoō, kimini, nzala, mpene, nsihi, bwunu we lipfu? **36** Bwunu a bu básono ti: «Mu nkooro a we, bali mu okadzwa bihi nswe etsughu.» «Bali mu okagwolo bihi ti anga bindoomo bi baakehe mabolo.» **37** Lo mu mandagha mwohonono mamu, bihi lili ba babvulu olughulu mu munde wu aadzyi bihi. **38** Mu kuulu me ndi a emiini ti, ngu okala lipfu, ngu okala bumweē, ngu okala bange-yulu, ngu okala bimpu, ngu okala mandagha mama lolo li, ngu okala mandagha mama bitsughu bibi nkulu, ngu okala banga a lileene, **39** ngu okala mpini yili mu yulu, ngu okala mpini yili mu

nsie, ngu okala elogho ekimi ki bágyighili ka ekughu okabala bihi ya dzyi li Nzaami mu Yiisu-Kriste, Mfumu a bihi o.

9 Me ndyele enganyma mu Kriste, me ka mpfiri mpya o, embwuru e me eli mu okasuo bumpughulu bu me mu Mufulu a ngili: **2** Me ndi a nyiĩ yi alagha ya mukolo a me li munsu mpara matala mwohonono. **3** Mu kuulu, me ndzyi ti me meme mbagha ndogho ŋa nkulu a Nzaami, ya me nkala o me wu áakaghaba ya Kriste mu nkooro a baana ba taara a me, ba bali ekaana emō ya me. **4** Bo ba bali basi Isarayelee, Nzaami ási bo nkara a baana ba nde, nde ágwi bo nsia, bindughu, Mikyene, esala kii okabuono, misiini, **5** bankagha-kwuru, ya me mu bo Kriste ágyi mu nyuru yi musunu, nde wu li ŋa yulu a byehene, Nzaami wu baakasyighi mu mibvu ya mibvu. «Aamene!» (aiñ g165) **6** Me ka ndyele o ti ndagha a Nzaami ka yiisiyli a mpini o. Mu kuulu, bwohonono ba bápala mu dzumu li Isarayelee ka bali basi Isarayelee o. **7** Nkara a baana ba Abarahame, ka oli bwohonono ba bali mu musyi a dzumu li nde o, lo: «Me mu Idzake we akala aabagha babo ba baata ti musyi a dzumu li we.» **8** Mbaala ti, ka oli baana baba musunu bali baana ba Nzaami o, lo baana baba misiini baakatala bo ti musyi a dzumu li nde. **9** Mu kuulu, ndagha yi bágyi misiini me yi: «Mu ena kyini a kiki, me sa yambvughuru ya Sara sa aburu mwana wu baghala.» **10** Ya ka oli yini a ndagha oyo o, óli obo si mu Rebeka, wu áabagha yimi mu baghala mumō, Idzake, taara a bihi. **11** Mu kuulu, baana babo nkini áli ka báburu bo o, ya bo nkini áli ka bágyighili bubwe bwunu we bubi o, lo, mu kuulu bitsimi bi ótswama okuru Nzaami bikakala bwunu a bu ásuolo nde, **12** ka mu nkooro a bigyighili o, lo mu munde wu aakata mbili, bályele kundaa Rebeka ti: «Naana sa akala musala a mbwee,» **13** bwunu a bu básono ti: «Me aansuolo Dzakobe ya aantwulu Edzawu mu libee.» **14** Mu obo, emakye liilyele? Mu Nzaami oli a ogwene a bunsumu? Si okala ka bunu! **15** Mu kuulu nde ályele kundaa Moyidze ti: «Me sa mono nyiĩ a munde wu ndzyi me omono nyiĩ, ya me sa mono ngebe a munde wu ndzyi me omono ngebe.» **16** Me mu obo, mimye ka mili mu waa li wu dzyi o, bwunu we mu lili wu li mu okabara ntyini, lo mu lili Nzaami wu aakamono nyiĩ. **17** Mu kuulu Bisono biikalyele kundaa Faraō ti: «Mu

mpere me aambyaha we mukogho mu osuo mu we lileene li me ya mu kuulu batsala nsia a nkwmumu a me mu nsie nsyini.» **18** Me mu obo, nde aakamono nyii kundaa munde wu adzyi nde omono nyii, ya aakagwa mukolo ngyi kundaa munde wu adzyi nde ogwa mukolo ngyi. **19** Mu obo, we sa lyele ti bunu-abo Nzaami akughu ofirikasyeme? Mu kuulu, nande kughu obihi waa li nde? **20** Lo we mbwuru, we nande li, mu osa mikeme ya Nzaami? «Elogho ki baamyene ekughu oleye kundaa wu aamyene kye ti: Mu emakye we aamyene me bu?» **21** Mbwuru wu aakamyene bilogho mu mubwee ka li a litumu mu mubwee o? Mu nkpaŋa a mubwee gyini oyo nde ka kughu ogyighili elogho ki baakasalala mu budziri, ya elogho ki baakasalala wene a budziri o? **22** Ya kala ti Nzaami bu adzyi osuo nkehe a nde ya osa ti bagyhaba lileene li nde, aakuru mukolo ya aakebe ku olagha bilogho bibi nkehe bi bágyighili mu nkooro a opfighili, **23** mpaala nde asa kuulu ti bagyhaba busini bu nsia a nde kundaa bilogho bibi ngebe bi átswama ogyighili nde mu nkooro a nsia a nde. **24** Ya baara babo ngu bihi-a-be. Nde áti bihi-a-be mbili, ka oli yini a ŋa kara li ba-Dzwife o, lo si ŋa kara li baala ka bali ba-Dzwife o, **25** ti bwunu a bu óleye Nzaami mu mukaana a mubighili Odze ti: «Wuulu ka áli ekaana e me o, me sa nta nde ekaana e me, ya wuulu ka áli wu a nkwmumu o, me sa nta nde wu a nkwmumu, **26** ya ŋa ebini kyini ekye ŋa áli balyele bo ti: “Be ka lili ekaana e me o”, sa bata bo ti baana ba Nzaami wu a mwee.» **27** Mubighili Edzayi ku ngulu yi a nde ákehe engubu mu nkooro a Isaraye ti: «Ngu okala ti mutala a baana ba Isaraye ayi ti anga dzyele li mubu, yini a mana ndaama yi aasyili akala yiibvwughu, **28** mu kuulu, Mfumu sa agyighili kuu mukughu ya mu maswa-maswa ndagha a nde ŋa nsie.» **29** Ya, bwunu a bu ootswama oleye Edzayi ti: «Kala ti Mfumu Sabaote ka ásihi bihi musyi a dzumu o, bihi liikapfighili ti anga bvulu lili Sodome, bihi liikaafaana a bvulu lili Ngomore.» **30** Mu obo, emakye bihi liiylele? Baala ka bali ba-Dzwife o, baala ka bákasagha bunsumu ŋa nkulu a Nzaami o, baabagha bunsumu, bunsumu bu baakabagha mu kana **31** lo Isaraye wu áakanama Mikyene mimi bunsumu, aakuono okuhu Mikyene mimye. **32** Mu emakye? Mu kuulu nde aakanama bunsumu bubo, ka mu kana o, lo ti anga bu buukafa mu bigyighili.

Bo baakubu kya mu limee li baakakubu makya, **33** bwunu a bu básono ti: «Me ntwulu mu mu bvulu lili Siyó limee li baakakubu makya, limee li linene li liikabwihi makubu. Ya munde wu aasa kana mu nde, ka akala aakpa budzwa o.»

10 Bandughu ba me mu kana, ndagha yi mvulu ndzyi me, ya lisamana li me kundaa Nzaami me liili ti ba-Dzwife babvwughu. **2** Mu kuulu me aakansuo bumpughulu mu bo ti bo bali a mukolo wu áalwulu mu mbaa a dzyi mu Nzaami, lo mbaa a dzyi li bo ka yili kunsu otsyeme ku ligyhaba o. **3** Mu kuulu, bo bu bagwene obaghala bu ookasa Nzaami baara bunsumu, ya bu baakasagha okala baara baba bunsumu mu ebomo, mu obo bo ka bali mu okasa bintamana mu ma ookasa Nzaami mu otwulu baara bunsumu, **4** mu kuulu, Kriste ákuhu Mikyene, mpaala bwohonu ba baakasa kana, Nzaami asa bo bunsumu ŋa nkulu a nde. **5** Mu kuulu, Moyidze ásono mu mi mitala bunsumu bu buukafa mu Mikyene ti: «Mbwuru wu akala aasa mandagha ma sa akala mwee mu mo.» **6** Lo ligyughu bu ookalyele Ndagha a Nzaami mu mi mitala bunsumu bu ookagwa kana: «Ka lyele mu mukolo a we o ti: Nande akala aakumu ku yulu?» Mbaala ti, mu osurulu Kriste ŋa nsie. **7** Bwunu we ti: «Nande akala aakumunu ku nsini a mbie yi nda yi a laŋa-laŋa?» Mbaala ti, mu opaha Kriste ŋa kara li ba bákpí. (*Abyssos g12*) **8** Mu obo, ndagha oyo bunu yidzyi oleye? «Ndagha yili ŋa bele a we, mu muŋma a we ya mu mukolo a we» Ndagha oyo me ndagha yi a kana yi liikatsala bihi nsia. **9** Mu kuulu, kala ti mu muŋma a we, we kihi ŋa nkulu a baara bwohonu ti Yiisu me Mfumu, ya kala ti mu mukolo a we, we si kana ti Nzaami ásiili nde ŋa kara li ba bákpí, we sa bvuwughu. **10** Mu kuulu, me mu mukolo baakasa kana; li liikasa ti Nzaami asa mbwuru akala wu bunsumu, ya me mu muŋma baakakihí ndagha yi aakabiri ku obvwughu. **11** Mu kuulu, Bisoño biikalyele ti: Nswe munde «wu aasa kana mu nde ka akala aakpa budzwa o.» **12** Mu obo, ka oli a lisobo ŋa kara li mu-Dzwife ya mu-Ngereke o: Bo bwohonu bali a Mfumu mumō, wuli esini kundaa babo bwohonu ba baakasamana nde. **13** Mu kuulu, «nswe munde wu aasamana nkwmumu a Mfumu, sa abvwughu.» **14** Mu obo, bunu-abo bo baasamana nkwmumu a munde wuulu bo ka baasi kana mu nde o? Ya bunu-abo bo baasa kana

mu munde wuulu bo ka baagyughu bu baatsala nsia a nde o? Ya bo bunu-abo baagyughu kala ti ka oli a mbwuru wu aatsala nsia nde o? **15** Ya bunu-abo bo baatsala nsia a nde kala ti ka bagweghe baara mu oyitsala yo o? Ti bwunu a bu básono ti: «Limono bu mili mye mibwe, myili mi babo ba baakabulutuocho mansia ma mabwe!» **16** Lo bo bwohono ka baasi bintamana mu nsia yi mbwe o. Mu kuulu Edzayi ályele ti: «Mfumu, nande aasi kana mu mandagha ma baagyughu bo kundaa bihi?» **17** Mu obo, kana liikafa mu mandagha ma baakagyughu, ya mandagha ma baakagyughu maakafa mu ndagha a Kriste. **18** Lo me mfwulu ti: Bo ka baagyughu o? Bo baagyughu! Mu kuulu Bisono biikalyele ti: «Baagyughu likyi li bo mu nsie nsyini,» «ya baagyughu mandagha ma bo tee ku manto ma nsie mu oli baara.» **19** Lo me mfwulu ti: Isarayelee ka aasoolo ndagha oyo o? Moyidze ngu wu a nsomo mu olyele ti: «Me sa nsa kuulu be lisa ebaa ekaana kiili ka eli ekaana o,» «mu nzili a ekaana ki egwene a mayele, me sa nsubu nkehe a be.» **20** Ya Edzayi ási bukyini tee mu olyele ti: «Bámono me kundaa babo baala ka bákasagha me o,» «me áamongoño kundaa babo baala ka báfwulu me ndagha o.» **21** Lo mu mi mitala Isarayelee, nde ályele ti: «Matala mwohonoo, me aandabala myaa mi me kundaa ekaana» «ki ébihi osa bintamana ya ki eli a mutswi mpini.»

11 Me mu obo me mfwulu ti: Bunu, Nzaami aatsili ekaana e nde? Si okala ka bunu! Mu kuulu, meme ndi musi Isarayelee, wu a musyi a dzumu li Abarahame, mu dzumu li Benzamē. **2** «Nzaami ka aatsili ekaana e nde o,» ekaana ki átswama osoolo nde. Be ligyighili osoolo mi ookalyele Bisono, mu matala ma ókanyoó mubighili eli kundaa Nzaami mu nkooro a basi Isarayelee ti: **3** Mfumu, «bo baadzwi mibighili mi we, bo baatsala bibini bi we bi baakagwa bikaba. Yini a me ngasighi aansiyili ya bo badzyi odzwa me!» **4** Lo mvuru a Nzaami nki yo? «Mu nkooro a meme, me aambunu mapfwunu nsaama ma baara baala ka baakasamana nzaami a Baale o.» **5** Bumó si mu matala mama lolo, oli a ndaama a baara baba bunsumu ba baasyili, ti bwunu a bu oli munsuolo wu a bwehe bu Nzaami. **6** Ankoho, kala ti mu nkooro a bwehe, lo ka ofirisyili mu nkooro a bigyighili o. Kala pele, bwehe ka bufirisyili bwehe o. **7** Mu obo, emakye

bihi liilyele? Bilogho bi ookasagha Isarayelee, bo ka baabagha bye o. Yini babo ba ósuolo Nzaami baabagha bye. Baara babake ayi ya mikolo ngiyi, **8** ti bwunu a bu ookalyele Bisono ti: «Tee mu etsughu kii lolo,» «Nzaami aagwi bo mufulu wu ogwuu,» «aadzwi bo mihi mpaala banyaá omono,» «aakyihi bo matswi mpaala banyaá ogyughu.» **9** Ya mukogho Dabvide si ályele ti: «Nyaá byiri bi bo bii odza bikala mwere kundaa bo, musyi a mbyi,» «nzili yi obwa, masyeme ma mafaana!» **10** «Nyaá mihi mi bo mikala kunsu mpyibi yi a laña-laña mpaala banyaá omono elogho nga-emó!» «Sa kuulu ti bibughu bibo bikala bibi korono matala mwohonoo!» **11** Mu obo, me mfwulu ti: Bo bu baatsahana, mpaala babwa kuulu ofiritemene we? Si okala ka bunu! Lo mu nkooro a bubi bu bo, baagwi obvwughu kundaa baala ka bali ba-Dzwife o, mu otsubu ebaa ki Isarayelee. **12** Ankoho, bubi bu ba-Dzwife buusi ti nsie yibagha busini, ya obwa o bo oosi ti baala ka bali ba-Dzwife o babagha busini. Lo nki busini buukala mu matala ma akala baasighili bo kuu mukughu? **13** Me ndyelee kundaa be baala ka lili ba-Dzwife o, buulu me ndi ntumu a baala ka bali ba-Dzwife o, me ndi a esee mu esala e me. **14** Obo me buulu me nkughu otsubu ebaa ña kara li ba lili a bo dzumu li mó, ya obvwuhu ndaama a baara babake. **15** Mu kuulu, kala ti otwulu o bo mu libee oosi ti Nzaami abvurulu ogwihini ya nsie, lo ña oofirigyagha bo Nzaami bunu a bo ookala? Bo sa babagha bumweé lo ka lipfu o. **16** Ankoho kala ti kaba lili nsomo mu nkpaña a limpa lili lili ngili, nkpaña yohono yili si yi a ngili. Ya kala ti mudza li wu a ngili, mampala mali si mama ngili. **17** Lo kala ti bagwahala ndaama a mampala ma muti a mu-Olibve mamake, ya kala ti we wu li musumunu mu-Olibve wu musuru, kala ti baanahaba we mu muti munde, ya mu matala ma kala ti we li a kaba mu malyimi ma maakafa mu mudza a mu-Olibve munde, **18** lo we ka sa mutwunu o. Kala ti we si mutwunu, ka dzimini o ti ka we aakwara mudza o, lo mudza aakwara we. **19** Mu obo we sa bvuhulu ti: Kala ti baagwahala mampala, me mu kuulu banahaba me ña ebini ekye. **20** Ndagha oyo yi a ngayma, mampala mamu baagwahala mo mu kuulu mo magwene a kana. Lo we, we li ña ebini e mo mu nkooro a kana. Ka kala a mubili a nyuru mu ndagha oyo o, lo kala a nzalamweé. **21** Mu kuulu, kala ti Nzaami aatwulu mu libee mampala ma mámene

momo mu muti, we sa mayele mpaala nde anyaa otwulu wehe si mu libee. **22** Mu obo, mono ati bubwe ya ebaghala e Nzaami, nde li a ebaghala kundaa ba baabwi, ya nde sa asa bubwe kundaa we kala ti, we nabara mu bubwe bu nde. Kala pele, wehe si sa bagwahala we. **23** Bumō si kundaa bomo ba-Dzwifwe, kala ti bo babihi osa kana, sa banahaba bo mu muti. Mu kuulu Nzaami li a lileene lili ofirinahaba bo mu muti. **24** Mu kuulu, kala ti batebe we mu mu-Olibve wu musuru, mu oleye ti we li musumunu wu baanahaba mu mu-Olibve wu bákunu. Mu obo, sa obvulu okala bubwe ti banahaba ba-Dzwifwe mu mu-Olibve wu a nda-bomo, ti bwunu a bu oli efa e bo. **25** Mu kuulu, bandughu ba me mu kana, me ka ndzyi o ti be likala kunsu nzi-nzimini a mansweghe ma Nzaami ma maamongo ma, mpaala be linyaā omongo ti anga baara ba babvulu mayele ya mihi mi beme. Ndaama a baara mu Isarayeleye ayi ya mukolo ngiyi, tee mu matala ma osomo bwohono baala ka bali ba-Dzwifwe o. **26** Ya me obo ekaana e Isarayeleye kyehene akala eebvwughu, ti bwunu a bu ookalyele Bisono ti: «Mukwulu sa afa ku munguo wu a Siyō,» «nde sa amaha mandagha ma mabi mu Dzakobe.» **27** «Ya obo akala me bu ookala ogwihini o me ya bo,» «mu matala ma akala aamaha me masumu ma bo.» **28** Mu mi mitala Nsia yi Mbwe, nganyama, ba-Dzwifwe bali mitaara mu nkooro a be. Lo mu mi mitala munsuolo a Nzaami, bo bali ba odzyi Nzaami mu nkooro a bataara ba bo. **29** Mu kuulu, bikaba bibi bwehe ya mbili a Nzaami mu esala ka baafirikagwolo ya baafirikasobo bye o. **30** Mu kuulu, ti bwunu a bu libihi be osa bintamana mu Nzaami mu nsi-nkulu, ya mu matala ma, Nzaami aamono be nyii mu nkooro a nkyini a bo. **31** Bwunu obo boho si mu matala ma, ba-Dzwifwe baasi nkyini, mpaala bamono boho si ngebe, ti bu baamono be ngebe. **32** Mu kuulu, Nzaami akuru baara bwohono kunsu ekogholo kii nkyini mpaala amono bo bwohono ngebe. **(eleēsē g1653)** **33** Wo! Busini, bunsughu ya ligyahaba bi Nzaami bili mugyighi! Ka bakughu osoolo mandagha ma aakalamana nde o! Ya manzili ma nde ka bakughu obaghala mo o! **34** Mu kuulu, «nande aasoolo bitsimi bi Mfumu?» «Nande aali mumpa-luo a nde?» **35** «Nande aagwi Mfumu nsomo, mpaala Mfumu afiri nde?» **36** Byehene bifi kundaa nde, bágyighili bye kundaa nde ya

mu nkooro a nde. Nyaā nsia yikala yi a nde mu mibvu ya mibvu! «Aamene!» **(aiōn g165)**

12 Me mu obo, bandughu ba me mu kana, mu nyii a Nzaami yi alagha, me ngwi be mpama, mu ogwa manyuru ma be ti anga mikaba mimi mweē, mimi ngili ya mi ookadzyi Nzaami. Kundaa be, obo sa okala obuono Nzaami ku ofaana ya Ndagha a nde. **2** Ka likanama bipfu bi baara ba nsie yi o, lo likala baara baala bu likighiri, libagha mayele ma manyaghara, mpaala be libaghala waa li Nzaami: Mandagha ma mabwe, ma aakakihi nde ya mama mukughu. **(aiōn g165)** **3** Mu bwehe bu oogwi me Nzaami, me ndyele kundaa nswe mbwuru mu be anyaa okala a bitsimi bii obvulu osagha omongo. Lo nswe mbwuru faana osagha okala a nzya-nzyara yi mayele ti bwunu a bu oli eteese ki ekaba li kana li ógwi nde Nzaami. **4** Mu kuulu, bwunu a bu oli binama bilagha mu nyuru a bihi, nyuru yili ngamō, ya binama byehene bibi nyuru ka biikasala esala emō o, **5** mu obo, bihi-a-be ba lili balagha, lili nyuru mō mu Kriste, ya nswe mbwuru mu bihi-a-be li enama ki e wu muke mu nyuru nga-mō oyo. **6** Lo bihi-a-be lili a bikaba bibi ya lisobo bibi bwehe, ti bu oli bwehe bu ógwi bihi-a-be Nzaami. Kala ti mbwuru li a ekaba kii mubighili, lo asalala kye bwunu a bu oli bunsumu bu kana. **7** Kala ti mbwuru li a ekaba kii osalala, lo agwa nyuru a nde mu esala ekye. Nyaā munde wu aakaluo, agwa nyuru a nde mu maluo. **8** Munde wu li a ekaba ki ogwa bana mpama, akagwa mpama. Munde wu li a ekaba ki okaba, akakaba mu mukolo mumō, munde wu li a ekaba ki otumu, akatumu ya mbaa, mbwuru nga-a-nyii akamono nyii mu esee. **9** Nyaā dzyi likala lili nganyama. Liikabele mandagha ma mabi, liikanabara mu mandagha ma mabwe. **10** Mu mi mitala dzyi lili bandughu mu kana, liikakala a dzyi be a be. Liikakala ba bansomo mu okagwa banganda budziri. **11** Ka likakala a bubolo o, lo liikakala a mbaa mu esala. Liikakala a mbaa mu mufulu, liikasalala Mfumu ti anga basala ba babwe. **12** Liikakala a esee mu emiini. Liikakala a nkaā munsu mpaara. Liikasa mukama mu obuono. **13** Liikabaha ba bangili mu okagwa bo bi bali a bo nzala a bye. Liikabwana bandzyi. **14** Liikaseme ba baakamwehē be kimini, liikaseme ya ka likabiili mpwoho o. **15** Liikakala mu esee ya babo ba bali mu esee. Liikalili ya babo ba baakalili. **16** Ligyighili okagwihini be a be.

Ka likakala a mubili a nyuru o, lo liikasagha okala emō ya baara ba bakughulu ya okasa mikolo mu bisala bi bikughulu. Ka likatsimi o ti be libvulu bunsughu. **17** Ka likabvurulu bubi mu bubi kundaa mbwuru o. Liikasa mpini mu okagyighili mandagha ma mabwe ŋa nkulu a baara bwohono. **18** Kala ti bukughu okala, ya kala mitala be, liikakala mu edzuunu ya baara bwohono. **19** Bandughu ba me baba mukolo, ka likabvurulu bubi mu bubi o, lo liikanyaā nkehe a Nzaami yikagwa mvuru, mu kuulu básono ti: «Me aambvurulu etere», me akala «aangwa mufuru», obo me bu olyele Mfumu. **20** Lo «kala ti mutaara a we li a nzala, gwa nde bi-odza. Kala ti nde li a nyoro, gwa nde madza. Mu kuulu, we sa obo, we li mu okakwu makala ma mbaa ŋa yulu a mutswi a nde». **21** Ka nyaā bubi bulughulu ŋa nkulu a we o, lo we lughulu ŋa nkulu a bubi mu okagyighili mandagha ma mabwe.

13 Nyaā nswe mbwuru akala kunsu litumu li bamfumu ba baatkatumu. Mu kuulu, nswe litumu liikafa kundaa Nzaami, ya yini a Nzaami aakagwa nswe litumu. **2** Me mu obo, munde wu aakabihi litumu, nde aakateme nsumu ya litumu li otwulu Nzaami. Babo ba baakateme nsumu ya litumu li Nzaami sa babagha masyeme mu manyuru ma bo. **3** Mu kuulu, ba baakasa bubwe ka baakakala a nzalamweē a bamfumu o, lo ba baakasa bubi baakakala a nzalamweē. Kala ti we ka dzyi okala a nzalamweē a mfumu o, sa bubwe ya nde sa agwa we masyighi. **4** Mu kuulu, mfumu aakasala Nzaami mu nkooro a bubwe bu we. Lo kala ti we si bubi, kala a nzalamweē, mu kuulu ka ku obwunu o mfumu ali a lipée, nde aakasala Nzaami mu osyeme ya mu osuo nkehe a nde kundaa wu aakasala bubi. **5** Me mu obo okihi litumu li bamfumu oli mupfunu, ka yini a mu nkooro obara nzalamweē a nkehe o, lo mu nkooro a embwuru ki ebwe si. **6** Me mu obo si be liikafiri mpagha. Mu kuulu esala ki okatolo mpagha, Nzaami āagwi bo kye. **7** Liikafiri kundaa nswe mbwuru ebyimi ki lili a be ya nde: Mpagha kundaa wu lifaana ofiri mpagha yi mawa-mawa, nzalamweē kundaa wu lifaana okala a be nzalamweē, budziri kundaa wu lifaana ogwa be budziri. **8** Ka likakala a ebyimi e mbwuru o, kala ka yini a okadzyi banganda be a be o. Mu kuulu munde wu aadzyi nganda, aakuhi Mikyene. **9** Mu kuulu, mikele

mi: «Ka bvughu mbughu ya mukala bwunu we mulumu a nganda o, ka dzwa o, ka turu o, ka sughu mukolo o,» ya mikele myehene mi mike, bákuru mye mu ndagha yi: «Dzyi nganda-mbwuru ti bu budzyi we nyuru a we». **10** Dzyi ka liikasa bubi kundaa nganda-mbwuru o: Dzyi me okughu ku Mikyene. **11** Bu ligyighili osoolo mu nki matala lili: Ma ngu matala ma lifaana osighili be mu ensama, mu kuulu, lolu bu obvwughu obvulu obehene ya bihi-a-be. Obvwughu oko ka ofirisiyili la ti mu matala mamu ma lísi bihi-a-be kana o. **12** Mpyibi ayi la, bwihi ayi ku bele a okya. Mu obo litswe litsili bigyighili bibi mpyibi, ya litswe lilaha bidzwana bii otsyeme. **13** Litswe likadzyara bwunu a bu ofaana, ti anga mu mwī wu ebala, wene a byiri bibi bilyili ya bibi oŋma mala malagha, wene a esighi ya enkwunu, wene a mumbanjana ya ebaa ki elagha. **14** Lo be lifaana olaha Mfumu Yīisu-Kriste ti anga eko ya linyaā ofirikagyighili mi ookadzyi musunu, mu okuhu dzyi li yo.

14 Libwana a munde wu gwene a mpini mu kana, gwene a otsaala a bitsimi bi nde. **2** Mbwuru mumō li a kana mu odza bilogho byehene. Wu muke, wu gwene a mpini mu kana, nde okadza yini a bisagha. **3** Munde wu aakadza anyāā otsaala wu aagwene okadza, ya munde wu aagwene okadza anyāā olamana wu aakadza, mu kuulu Nzaami aabwana nde. **4** We, we nande li mu olamana musala a mbwuru mukimi? Ngu okala ti nde li mu mukiri, bwunu we nde aabwi, mimye mitala mfumu a nde. Ya nde sa agyighili otemene, mu kuulu Mfumu li a lileene lii otehebe nde. **5** Mu kuulu, mu kana li mfu-nga-empele bitsughu bini bibvulu bibike mupfunu, mu kaana lili wu muke, bitsughu byehene bili nsihi mu mupfunu. Nyaā nswe mbwuru, mu mayele ma nde, akala a kana mu bitsimi bibi ndaa ndeme. **6** Munde wu aakagwa bitsughu mupfunu me mu nkooro a Mfumu aakasa obo. Munde wu aakadza, me mu nkooro a Mfumu aakadza, mu kuulu nde aakabvurulu matuono kundaa Nzaami ŋa aakasa nde obo. Wu aagwene okadza, me mu nkooro a Mfumu nde aagwene okadza. Ndehe si aakabvurulu matuono kundaa Nzaami ŋa aakasa nde obo. **7** Mu kuulu, mbwuru si mumō mu bihi-a-be ka li mweē mu ndeme o, ya mbwuru si mumō ka kughu okpa mu nkooro a ndeme o. **8** Mu kuulu, kala ti bihi-a-be lili mweē, lo bihi lili mweē mu

nkooro a Mfumu. Ya kala ti bihi liikakpa, bihi mu nkooro a Mfumu liikakpa. Bihi ngu likala mweë, bihi ngu likpi, bihi lili baara ba Mfumu. **9** Mu kuulu, kala ti Kriste ákpi ya asighili mu lipfu, me mu okala Mfumu a ba bákpi ya baba mweë. **10** Lo we, mu emakye we li mu olamana ndughu a we mu kana? Bwunu we, mu emakye we li mu otsaala ndughu a we mu kana? Mu kuulu, sa balamana bihi bwohonon ña mbala a muyala a Nzaami. **11** Mu kuulu básono ti: «Me Mfumu wu a mweë ndeyele yo,» «nswe mbwuru sa akunu mabuo ña nkulu a me,» «ya murjma wu a nswe mbwuru sa aleyele mandagha ma maagwa Nzaami masyighi!» **12** Obo me buulu, nswe mbwuru mu bihi-a-be sa balamana nde ña nkulu a Nzaami mu mi aagyighili nde ndeme. **13** Mu obo, litswe linyaá ofirikalamana babake. Liswe ligwolo munkaana wu ogwene otwulu limeë li liisa ti bandughu mu kana bakubu makya, bwunu we libwihi bo mu masumu. **14** Me ngiyighili osoolo, ya me nsi kana ti mu Mfumu Yisu ka oli a elogho ki esujumu mu kyeme o. Lo kala ti mbwuru tsimi ti elogho eli ki esujumu, kundaa nde elogho ekye sa ekala ki esujumu. **15** Kala ti, mu nkooro a bi-odza, ndughu a we mu kana aanyoó, we ka li mu ofirikadzyara bwunu a bu oli dzyi o. Mu nkooro a bi-odza, ka sa kuulu ti munde wuulu Kriste ákpi mu nkooro a nde apfighili o. **16** Mu obo, mbwuru anyaa otsaala ekye kiili kundaa be eli ki ebwe. **17** Mu kuulu Emfumu e Nzaami ka etala odza ya oñma o. Lo kye etala bunsumu, edzuunu ya esee bi ookagwa Mufulu a Ngili. **18** Munde wu aakasalala Kriste obo, Nzaami aakadzyi nde, ya baara baakakihi nde. **19** Obo me buulu, litswe lisa mpini mu okasa mandagha ma maakagwa edzuunu ya ma maakawuhu bihi-a-be. **20** Ka dzwa esala e Nzaami mu nkooro a bi-odza o. Nganma, bilogho byehene bili tse-tse. Lo oli bubi kundaa mbwuru mu odza bilogho bi biikasa kuulu ti babake bakubu kya. **21** Oli bubwe mu onyaa odza tuo ya oñma mala ma bviini, mu obihi bilogho byehene bi bili limeë li ookubu ndughu a we mu kana makya. **22** Kana li li a we, kebe lo we weme ña nkulu a Nzaami. Esee kundaa munde wu aagwene okalamana nde ndeme ña aakagwolo nde mukaana mu mi aagyighili! **23** Lo munde wu aakeje mu bi aadza, nde aabagha masyeme. Mu kuulu ndagha yi aagyighili nde ka yifi mu kana li nde o. Ankoho,

myehene mi miigwene okafa mu kana, mili masumu.

15 Kala ti bihi-a-be lili a mpini mu kana, lifaana obaha ba bagwene a mpini mu kana, lo ka yini a mu okagyighili mandagha ma maakagwa bihi bameme esee o. **2** Nyaá nswe mbwuru mu bihi-a-be akagyighili mandagha ma maagwa nganda-mbwuru esee mu nkooro a bubwe ya okulu o nde. **3** Mu kuulu Kriste ka ágyighili mandagha ma mákagwa ndeme esee o, lo ti bwunu a bu básono: «Bitughu bi babo ba bali mu okatughu we biibwi mu me.» **4** Mu kuulu, mandagha mwohonon ma básono mu nsi-nkulu, básono mo mpaala bihi-a-be libagha maluo, buulu mu mukama ya mu mpama yi ookagwa Bisons, bihi-a-be likala a emiini. **5** Nyaá Nzaami wu aakagwa mukama ya mpama asa kuulu ti be likala bitsimi bimō be a be, ti bwunu a bu odzyi Yiisu-Kriste, **6** mpaala mu bitsimi bimō ya mu mbiili mō, be lisyighi Nzaami, Taara a Mfumu a bihi Yiisu-Kriste! **7** Me mu obo, liikabwana a babake be a be, ti bwunu a bu óbwana a be Kriste ndeme, mu nkooro a nsia a Nzaami. **8** Mu kuulu, me ndeyele ti Kriste ayi musala a ba básomo nzo a mbaa, mu nkooro a enganma e Nzaami, mpaala misiini mi bágwí kundaa bataara mikeele. **9** Lo baala ka bali ba-Dzwife o baakagwa Nzaami nsia mu nkooro a nyii yi aakasuo nde, ti bwunu a bu básono ti: «Me mu obo me sa kansyighi we ña kara li bikaana», «ya me sa kangyimi mu nsia a nkwwu a we.» **10** Bisons bifirikalyele ti: «Bikaana, likala mu esee ya ekaana ki oosuolo Mfumu!» **11** Ya báfirisono bu: «Bikaana byehene, ligwa Mfumu nsia,» «nyaá baara bwohonon bagwa nde masyighi!» **12** Edzayi si áleyele ti: «Nde sa akala apala, mu musyi a dzumu li Dzese,» «munde wu akala aatemene mu otumu bikaana.» «Bikaana bibye sa bisa emiini mu nde.» **13** Nyaá Nzaami wu aakagwa emiini aluhu be mu esee kyehene ya mu edzuunu kyehene mu nkooro a kana li be, kuulu be lilwulu mu emiini mu lileene li Mufulu a Ngili! **14** Bandughu ba me mu kana, mu mi mitala be, me ndi a kana ti be lilwulu mu mukolo mubwe, be lili a ligyahaba lwohonon, ya be liikughu mu okagyehene banganda be a be. **15** Lo mu mambughu mana, me aansono be ya kaaha mu mukaana wu ti anga mu olibili be mweë mu mi bágyihi be, mu nkooro a bwehe bu ógwí me Nzaami, **16** mu

okala musala a Yiisu-Kriste kundaa baala ka bali ba-Dzwife o. Me aangwi nyuru me yohono mu esala ki e ngili ki e Nsia yi Mbwe yi a Nzaami, mpaala baala ka bali ba-Dzwife o bakala ekaba ki ookihi Nzaami, ki ootsehebe Mufulu a Ngili. 17 Me mu obo me ndi a mutwunu mu Yiisu-Kriste, mu mi mitala esala e Nzaami. 18 Mu kuulu me ka nkughu obili mu ndagha nkimi o, kala ka yini a mu mi ógyighili Kriste mu me o, mu okabiri baala ka bali ba-Dzwife o bakala a bintamana mu mbiili ya mu bigyighili, 19 mu lileene li bilyimi ya lili bimaã, mu lileene li Mufulu a Nzaami. Me mu obo, me bu nsehene obaana ku Yerusaleme tee ku Iliri, me aantsala Nsia yi Mbwe yi a Kriste mu bibini byehene. 20 Lo me aangwi mukolo a me mu otsala Nsia yi Mbwe mu bibini biili nkini ka bámaatuolo nkhwumu a Kriste o, mpaala me nyaã otwu ŋa yulu a bitsini bi bibagha bi nzo a mbwuru mukimi. 21 Lo ti bwunu a bu básono: «Kundaa baala ka bátwoho bo nsia a nde o, sa bamono nde,» «ya babo baala ka bágyughu nsia a nde o, sa babaghala.» 22 Me ndagha oyo yiikakahaba me mansa malagha mu oyamono be. 23 Lo mu matala ma, me ka afirinsyili a esala mu bitsulu bi nsie bibye o, ya obaana bamvulu balagha, me ndi a nzala a oyamono be ku olagha, 24 ŋa akala aangye me ku nsie yi a Esepaanye. Me ndi a emiini ti me sa mono be ŋa akala aanduru me, ya me sa ngyagha bilogho bi aankala a me nzala a bye mu midzye, ŋa mbihi a ŋa aankuhu me dzyi li me lili oluhu mana matala emō ya be. 25 Lo mu matala ma, me ngyene ku Yerusaleme mu yibaha ba bangili baba li oko. 26 Mu kuulu baara baba bitsulu bi nsie bibi Masedwane ya Akayi, baamono bubwe mu otolo nzi, yi ogwa libaha kundaa bawele ŋa kara li ba bangili ba bali ku Yerusaleme. 27 Bo baagwolo munkaana mu ogyighili ndagha oyo, mu kuulu bo bali a ebyimi e bo. Kala ti baala ka bali ba-Dzwife o, baabagha kaba mu busini bu ookagwa mufulu, boho si bafaana osalala bo mu mi mitala bilogho bi bo bibi musunu. 28 Me mana ndagha yi, ya ogwa ŋa nkulu a baara bwohono bikaba bi baatolo, me sa bulunduru kundaa be ŋa aangye me ku Esepaanye. 29 Me nsoolo ti ŋa aayamono me be, me sa ngya a liseme lili mukughu lili Kriste. 30 Lo bandughu ba me mu kana, me ngwi be mpama mu nkhwumu a Mfumu a bihi Yiisu-Kriste ya mu dzyi li ookagwa Mufulu, mu odzwana mvulu emō ya me mu

okabuono Nzaami mu nkooro a me, 31 mpaala me mbvwughu ŋa myaã mi ba bagwene a kana mu Mfumu ba bali mu etsulu e nsie kii Yude, ya libaha li aambiri me, ba bangili ku Yerusaleme, bo bagyagha lo bubwe. 32 Obo me buulu mu esee me sa yamono be mu waa li Nzaami, ya me sa mbagha mana matala mama ogwumu kundaa be. 33 Nyaã Nzaami wu edzuunu akala ya be bwohono! «Aamenel!»

16 Me ngweghe be Foyebe, nkele a bihi, wu li musala mu libwunu li Nzaami lili mu bvulu lili Senkere, 2 mu kuulu be libwana a nde mu nkhwumu a Mfumu, bwunu a bu ofaana mu ba bangili. Libaha nde mu nswe ndagha yi aakala a nde nzala a be. Mu kuulu nde ábaha baara balagha, ngu okala meme si. 3 Ligwa Pirisika ya Akila, bandughu ba me ba esala mu Yiisu-Kriste, mboro. 4 Bo ba bákihi ogwa mitswi mi bo mu obvwuhu laama li me. Ka oli yini a me ngasighi ndi mu okabvurulu bo matuono o, lo si ya Mabwunu ma Nzaami mwohono mama baala ka bali ba-Dzwife o mali mu okabvurulu bo matuono. 5 Ligwa si libwunu li Nzaami li liikabvujunu mu nzo a bo mboro. Ligwa Epayinete, ndughu a me wu mukolo, mboro, nde wu li wu a nsomo mu osa kana mu Kriste ku nsie yi a Adzi. 6 Ligwa Mari mboro, nde wu aamono mpara yi alagha mu nkooro a be. 7 Ligwa Andoronikose ya Yunyase mamboro, bo bali badzighi ba me ya bo bali si bandughu ba ándi a me mu boloko. Bo bali baara baba budziri bu bulagha ŋa kara li bantum, ya bo bási kana mu Kriste nsomo ya me. 8 Ligwa Ampilyatuse, ndughu a me wu mukolo mu Mfumu, mboro. 9 Ligwa Urubē, ndughu a bihi wu esala mu Kriste, ya Sitakise, ndughu a me wu mukolo mamboro. 10 Ligwa Apelese mboro, nde wu aasuo bigyighili bi kana li nde mu Kriste. Ligwa baara ba nzo a Arisitobule mamboro. 11 Ligwa Erodyō mudzighi a me mboro. Ligwa baara ba nzo a Narasise ba bali mu Mfumu mamboro. 12 Ligwa Tirifene ya Tirifose, bakaha ba bákasala esala kii mpini mu Mfumu, mamboro. Ligwa Pereside, ndughu wu mukolo wu mukaha, mboro, nde wu ásala ku olagha mu Mfumu. 13 Ligwa Rufuse, wu oosuolo Mfumu ya ngughu a nde wu li ngughu a mehe si, mamboro. 14 Ligwa Asekirite, Felengo, Eremese, Patorobase, Eremase ya bandughu mu kana ba bali ya bo mamboro. 15 Ligwa mamboro kundaa Filolonge ya Dzuli, Neere

ya nkele a nde wu mukaha, Olimpase ya baba ngili bwohono ba bali emō ya bo. **16** Ligwihini a mamboro be a be mu onyuburu ku ofaana ya kuu baana ba Nzaami. Mabwunu ma Kriste mwohono magwi be mamboro. **17** Bandughu mu kana, me ngwi be mpama mu kuulu be lisa mayele mu baara ba baakasa munkabala ŋa kara li banga-a-kana ya baakabwihi bo mu masumu, mu mandagha mama lisobo ya maluo ma liigyagha be. Likala la ya bo. **18** Mu kuulu baara baba obo ka bali basala ba Mfumu a bihi Kriste o, lo bo baakasala mu oluhu mila mi bomo. Mu mbiili a bo yimbwe ya yi maluono, bo baakabulupfiri baara ba bagwene soolo mandagha bubwe. **19** Mu mi mitala be, baara bwohono basoolo bintamana bi be. Mu obo me aakamono esee mu nkooro a be, lo me ndzyi ti be likala bansughu mu mi mibwe, bwunu a bu lili be baba tse-tse mu mi mitala bubi. **20** Edzidzighi, Nzaami wu edzuunu sa apweene Satana ku nsie a myili mi be. Nyaā bwehe bu Mfumu a bihi Yiisu bukala ya be! **21** Timote, ndughu a me wu esala, emō ya badzighi ba me Lusiyuse, Yasō ya Sosipatere, bagwi be mamboro. **22** Me Teretiyuse, wu nsono mandagha ma olyele poole mu mukaana wu, me ngwi be mamboro mu nkwumu Mfumu. **23** Ngayuse, wu aabwana me ya libwunu li Nzaami lwohono mu nzo a nde, gwi be mamboro. Erasete, wu aakakebe nzi a bvulu, gwi be mamboro, bumo si ya Kwaratuse, ndughu mu kana. [**24** Nyaā bwehe bu Mfumu a bihi Yiisu-Kriste bukala ya be bwohono! Aamene] **25** Nsia kundaa Nzaami! Nde li a lileene lili ogwa be mpini, mu Nsia yi Mbwe yi a Yiisu-Kriste yi aakabulunsala me. Mu Nsia yi Mbwe oyo, Nzaami aasuo mansweghe ma básweghe obaana mu ebaana, (aiōnios g166) **26** lo mo maamorjono mu matala ma mu bisono bi libighi, ti bwunu a bu oli litumu li Nzaami wu li mu mibvu ya mibvu. Ya bikaana byehene bisoolo mo, mu kuulu bye bisa kana ya bikala a bintamana mu nde. (aiōnios g166) **27** Nyaā nsia yikala kundaa Nzaami, nsughu nga-mumō, mu Yiisu-Kriste, mu mibvu ya mibvu! «Aamene!» (aiōn g165)

1 Korente

1 Me Poole, ntumu a Yiiisu-Kriste wu óti Nzaami mbili mu waa li nde, ya Soretene ndughu mu kana, **2** lisono mukaana wu kundaa Libwunu li Nzaami li lili mu bvulu lili Korente, bo ba ótwulu Nzaami mu libee mu osalala nde bu bali emō mu Yiiisu-Kriste. Bo bali baba tse-tse mu mbili yi báti bo emō ya babo bwohono ba baakasamana mu bibini byehene mu nkumu a Mfumu a bihi Yiiisu-Kriste, Mfumu a bo ya bihi bwohono. **3** Nyaã bwehe ya edzuunu bi bifi kundaa Nzaami Taara a bihi ya kundaa Mfumu Yiiisu-Kriste bikala ya be! **4** Nswe matala, me aakambvurulu matuono kundaa Nzaami a me mu be mu bwehe bu ógwi be Nzaami mu Kriste Yiiisu. **5** Mu kuulu mu Nde, be lili bisini mu bikaba byehene, emvulu ngughu bikaba bibi Ndagha ya bibi ligyahaba. **6** Mu kuulu bumpughulu bu bihi mu Kriste buumojono nkara a bubwe kundaa be. **7** Me mu obo, be ka ligweene a ekaba kii bwehe si emō o, bu lili mu okakebe omojono o Mfumu a bihi Yiiisu-Kriste. **8** Me Nde akala aagwa be mpini tee ku masini, mpaala be likala baara ba bagwene a ndagha yi baasyeme bo mu etsughu ki oogya Mfumu a bihi Yiiisu-Kriste. **9** Nzaami wu aati be mbili mu okala bumō ya Mwana a Nde Yiiisu-Kriste, Mfumu a bihi, Nde li wu bakughu osa kana. **10** Bandughu ba me mu kana, me ngwi be mpama mu nkumu a Mfumu a bihi Yiiisu-Kriste, mu okala a mbiili mō: Onyaã okala a munkaghaba ŋa kara li be. Ligyighili okala emō, mu mufulu ya mu bitsimi bi be. **11** Mu kuulu, bandughu ba me mu kana, baara ba nzo a Kolowe baalyele me ti be lili mu okabanjana be a be. **12** Me bu ndzyi oleyele: Nswe mbwuru mu be li mu okalyele ti: «Me, me ndi mbwuru a Poole», wu muke ti: «Me, me ndi mbwuru a Apolose», mukimi ti: «Me, me ndi mbwuru a Piere», ya wunu ti: «Lo me, me ndi mbwuru a Kriste.» **13** Bunu, Kriste wu aakaghaba ali? Ngu Poole bákomo ŋa kuruwa mu be? Bwunu we me mu nkumu a Poole bábogho be? **14** Me aakambvurulu matuono kundaa Nzaami mu kuulu me ka ámbogho mbwuru si mumō ŋa kara li be o, kala ti ka yini a Kirisipuse ya Ngayuse o. **15** Mu obo, mbwuru si mumō ka kughu oleyele o ti mu nkumu a me bábogho be. **16** Aa nganjma! Me ámbogho si baara ba

nzo a Esetefanase. Kala ti bamaha baara babo, me bu nsolo ti me ka ámbogho mbwuru mukimi o. **17** Mu kuulu Kriste ka ágweghe me mu obogho baara o, lo mu otsala Nsia yi Mbwe, ka mu bunsughu bubu obili o, mpaala lipfu li Kriste ŋa kuruwa likala lili bwunu. **18** Mu kuulu maluo ma kuruwa mali lala kundaa baara ba bali mu okagye ku odzimini, lo kundaa bihi ba liibvwughu, mo mali lileene li Nzaami. **19** Mu kuulu básono ti: «Me sa mbyihi bunsughu bu bunsughu, ya me sa mana mayele ma banga-a-mayele.» **20** Nsughu kunu ali? Muluo-mikyene kunu ali? Nga a munsoboho wu matala ma kunu ali? Nzaami ka aakirili bunsughu bu nsie yi lala o? (*aiōn g165*) **21** Mu kuulu, mu nzili a bunsughu bubo, baara ba nsie ka baasoolo Nzaami muna bunsughu bu Nde o, me mu nzili a lala li maluo Nzaami aamono bubwe mu obvwuhu ba baakasa kana. **22** Ba-Dzwife bali mu okaluomo bilyimi bii okinjimi, ya ba-Ngereke bali mu okasagha bunsughu. **23** Lo bihi, bihi lili mu okalu Kriste wu bákomo ŋa kuruwa, Nde wu li kya kundaa ba-Dzwife ya wu li lala kundaa baara baala ka bali ba-Dzwife o. **24** Lo kundaa baara ba óti Nzaami mbili, ngu okala ba-Dzwife, ngu okala ba-Ngereke, nde li Kriste, lileene ya bunsughu bu Nzaami. **25** Mu kuulu lala li Nzaami libvulu bunsughu bu baara, ya okolo o Nzaami oluru mpini a baara mu makpa. **26** Bandughu ba me mu kana, limagyighili otsimi bunu be lili, be ba ooti Nzaami mbili: Mu otala mu embwuru, ka oli a bunsughu balagha ŋa kara li be o, ngu okala banga-a-lileene ba balagha, ngu okala baara balagha baba madzumu mama budziri. **27** Lo Nzaami aasuolo ŋa nsie mandagha mama lala mu otwuhu bunsughu bupfiri, Nde aasuolo ŋa nsie bilogho bi bikolo mu otwuhu bilogho bi bili a mpini bupfiri. **28** Nzaami aasuolo ŋa nsie bilogho bi bigwene a mupfunu, bilogho bi baakatsaala, bilogho bibi bwunu, mu osa ti bilogho bi bili a mupfunu ŋa nsie bikala bibi bwunu. **29** Mpaala mbwuru si mumō anyaa okala a mutwunu ŋa mihi mi Nzaami. **30** Ankoho, me mu nkooro a Nzaami be lili mu Yiiisu-Kriste. Kriste wuulu mu waa li Nzaami ayi bunsughu bu bihi, bunsumu bu bihi, bungili ya okwulu o bihi. **31** Me mu obo básono ti: «Nyaã ti mbwuru nga a mutwunu asa mutwunu a nde mu Mfumu.»

2 Bandughu ba me mu kana, mu matala ma áyantsala me be nsia yi a mansweghe ma

Nzaami, me ka ánsalala mbiili yi a mankumu o, lo me ánsalala mbiili yi a nja taa-taa. 2 Mu kuulu me áangwolo munkaaana wu onyaá osoolo ndagha nkimi nja kara li be kala ti ka yini a Yiiisu-Kriste, Yiiisu-Kriste wu bákomo nja kuruwa. 3 Me mu obo, mu matala ma ándi me nja kara li be, me ándi wu a kolo, me ándi a enkweghu mu nzalamweé. 4 Maluo ma me ya Nsia yi Mbwe yi ákantsala me, ka bíli bibi mbiili yi a opeene yi a bunsughu o, lo Mufulu ya lileene bíikasuo mi ákandyele me, 5 mpaala kana li be linyaá okala mu bunsughu bu baara, lo mu lileene li Nzaami.

6 Lo bihi me bunsughu lili mu okabululuo nja kara li baara ba bákughu mu kana. Bunsughu bu ka buli bubu nsie yi o, bwunu we bubu bamfumu ba nsie yi ba bágyighili mu opfighili. (aiñ g165) 7 Bihi lili mu okabululuo bunsughu bu Nzaami, bunsughu bu básweghe nja mihi mi baara ba nsie, bunsughu bu ótswana ogyighili Nzaami mu nkooro a nsia a bihi, nsomo nde agyighili nsie. (aiñ g165) 8 Ka oli a mfumu si mumó mu bamfumu ba nsie yi wu áasoolo bo o, mu kuulu, kala ti bo áli basoolo bunsughu bubo, nkini bo áli ka bakaakomo Mfumu wu a nsia nja kuruwa o. (aiñ g165) 9 Lo bwunu a bu básono ti: «Mandagha maala mihi nkini mímaamono o, maala matswi nkini mámaagyughu o,» «ya maala mbwuru nkini ámaatsemi mu mukolo o,» «Nzaami aagyighili mo mu nkooro a babo ba baakadzyi nde.» 10 Lo me kundaa bihi Nzaami aasuo mandagha mamu mu Mufulu a Ngili. Mu kuulu Mufulu aakakeene mandagha mwohonon, ngu okala muyighi a bitsimi bi Nzaami. 11 Mu obo, na munde nja kara li baara soolo bitsimi bi bili munsa mbwuru, kala ka oli yini a mufulu wu li munsa nde o? Bwunu obo si, ka oli a mbwuru wu soolo bitsimi bi Nzaami o, kala ka yini a Mufulu a Nzaami o. 12 Ankoho bihi ka liigyagha mufulu wu a nsie yi o, lo Mufulu wu aafi kundaa Nzaami, mpaala bihi libaghala bikaba bi oogwi bihi Nzaami mu bwehe bu nde. 13 Ya bihi ka lili mu okabili mu mandagha mamu mu mbiili yi ookaluo bunsughu bu baara o, lo mu mbiili yi ookaluo Mufulu a Nzaami. Obo me bu liikasuo bihi enganyma e Mufulu mu mbiili yi ookagwa Mufulu. 14 Lo mu embwuru, mbwuru ka kughu okihi mandagha ma Mufulu a Nzaami o. Mu kuulu mo mali lala kundaa nde. Nde ka kughu obaghala mo o, mu kuulu yini a mu Mufulu bakughu obaghala mo. 15 Lo mbwuru wuli mu mufulu aakabaghala mandagha mwohonon, lo

ndeme, mbwuru ka kughu obaghala nde o. 16 Mu kuulu, «nande aasoolo etsimi e Mfumu mu ogwa nde luo?» Ankoho bihi, bihi lili a etsimi e Kriste.

3 Bandughu ba me mu kana, me ngu wuulu ka aambili kundaa be ti anga kundaa baara ba bali mu mufulu o, lo ti anga kundaa baara ba bakolo, ti anga kundaa bike-bike mu Kriste. 2 Maluo ma aangwi me be mali ti anga mabiene, lo ka bi-odza bi bikubu o, mu kuulu be ka likaakuñu bye o. Ngu okala mu matala ma, be ka lileene odza bye o. 3 Mu kuulu be nkini lili baara ba bali a nzya-nzyara yi a baara ba nsie yi. Nja kara li be oli a ebaa ya mumbanjana. Lo bunu, be ka lili baara baba musunu ya ba bali a nzya-nzyara yi a embwuru o? 4 Nja ookalyele mbwuru mumó ti: «Me, me ndi mbwuru a Poole!» Ya wu muke ti: «Me ndi mbwuru a Apolose!» Be ka lili ti anga baara bwohonon o? 5 Apolose nande ali? Poole nande ali? Bo yini a basala bali, baala mu nzili a bo be liisi kana mu Nzaami, bwunu a bu oli ekaba ki ógwi Mfumu kundaa nswe mbwuru mu bo. 6 Me, me aankunu, Apolose aagyirili madza, lo Nzaami aakakwuhu. 7 Mu obo, ka oli wu aakunu bwunu we wu a aakagyirili madza li a mupfunu o, lo Nzaami wu aakakwuhu. 8 Mu kuulu, wu aakakunu ya wu aakagyirili madza bali embe, lo nswe mbwuru sa abagha mufuru a nde bwunu a bu oli esala e nde. 9 Mu kuulu bihi bwohonon lili bandughu mu esala emó ya Nzaami, ya be, be lili nseghe a Nzaami, nzo yi ootwu Nzaami. 10 Bwunu a bu oli bwehe bu oogwi me Nzaami, ti anga mutwu-manzo wu li nsughu, me aantwu bitsini bi bibagha bi nzo, ya mbwuru mukimi aatwu nja yulu a bye. Lo nswe mbwuru asa mayele mu ntwu-ntwu yi ali mu okatwu nde nja yulu a bitsini bibye. 11 Mu kuulu, mbwuru ka kughu ofiritwu bitsini bi bibagha bikimi nja yulu a bi bátswana otwu o, bitsini bi bibagha bibye ngu Yiiisu-Kriste. 12 Ngu okala ti batwu nja yulu a bitsini bi bibagha bibye mu oore, mu ngele, mu mameé mama ntala, mu miti, mu liseghe bwunu we mu ndonjo, 13 esala kii nswe mbwuru sa emononon epankala mu etsughu kii mumfwunu. Etsughu ekye sa esuo nja mbala esala e nswe mbwuru, mu kuulu kye sa ekala etsughu kii mbaa, ya mbaa sa yigyele esala e nswe mbwuru-mbwuru. 14 Kala ti esala kii otwu ki oosala mbwuru nja yulu a bitsini bi bibagha bikuono odzighi, mbwuru

munde sa abagha mufuru. **15** Lo kala ti kye edzighi, nde akala ka bagha mufuru o. Nde sa abvwughu, lo ti anga mbwuru wu aaluru ŋa kara li mile mi mbaa. **16** Be ka lisoolo o ti be lili nzo a Nzaami ya Mufulu a Nzaami aakakala mu be? **17** Kala ti mbwuru tsala nzo a Nzaami, Nzaami sa atsala nde. Mu kuulu nzo a Nzaami yili yi a ngili, ya be lili nzo a Nzaami oyo. **18** Mbwuru anyaa opfiri nyuru a ndeme: Kala ti mbwuru ŋa kara li be aakatsimi ti nde li nsughu mu efaana kii baara ba nsie yi, nyaā nde akala nga-a-lala mpaala akala nsughu. (aiōn **g165**) **19** Mu kuulu bunsugghu bu nsie yi buli lala ŋa mihi mi Nzaami. Mu kuulu básono ti: «Nzaami aakabagha bansugghu mu myere mimi mayele ma bomo ma mabi.» **20** Ya báfirisono bu: «Mfumu soolo bitsimi bi bansugghu. Nde soolo ti bye ka bili bibi mubwughu o.» **21** Mu obo, mbwuru anyaa okala a mutwunu mu baara, mu kuulu byehene bili bibi ndaa be: **22** Ngu okala Poole, ngu okala Apolose, ngu okala Sefase, ngu okala nsie, ngu okala laama, ngu okala lipfu, ngu okala matala mama lolo, ngu okala matala ma maagya, byehene bili bibi ndaa be. **23** Lo be, be lili baba Kriste, ya Kriste li wu a Nzaami.

4 Mu obo, baara bafaana omono bihi ti anga basala ba Kriste, ti anga mimbiri mi mili a leme lii oluo engarŋma ki mansweghe ma Nzaami. **2** Lo mandagha ma baakaluomo kundaa mimbiri, me mu okala baara ba baakakebe mukihi wu bálabá bo. **3** Ngu okala ti be lilamana me, bwunu we ba lamana me ŋa bala a muyala, mu me ka oli ndagha o. Me meme ka ndamana nyuru a me o. **4** Mu mukolo a me, me ka nsoolo ndagha si mō o. Lo ka mu nkooro a obo me aamorjono ti anga wu a nsumu o. Me Mfumu aakalamana me. **5** Mu obo, ka litswama olamana mbwuru o nsomo matala ma ókuru Mfumu mato, nsomo Mfumu agya. Nde sa apaha ŋa tse-tse mansweghe ma mali kunsá mpyibi yi a laŋa-laŋa ya sa asuo ŋa mbala bitsimi bi mikolo mi baara. Ojo nswe mbwuru akala aabagha nsia yi aafa kundaa Nzaami. **6** Bandughu ba me mu kana, me mu nkooro a be me aansuo mandagha mamó mu efaana kii meme ya Apolose. Me mu efaana ekye be liigyighi onyaā oluru milili mi bási mu Bisono. Mpaala be linyaā olwulu mu mubili a nyuru bu lisomo mu engulu kii ndaa mumō bwunu we kii ndaa wu muke. **7** Mu kuulu, mu emakye we li mu okamorjono ti we

bvulu ba bake? Emakye we li a kye kiili ka ogwa bágwi we kye o? Ya kala ti ogwa bágwi we kye, mu emakye we li mu okasa mutwunu, ti anga ka mu ogwa bágwi we kye o? **8** Be ayi limaabagha bilogho byehene! Be ayi bisini! Be ayi mikogho, lo bihi ka lili mikogho o. Mu engarŋma me ndzyi ti be likala nkara a mikogho mpaala bihi si likala mikogho emō ya be. **9** Mu kuulu, me bu nsimi ti Nzaami aatwulu bihi ŋa kyaā, bihi bantumu mu okala ŋa ebini kii masini. Bihi ayi lili ti anga baara ba baatsyiri mukakana a lipfu, ba baasuo ŋa ebini kii baara bwohono, ŋa nkulu a bangye-yulu ya ŋa nkulu a baara. **10** Bihi, bihi lili banga-a-lala mu nkooro a Kriste, lo be, be lili bansugghu mu Kriste. Bihi, bihi lili ba bakolo, lo be, be lili a mpini. Be, be lili baara baba nsia, lo bihi, bihi lili babo ba baagwene okagwa budziri. **11** Tee mu matala ma, bihi lili mu okakpa nzala, bihi lili a nyoro, bihi lili mpene, bali mu okakaha bihi nswa-nswa, bihi lili mu okabulugye magye-agye. **12** Bihi lili mu okamono mpara mu okasala mu myaā mi bihi bameme. ŋa baakatughu bihi, bihi liikaseme, ŋa baakamwehē bihi kimini, bihi liiakuru mukolo. **13** ŋa baakaburulu bihi mandagha, bihi liikagwa babake mpama. Tee mu matala ma, bihi ayi lili ti anga mubviini a nsie, bisagha bi ookatsili baara bwohono ku yala. **14** Me ka nsono be mandagha ma mu otwuhu be budzwa o, lo mu ogyehe be ti anga baana ba me baba mukolo. **15** Mu kuulu, ngu okala ti be likughu okala a mapfwunu kwumu ma mimbiri mu Kriste, be ka lili a bataara balagha o. Ngu me aamburu be mu Yiisu-Kriste mu Nsia yi Mbwe. **16** Mu obo, me ngwi be mpama: Liikanama efaana e me. **17** Me mu obo me aangweghe be Timote, mwana a me wu mukolo wu bakugghu osa kana mu nde mu Mfumu. Nde sa akalibili be mweē mu nzya-nzyara a me mu Yiisu-Kriste, ti bwunu a bu aakanduo me yo mu bibini byehene, mu mabwunu ma Nzaami mwohono. **18** Ndaama a baara ŋa kara li be baalwulu mu mubili a nyuru, bu batsimi ti me akala ka ayamono be o. **19** Ankoho, edzi-dzighi me ndi mu ogya kundaa be kala ti Mfumu dzyi, ya me sa nsoolo lileene li baara ba balwulu mu mubili a nyuru, lo ka mbiili a bo o. **20** Mu kuulu Empu e Nzaami ka eli mu mbiili o, lo mu lileene. **21** Be bunu lidzyi? Me ngya kundaa be ya mukaana bwunu we ya mukolo wu alwulu mu dzyi ya mufulu wu a edzuunu?

5 Baara bali mu okabulubili mu bibini byehene ti ŋa kara li be oli a enkwunu, enkwunu kiili kaala nkini ka bámaamono kye kundaa baala ka baakasa kana mu Nzaami o. Mu kuulu mumō ŋa kara li be aato mu eteese kii okabvughu mbughu ya mukala a taara a nde! **2** Lo be liilwulu mu mubili a nyuru! Ali ofaana ti be likala kunsá minyoō tee mu matala ma baamaha wu aagyighili ndagha yi obo ŋa kara li be. **3** Me ngu wuulu, ngu okala ti me ka ndi emō ya be mu musunu o, lo mu mufulu me ndi emō ya be, ya me maandamana mbwuru wu aagyighili ndagha yi obo, ti anga me ndi ŋa kara li be. **4** Ŋa akala liibvujunu be mu nkumu a Mfumu a bihi Yiiisu, mehe si sa nkala ya be mu mufulu ya mu lileene li Mfumu a bihi Yiiisu. **5** Lityeghe mbwuru wu obo ŋa myaā mi Satana mu kuulu nyuru a nde yipfighili, mpaala mufulu a nde abvwughu mu etsughu e Mfumu. **6** Ka oli a ndagha yi liikala a be mubili a nyuru o! Be ka lisoolo o ti ndaama a pfini yiikasa ti nkpara a mampa yohono yifuulu? **7** Limaha pfini li likulu mpaala be likala nkpara a mampa yi nyaghara. Mu engarjma be lili ba bagwene a pfini. Mu kuulu Kriste, mwana a endoomo e bihi kii Paake, bágwi nde ti anga mukaba. **8** Mu obo, litswe lisa kyiri kii gwene a pfini li likulu, ngu okala pfini lili mandagha ma mabi ya mukolo mubi, lo ya mampa ma magwene a pfini, mu bitsimi bi bitsyeme ya mu engarjma. **9** Me aansono be mu mukaana a me ti be ka lifaana okala a endughu ya baara banga-a-enkwunu o. **10** Me bu mbili obo, ka mu nkooro a baara bwohonono banga-a-enkwunu ba bali mu nsie yi o, bwunu we banga a ntono a nzi, ba baakagwohonono bilogho bi baara, ya ba baakasamana banzaami baba mpya. Kala ti áli obo, nkini be lifaana opala mu nsie. **11** Mu matala ma, me aansono be mpaala be linyaā okala emō ya mbwuru wu liita be ti ndughu mu kana, lo nde li nga-a-enkwunu, bwunu we li a ntono a nzi, aakasamana banzaami baba mpya, aakatughu baara, li enkolo-mala, aakagwohonono bilogho bi baara. Mbwuru wu obo, be ka lifaana si odza emō ya nde o. **12** Mu kuulu, ngu me mfaana olamana baara baala ka bali mu libwunu o? Ya baara ba bali mu libwunu, ka be lifaana olamana bo o? **13** Baara ba bali ku mbala a libwunu me Nzaami akala aalamana bo. «Libyi wu mubi ŋa kara li be.»

6 Ŋaala mbwuru mumō mu be li a ndagha ya mbwuru mukimi, bunu nde akughu osa nde mumfwunu ŋa nkulu a bansughu a lamana ba bagwene a kana mu Nzaami, lo ka ŋa nkulu a baana ba Nzaami o? **2** Be ka lisoolo o ti me baana ba Nzaami akala baalamana nsie? Ya kala ti me mu be akala baalamana nsie, bunu be ka likughu olamana mandagha ma magwene a mupfunu o? **3** Be ka lisoolo o ti me bihi-a-be akala liilamana bangye-yulu? Mu obo mu emakye bihi-a-be ka likughu olamana mandagha ma matala bumweē bu o? **4** Mu obo, kala ti be lili a muyala ya banganda mu mi mitala mandagha mama bumweē, be liikagwolo bansughu a lamana baara ba ookamono libwunu li Nzaami ti bo ka bali a mupfunu o! **5** Me ndyele obo mu otwuhu be budzwa. Mu obo, ŋa kara li be ka oli a mbwuru si mumō wuli a bunsughu wu kughu olamana bandughu ba nde mu kana o? **6** Lo bunu ndughu mu kana mumō, li mu okasa ndughu wu muke mumfwunu ŋa nkulu a bansughu a lamana ba bagwene a kana mu Nzaami! **7** Mu mi mitala be, be ayi bikwono bu lili a mimfwunu be a be. Mu emakye be lili mu ogwene okakuru mukolo mu mandagha maala ka mali mama nsumu o? Mu emakye be lili mu ogwene okakihi ti bagwohonono be bilogho bi lili a bye? **8** Lo me be lili mu okagyighili mandagha maala ka mali mama bunsunu o ya lili mu okagwohonono bilogho bi babake, ya bo bali bandughu mu kana! **9** Be ka lisoolo o ti ba bagwene a bunsunu akala ka bagwolo pfa li Emfumu e Nzaami o? Ka lipfiri manyuru ma beme o: Ka oli banga a enkwunu o, ba baakasamana banzaami baba mpya, ba baakabvughu mbughu ya bakala bwunu we balumu ba banganda, babaghala ba bali a bipfu bi bakaha, babaghala ba baakabvughu mbughu ya bambaala babaghala, **10** banga a pfyibi, banga a ntono a nzi, binkolo-mala, banga a bitughu bwunu we ba baakagwohonono bilogho bi baara, bo ka bagwolo pfa li Emfumu e Nzaami o. **11** Ankoho obo me bu óli babake ŋa kara li be. Lo be ayi baaswagha be, be ayi baasi be baba ngili, be ayi baba bunsunu mu nkumu a Mfumu Yiiisu-Kriste ya mu Mufulu a Nzaami a bihi. **12** Me ndi a muswa mu ogyighili mandagha mwohonono, lo mandagha mwohonono ka mali a ndaana o. Me ndi a muswa mu ogyighili mandagha mwohonono, lo me, me ka nkihi okala nkana a elogho si emō o. **13** Bi-odza bili bibi mila, ya mila mili

mimi bi-odza. Nzaami sa adzihibi bi-odza ya mila. Lo nyuru ka yili yi a enkwunu o, yo yili yi a Mfumu, bwunu a bu oli Mfumu wu a ndaa nyuru. **14** Ankoho Nzaami wu aasiili Mfumu ŋa kara li ba bákpi, sa asiili bihi si ŋa kara li ba bákpi mu lileene li Nde. **15** Be ka lisoolo o ti manyuru ma be mali binama bi nyuru a Kriste? Me nkughu ogwolo binama bi nyuru a Kriste mu osa bye binama bi nyuru a mukaha nga a enkwunu? Si okala ka bunu! **16** Be ka lisoolo o ti mbwuru wu aabvughu mbughu ya mukaha nga a enkwunu bo ya nde ayi nyuru mō? Mu kuulu bályele ti: «Bo bansa buolo sa bakala nyuru mō.» **17** Lo munde wu aakala emō ya Mfumu li ya Nde mu mufulu mumō. **18** Libara enkwunu. Nswe lisumu li oogiyighili mbwuru lili ku mbala a nyuru a nde, lo wu aasi enkwunu aasi lisumu mu nyuru a ndeme. **19** Bunu, be ka lisoolo o ti nyuru a be yili nzo a Mufulu a Ngili wu li mu be, Mufulu wu oogwi be Nzaami? Manyuru ma be ka maafirisiyili mama ndaa beme o, **20** mu kuulu bákwlulu be mu mutala wu bvulu. Mu obo liikasyighi Nzaami mu manyuru ma be.

7 Mu mi mitala mandagha ma liisono be me, oli bubwe ti baghala anyaa obvughu mbughu ya mukaha. **2** Lo buulu baara banyaā okasa enkwunu, oli bubwe ti nswe baghala akala a mukala a nde, ya nswe mukaha akala a mulumu a nde. **3** Baghala faana okakuhu mandagha ma oli a mukala a nde nzala a mo, ya mukala faana si okakuhu mandagha ma oli a mulumu a nde nzala a mo. **4** Mukaha ka li a litumu mu nyuru a ndeme o, lo mulumu a nde li a litumu mu nyuru a nde. Bwunu o bo si, mulumu ka li a litumu mu nyuru a ndeme o, lo mukala li a litumu mu nyuru a nde. **5** Mulumu ya mukala, be ka lifaana okalighi banganda manyuru ma be o, kala ka yini a bu ligwihini mu onyaa obvughu mbughu mu mana matala mpaala likasamana. Lo ŋa nseele, lifiribvughu mbughu, kala pele Satana sa abagha mpeene yi otsihi be, bu ligwene oleene mu okuru manyuru. **6** Mandagha ma ndyele me be ka mali litumu o, yini a bitsimi me nsuo be. **7** Me ali ndzyi ti babaghala bwohonon bakala ti anga me. Lo nswe mbwuru li a ekaba kii bwehe kii lisobo ki ógwi nde Nzaami: Mumō li a ekaba kii nde, wu muke si li a ekaba kii nde. **8** Kundaa bamfi ya kundaa bapfiili baba bakaha, me ndyele ti bubwe bo bakala ti anga me. **9** Lo kala ti bo

ka bakughu oleene okuru manyuru ma bo o, bo bafaana okie. Bubwe bo bakie, mu kuulu banyaā okamono mpara yi empala. **10** Kundaa ba bákíe, me ngwi bo litumu li, litumu li ka lifi kundaa me o, lo kundaa Mfumu: Mukaha ka faana okaghaba ya mulumu a nde o. **11** Kala ti nde aakaghaba ya mulumu a nde, lo nde anyaa ofirikie bwunu we nde afirigwihini ya mulumu a nde. Ya mulumu anyaa obyí mukala a nde. **12** Kundaa babake me ndyele bu ka Mfumu lyele o, lo me ndyele: Kala ti ndughu mu kana li a mukala wu gwene a kana, ya wu kihi okala ya nde, lo nde anyaa obihi nde. **13** Kala ti mukaha li a mulumu wu gwene a kana ya kala ti nde kihi okala ya nde, nde anyaa obihi mulumu a nde. **14** Mu kuulu, mulumu wu gwene a kana ayi li mwana a Nzaami mu nzili a mukala a nde, ya mukaha wu gwene a kana ayi li mwana a Nzaami mu nzili a mulumu a nde. Kala ti ka oli obo o, nkini baana ba be bali ba basunumu, lo bo bali baba ngili. **15** Lo kala ti wu gwene a kana dzyi okaghaba ya mulumu bwunu we mukala a nde, nyaā nde akaghaba! Ndughu mu kana wu mukaha bwunu we wu baghala ka aafirisiyili a munama ya nde o. Nzaami áti be mbili mu okala mu edzuunu. **16** Mu kuulu, bunu-a-bo be liisoolo kala ti me we mukala akala aabvwuhu mulumu a we? Bwunu we, me we mulumu akala aabvwuhu mukala a we? **17** Ndagha yinke me yi, nswe mbwuru faana okakala mu eteese ki ógwi nde Mfumu, bwunu a bu áli nde ŋa óti nde Nzaami mbili. Mamo mandagha ma aakantummu me kundaa mabwunu ma Nzaami mwohonon. **18** Mbwuru átswama osomo nzo a mbaa ŋa óti nde Nzaami mbili? Nyaā nde akala bwunu obo. Mbwuru nkini áli ka asomo nzo a mbaa o ŋa óti nde Nzaami mbili? Nde anyaa osomo nzo a mbaa. **19** Osomo nzo a mbaa ka yili ndagha o, ogwene osomo nzo a mbaa si ka yili ndagha o. Ndagha yiluru mupfunu me mu osalala mikyene mi Nzaami. **20** Nyaā nswe mbwuru akala bwunu a bu áli nde ŋa óti nde Nzaami mbili. **21** We nkana áli ŋa óti we Nzaami mbili? Ka mono mukolo mpara o. Lo kala ti we kughu obagha mpeene mu okala bunya-nyaā, bagha ndaana mu mpeene oyo. **22** Mu kuulu nkana wu óti Mfumu mbili li mbwuru wu bunya-nyaā mu Mfumu. Bumō si mbwuru wu bunya-nyaā wu óti Mfumu mbili li nkana a Kriste. **23** Nzaami ákwulu be mu mutala wu munene: Ka likala bankana ba baara o. **24** Bandughu mu kana,

nswe mbwuru akala ɲa mihi mi Nzaami bwunu a bu ʼali nde ɲa ʼoti nde Nzaami mbili. **25** Mu mi mitala minkyini, me ka ndi a litumu li lifi kundaa Mfumu o, lo me etsimi nsuo, etsimi kii mbwuru wuulu mu nkooro a ngebe a Mfumu, be likughu osa kana mu nde. **26** Mu nkooro a mpara yi a matala ma, me bu ntsimi ti obvulu bubwe kundaa nswe baghala mu okala bwunu a bu ali. **27** We li a mukala? Ka sagha okaghaba ya nde o. We ka li a mukala o? Ka sagha okie o. **28** Lo kala ti we kie, we ka si lisumu o. Ya kala ti munkyini kie, lo nde ka si lisumu o. Lo baara ba bʼakie sa bamono mpara yi alagha mu bumwee bu bo. Ya me, me ndzyi ogyehe be mpaala mpara oyo yinya obwa mu be. **29** Bandughu mu kana, me bu ndyele: Matala ayi mapfi. Obaana matala ma, nyaʼa ti babaghala ba bʼakie bakala ti anga bo baala ka bali a bakala o. **30** Baara ba bali mu okalili bakala ti anga bo baala ka bali mu okalili o. Baara ba bali kunsu esee bakala ti anga bo baala ka bali kunsu esee o, baara ba bali mu okaswumu bakala ti anga bo baala ka bali a elogho o. **31** Babo ba bali mu okabagha ndaana mu bilogho bi nsie bakala ti anga bo baala ka bali mu okabagha ndaana mu bye o. Mu kuulu nsie yi bwunu a bu bʼagyili yo sa yiluru. **32** Me ndzyi ti be linya okala a minyo. Baghala wu a mfi aakasa mukolo mu mandagha ma Mfumu. Nde aakasagha bunu-a-bo aagwa Mfumu esee. **33** Lo baghala wu aakie aakasa mukolo a nde mu mandagha ma nsie, nde aakasagha bunu-a-bo aagwa mukala a nde esee. **34** Ya mukolo a nde li wu aakaghaba. Bwunu obo si, mukaha wu a mfi bwunu we munkyini aakasa mukolo mu mandagha ma Mfumu mpaala akala wu a ngili mu nyuru ya mu mufulu. Lo mukaha wu aakie aakasa mukolo mu mandagha ma nsie, nde aakasagha bunu-a-bo nde aagwa mulumu a nde esee. **35** Me ndyele mandagha mamu mu nkooro a ndaana a be, lo ka mu oleghebe be mwere o, mpaala be likasa mandagha ma mafaana, ya be likala emʼo ya Mfumu, gwene a oluhu matala mu mandagha mama muyanjana. **36** Lo kala ti mbwuru tsihi ti nde ka kughu okuru mukolo o ɲa nkulu a munkyini a nde wu aagwi nde bilyimi, kala ti empala eetswi nde, ya ti ofaana okala obo, lo agyighili bu adzyi nde, nde ka asa lisumu o, akie o nde. **37** Lo munde wu gwolo munkana mu mukolo a nde mu ogwene obvughu mbughu ya munkyini a nde wu aagwi bilyimi, gwene a ku batyihi nde kunda baara,

bu ali a bitsimi bi nde byehene, munde sa asa bubwe. **38** Mu obo, munde wu aakie munkyini a nde wu aagwi bilyimi aasi bubwe, ya wu gwene okie nde sa abvulu osa bubwe. **39** Mukaha wu bʼakie sa akala wu aanabara ya mulumu a nde mu matala mwohonu ma oli mulumu a nde mwee. Kala ti mulumu kpi, nde li bunya-nyaʼa mu okie wu adzyi nde, lo yini a mu Mfumu. **40** Lo me bu ntsimi ti nde sa abvulu okala a esee, kala ti nde kala bwunu a bu ali. Ya me bu ntsimi ti mehe si ndi a Mufulu a Nzaami.

8 Mu mandagha ma matala tuo li bʼagwi mukaba kundaa banzaami baba mpya, bihi lisoolo ti bihi bwohonu lili a ligyhaba. Ligyhaba liikagwa mubili a nyuru, lo dzyi liikakwuhu kana. **2** Kala ti mbwuru aakatsimi ti nde soolo mandagha, lo nde nkini ka soolo mandagha bwunu a bu bafaana osoolo mo o. **3** Lo kala ti mbwuru aakadzyi Nzaami, Nzaami soolo nde. **4** Mu obo, mu mi mitala odza tuo li baagwi mukaba kundaa banzaami baba mpya, bihi lisoolo ti banzaami baba mpya mu nsie ka bali banzaami baba nganma o, ya ka oli a Nzaami mukimi o, kala ka yini a Nzaami mumʼo o. **5** Mu kuulu, kala oli nganma ti oli a ba baakata ti banzaami, ngu okala ku yulu, ngu okala ɲa nsie, ya oli nganma kundaa bo ti oli a banzaami balagha ya bamfumu balagha, **6** lo kundaa bihi, Nzaami li yini a mumʼo, Taara, nde aagyighili bilogho byehene, ya bihi lili baba mwee mu nkooro a nde, ya Mfumu li yini a mumʼo, me Yiisu-Kriste, bilogho byehene bʼagyighili mu nde, ya bihi lili mwee mu nkooro a nde. **7** Lo baara bwohonu ka bali a ligyhaba li mandagha ma o. Mu kuulu, baara babake ba bʼakasamana banzaami baba mpya, tee sonali, baakadza tuo lilo ya bitsimi biili ti baagwi lo mukaba kundaa banzaami baba mpya. Mu obo, bitsimi bi bo bili bi bigwene a makpa ya bili a mubviini mu nkooro a bilogho bibye. **8** Ankohe, ka oli bi-odza biikasa ti bihi-a-be libehene ya Nzaami o: Kala ti bihi ka lili bye o, ka oli a elogho ki baamaha mu bihi o, kala ti bihi lili bye, ka oli a elogho ki baabwehe mu bihi o. **9** Lo lisa mayele mpaala bunya-nyaʼa bu be bunyaʼa okala limee li ookakubu ba bagwene a makpa mu kana makya. **10** Mu kuulu, kala ti mbwuru wu gwene a makpa mu kana mono we, we wu li a ligyhaba, mu okadza munsu nzo yi baakasamana banzaami baba mpya, bunu, bitsimi bi nde ka bigwa nde

mpama mu okadza tuo li bázwi mukaba kunda
banzaami baba mpya o? **11** Me obo, mbwuru
wu gwene a makpa mu kana, nde wu li ndughu
mu kana wuulu Kriste ákpi mu nkooro a nde,
aakagwujumu mu nkooro a ligyhaba li we. **12** Mu
matala ma liikasa bihi-a-be lisumu lili
obo kunda bandughu mu kana ba bagwene
a makpa mu kana, bihi-a-be liikabwihi kana li
bo ya liikasa lisumu kunda Kriste. **13** Me mu
obo, kala bi-odza bikughu obwihi ndughu a me
mu kana mu lisumu, si okala ka bunu me ka
nkughu ofiridza tuo o, mpaala me nyaá obwihi
ndughu a me mu kana mu lisumu. (aiñ g165)

9 Bunu, me ka ndi bunya-nyaá o? Me ka ndi
ntumu o? Me ka ámono Mfumu a bihi Yiisu
o? Be beme ka lili bimburi bi esala e me mu
Mfumu o? **2** Kala ti kunda babake me ka ndi
ntumu o, lo kunda be me ndi ntumu, mu
kuulu be lili enyeme ki esala e me kii buntumu
mu Mfumu. **3** Yi me mvuru yi okala nyuru yi
aakangwa me kunda babo ba baakalamana
me: **4** Bunu, bihi ka lili a muswa mu odza ya
ogma o? **5** Bihi ka lili a muswa mu okabuludzie
ya nkele mu kana wu aakala ti anga mukala a
bihi o? Bihi ka lili a muswa mu okabuludzie
ya nkele mu kana wu aakala ti anga mukala a
bihi, ti bu ookasa bantumu babake, bambwee
ba Mfumu ya Sefase o? **6** Bwunu we, yini a bihi
a Baranabase lili a muswa mu osala mu obagha
bi-odza? **7** Nande aakasa esala ki bumbumbulu
mu nzi yi a ndaa ndeme? Nande aakakunu
nseghe a bviini gwene a bimburi bi yo odza?
Nande li mu nkaala a mukaá a bibuulo ya kwono
okabvughu mu mabyene ma bibuulo bibye?
8 Bunu, yini a mu embwuru me mbili obo?
Mikyene si ka miikalyele obo o? **9** Mu kuulu
básono mu mikyene mi Moyidze ti: «We akala
ka kuru muña a ngoomo wu li mu okadzyara
bimburi o.» Bunu, Nzaami aakamono mukolo
mpara mu bangoomo? **10** Ka oli mu nkooro a
bihi nde aakabili obo o? Heé, me mu nkooro a
bihi básono obo. Mu kuulu, munde wu aakapuru
nseghe faana okapuru ya emiini, ya munde
wu aakadzyara bimburi faana okadzyara ya
emiini kii obagha kaba li bimburi lili ndaa nde.
11 Kala ti bihi liikunu bilogho bibi mufulu mu
be, lo ndagha yi okinjimi ñana-ño yi li kala
ti bihi litolo mu be bilogho bibi ña nsie? **12**
Kala ti babake bali a muswa munde mu be, lo
bunu bihi ka likughu okala a nde ku obvulu

ya bo o? Lo bihi ka liisalala muswa munde o.
Bihi liikakuru mukolo mu mandagha mwohonu
mpaala linyaá okahaba Nsia yi Mbwe yi a Kriste
mu otsajama. **13** Be ka lisoolo o ti ba baakasala
mu nzo a Nzaami bo okadza bi biikafa mu nzo a
Nzaami? Ya be ka lisoolo o ti ba baakasala ña
baakatsughu mikaba baakabagha kaba li bo mu
bi baakatsughu o? **14** Bwunu obo si Mfumu ázwi
litumu ti ba baakatsala Nsia yi Mbwe bafaana
okabagha bi-odza mu Nsia yi Mbwe. **15** Lo me
ngu wuulu ka aakansalala ndagha si mō mu
miswa mimye o. Ya me ka aansono mandagha
ma mu kuulu bagwa me mye o. Bubwe me
nkpa ya ti me nkhi ti mbwuru agwohonu me
mutwunu wu ndi a me mu ndagha oyo! **16** Mu
kuulu kunda me, otsala Nsia yi Mbwe ka yili
ndagha yi osa mutwunu o, lo yo yili ndagha yi
mfaana me osa. Mu obo, nyii yi alagha kunda
me kala ti me ka ntsala Nsia yi Mbwe o! **17**
Kala ti me mu dzyi li meme aakabulunsala, me
sa mbagha mufuru. Lo kala ti ka mu dzyi li
meme o, me yini a esala ki bákwighi me ndi
mu okabulunsala. **18** Mufuru a me wunu? Me
mu ogwa kuu bwunu Nsia yi Mbwe yi ndi mu
okabulunsala me, gwene a osalala miswa mi
ookagwa me Nsia yi Mbwe yi. **19** Mu kuulu, ngu
okala ti me ndi bunya-nyaá ña mihi mi baara
bwohonu, meme aankihi okala nkana a baara
bwohonu, mpaala me mbagha Kriste baara
balagha. **20** Ña kara li ba-Dzwife, me áakankala ti
anga mu-Dzwife, mpaala me mbagha Kriste ba-
Dzwife. Ña kara li baara ba bali kunsu mikyene
me áakankala ti anga mbwuru wu li kunsu
mikyene mpaala me mbagha Kriste babo ba bali
kunsu mikyene, ngu okala ti meme ka ndi kunsu
mikyene o. **21** Ña kara li ba bagwene a mikyene
me áakankala ti anga wu gwene a mikyene
mpaala me mbagha Kriste babo ba bagwene a
mikyene. Ka mu olyele o ti me gwene a mikyene
mi Nzaami, mu kuulu Kriste li mikyene mi me.
22 Ña kara li ba bagwene a makpa, me áakankala
ti anga wu gwene a makpa, mpaala me mbagha
Kriste babo ba bagwene a mapka. Me aadzyi
okala ti anga baara bwohonu babo, mpaala me
mbvwuhu ndaama a baara. **23** Ya me aangyighili
mandagha mwohonu mamu mu nkooro a Nsia yi
Mbwe, mpaala me mbagha ndaana mu yo. **24** Be
ka lisoolo ti ba baakasa engili-a-ngi ku mbala-a-
bimpa, bo bwohonu baakabara ntyini, lo yini a
mumō aakabagha embwaá? Behe si liikabara
ntyini ti anga baara ba baabagha embwaá. **25**

Baara bwohono ba baakasa bimpa bibi mantiyini baakakebe mangili mama mpini. Bo baakasa obo mu obagha muburu wu aakapfighili, lo bihi liikasa obo mu obagha muburu wu aagwene okapfighili. **26** Mu obo, me ndi mu okabara ntyini, lo me ka ndi mu okabara embara-ambara o. Ti anga munde wu aakadzwana bikyini bibi minkono, me ka ndi mu okakaha minkono enkaha-a-nkaha o. **27** Lo me ndi mu okamwehē nyuru a meme mpara, me ndi mu okasa yo kunsu litumu li me, mpaala me bu ntsala Nsia yi Mbwe kundaa babake, Nzaami anyaa otwulu meme mu libee.

10 Bandughu ba me mu kana, me ka ndzyi o ti be lidzimini ti bataara ba bihi bwohono báli ku nsie a edzi ki ékakala bo, ya bo bwohono bápala mubu. **2** Bo bwohono bábagha liboghoru li Moyidze munsa edzi ya munsa mubu. **3** Bo bwohono báli bi-odza bimō bibi mufulu. **4** Ya bo bwohono báŋmi madza mamō mama mufulu, mu kuulu bo bákaŋma madza mu limeē lili mufulu li líkagye nzili mō ya bo, ya limeē lilo me Kriste. **5** Lo Nzaami ka ámono esee mu baara balagha ŋa kara li bo o, mu obo bo bákpi ku syehē. **6** Mandagha mamu mali bifaana kundaa bihi, mpaala bihi linyaā okala a manzala ma mabi, ti anga bu báli a bo. **7** Ka likala ba baakabuono banzaami baba mpya o ti anga baara babake ŋa kara li bo, bwunu a bu básono ti: «Baara bábwī nsini mu odza ya mu oŋma, ya bátemene mu oŋene.» **8** Bihi-a-be linyaā osa enkwunu, ti anga bu ósi baara babake ŋa kara li bo. Mu etsughu etsyini, bo bákpi baara mapfwunu makwumu-mwolo ya matere. **9** Bihi-a-be linyaā okatsihi Kriste, ti anga bu ósi baara babake ŋa kara li bo, bantaala bátswi bo ya bo bákpi. **10** Ka likanŋunu o ti anga bu ókanŋunu baara babake ŋa kara li bo, ngye-yulu a lipfu ádzwi bo. **11** Ankoho, mandagha mamu mábwī mu bo mpaala makala bifaana ya básono mo mu ogyehē bihi, bihi ba liito mu matala mama masini. (aíōn g165) **12** Obo me buulu, mbwuru wu li mu okatsimi ti nde li mu mukiri asa mayele mpaala anyaa obwa. **13** Bigyeele bi liikabwana a be bili bi ookabwana a baara bwohono. Lo Nzaami li wu bakughu osa kana mu nde, nde ka kughu ogwa muswa o ti batsihi be oluru mpini a be. Kunsu bigyeele, nde sa agwa be mpeene mpaala be lileene okuru mukolo mu bye. **14** Me mu obo bandughu ba me

baba mukolo, liikabara osamana banzaama baba mpya. **15** Me mbili kundaa be ti anga kundaa baara ba bali a mayele. Litsimi beme kala ti mandagha ma ndyele me mali mabi bwunu we mabwe. **16** Ebaha kii liseme ki liikabvurulu bihi matuono kundaa Nzaami ka eekasa bihi bumō ya makili ma Kriste o? Limpā li liikatsyiri bihi ka liikasa bihi bumō ya nyuru a Kriste o? **17** Buulu limpā lili yini a limō, bihi lili balagha, bihi bwohono lili nyuru yini a mō. Mu kuulu bihi bwohono liikakaba limpā lyini lilo. **18** Limono baara ba Isarayeke ba baakadza banyama ba baagwi mikaba, bo ka bali bumō ya ebini ki baakagwa Nzaami bikaba o? **19** Me nki ndagha ndzyi olyele? Tuo li baagwi mukaba kundaa banzaami baba mpya lili a mupfunu? Bwunu we banzaami baba mpya bali a mupfunu? **20** Pele! Lo mikaba mi ookagwa ba bagwene osoolo Nzaami, bo baakagwa mye kundaa mifulu mi mibi lo ka kundaa Nzaami o. Lo me ka ndzyi ti be likala bumō ya mifulu mi mibi o. **21** Be ka likughu oŋma bviini li lili munsa ebaha e Mfumu ya li lili munsa ebaha ki mifulu mi mibi o. Be ka likughu odza bilogho bi bili ŋa tabele li Mfumu ya bi bili ŋa tabele li mifulu mi mibi o. **22** Bunu, bihi ebaha e Mfumu lidzyi otsumunu? Bihi libvulu nde mu mpini? **23** «Me ndi a muswa mu ogyighili mandagha mwohono», lo mandagha mwohono ka mali a mupfunu o. «Me ndi a muswa mu ogyighili mandagha mwohono», lo mandagha mwohono ka maakakwuhu kana li baara o. **24** Mbwururu anyaa osagha ndaana yi a ndaa ndeme, lo asagha ndaana yi a wu muke! **25** Liikadza bilogho byehene bi baakatyeghe ku yu, gwene a okabulugwa bifwulu bi bikughu osuo mikolo mi be mpara. **26** Mu kuulu «nsie ya bilogho byehene bi bili mu yo bili bibi Mfumu.» **27** Kala ti mbwuru wu gwene a kana ti be mbili mu odza ya nde ya kala ti be likihi, lidza byehene bi baagwa be, wene a ogwa bifwulu bi bikughu osuo mikolo mi be mpara. **28** Lo kala ti mbwururu lyele be ti: «Li tuo li baagwi mukaba kundaa banzaami baba mpya», ka lidza lo o, mu nkooro a mbwuru wu aagyehe be ya mu nkooro a onyaa osuo mikolo mi be mpara. **29** Mukolo mpara wu ndi mu okalyele me, ka ali wu a ndaa be o, lo wu a ndaa wu muke. Mu kuulu, mu emakye mukolo a mbwuru mukimi aalamana bunya-nyaa bu me? **30** Kala ti me aakandza bi-odza bi me mu mu okabvurulu matuono, mu emakye baabili bubi bu me mu

bi-odza bi ndi mu okabvurulu me matuono kundaa Nzaami? **31** Mu obo, ngu okala ti be lili, ngu okala ti be liijmi, nswe ndagha yi liigyighili be, liikagyighili mandagha mwohonu mu ogwa Nzaami nsia. **32** Ka likala limeē li ookubu baara makya o, ngu okala kundaa ba-Dzwife, ngu okala kundaa ba-Ngereke, ngu okala kundaa Libwunu li Nzaami. **33** Me mu obo, mehe si aakansa mpini mu okala wu mubwe kundaa nswe mbwuru mu mandagha mwohonu, bu aakagwene osagha ndaana yi a ndaa meme, lo yi a ndaa baara balagha, mpaala bo babvwughu.

11 Liikanama efaana e me, ti bu aakanama meme efaana e Kriste. **2** Me aakansyighi be bu liikalibili be mweē mu me mu mandagha mwohonu, ya bu liikakebe be maluo ma anduo me be. **3** Lo me ndzyi ti be lisoolo ndagha yi: Kriste li Mfumu a nswe baghala. Baghala li mfumu a mukaha ya Mfumu a Kriste me Nzaami. **4** Nswe baghala wu aakasamana bwunu we wu aakabighili ya mutswi wu báfughu, nde aakatwuhu mfumu a nde budzwa. **5** Lo nswe mukaha wu aakasamana bwunu we aakabighili ya mutswi wu bagwene ofughu, nde aakatwuhu mfumu a nde budzwa mu kuulu nde li ti anga wu baasi nkulu. **6** Kala ti mukaha ka laha etambala o, nyaā bakie nde mfu! Ya kala ti oli budzwa kundaa mukaha mu okala a mfu yi bakie, bwunu we nkulu, lo nyaā nde alaha etambala! **7** Baghala ka faana olaha etambala mu mutswi a nde o, mu kuulu nde li efaana kii nsia a Nzaami. Mukaha li nsia a baghala. **8** Mu kuulu ka bágyighili baghala mu mukaha o, lo mukaha bágyighili mu baghala. **9** Ya ka bágyighili baghala mu nkooro a mukaha o, lo mukaha bágyighili mu nkooro a baghala. **10** Mu obo mukaha faana okala a elyimi ki litumu ŋa yulu a mutswi a nde, mu nkooro a bangye-yulu. **11** Lo mu Mfumu, mukaha ka kughu okala gwene a baghala o, ya baghala ka kughu okala gwene a mukaha o. **12** Mu kuulu, bwunu a bu bágyighili mukaha mu baghala, bwunu obo si baakaburu baghala kundaa mukaha. Ya byehene bifi kundaa Nzaami. **13** Limatsimi ati ndagha yi beme: Oli bubwe ti mukaha asamana Nzaami ku ogwene a olaha etambala mu mutswi? **14** Nsie yomo ka yiikaluo be ti oli budzwa kundaa baghala mu okala a mfu yi nda o? **15** Lo kundaa mukaha, okala a mfu yi nda oli nsia, mu kuulu Nzaami ágwi nde mfu ti anga etambala! **16** Lo

kala ti mbwuru dzyi osa mikeme, bihi ka lili a epfu ekye o, ya Bimvuŋunu bi Nzaami si ka bili a epfu ekye o! **17** Me ka ngwi be masyighi mu mandagha ma andyele me be o, mu kuulu ŋa liikabvuŋunu be, be liibvulukasa bubi ŋa ebini kii bubwe. **18** Nsomo-a-nsomo, me ndi mu okagyughu ti ŋa liikabvuŋunu be mu libwunu, oli a munkaghaba ŋa kara li be, ya me nsi kana ti oli a ndaama a enganjma mu ndagha oyo. **19** Ofaana okala si a munkaghaba ŋa kara li be mpaala basoolo ba baakakebe mukihwi wu bálaba bo ŋa mbihi a ŋa bagyele bo. **20** Mu matala ma liikabvuŋunu be, be ka liikabvuŋunu mu odza bilogho bi Mfumu o. **21** Mu kuulu, mu matala mama odza, nswe mbwuru aakabigini odza bilogho bibi ndaa ndeme. Mu obo, babake baakasyili ya nzala, ya babamō baakakolo mala. **22** Bunu, be ka lili a manzo ku likughu odza ya oŋma o? Bwunu we be libwunu li Nzaami lili mu okatsaala bu liikatwuhu ba bagwene a elogho budzwa? Nki ndagha me andyele be? Me ngwa be masyighi? Pele, mu ndagha yi me ka ngwa be masyighi o. **23** Mu kuulu me aangyagha kundaa Mfumu mandagha ma anduo me be ti: Mfumu Yiisu, mu mpyibi yi bátyeghe nde, ágwolo limpa, **24** ya bu abvurulu matuono kundaa Nzaami, nde átsyiri lo ya ályele ti: «Yi me nyuru a me, yili yi a ndaa be. Liikasa bu mu okalibili mweē mu me». **25** Bu bamana odza limpa, nde ási bwunu obo si mu ebaha, nde ályele ti: «Ebaha ki eli ogwihini ku onyagharu mu makili ma me, liikasa bu mu okalibili mweē mu me matala mwohonu ma akala liikanjma be kye». **26** Mu kuulu, nswe matala ma liidza be limpa li ya liijma be ebaha ki, be sa likatsala nsia a lipfu li Mfumu tee mu matala ma aayabvughuru nde. **27** Me mu obo, mbwuru wu aadza limpa bwunu we oŋma ebaha e Mfumu buulu ka bufaana o, nde sa akala a ebili mu nyuru ya mu makili ma Mfumu. **28** Nyaā ti nswe mbwuru agyighili okeene nzya-nzyara a ndeme nsomo nde adza limpa li ya aŋma ebaha ki. **29** Mu kuulu munde wu aadza ya wu aŋma gwene a okeene nyuru, nde aakadza ya aakanjma mumfwunu a ndeme. **30** Me mu obo oli a babyele ya banga-a-bipfwumu balagha ŋa kara li be, ya baara balagha bamaakpa. **31** Kala ti bihi liikakeene nzya-nzyara a bihi bameme, nkini ka bakaalamana bihi o. **32** Lo ŋa baakalamana bihi, me Mfumu akasyeme bihi mpaala linyaā obwa mu masyeme emō ya baara ba nsie. **33** Me

mu obo bandughu ba me mu kana, mu matala ma liikabvugunu be mu odza, liikakebe babake. **34** Kala ti mbwuru li a nzala, nyaā nde adza ku nzo a nde, mpaala be linyaā okabvugunu mu okadzuru mumfwunu a be beme. Mu mandagha ma masyili, me sa ngyighili mo ŋa akala aangya me.

12 Bandughu ba me mu kana, mu mi mitala bikaba bi mufulu, me ka andzyi o ti be likala kunsu nzi-nzimini. **2** Be lisoolo ti ŋa líli be ba bagwene a kana, baara bákabiri be kundaa banzaami baba bityeghe ba baagwene okabili nkwoono obihí. **3** Me mu obo me ndyele kundaa be ti: Ka oli a mbwuru wuulu, bu abili kunsu Mufulu a Ngili kughu oleye ti: «Epwolo kundaa Yiisu!» Ya mbwuru ka akughu oleye o ti: «Yiisu li Mfumu!» Kala ti, ka oli mu Mufulu a Ngili o. **4** Bikaba bili bibi mawa-mawa, lo Mufulu wu aakagwa bye li mumō, **5** bisala bili bibi mawa-mawa, lo mu osalala Mfumu mumō, **6** bigyighili bili bibi mawa-mawa, lo me Nzaami wunu munde aakagyighili bye byehene mu bo bwohono. **7** Kundaa mbwuru mbwuru Mufulu aakamōjono mu ekaba mu nkooro a bubwe bu baara bwohono. **8** Kundaa mumō Mufulu ágwi ndagha yi bunsughu, kundaa wu muke ndagha yi ligyhaba, mu Mufulu wunu munde. **9** Kundaa wunu kana, mu Mufulu wunu munde, kundaa wu muke bikaba bibi odzuhu mabyele, mu Mufulu wunu munde. **10** Kundaa mumō, ogyighili bimaā, kundaa wu muke obighili, kundaa wu muke ogyighili okehene mifulu, kundaa wunu obili mu mandiji mama mawa-mawa, kundaa wu muke obaala mandiji. **11** Myehene mimye yini a Mufulu mumō ya wunu munde aakabulugyighili, bu agwi kundaa nswe mbwuru ekaba, bwunu a bu adzyi nde. **12** Nyuru yili nga-mō lo yo yili a binama bilagha, ya bu oli binama bilagha mu nyuru, binama byehene bibye bili nyuru nga-mō, bwunu obo si oli mu Kriste. **13** Mu kuulu bihi bwohono báborghoro bihi munsu Mufulu mumō mu nyuru nsyini, ba-Dzwife bwunu we ba-Ngereke, bankana bwunu we baara baba bunyanyaā, ya bihi líinjmi bibi mu Mufulu nga-mumō munde. **14** Nyuru ka yili a enama yini a emō o, lo binama bilagha. **15** Kala ti kwulu elyele ndiri: «Buulu me ka ndi kwogho o, me ka ndi mu nyuru o», bunu, kye sa enyaā okala enama e nyuru? **16** Kala ti tswi lilyele ti: «Buulu me ka ndi lihi o, me ka ndi mu nyuru o»,

bunu lo sa linyaā okala enama e nyuru? **17** Kala ti nyuru yohono yili lihi, bunu yo yiigvughu? Kala ti nyuru yohono yili tswi, bunu baagyughu mpihi? **18** Lo Nzaami átwulu nswe enama mu nyuru, bwunu a bu adzyi nde. **19** Kala ti bye byehene bili enama emō, nyuru bunu yiikala? **20** Binama bili bilagha, lo nyuru yini a mō. **21** Lihi ka likughu oleye kundaa ekee o ti: «Me ka ndi a nzala a we o», mutswi si ka kughu oleye kundaa myili o ti: «Me ka ndi a nzala a be o.» **22** Ngu okala binama bi nyuru bi biikamōjono bi bigwene a mpini, bili a mupfunu. **23** Bibye bi liikamono ti ka bili bibi budziri o, me bibye bihi liibvulu okagwa budziri. Bibye bi biikamwehē bihi budzwa ŋa mihi mi baara, me bibye liibvulu okafughu. **24** Bibye bi biigwene okamwehē bihi budzwa ŋa mihi mi baara, ka bili a nzala a budziri o. Lo Nzaami ágyighili nyuru mu eteese kii ogwa budziri bu bubvulu kundaa bi bigwene a budziri, **25** mpaala onyaā okala a munkabala munsu nyuru, lo mu kuulu binama bi nyuru bikabaha bibike bye a bye. **26** Kala ti enama etsyini eli mu omono mpara, binama byehene biikakaba mpara a nde, kala ti enama etsyini ebagha nsia, binama byehene bikakaba esee e nde. **27** Be lili nyuru a Kriste, ya nswe mbwuru li enama e nyuru oyo. **28** Mu Emvugunu e Nzaami, Nzaami átwulu nsomo-a-nsomo bantumu, ŋa ebini kii byele mibighili, ŋa ebini kii bitere baluo, ŋa mbihi banga-a-bimaā, ba baakadzuhu mabyele, ba baakabaha baara, mimbiri, ya ekaba kii obili mandiji mama mawa-mawa. **29** Bunu, bo bwohono bali bantumu? Bunu, bo bwohono bali mibighili? Bunu, bo bwohono bali baluo? Bunu, bo bwohono baakasa bimaā? **30** Bunu, bo bwohono bali a ekaba kii odzuhu mabyele? Bunu, bo bwohono baakabili mu mandiji mama mawa-mawa? Bunu, bo bwohono baakabaala mandiji? **31** Liikakala a nzala obagha bikaba bi bibvulu bubwe. Sa me firinsuo be nkara nzili yi bvulu bubwe.

13 Ngu okala ti me mbili mandiji ma baara ya mama banyeghe-yulu, kala ti me ka ndi a dzyi o, me ndi esyeē kii mu boronze ki eli mu okabili bwunu we nguŋu yi aakasa nkele yi alagha. **2** Ngu okala ti me ndi a ekaba kii obighili, ligyhaba li mandagha mwohono mama ensweghe ya osoolo kwohono, ngu okala ti me ndi a kana li liikasobo minguo bibini, kala ti me ka ndi a dzyi o, lo me ka ndi a mupfunu o.

3 Ngu okala ti me nkaba busini bu me bwohono kundaa bawele, ngu okala ti me ngwi nyuru a me mpaala batsughu yo ku mbaa, kala ti me ka ndi a dzyi o, mandagha mamō ka mali a mupfunu mu me o. 4 Dzyi liiakakuru mukolo mu okebe, dzyi liikasa bubwe, lo ka lili a musogho o. Dzyi ka lili a mubili a nyuru o, lo ka lili a nzala a nsia o. 5 Dzyi ka liikagyighili ndagha yi budzwa o, lo ka liikasagha ndaana yi a ndaa ndeme o, lo ka liikabagha nkehe o, lo ka liikalibili mweē mu bubi o. 6 Dzyi ka liikamono esee mu ogwene a bunsumu o, lo dzyi liikamono esee mu engarjma. 7 Dzyi liikasa mandagha mwohono kolokolo, lo liikasa kana mu mandagha mwohono, lo liikasa emiini mu mandagha mwohono, lo liiakakuru mukolo mu mandagha mwohono. 8 Dzyi ka liikafa o. Mandagha mama libighi? Mo sa mafa. Obili mu mandiji? Sa ofa. Ligyahaba? Sa lifa. 9 Mu kuulu yini a ndaama a mandagha bihi-a-be ligyahaba, ya yini a ndaama bihi-a-be liikalyele mu libighi. 10 Lo mu matala ma oogya mandagha mama mukughu, mandagha mama ndaama sa madzimini. 11 Ŋa ándi me muke-muke, me áakambili ti anga muke-muke, me áakantsimi ti anga muke-muke, me áandi a mayele ti anga mama muke-muke. Me bu nkulu, me aansihī mandagha mwohono mama bike-bike. 12 Mu matala ma, bihi-a-be lili mu okamono mu etalatala, nkini ka lili mu ogyighili okamono o, lo etsughu eli ki akala liigyighili omono bihi-a-be. Mu matala ma me nsoolo ndaama a mandagha, lo etsughu eli kiili me sa ngvyighili osoolo bwunu a bu bágyighili osoolo me. 13 Ankoho mu matala ma, mandagha matere ma magwene a masini ngu ma: Kana, emiini ya dzyi. Lo me dzyi li libvulu bunene mu mandagha mansa matere.

14 Liikasagha dzyi, liiakala a nzala a bikaba bibi mufulu, emvulu-ngughu obighili. 2 Mu kuulu munde wu aakabili mu mandiji maala baara ka basoolo o, nde ka aakabili kundaa baara o, lo kundaa Nzaami, mu kuulu mbwuru si mumō ka aakabaghala nde o. Ya mu Mufulu nde aakalyele mandagha mama ensweghe. 3 Lo munde wu aakabili ti anga mubighili, nde kundaa baara aakabili. Nde aakakwuhu kana li bo, nde aakagwa bo mpama, nde aakabuono bo. 4 Mbwuru wu aakabili mu mandiji aakakwuhu kana li ndeme, lo wu aakabighili aakakwuhu kana li libwunu li Nzaami. 5 Me ndzyi ti be bwohono likabili mu mandiji maala baara ka

basoolo o, lo me mvulu odzyi ti be bwohono likabighili. Mbwuru wu aakabighili li a mupfunu wu alagha, nde bvulu mbwuru wu aakabili mu mandiji maala baara ka basoolo o, kala ka yini a mu matala ma aakabaala nde mandagha ma aalyele nde mu otwu libwunu li Nzaami. 6 Bandughu ba me mu kana, mu matala ma limatsimi ati, nki ndaana be liibagha mu me kala ti me ngyi kundaa be ya me mbwi okabili ya be mu mandiji maala baara ka basoolo o ŋa ebini kii ogya a be ndagha yi a osuo be mandagha mama ensweghe ma oosuo me Nzaami, mandagha mama ligyahaba, mandagha mama ngu libighili, mandagha mama oluo? 7 Kala ti bilue bibi makini bi biikapaha likyi, ewebe-a-webe bwunu we nguomo, ka bipaha likyi lili lisobo o, bunu-abo baasoolo ti likyi li, lili ewebe-a-webe bwunu we lili nguomo? 8 Ya kala ti mvulu-a-mvulu yipaha likyi li oogwene obaghala baara, nande aakala mukughu mu odzwana mvulu? 9 Bumō si kundaa be, kala ti ndiji a be ka yilyele ndagha yi oobaghala baara o, bunu baasoolo mandagha ma bali mu okalyele? Lo be lili mu okabili kuu bwunu. 10 Ngu okala ti mandiji ŋa yulu a nsie mali mama mawa-mawa, ka oli a ndiji yi gwene a mambaala o. 11 Mu obo, kala ti me ka nsoolo mambaala ma ndiji a mbwuru o, lo me ndi munzyi kundaa nde, ya nde wu li mu okabili li munzyi kundaa me. 12 Bwunu obo si, mu kuulu be lili mu okasagha bikaba bibi Mufulu, libvulu okasagha bikaba bi biitwu libwunu li Nzaami. 13 Me mu obo, Nyaā ti munde wu aabili mu ndiji yiili baara ka basoolo o, asamana mpaala abagha bu aabaala. 14 Mu kuulu, kala ti me nsamana mu ndiji yiili baara ka basoolo yo o, mufulu a me li mu okasamana, lo mayele ma me ka mali mu okasala o. 15 Mu obo, emakye me aansa? Me sa nsamana mu Mufulu, lo me sa nsamana si mu mayele. Me sa ngyimi mu Mufulu, lo me sa ngyimi si mu mayele. 16 Mu kuulu, kala ti yini a mu Mufulu we li mu okatuono Nzaami, bunu-abo mbwuru wu li mu okagyughu we akughu olyele «Aamene» mu lisamana li we lili obvurulu matuono, bu agwene osoolo mi li mu okalyele we? 17 Ngu okala ti we li mu okabvurulu matuono ku obwe, lo lisamana lilo ka lili mu okakwuhu kana li wu muke o. 18 Me aakamvurulu matuono kundaa Nzaami mu kuulu me mvulu be bwohono mu obili mandiji maala baara ka basoolo o, 19 lo munsā

libwunu li Nzaami, me mvulu odzyi oleyele mandagha mataana mu mayele ma me, mpaala me nduo babake, ɲa ebini kii oleyele mandagha mapfwunu-kwumu mu mandiji maala baara ka basoolo o. **20** Bandughu ba me mu kana, ka likatsimi ti anga baana basala o. Mu mi mitala bubi, likala baana ba basala, lo mu bitsimi, likala bakwuru. **21** Mu Mikyene básono ti: «Me mu baara baba mandiji makimi ya mu miɲma mi banzyi, me akala aambili kundaa ekaana ki lo ngu okala obo, bo akala ka bagyughu me o, obo me bu oleyele Mfumu.» **22** Me mu obo, mandiji mali elyimi kundaa ba bagwene a kana, lo ka kundaa ba banga a kana o. Lo mandagha mama libighi mali elyimi kundaa ba bali a kana, lo ka kundaa ba bagwene a kana o. **23** Limatsimi ati, kala ti Libwunu li Nzaami lwohono libvujunu ya baara bwohono, babwi obili mandiji maala baara ka basoolo o, kala ti baara baba bwunu bagyi, bwunu we ba bagwene a kana, bo ka batsimi o ti be lala liibyele? **24** Lo kala ti baara bwohono bali mu okabighili, mbwuru wu gwene a kana bwunu we wu a bwunu wu aayasomo, mu nkooro a mi ali mu okagyughu nde, nde sa akihi masumu ma nde ya sa amono ti baara bwohono nde bali mu okalamana. **25** Mansweghe ma mukolo a nde sa mamogono. Mu obo, nde bu abwi mamfumunu edzili mu nsie, nde sa asamana Nzaami ya nde sa alyele ti: «Nganɲa, Nzaami li ɲa kara li be!» **26** Mu obo, bandughu ba me mu kana, emakey lifaana osa? ɲa liikabvujunu be, mbwuru mutsyini mu be kughu ogyimi ekwumu, wu muke kughu oluo, mbwuru wunu kughu oleyele mandagha mama ensweghe ma oosuo nde Nzaami, mbwuru wunu kughu obili mu mandiji maala baara ka basoolo o, bwunu we obaala mandiji. Nyaã ti mandagha mwohono makala ma maakwuhu kana li baara bwohono. **27** Kala ti baara badzyi obili mu ndiji yiili baara ka basoolo o, nyaã baara buolo bwunu we batere babili, mumõ ɲa mbihi a wu muke, ya okala si a mbwuru wu abaala. **28** Kala ti ka oli a mbwuru wu aabaala o, nyaã baara bakala pii munsu libwunu li Nzaami, nswe mbwuru abili mu ndeme ya kundaa Nzaami. **29** Mu mi mitala mibighili, nyaã baara buolo bwunu we batere babili ya babake bakeene mandagha ma baalyele bo. **30** Kala ti mbwuru mukimi ɲa kara li libwunu li Nzaami li a yi aalyele mu mandagha mama ensweghe ma oosuo nde Nzaami, nyaã mbwuru wu a nsomo akala pii. **31** Mu kuulu, be bwohono

likughu obighili, lo mumõ mumõ, mpaala baara bwohono babagha mayele ya babagha mpama. **32** Mifulu mi mibighili miikagyughu mibighili. **33** Mu kuulu Nzaami ka li Nzaami wu masasa o, lo nde li Nzaami wu edzuunu. Bwunu a bu oli mu Mabwunu ma Nzaami mwohono, **34** nyaã bakaha bakala pii munsu Mabwunu ma Nzaami, mu kuulu bo ka bali a muswa mu obili omo o. Nyaã bo bakala kunsu litumu, bwunu a bu ookalyele si Mikyene. **35** Kala ti bo bali a mandagha ma badzyi ogyighi, nyaã bo bafwulu balumu ba bo ku nzo. Mu kuulu ka oli bubwe o ti mukaha abili munsu Libwunu li Nzaami. **36** Bunu, Ndagha a Nzaami kundaa be yifi? Bwunu we, yini a kundaa be yo yito? **37** Kala ti mbwuru tsimi ti nde li mubighili bwunu we li mbwuru wu mufulu, nyaã nde abaghala mu mandagha ma nsono me be ti mo mali litumu li Mfumu. **38** Kala ti mbwuru ka soolo mo o, lo ndehe si ka basoolo nde o. **39** Me mu obo, bandughu ba me mu kana, liikasagha ekaba kii obighili ya ka likakahaba baara mu okabili mu mandiji maala baara ka basoolo o. **40** Lo mandagha mwohono mafaana okaluru bwunu a bu ofaana ya kunsu bunkere.

15 Bandughu ba me mu kana, me ndibili be mweẽ mu Nsia yi Mbwe yi aantsala me be, yi liigyagha be, be liinabara mu yo, **2** ya mu yo si be lili mu nzili a obvwughu, kala ti be likwara yo bwunu a bu aantsala me be yo. Lo kala ti ka obo o, kana li be lili lili bwunu. **3** Me áantswama ogwa kundaa be mandagha ma ángyagha meme ti: Kriste aakpi mu nkooro a masumu ma bihi, bwunu a bu ookalyele Bisono. **4** Bádzighi nde, nde ásigihili mu lipfu etsughu kii bitere, bwunu a bu ookalyele Bisono. **5** Nde ámogono kundaa Sefase ya kundaa bantumu kwumu ya buolo. **6** ɲa nseele, mu sa limõ, nde ámogono kundaa bandughu mu kana oluru mutala a nkamataana. Balagha ɲa kara li bo bali nkini mweẽ ya babake baakpi. **7** ɲa mbihi, nde ámogono kundaa Dzake, ya kundaa bantumu bwohono. **8** ɲa mbihi a bo bwohono, nde aamogono kundaa mehe si ti anga kundaa mwana wu baburu gwene a bangoono okughu. **9** Mu kuulu me, me ndi wu bvulu busala mu bantumu, me wuulu ka ndi a muswa ti bata me ntumu o, mu kuulu me aamwehẽ Libwunu li Nzaami kimini. **10** Lo mu bwehe bu Nzaami, me ndi bwunu a bu ndi, ya bwehe bu nde kundaa me ka buli bubu bwunu o,

lo me aambvulu osala ya bo bwohono, ka oli me o, lo bwehe bu Nzaami bu buli mu me. **11** Me mu obo, ngu okala ti me, ngu okala ti bo, oyo me nsia yi liikatsala bihi, ya me mu yo be liisi kana. **12** Lo kala ti baakatsala nsia ti Kriste aasighili ŋa kara li ba bákpi, bunu-abo babake ŋa kara li be baakalyele ti osighili ŋa kara li ba bákpi ka oli o? **13** Kala ti osighili ŋa kara li ba bákpi ka oli o, lo Kriste si ka ásigihili mu lipfu o. **14** Ya kala ti Kriste ka aasighili ŋa kara li ba bákpi o, lo maluo ma bihi mali mama mukajana, kana li behe si lili mukajana. **15** Bihi lili mu okamogono ti anga bampughulu ba Nzaami baba mpya, mu kuulu bihi liisuo bumpughulu bubu mpya mu Nzaami ŋa liikalyele ti Nzaami aasiili Kriste ŋa kara li ba bákpi, lo nde ka aasiili nde mu lipfu o, kala ti oli ngan̄ma ti ba bákpi ka baakasighili mu lipfu o. **16** Mu kuulu, kala ti baara ba bákpi ka baakasighili mu lipfu o, lo Kriste si ka aasighili mu lipfu o. **17** Ya kala ti Kriste ka aasighili mu lipfu o, lo kana li be ka lili a mupfunu o, be lili nkini kunsu masumu ma be **18** ya babo ba baakpi munsu kana mu Kriste baapfighili. **19** Kala ti bihi lili a emiini mu Kriste yini a mu bumweē bu, lo bihi lili baara ba babvulu a nyī mu baara bwohono. **20** Lo mu engan̄ma, Kriste aasighili ŋa kara li ba bákpi: Nde li wu a nsomo mu osighili mu lipfu ŋa kara li ba bákpi. **21** Buulu lipfu liigy mu mbwuru mumō, me mu mbwuru mumō si oogyi osighili mu lipfu ŋa kara li ba bákpi. **22** Mu kuulu, bwunu a bu ookakpa baara bwohono mu Adā, bwunu obo si baara bwohono sa babagha laama mu Kriste, **23** lo mbwuru mbwuru mu matala ma nde: Nsomo a nsomo Kriste, ŋa mbihi a matala ma aayabvughuru nde, bo bwohono ba bali baba Kriste. **24** Ŋa nseele masini sa magya, ŋa akala abvurulu nde Emfumu kundaa Nzaami Taara, bu amana otsala ba baakatumu bwohono, bimbumu byehene, ya lileene lwohono. **25** Mu kuulu nde faana okala mukogho, tee ŋa aatwulu nde «mitaara mi nde myehene ŋa nsie a myili mi nde». **26** Lipfu me mutaara wu ensiele-mbihi wu akala baasyehē ekulu. **27** Mu kuulu, «Nzaami aatwulu bilogho byehene ŋa nsie myili mi nde». Lo ŋa aakalyele nde ti bilogho byehene bili kunsu litumu li nde, oli tse-tse ti munde wu aagwi nde litumu ŋa yulu a bilogho byehene ka li mu kara o. **28** Ya ŋa akala baagwa nde litumu ŋa yulu a bilogho byehene, oŋo Mwana ndeme sa akala kunsu litumu li munde wu aagwi nde litumu ŋa yulu

a bilogho byehene, mu kuulu Nzaami aakala a litumu mu byehene ya mu baara bwohono. **29** Kala ti ka oli obo o, ba baakakihi liboghoru mu ba bákpi emakye akala baasa? Kala ti ka oli ngan̄ma o ti ba bákpi sa basighili mu lipfu, mu emakye bo baakakihi liboghoru ŋa ebini e bo? **30** Ya bihi bameme si, mu emakye mu nswe matala bihi liikakala be-bele ya lipfu? **31** Bandughu ba me mu kana, nswe etsughu me ndi be-bele ya lipfu. Me ndyele be yo oli ngan̄ma, me aakansa mutwunu mu be matala mwohono, mu endughu e bihi-a-be mu Yiisu-Kriste Mfumu a bihi. **32** Kala ti me aandzwana ya baara ba bali ti anga banyama ku Efedze mu nkooro a mandagha mama embwuru, nki ndaana me aambagha? Kala ti ba bákpi ka baakasighili mu lipfu o. Lo «litswe lidza ya liŋma, mu kuulu ŋa epala, bihi-a-be sa likpa». **33** Ka ligwun̄mu beme o: «Bambaala ba babi baakabyihi bipfu bi bibwe.» **34** Ligyabvughuru mu bitsimi bi bibwe ya ka lifirikasa masumu o, mu kuulu ndaama a baara ka bagyahaba Nzaami o, me ndyele obo mu ogwa be budzwa. **35** Lo mbwuru sa alyele ti: «Bunu-abo baara ba bákpi baakasighili mu lipfu? Bo nki nyuru baakala a yo?» **36** We ewulu! Liburu li aakakunu we ka likughu omene o kala ti lo ka likpi o. **37** Ki aakakunu we ka oli muti wu aakakebe we o, lo liburu, lo likughu okala liburu li bele bwunu we li buru lili muti mukimi. **38** Ŋa mbihi Nzaami aakagwa lo nyuru bwunu a bu adzyi nde. Ya nswe liburu lili a nyuru yi a ndaa ndeme. **39** Bibuo bi bimweē byehene ka bili a nyuru mō o. Nyuru a mbwuru yili a lisobo ya nyuru a nyama, nyuru a ŋmini yili a lisobo ya nyuru a nswi. **40** Oli si a manyuru mama mayulu ya manyuru mama nsie. Lo nsia a manyuru mama yulu yi li a lisobo ya nsia a manyuru mama nsie. **41** Osehene o tala okimi, osehene o ngoono okimi, osehene o ban̄oman̄omo okimi. Ngu okala ban̄oman̄omo, nswe ŋoman̄omo li a osehene o nde. **42** Oli si bumō mu osighili o ba bákpi mu lipfu: Baakadzyighi nyuru a mbwuru yi aakabolo, yo yiikasighili mu lipfu yi aagwene okabolo. **43** Nyuru yi baakadzyighi yili yi agwene a mupfunu, lo yo yiikasighili mu lipfu kunsu nsia. Nyuru yi baakadzyighi yi aakolo, yo yiikasighili mu lipfu ya lileene. **44** Nyuru yi baakadzyighi yi a embwuru, yo yiikasighili mu lipfu nyuru yi mufulu. Kala ti oli a nyuru yi embwuru, oli si a nyuru yi mufulu. **45** Me mu obo básono ti: «Mbwuru wu a nsomo

Adā, ákighiri mbwuru wu a mweē.» Adā wu masini, nde li mbwuru wu mufulu, mufulu wu aakagwa laama. **46** Ka oli nyuru yi mufulu yili yi a nsomo o, lo nyuru yi embwuru yili yi a nsomo. Yi a mufulu ŋa mbihi yiikagya. **47** Mbwuru wu a nsomo wu bámyeme mu nsie, li lifufunu. Mbwuru wu a bwolo áfi ku yulu. **48** Bwunu a bu oli mbwuru wu a nsie, obo si oli baara ba bámyene mu nsie, ya bwunu a bu oli mbwuru wu a yulu, obo si baara baba yulu akala baakala. **49** Ya bwunu a bu lili bihi mu efaana e mbwuru wu bámyeme mu nsie, bihi-a-be si sa likala efaana e mbwuru wu aafi ku yulu. **50** Bandughu ba me mu kana, ndagha yi ndyele me be me yi: Nyuru a bihi yi embwuru ka yikughu ogwolo pfa li Emfumu e Nzaami o, ya bi biikabolo ka bikughu ogwolo pfa li bi biigwene okabolo o. **51** Me ndagha yi a ensweghe aandyale be: Bihi bwohono ka likpa o, lo bihi bwohono sa likighiri **52** ŋaana oŋo, mu mbwe-mbwere a mihi, mu likyi li mvulu-a-mvulu yi masini. Mu kuulu, ŋa bafulu mvulu-a-mvulu, ba bákpi sa basighili mu lipfu gwene a manyuru ma maakabolo, ya bihi, bihi sa likighiri. **53** Mu kuulu, nyuru yi aakabolo yifaana olaha nyuru yi aagwene okabolo, ya nyuru yi aakakpa yifaana olaha laama lili mibvu ya mibvu. **54** Mu matala ma akala oolaha nyuru yi aakabolo nyuru yi aagwene okabolo, ya nyuru yi aakakpa bu yilaha laama lili mibvu ya mibvu, oŋo ŋa akala ookeele ndagha yi basono ti: «Olughulu oodzihibi lipfu kuu mankulu!» **55** «Lipfu, olughulu o we kunako oli? Lipfu, lileene li we lii odzwa kunu-ako lili?» (Hades 986) **56** Lileene li lipfu lii odzwa me lisumu, ya lileene li lisumu me mikyene. **57** Lo litswe likabvurulu matuono kundaa Nzaami, nde wu aakagwa bihi olughulu mu Mfumu a bihi Yiisu-Kriste! **58** Me mu obo bandughu ba me mu kana baba mukolo, ligyighili otemene mu mpini, gwene onyiĩ, matala mwohono liikasala bubwe mu esala e Mfumu, bu lisoolo ti esala e be ka eli kii bwunu o.

16 Mu mi mitala bikaba mu nkooro a baara ba Nzaami baba ku Yerusaleme, behe si ligyighili bwunu a bu aantumu me mabwunu ma Nzaami ma mali mu etsulu e nsie kii a Ngalati. **2** Nyaa ti mu nswe etsughu kii liminjĩ, nswe mbwuru mu be akatwulu nzi mu libee, bwunu a bu oli libagha li nde, mpaala banyaã okebe matala ma aangya me, mu otolo nzi. **3**

Ŋa akala aangya me, me sa ngweghe baara ba liisulo be ya mikaana mpaala babiri bikaba bi be ku Yerusaleme. **4** Kala ti bubwe me ngye ya bo, bo sa bagye nzili mō ya me. **5** Ŋa akala aanduru me mu etsulu e nsie kii Masedwane, me sa ngyamono be, mu kuulu me mu Masedwane aanduru. **6** Okughu okala ti me sa nduhu mana bitsughu kundaa be, ya oluhu ndo yi a mpie yi alagha kundaa be, mpaala be ligwa me libaha li likughu mu onama midzye mi me. **7** Mu sa li, me ka ndzyi omono be ŋa aanduru me o, ya me nsi emiini ti me sa nduhu mana bitsughu ya be, kala ti Mfumu gwi muswa. **8** Lo me sa nkala ku Efedze tee mu kyiri kii Pantekote, **9** mu kuulu, nzili yili bwaha mu otsala Nsia yi Mbwe, ya mitaara mi me mili milagha. **10** Kala ti Timote yato, lisa kuulu ti nde anyaa okala a nzalamweē kundaa be, mu kuulu nde li mu okasala esala e Mfumu ti anga me. **11** Mu obo, mbwuru anyaa otsaala nde. Ligwa nde bilogho bi aakala nde nzala a bye mpaala adzye ku obwe tee kundaa me, mu kuulu bihi ya bandughu mu kana lili mu okakebe nde. **12** Lo mu mi mitala ndughu a bihi mu kana Apolose, me aangwi nde mpama yi alagha mpaala nde ayamono be ya bandughu mu kana, lo nde ka aakadzyi ogya kundaa be mu matala ma o. Nde sa agya mu matala ma akala aabagha nde mpeene. **13** Likahala mihi, ligyighili otemene mu kana, lilaha ebaghala, likala a makpa. **14** Liikagyighili mandagha mwohono mu dzyi! **15** Bandughu ba me mu kana, me firinduomo be ndagha yi: Be lisoolo ti baara ba dzumu li Esetefanase bali ekaba kii nsomo mu ogyinjĩ mayele mu etsulu e nsie kii Akayi, ya bo baagwi manyuru ma bo mu osalala baara ba Nzaami. **16** Behe si, liikakihi litumu li baara baba obo, ya lili baara bwohono ba baakasala emō ya babo. **17** Me ndi a esee ki elagha mu omono Esetefanase, ya Forotunatuse bo ya Akayikose. Bo baakiri ŋa ebini kiili be ŋa bele a me, **18** mu kuulu bo baabuho mukolo a me ya wu a ndaa be. Mu obo, liikagwa baara baa obo masyighi. **19** Mabwunu ma Nzaami mama mu etsulu e nsie kii Adzi magwi be mamboro. Akila ya Pirisika ya libwunu li Nzaami li liikabvununu mu nzo a bo bagwi be mamboro ma malagha mu Mfumu. **20** Bandughu mu kana bwohono bagwi be mamboro. Ligwihini a mamboro be a be mu onyuburu ku ofaana ya kuu baana ba Nzaami. **21** Me Poole, me ngwi be mamboro mu

bisono bi nsono me mu kwogho e meme. **22**
Kala ti mbwuru ka li ndughu a Mfumu o, lo
babiili nde epwolo! «Marana ta!» **23** Nyaā ti
bwehe bu Mfumu Yiisu bukala ya be bwohono!
24 Me aakandzyi be bwohono mu Kriste Yiisu.

2 Korente

1 Me Poole, ntumu a Kriste-Yiisu mu waa li Nzaami. Ya Timote ndughu mu kana a bihi a be, me nsono mukaana wu kundaa libwunu li Nzaami li lili mu bvulu lili Korente, ya kundaa baara ba Nzaami ba bali mu etsulu e nsie kyehene kii Akayi. **2** Nyaã bwehe ya edzuunu bi bifi kundaa Nzaami Taara a bihi-a-be ya kundaa Mfumu Yiisu-Kriste bikala ya be! **3** Masyighi kundaa Nzaami, Taara a Mfumu a bihi a be Yiisu-Kriste, Taara nga-a-nyii ya Nzaami nga-a-mpama yohono! **4** Nde aakagwa bihi mpama mu mpara a bihi yohono, mpaala bihi likughu okagwa mpama kundaa babo bwohono ba bali mu mpara, mu mpama yi liikabagha bihi bameme kundaa Nzaami. **5** Mu kuulu, bwunu a bu oli mpara a Kriste yi alagha mu bihi, bwunu obo si mpama a bihi yiikakala yi alagha mu Kriste. **6** Kala ti bihi lili mu mpara, me mu ogwa be mpama ya okwulu o be. Kala ti bihi liibagha mpama, me mu nkooro a mpama a be, yi aakasa ti be likakuru mukolo mu mpara gyini oyo yi liikakwumu bihi si. **7** Ya emiini e bihi mu nkooro a be eli a mpini, mu kuulu bihi lisoolo ti be bu likaba mpara a bihi, behe si lili a mpama emō ya bihi. **8** Mu kuulu, bandughu mu kana, bihi ka lidzyi o ti be ligwene osoolo kimini li límono bihi ku etsulu e nsie kii Adzi: Bamwehē bihi kimini li lilagha, kimini li libvulu mpini a bihi, ya bihi ka lifirisiyili a emiini o ti sa likala baba mweē. **9** Lo mu mikolo, bihi bameme áli liisoolo ti bihi sa likpa. Mpaala linyaã osa kana mu bihi bameme, lo mu Nzaami wu aakasiili ba bápki mu lipfu. **10** Me nde áakwulu bihi mu lipfu lili obo ya akala aakwulu bihi mu lo. Eē, bihi lili a emiini e bihi mu nde, ya bihi lili a emiini ti nde akala aafirikwulu bihi. **11** Be beme si lili mu okabaha bihi, bu liikasamana mu bihi. Me obo, bwehe bu lígyagha bihi mu nkooro a nsamana a baara balagha, buukala ndagha yi oobvurulu baara balagha matuono kundaa Nzaami mu bihi. **12** Mu kuulu ndagha yi lili a bihi mutwunu me bumpughulu bu likyi li liikabili mu mikolo mi bihi. Bihi liidzyara mu nsie, emvulu-ngughu ŋa busu bu be gwene a ligwagha, ya mu bunsumu bi biikafa kundaa Nzaami. Ka oli mu bunsughu bu baara o, lo mu bwehe bu Nzaami. **13** Bihi ka lili mu ofirisono be ndagha nkimi o, ŋa yulu a mi lili mu okatala ya

okabaghala be. Ya me nsimi ti be tumu ligyighili obaghala, **14** bwunu a bu liibaghala be ndaama ti: Bihi lili ndagha yi likughu okoboro be ntulu, bwunu obo si be liikala mutwunu a bihi mu etsughu e Mfumu a bihi a be Yiisu. **15** Ya buulu me áansi mukolo mu ndagha oyo, me áandi a etsimi ki ogyamono be, mpaala ŋa aangya me, me ngwa be esee mu sa lili ywolo, **16** ya me mara kundaa be, me áandzyi ogye ku etsulu e nsie kii Masedwane, ya ŋa nseele, me bu mara ku Masedwane, me ali aandzyi ogyabvughuru kundaa be. Mpaala be ligwa bi bifaana mu midzye mi me ku etsulu e nsie kii Yude. **17** Me bu aangwene okuhu munkaana wu, odzyi oleyele ti me ka aakankuhu mandagha ma aakankuru me o? Bu odzyi oleyele ti bitsimi bi aankuru me bili bibi embwuru, mpaala mu me mu sa limo okala a «Eē» ya «Pele»? **18** Nzaami mpughulu a me: Ndagha yi liilyele bihi kundaa be ka yili «Eē» ya «Pele» o. **19** Mu kuulu Mwana a Nzaami, Yiisu Kriste, wu lítsala bihi nsia kundaa be, me, Timote ya Silibvē, ka áli «Eē» ya «Pele» o. Lo mu nde matala mwohono óli yini a «Eē»! **20** Mu kuulu misiini mi Nzaami myehene mu Yiisu mili yini a «Eē». Me mu obo bihi liikalyele mu nde «Aamene» mu ogwa nsia kundaa Nzaami. **21** Munde wu aakagwa bihi ya be mpini mu Kriste, ya wu áaswolo bihi mu okala baba ndaa nde, me Nzaami. **22** Nde ási bihi si enyeme e nde ya átwulu Mufulu a nde mu mikolo mi bihi ti anga esughu mu bi aagwa nde bihi. **23** Nzaami li mpughulu a me, nyaã nde adzwa me, kala me mpfiri. Me ka áyambvughuru ku Korente o, mu kuulu be linyaã omono mpara. **24** Bihi ka lili mu okasagha okwighi be mi lifaana osa kana o. Lo bihi lili mu okasala emō ya be mu esee e be buulu be liigyighili ogwama mu kana,

2 Mu obo, me aangwolo munkaana wu ogwene ofiriyamono be ŋaala oli a nkini minyoō. **2** Mu kuulu, kala ti me meme ndi mu okasohobo be mu minyoō, lo nande aagwa me esee, kala ti ka oli munde wu áansohobo me mu minyoō o? **3** Me aansono be mandagha ma mpaala ŋa akala aangya me kundaa babo ba bakaagwa me esee, me nyaã okala a minyoō. Me ndi a kana ti: Esee e me eli kii ndaa be, be bwohono. **4** Me aansono be kunsu kimini li lilagha, me ándi ya nyii mu mukolo ya mansaŋa ma malagha. Ka mu ogwa be minyoō o, lo mu kuulu be lisoolo dzyi li lilagha li ndi a me mu be. **5** Kala ti

mbwuru ɲa kara li be aagwi bana minyoō, ka oli me nde aagwi minyoō o, lo be bwohonon de aagwi minyoō. Mu ogwene osa mawala, me nkughu olyele ti ka kundaa be bwohonon o, lo yini a kundaa ndaama a baara mu be nde aagwi minyoō. 6 Masyeme ma oogwi nde baara balagha, maakughu. 7 Mu bu, lifaana osa nde kolokolo ya ogwa nde bukyini, mfangolo nde mono mpara mu minyoō mi milagha. 8 Mu obo, me ngwi be mpama mu osuo nde ti be lidzyi nde. 9 Mu kuulu me aansono behe si mu osoolo mu bigyele kala ti be lili a bintamana mu mandagha mwohonon. 10 Lo mbwuru wu liisa be kolokolo, mehe si sa nsa nde kolokolo. Kala ti me aanso mbwuru kolokolo mu ndagha nga mō, me mu nkooro a be me aanso kolokolo ɲa nkulu a Kriste, 11 mpaala Satana anyaa opfiri bihi, mu kuulu bihi ka liidzimini bitsimi bi nde. 12 Mu matala ma áyinto me mu bvulu lili Torowase mu otsala Nsia yi Mbwe yi a Kriste, ngu okala ti Mfumu ágwi me nzili, 13 mufulu a me ka áli mu edzuunu o, mu kuulu me ka ámono Tite ndughu a me mu kana o. Me mu obo me ábulunsihi bo ya ángyene ku Masedwane. 14 Me ndi mu okabvurulu matuono kundaa Nzaami, mu kuulu matala mwohonon de aakabiri bihi mu olughulu o nde mu Kriste, ya wuulu mu bihi aakatsala mpihi a ligyahaba li nde mu bibini byehene. 15 Mu kuulu bihi lili kundaa Nzaami mananaase ma Kriste mama mpihi yimbwe ɲa kara li baara ba baabvwughu, ti anga ɲa kara li baara ba bali mu okagye ku opfighili o bo. 16 Kundaa bana, mpihi a lipfu yi aakabiri ku lipfu, kundaa babake, mpihi a laama yi aakabiri ku laama. Ya nande kughu osa esala kii obo? 17 Mu kuulu bihi ka lili ti anga baara babake ba baakabuluta nkaala mu ndagha a Nzaami o. Lo bihi liikabulubili mu bunsumu mu nkwumu a Nzaami, ɲa busu bu Nzaami ya mu Kriste.

3 Bunu, be bu litsimi ti bihi omonono liisagha ofrimonono mu bihi bameme? Bwunu we bihi nzala a osuo be mikaana mi miigwa be muswa mu obwana a bihi, ti anga bu ookasa baara babake, bwunu we oluomo be mye? 2 Me be lili mukaana a bihi, mukaana wu básono munsu mukolo a bihi, wu basoolo ya wu ookatara baara bwohonon. 3 Mu engarɲa, be lili mukaana a Kriste wu ásono nde mu nzili yi esala e bihi. Nde ka li mukaana wu básono mu laā o, lo wu básono mu Mufulu a Nzaami

wu a mweē, ka ɲa yulu a bipa bi mameē o. Lo ɲa yulu a misunu, mu mikolo mi be. 4 Ekye me emiini ki lili a bihi mu Nzaami mu nzili a Kriste. 5 Ka oli mu mpini a bihi bameme bihi likughu osa esala kii obo o. Lo mpini a bihi yi osa esala ki, yiikafa kundaa Nzaami. 6 Me ndehe si aagwi bihi mpini mu okala basala baba ogwihini ku onyaghara. Ogwihini kuulu ka oli kunsu litumu li mukaana a Mikyene o, lo kunsu litumu li Mufulu. Mu kuulu mukaana a Mikyene aakadzwa, lo Mufulu a Nzaami aakagwa laama. 7 Esala Mikyene ki básono ɲa yulu a bipa bi mameē, ébiri ku lipfu. Ankoho, kye éli a nsia yiili baana ba Isarayeke ka báleene otuunu mihi mu okehene edzili e Moyidze o, ki ékasehene mu nsia oyo, ngu okala ti nsia me yili yini a yi a mana matala. 8 Bunu-abo esala ki Mufulu eegwene obvulu a nsia? 9 Esala kii okehe baara mukakana a lipfu éli a nsia, bunu a bo esala kii osa baara bunsumu egwene obvulu a nsia? 10 Ya mu nkooro a nsia yibvulu bunene oyo, bibye bi bágwi nsia ka bíbagha nsia o. 11 Mu kuulu, kala ti bilogho bi bigwene okagiyili bíbagha nsia, mu obo bilogho bi biikagiyili matala mwohonon sa bibvulu a nsia. 12 Bu lili a emiini kii obo, bihi ka lili a bwomo o. 13 Bihi ka liikasa bu ósi Moyidze o wu áakafughu edzili e nde mu mupa a eko, mpaala basi Isarayeke banyaá omonon masini ma osehene o nsia oyo yi a mana matala. 14 Lo mayele ma bo másughu ya bo ka bakughu obaghala. Mu kuulu, tee mu etsughu kii lolo, ɲa baakatara bo mikaana mi ogwihini ku okulu, mupa a eko munde nkini li mu bitsimi bi bo. Nde ka bámaha o, mu kuulu yini a mu Kriste nde akala aadzimini. 15 Tee mu etsughu kii lolo, ɲa baakatara mikaana mi Moyidze, oli a nkini mupa eko wu aakafughu bitsimi bi bo. 16 Lo ti bu basono: «ɲa baakakaghala kundaa Mfumu, mupa eko nde aakamara». 17 Ankoho Mfumu me Mufulu, ya ɲa ebini ki oli Mufulu a Mfumu, me oño bunyanyaá buli. 18 Bihi bwohonon ba lili a bidzili bi bágwene ofughu mupa eko, liikasuo nsia a Mfumu ti anga bu ookasuo etalatala, bihi liikagwolo buke-buke efa e nsia nde yibvulu olagha. Ekye me esala ki ookasa Mfumu wu li Mufulu.

4 Mu obo, buulu Nzaami, mu nkooro a ngebe a nde, ágwi bihi esala ki obo, bihi ka ligwene a bukyini o. 2 Bihi liibihi mandagha mama bupfiri ma baakasa mu ensweghe, bihi ka liikadzyara

kunsa mayele ma mabi o, ya bihi ka liikasobo ndagha a Nzaami o. Lo bihi liikasuo engarjma nja nkulu a Nzaami, liikasa ti nswe mbwuru atala ndeme, kala ti mu nkumu a Nzaami bihi liikasala bwunu we pele. **3** Kala ti Nsia yi Mbwe yi liikatsala bihi yili yi basweghe, yo yili yi basweghe kundaa babo ba bali mu okagye ku odzimini, **4** kundaa baara ba baakabihi osa kana. Satana, nzaami wu a nsie yi aamana mayele ma bo, mpaala bo banyaã omono osehene o nsia a Nsia yi Mbwe yi a Kriste, wu li efaana e Nzaami. **(aiõn g165)** **5** Mu kuulu, bihi ka liikabulutsala nsia a bihi bameme o, lo bihi bu liikabulutsala nsia ti: Yiiisu-Kriste li Mfumu, ya bihi bameme lili basala ba be mu nkooro a Yiiisu. **6** Mu kuulu Nzaami wu áalyele ti: «Nyaã kunsa mpyibi yi a laja-laja otsyeme osehene», ndeme aasehene munsu mikolo mi bihi, mpaala ligyhaba li Nsia a Nzaami lisehene nja yulu a edzili e Kriste Yiiisu. **7** Lo bihi liikabulubiri busini bu, munsu mayughu ma bámyene mu mubweë, mpaala lileene li libvulu bunene li, likala lili Nzaami, lo ka lili ndaa bihi o. **8** Baakaswehë bihi mu mangulu mwohonu, lo ka baapweene bihi o. Bali mu okagwa bihi nzalamweë, lo emiini e bihi ka eefi o. **9** Baakamwehë bihi kimini, lo Nzaami ka aanyaghala bihi o. Baakabwihi bihi nja nsie, lo ka baadzwi bihi o. **10** Matala mwohonu, ya mu bibini byehene nsihi a lipfu yili ya bihi ti bu yili yo mu Yiiisu, mpaala bumweë bu Yiiisu si bumogono mu nyuru a bihi. **11** Mu kuulu, bihi ba lili mweë, matala mwohonu bali mu okatyeghe bihi mu lipfu mu nkooro a Yiiisu, mpaala bumweë bu Yiiisu si bumogono mu nyuru a bihi yi aakakpa. **12** Obo me buulu, lipfu liikasala mu bihi, mpaala bumweë busala mu be. **13** Ya buulu bihi-a-be liikadzara mu Mufulu wuunu munde wu a kana, ti básono ti: «Me aansu kana, me mu obo me aambili», bihi si liikasa kana, me mu obo bihi liikabili. **14** Bu lisoolo ti munde wu áasiili Mfumu Yiiisu mu lipfu sa asiili bihi si mu lipfu emõ ya Yiiisu, ya nde sa asa ti bihi ya be likala nja nkulu a nde. **15** Mu kuulu, me mu bubwe bu be mandagha mwohonu mamu mali mu okabwa mu bihi, mpaala bwehe bupfini mu baara balagha, ya ti baara balagha babvurulu matuono mu ogwa Nzaami nsia. **16** Me mu obo bihi ka liikakolo o. Ya ngu okala ti manyuru ma bihi mali mu okabyi buke-buke, mufulu a bihi li mu okakighiri munyaghara nswe etsughu. **17** Mu kuulu mpara yi lili mu okamono bihi

mu matala ma, yili mu oluru ya yileje. Yo ka yifaana si ema ya nsia yinene o, yi a mibvu ya mibvu. Ankoho yo yili mu okagyighili bihi nzili yi obagha nsia oyo. **(aiõnios g166)** **18** Mu obo, bihi ka liikasa mukolo mu bilogho bi biikamogono mu mihi o, lo bihi liikasa mukolo mu bibye bi biigwene okamogono mu mihi. Mu kuulu bi biikamogono mu mihi, bili bibi mana matala, lo bi biigwene okamogono mu mihi, bili bibi mibvu ya mibvu. **(aiõnios g166)**

5 Mu kuulu, bihi lisoolo ti, kala ti nyuru a bihi yi a nja nsie, yiili ti anga ebvulu yitsanama, bihi lili a nzo yi mibvu ya mibvu mu mayulu, yi ótwu Nzaami, nzo yiili ka oli baara baátwu o. **(aiõnios g166)** **2** Ya mu matala ma, bihi lili mu okakurju, mu okakebe mu dzili li lilagha mu olaha binkuru mu nyuru a bihi yi a mayulu. **3** Mu engarjma bihi limana olaha binkuru me, Nzaami ka afirimono ti bihi lili mpene o. **4** Mu kuulu, mu matala ma lili bihi nkini munsu nyuru yi a nja nsie, bihi lili mu okakurju ti anga baara ba bali mu okabiri leme. Ka mu kuulu ti bihi lidzyi okpa mu obih nyuru yi a nja nsie o, lo bihi lidzyi olaha binkuru mu nyuru yi a mayulu, mpaala laama lidzahaba bi biikakpa. **5** Ya me Nzaami aagyighili bihi mu okala a bumweë baba obo, nde wu aagwi bihi Mufulu wu a Ngili a nde ti anga kaba lili nsomo mu bilogho bi ásiini a nde bihi. **6** Mu obo, matala mwohonu bihi liilwulu mu bukyini, bu lisoolo ti matala mwohonu ma liikala bihi munsu nyuru yi, bihi lili la ya Mfumu. **7** Mu kuulu bihi mu kana liikadzara, lo ka mu mi liikamono o. **8** Ngarjma, bihi liilwulu mu bukyini ya lili mu okamono ti obvulu bubwe mu okala la ya nyuru yi, mu okala kundaa bihi, bele ya Mfumu. **9** Me mu obo si bihi liikasagha yini a ndagha mō: Ogwa Mfumu esee, ngu okala ti bihi lili mu okagyili mu nyuru yi a nsie, bwunu we bihi lisihi yo. **10** Mu kuulu bihi bwohonu lifaana otemene nja nkulu a mbala a muyala a Kriste, mpaala nswe mbwuru agyagha mufuru wu mandagha mwohonu ma ágyighili nja áli nde mweë nja yulu a nsie, ma mabwe bwunu we ma mabi. **11** Mu obo, bu lisoolo bunu ogwa Mfumu budziri odzyi olyele, bihi lili mu okasagha opeene a baara babaghala ti Nzaami yighili osoolo bihi. Me ndi a emiini ti behe si lisoolo bihi mu mikolo mi be. **12** Bihi ka lili a nzala a ofirikala a masyighi kundaa be o. Lo bihi lili mu okagwa be mpeene mu

okala a mutwunu mu bihi, mpaala be libagha yi liigwa mvuru kundaa ba bali a masyighi mu mandagha ma maakamoronu mu mihi, lo ka mu ma mali munsu mukolo o. **13** Mu kuulu, kala ti baara bali mu otsimi ti bihi ayi banga-a-lala, me mu osyighi Nzaami. Kala ti bihi lili nsiili, me mu ndaana a be. **14** Mu kuulu, dzyi li Kriste lili mu okatsiini bihi mu otsimi ti: Yini a mbwuru mumō áakpi mu nkooro a baara bwohonu, ya me mu obo, baara bwohonu baakpi. **15** Ya kala ti nde ákpi mu nkooro a baara bwohonu, mu kuulu baara ba bamweē banyaā ofirikala mweē mu bomo, lo mu nkooro a mbwuru munde wu áakpi ya ásigihili mu lipfu mu nkooro a bo. **16** Me mu obo, obaana matala ma, bihi ka lifirisoolo mbwuru mu efaana kii mbwuru o. Ngu okala ti bihi líisoolo Kriste mu efaana kii mbwuru, lo mu matala ma bihi ka lifirisoolo nde obo o. **17** Mu obo, kala ti mbwuru li mu Kriste, nde li ebuo ki enyaghara, mandagha ma makulu maaluru, mandagha mwohonu ayi ma manyaghara. **18** Ya mandagha mwohonu mamu maakafa kundaa Nzaami, nde wu aabvurulu ogwihini ya bihi mu Kriste, ya wu aagwi bihi esala kii okabvurulu ogwihini ŋa kara li baara ya nde. **19** Mu kuulu, mu Kriste Nzaami ábvurulu ogwihini ŋa kara li ndeme ya nsie, gwene a otaā bubi bu baara, ya otwulu mu bihi ndagha a nde yi a obvurulu ogwihini. **20** Mu obo, bihi lili bimbala mu nkumu a Kriste, ya me mu bihi Nzaami ndeme ali mu okata be mbili. Mu nkumu a Kriste, bihi libuono be: Nyaā be likihi obvurulu ogwihini ya Nzaami! **21** Kriste wuulu ka áli a masumu o, Nzaami ási Nde nga-a-masumu mu nkooro a bihi, mpaala mu nde, bihi likala baara ba bunsumu bu Nzaami.

6 Buulu bihi lili mu okasala emō ya Nzaami, bihi lili mu okagwa be mpama, mpaala bwehe bu Nzaami bu líyagha be bunyaā okala ba bubwunu. **2** Mu kuulu Nzaami ályele ti: «Mu matala ma mabwe, me aangyughu we, ya mu etsughu kii obvwughu, me aambaha we.» Ankoho, matala ma mali mama nkara a bubwe. Lolo li me etsughu kii obvwughu. **3** Bihi ka lidzyi ti mbwuru akubu kya mu ndagha nga mō mu nkooro a bihi o, mpaala banyaā obagha ebili mu esala e bihi. **4** Lo mu mandagha mwohonu, bihi bameme liikasagha osuo ti bihi lili basala ba Nzaami. Mu obo, bihi lili a mukama wu alagha mu okuru mukolo mu mpara, mu kimini, mu

minyoo, **5** mu nswa-nswa, mu maboloko, mu mpaatsala, mu bisala bibi mpini, mu okakeele, mu okuru nswele mu bala, **6** mu okakala baba tse-tse, mu ligyhaba, mu okuru mukolo mu okebe, mu bubwe, mu Mufulu a Ngili, mu dzyi lili nganma, **7** mu oluo ndagha yi enganma, mu lileene li Nzaami, mu bidzwana bibi bunsumu mu odzwana bwunu we mu okala bihi, **8** munsu nsia ya munsu budzwa, munsu nsia yi mbi ya yi mbwe. Ngu okala ti baakatsimi ti bihi lili banga-a-mpya, lo bihi lili banga-a-enganma. **9** Ngu okala ti baakalyele ti ka basoolo bihi o, lo bihi lili baara ba bagyighili osoolo. Ngu okala ti baara baakalyele ti bihi lili mu okpa, lo bihi lili nkini mweē. Ngu okala ti bali mu okakaha bihi nswa-nswa, lo nkini baadzwi bihi o. **10** Ti anga baara ba bali a minyoō, lo bihi lili kunsu esee matala mwohonu. Ti anga bawele, lo bihi liikagwa baara balagha busini. Ti anga baara baala ka bali a elogho, lo bihi lili a bilogho byehene! **11** Bihi liibili kundaa be basi Korente, mu bunya-nyaā, mikolo mi bihi mili bwaha waghala. **12** Bihi ka likuru be mikolo mi bihi o, lo beme liikuru bihi mikolo mi be. **13** Mu obo, linyaā me mbili kundaa be ti anga kundaa baana ba meme, behe si lidzubulu bihi mikolo mi be waghala! **14** Ka lisa endughu ya baara ba baagwene okasa kana o. Mu kuulu, nki emvununu ekughu okala ŋa kara li bunsumu ya bubi? Nki bumō bukughu okala ŋa kara li otsyeme ya mpyibi ya laŋa-laŋa? **15** Nki ogwihini oli ŋa kara li Kriste ya Dyabulu? Nki endughu ekughu okala ŋa kara li nga-a-kana ya wu gwene a kana? **16** Nki endughu eli ŋa kara li nzo a Nzaami ya bityeghe? Mu kuulu bihi, bihi-a-be lili nzo a Nzaami yi a mweē, ti bwunu a bu ólyele Nzaami ti: «Me sa nkala ŋa kara li bo, ya me sa kabulungye ya bo. Me sa nkala Nzaami a bo, ya bo sa bakala baara ba me.» **17** Me mu obo Mfumu ályele ti: «Lipala ŋa kara li bo, ya likaghaba ya bo. Ka libyeme elogho ki esunumu o, ya me sa ngyagha be. **18** Me sa nkala Taara a be, ya be sa likala baana ba me ba babaghala ya ba bakaha.» Obo me bu olyele Mfumu Nzaami Nga-a-Mpwū.

7 Bandughu ba me baba mukolo, buulu bihi lili a misiini mimi obo, litswe litsehebe manyuru ma bihi mu omaha mubviini wu a nyuru ya wu a mufulu, bu lisi kuulu ti bungili bukala bubu mukughu mu okagwa Nzaami budziri. **2** Ligyighili bihi ebini munsu mikolo mi be.

Bihi ka liisi mbwuru bubi o, bihi ka liibwihi nkana li mbwuru o, bihi ka liisalala busini bu mbwuru o. **3** Me ka ndyele obo mu osyeme be o, mu kuulu, nsomo me aandyele ti: Be lili mu mikolo mi bihi, ngu okala mu lipfu, ngu okala mu bumweē. **4** Me ndi a emiini ki elagha mu be. Me ndi a mutwunu wu alagha mu be. Me aandwulu mu mpama. Kunsu kimini li bihi lwohono, me ndi a esee ki elagha. **5** Mu kuulu, mu matala ma lito bihi ku Masedwane, bihi ka libagha si mana matala maa ogwumu o, lo bihi limono mpara yi mawa-mawa: Bikiyini ku mbala, nzalamweē kunsu mikolo. **6** Lo Nzaami wu aakagwa mpama kundaa baara ba obwogho mikolo, aagwi bihi mpama mu ogya o Tite, **7** ya ka yini a mu ogya o nde o, lo si mu mpama yi ábagha nde kundaa be. Nde aalyele bihi dzyi li lilagha li lili a be mu ofirimono me, bilili bi be, mbaa a dzyi li be mu okala me, me mu obo me aafirimbagha esee ki ebvulu bunene. **8** Ngu okala ti me aangwi be minyoō mu mukaana wu ántswama nsono me be, lo me ka ndi a manguo mu ndagha oyo o. Ngu okala ti me aandi a manguo, mu kuulu me aamono ti mukaana munde aagwi be minyoō mu mana matala, **9** lo mu matala ma me ndi a esee. Ka mu nkooro a minyoō mi be o, lo mu kuulu minyoō mi be miisi ti be ligyini mayele. Mu kuulu be liinyoō bwunu a bu ookadzyi Nzaami. Mu obo, bihi ka liisi be ndagha yimbi o. **10** Mu kuulu, minyoō mii enzaami miikaburu ogyini mayele, ku ookabiri ku obvwughu ku baagwene okanyoō, lo minyoō mi nsie miikaburu lipfu. **11** Mu obo, limono ati mandagha ma ookaburu minyoō mii enzaami kundaa be: Okala a mbaa mu osala, okaluomo be a be kolokolo, okabihi bubi, okala a budziri, okala a nzala a omono me ku olagha, okala a dzyi li linene, okala a bukyini mu ofyeē bubi. Mu mandagha mwohono be liisuo ti be liikakala tse-tse mu ndagha oyo. **12** Mu obo, kala ti me aansono be mukaana, ka oli mu nkooro a wu aakasa bubi o, bwunu we mu wu baasi bubi, lo mu osuo ŋa nkulu a beme, ŋa nkulu a Nzaami, mbaa yi lili a be mu bihi. **13** Me mu obo baagwi bihi mpama. Ŋa yulu a mpama oyo, bihi liifirimono esee ki ebvulu, bu liimono esee e Tite wuulu be bwohono liigwi mukolo a nde edzuunu. **14** Kala ti ŋa nkulu a nde me aansuo mana mutwunu mu be, me ka aamono budzwa mu ndagha oyo o. Ti bwunu a bu liikabili bihi ya be matala

mwohono mu enganyma, mandagha ma líli a bihi mutwunu mu be ŋa nkulu a Tite maamono si ti anga enganyma. **15** Dzyi li nde mu be lili lilagha, ŋa aakalibili nde mweē mu bintamana bi be bwohono, mu kuulu be liibwana a nde mu budziri ya kunsu enkwughu. **16** Me ndi a esee mu osa kana mu be mu mandagha mwohono.

8 Bandughu mu kana, bihi lidzyi olyele be bu oosuo Nzaami bwehe bu nde kundaa Mabwunu ma Nzaami mama etsulu e nsie kii Masedwane. **2** Ngu okala ti mpara yi alagha yiisohobo mabwunu mamo kunsu bigyele, lo esee e bo ki ebvulu ya buwele bu bo bubu mpini, biipughulu mu busini bu kaba li bo. **3** Me ndi mpughulu mu ndagha yi: Bwunu a bu oli libagha li bo, bo baagwi mu waa li bomo, mu eteese ki ebvulu libagha li bo. **4** Bo baabwono bihi ya epini mu ogwa bo bwehe bu osomo mu esala kii obaha baara ba Nzaami. **5** Bo baagyighili ku oluru eteese ki liikatsimi bihi. Bo baatswama ogwa bumweē bu bo kundaa Mfumu, ŋa nseele kundaa bihi, mu waa li Nzaami. **6** Me mu obo bihi liigwi Tite mpama, mpaala nde amana esala kii bwehe ki kundaa be, bwunu a bu ábaana nde kye. **7** Lo, bwunu a bu lili a be mandagha mwohono ku olagha, kana, mbiili yi mbwe, ligyahaba, mbaa yi mawa-mawa ya dzyi li lili a be mu bihi. Likala si a kaba li lilagha mu libaha li. **8** Me ka ngwi be litumu o, lo me ndyele be obo mu nkooro a mbaa a babake, mpaala bagyele enganyma e dzyi li be. **9** Mu kuulu be lisoolo bwehe bu Mfumu a bihi Yiisu-Kriste, nde wu áali esini, nde ákighiri muwele mu nkooro a be, mpaala mu buwele bu nde be likala bisini. **10** Me ngwi be etsimi e me mu ndagha oyo: Oli ndaana kundaa be, be baala obaana mubvu wu aaluru liili baara baba nsomo mu otolo bikaba bibye. Ka yini a mu otolo bikaba bibye o, lo ya ogwolo munkana wu otolo bye. **11** Obo me buulu mu matala ma, limana esala ekye, mpaala mandagha ma liigyighili be bwunu a bu oli libagha li be, makala embe-embe ya mbaa a waa li be. **12** Mu kuulu, ŋa baakagwa mu mukolo mumō, Nzaami aakakihi ekaba ekye, ti bwunu a bu oli libagha li lili a lo, lo ka li ligwene a lo o. **13** Mu kuulu, ka badzyi osohobo be kunsu kimini mu ogwa babake libaha o, lo mu osa kuulu ti baara bwohono bakala embe. **14** Mu matala ma, bilogho bi lili a be bi bibvulu, sa bibaha ba bali kunsu magweene, mpaala ŋa akala liikala be

kunsa magweene, bi baakala a bo bi bibvulu sa bibaha be, mpaala okala embe mu baara bwohono. **15** Bwunu a bu básono ti: «Munde wu áali a bilogho bilagha, ka áli a bi biluru o, ya munde wu áali a ndaama ka ágweene a elogho o». **16** Litswe libvurulu matuono kundaa Nzaami mu nkooro a mbaa yi aalo nde mu mukolo a Tite, mbaa yini oyo yi lili a bihi mu be. **17** Mu kuulu nde aakihi ya mbaa yi alagha ndagha yi liisuo bihi nde, ya me mu waa li ndeme nde aagyi kundaa be. **18** Emō ya nde, bihi liigweghe ndughu mu kana wu ookagwa Mabwunu ma Nzaami masyighi mu nkooro a esala nde mu Nsia yi Mbwe. **19** Ŋa yulu oŋo, Mabwunu ma Nzaami maasuolo nde mu okala ndughu a bihi wu midzye, mu esala kii bwehe ki lili mu okabulusala bihi, mu nkooro a nsia a Mfumu ndeme ya mu osuo bumpughulu bu mbaa a bihi. **20** Bihi ka lidzyi o ti baara babagha bihi epfwumu mu mi mitala esala ki baagwi bihi kii otolo bikaba bi bilagha bibye. **21** Mu kuulu bihi liikadzyi ogyighili mandagha ma mabwe, ka yini a ŋa busu bu Mfumu o, lo ŋa nkulu a baara bwohono si. **22** Bihi liigweghe ya bo ndughu a bihi mu kana, munde wuulu mu mansa malagha, bihi liigyele nde mu omono bu oli mbaa a nde, ya mu sa li yo yiibvulu, buulu nde li a kana li lilagha mu be. **23** Mu obo, mu mi mitala Tite, nde li ndughu a me wu midzye ya nganda a me wu esala kundaa be. Lo bandughu ba bihi mu kana bali bantumu ba Mabwunu ma Nzaami, nsia a Kriste. **24** Me mu obo, ŋa nkulu a mabwunu ma Nzaami, lisuo bo ti be lidzyi bo, ya ti mutwunu a bihi mu be ka li wu a bwunu o.

9 Mu mi mitala ndagha yi ogwa libaha kundaa baara ba Nzaami, me ka aamono mupfunu mu osono be o. **2** Me nsuolo mukolo mbaa a be mu ndagha yii obaha baara ba Nzaami, ya me ndi a mutwunu mu nde ŋa nkulu a basi Masedwane. Me aandyele bo ti bandughu mu kana ba bali ku etsulu e nsie kii Akayi báli mukughu mu ogwa libaha obaana mbvulu wu aaluru, ya mbaa a be mu ogwa libaha yiigwi baara balagha mpama. **3** Lo me aangweghe be bandughu mu kana mpaala mutwunu wu lili a bihi mu nkooro a be anyaa okala wu a bwunu mu ndagha oyo, ya be likala baba mukughu, bwunu a bu aandyele me yo. **4** Me ndi a nzalamweē ti kala basi Masedwane ba baagya ya me ya bamono ti be ka lili mukughu

o, bihi sa likpa budzwa mu nkooro a emiini ki liisi bihi mu be, behe si sa likpa budzwa. **5** Me mu obo me aamono mupfunu mu ogweghe bandughu mu kana ba baatswama ku nkulu a bihi, mpaala babvughu bikaba bi liisiini a be bihi, mpaala libaha lilo likala ti anga ekaba ki baagwi mu mukolo mumō, lo ka mu mikolo myele o. **6** Lisoolo ti, nswe mbwuru wu aakunu ku osala, sa atolo si ku osala, ya wu aakunu ku olagha, sa atolo si ku olagha. **7** Nyaā nswe mbwuru agwa bwunu a bu aagwaa nde mu mukolo a nde, gwene a minyoō bwunu we mu ku baakwighi nde. Mu kuulu «Nzaami aakadzyi mbwuru wu aakagwa mu esee». **8** Ya Nzaami li a lileene mu olwuhu be mu bwehe bubu mawamawa, mpaala mu matala mwohono be likakala a byehene bi bikughu, ya be lifirikala a bye bi bilagha, mu okagyighili myehene mi mibwe. **9** Bwunu a bu básono ti: «Nde aakakaba, nde aakagwa kundaa bawe, bunsumu bu nde buli bubu mibvu ya mibvu.» (aiōn g165) **10** Ankoho, Nzaami wu aakagwa «mburu kundaa mukunu ya wu aakagwa bi-odza», sa agwa behe si mburu, sa asa ti yo yiburunu, ya sa asa ti bimburu bi bunsumu bu be bikulu. **11** Mu obo, be sa likala bisini mu mandagha mwohono, mpaala matala mwohono be likagwa bikaba bibi mawamawa. Ya, bwohono ba baagyagha bikaba bi be, mu nzili a bihi, sa bakabvurulu matuono kundaa Nzaami. **12** Mu kuulu esala kii ogwa bikaba ki, ka eegwa yini a libaha kundaa baara ba Nzaami o, lo kye sa esa si kuulu baara babvurulu matuono malagha kundaa Nzaami. **13** Bu bamono mupfunu a esala ki, bo sa basyighi Nzaami mu nkooro a bintamana bi liikasuo be ŋa nkulu a Nsia a Kriste yi Mbwe, ŋa nkulu a baara bwohono, ya mu libaha li likaba be busini bu be emō ya bo, ya baara bwohono. **14** Mu dzyi li lilagha li bali a bo mu be, bo baakasamana mu be mu nkooro a bwehe bubu bvulu olagha bu oogwi be Nzaami. **15** Matuono kundaa Nzaami mu nkooro a ekaba e nde kiili baara ka bakughu ogwa mambaala ma kye ol

10 Me Poole, me ngwi be mpama mu edzuunu ya bubwe bu Kriste, me wu ookalyele baara ti, ka ndi a bukyini ŋa mihi mi be o, lo aakankala a kaha li lilagha ŋa aakankala me la ya be. **2** Mu obo, me mbuono, ka litsiini me mu okala a kaha ŋa aangya me kundaa be, ti bwunu a bu aansa me kundaa baara ba baakatsimi ti bihi

liikadzyara mu embwuru. **3** Mu enganyma, bihi lili baara, lo bihi ka liikadzwana mu embwuru o. **4** Mu kuulu, bidzwana bi liikasalala bihi mu odzwana mamvulu ka bili bii embwuru o. Lo bye bili a lileene mu Nzaami, mu otsala bibagha bibi mpini bi bili bitsimi bibi mpya. **5** Ya mu otsala masyighi mwohono ma maakatemene ligyhaba li Nzaami ngangala. Ya bihi liikagwolo bitsimi byehene mu obiri bye mu okala a bintamana mu litumu li Kriste. **6** Bihi lili si yeelee mu osyeme baara bwohono ba baakabihi litumu, mu matala ma ookala bintamana bi be mukughu. **7** Litala mandagha bwunu a bu mali! Kala ti mbwuru li a kana ti nde li wu a Kriste, nyaã nde akwara si ndagha yi: Kala ti nde li wu a Kriste, bihi si lili baba Kriste! **8** Mu obo, me nkughu okala a mutwunu wu alagha mu emfumu ki oogwi bihi Mfumu, mu osa ti kana li be likulu, lo ka mu obwihi lo o. Me ka mono budzwa mu ndagha oyo o. **9** Me ka ndzyi omojono ti anga mbwuru wu li mu okagwa be nzalamweë mu mikaana mi me o. **10** Mu kuulu, baakalyele ti mikaana mi mili a mandagha mama kubu ya mama mpini. Lo mu matala ma aakakala ndeme ña nkulu a bihi, nde ka aakakala a mpini o, ya mandagha ma nde ka maakakala a mubwughu o. **11** Nyaã ti mbwuru wu aakabili obo akwara ndagha yi: Bwunu a bu liikabili bihi mu mikaana ña lili bihi la, bwunu obo si bihi liikala mu bigyighili bi bihi ña nkulu a be. **12** Mu obo, bihi ka likala a kaha lili osagha okala embe bwunu we lili ofaana ya baara babake, ba baakakala a masyighi mu bomo o. Bo bu baakagwolo efaana kii bomo mu ogyeele bo-a-bo, bo bali biwulu. **13** Bihi ngu baala ka likala a mutwunu mu eteese ki eluru o. Lo bihi lili mu okasa mutwunu yini a mu milili mii esala ki ógwi bihi Nzaami, ki eesi ti bihi liyato tee kundaa be. **14** Mu obo bihi ka lili mu okaluru milili mi esala e bihi o, ti anga bihi ka liigy ti tee kundaa be o. Mu kuulu, bihi lili baara baba nsomo ba bayabiri be Nsia yi Mbwe yi a Kriste. **15** Bihi ka lili a mutwunu wu luru mu bisala bi baara bakimi o. Lo kala ti kana li be likulu, bihi sa likala a emiini mu ofirikala baara ba banene ña kara li be mu esala e bihi, **16** bu litsala Nsia yi Mbwe mu bitsulu bi mansie bi bili la ya be, gwene okala a mutwunu mu bisala bi baara bakimi, mu bibini bi ógweghe bo Nzaami. **17** Ti bwunu a bu básono ti: «Nyaã ti mbwuru wu aasa mutwunu, asa mutwunu a nde mu Mfumu!» **18** Mu kuulu, ka baakakihi

mbwuru wu li a masyighi mu nyuru a ndeme o, lo munde wu aakabagha masyighi kundaa Mfumu.

11 Me ndzyi ti be likuru mana lala li me. Mu nganyma, likuru me! **2** Mu kuulu, me aakansa be ebaa ki eekafa kundaa Nzaami ndeme. Me aangwolo bilyimi bi mabala ma be kundaa mulumu yini a mumõ, mu osuo be kundaa Kriste. Me ndzyi osuo be kundaa nde ti anga bu baakasuo mutughu wu munkyini ya wu a tse-tse. **3** Lo bwunu a bu ópfiri ntaala Ebve mu bintwaã bi nde, me ndi a nzalamweë ti bapfiri behe si. Me ka andzyi o ti bitsimi bi be bikighiri bi bibi ya bikaghaba ya bubwe ya butse-tse ña nkulu a Kriste. **4** Mu kuulu, kala ti mbwuru yaluo be Yiisu mukimi ña yulu a munde wu líluo bihi be, be liikakuru nde. Be liikakuru si ogyagha mufulu mukimi ña yulu a munde wu lígyagha be, bwunu we Nsia yi Mbwe nkimi ña yulu a yi lígyagha be. **5** Lo me bu ntsimi ti babo ba liikata be «bantumu ba banene», ka babvulu me mu ndagha si mõ o. **6** Kala ti me ka ndi wu bátsyaha mu mi mitala liteere li obili o, lo mu mi mitala ligyhaba li mandagha ma Nzaami, me ndi wu bátsyaha. Bihi áli liisuo be mwohono ma mõ epankala, mu nswe matala. **7** Me lisumu aansu bu aankughulu me ña nkulu a be mpaala me nseene be mu yulu, ña aakanduo me be Nsia yi Mbwe yi a Nzaami gwene a oluomo be nzi? **8** Me ka aansu bubi bu aankihi mufuru a mabwunu makimi, mpaala me nsalala nde mu obaha be. **9** Ya mu matala ma aandi me kundaa be, me ka aanduomo mbwuru mu ogwa me libaha li aakankala a me nzala a lo o. Mu kuulu bandughu mu kana ba baafi ku etsulu e nsie kii Masedwane, baayabiri me bilogho byehene bi aandi a me nzala bye. Ya mu mandagha mwohono, me aambihi okala leme kundaa be, ya me sa nsa mukama mu okagyighili ndagha oyo. **10** Mu enganyma e Kriste ki eli mu me, ka oli a mbwuru mu etsulu e nsie kii Akayi wu aalighi me mu okala a mutwunu mu ndagha oyo o! **11** Mu emakye me ndyele obo? Mu kuulu me ka aakandzyi be o? Nzaami soolo ti me ndzyi be! **12** Mandagha ma ndi mu okagyighili me, me sa firingyighili mo, mpaala me nyaã ogwa nzili kundaa ba badzyi omojono ti bo bali nsihi ya bihi, mu mandagha ma baakasa bo mutwunu. **13** Baara baba obo bali bantumu baba mpya, basala baba emfiri-a-

mpya ba baakamoŋono ti bo bali bantumu ba Kriste. **14** Ndagha oyo ka yili ndagha yi a misimi o, mu kuulu Satana ndeme aakamoŋono ti ngye-yulu wu otsyeme. **15** Ka yili ndagha yi a okinjimi o, kala ti basala ba Satana baakamoŋono ti anga basala baba bunsumu. Masini ma bo sa makala bwunu a bu oli bigyighili bi bo. **16** Me firindyeye yo, mbwuru anyaaŋ otsimi ti me ndi nga-a-lala. Kala ti be likihi ti me ndi nga-a-lala, lo linya kuulu ti mehe si nkala a mana masyighi! **17** Mandagha ma aandyeye me, me ka aandyeye mo ti bu oli dziyi li Mfumu o. Lo me sa mbili ti anga nga-a-lala, ya me ndi a kana mu obagha ndagha yi aankala a me masyighi. **18** Mu kuulu baara balagha baakabulusa masyighi mu mandagha mama embwuru, mehe si sa nkala a masyighi. **19** Be ba libvulu a mayele, be liikakuŋu banga-a-lala mu bunyanya! **20** Mu kuulu be liikakuŋu ti basa be bankana, basalala busini bu be, bagwohono bilogho byehene bi lili a be, bakatsaala be, bakakaha be ku edzili! **21** Me ndi a budzwa mu olyele be mandagha ma: Oli mu omorŋono ti bihi-a-be ka lili a mpini o. Lo kala ti mbwuru li a kaha lili ogyighili ndagha, mehe si ndi a kaha lilo! Me ndi mu obili ti anga nga-a-lala. **22** Bo ba-Eebere bali? Mehe si ndi mu-Eebere! Bo basi Isarayelee bali? Mehe si ndi musi Isarayelee! Bo baba musyi a dzumu li Abarahame bali? Mehe si ndi mu musyi a dzumu li Abarahame! **23** Bo basala ba Kriste bali? Me ndi mu obili ti anga nga-a-lala, me mbvulu bo! Mu bisala bibi mpini, me mbvulu bo. Mu osomo boloko, me mbvulu bo. Mu nkubu, me mbvulu bo. Mu mi mitala nsihi yi lipfu, mansa malagha me aakaankpa. **24** Mansa mataana, ba-Dzwife bakaha me nswa-nswa makwumu-matere ya wa. **25** Mansa matere, bakaha me mangbala. Sa limo bakaha me mamee. Mansa matere bwara bu andi me mu kara budzyama mu madza. Sa limo me aanduho etsughu etsyini ya mpyibi nsyini mu kara a kara a mubu. **26** Matala malagha, me aangyene midzye mu myili. Me aansomo kunsu nsihi yi a banzala, nsihi yi a bantwumu, nsihi yi a ba lili etswumu emo, nsihi yi a baala ka bali ba-Dzwife o, nsihi yi a bvulu, nsihi yi a syeha, nsihi yi a mubu, nsihi yi a bandughu mu kana baba mpya. **27** Me aakasala ya aakamono mpara, aakakahala mihi, aakakolo nzala ya nyoro, aakakpa nzala, aakaŋma mpie ya aakankala mpene. **28** Gwene otala mandagha ma masyili, ndagha yi li mu okamwehe me mpara

nswe etsughu, me manguo mu Mabwunu ma Nzaami mwohonono. **29** Nande aakolo gaala mehe si ka aankolo o? Nande baabwihi mu masumu, gwene a osa me mukolo mpara? **30** Kala ti me mfaana osa masyighi, me sa nsa masyighi mu mi miikasuo ti me ka ndi a mpini o. **31** Nzaami, wu li Taara a Mfumu Yiisu, wu li wu liseme mu mibvu ya mibvu, soolo ti me ka ndi mu okapfiri o. (aiŋ g165) **32** Ku Damase, mfumu a etsulu e nsie wu aali embala ki mukogho Aretase, atwulu bankyele mu miŋma mi bvulu lili Damase, mpaala basyimi me. **33** Lo basurulu me munsu nkuru yi nene, mu etse ki eli mu ebagha kii mutele wu mula, ya me aambvwughu ŋa myaa mi nde.

12 Bunu, me mfaana okala a masyighi? Pele, ka oli a mupfunu o! Lo me ndzyi obili mu mi mitala mandagha ma amono me mu limono ya mandagha mama ensweghe ma osuo me Mfumu. **2** Me nsoolo enduono e Kriste kiili, bamvulu kwumu ya bana bamaaluru, Nzaami agyene a nde ku nkara a Mayulu. Nde mu nyuru yi a musunu ali? Me ka nsoolo o. Nde ka ali mu nyuru yi a musunu o? Me ka nsoolo o. Lo Nzaami soolo. **3** Ya me nsoolo ti mbwuru munde, ngu okala ti ali mu nyuru a nde, bwunu we ka ali mu nyuru a nde o, me ka nsoolo, lo Nzaami soolo. **4** Mbwuru munde bagyene a nde ku paradise, ya nde agyughu mandagha maala ka bakughu obagha bu baalyele o, mandagha maala mbwuru ka li a muswa mu ofirilyele mo o. **5** Me sa nkala a masyighi mu mbwuru wu obo, lo mu meme, me sa nkala a masyighi yini ŋa oosughu o mpini a me. **6** Kala ti me nzala a okala a masyighi, me ka kaankala nga-a-lala o, mu kuulu me yini a engaŋma kaandyeye. Lo me aambihi osa obo, mpaala baara banya a omono me mu eteese ki ebvulu mandagha ma baamono bo mu me, bwunu we mandagha ma baagyughu bo me mu obili. **7** Mu obo, mpaala me nya okala a liwagha mu mandagha mama misimi mama ensweghe ma osuo me Nzaami, basohobo me nsiene munsu nyuru, ngu ngye-yulu a Satana aakamwehe me mpara, mpaala me nya okala a liwagha. **8** Mansa matere me aambuono Mfumu mpaala amaha me mpara oyo. **9** Lo nde alyele me ti: «Bwehe bu me bukughu mu we, lileene li me liikamoŋono ŋa ookasughu mpini a we». Mu obo, me sa kala a masyighi ma mbvulu mu matala ma

ookasughu mpini a me, mpaala lileene li Kriste likala mu me. **10** Me mu obo me aankamono esee mu matala ma ookasughu mpini a me, mu bitughu, mu mpara, mu kimini li ookamwehē bihi baara ya mu nzalamweē, mu nkooro a Kriste. Mu kuulu, me mu matala ma ookasughu mpini a me, me aakankala a makpa. **11** Me ndi mu okabili ti anga nga-a-lala. Me be liitsiini me mu obili obo! Mu kuulu, me be liikaabili mu osuo bubwe bu me, lo ka meme o. Ngu okala ti me ndi mbwuru wu a bwunu, bantumu ba baakamojono ti bo bali baara ba banene, ka babvulu me mu ndagha si mō o. **12** Bilyimi bi biikasuo ti mbwuru li ntumu biimorjono ŋa kara li be: Okuru mukolo mu biyelee, bilyimi bibi okijimi, bigyighili bibi lileene ya bimaā. **13** Nki ndagha me āngyighili mu mabwunu ma Nzaami, yi aangwene ogyighili me kundaa be? Ndagha yi nsolo me yini a ti me ka aakankala leme kundaa be o. Lisa me kolokolo kala ti me bubu aansi mu ndagha oyo! **14** Li me sa li litere li ndi me mukughu mu ogya kundaa be, ya me ka ankala leme kundaa be o. Mu kuulu me nzala a be ndi a yo, lo ka bilogho bi be me ndi a nzala a bye o. Mu enganyma, ka oli baana bafaana otwulu bilogho mu libee mu nkooro a biburu bi bo o, lo biburu bifaana otwulu bilogho mu libee mu nkooro a baana ba bo. **15** Me ngu wuulu sa nsalala nzi a me yohono mu esee mu nkooro a be, ya sa ngwa laama li me mu nkooro a be. Kala ti me ndzyi be ku olagha, be yini a ku osala lidzyi me? **16** Mu enganyma, lisoolo ti me ka aandi leme kundaa be o! Lo baara babake bali mu okalyele ti me ndi nga-a-bintwaā, me aambagha be mu mayele ma mabi. **17** Bunu, mu baara ba aangweghe me be, oli a mbwuru wu aagwolo mu nkumu a me bilogho bi be mu mayele ma mabi? **18** Me aangwi Tite mpama mu ogye kundaa be. Ya me aangweghe ndughu mu kana mumō ya nde. Bunu, Tite bilogho bi be aagwolo mu mayele ma mabi? Bihi a nde ka liikakala a bitsimi bimō o? Bihi a nde ka liikadzyara mu nzili mō o? **19** Obaana mana matala, be bu lili mu okatsimi ti bihi manyuru ma bihi lili mu okakala ŋa nkulu a be? Pele, bihi me ŋa busu bu Nzaami, mu Kriste, lili mu okabili. Ya bandughu ba me baba mukolo, mandagha mwohonono ma liikalyele ya liikagyighili bihi me mu nkooro a otwu kana li be. **20** Mu kuulu me ndi a nzalamweē ti ŋa aangya me kundaa be, me ka ayambwana be

bwunu a bu ndzyi me ti be likala o, ya behe si linyaā omono me ti bwunu a bu lidzyi be ti me nkala. Me ndi a nzalamweē ti ŋa kara li be okala a mumbanjana, ebba, mankehe, embagha, makuhu mu banganda, embili-a-mbili, mubili a nyuru, yaghala. **21** Me ndi si a nzalamweē ti ŋa aangya me kundaa be, Nzaami afiritwuhu me bupfiri mu nkooro a be, ya me ndili mu nkooro a baara balagha, ba bātswama osa masumu mu matala ma makulu, ya ba baagwene ogyiŋi mayele mu onyaā mandagha ma bātswama okasa bo: mandagha mama osujumu, esighi ya enkwanu.

13 Li me sa lili tere li aagya me kundaa be. Ti bu básono: «Mu otsyiri nswe ndagha, bafaana ogyughu bampughulu buolo bwunu we batere.» **2** Mu matala ma ándi me ya be mu sa lili gyolo, me ámaandeyele yo, ya me firindyele yo lolo mu matala maala me ka ndi ya be o. Me firindyele kundaa ba bātswama osa masumu, bumō si kundaa babake ti: Kala me yambvughuru mu oyamono be, me ka amono mbwuru nyiŋ o. **3** Mu kuulu be lili mu okasagha elyimi ki eesuo ti Kriste aakabili mu me. Nde wuulu ka agwene a mpini kundaa be o, lo nde li a lileene ŋa kara li be. **4** Mu kuulu, bákomo nde ŋa kuruwa mu matala ma osughu mpini a nde, lo nde li mweē mu lileene li Nzaami. Ya bihi si lili ba bagwene a mpini emō ya nde, lo mu nkooro a be bihi sa likala mweē emō ya nde mu lileene li Nzaami. **5** Ligyeele manyuru ma be beme mu omono kala ti be lili mu kana. Likeene mikolo mi be beme. Be ka liikihi o ti Yiusu-Kriste li mu be? Kala ti ogyeele ku liigyele be manyuru ma be oli kuu mpya, lo be áyi liibwi. **6** Mu enganyma me ndi a emiini ti be sa liikihi ti bihi ka liibwi o. **7** Lo bihi liikabuono Nzaami mpaala be linyaā ogyighili ndagha yi mbi. Ka mu kuulu ti bihi limorjono ti bihi liilughulu, lo mu kuulu ti be likasa bubwe, ngu okala ti bihi lili mu okamorojono ti ka liibwi o. **8** Mu kuulu bihi ka lili a lileene li otemene a enganyma nsumu o. Lo bihi yini enganyma likughu osalala. **9** Bihi, bihi liikakala a esee ki elagha nswe matala ma ookasughu mpini a bihi. Lo be, be lili a makpa. Bihi liikasamana mpaala be likala baara ba babvughuru mu nzili yimbwe. **10** Me mu obo, me bu ndi nkini la ya be, me nsono be mandagha ma mpaala mu matala ma akala aangya me kundaa be, me nyaā osyeme be mu

ebaghala mu litumu li ógwi me Mfumu. Litumu lilo ka lili mu kuulu me ntsala kana li be o, lo mu kuulu me ntwu lo. **11** Bandughu ba me mu kana, mu omana mukaana a me, likakala mu esee, likasagha okala baara ba babvughuru mu nzili yimbwe, likagwa be a be mpama, likakala a bitsimi bimō, likakala mu edzuunu, ya Nzaami wu a dzyi ya wu edzuunu sa akala ya be. **12** Ligwihini a mamboro be a be mu dzyi ti bu ofaana ku baara ba Nzaami. Baara ba Nzaami bwohono bagwi be mboro. **13** Nyaã bwehe bu Mfumu Yiisu-Kriste, dzyi li Nzaami ya bumō bu Mufulu a Ngili, bikala ya be bwohono!

Ngalate

1 Me Poole, wu li ntumu, mu gwaa li Yiisu-Kriste ya lili Nzaami, Taara wu áasiili nde ŋa kara li ba bápki, lo me ka ndi ntumu mu dzyi li baara o, bwunu we mu libaha li mbwuru. **2** Emō ya bandughu mu kana bwohono ba bali kunu ya me, me nsono mukaana wu kundaa mabwunu ma Nzaami ma mali mu etsulu e nsie kii Ngalati mu oleye ti: **3** Nyaā bwehe ya edzuunu bi bifi kundaa Nzaami Taara a bihi ya kundaa Mfumu a bihi Yiisu-Kriste, bikala ya be! **4** Yiisu-Kriste ágwi bumweē bu nde ndeme mu nkooro a masumu ma bihi-a-be, mpaala akwulu bihi-a-be mu nsie yi a bubi yi, ti bwunu a bu oli gwaa li Nzaami, wu li Taara a bihi-a-be. (aiōn g165) **5** Nyaā nsia a Nzaami yikala yi mibvu ya mibvu! Amene. (aiōn g165) **6** Me nkiñimi mu maswa ma liisi be mu otyeghe munde wu aati be mbili mu bwehe bu Kriste mbihi, mu onama nsia yi mbwe nkimi. **7** Lo mu ogyighili otala, ka yili Nsia yi Mbwe nkimi o, mu kuulu yini a baara ba bali mu okasa yaghala ŋa kara li be, ya ba badzyi obyihi Nsia yi Mbwe yi a Kriste. **8** Lo kala ti mbwuru, bwunu we bihi bameme, bwunu we kala ti ngye-yulu mumō wu a mayulu tsala be Nsia yi Mbwe, yili a lisobo ya yi liitsala bihi be, nyaā babiili nde epwolo! **9** Bihi liimaatswama oleye be yo, ya mu matala ma me firindyele ti: Kala ti mbwuru tsala be Nsia yi Mbwe nkimi yili a lisobo ya yi liigyagha be, nyaā babiili nde epwolo! **10** Mu matala ma, me bu ndi mu okasagha ti baara bakihi me, bwunu we kuulu ti Nzaami akihi me? Baara me ndi mu osagha ogwa esee? Pele, kala ti me baara aakandzyi ogwa esee, nkini me ka akaankihi okala musala a Kriste o. **11** Bandughu ba me mu kana, mu engañma, me ndyele kundaa be ti: Nsia yi Mbwe yi, yi aantuohe me be ka yifi kundaa a mbwuru o. **12** Mu kuulu, ka oli mbwuru aagyaha me yo o, bwunu we aaluo me yo, lo Yiisu-Kriste áasuo me yo. **13** Buulu be líigyughu bu óli nzya-nzyara a me mu matala ma makulu, ŋa ándi me mu libwunu li ba-Dzwife. Be lisoolo bu áakamwehē me libwunu li kimini mu dzighi, ya bu áakansagha me odzwa lo. **14** Mu osalala ku mikyene ya ekulu ki ba-Dzwife, me áakamvulu ba-Dzwife balagha ba bali esene emō ya me. Mu kuulu me áandi a ebaa kii elagha mu okakala ekulu ki bankagha

ba bihi. **15** Lo Nzaami wu áasuolo me obaana mu mweē a ngughu a me, ya wu áati me mbili mu bubwe bu nde, **16** nde aamono bubwe mu osuo me Mwana a nde mu matala ma, mu kuulu me ntuohe Nsia yi Mbwe yi a nkwumu a nde kundaa baala ka bali ba-Dzwife o. Lo mbala mō, me ka ánduomo luo kundaa mbwuru o, **17** ya me ka ámangye ku Yerusaleme mu oyimono babo ba báli bantum nsomo ya me o. Lo me áangyene ku nsie yi a Arabi. Bu ámara oko, me áambvughuru ku bvulu lili Damase. **18** Yini a ŋa mbihi a bamvulu batere, me áankumu ku Yerusaleme mu oyimono ya Sefase. Ya me áansi bitsughu kwumu ya bitaana ya nde. **19** Me ka ámono ntumu mukimi o, kala ti ka yini a Dzake o, mbwee a Mfumu. **20** Nzaami li mpughulu mu mandagha ma ma ndi mu osono me be, me ka mpfiri mpya o. **21** ŋa mbihi ogo, me áangyene ku bitsulu bi nsie bibi Siri ya bibi Silisi. **22** Lo baara baba mabwunu ma Nzaami mama mu etsulu e nsie kii Yude, ma máli mu Kriste, nkini ka bámaamono edzili e me o. **23** Bo yini a nsia ali bágyughu ti: «Munde wu áakamwehē bihi-a-be kimini mu matala ma máluru, mu matala ma, li mu okabulutsala ti anga nsia yi mbwe yi a kana li ákasagha nde odzihibi». **24** Mu obo bo bákasyighi Nzaami mu nkooro a me.

2 ŋa mbihi a bamvulu kwumu ya bana, me áafirinvughuru ku Yerusaleme emō ya Baranabase. Ya me áambiri si Tite. **2** Me áankumu oko mu litumu li ógwi me Nzaami. Me áangyene oko ya áanduo bo Nsia yi Mbwe yi ákantsala me kundaa baala ka bali ba-Dzwife o. Me áanduo si yo mu bimogo kundaa baara ba babvulu mupfunu. Me áanduo bo, mu kuulu esala ki ánsi me nsomo ya ki ndi mu okasa me mu matala ma, enyaā okala kii bwunu. **3** Lo Tite, wu áali ya me, ka bátsiini nde mu mpini o mu osomo nzo a mbaa, si bu áli nde mu-Ngereke. **4** Óli a bandughu mu kana baba mpya, ba básomo mu mayele ŋa kara li emvunjunu e bihi. Bo bágyi mu okeene bumpoholo bu lili a bihi mu Yiisu-Kriste, mpaala basa bihi bankana ba Mikyene. **5** Lo si ekee, bihi ka líkihi onama mandagha ma baara babo o, mu kuulu bihi líidzyi ti engañma ki Nsia yi Mbwe ekakala mu be. **6** Baara baba mupfunu báli si oko. Lo ngu okala ti bo báli bamfumu, kundaa me, bumfumu bu bo ka buli ndagha yi mupfunu o, mu kuulu Nzaami ka aakatala bidzili o. Ya bamfumu baba

mupfunu babo, ka bátumu me mbwehe ndagha si mō mu maluo ma me o. **7** Lo bo bu bamono ti Nzaami ágwi me litumu mu oyitsala Nsia yi Mbwe kundaa ba bággwene osomo nzo a mbaa, ti bwunu a bu ágwi nde Piere litumu mu oyitsala Nsia yi Mbwe kundaa ba básomo nzo a mbaa, **8** mu kuulu munde wu áasi ti Piere akala ntumu kundaa ba básomo nzo a mbaa, me ndehe si áasi ti me nkala ntumu kundaa baala ka bali ba-Dzwife o, **9** Dzake, Sefase ya Dzā ba báli makwii ma libwunu li Nzaami, bu babaghala ti Nzaami áagwi me bwehe bubo, bo bágwi bihi ya Baranabase mboro yi a ekee, mu osuo ti lílil bumō ya bo mu esala. Ya bo, lílgwihini ti, bihi ligye kundaa baara ba bágwene osomo nzo a mbaa, ya bo bagye kundaa baara ba básomo nzo a mbaa. **10** Bo bátswi bihi mukele ti likatsimini baweke, ya me áakansa ndagha oyo mu mukolo mumō. **11** Lo ŋa ógyi Sefase ku bvulu lili Antyose, me áambihi nzya-nzyara a nde ŋa nkulu a baara bwohono, mu kuulu nde ka áli ya bwuu mu osa obo o. **12** Nsomo ndaama a baara ba ógweghe Dzake bayato, Sefase ákadza emō ya baala ka báli ba-Dzwife o. Lo baara babo bu bayato, nde ágweje ya ákaghaba ya baala ka báli ba-Dzwife o. Nde ási obo mu nkooro a nzalamweē a ba básomo nzo a mbaa. **13** Ba-Dzwife babake bakanama bu ákasa nde. Baranabase si ágyene mu nkwi-nkwughu a nzya-nzyara a bo yi bumpibi. **14** Lo me bu mono ti bo ka bákadzyara kunsu enganyma ki Nsia yi Mbwe o, me áandyele kundaa Sefase ŋa nkulu a baara bwohono ti: «We wuli mu-Dzwife li mu okadzyara ti anga baara baala ka bali ba-Dzwife o. Lo we ka li mu okadzyara ti anga bu ookadzyara ba-Dzwife o! Bunu we kughu otsiini baala ka bali ba-Dzwife o banama bipfu bi ba-Dzwife?» **15** Bihi-a-be lili ba-Dzwife baba emburu-ngughu, bihi-a-be ka lili mu kaba lili banga-a-masumu ba o, baala ka bali ba-Dzwife o. **16** Lo bihi-a-be lisoolo ti Mikyene ka mikughu osa o ti mbwuru akala nga-a-bunsumu ŋa mihi mi Nzaami, lo yini a mu osa kana mu Yiiisu-Kriste. Bihi si liisi kana mu Yiiisu-Kriste mpaala basa ti bihi likala banga-a-bunsumu mu kana li bihi mu Nde, lo ka mu onama Mikyene o. Mu kuulu, Mikyene ka mikughu osa o ti mbwuru akala nga-a-bunsumu ŋa mihi mi Nzaami. **17** Bihi-a-be lili mu okasagha ti Nzaami asa bihi-a-be likala banga-a-bunsumu mu Kriste. Bu liisi bubo, baamono ti bihi-a-be lili banga-a-

masumu. Kala ti me obo, ngu Kriste aasi kuulu ti bihi-a-be likala banga-a-masumu? Pele, ka bubo o! **18** Mu obo, kala ti me firintwu bibye bi aantsala me, me ndi mu osuo ti me ndi mu otsala Mikyene. **19** Mu kuulu, me ndi wu aakpi mu Mikyene, mu okala mweē mu Nzaami. Bákomo me ŋa kuruwa emō ya Kriste. **20** Me bu ndi mweē, ka oli me o, lo Kriste li mweē mu me. Mu bumweē bu me bubu mu musunu, me ndi a bo mu kana mu Mwana a Nzaami wu áadzyi me ya wu áagwi nyuru a nde ndeme mu nkooro a me. **21** Me ka mbihi bwehe bu Nzaami o, mu kuulu, kala ti bunsumu buli mu onama Mikyene, lo Kriste kuu bwunu ákpi.

3 Aa baara ba Ngalate, be mayele we! Nande aabiili be mpwoho? Be baala, ŋa mihi mi be bágyighili osuo Yiiisu-Kriste wu bákomo ŋa kuruwa. **2** Limatsimi ati mu ndagha yi: Mufulu wu lígyagha be, be lígyagha nde mu nkooro a osalala Mikyene, bwunu we mu nkooro a ku lígyughu be Nsia yi Mbwe, mpaala be lisa kana mu yo? **3** Bunu-abo be likughu okala a buwulu mu eteese kii bu? Be líibaana mu Mufulu, ya mu matala ma be lidzyi onama mu embwuru? **4** Mandagha mwohono ma liibwana a be ma, mama bwunu? Ka okughu okala ti kuu bwunu o! **5** Nzaami aakagwa be Mufulu a nde ya aakasa bimaā ŋa kara li be. Mu nkooro a Mikyene mi liikanama be, bwunu we mu nkooro a Nsia yi Mbwe yi a kana yi lígyughu be nde aakasa obo? **6** Buulu, Abarahame ási kana mu Nzaami, Nzaami ámono nde ti mbwuru nga-a-bunsumu. **7** Lo be lifaana osoolo yo ti, babo ba baakasa kana, me bo bali baana ba Abarahame. **8** Bisono bítswama olyele yo ti, Nzaami sa asa kuulu ti baara baala ka bali ba-Dzwife o, bakala baara ba nga-a-bunsumu mu kana. Nde átuoho nsia yi mbwe yi kundaa Abarahame: «Bikaana byehene sa bibagha liseme mu we.» **9** Mu obo, babo ba baakasa kana, bali ba básame mu Abarahame, munga-a-kana. **10** Babo bwohono ba baakasa mukolo mu onama Mikyene bali kunsu epwolo. Mu kuulu básono ti: Epwolo kundaa mbwuru wu aagwene osa mukama mu onama mandagha mwohono ma básono munsu mukaana a mikyene! **11** Mu enganyma, ŋa busu bu Nzaami ka oli a mbwuru si mumō wuli nsumu bu aakanama mikyene o, mu kuulu básono si ti: «Mbwuru nga-a-bunsumu sa akala mweē mu kana.» **12** Lo Mikyene ka mítala kana

o, lo mu mye básono ti: «Munde wu aakanama mandagha mwohono ma ookatumu mikyene sa akala mweë mu mye.» **13** Kriste ákwulu bihi-a-be mu epwolo ki Mikyene, bu ákighiri nde ndeme epwolo mu nkooro a bihi-a-be, ti bwunu a bu básono ti: «Epwolo kundaa munde wu baamanana ŋa yulu a muti.» **14** Mu kuulu, mu Yiisu-Kriste liseme li líyato tee kundaa baala ka bali ba-Dzwife o, mpaala mu kana, bihi-a-be ligyagha Mufulu wu ógwi Nzaami misiini. **15** Bandughu mu kana, mu mi mitala bipfu bi baara: Kala ti mbwuru sono mukaana wu osuo gwaa li bafaana onama ŋa mbihi a lipfu li nde, mbwuru mukimi ka kughu omaha o, bwunu we obwehe ndagha nkimi o mu mi aasono nde. **16** Mu obo, misiini bágwi mye kundaa Abarahame ya kundaa munde wu aapala mu etagha e nde. Ka bályele o ti: «Ya kundaa ba aapala mu etagha e nde», mu olyele ti kundaa baara balagha, lo yini a kundaa mbwuru mutsyini: Wu aapala mu etagha e we, mbaala ti «Kriste». **17** Me bu ndzyi olyele ti: Nzaami átswama osono mukaana mu osuo mandagha ma maagya ku nkulu. Mikyene mi mígyi ŋa mbihi a bamvulu nkama-na ya makwumu-matere ka mikughu okahaba misiini mimye o, ya osa kuulu ti misiini mimye mikala mimi bwunu. **18** Kala ti pfa okabagha mu mikyene, ka bakughu ofiribagha nde mu misiini o. Bu ta ngu mu misiini Nzaami ágwi liseme kundaa Abarahame. **19** Mu obo, mupfunu a mikyene muma? Mikyene bábwehe mye mu okasuo masumu ma ookasa baara, tee mu matala ma oogya munde wu bágwi misiini. Ngu bangye-yulu báayasuo Mikyene, mu wu aakabvuhulu ogwihini. **20** Lo mubvughu ogwihini wu a mbwuru ngasighi ka li o. Ya Nzaami li yini a mumō. **21** Obo, mu olyele ti mikyene mili mutaara a misiini mi Nzaami? Pele, ka bukughu okala obo o! Kala ti oli a mukyene wu aakagwa bumweë, nkini li bunsumu bukaagya mu mikyene. **22** Lo Bisoño biikalyele ti baara bwohono bali kunsu bunkana bu masumu, mpaala ba baakasa kana mu Yiisu-Kriste bagyagha byehene bi ósiini a bo Nzaami. **23** Ŋaala áli kana nkini ogya we, bihi-a-be lílil kunsu bunkana bu mikyene, mpaala likebe matala ma oomogono kana lilo. **24** Mu obo, mikyene míli nkyele a bihi-a-be mu matala ma likakebe Kriste, mu kuulu likala baara baba nsumu mu kana. **25** Lo kana bu líigyí, bihi-a-be ka líifirisyili kunsu litumu li nkyele munde o. **26**

Mu kuulu, be bwohono lili baana ba Nzaami, mu kana li liikasa mu Yiisu-Kriste. **27** Mu obo, be bwohono ba báboghoru mu Yiisu-Kriste, be lílilaha Kriste mu nyuru. **28** Ka ofirisyili a mu-Dzwife o, bwunu we mu-Ngereke. Ka ofirisyili a nkana o, bwunu we mbwuru wu bumpoholo. Ka ofirisyili a baghala o, bwunu we mukaha, mu kuulu be bwohono lili mbwuru mumō mu Yiisu-Kriste. **29** Ya kala ti be lili baba ndaa Kriste, lo be lili baba mu etagha kii ndaa Abarahame, be líibyalá pfa li nde, ti bwunu a bu oli misiini mi ógwi Nzaami.

4 Me bu ndzyi olyele: Mu matala maala mwana munde wu akala aabyala mukobo li nkini ngaye, ŋa kara li nde ya nkana ka oli a lisobo o, nde wuulu li mfumu a bilogho byehene. **2** Lo nde aakakala mu litumu li ba bali mu okakwuhu nde ya ba bali mu okakebe bilogho bi nde tee mu matala ma ókuru taara a nde. **3** Oli si bumō kundaa bihi-a-be. Ŋa líli bihi-a-be baana ba basala, bihi-a-be lílil bankana ba mandagha ma nsie. **4** Lo matala bu makughu, Nzaami aagweghe Mwana a nde, wu óburu mukaha, ŋa lili nkini kunsu litumu li mikyene, **5** mu okwulu ba bali kunsu litumu li mikyene, mpaala bihi-a-be likala baana ba ákwuhu nde. **6** Mu kuulu be lili baana, Nzaami ágweghe Mufulu a Mwana a nde, munsu mikolo mi bihi-a-be. Nde wu li mu okakehe engubu ti: Aba, Taara! **7** Mu obo we ka aafirisyili nkana o, lo we li mwana. Ya buulu we li mwana, Nzaami sa agwa we mukobo wu ásiini a nde baana ba nde. **8** Mu nsi-nkulu, be ka áli lisoolo Nzaami o, ya be lílil bankana ba banzaami baba mpya. **9** Lo mu matala ma, be lisoolo Nzaami, bwunu we Nzaami soolo be. Bunu-abo be likughu ofiribvughuru mu bilogho bi bigwene a lileene ya mupfunu? Be lidzyi ofirikala bankana ba bye? **10** Be liikagwa bitsughu, bangoono, mando ya bamvulu budziri bu bulagha! **11** Me ndi a nzalamweë ti mara esala kii mpini ki aansu me mu be ekala kii bwunu. **12** Bandughu mu kana, me mbuono be. Likadzyara ti anga me, mu kuulu mehe si ayi ndi ti anga be. Be ka liisi me ndagha si mó yi mbi o. **13** Be ligyighili osoolo yo bubwe, ti ebyele mu nyuru éegwi me nzili mu otsala be Nsia yi Mbwe, mu sa lili nsomo. **14** Ya, si buulu be liimono mpara yi alagha mu nkooro a ebyele ki éli mu nyuru a me, lo be ka lítsaala me o, ya ka líbihi me o. Ya be líibwana a me ti anga

ngye-yulu a Nzaami, bwunu we ti anga Yiisu-Kriste. **15** Lo esee ki lili a be ekye kunu egylene? Mu kuulu me nsuo bumpughulu bu me mu be ti: Kala áli bukughu okala, be líikaasorolo mihi mi be mu ogwa me mye. **16** Lo me bu aandyele be enganyma, me ayi mutaara a be? **17** Mbaa a dzyi yi bali mu okasuo bo mu be ka yili yi mbwe o, bo yini a me badzyi okabala ya be, mpaala be likala a dzyi lili lagha mu bo. **18** Oli bubwe mu okala a mbaa yi a dzyi, mu mandagha ma mabwe matala mwohono. Lo ka oli yini a mu matala ma aakankala me emō ya be o. **19** Baana ba me, mpara yi ndi mu okamono me mu be, yili ti anga yi a misuo mimi oburu, me ndi mu omono yo, tee ŋa oosala Kriste mu be. **20** Mu matala ma, me ndzyi okala ŋa kara li be, mpaala me nsuolo bu aambili me kundaa be, mu kuulu me ka nsuolo o bunu me aansa mu be. **21** Limalyele ati me, be ba lidzyi okala kunsu litumu li mikyene, be ka liikagyughu mandagha ma básono mu mikyene o? **22** Mu kuulu básono ti, Abarahame áburu baana buolo ba babaghala, mumō mu mukaha wu a nkana, wu muke mu mukaha wu a bumpoholo. **23** Lo mwana wu a mu mukaha wu a nkana báburu nde mu gwaa li baara, ya mwana wu a mu mukaha wu a bumpoholo báburu nde mu otswihi misiini mi ógwi Nzaami kundaa Abarahame. **24** Ndagha yi yili ti anga nkumu yiili mbaala me yi: Bakaha bansa buolo báli bindughu bibi ogwihini byele. Endughu emō ki éfi ku munguo wu a Sinayi, ya eekaburu baana ba bankana, kye ngu Angare. **25** Mu obo Angare me munguo wu a Sinayi wu li ku Arabi. Ya me nde afaana ya Yerusaleme lili matala ma, mu kuulu lo lili kunsu bunkana ya baana ba lo. **26** Lo Yerusaleme lili mayulu lili bumpoholo, ya me lo lili ngughu a bihi. **27** Mu kuulu básono ti: «Kala mu esee, mukaha wu etini, we wu gwene a baana! Fulu miluolo mimi esee, we wu áagwene omono mpara a misuo mimi oburu! Mu kuulu baana ba mukaha wu baanyaghala ku mbala babvulu olagha ya baana ba mukaha wu bakye.» **28** Lo kundaa be bandughu ba me mu kana, be lili baana baba misiini ti anga Idzake. **29** Lo bwunu a bu ókamwehē mwana wu báburu mu gwaa li baara mwana munde wu báburu mu Mufulu kimini, oli si nkini bwunu obo mu matala ma. **30** Lo Bisono bunu biikalyele? «Byi mukaha wu a nkana ya mwana a nde wu baghala mu kuulu mwana a nde anyaa okaba mukobo ya

mwana a mukaha wu a bumpoholo.» **31** Mu obo bandughu ba me mu kana, bihi-a-be ka lili baana baba mu mukaha wu a nkana o, lo baana baba ndaa mukaha wu a bumpoholo.

5 Kriste ákwulu bihi-a-be mpaala likala a nkara bumpoholo. Mu obo, lisa mukama ya ka likihi o ti bafirisa be kunsu ekogholo kii bunkana. **2** Ligyughu! Me Poole ndyele kundaa be ti: Kala be likihi osomo nzo a mbaa, lo Kriste ka afirisiyili a mupfunu kundaa be o. **3** Me firindyeye ya me nyeme ti nswe mbwuru wu aasomo nzo a mbaa, nde faana okanama Mikyene myehene. **4** Be baliikasagha okala baba nsumu mu Mikyene, be liikaghaba ya Kriste, be liitsili bwehe bu Nzaami. **5** Lo mu bihi, mu lileene li Mufulu, bihi lili mu okasa emiini e bihi mu Nzaami, wu aasa kuulu ti bihi-a-be likala bunsumu mu kana li lili a lo. **6** Mu kuulu kundaa mbwuru wu li mu Yiisu-Kriste, osomo nzo a mbaa bwunu we ogwene osomo nzo a mbaa ka bili a mupfunu o, lo ki ebvulu mupfunu, kana li liikamongo mu dzyi. **7** Be líikabara ntyini bubwe. Lo nande aatehebe be, mu okahaba be mu osalala enganyma? **8** Bitsimi bi opeene bibye ka bifi kundaa Nzaami wu aati be mbili o. **9** Ya baakalyele ti: «Mana ndaama a pfini yiikasa ti nkpaā a mampa yohono yifuulu!» **10** Me, me ndi a emiini mu be mu nkooro a Mfumu. Me nsuolo ti be akala ka litsimi bukimi o. Lo munde wu aalo yaghala ŋa kara li be, sa agyagha masyeme, ngu okala ti nande nde ali. **11** Bandughu ba me mu kana, mu me, kala ti me ndi mu ofirikabulutsala nsia yi a osomo nzo a mbaa ti yo yili ndagha yi mupfunu, lo mu emakye bali mu ofirikamwehē me kimini? Kala ti obo, bubi bu ookamono baara mu matala ma baakatsala nsia a kuruwa, ka bufirisiyili ndagha yi mubwughu o! **12** Kala ti obo, nyaā bagwogholo si babo ba bali mu okasa yaghala ŋa kara li be! **13** Bandughu ba me, báti be mbili mu okala bumpoholo. Oli bubwe ti bumpoholo bubo bunyaā ogwa be nzili yi odzyara mu nyuru! Lo mu dzyi, liikakala basala ba banganda. **14** Mu kuulu mikyene myehene bakuru mye mu wu: «Dzyi nganda-mbwuru ti anga weme.» **15** Lo kala ti be beme lili mu okatswa ba bamo myini ya lili mu okakaghala beme-a-beme ti anga banyama, lisa mayele, kala pele be beme sa lidzwa banganda. **16** Me bu ndyele be: Liikadzyara mu Mufulu ya be ka lifirigyighili dzyi li nyuru o. **17** Mu kuulu nyuru

li a dzyi li liikatyeghe Mufulu ebughu, ya Mufulu li a dzyi li liikatyeghe nyuru ebughu. Mufulu ya nyuru ka baakagwihini o, mu kuulu be linyaā osa mandagha ma liikadzyi be osa. **18** Lo kala ti be liikadzyara mu Mufulu, be ka lifirikala kunsu litumu li Mikyene o. **19** Bigyighili bibi nyuru ngu bi: Esighi, mandagha mama budzwa, enkwunu, **20** osamana bityeghe, ndogho, mbele a baara, mumbanjana, musogho, mankehe, embagha, munkaghaba, etaara, **21** osughu mukolo mu bilogho bi banganda, byiri bibi oyma mala ma malagha ya bibi bilyili, ya mandagha makimi ma mafaana ya mamu mwohonono. Me ngyehe be, ti bwunu a bu ántswama ndyele me be ti, ba baakagyighili mandagha mamu ka babagha ebini mu Emfumu e Nzaami o. **22** Lo bimburu bibi Mufulu me bi: Dzyi, esee, edzuunu, okuru mukolo mu okebe, bubwe, okabaha babamō, kana, **23** odzuunu, okuru nyuru. Mikyene ka mili etaara ya mandagha mamu o. **24** Baara ba bali mu Yiisu-Kriste áyi bákomo manyuru ma bo ŋa kuruwa ya bigyili bi yo bi bibi ya dzyi li yo li libi. **25** Kala ti bihi-a-be lili mweē mu Mufulu, litswe likadzyara si mu litumu li Mufulu. **26** Ka likala a mubili a nyuru o, ka likasa banganda mutaha o, ya ka likasughu mukolo mu banganda o.

6 Bandughu ba me mu kana, kala ti basyimi mbwuru mu okasa bubi, be ba lili a Mufulu a Nzaami libvurulu nde mu edzuunu mu nzili yi a nsumu. Lo weme si, sa mayele, mpaala we nyaā obwa mu mwere munde. **2** Beme-a-beme, liikabaha babamō ba bali mu mpara, me obo be liikuhu Mikyene mi Kriste. **3** Buulu, nswe munde wu aakatsimi ti nde li mbwuru wu bvulu mupfunu, nde wuulu li mbwuru wu a bwunu, lo nde li mu okapfiri nyuru a ndeme. **4** Nswe mbwuru agyighili okehene bigyighili bi nde. Kala ti bye bili bibwe, nyaā nde ndeme amono esee, lo ka mu bigyili bi mbwuru mukimi o. **5** Mu kuulu, nswe mbwuru sa abiri leme li nde ndeme. **6** Nswe munde wu baaluo Ndagha a Nzaami, agwa kaba lili bilogho bi nde byehene kundaa munde wu li mu okaluo nde. **7** Ka ligwujumu o, ka baakasebe Nzaami o. Nswe mbwuru aakatolo bimburu bi aakakunu nde. **8** Munde wu aakunu mu okuhu gwaa li nyuru a ndeme, sa atolo bi ookaburu nyuru, ngu lipfu. Munde wu aakunu mu Mufulu, sa atolo bi ookaburu Mufulu, me laama lili mibvu ya mibvu. (aiōnios g166) **9** Litswe likasa bubwe ku

ogwene a okolo, buulu ŋa ookughu matala, kala ti ka likwono o, bihi-a-be litolo bimburu. **10** Me mu obo, bu lili a matala, litswe likagyighili mandagha ma mabwe kundaa baara bwohonono. Nsomo a nsomo kundaa bandughu mu kana. **11** Limono bunu-a-bo me aansono be mu kwogho e me bisono bi binene bi! **12** Baara bwohonono ba badzyi omogono ti bali ba babwe mu embwuru, me bo badzyi osohobo be nzo a mbaa mu nko. Bitsimi bi bo bili ti, banyaā omwehē bo kimini mu nkooro a lipfu li Kriste ŋa kuruwa. **13** Mu kuulu, bomo ba baakasomo nzo a mbaa ka baakasalala Mikyene o, lo bo badzyi ti be lisomo nzo a mbaa, mpaala basa mutwunu mu manyuru ma be. **14** Si okala ka bunu, me ngu wuulu ka nkughu okala a mutwunu mu ndagha nkimi o, kala ti ka yini a mu lipfu li Mfumu a bihi-a-be Yiisu-Kriste ŋa kuruwa o. Mu lo, ayi bákomo nsie nsyini ŋa kuruwa mu nkooro a me, ti bwunu a bu bákomo me ŋa kuruwa mu nkooro a bigyighili bi baara ba nsie. **15** Mu kuulu, ndagha yi mupfunu ka oli osomo nzo a mbaa o, bwunu we ogwene osomo nzo a mbaa, lo okala mbwuru wu munyaghara. **16** Nyaā edzuunu ya nyiī bikala ya babo ba akala baanama maluo ma, ya bikala si mu Isarayelee li Nzaami. **17** Obaana lolo, mbwuru si mumō anyaa ofirimwehē me mpara, mu kuulu me ndi a bigwa ya bikili bi mabogho ma Yiisu mu nyuru a me. **18** Bandughu mu kana, nyaā bwehe bu Mfumu a bihi-a-be Yiisu-Kriste bukala ya mufulu a be! Aamene.

Efedze

1 Me Poole, ntumu a Yiisu-Kriste mu waa li Nzaami, nsono mukaana wu kundaa baba ngili ba bali ku bvulu lili Efedze, ba baakasa kana mu Yiisu-Kriste: **2** Nyaã bwehe ya edzuunu bi bifi kundaa Nzaami Taara a bihi ya kundaa Mfumu Yiisu-Kriste bikala ya be! **3** Masyighi kundaa Nzaami, Taara a Mfumu a bihi Yiisu-Kriste, nde wu aaseme bihi mu Kriste mu liseme lwohono lili mufulu mu mayulu. **4** Mu nde, Nzaami ásuolo bihi nsomo nde agyighili nsie, mpaala bihi likala baba ngili, ba bagwene a epfwumu ña busu bu nde. Mu dzyi li nde, Nzaami **5** átswamagwolo munkana mu osa ti bihi likala baana ba nde mu Yiisu-Kriste, ti bwunu a bu oli waa li nde li libwe, **6** mu kuulu bihi lisyighi nsia a bwehe bu nde, bwehe bu aapfwaha nde bihi mu mwana a nde wu a dzyi. **7** Mu makili ma Yiisu, Nzaami aakwulu bihi, nde aasi masumu ma bihi kolokolo, ti bwunu a bu oli busini bu bwehe bu nde. **8** Nzaami aapfwaha bihi bo kunsu bunsughu bwohono ya mayele mwohono. **9** Nde aasuo bihi mansweghe ma waa li nde, bitsimi bi bibwe bi átswama okuru nde mu Kriste, **10** mu okuhu bye ña ookughu matala mpaala abvughu byehene kunsu litumu li Kriste, byehene bi bili mu mayulu ya bi bili ña nsie. **11** Mu Kriste bihi si libagha kaba lili pfa, bihi ba ásuolo nsomo ti bwunu a bu oli bitsimi bi ókuru munde wu aakagyighili mandagha mwohono ti bwunu a bu oli munkana a waa li nde, **12** mpaala lisyighi nsia a nde, bihi ba lítswama osa emiini e bihi mu Kriste. **13** Mu nde, behe si bu liguughu mandagha mama ngarjma, nsia yi mbwe yi a obvwughu o be, mu nde si be liisi kana ya baasi be elyimi kii Mufulu a Ngili wu ásiini a be. **14** Mufulu munde li kaba lili nsomo mu pfa li libagha bihi. Bihi sa libagha lo mu matala ma baakwulu bihi kuu mukughu, mpaala bihi lisyighi nsia a nde. **15** Me mu obo mehe-si, bu aangyughu bu bali mu okabili mu kana li be mu Mfumu Yiisu ya mu dzyi li lili a be mu baba ngili bwohono, **16** me ndi mu okabvurulu matuono mu be matala mwohono. Ya me aakansamana mu be. **17** Nyaã Nzaami a Mfumu a bihi Yiisu-Kriste, Taara wu a nsia, agwa be mufulu wu a bunsughu ya wu aakasuo mandagha mama ensweghe, wu aasa ti be lisoolo nde. **18** Nyaã Nzaami abaha mikolo

mi be mu obaghala ya osoolo nki emiini ki bákuru mu mbili yi áti nde be, nki busini bubu nsia a pfa li nde ña kara li baba ngili, **19** ya nki bunene bu lileene nde aasuo kundaa bihi ba liikasa kana, lileene lilo li aasuo nde ya mpini yohono. **20** Nde aasuo lileene lilo bu aasiili Kriste ña kara li ba bákpí ya aabwihi nde nsini ña kwogho-a-kwogho e nde mu mayulu. **21** Mu obo, Kriste li ña yulu a bimfumu byehene, litumu lwohono, lileene lwohono, empu kyehene ya nswe nkumu yi bakughu otajana, ka yini a mu matala ma o, lo ya mu matala ma maagya si. (aiõn g165) **22** Nzaami aasuhu byehene ku nsie a myili mi Kriste, ya nde aatwulu nde mu okala mutswi ña yulu a byehene, mutswi a libwunu li Nzaami, **23** li lili nyuru a nde, mukughu wu a munde wu aakaluhu byehene mu baara bwohono.

2 Lo be, be áli lípki mu nkooro a bibili bi be ya masumu ma be. **2** Be áli líkanama bipfu bi baara ba nsie yi, be líkanama litumu li mfumu a mifulu mi mili mu engie-a-ngie. Me mufulu munde li mu okasala mu matala ma mu ba baakabihi litumu li Nzaami. (aiõn g165) **3** Bihi bwohono si líli ti anga bo ya mu nsi-nkulu líikabuludzyara bwunu a bu oli dzyi li embwuru e bihi, mu okabulugyighili mi odzyi nyuru ya bitsimi bi bihi. Mu nzya-nzyara a bihi, bihi líli baara baala nkehe a Nzaami yífaana obwa mu bihi ti anga mu babake. **4** Lo Nzaami alwulu mu nyí, ya mu nkooro a dzyi li linene li adzyi nde bihi, **5** bihi baala áli líikpi mu nkooro a masumu ma bihi, nde aabvurulu bihi baba mweé emõ ya Kriste. Me mu bwehe bu Nzaami be libvwughu. **6** Nde aasiili bihi mu lipfu ya aabwihi bihi nsini mu mayulu emõ ya Yiisu-Kriste, **7** mu osuo mu matala ma maagya, busini bu bwehe bu nde bu bubvulu olagha, mu bubwe bu nde kundaa bihi mu Yiisu-Kriste. (aiõn g165) **8** Mu kuulu, me mu bwehe baabvwuhu be, mu nzili a kana. Obvwughu oko ka ofi kundaa beme o, ko oli ekaba e Nzaami. **9** Ka oli mu nkooro a bigyighili o, mpaala mbwuru si mumõ anyaa okala a ligwagha. **10** Mu kuulu bihi lili baara ba ógyighili Nzaami. Nde áagyighili bihi mu Yiisu-Kriste mpaala likala a bigyighili bi bibwe, bigyighili bi átswama okuru nde, buulu bihi lisalala bye. **11** Mu obo, líikalibili mweé mu ndagha yi: Mu nsi-nkulu be líli baala ka bali ba-Dzwife o mu musunu, bákalylele be ti ba bágwene osomo nzo a mbaa kundaa ba

baakatsimi ti bo básomo nzo a mbaa, lo básomo nzo a mbaa mu manyuru ma bo ya mu myaã mi baara. **12** Mu matala mamō be ka líli a Kriste o, be lílil banzyi mu nsie a Isarayelee, banzyi mu ogwihini ku misiini, ba bagwene a emiini ya ba bagwene a Nzaami mu nsie. **13** Lo mu matala ma, mu Yiisu-Kriste, be baala mu nsi-nkulu lílil la, be ayi be-bele mu makili ma Kriste. **14** Mu kuulu me nde li edzuunu e bihi, nde wu aasi kuulu ti Ba-dzwife ya baala ka bali Ba-dzwife o bakala ekaana emō. Bu aagwi nyuru a nde, nde aatsala ebagha kii eekakabala bo, ya ki eekalo etaara ŋa kara li bo. **15** Nde aasyehe Mikyene ekulu emō ya mikele ya litumu li mye, mpaala mu ndeme, nde agyighili mu bo bansa buolo, mbwuru mutsyini wu munyaghara, mu osa edzuunu, **16** ya mu osa ogwihini ŋa kara li bansa buolo ya Nzaami mu nyuru nga-mō mu kuruwa, bu amana mbele. **17** Nde aayagwa nsia, ti anga nsia yi mbwe, edzuunu kundaa be ba lílil la, ya edzuunu kundaa ba báli be-bele. **18** Buulu mu nde, bihi bansa buolo lílil a muswa mu osomo ŋa oli Taara mu Mufulu nga-mumō. **19** Mu obo, be ka lifirisiyili banzyi o, ngu okala baara ba baafi mu mansie makimi. Lo be ayi basi nsie emō ya baba ngili, baara baba dzumu li Nzaami. **20** Be baatwu be ŋa yulu a bitsini bi bibagha bi nzo bi bili bantumu ya mibighili, ya Yiisu-Kriste ndeme li limeē lílil ŋa mutswunu li líikakwara nzo. **21** Me mu nde nzo yohono yiigwama ya yiitemene mu okala nzo a nzaami yi a ngili mu Mfumu. **22** Mu nde behe si bátwu be emō mu okala nzo yi ookakala Nzaami mu Mufulu.

3 Mu ndagha oyo, me Poole ndi mbwuru a boloko mu esala e Yiisu-Kriste mu nkooro a be, baala ka lílil ba-Dzwife o... **2** Kala ti be líligyughu, bwunu a bu oli esala e bwehe bu Nzaami ki bágwi me mu nkooro a be. **3** Mu limono baasuo me mansweghe ma Nzaami, ti bwunu a bu aansono me be mo mapfi-mapfi mu mukaana wu. **4** Bu líita mukaana wu, be likughu obaghala mayele ma ndi a me mu mansweghe ma Kriste. **5** Mansweghe mamō ka básuo mo kundaa baana ba baara mu biseene bibike o ti anga bu baasuo mo mu matala ma mu Mufulu kundaa bantumu ba nde baba ngili ya mibighili: **6** Mu osoolo ti baala ka bali ba-Dzwife o bali a pfa limō lyini lílil, bali nyuru mō gyini oyo, bali mu misiini myini mimye, mu Yiisu-Kriste

mu nsia yi mbwe. **7** Mu nkooro a Nsia yi Mbwe oyo me ayi musala, ti bwunu a bu oli ekaba e bwehe bu Nzaami bu baagwi kundaa me, mu nzili a bwehe bu nde. **8** Kundaa me, me wu mbvulu busala mu mupfunu ŋa kara li baba ngili bwohono, baagwi me bwehe bubo buu otsala kundaa baala ka bali ba-Dzwife o muyighi a busini bu Kriste, ti anga nsia yi mbwe, **9** ya mu osuo ŋa tse-tse kundaa baara bwohono omoŋono o mansweghe ma Nzaami, nde wu áagyighili bilogho byehene, ábunu mansweghe mamō obaana ku ebaana. (aiōn g165) **10** Mpaala mu nzili a libwunu li Nzaami, bamfumu ya ba baakatumu mu mayulu basoolo bunsughu bu Nzaami bubu bifa-bifa, **11** ti bwunu a bu aagyighili nde, mu Mfumu a bihi Yiisu-Kriste, bitsimi bi ákuru nde mu mibvu ya mibvu. (aiōn g165) **12** Mu Yiisu-Kriste, ya mu kana li bihi mu nde, bihi lílil a emiini ki ekughu mu obehene ya Nzaami mu kana. **13** Mu obo me nduomo be mu onyaa otsili bukyini mu nkooro a mpara yi ndi mu okamono me mu be. Mpara oyo yili nsia a be. **14** Me mu obo me nkunu mabuo ŋa nkulu a Taara. **15** Me nde aakagwa nkumu kundaa nswe dzumu li lílil ku yulu ya ŋa nsie. **16** Mpaala mu busini bu nsia a nde, agwa be mpini ya líleene mu Mufulu a nde, mu nkooro a ndaana a mikolo mi be. **17** Nyaá Kriste akala munsá mikolo mi be mu kana, ya be limyehe midza ya líkala ba bágwama mu dzyi, **18** mpaala emō ya baba ngili bwohono be líleene obaghala bunene, bula, muyighi, mutele, **19** ya dzyi li Kriste li líliru lígyahaba lwohono. Mu obo be lílilwulu mu busini bu Nzaami bwohono. **20** Kundaa munde wu kughu ogyighili ku obvulu mi líikaluomo ya mi líikatsimi bihi mu líleene li nde li líikasala mu bihi, **21** kundaa nde nsia munsá libwunu li Nzaami ya mu Yiisu-Kriste, mu biseene byehene, mu mibvu ya mibvu. Aamenel! (aiōn g165)

4 Mu obo, me ngwi be mpama, me wu ndi mu boloko mu kuulu me aakansalala Mfumu, mu okala a nzya-nzyara yi faana ya mbili yi lílíkihi be, **2** kunsá okughulu kwohono ya mu edzuunu, ya okakuru mukolo mu okebe. Mu dzyi, líikakuru mukolo mu nzya-nzyara a babake be a be, **3** bu lílil makpa mu okakebe bumō bu ookagwa Mufulu mu munama wu edzuunu. **4** Oli a nyuru yini a mō ya Mufulu yini a mumō, bumō si Nzaami áti be mbili mu emiini yini a emō. **5**

Oli a Mfumu yini a mumō, kana yini a limō, libogho yini a limō, 6 Nzaami yini a mumō ya Taara a bwohono, wu aakatumu bwohono, wu aakasala mu bwohono, ya wu li mu bwohono. 7 Lo kundaa nswe mbwuru mu bihi, baagwi bwehe, ti bwunu a bu oli eteese ki ekaba e Kriste. 8 Me mu obo bályele ti: ǀǀa ákumu nde ku yulu, nde ábiri baara ba boloko, nde ágwi baara bikaba. 9 Nde ákumu! Bunu odzyi olyele, nsomo nde akumu, nde átswana okumunu ku nsini a nsie? 10 Munde wu aakumunu, me wunu munde si aakumu ku nkara a mayulu mwohono, mpaala aluhu bilogho byehene. 11 Ya nde aasi kuulu ti, bana bakala bantum, babamō mibighili, babake ba baakatsala nsia yi mbwe, ya babake minkaala bibuolo ya baluo. 12 Nde aasi obo mu kuulu baba ngili bakala ba bakughu mu osala esala kii otwu nyuru a Kriste, 13 tee mu matala ma liito bihi bwohono mu bumō bu kana ya ligyahaba li Mwana a Nzaami, ya bihi sa likala kara a mukughu ti anga Kriste wu li mukughu. 14 Mu obo, bihi ka lifirikala bike-bike o, ba ookanyihhi mampo ma madza ya ba ookabiri bifulu bibi maluo. Bihi ka lifirikihi o ti bakagene ya ba bakadzihibi bihi mu mpya ya mayele baara ma mabi. 15 Lo bu liikalyele ngajma munsá dzyi, bihi lifaana okulu mu mandagha mwohono mu Kriste, nde wu li mutswi. 16 Me mu nde, binama bi nyuru byehe bibvunjunu ebini emō mu libaha li misunu ya mikaā. Mu obo, ǀa okasala nswe enama bwunu a bu ofaana, nyuru yohono yiikakulu mu dzyi. 17 Mu obo, ndagha yi ndeyle me ya yinsuo me be bumpughulu mu Mfumu me yi: Ka lifirikala a nzya-nzyara a baara ba bagwene osoolo Nzaami o, baala bitsimi bi bo yini a mu mandagha ma magwene a mupfunu. 18 Mayele ma bo mali kunsá mpyibi, ya bo bali banzyi mu bumweē bu Nzaami, mu nkooro a nzi-nzimini yi li mu bo ya mu nkooro a mikolo ngyi mi bo. 19 Bo ka baafirikamono bupfiri o, bo áyi batyeghe manyuru ma bo mu mandagha mama enkwunu, bo baakagyighili mandagha mama osujumu mama mawa-mawa. 20 Lo be, ka obo be liisoolo Kriste o, 21 kala ti me nde be liigyughu ya baaluo be, ti bwunu a bu oli engajma ki eli mu Yiisu. 22 Lo be lifaana odzwulu embwuru e be ki ekulu ki efaana ya nzya-nzyara a be yi nkulu, ya ki eekabyihhi kyeme mu manzala ma kye mama mpya. 23 Be lifaana okighiri mu mufulu mu mayele ma be 24 ya olaha

embwuru ki enyaghara, ki baagyighili mu efa kii Nzaami, munsá bunsumu ya bungili bu buukaburu engajma. 25 Mu obo, linyaā mpya ya nswe mbwuru mu be akalyele engajma kundaa nganda a nde, mu kuulu bihi-a-be lili binama bibi nyuru mō. 26 Mu matala ma liikabagha be nkehe, ka likasa masumu o. Tala linyaā odzyama ǀaala be lili nkini ya nkehe. 27 Ka likagwa mpeene kundaa dyabulu o. 28 Muturu anyā ofirikaturu. Lo nde akasa mpini mu osala mu myāā mi nde esala ki ebwe, mpaala nde abagha ki aagwa kundaa wu aakeghele. 29 Ndagha si mō yi mbi yinyaā opala mu mǀjma mi be. Lo kala ti yo yipala, lo yikala yimbwe, yi aatwu, ya yi aagwa bwehe kundaa ba baagyughu yo. 30 Ka likagwa Mufulu a Ngili a Nzaami nyīi o, mu kuulu mu nde bási be elyimi mu etsughu ki akala ookwulu be Nzaami. 31 Limaha ǀa kara be nkala, kakaba, nkehe, kyele, bitughu, ya mandagha mwohono ma mabi. 32 Liikakala baara ba babwe ya banga a mikolo nyīi be a be, liikasa be a be kolokolo, ti bwunu a bu ósi be Nzaami kolokolo mu Kriste.

5 Be lifaana okanama bwunu a bu oli Nzaami, ti anga baana baba mukolo, 2 ya liikakala mu dzyi ti bwunu a bu ódzyi bihi-a-be Kriste. Nde ágwi nyuru a nde kundaa Nzaami ti anga ekaba ya mukaba wu otsughu mu nkooro a bihi-a-be, ti anga mananaase mama mpihi yi mbwe. 3 Ti anga bu ofaana kundaa baba ngili, banyaā ofirikatǀjana ǀa kara li be enkwunu, mandagha mama osujumu mama mawa-mawa, ntono a nzi. 4 Mbiili yi budzwa, mbiili yi buwulu bwunu we yi mbi ka yifaana ǀa kara li be o. Lo be lifaana okabvurulu matuono. 5 Mu kuulu, ligyighili osoolo ti: Mbwuru si mumō mu banga-a-enkwunu, baba sujumu, banga a ntono a nzi (ekye me efaana kii osamana ba nzaami baba mpya), ka babagha pfa mu Emfumu e Kriste ya kii Nzaami o. 6 Mbwuru anyā opfiri be mu mbiili yi mukajana. Mu kuulu mu nkooro yo nkehe a Nzaami yiigya ǀa yulu a ba baakateme a Nde ngangala. 7 Ka likala a mfwunu mō ya bo o. 8 Mu kuulu, mu nsi-nkulu be líli mpyibi yi a laǀa-laǀa, lo mu matala ma be lili otsyeme mu Mfumu. Liikakala ti anga baana baba otsyeme. 9 Mu kuulu, mimburi mi otsyeme me bubwe, bunsumu, engajma. 10 Ligyahaba likeene mandagha ma maakagwa Mfumu esee, 11 ya ka likakala bumō mu bigyighili bi bigwene

a mupfunu bibi mpyibi o. Lo liikafwunu bye. **12** Mu kuulu, mandagha ma ookagyighili baara babo mu ensweghe mali mama budzwa mu obili mu mo. **13** Lo bu bafwunu mandagha mamō, mo mamōjono ŋa otsyeme bu mali mo. **14** Mu kuulu mandagha mwohonō maala ayi ma maamōjono mo mali otsyeme. Mu obo baakalye ti: Sighili, we wuli ensama, temene ŋa kara li ba bápki, ya Kriste sa atwulu we kunsā otsyeme. **15** Liikasa mayele mu nzya-nzyara a be: Ka likakala ti anga biwulu o, lo liikakala ti anga banga-a-munzeele, **16** Lisalala matala mukuulu bitsughu bili bibi. **17** Mu obo, ka likala baara ba bagwene a mayele o, lo libaghala waa li Mfumu bunu lili. **18** Ka likakolo bviini o, mo maakabiri ku odzimini, lo likala ba bálwulu mu Mufulu. **19** Liikagwa be a be mpama mu bikwumu, bikwumu bibi nsia ya bikwumu bi ógwi Mufulu, likagyimi ya likagwa Mfumu nsia mu mukolo a be ndehene. **20** Mu matala mwohonō, mu mandagha mwohonō, likabvuhulu matuono kundaa munde wu li Nzaami Taara mu nkumu a Mfumu a bihi Yiiisu-Kriste. **21** Be ba likagwa Kriste budziri, likakihi litumu li babamō be a be. **22** Bakaha, liikakihi litumu li balumu ba be ti anga bu liikakihi be litumu li Mfumu. **23** Mu kuulu baghala li mfumu a mukaha, ti anga bu oli Kriste mfumu a Libwunu, li lili nyuru a nde, yi ali nde mubvwuhu. **24** Lo, bwunu a bu ookakihi Libwunu litumu li Kriste, nyaā bakaha si bakakihi litumu li balumu ba bo mu mandagha mwohonō. **25** Balumu, liikadzyi bakala ba be ti anga bu ódzyi Kriste Libwunu ya nde ndeme ágwi nyuru a nde mu nkooro a lo. **26** Obo nde ádzyi osa lo lili ngili bu atsehebe lo mu madza ma maakaswagha ya mu Ndagha, **27** mpaala nde asuo ŋa nkulu a ndeme libwunu li libwe, li ligwene a mpiri, ngu okala mikara, ngu okala elogho ki ebi, lo likala libwunu li lingili ya li ligwene a epfwumu. **28** Bwunu obo si balumu bafaana odzyi bakala ba bo, ti anga manyuru a bomo. Munde wu aakadzyi mukala a nde, nde dzyi nyuru a ndeme. **29** Mbwuru nkini ka ámaabele nyuru a ndeme o, lo nde aakabugunu yo ya aakasa yo bunkere ti anga bu ookasa Kriste mu libwunu, **30** mu kuulu bihi-a-be lili binama bi nyuru a nde. **31** Me mu obo baghala sa asihi taara ya ngughu a nde, sa anabara ya mukala a nde, ya bansa buolo sa bakala nyuru mō. **32** Mamo mali mansweghe ma manene. Me, me ndyele ti mo matala Kriste ya Libwunu li

Nzaami. **33** Ngu mu obo, nyaā mumō-mumō mu be adzyi mukala a nde ti anga ndeme, ya mukala agwa mulumu a nde budziri.

6 Baana, liikakihi litumu li biburu bi be, mu kuulu, obo oli bunsumu mu Mfumu. **2** Gwa taara ya ngughu a we budziri, munde me mukyene wu a nsomo wu li ya misiini: **3** mpaala we kala a esee ya we laama ŋa nsie. **4** Be bataara, ka likagwa baana ba be nkehe o, lo liikakwuhu bo kunsā maluo ya mu bigyehe bi Mfumu. **5** Bankana, liikasa bintamana kundaa bamfumu ba be baba ŋa nsie kunsā nzalamweē ya oteghere, mu mukolo wu bunya-nyaā, ti anga be ba lili mu okasa bintamana kundaa Kriste. **6** Ka likasa obo yini a ŋa mihi mi bo o, ti anga mu omōjono bubwe kundaa baara, lo liikakihi litumu ti anga bankana ba Kriste ba baakagyighili waa li Nzaami mu mukolo mumō. **7** Liikasalala bo mu mukolo mumō ti anga be lili mu okasalala Mfumu, lo ka ti anga ba bali mu okasalala baara o, **8** bu lisoolo ti, nswe mbwuru, ngu ali nkana bwunu we mbwuru wu bunya-nyaā, ndeme sa abagha mufuru kundaa Mfumu mu mandagha ma mabwe ma aakagyighili nde. **9** Kundaa be bamfumu, liikasa bwunu obo si kundaa bankana ba be. Linyaā mirjaana, bu lisoolo Mfumu a bo ya wu a ndaa be li mu mayulu, ya nde ka li a munsuolo a bidzili o. **10** Mu omana, libagha mpini mu Mfumu, mu litumu li lileene li nde lwohonō. **11** Lilaha bidzwana bi Nzaami byehene mpaala be lileene otemene ŋa nkulu a bigyighili bi dyabulu bibi emfiri-a-mpya. **12** Mu kuulu, ekyini ki lili a kye, ka eli kii odzwana mu musunu ya makili o, lo kii odzwana a bimpu, bamfumu ya lileene bi nsie yi a mpyibi yi a laŋa-laŋa yi, ekyini kii odzwana a lileene li mifulu mi mibi mi mili ku yulu, ŋa kara li mayulu ya nsie. (aiŋ g165) **13** Mu obo, ligwolo bidzwana bi Nzaami byehene, mpaala be likala a mpini mu etsughu ki ebi ya bu limana ogyighili mandagha mwohonō, be litemene bubwe. **14** Mu obo, ligyighili otemene! Lilaha engarjma ti anga muswele mu bala, ya lilaha bunsumu ti anga enkuru kii mu bisyeē ki eekakyi butulu. **15** Lilaha ti anga bikoghorō mu myili mi be mana maa otsala Nsia yi Mbwe yi edzuunu. **16** Mu matala mwohonō, ligwolo kana ti anga likubu, mu lo be lileene odzihibi magyo ma mbaa mama Wu Mubi. **17** Ligwolo si obvwughu ti anga mpu yi esyeē ya Ndagha a Nzaami ti anga lipee lili

Mufulu. **18** Mu libaha li Mufulu, liikasamana mu Mufulu mu nswe matala mu nsa-nsamana yi mawa-mawa ya yi a opele. Mu obo likahala mihi ya mu nswe matala lisa mukama mu okapele Nzaami mu nkooro a baba ngili bwohono. **19** Liikasamana mu nkooro a mehe si, mpaala Nzaami agwa me ndagha yi oleyele mu matala ma akala aandezubulu me muruma mu otsala mu kana nsia a mansweghe ma Nsia yi Mbwe. **20** Mu nkooro a ndagha oyo me ndi embala kii Nsia yi Mbwe, wu bakuru misyi mimi bisyeē. Mu obo liikasamana mpaala me kambili ya kana mu Nsia yi Mbwe bwunu a bu mfaana me obili mu yo. **21** Tisyike sa agwa be mansia mwohono, mpaala behe si lisoolo mandagha ma matala me ya ma ndi mu okagyighili me. Nde li ndughu mu kana wu mukolo, musala a Mfumu wu bakughu osa kana mu nde. **22** Me ngweghe be nde mu mpere mpaala be lisoolo mandagha ma matala bihi, ya mpaala nde agwa be bukyini. **23** Nyaā edzuunu, dzyi ya kana bi bifi kundaa Nzaami Taara, ya kundaa Mfumu a bihi Yiesu-Kriste bikala ya bandughu mu kana! **24** Nyaā bwehe bukala ya babo bwohono ba baakadzyi Mfumu a bihi Yiesu-Kriste mu dzyi li liigwene okabyi!

Filipe

1 Me Poole ya Timote, bankana ba Yiisu-Kriste, lisono mukaana wu kundaa ba bangili bwohonu mu Yiisu-Kriste ba bali mu bvulu lili Filipe, bakwuru ba libwunu li Nzaami ya basala: **2** Nyaā bwehe ya edzuunu bi bifi kundaa Nzaami Taara a bihi ya kundaa Mfumu a bihi Yiisu-Kriste bikala ya be! **3** Matala mwohonu ma aakansimi me be, me aakambvurulu matuono kundaa Nzaami. **4** Matala mwohonu ma aakansamana me Nzaami mu be bwohonu, me aakansamana mu esee, **5** mu kuulu be lili mu okabaha me mu otsala Nsia yi Mbwe, obaana mu etsughu kii nsomo tee sonali. **6** Me ndi a kana ti Munde wu áabaana esala ki ebwe mu be, sa amana kye tee mu etsughu ki oogyabvughuru Yiisu-Kriste. **7** Oli bubwe ti me kabulunkala a bitsimi bibi obo mu be bwohonu. Mu engayma, me ndzyi be mu mukolo mumō, mu kuulu be líbaha me mu esala ki ógwi me Nzaami mu bwehe bu nde. Be ka líbaha me yini a mu matala ma ándi me bumpoholo mu okala ya mu otsala Nsia yi Mbwe o, lo ya mu matala maha si ma ndi me munsu boloko. **8** Nzaami li mpughulu a me ti me ndzyi be bwohonu mu nkwere a dzyi li Yiisu-Kriste. **9** Ligyughu bu aakansamana me mu be: Nyaā dzyi li be lifiripfini ku olagha mu ligyahaba lili ngayma, ya mu obaghala kuu mukughu, **10** mu kuulu be lisoolo osuolo mimi mupfunu. Obo be sa likala baba tse-tse ya ba bagwene a epfwumu mu etsughu ki oogyabvughuru Kriste, **11** ya ba bálwulu mu bimburu bibi bunsumu bi liikagyagha bihi-a-be mu Yiisu-Kriste, mu ogwa nsia ya masyighi kundaa Nzaami. **12** Bandughu ba me mu kana, me ndzyi be lisoolo ti mandagha ma máabwi mu me máasi kuulu ti Nsia yi Mbwe yigye ku nkulu. **13** Me mu obo, bambubulu bwohonu ba baakakebe mu nzo a mukogho ya mu bibini bibike byehene, baagyighili osoolo ti mu nkooro a Kriste me ndi mu boloko. **14** Ya balagha mu bandughu mu kana, bu bamono me mu boloko, bali mu ofirikabagha bukyini mu Mfumu mu oluo Ndagha a Nzaami ku ogwene a nzalamweē. **15** Oli ngayma ti baara babake bali mu okatsala Nsia yi Mbwe mu nkooro a embagha ya kunsu mumbanjana. Lo babamō bali mu okatsala nsia a Kriste mu bitsimi bi bibwe. **16** Baara ba baakasala mu dzyi, ya bo basoolo ti mu nkooro a okala Nsia yi Mbwe me ndi ŋa. **17**

Lo baara babake babo, bo bali mu okatsala nsia a Kriste munsu mufulu wu embagha, bitsimi bi bo ka bili bi bitsyeme o. Bo baakatsimi ti oyo mpara a boloko li me bo bali mu okabwehe. **18** Lo ndagha we! Ngu okala ti mu bitsimi bibi mpya bwunu we bibi ngayma, lo nsia a Kriste yili mu okatsajama. Ya mu obo me ndi a esee, ya me sa firikankala mu esee. **19** Mu kuulu me nsoolo ti mandagha mwohonu mamu sa masa ti me mvwughu, mu nkooro a nsamana a be ya libaha li Mufulu a Yiisu-Kriste. **20** Bwunu a bu oli ma ndi mu okabulunkebe me ya ma aansu me emiini ku olagha, me ka ankala a bupfiri mu ndagha si mō o. Lo mu emiini kyehehe, lolo bu ya mu matala mwohonu, Kriste sa akala a nsia mu nyuru a me, mu bumweē bu me bwunu we mu lipfu li me. **21** Mu kuulu mu me, bumweē ngu Kriste, ya lipfu lili ndaana a me. **22** Lo kala ti okala mweē oli ndaana mu me mu osala esala, me ka nsoolo emakye me nfaana osuolo o. **23** Me ndi mu ogwimi ŋa kara oŋo: Me ndi a nzala a ogye ya okala ya Kriste, obo obvulu bubwe. **24** Lo mu nkooro a be, obvulu mupfunu me nkala wu a mweē. **25** Mu obo me ndi a kana ya me nsoolo ti me sa ndaama, ya sa nkala ya be mpaala be ligye ku nkulu mu esee e kana li be. **26** Mpaala mu nkooro a me, mu matala ma aayambvughuru me ŋa kara li be, mutwunu wu lili a be mu Yiisu-Kriste akulu. **27** Be ngu baala liikadzyara mu efaana kii Nsia yi Mbwe yi a Kriste. Mu kuulu, ngu okala ti me yamono be, ngu okala ti me ka ngwi o, me nguyughu ti be liitemene mu mufulu mumō, bu liikadzwana mvulu emō, mu mukolo mumō mu nkooro a kana li ookagwa Nsia yi Mbwe. **28** Be ka likala a nzalamweē a mitaara mi be o. Kundaa bo, ekye me elyimi kii opfighili o bo. Lo kundaa be, ekye elyimi ki eesuo ti be liibvwughu, ya kye efi kundaa Nzaami. **29** Mu kuulu, Nzaami aagwi be bwehe mu osala mu Kriste. Ka oli yini a mu osa kana mu nde o, lo mu omono mpara mu nkooro a nde si, **30** mu okabuludzwana mvulu yi límono be me mu okadzwana, mvulu yi lisoolo be ti tee sonali, me ndi mu okadzwana yo.

2 Kala ti oli a mpama mu Kriste, kala ti oli a bukyini mu dzyi, kala ti oli a bumō bu Mufulu, kala ti oli a nkwere a dzyi ya nyii mu babamō, **2** lo lisa kuulu ti munyurŋu a me akala mukughu be bu likala kunsu ogwihini. Liikakala a dzyi limō, mukolo mumō ya etsimi emō. **3** Ka

likasa mandagha mu embagha o, bwunu we mu osagha nsia yi a bwunu. Lo kunsu okughulu, liikatala babake ti anga bo babvulu be. **4** Nswe mbwuru mu be anyaa okasagha yini a ndaana yi a ndaa ndeme, lo akasagha si ndaana yi a banganda. **5** Na kara li be, liikadzara bu ofaana mu Kriste Yiesu: **6** Ngu okala ti ka oli a lisobo na kara li nde ya Nzaami o, lo nde ka asagha kee-kee akebe bunsihhi bu nde ya Nzaami o. **7** Lo mu ndeme, nde abihhi byehene bibye, mu okala musala, nde afaana ya baara, ya omonono ti nde li nkara a mbwuru. **8** Nde akughulu ndeme mu okala a bintamana tee ku lipfu, lipfu lili na yulu a kuruwa. **9** Me mu obo, Nzaami mu waa li ndeme akuhubu nde, ya agwi nde Nkwumu yibvulu mankwumu mwohonono. **10** Mu kuulu, mu nkwumu a Yiesu mabuo mwohonono, bakunu mo mu mayulu, na nsie, ya ku nsini a nsie, **11** ya nswe mbwuru abili ti Yiesu-Kriste li Mfumu, mu ogwa nsia kundaa Nzaami Taara. **12** Mu obo, bandughu ba me baba mukolo, be ba lili a bintamana mu me mu matala mwohonono, ka likasuo bye yini a na nkulu a me o, lo liikabvulu osa obo mu matala maala me ka ndi ya be o. Likasala mu budziri ya enkwughu mu obvwughu o be, **13** me Nzaami aakasala mu be ya aakagwa be waa ya osa mandagha ma aakadzyi nde. **14** Liikagyighili mandagha mwohonono gwene a minyuni ya mikeme, **15** mpaala banyaa obagha mi baasyeme be ya be likala baba tse-tse, baana ba Nzaami ba bagwene a epfwumu na kara li eseene ki egwunumu ya ki ebi ki. Na kara li eseene ekye, be lili ti anga ba baakagwa otsyeme na yulu a nsie, **16** bu liikabiri nsia a Ndagha yi a laama. Obo, me sa nkala a mutwunu mu etsughu ki ooyabvughuru Kriste, mu kuulu me ka aambara ntyini yi a bwunu o ya ka aamono mpara yi a bwunu o. **17** Lo ngu okala ti bafaana ogyiri makili ma me na yulu a ekaba ki baagwa kundaa Nzaami, ekaba ki eli esala e kana li be, me sa nkala a munyuni ya sa nkala mu esee emō ya be. **18** Bumō si kundaa be, likala a munyuni mu obo, ya likala mu esee emō ya me. **19** Me ndi a kana mu Mfumu Yiesu ti edzi-dzighi me sa ngweghe be Timote mpaala mehe si mbagha bukyini mu mampolo ma be ma akala aambagha me. **20** Me ka ndi a mbwuru mukimi na yulu a nde o, wu li a bitsimi bimō ya me, wu li a manguo mama nganma mu mandagha ma matala be. **21** Bo bwohonono baakabulusagha yini a ndaana a

bomo, lo ka yi a ndaa Yiesu-Kriste o. **22** Lo nde, be lisoolo ti nde amaasuo bilyimi: nde asala ya me ti anga mwana na likara li taara a nde, mu esala kii Nsia yi Mbwe. **23** Me nde me akala aangweghe kundaa be, mu matala ma akala aansoolo me bu baagyighili ndagha a me. **24** Me ndi a kana mu Mfumu ti edzi-dzighi, meme si sa ngya kundaa be. **25** Lo me aamono ti oli mupfunu mu obvurulu Epaforodite kundaa be, ndughu a me mu kana, ndughu a me wu esala ya wu mamvulu, munde wu ali ligweghe be mu oyagwa me libaha li andi a me nzala a lo. **26** Nde dzyi omono be bwohonono ku olagha, ya nde li mu okamono mpara mu nkooro nsia yi a obyele o nde yi liigyughu be. **27** Nde aali mubyele, bele ya lipfu, lo Nzaami aamono nde nyii. Ka oli yini a nde o, lo ya mehe si, mpaala me nyaā okala a minyoō na yulu a minyoō. **28** Me mu obo me nsi maswa mu obvurulu be nde mpaala na akala liimono be nde be lifirikala a esee ya minyoō mi me mikala misala. **29** Libwana a nde mu esee kyehene mu Mfumu, ya liikagwa budziri kundaa baara baba ti nde, **30** buulu mu nkooro a esala e Yiesu nde akaakpa ya akaapfihili laama li nde, mu osa esala ki obaha me na ebini e be.

3 Mu matala ma, bandughu ba me mu kana, liikakala mu esee mu Mfumu. Kundaa me ka yili ndagha yi a mpara o, mu ofirisono be mandagha ma answama osono me be. Obo obvulu bubwe kundaa be. **2** Liikasa mayele mu bambwa, liikasa mayele mu basala ba babi, liikasa mayele mu ba basomo nzo a mbaa yi a mpya. **3** Mu kuulu ba basomo nzo a mbaa yi a nganma me bihi, ba liikasamana Nzaami mu Mufulu, ba likasuo mutwunu a bihi mu Yiesu-Kriste, bihi ka liikasa kana mu bihi bameme o. **4** Mu ogyighili otala me ndi a bwuu mu okasa kana mu meme. Kala ti mbwuru mukimi aakatsimi osa kana mu ndeme, lo asoolo ti me mvulu nde ku olagha. **5** Me, basohobo me nzo a mbaa mu etsughu kii mpuomo, me ndi mu etswumu kii Isarayelee, mu dzumu li Benzamē, mu-Eebere wu baburu kundaa ba-Eebere. Mu mi mitala osalala Mikyene, me ndi mu-Faridzyē. **6** Me aandi a mbaa mu bipfu bi ba-Dzwife, me akamwehē libwunu li Nzaami kimini, mu mi mitala bunsumu bu Mikyene, me ka andi a mi bakughu osyeme me o. **7** Ankoho bilogho byehene bi akamono me ti bili ndaana kundaa me, me ndi mu omono bye ti

bilogho bibi bwunu mu nkooro a Kriste. **8** Lo me aamono si ti bye byehene bili bilogho bibi bwunu, ŋa nkulu a busini bu bubvulu bunene: Busini bubo ngu osoolo Kriste Yiisu, Mfumu a me. Mu nkooro a nde, me áampfihili byehene bi ándi a bye, ya me ndi mu otala bye ti anga yala, mpaala me mbagha Kriste, **9** ya me nkala emō ya nde. Ka oli mu bunsumu bubu meme o, bu bufi mu mikyene, lo bufi mu kana mu Kriste, bunsumu bu bufi kundaa Nzaami ya bu busiŋi mu kana. **10** Bu ndzyi me mu matala ma, me osoolo Kriste, nde, ya lileene li osighili o nde mu lipfu, ya okala bumō mu mpara a nde, mu ofaana ti nde mu lipfu li nde, **11** mpaala me ndeene osighili ŋa kara li ba bákpí, kala okughu okala. **12** Ka litsimi o ti me aandughulu mu byehene bibye bwunu we ti me ayi ndi mukughu, lo me ndi mu okabara ntyini mpaala me ndughulu byehene bibye, mu kuulu Yiisu-Kriste ndeme áyi akwara me. **13** Bandughu ba me mu kana, me meme ka nkughu otsimi ti me ayi aandughulu o. Lo ndagha mō me ndi mu okasa: Okadzimini mandagha mwohonon ma máluru, ya me ndi mu okasa mukama mpaala me ndughulu mu mandagha ma mali ku nkulu. **14** Mu obo, me ndi mu obara ntyini, tee ku aandughulu me mu mbili yi a ku yulu yi óti bihi Nzaami mu Yiisu-Kriste. **15** Bihi bwohonon ba lili baara baba mukughu mu enzaami, liikatsimi obo. Lo kala ti be lili mu eteese kii okatsimi bukimi, Nzaami sa asuo be yo. **16** Lo si okala ti ka bunu, ŋa ebini ki liiyato ki, litswe likadzyara mu nzili nga-mō ti bu liisi mu oyato mu matala ma. **17** Bandughu ba me mu kana, be bwohonon liikanama mi aangyighili me, liikagyighili otala ba baakadzyara mu efaana ki lili mu omonon be mu bihi. **18** Ti bwunu a bu ákandyele me be mu matala nswe matala, ya mu matala maha si me ndi mu okalyele be kunsu elili ti, balagha bali mu okadzyara ti mitaara mi kuruwa li Kriste. **19** Masini ma bo me opfighili, nzaami a bo me mila mi bo, ya bali mu omonon esee mu mi mifaana ogwa bo bupfuru. Bo baala bitsimi yini a mu bibi nsie. **20** Lo bihi, bihi lili baara baba Emfumu ki mayulu, ku oofa Mfumu Yiisu-Kriste, Mubvwuhu wu lili mu okakebe bihi. **21** Nde wu akala aakirili nyuru a bihi yi minyoō yikala ti bu oli nyuru a nde yi a nsia, mu lileene li lili mu ogwa nde muswa wu otwulu bilogho byehene kunsu litumu li nde.

4 Mu obo, bandughu ba me mu kana baba mukolo, me ndi a nzala a ofrimono be, be ba liikagwa me munyuū ya be ba lili kagha li me lili nsia! Bangee ba me baba mukolo, obo me bu lifaana be okala a mukama mu Mfumu. **2** Evodi ya Sētisyē, yoboo me mbuono be mu okala ya ogwihini be a be mu Mfumu. **3** Ya we mbaala a me wu esala wu a ngarjma, me nduomo we mu obaha bo. Mu kuulu bo bádzwana emō ya me mu nkooro a Nsia yi Mbwe, emō si ya Kelemō ya bandughu ba me baba esala babake. Mankwumu ma bo mali mu mukaana wu a bumweē. **4** Liikakala a esee mu Mfumu matala mwohonon, me firindyele yo, liikakala a esee! **5** Nyaā bubwe bu be bumogonon ŋa mihi mi baara bwohonon! Mfumu ayi aabehene. **6** Ka likakala a minyoō mu ndagha si mō o. Lo mu matala mwohonon, liikalyele kundaa Nzaami bi lili a be nzala a bye, mu lisamana, mu obuono ya mu obvurulu matuono. **7** Ya edzuunu e Nzaami ki eluru mayele mwohonon sa ekebe mikolo mi be ya bitsimi bi be mu Yiisu-Kriste. **8** Baana ba Taara a me, mu omana, be lifaana okatsimi mu mandagha mwohonon mama ngarjma, mama budziri, mama bunsumu, mama tse-tse, ma bafaana okadzyi, ma bafaana okagwa nsia, ma mabwe ya ma bafaana okasyighi. **9** Liikasalala mandagha mwohonon ma lígyighi be kundaa me, ma lígyagha be, ma lígyughu be me mu okalyele ya ma límonon be me mu okasa. Ya Nzaami wu a edzuunu sa akala ya be. **10** Me aamonon esee ki elagha mu Mfumu mu kuulu ku masini, bitsimi bi be mu me biifulu. Mu engarjma, be lílil a bitsimi, lo ka líkabagha mpeene mu osuo me bye o. **11** Ka oli nzala a obagha yitumu me mu obili obo o, mu kuulu me aangyighi okakala a esee matala mwohonon mu bilogho bi ndi a bye. **12** Me nsoolo okala kunsu buwele, ya me nsoolo okala kunsu bupfulu. Mu matala mwohonon ya mu mandagha mwohonon, me aangyighi mu okala a yughuru bwunu we mu okala a nzala, ngu okala ti me ndi kunsu bupfulu bwunu we kunsu makeghele. **13** Me nkughu osa mandagha mwohonon mu libaha li munde wu aakagwa me lileene. **14** Lo be liisi bubwe bu liibaha me mu mpara a me. **15** Be basi Filipe, be lisoolo ti ku ebaana e Nsia yi Mbwe, mu matala ma ámpfi me mu etsulu e nsie kii Masedwane, ka óli a libwunu li Nzaami likimi li lígwi me libaha o, kala ka yini a lili ndaa be o. **16** Mu matala ma ándi me ku Tesalonike, be áli liigweghe me bi

ákankala a me nzala a bye mansa mwolo. **17** Ka oli ti me bimbwara ndi mu okasagha o. Lo me ndi mu okasagha ti ndaana yibvulu yikala yi a ndaa be. **18** Me áangyagha bilogho byehene ya me ndi kunsu bupfulu bu bulagha. Me áambagha bilogho byehene bi ákankala a me nzala a bye na áangyagha me bi lígweghe be me kundaa Epafrodite. Bye bili mananaase mama mpihi yi mbwe, mukaba wu ookihi Nzaami ya wu aagwi nde esee. **19** Ya Nzaami a me sa aluhu be mu bilogho byehene bi liikala a be nzala a bye, bwunu a bu oli nsia a busini bu nde mu Yíisu-Kriste. **20** Nyaã nsia yikala kundaa Nzaami Taara a bihi mu mibvu ya mibvu. Aamene! (aiōn g165) **21** Ligwa mboro kundaa nswe wu a ngili mu Yíisu-Kriste. Bandughu mu kana ba bali ya me bagwi be mboro. **22** Ba bangili bwohono bagweghe be mboro, emvulu-ngughu babo ba bali mu nzo a Sedzare. **23** Nyaã bwehe bu Mfumu Yíisu-Kriste bukala ya be bwohono!

Kolose

1 Me Poole, ntumu a Yiisu-Kriste mu dzyi li Nzaami, ya Timote ndughu mu kana, **2** lisono mukaana wu kundaa ba bangili ba bali ku Kolose, bandughu ba bihi mu kana: Nyaã bwehe ya edzuunu bi bifi kundaa Nzaami Taara a bihi, bikala ya be! **3** Bihi liikabvurulu matuono kundaa Nzaami, Taara a Mfumu a bihi Yiisu-Kriste, ya nswe matala liikasamana mu be. **4** Mu kuulu, bihi liigyughu bu baakabili mu kana li be mu Yiisu-Kriste ya mu dzyi li lili a be mu ba bangili bwohono, **5** mu nkooro a emiini ki baabunu be mu mayulu. Emiini ekye ki ligyighu be nsomo mu ndagha yi a ngajma, ndagha oyo me Nsia yi Mbwe. **6** Nsia yi Mbwe oyo yiito kundaa be, bwunu a bu yili mu okaburu yo bimburu ya yili mu okatsanjama mu nsie nsyini, bwunu obo si yo yili na kara li be, obaana etsughu ki ligyughu ya ligyahaba be bwehe bu Nzaami mu engarjma. **7** Bwunu a bu oluo be Epafarase, ndughu a bihi wu mukolo ya nganda a bihi mu esala, nde li mu be musala a Kriste wu bakughu osa kana mu nde. **8** Ya nde aalyele bihi mu nki dzyi Mufulu ali mu okasala mu be. **9** Me mu obo, obaana etsughu ki ligyughu bihi nsia oyo, bihi si ka lili mu okakolo o mu osamana Nzaami mu be, ya lili mu okaluomo ti be ligyighili ogyahaba waa li Nzaami mu bunsughu bwohono ya mayele mama Mufulu, **10** mpaala be likala a nzya-nzyara yi afaana na nkulu a Mfumu, mu kuulu be ligwa nde esee mu mandagha mwohono, be liburu bimburu mu bigyighili bi bibwe bibi mawa-mawa ya likulu kunsu ligyahaba li Nzaami. **11** Be sa ligwama mu lileene mu mandagha mwohono mu mpini a nde yi a nsia, mu kuulu be likala a mukama ya likuru mukolo mu mandagha mama otsihi mwohono. Mu esee, **12** liikabvurulu matuono kundaa Taara wu aasi kuulu ti be likala ba bakughu ogyagha kaba li pfa lili ba bangili kunsu otsyeme. **13** Nde abvwuhu bihi mu litumu li mpyibi yi a larajala mu ogye a bihi kunsu empu e Mwana a nde wu a dzyi. **14** Mu mwana a nde bakwulu bihi ya basi masumu ma bihi kolokolo. **15** Nde li efaana e Nzaami wu baagwene okamono, Mwana wu a nsomo mu baara ya mu byehene bi bagyighili, **16** mu kuulu, me mu nde bagyighili bilogho byehene, mu mayulu ya na nsie, bilogho bi baakamono ya bi baagwene okamono, makubu

ya bimfumu, bimpu ya litumu. Bilogho byehene bagyighili mu nde ya mu nkooro a nde. **17** Nde, nde li nsomo mu bilogho byehene, ya me mu nde bilogho byehene bili na bibini bi bye. **18** Nde li mutswi a nyuru, nyuru me libwunu li Nzaami. Nde li ebaana, mwana wu a nsomo wu asighili mu ba bakpi, mu kuulu nde akala wu a nsomo mu bilogho byehene. **19** Mu kuulu Nzaami adzyi ti enzaami e nde ekala kii mukughu mu Mwana a nde, **20** ya mu Mwana a nde, Nzaami abvurulu ogwihini na kara li byehene ya ndeme, ngu okala bi bili na nsie, ngu okala bi bili mu mayulu, bu asi edzuunu mu Mwana a nde, mu makili ma matsanjama na kuruwa. **21** Ya be baala mu matala ma makulu lili banzyi ya mitaara mi Nzaami mu bitsimi ya mu bigyighili bi be bi bibi, **22** mu matala ma, Nzaami aasi ti be ligwihini ya nde mu lipfu li Mwana a nde, mu nyuru yi a musunu, mpaala be limonono ba bangili na nkulu a nde, ba bagwene a bifwumu ya ba bagwene a mi baasyeme bo. **23** Lo be lifaana okala munsu kana, ba bagyighili omyehe midza, gwene onyii, baala ka bakughu ogye a bo la ya emiini e Nsia yi Mbwe yi ligyughu be o, yi batsala mu nsie nsyini, ya me mu yo me Poole ndi musala. **24** Mu matala ma, me ndi a esee mu mpara yi ndi mu okamono me mu nkooro a be, ya me ndi mu okabwehe mu nyuru a me kimini li ligwene mu kimini li lili mu nyuru a Kriste, libwunu li Nzaami. **25** Me ayi musala a lo, bwunu a bu ooluomo me Nzaami mu osala esala e nde, mpaala me ntwoho ndagha a Nzaami yohono kundaa a be. **26** Mu matala ma makulu, ndagha oyo ali basweghe yo kundaa biseene byehene matala mwohono. Lo mu matala ma, nde aasuo yo epankala kundaa ba bangili ba nde. (aiōn g165) **27** Kundaa bo, Nzaami aadzyi osuo nsia ya busini bu ndagha oyo na kara li baara baala ka bali ba-Dzwife o. Ensweghe ekye me Kriste mu be, emiini kii nsia! **28** Me nsia a Kriste munde bihi lili mu okabulutsala, bu ligyehe ya liluo nswe mbwuru mu bunsughu, mu kuulu nswe mbwuru akala mukughu mu Kriste. **29** Me mu obo me ndi mu okasala ya ndi mu okadzwana mu mpini a nde, yili mu okasala mu me mu lileene.

2 Mu obo, me ndzyi ti be lisoolo nki mvulu yi nene me ndi mu okadzwana mu nkooro a be, mu nkooro a ba bali ku Lawodise, ya mu nkooro a bo bwohono baala nkini ka bamaamono me

o. 2 Mpaala bo bakala a bukyini, bagyighili okala bumō mu dzyi, ya me ndzyi si ti bo balwulu mu emiini ki ookagwa mayele mama ngan̄ma. Obo bo baasoolo bitsimi bi Nzaami bibi ensweghe, bitsimi bibye me Kriste. 3 Me mu nde busini bwohono bu bunsughu ya bubu ligyahaba busweme. 4 Me ndyele be mandagha mamō mpaala mbwuru anyāā opfiri be mu liteere li nde lili obili. 5 Mu kuulu, si buulu ti me ka ndi mbughu mō ya be mu nyuru o, lo me ndi emō ya be mu mufulu. Me ndi a munyuyu mu kuulu be lili mu okagyighili mandagha mwohono mu bunsumu ya kana li be mu Kriste lili a mpini. 6 Me mu obo, bwunu a bu liikihi be Yīisu-Kriste, Mfumu, likala mweē mu nde. 7 Limyehe midza ya likulu mu kana li be mu nde, ti bwunu a bu bāluo be ya liikabvurulu matuono kundaa Nzaami matala mwohono. 8 Lisa mayele, mpaala mbwuru anyāā opfiri be mu bitsimi bibi bunsughu bubu mpya ya bubu mukan̄ana, ti bu oli ekulu e baara ya bilogho bi nsie biili ka bili mu Kriste o. 9 Mu kuulu, mu nyuru a nde myehene mi mili mu Nzaami mili kuu mukughu. 10 Ya mu nde be limaalwulu mu byehene, nde wu li Mfumu a bwohono ba bali a lileene ya bwohono ba bali a litumu. 11 Mu nde si, be līsomo nzo a mbaa, osomo nzo a mbaa oko ka kuu mu myāā mi baara o, lo mu odzwulu nyuru yi a musunu. Oyo me nzo a mbaa yi ósohobo be Kriste. 12 Bádzyighi be emō ya nde mu liboghorō, be līsighili si mu lipfu emō ya nde mu kana li līsi mu bigyighili bi Nzaami wu áasiili nde ɗa kara li ba bákpi. 13 Be ba līli ba bápki mu nkooro a bipfwumu bi be ya bu lígwene osohobo manyuru ma be nzo a mbaa, Nzaami áabvurulu be baba mweē emō ya Kriste, bu ási masumu ma bihi mwohono kolokolo. 14 Nde aakaghala mukaana wu aakafwunu bihi ti bwunu a bu básono mu mikyene, mukaana wu aakaghala bihi mfulu. Nde aadzihibi mukaana bu aakomo nde ɗa kuruwa. 15 Nde aamaha lileene li bimfumu ya lili ba bali a litumu, nde aasuo bo epankala kundaa baara, bu aabiri bo munsu muluo wu olughulu o Mwana a nde. 16 Obaana oɗo, mbwuru anyāā olamana be mu nkooro a bi liidza bwunu we bi liijma, mu nkooro a kyiri, mu nkooro a ngoono wu bighi bwunu we mu etsughu kii sabate. 17 Byehene bibye bili edzyimi kii mandagha ma akala maagya ku nkulu, lo engan̄ma e mo me nyuru a Kriste. 18 Banyāā ogwa be ebili, baara ba

baakamono esee mu «okala ba bakughulu» ya «ba baakasamana bangye-yulu». Bo baakagwa limono li bo mupfunu wu alagha ya bo bálwulu mu bitsimi bibi musunu bi biikaluhu bo mu ligwagha. 19 Ya bo ka bali emō ya Kriste wu li mutswi o. Me mu nde nyuru yohono yili nkara emō mu mikar̄a ya mu ookabvununu binama, yiikabagha bi-odza ya yiikakulu mu nkunkulu yi aakafa kundaa Nzaami. 20 Kala ti be liikpi ya Kriste ya kala ti be ka liifirisiyili kunsu litumu li bilogho bi nsie o, mu emakye be likughu okala ti anga baara ba nsie ba bali kunsu mikyene mi: 21 «Ka gwolo o, ka lyini o, ka byeme ol!» 22 Bilogho byehene bi biikabyi ku baakasalala bye! Mimye mikyene ya maluo ma baara. 23 Mu engan̄ma, mye miikamoɗono ti anga bunsughu: Osamana bu odzyi nswe mbwuru, okala wu akughulu ya okamwehē nyuru mpara. Lo komo, mye ka mili a mupfunu o ya mye mili yini a mu okagwa musunu esee.

3 Kala be līsighili mu lipfu ya Kriste, lo liikasagha bibi mayulu, oko ku óbwi Kriste nsini ku kwogho e Nzaami kii babaghala. 2 Liikatsimi bibi mayulu, lo ka bibi nsie o. 3 Mu kuulu be liipki, ya bumweē bu be buli busweme ya Kriste mu Nzaami. 4 Mu matala ma akala oomoɗono Kriste, nde wu li bumweē bu be, oɗo behe si sa limoɗono ya nde mu nsia. 5 Mu obo, lidzwa bibi nsie mu manyuru ma be: enkwunu, mandagha mama osun̄umu mwohono, dzyi li esighi, sughu li mukolo, dzyi li libi, ntono a nzi yi li osamana ku bityeghe. 6 Me mu mandagha mamō nkehe a Nzaami yiikabwa mu babo ba baakabihi litumu li nde. 7 Obo me bu líkadzyara behe si mu matala ma makulu, ɗa óli bumweē bu be kunsu masumu mamō. 8 Lo mu matala ma, behe si litsili byehene bibye: nkehe, nzuru, mukolo mubi, makuhu, mbiili yi budzwa mu miɗma mi be. 9 Ka likapfiri mpya be a be o, buulu be líidzwulu mbwuru wu mukulu ya bigyighili bi nde, 10 ya be liilaha mbwuru wu munyaghara, wu aafirakighiri wu munyaghara mu ligyahaba mu efa kii wu áagyighili nde. 11 Mu obo, ka ofirisiyili a mu-Ngereke ngu okala mu-Dzwife o, wu áasomo nzo a mbaa ngu okala wu áagwene osomo nzo a mbaa, munzyi ngu okala mu-Syite, nkana ngu okala mbwuru wu bunya-nyāā, lo Kriste li byehene ya li mu bwohono. 12 Be ba ósuolo Nzaami, ba bangili, ya ba aakadzyi nde, liikakala

ya mukolo wu a nyiĩ, wu mubwe, wu gwene a masyighi, wu adzuunu, wu aakakuru mukolo mu okebe. **13** Liikakala a mukolo wu munene mu okakihi be a be bwunu a bu lili. Kala ti mumō ŋa kara li be li a minyoō mu wu muke, liikasa kolokolo be a be. Ti bu ookasa be Mfumu kolokolo, behe si liikasa obo. **14** Lo ŋa yulu a mandagha mwohono, liikalaha dzyi. Dzyi me musyi wu aakagyighili obvughu. **15** Nyaā edzuunu e Kriste, edzuunu ki báti be mbili mu nyuru nga-mō, ekala mu mikolo mi be. Liikasoolo obvurulu matuono. **16** Nyaā ndagha a Kriste yikala mu be mu busini bu yo bwohono, liikabvurulu Nzaami matuono mu mikolo mi be myehene. Liikaluo ya liikagyeha be a be mu bunsughu bwohono mu bikwumu, mu bikwumu bibi masyighi ya mu bikwumu bi ookagwa Mufulu. **17** Myehene mi likughu ogyighili be mu mbiili bwunu we mu bigyighili, ligyighili mye mu nkumu a Mfumu Yiisu, bu libvurulu matuono mu nde kundaa Nzaami Taara. **18** Bakaha, likala kunsu litumu li balumu ba be bwunu a bu ofaana mu Mfumu. **19** Balumu liikadzyi bakala ba be ya linyaā okakuru mukolo mu bo. **20** Baana, mu mandagha mwohono, liikakihi litumu li biburu bi be, obo me bu odzyi Mfumu. **21** Bataara, ka likata baana ba be nkehe o, mara bo bagwene a bukyini. **22** Bankana, liikasa litumu li bamfumu ba be baba nsie mu mandagha mwohono. Ka likasa obo yini a ŋa nkulu a bo o, ti anga yini a mu nzala a omoŋono ba babwe kundaa baara, lo likasa obo mu mukolo wu bunya-nyaā, mu budziri ba liikagwa be Mfumu. **23** Nswe esala ki liisa be, liikasa kye mu mukolo wu mubwe, ti anga be lili mu okasa esala e Mfumu, lo ka ki e baara o, **24** bu lisoolo ti be sa libagha pfa lili mufuru kundaa Nzaami. Mu kuulu Mfumu wu a ngan̄ma wu liikasalala be, me Kriste. **25** Munde wu aasalala bubi sa abagha ndaana a bubi bu nde, mu kuulu Nzaami ka li a munsuolo mu baara o.

4 Bamfumu, liikagyighili mandagha ma mabwe ya mama bunsumu kundaa bankana ba be, bu lisoolo ti behe si lili a Mfumu ku yulu. **2** Liikasa mukama mu lisamana, ya mu lo, liikakahala mihi ya liikabvurulu Nzaami matuono. **3** Liikasamana si mu bihi, mpaala Nzaami agwa bihi matala ma mafaana mu oluo Ndagha a nde, ya mu kuulu me ndyele mansweghe ma Kriste. Me mu nkooro a mansweghe mamo me ndi mu

boloko. **4** Liikasamana mpaala me ntsala nsia a mansweghe mamo epankala, ti bwunu a bu mfaana me mo otsala. **5** Liikadzyara mu bunsughu ya baara baba ku mbala. Liikasalala matala. **6** Nyaā mbiili a be yikakala yimbwe mu nswe matala, yi oto mungba, mpaala be lisoolo bu lifaana ogwa mvuru kundaa nswe mbwuru. **7** Mu mi mitala me, Tisyike wu li ndughu a me mu kana wu mukolo mu Mfumu, musala wu bakughu osa kana mu nde, mbaala a me mu esala, sa agwa be mansia mwohono. **8** Mu mpere me aangweghe be nde, mu kuulu be lisoolo bu lili bihi ya mpaala nde agwa be bukyini. **9** Me ngweghe nde ya Onesime, ndughu mu kana wu mukolo ya wu bakughu osa kana mu nde, wu li wu a ndaa be. Bo sa balyele be mandagha mwohono ma mali mu okaluru kunu. **10** Arisitareke nganda a me wu a boloko gwi be mboro. Mareke, mudzighi a Baranabase ndehe si gwi be mboro. Me mu nkooro a Mareke munde áli bágwi be litumu ti, kala nde gyi kundaa be, ligyighili obwana nde. **11** Yiisu si, wu baakata ti Yusutuse, gwi be mboro. Ŋa kara li ba-Dzwife, yini a bo baakasala ya me mu otsala nsia a Emfumu e Nzaami. Me bo baakagwa me bukyini. **12** Epafarase, musala a Yiisu-Kriste, wu li wu a ndaa be gwi be mboro. Matala mwohono nde aakadzwana mvulu mu nsamana a nde mpaala be ligyighili otemene, likulu mu mufulu, ya likala ba bakughu ogyighili mandagha mwohono ma ookadzyi Nzaami. **13** Me nsuo bumpughulu mu nde ti nde aakamono mpara yi alagha mu nkooro a be, mu ba bali ku Lawodise ya ba bali ku Yeropolise. **14** Luke, ngaa-libughu, ndughu a bihi wu mukolo, gwi be mboro. Demase si gwi be mboro. **15** Ligwa bandughu mu kana ba bali ku Lawodise mboro, bumō si kundaa Nimfa ya kundaa libwunu li Nzaami li liikabvurunu mu nzo a nde. **16** Be limana otala mukaana wu, lisa kuulu ti batala nde si kundaa libwunu li Nzaami lili basi Lawodise. Ya behe si akala litala mukaana munde wu aafa kundaa basi Lawodise. **17** Lilyele kundaa Aresyipe ti: «Sa mayele mu esala e Mfumu ki aabagha we, mpaala we gyighili osala kye!» **18** Me Poole ngwi be mboro, meme nsomo yo. Liikalibili mweē ti me ndi mu boloko. Nyaā bwehe bukala ya be!

1 Tesalonike

1 Me Poole, emō ya Silibvī ya Timote, lisono mukaana wu kundaa libwunu li Nzaami li lili mu bvulu lili Tesalonike, libwunu li Nzaami Taara ya lili Mfumu Yīisu Kriste: Nyaā bwehe ya edzuunu bikala ya be! **2** Mu nswe matala, bihi liikabvurulu matuono kundaa Nzaami mu be bwohono. Ya bihi likasamana mu be. **3** ŋa mihi mi Nzaami Taara a bihi, bihi likalibili mweē mu bigyighili bi kana li be, bisala bi likasala be mu dzyi, ya mukama a be mu emiini mu Mfumu a bihi Yīisu-Kriste. **4** Bandughu ba me mu kana, be ba ookadzyi Nzaami, bihi lisoolo ti Nzaami ásuolo be mu okala baba ndaa nde. **5** Mu kuulu, ka yini a mu mbiili bihi líluo be Nsia yi Mbwe o, lo si mu lileene, mu libaha li Mufulu a Ngili ya mu kana. Be lisoolo bu líli bihi ŋa kara li be, mu nkooro a bubwe bu be. **6** Ya beme si liinama efaana e bihi ya kii Mfumu, bu liigyagha Ndagha kunsu mpara yi alagha, mu esee ki ookagwa Mufulu a Ngili. **7** Mu obo, be ayi bifaana kundaa baara bwohono ba baakasa kana ba bali ku bitsulu bi mansie bibi Masedwane ya Akayi. **8** Mu kuulu, Ndagha a Mfumu yiifi kundaa be ya baagyughu yo tee ku Masedwane ya ku Akayi. Nsia a kana li be mu Nzaami yiitsanjama mu bibini byehene ya bihi ka lifrisiyili a nzala a obili mu lo o. **9** Mu kuulu baara bwohono bali mu okabulubili mu mbwambwana yi liibwana a be bihi ya bu liityeghe be banzaami baba bityeghe mbihi mu osalala Nzaami wu a mweē ya wu a nganjma, **10** ya mu okebe Mwana a nde wu aafa ku mayulu, Yīisu wu aasiili nde ŋa kara li ba bákpi. Me mwana munde aakwulu bihi-a-be mu masyeme ma Nzaami ma maagya.

2 Mu obo, bandughu ba me mu kana, be beme ligyighili osoolo ti ogya o bihi kundaa be ka ooli ku obwunu o. **2** ŋa mbihi a ŋa bámwehē bihi kimini ya ŋa límono bihi mpara ku bvulu lili Filipe, ti bwunu a bu lisoolo be, bihi liibagha bukyini bu bukughu mu Nzaami a bihi mu oluo be Nsia yi Mbwe a nde ŋa kara li mamvulu. **3** Mpama yi líkagwa bihi baara ka yísini mu epfwumu o, ka yísini mu osunjumu o, bwunu we mu mayele ma mabi. **4** Lo buulu me Nzaami aagyele bihi ya aagwi bihi Nsia yi Mbwe, bihi ka likabili mu ogwa baara esee o, lo mu ogwa Nzaami wu aakagyele mikolo mi baara esee. **5**

Mu kuulu, be lisoolo ti kaala bihi nkini liisalala mbiili yi mbwe mu opele baara o. Kaala bihi nkini liisuo be bitsimi bibi ntono a nzi o. Nzaami li mpughulu mu mandagha mamō. **6** Bihi ka liisagha masyighi ma maafa kundaa baara o, ngu okala kundaa be, bwunu we kundaa baara bakimi. **7** Bu lili bihi bantumū ba Kriste, bihi liikaakwighi be mu ogwa bihi budziri, lo bihi líli ti anga bike-bike ŋa kara li be. Ti anga ngughu wu aakatsyaha baana ba nde, **8** mu dzyi li líli a bihi mu be, bihi ka lídzyi o ti bihi líluo be yini a Nsia yi Mbwe yi a Nzaami, lo si ogwa bumweē bu bihi bameme mu be, mu kuulu be lili baara baba ntala kundaa bihi. **9** Bandughu mu kana, be lilibili mweē mu esala e bihi ya mu mpara yi liimono bihi. Mu kuulu, bihi likabulutsala be Nsia yi Mbwe yi a Nzaami, mu okasala si mpyibi ya mwi, mu onyaā ogwa leme kundaa nswe mbwuru ŋa kara li be. **10** Be lili bampughulu, ya Nzaami si li mpughulu, ti ŋa nkulu a be ba liikasa kana, bihi líli a nzya-nzyara yi bungili, yi bunsumu ya yi baagwene a yi baasyeme. **11** Be lisoolo si ti bihi líli kundaa nswe mbwuru mu be ti bu ookakala taara ya baana ba nde. **12** Bihi lili mu okagwa be mpama, bukyini ya lili mu okasa be enkwiili mu okala a nzya-nzyara yi aakagwa Nzaami budziri, nde wu áti be mbili mu Emfumu ya mu nsia a nde. **13** Me mu obo, bihi si likabvurulu matuono kundaa Nzaami matala mwohono mu kuulu be bu ligyagha ndagha a Nzaami yi líluo bihi be, be líikihi yo, ka ti anga ndagha a mbwuru o, lo nkara a bwunu a bu yili yo ndagha a Nzaami yi a nganjma, yili mu okabulusala mu be ba liikasa kana. **14** Mu kuulu, bandughu mu kana, be beme liinama mabwunu ma Nzaami mama mu Yīisu-Kriste ma mali ku Yude. Behe si liigyagha kundaa baara ba nsie a beme ba baagwene okasa kana mu Yīisu, mpara oyo yi oogyagha banga-a-kana baba ku Yude kundaa baara ba nsie a bomo. **15** Me bo baadzwi Mfumu Yīisu ya mibighili, me bo baamwehē bihi kimini. Bo ka baakagwa Nzaami esee o ya bo bali mitaara mi baara bwohono. **16** Bo baakakahaba bihi mu oluo baala ka bali ba-Dzwife o maluo ma maabvwuhu bo. Obo me bu baakakwuhu eteese ki masumu ma bo matala mwohono. Lo nkehe a Nzaami yibwi mu bo. **17** Lo mu bihi, bandughu mu kana, bihi lili la ya be mu manyuru mu mana matala, lo ka mu mukolo o. Mu matala ma, bihi lili a nzala a oyamono be yi alagha,

ya bihi lili mu okasa mpini mpaala ndagha oyo yikughu. **18** Mansa malagha, bihi liikasagha oyamono be, ya meme Poole aangyelee ogya kundaa be, lo Satana aakakahaba bihi. **19** Mu obo, nande li emiini e bihi? Nande li esee e bihi? Nande li kagha lili mutwunu a bihi? Ka ngu behe si nga nkulu a Mfumu a bihi Yiisu, mu matala ma akala aagya nde o? **20** Mu engarjma, me be lili nsia a bihi ya esee e bihi.

3 Me mu obo, buulu bihi ka liifirileene okebe o, bihi liigwolo munkaana wu osyili ngasighi ku bvulu lili Atene. **2** Ya bihi liigweghe be Timote, wuli ndughu a bihi mu kana, wu aakasala ya Nzaami mu okatsala Nsia yi Mbwe yi a Kriste emō ya bihi, mpaala nde agwa be mpini ya bukyini mu osa mukama mu kana. **3** Mpaala mbwuru anyaa okala a mukolo maā-maā mu nkooro a kimini li lili mu okamono bihi-a-be matala ma. Buulu, be ligyighili osoolo beme ti mpara oyo yili kunsu bitsimi bi okuru Nzaami mu bihi-a-be. **4** Mu matala ma lili bihi kundaa be, bihi liitswama okalyele be ti sa bamwehē bihi-a-be kimini li lilagha. Ya be lisoolo ti mandagha mamō maakeele. **5** Me mu obo, me ka aafirindeene okebe o ya me aangweghe Timote mu oyabagha mansia ma kana li be, bu limono nzala a mweē ti nkini a nki Nga-a-bigyeele maagyeele be, ya mara esala e bihi ekala kii bwunu. **6** Lo mu matala ma, Timote wu fi kundaa be, maayabvughuru kundaa bihi, ya nde aayagwa bihi mansia ma mabwe mama kana li be, mama dzyi li be. Nde aalyele bihi bitsimi bi bibwe bi liikebe be mu bihi ya ti be lili a nkara a nzala a ofirimono bihi, ti bwunu a bu lili a bihi si nkara a nzala a ofirimono be. **7** Mu obo, bandughu mu kana, nga kara a mpara ya kimini li bihi, bihi liibagha bukyini mu be, mu nkooro a kana li be. **8** Mu matala ma, bihi liifiribagha bumweē, mu kuulu be lili mu okasa mukama mu Mfumu. **9** Bunu-abo bihi likughu obvurulu matuono kundaa Nzaami mu nkooro a be, mu esee kyehehe ki lili a bihi mu be nga nkulu a Nzaami a bihi? **10** Mpyibi ya mwi, bihi liikabuono Nzaami ku olagha mpaala bihi lifirimono be ya libwehe mandagha ma mali mu okagweene mu kana li be. **11** Nyaā Nzaami ndeme wu li Taara a bihi-a-be, ya Mfumu a bihi-a-be Yiisu, badzubulu bihi nzili yi ogya kundaa be! **12** Nyaā Mfumu asa kuulu ti dzyi li be lilwulu ya lipfini nga kara li be ya babake

ya baara bwohono, ti bu oli dzyi li bihi mu be! **13** Nyaā nde agwa mikolo mi be mpini mpaala be likala baara baba bungili, gwene a epfwumu ki baasyeme nga nkulu a Nzaami wu li Taara a bihi, mu matala ma ogya Mfumu a bihi Yiisu ya baba ngili ba nde bwohono! Aamene!

4 Bandughu mu kana, mu omana, bihi liigyihili be nki nzya-nzyara be lifaana okala a yo mu ogwa Nzaami esee, ya be lili mu okadzyara obo. Lo mu matala ma, bihi lili mu okaluomo be ya lili mu okatumu be mu nkhwumu a Mfumu Yiisu mu ofirigyighili mi miluru. **2** Mu kuulu, be lisoolo nki maluo bihi liigwi be ma maafi kundaa Mfumu Yiisu. **3** Dzyi li Nzaami lili ti be likala baara ba bātwwulu mu libee mu okala ba baba ndaa nde, linyaā okala a enkwunu. **4** Nyaā nswe mbwuru mu be agyighili osuolo mukala a nde mu okala kunsu bungili ya budziri. **5** Nde ka faana onama bisee bi musunu o ti bu ookasa baala ka bali ba-Dzwife o, ba bagwene osoolo Nzaami. **6** Mu ndagha yi, mbwuru si mumō anyaa osa bubi bwunu we opfiri ndughu a nde mu kana, mu kuulu bihi liitswama olyele be yo ya osuo bumpughulu bu ndagha yi: Mfumu aakasyeme baara ba baakagyighili mandagha mamō. **7** Mu kuulu, Nzaami ka aati bihi mbili mpaala bihi likakala kunsu mandagha mama osugumu o, lo mu okakala kunsu bungili. **8** Me mu obo, nswe munde wu aabihi maluo ma, nde ka mbwuru abihi o, lo nde Nzaami wu aakagwa be Mufulu a nde wu a Ngili abihi. **9** Mu mi mitala dzyi lili bandughu mu kana, be ka lili a nzala a kuulu ti basono be mukaana o, mu kuulu Nzaami aaluo be bunu be lifaana okadzyi babake be a be. **10** Me obo behe si liikasa kundaa bandughu mu kana bwohono ba bali ku nsie yi a Masedwane yohono. Lo bandughu ba me mu kana, bihi ligwi be mpama mu ofirigye linku-nkulu. **11** Liikasagha okala kunsu edzuunu, mu okatala yini a mandagha ma beme, ya mu okasala mu myaa mi be, ti bu liigwi bihi be litumu. **12** Mpaala nzya-nzyara a be yikala yi a budziri nga mihi mi baara baala ka bali banga-a-kana o, ya be linyaā okala leme kundaa mbwuru mukimi. **13** Bandughu mu kana, bihi ka lidzyi o ti be likala kunsu nzi-nzimini mu mi mitala baara ba bākpī, mpaala be linyaā okala kunsu minyoō ti anga baara babake ba bagwene a emiini. **14** Mu kuulu, kala ti bihi liikasa kana ti Yiisu aakpi ya aasighili mu lipfu, bwunu obo si

Nzaami akala aasiili mu Yiiisu, emō ya nde baara ba bákpi. **15** Ligyughu ndagha yi lilyele bihi be, yo yili ndagha yi ólyele Mfumu: Bihi-a-be ba liikala mweē tee mu matala ma oogya Mfumu, ka akala liikala ku nkulu a babo ba bátswama okpa o. **16** Mu kuulu Mfumu ndeme, mu engubu kii litumu, ya mu likyi li mfumu a bangye-yulu ya lili mvulu-a-mvulu a Nzaami, bu aafa ku yulu, sa ayakumunu ya ba bákpi mu Kriste sa batswama osighili mu lipfu. **17** Ŋa nseele, bihi-a-be ba lili nkini mweē, sa baseene bihi-a-be nzili mō ya bo mu bidzi mu obwana a Mfumu, mu engye-a-ngye. Ya obo me bu liikala bihi-a-be matala mwohono ya Mfumu. **18** Mu obo, mu mandagha mamo liikagwa be a be bukyini.

5 Bandughu mu kana, mu mi mitala matala bwunu we ena ki ookeele mandagha mamo, be ka lili a nzala a kuulu ti basono be mo o. **2** Mu kuulu, be beme ligyighili osoolo ti etsughu e Mfumu sa egya ti anga bu ookagya muturu mu mpyibi. **3** Mu matala ma akala oolyele baara ti: «Bihi lili mu edzuunu ya lili kunsanke-nkebe yimbwel!» Ōgo mu ensihibi obiyi sa obwa mu bo ti anga misuo mi oburu, ya ka okala a mbwuru wu akala aabara o. **4** Lo be bandughu mu kana, be ka lili kunsan mpyibi yi a laŋa-laŋa o, mu kuulu etsughu ekye egya kundaa be mu ensihibi ti anga muturu. **5** Mu kuulu be bwohono lili baana ba otsyeme, baana ba mwī. Bihi-a-be ka lili baara baba mpyibi o, bwunu we baara baba mpyibi yi a laŋa-laŋa o. **6** Mu obo, bihi-a-be linyaā ogyoŋomo ensama ti anga baara babake. Lo litswe likahala mihi ya likala a nzya-nzyara yi faana ya yi budziri. **7** Mu kuulu, baara ba baakagyoŋomo, mu mpyibi baakagyoŋomo ensama, ya baara ba baakakolo mala, mu mpyibi baakakolo mala. **8** Lo bihi-a-be ba lili baara ba mwī, litswe likala a nzya-nzyara yi faana ya yi budziri, litswe lilaha kana ya dzyi ti anga enkuru kii mu esyeē ki baakakyi butulu, ya emiini kii obvwughu ti anga mpu yi esyeē. **9** Mu kuulu, Nzaami ka ásuolo bihi-a-be mu ogyagha nkehe a masyeme ma nde o, lo mu obagha obvwughu mu Mfumu a bihi Yiiisu-Kriste, **10** wu aakpi mu nkooro a bihi mpaala, ngu okala ti bihi-a-be lili mu okakahala mihi, bwunu we lili mu okagyoŋomo ensama, bihi-a-be likala emō ya nde. **11** Mu obo, liikagwa be a be mpini ya liikabaha bana mu okulu mu kana, ti bwunu a bu liitswama okasa be. **12** Bandughu

mu kana, bihi liluomo be mu okala a budziri mu baara baala ŋa kara li be bali mu okasala mu be, ba bali mu okatumu be mu Mfumu ya ba bali mu okagyehe be. **13** Liikagwa bo budziri bu bulagha ya liikadzyi bo mu nkooro a bigyighili bi bo. Liikakala mu edzuunu be a be. **14** Bandughu mu kana, bihi ligwi be mpama mu okagyehe babolo, mu okagwa banga a nzalamweē bukyini, mu okabaha ba bakolo. Liikakala a mukolo wu munene kundaa baara bwohono. **15** Liikasa mayele, mbwuru si mumō anyā obvurulu bubi mu bubi, lo matala mwohono, liikasagha osa bubwe be a be ya kundaa baara bwohono. **16** Liikakala mu esee matala mwohono. **17** Liikabuono matala mwohono. **18** Liikabvurulu matuono mu mandagha mwohono, mu kuulu lilo me waa li Nzaami kundaa be mu Kriste Yiiisu. **19** Ka lidzihibi mbaa a Mufulu a Ngili o, **20** ka likatsaala mandagha ma ookalyele mibighili o, **21** ligyighili okakeene mandagha mwohono, liikakebe mandagha ma mabwe. **22** Liikabihi osa bubi mu bifa byehene. **23** Nyaā Nzaami wu edzuunu ndeme asa be baba ngili kuu mukughu. Nyaā ti embwuru e be kyehene, mufulu a be, muwumunu a be, nyuru a be, bikala bi bákebe bubwe bi bigwene a yi baasyeme tee mu matala ma oogya Mfumu a bihi Yiiisu-Kriste! **24** Mbwuru wu aati be mbili, li wu bakughu osa kana mu nde: Nde aasa ndagha oyo. **25** Bandughu mu kana, liikabuono si mu bihi. **26** Ligwa bandughu mu kana bwohono mamboro mu onyuburu ku ofaana ya kuu baana ba Nzaami. **27** Me mbuono be mu nkumu a Mfumu: Litaā mukaana wu ŋa nkulu a bandughu mu kana bwohono! **28** Nyaā bwehe bu Mfumu a bihi Yiiisu-Kriste bukala ya be!

2 Tesalonike

1 Me Poole, emō ya Silibvĩ ya Timote, lisono mukaana wu kundaa libwunu li Nzaami li lili mu bvulu lili Tesalonike, libwunu li Nzaami Taara a bihi ya lili Mfumu Yiisu-Kriste: **2** Nyaã bwehe ya edzuunu bi bifi kundaa Nzaami Taara a bihi ya kundaa Mfumu Yiisu-Kriste bikala ya be! **3** Bandughu ba me mu kana, mu nswe matala, bihi lifaana okabvurulu matuono kundaa Nzaami mu be. Oli bubwe kundaa bihi mu okasa obo, mu kuulu kana li be lili mu okakulu ku olagha, ya dzyi li lili a be bwohono bana ya babamo lili mu okapfini. **4** Me mu obo bihi lili a mutwunu mu okabili mu be mu mabwunu ma Nzaami, mu nkooro a mukama ya kana li be ŋa nkulu a bigyele byehene ya kimini bi liikabwana a be. **5** Ekye me elyimi kii mumfwunu a Nzaami wu bunsumu, mpaala be likala baara baba mukughu mu Emfumu e Nzaami kiili, be lili mu okamono mpara mu kye. **6** Mu kuulu kala oli ngan̄ma ti Nzaami li bunsumu, nde sa abvurulu mpara kundaa babo ba baakamwehē be mpara. **7** Mu matala ma omoŋono Mfumu Yiisu, ŋa akala aafa nde ku yulu ya bangye-yulu ba nde baba lileene, Nzaami sa agwa be ogwumu, emō ya bihi, be ba lili kunsa mpara. **8** Yiisu sa agya munsa mile mi mbaa, mu osyeme ba bagwene osoolo Nzaami ya ba bagwene a bintamana mu Nsia yi Mbwe yi a Mfumu a bihi Yiisu. **9** Masyeme ma ofaana obagha baara babo me obiyi kuu mibvu ya mibvu. Bo sa bakala la ya Mfumu ya nsia a mpini a nde. (aiōnios g166) **10** Mandagha mamu sa makeele mu etsughu ki oogya Mfumu. Mu obo, bwohono ba bali baba ndaa nde sa bagwa nde nsia, bwohono ba baakasa kana sa bagwa nde masyighi. Behe si sa likala emō ya bo, mu kuulu be liisi kana mu bumpughulu bu liisuo bihi be. **11** Me mu obo bihi likasamana matala mwohono mu be, mu kuulu Nzaami a bihi aamono ti be lili baba mukughu mu mbili yi áti nde be, ya nde akuhu mu lileene li nde, bitsimi byehene bi bibwe ya bigyighili byehene bibi kana, **12** mpaala nkwwu a Mfumu a bihi Yiisu yikala a nsia mu be, ya be likala mu nde, ti bwunu a bu oli bwehe bu Nzaami a bihi ya Mfumu Yiisu-Kriste.

2 Bandughu mu kana, mu mi mitala oyabvughuru o Mfumu Yiisu-Kriste ya

obvununu o bihi-a-be ya nde, bihi liluomo be bu: **2** ka lisa o kuulu ti bitsimi bi be bigwimi maswa-maswa mu nkooro a ndagha yi osuo mufulu, mu ndagha nga-mō bwunu we mu nkooro a mukaana wu baalyele ti kundaa bihi aafi, wu li mu okalyele ti etsughu e Mfumu eeto. **3** Mbwuru anyaa opfiri be mu ndagha si mō. Nsomo etsughu ekye egya, baara sa batemene a Nzaami nsumu, ya Mbwuru wu Mubi wu obyii sa amoŋono. **4** Nde sa atemene nsumu ya byene bi baakata ti nzaami, bwunu we byehene bi baakasyighi. Nde sa ato tee mu eteese kii oyibwa nsini mu Nzo a Nzaami, ya ki olyele ndeme ti nde me Nzaami. **5** Be ka lili mu olibili mweē o ti me áli andyele be ndagha yi ŋa ándi me nkini kundaa be? **6** Ya mu matala ma be ligyighili osoolo emakye eli mu okakwara nde, mpaala nde amoŋono yini a mu matala ma bákuru. **7** Mu kuulu mansweghe ma bubi mali mu okabulusala, lo sa masomo mu osala ku obvulu ŋa odzimini munde wu li mu okakwara nde. **8** Mu obo Mbwuru wu Mubi sa amoŋono, lo Mfumu Yiisu sa adzwa nde mu mufulu a muŋma a nde ya sa akala adzihibi nde mu matala ma aamoŋono nde. **9** Ogya o Mbwuru wu Mubi sa omoŋono mu lileene lili Satana, mu mpaana yi mawa-mawa, mu bilyimi ya bimaã bibi mpya, **10** ya mu opfiri kuu mawa-mawa ya ogwene ku bunsumu kundaa babo ba baagwunumu, mu kuulu bo ka baagyagha dzyi lili engan̄ma liili áli likughu obvwuhu bo o. **11** Me mu obo Nzaami li mu ogweghe bo mufulu wu ogwunumu mpaala basa kana mu mpya, **12** mu kuulu basa muyala kundaa baara bwohono baala ka baasi kana mu engan̄ma o, lo baala baamono esee mu okagyighili mandagha mama gwene a bunsumu. **13** Bandughu mu kana ba ookadzyi Mfumu, bihi me baala lifaana okabvurulu matuono kundaa Nzaami matala mwohono mu nkooro a be. Mu kuulu, Nzaami ásuolo be mu okala baba nsomo mu obvwughu, mpaala be libvwughu mu libaha li Mufulu wu aakasa ti be likala baba ngili ya likala a kana mu engan̄ma. **14** Nzaami áti behe si mbili mu nzili a Nsia yi Mbwe yi líluo bihi be, mpaala be libagha nsia a Mfumu a bihi Yiisu-Kriste. **15** Me mu obo, bandughu mu kana, lisa mukama ya likwara maluo ma liiluo bihi be, ngu okala mu mbiili bwunu we mu mukaana. **16** Nyaã Mfumu a bihi Yiisu-Kriste ndeme ya Nzaami Taara a bihi, wu áadzyi bihi ya wuulu mu bwehe bu nde, aagwi

bihi mpama yi a mibvu ya mibvu ya emiini ki ebwe, (aiōnios g166) 17 bagwa be mpama ya mpini mu okasa bigyighili bi bibwe ya mbiili yi mbwe matala mwohono!

3 Mu omana, bandughu mu kana liikasamana Nzaami mu nkooro a bihi, mpaala ndagha a Mfumu yitsanjama mu maswa-maswa ya yibagha nsia ti anga bu yili a yo nsia kundaa be. 2 Liikasamana si Nzaami mpaala bihi libvwughu ŋa myaā mi baara ba nga-a-ebaghala ya ba babi, mu kuulu baara bwohono ka bali a kana o. 3 Lo Mfumu li wu bakughu osa kana mu nde, nde sa agwa be mpini ya sa akala be mu Nga-a-bubi. 4 Bihi lili a kana mu Mfumu ti be lili mu okasa ya be sa lifirikasa mandagha mwohono ma lili mu okatumu bihi be. 5 Nyaā Mfumu akatumu mikolo mi be mpaala be likadzyi Nzaami ya likala a mukama ti wu a Kriste! 6 Bandughu mu kana, mu nkwumu a Mfumu a bihi-a-be Yiiisu-Kriste, bihi ligwi be litumu mu okala la ya nswe ndughu mu kana wu li mubolo, wu agwene okanama maluo ma liiluo bihi be. 7 Be beme lisoolo bu lifaana onama be efaana e bihi, mu kuulu bihi ka liili babolo ŋa kara li be o. 8 Bihi ka liili bi-odza bi mbwuru ku o bwunu o. Lo kunsala esala ya kunsala mpara, mpyibi ya mwii bihi liikasala mpaala linyaā okala leme kundaa mbwuru mumō ŋa kara li be. 9 Ka mu kuulu ti bihi ka liili a muswa o, lo mu kuulu bihi bameme liidzyi osuo be efaana ki lifaana be onama. 10 Buulu, ŋa lili bihi kundaa be, bihi likagwa be litumu li: Kala ti mbwuru ka dzyi okasala o, lo anyaa si okadza! 11 Lo bihi lili mu okagyughu ti baara bana ŋa kara li be bali kunsala bubolo, ya ŋa ebini kii osala, bo bali okabulunama mandagha ma magwene a mubwughu. 12 Mu nkwumu a Mfumu a bihi-a-be Yiiisu-Kriste, bihi lili mu okagwa litumu ya mpama kundaa baara baba obo, mu okasala mu edzuunu mu kuulu babagha bi-odza mu mpini a bomo. 13 Lo kundaa be bandughu mu kana, ka likolo mu okasa bubwe o. 14 Kala ti mbwuru bihi onama mandagha ma liitumu bihi munsala mukaana wu, lisa kuulu ti baara bwohono basoolo nde ya ka lifirikala a endughu ya nde o, mpaala nde amono bupfiri. 15 Ka limono nde ti anga mutaara o, lo ligyehe nde ti anga bu baakagyehe ndughu mu kana. 16 Nyaā Mfumu wu edzuunu, ndeme akagwa be edzuunu mu matala mwohono ya mu mandagha

mwohono. Nyaā Mfumu akala ya be bwohono! 17 Me Poole, me ngwi be mboro, bu nsono yo mu kwogho e meme. Ekye me enyeme ki aakansa me mu mikaana myehene mi aakansono me. 18 Nyaā bwehe bu Mfumu a bihi-a-be Yiiisu-Kriste bukala ya be bwohono!

1 Timote

1 Me Poole, ntumu a Yiisu-Kriste mu litumu li Nzaami Mubvwuhu a bihi, ya lili Yiisu-Kriste, wu li emiini e bihi, **2** nsono mukaana wu kundaa Timote, nkara a mwana a me mu kana. Nyaã ti bwehe, nyii ya edzuunu bi bifi kundaa Nzaami Taara ya kundaa Mfumu a bihi Yiisu-Kriste bikala ya we! **3** Ti bwunu a bu ángwi me we litumu mu matala ma ákangye me ku Masedwane ti kala ña Efedze, mpaala we kahaba baara babake mu onyaã okatsala nsia a maluo mama mpya **4** ya mu onyaã osa mukolo mu masaba ya mu okatarjana mankwumu ma bankagha-kwuru ma magwene a masini. Mandagha mamu maakaburu munsohobo ña ebini kii osala esala e Nzaami ki baakasa mu kana. **5** Mupfunu a litumu lilo ngu osuo dzyi li lifi mu mukolo wu a tse-tse, mu bitsimi bi bibwe ya mu kana lili nganma. **6** Baara babake, bu baabihi onama mandagha mamu, baagyene mu okabulusa nkele yi gwene a mubwughu. **7** Bo badzyi okala baluo ba mikyene, lo bo bomo ka bali mu okabaghala mandagha ma bali mu okalyele bo o, ngu okala mandagha ma baakalyele bo ya enziini ti mo mali mama nganma. **8** Bihi-a-be ligyili osoolo ti mikyene mili mibwe kala ti basalala mye bu ofaana. **9** Bihi-a-be si lisoolo ti mikyene ka bágwí mye mu nkooro a baara baba nsumu o, lo mu nkooro a baara ba baagwene okanama Mikyene ya ba baakagyighili mandagha ma mabi, baara ba babi ya banga-a-masumu, baara ba baagwene okagwa Nzaami budziri ya ba baagwene okagwa bilogho bibi ngili budziri, ba baakadzwa bataara babo ya ba baakadzwa bangughu babo, ba baakadzwa baara, **10** baara banga-a-enkwunu, babaghala ba baakabvughu mbughu ya banganda babaghala, minta-nkaala mi bankana, banga a mpya, ba baakalaba mukihi wu a mpya, ya baara bwohono ba baakatemele maluo mama nganma ngangala. **11** Obo me bu oli nsia yi mbwe yi a nsia a Nzaami nga a esee, nsia yi mbwe yi baagwi me. **12** Me mbvurulu matuono kundaa Yiisu-Kriste mfumu a bihi, nde wu aagwi me lileene, mu kuulu nde aamono ti me ndi mbwuru wu bakughu osa kana mu nde bu aasi ti me nsala esala e nde, **13** me wuulu nsomo áakantsua Nzaami, áakamwehẽ banga-a-kana kimini, nga a enjma. Lo Nzaami

aamono me nyii mu kuulu me áakangyighili mandagha mamu kunsu nzi-nzimini, wene a kana. **14** Ya bwehe bu Mfumu a bihi bu bulagha buumogono mu me, nde aagwi me kana ya dzyi bi biikafa mu bumõ ya Yiisu-Kriste. **15** Ndagha yi yili yi a nganma ya yiili baara bwohono bakughu okihi yo: Yiisu-Kriste aagyi ña nsie mu oyabvwuhu banga-a-masumu. Ya me, me ndi mbwuru wu a nsomo ña kara li banga-a-masumu. **16** Lo Nzaami aamono me nyii, mpaala mu me, wu ndi wu a nsomo, Yiisu-Kriste asuo mukolo a nde wu munene ti anga efaana kundaa babo ba baasa kana mu nde mpaala babagha laama lili mibvu ya mibvu. (aiõnios g166) **17** Nyaã nsia ya budziri bikala kundaa Mukogho wu matala mwohono, wu aagwene okamogono, wu aagwene okakpa, Nzaami yini a mumõ, mu mibvu ya mibvu! «Aamenel!» (aiõn g165) **18** Timote mwana a me, me ntumu we mu odzwana mvulu yi mbwe, ti bwunu a bu oli mandagha ma ótswama oleye mibighili mu nkooro a we, mpaala we bagha mpini mu mo, **19** we bukebe kana ya bitsimi bi bibwe. Bitsimi bi bibwe bibwe, babake baatsili bye ya baadzihibi kana li bo. **20** Imene ya Alesandere bali ña kara li baara babo. Me aanyaghala bo ña myaã mi Satana mpaala bo banyaã ofirikatsua Nzaami.

2 Mu obo, nsomo-a-nsomo me gwi be mpama mu akaluomo, mu okasamana, mu ookabuono ya mu okabvurulu matuono kundaa Nzaami mu baara bwohono, **2** mu nkooro a mikogho ya mu nkooro a baara bwohono ba bali a litumu, mpaala bihi-a-be likala a bumweẽ bubu edzuunu ya bubu pii, mu enzaami kyehehe ya budziri bwohono. **3** Obo oli bubwe ya Nzaami wu li Mubvwuhu a bihi-a-be aakadzyi obo. **4** Nde dzyi ti baara bwohono babvwughu ya bakala a ligyahaba li enganma. **5** Mu kuulu Nzaami li yini a mumõ, ya mbwuru wu aakabvurulu endughu ña kara li Nzaami ya baara li yini a mumõ, mbwuru munde me Yiisu-Kriste, **6** nde wu áafiri ekolo mu nyuru a ndeme mu nkooro a baara bwohono: Bubo me bumpughulu bu básuo mu matala ma ósuolo Nzaami. **7** Me mu obo Nzaami ásuolo me mu okala wu aakata mukwughu, ntumu (me enganma ndeye, me ka mpfiri mpya o) ya muluo kundaa baala ka bali ba-Dzwife o, mu kana ya mu enganma. **8** Mu obo, me ndzyi ti babaghala bakasamana Nzaami mu bibini byehene, bakaseene myaã mimi ngili

mama kana o, masaba ma birjmini bi bakaha. Lo we sa mpini mu okala a enzaami ki ebwe. **8** Mu kuulu bimpa bi biikagwa nyuru mpini ka bili a ndaana yi alagha o. Lo enzaami eli a mupfunu mu myehene: Kye eli a misiini mimi laama lili lolo ya lili bitsughu bi biigya. **9** Ndagha yi yili yi a nganma ya yiili baara bwohono bakughu okihi yo: **10** Kala ti bihi-a-be lili mu okamono mpara ya lili mu okadzwana mvulu, mu kuulu bihi-a-be liisi emiini mu Nzaami wu a mweë, wu li mubvwuhu a baara bwohono, ya bvulu-bvulu banga-a-kana. **11** Mamo mandagha ma faana otumu ya oloo we baara. **12** Mbawuru anyaa otsaala bufulu bu we! Lo we kala efaana kundaa banga-a-kana mu mbiili, mu nzya-nzyara, mu dzyi, mu kana ya mu mukolo wu a tse-tse. **13** Tee mu matala ma akala aangya me, sa makpa mu okantaã Bisono bibi ngili ŋa nkulu a baara bwohono, mu okagwa babake mpama ya mu okaluo. **14** Ka merjene ekaba kii bwehe bu Nzaami ki eli mu we o, ekaba ki bágwi we mu nzili a libighi ya ŋa ónaã we emvurunu ki bakwuru ba libwunu myaa ŋa yulu a mutswi. **15** Sa mandagha mamo mu mukolo mumõ, gwa nyuru a we yohono mu esala ki mpaala okulu o we omogono ŋa mihi mi baara bwohono. **16** Kahala mihi mu nyuru a weme ya mu maluo ma we. Sa mukama munsã mandagha mamo. Mu kuulu, we bu si obo, we weme sa bvwuhu ya baara ba baagyughu wehe si sa babbvwughu.

5 Ka akasyeme ejmini mu ebaghala o, lo kagwa nde mpama ti anga we li mu okagwa taara a weme mpama. Aakagwolo minkuru-mbala ti anga baana ba ngughu a we, **2** bakaha ba bakwuru ti anga bangughu ba we, batughu ti anga bankele ba we, ya mukolo wu a tse-tse. **3** Aakagwa bapfiili ba bakaha, maa ngu bapfiili, ba bali a nzala a libaha budziri. **4** Kala ti mupfiili wu mukaha li a baana bwunu we bateghele, nyaã ti nsomo baana ya bateghele babo basuo enzaami e bo mu manzo ma bomo ya mu okabvurulu bubwe bu ósi bo biburu bi bo. Obo me bu ookadzyi Nzaami. **5** Lo maa ngu mupfiili wu mukaha wu aasyili ngasighi, wu aasi emiini e nde mu Nzaami, nde aakasa mukama mu okasamana ya mu okabuono mpyibi ya mwii. **6** Lo mupfiili wu mukaha wu li kunsã bisee bi nsie nde li wu a kpi, ngu okala ti nde li nkini mweë. **7** Mimye mikele mi faana otswa we bapfiili ba bakaha, mu kuulu banyaã obagha

ndagha yi baasyeme bo. **8** Ya kala ti mbwuru ka aakabaha badzighi ba nde o, bvulu-bvulu baara ba bali mu nzo nde, lo nde aatunu kana li nde, ya nde bvulu bubi ya mbwuru wu gwene a kana. **9** Mu osono nkumu a mupfiili wu mukaha mu mukaana wu a emvurunu ki bapfiili, nde faana okala a bamvulu obaana makwumu-masemene tee ku yulu, ya wu áali mukala a baghala yini a mutsyini. **10** Baara bafaana osuo bumpughulu bu bigyighili bi nde bi bibwe: Nde aakwuhu baana ba nde, nde aakabwana a baara mu nzo a nde, nde aakaswagha myili mi baba ngili, nde aakabaha babo ba bali mu mpapa ya nde aakasalala bigyighili bi bibwe. **11** Lo we ka sono mankwumu ma bapfiili ba bali nkini batughu o. Mu kuulu, mu matala ma baakala a bo nzala a ofirikie, bo baakabihi Kriste. **12** Obo me bu baakasomo bo mu mumfwunu mu kuulu bo baakatunu mukihi wu bálabá nsomo. **13** Ndagha yinke me yi, bo bu bagwene a esala ki baasa, bo baakabulugye mu manzo ma baara, lo ka yini a mu nkooro a ku bagwene a bo esala o, lo mu nkooro a nkele ya embili-a-mbili e bo. Bo baakabulubili mu mandagha maala ka bafaana obili mu mo o. **14** Mu obo, me ndzyi ti bapfiili ba bali nkini batughu bafaana ofirikie, bafaana oburu baana, bafaana okala bakaha ba babwe mu manzo, buulu banyaã ogwa mutaara nzili yi obili bubi bu banga-a-kana. **15** Mu kuulu, bapfiili ba bakaha babake ŋa kara li bo baasihi nzili a Mfumum mu onama Satana. **16** Kala ti nga-a-kana wu mukaha li a bapfiili ba bakaha mu badzighi ba nde, nyaã nde abaha bo ya leme lilo linyaã ogya ku yulu a libwunu li Nzaami, buulu libwunu li Nzaami libaha maa ngu bapfiili ba bakaha. **17** Nyaã ti bakwuru ba libwunu ba baakatumu bubwe bagwa bo budziri bu bulagha ya bu bufaana, bvulu-bvulu ba baakamono mpapa mu esala kii okatsala nsia a Ndagha a Nzaami ya kii okaluo. **18** Mu kuulu, Ndagha a Nzaami yiikalyele ti: «We ka kuru murjma a ngoomo wu li mu okasala mu matala mama okele bimburu o,» ya: Musala faana obagha mufuru a nde. **19** Ka kihi o ti bayafwunu mukwuru a libwunu kundaa we, kala ti ka «ŋa nkulu a bampughulu buolo bwunu we batere o.» **20** ŋa mihi mi baara bwohono, aakasyeme ba baakasa masumu, buulu babake babagha nzalamweë. **21** ŋa nkulu a Nzaami, ŋa nkulu a Yiisu-Kriste ya ŋa nkulu a bangye-yulu ba básuolo, me ntswi we mikele mi mu

okasalala mandagha mamo mu bunsumu wene a munsuolo a bidzili. **22** Ka naā myaā mu maswa-maswa ŋa yulu a mutswi a mbwuru o, mara we kala mu mfwunu a masumu ma mbwuru mukimi. We weme, aakakala wu a tse-tse. **23** Mu nkooro a mila mi miikatswa we matala mwohono ya mabyele mama mu mweē, ka akaŋma yini a madza o. Aakaŋma si mana bviini. **24** Masumu ma baara bana maakamogono nsomo basa bo mumfwunu. Lo masumu ma baara babake maakamogono yini a ŋa mbihi. **25** Bumō si, bigyighili bi bibwe biikamogono ŋa mihi mi baara bwohono, ngu okala bibye biili nkini biimogono o, bye ka bikughu osweme o.

6 Nyaā ti baara bwohono ba bali kunsu bunkana bagwa bamfumu ba bo budziri, mpaala banyaā otsaala nkumu a Nzaami ya maluo ma bihi. **2** Ya bankana ba bali a bamfumu banga-kana banyaā okatsaala bamfumu ba bo mu kuulu bo bali bandughu mu kana. Lo bo bafaana okasalala bo ku obvulu bubwe mu kuulu bo bali mu okasalala banga-a-kana ya bandughu ba bo baba mukolo. Mamo ngu mandagha mafaana okaluo we ya okatumu. **3** Nswe mbwuru wu aakaluo maluo makimi, ya ka li mu okanama mandagha ma mabwe mama Mfumu a bihi Yiisu-Kriste o, ya maluo ma mali bwunu a bu oli enzaami, **4** nde ka li a ligyahaba o, mubili a nyuru aadzwi nde mihi. Nde li a bubyele bubu munsohobo ya mumbaŋana. Obo me bu ookagya sughu li mukolo, mitaha, otsaala, ya bitsimi bi bibi, **5** mimbaŋana mi migwene a masini ŋa kara li baara ba bali a mayele oby. Bo ka basoolo enganyama o, ya bo baakatsimi ti enzaami eli nzili yi obagha busini. **6** Nganyama, enzaami eli busini bu bunene kundaa munde wu aakamono esee mu yini a bi ali a nde. **7** Mu kuulu bihi-a-be ka liyabiri elogho mu nsie o, bwunu obo si ŋa akala liimaara bihi-a-be ŋa nsie, ka libiri elogho o. **8** Kala ti bihi-a-be lili a bi-odza ya binkuru, bihi-a-be lifaana okamono esee mu bye. **9** Lo babo ba baakadzyi okala a busini, baakabwa mu bigyeele, baakakogholo mu mwere ya mu sughu li mukolo li linene ya li libi li liikasohobo baara kunsu oby ya odzimini. **10** Mu kuulu ntono a nzi yiikaburu mandagha mwohono ma mabi. Mu nkooro a yo, baara bana baadzimini ya ka baafirisyili a kana o, ya bo baamwehē manyuru ma bomu mpara yi alagha.

11 Lo we wu li mbwuru a Nzaami, aakabara mandagha mamo. We faana okasagha bunsumu, enzaami, kana, dzyi, mukama ya odzuunu. **12** We kadzwana mvulu yi mbwe yi a kana, dzarala laama lili mibvu ya mibvu li báti we mbili mu lo, ya liili we áasuo bumpughulu bu bubwe ŋa nkulu a bumpughulu balagha. (aiōnios g166) **13** ŋa nkulu a Nzaami wu aakagwa byehene bi bili mweē laama, ya ŋa nkulu a Yiisu-Kriste wu áasuo bumpughulu mu mbiili yi mbwe yi a kana ŋa busu bu Ponse Pilate, me ngwi we litumu li: **14** Kebe litumu bu kala wene a mpiri, wene a mi baasyeme we, tee mu matala ma oomogono Mfumu a bihi Yiisu-Kriste. **15** Omogono oko sa okala, mu matala ma ókuru Nzaami, nga-a-esee, lbyala nga emō, Mukogho a mikogho ya Mfumu a bamfumu, **16** yini a nde wuulu ka aakakpa o, nde wu aakakala kunsu otsyeme kuulu mbwuru ka kughu osomo oko o, otsyeme kuulu mbwuru si mumō nkini ámaamono o, ya ka kughu omono o. Nyaā ti nsia ya lileene bibi mibvu ya mibvu bikala kundaa nde! «Aamene!» (aiōnios g166) **17** Gwa litumu li kundaa bisini bi bili mu nsie yi banyaā okala a mubili a nyuru, ya banyaā osa emiini e bo mu busini buulu ka buukagyili matala malagha o. Lo bo basa emiini e bo mu Nzaami, nde wu aakagwa bihi bilogho byehene ku olagha mpaala bihi limono esee mu bye. (aiōn g165) **18** Nyaā bo bakasa bubwe, bakala bisini mu bigyighili bi bibwe, banga-a-kaba, ba baakabaha banganda. **19** Obo bo baakwu busini bu bubwe mu bomu mu bitsughu bi nkulu, mpaala babagha laama lili nganyama. **20** A we Timote! Aakakebe mandagha ma baagwi we. Aakabara mbiili yi mukaŋana yi aagwene faana ya kana. Ka akabaŋana mu mi mitala maluo mama ligyahaba lili mpya o. **21** Ndaama a baara yi aakatsimi ti yo yili a ligyahaba lilo, ka yiifirisyili mu nzili a kana o. Nyaā bwehe bu Nzaami bukala ya be!

2 Timote

1 Me Poole, ntumu a Yiisu-Kriste mu waa li Nzaami, bwunu a bu oli misiini mi bumweẽ bu buli mu Yiisu-Kriste, 2 nsono mukaana wu kundaa Timote, mwana a me wu mukolo. Nyaã ti bwehe, nyii ya edzuunu bi bifi kundaa Nzaami Taara ya kundaa Mfumu a bihi Yiisu-Kriste bikala ya we! **3** Me aakamvurulu matuono malagha kundaa Nzaami, wu aakansalala me mu bitsimi bibi tse-tse ti anga bu ósalala bankagha ba me. Matala mwohonon, me aakansamana mu we mpyibi ya mwii. **4** Me aakandibili mweẽ mu mansarja ma we, ya me ndi a nzala a omonon we kuu olagha mpaala me ndwulu mu esee. **5** Me aakandibili si mweẽ mu kana li we lili nganma, bwunu a bu óli kana li nkagha a we Loyidze ya lili ngughu a we Enise. Me ngyighili osoolo ti kana lilo lili si mu we. **6** Mu obo, me ndibili we mweẽ mu ofirifulu mbaa a ekaba ki ógwi we Nzaami mu matala ma ánarja me we myaã nja yulu a mutswi. **7** Mu kuulu, Nzaami ka ágwi bihi-a-be mufulu wu a nzalamweẽ o, lo mufulu wu a mpini, wu a dzyi ya wu okakuru nyuru. **8** Ka kala a budzwa mu osuo bumpughulu bu Mfumu a bihi o, ka kala a budzwa mu me wu ndi mu boloko mu nkooro a nde o. Lo mono mpara ya me mu nkooro a Nsia yi Mbwe mu lileene li Nzaami. **9** Nde wu aabvwuhu bihi ya wu aati bihi mbili mu okala a bumweẽ bubu ngili, ka mu nkooro a bigyighili bi bihi bi bibwe o, lo bwunu a bu oli bitsimi bi ákuru nde, bwunu a bu oli bwehe bu ágwi bihi mu Yiisu-Kriste nsomo nde agyighili bilogho byehene. (aiōnios g166) **10** Mu matala ma, bwehe bubo buumonono nja omonono Mfumu a bihi Yiisu-Kriste, wu aamana lileene li lipfu, ya wu aasuo nja tse-tse laama lili mibvu ya mibvu mu nzili a Nsia yi Mbwe. **11** Me mu nkooro a Nsia yi Mbwe oyo Nzaami aasuolo me mu okala wu aakata mukwughu, ntumu ya muluo. **12** Me mu nkooro a ndagha oyo me ndi mu okamono mpara yi. Lo me ka ndi a budzwa mu ndagha oyo o, mu kuulu me ngyahaba mu nande me aansu kana. Ya me ndi a emiini ti nde li a lileene mu okebe ma ágwi nde me tee mu etsughu ekye. **13** Kwara, mu kana ya mu dzyi li lili mu Yiisu-Kriste, efaana ki mandagha mama nsumu ma ágyughu we kundaa me. **14** Kebe, mu nzili a Mufulu a Ngili wu li mu bihi, mandagha mwohonon ma mabwe

ma ágwi we. **15** We soolo ti baara bwohonon ba bali ku Adzi baanyaghala me. Fingele ya Eremongene bali mu mutala a bo. **16** Nyaã Mfumu amono nzo a Onesifore nyii mu kuulu matala malagha, nde aakagwa me mpini, ya ka aakamono budzwa mu me wu ndi mu boloko o. **17** Me mu obo, nde bu aagyi ku bvulu lili Rome, nde aasi maswa mu osagha me ya nde aamono me. **18** Nyaã Mfumu Yiisu agwa nde bwehe mu etsughu kii mumfwunu, mpaala Nzaami amono nde nyii. We weme gyighili osoolo obvulu baara bwohonon ti ku bvulu lili Efedze, nde áabaha bihi.

2 Mu obo mwana a me, we ngu wuulu gwama mu bwehe bu buli mu Yiisu-Kriste. **2** Ya mandagha mwohonon ma ágyughu we kundaa me nja nkulu a bumpughulu balagha, gwa mo kundaa baara ba bakughu osa kana mu mo ya baala boho si bakughu oluo mo kundaa babake. **3** Mono mpara ya me ti anga mbumbulu a Yiisu-Kriste wu mubwe. **4** Ka oli a mbumbulu wu li mu esala wu aafirikasa ndagha nkimi o ya baara baala ka bali ba mbumbulu o, kala ti nde dzyi ogwa mbwuru wu aagwolo nde mu esala esee. **5** Wu aakasa bimpa ka kughu obagha muburu wu a ba baakalughulu o, kala ti nde ka si bimpa bwunu a bu oli mikyene mi bimpa o. **6** Mukunu manseghe wu aakamono mpara mu osala nseghe faana okala wu a nsomo mu obagha kaba li nde lili bimburu. **7** Baghala mandagha ma ndyele me we ya Mfumu sa agwa we mayele mu mandagha mwohonon. **8** Libili mweẽ mu Yiisu-Kriste wu aasighili nja kara li ba bákpí, ya wu aapala mu musyi a dzumu li Dabvide, ti bwunu a bu ookalyele Nsia yi Mbwe yi aakantsala me. **9** Mu nkooro a yo me ndi mu okakuru mukolo mu mpara yi ndi mu okamono me, ya me ndi munsu boloko ti anga ntwumu. Lo ndagha a Nzaami ka yili munsu boloko o. **10** Me mu obo me aakankuru mukolo mu mandagha mwohonon mu nkooro a babo ba ósuolo Nzaami, mpaala boho si babagha obvwughu ku oli mu Yiisu-Kriste, ya nsia yi a mibvu ya mibvu. (aiōnios g166) **11** Ndagha yi yili yi a nganma: «Kala ti bihi liikpi ya nde, bihi si sa likala mweẽ emō ya nde, **12** kala ti bihi lisi mukama, bihi si sa litumu si ya nde, kala ti bihi libihi nde, ndehe si sa abihi bihi, **13** kala ti bihi ligwene a kana, nde li wu bafaana osa kana mu nde, mu kuulu nde ka kughu otunu ndeme o.»

14 Mamo me mandagha ma faana we okalibili bo mweë, gyehe bo ña nkulu a Nzaami ti babara mimbañana mu bitsuo biili ka bili a esala o, kala ti ka yini obiyi ba baakagyughu mimbañana mimye o. **15** Sa mpini mu omorjono ña nkulu a Nzaami ti anga mbwuru wu aakagwa Nzaami esee, musala wuulu ka li a budzwa mu esala e nde o, ya wu aakaluo Ndagha yi a engañma mu bunsumu. **16** Lo we ka somo mu mbiili a baara yi a mukañana o, yiili ka yifaana ya kana o. Baara ba bali a bipfu bibye sa bakagye linkulu kunsu bubi bu bubvulu matala mwohonon. **17** Maluo mabo mali ti anga eborjo ki eekanyaã. Imene ya Filete bali mu mutala a baara babo. **18** Bo baamara mu nzili yi a engañma, bu baakalyele ti osighili mu lipfu áyi óluru ya bo baakabwihi kana li ndaama a baara. **19** Lo bitsini bi bibagha bibi mpini bi ootwuu Nzaami bili nkini ya mpini. Mu bye bási binyeme mu mandagha ma: Mfumu gyahaba ba bali baara ba nde ya: Nyaã nswe wu aatañana nkwumu a Mfumu akala la ya ogwene a bunsumu! **20** Ankoho munsu nzo yi nene ka ookakala yini a mandorjo mama oore ya mama ngele o, lo oli si a mandorjo ma bágyighili mu miti ya mama mu mubweë. Mama nsomo me ma baakasalala mu bitsughu bibi byiri, mamake ma baakasalala nswe etsughu. **21** Mu obo, kala ti mbwuru kala wu a tse-tse bu akaghaba ya mandagha mwohonon ma mabi ma aandyele me, nde sa akala ti anga elogho ki baakasalala mu budziri, elogho ki báseme, ki eli mupfunu kundaa mfumu a nde, ki bakughu osalala mu nswe esala ki ebwe. **22** Aakabara enzyi-a-nzyi kii bufulu ya aakanama bunsumu, kana, dzyi, edzuunu emõ ya babo ba baakasamana Mfumu mu mukolo wu a tse-tse. **23** Aakabihi minsohobo mimi bwunu ya mimi buwulu. We gyaghaba ti mye miikaburu mimbañana. **24** Mu kuulu musala a Mfumu ka faana okabañana o. Nde faana okakala a dzyi mu baara bwohonon, nde faana osoolo oluo ya okuru mukolo ña nkulu a baara baala ka bali bitsimi bimo ya nde o. **25** Nde faana okasyeme mu edzuunu babo ba baala ka bali a bitsimi bimo ya nde o, nkini-a-nki Nzaami kughu osa ti bagyiñi mayele mu osoolo ligyahaba lili ngañma, **26** ya mu oyabvughuru mu bitsimi bi bo bi bibwe mpaala bapala mu myere mi dyabulu wu aasyimi bo, mu kuulu bakasalala waa li nde.

3 Gyahaba ti mu bitsughu bibi masini, matala mama mpara sa makala. **2** Mu kuulu baara sa bakala banga a bi, banga a ntono a nzi, banga a masyighi, banga a ligwagha, ba baakatsaala Nzaami, ba baakabihi litumu li biburu bi bo, ba baakabihi okihi bubwe bu baasi bo ya ba bagwene a budziri mu bibi ngili, **3** banga a mikolo ngyi, ba bagwene a nyii, banga a makuhu, ba baagwene okaleene okuru nyuru, banga a dzighi, mitaara mi mandagha ma mabwe, **4** ba baakatyeghe banganda, banga a mankehe, ba ódzwi ligwagha mihi, ba baakadzyi bisee bi nyuru ku obvulu Nzaami. **5** Bo sa bakala a efa ki eemorjono ti kii enzaami, lo bo sa batunu lileene li Nzaami. Kala la ya baara babo. **6** Mu kuulu, ndaama a baara mu bo yili mu okabulusomo mu mayele mu manzo mu osa kunsu litumu li bo bakaha ba bali a kana li lisala, baala ya leme li masumu ya enzyi-a-nzyi. **7** Matala mwohonon bo bali mu okagyighi, lo ka bali mu okasoolo ligyahaba lili engañma o. **8** Bwunu a bu áli otemene Dzanese ya Dzamberese Moyidze ngangala mu matala ma makulu, bwunu obo si baara babo bali mu okatemene engañma ngangala. Bo bali a mayele ma magwimi ya kana li bo ka lili mubwughu o. **9** Lo bo ka baagye la o, mu kuulu baara bwohonon sa basoolo buwulu bu bo, bwunu a bu áli basoolo buwulu bu Dzanese ya Dzamberese. **10** Lo we Timote aagyighili onama maluo ma me, nzya-nzyara a me, bitsimi bi aankuru me, kana li me, okuru mukolo a me mu okebe, dzyi li me, mukama a me, **11** makimini ya mpara a me. We soolo mandagha mwohonon ma maabwi mu me ku mabvulu mama Antyose, Ikonyome ya Lisitere, ya nki kimini me aamono. Lo Mfumu aakwulu me mu kimini lwohonon. **12** Mu obo, baara bwohonon ba badzyi okala a laama li lili bunsumu mu Nzaami mu bumõ ya Yiiisu-Kriste sa bamwehë bo kimini. **13** Lo baara ba babi ya baara banga a mpya sa bakagye linkulu kunsu bubi. Bo sa bapfiri babake, lo baara sa bapfiri boho si. **14** Lo we ngu wuulu kwara mu mpini mandagha ma aagyighi we ya ma aakihi we mu mukolo mumõ. We soolo nande aaluo we mo. **15** Obaana bugye bu we, we soolo Bisono bibi Ngili. Bye bikughu ogwa we munzeele wu aakabiri ku obvwughu mu nzili a kana mu Yiiisu-Kriste. **16** Bisono byehene Nzaami aagwi mayele mu osonon bye ya Bisono byehene bili a mupfunu mu oluo, mu obihhi maluo mama mpya, mu osyeme bubi

ya mu ogwa luo mu bunsumu bu ookaluomo Nzaami. **17** Mpaala mbwuru a Nzaami akala mukughu ya wu li a bi bifaana mu osa bigyighili byehene bi bibwe.

4 Nja nkulu a Nzaami ya nja nkulu a Yiisu-Kriste wu akala aalamana baba mwee ya ba bakpi, ya mu nkulumu a Kriste wu akala aamogono kunsu a empu e nde, me ngwi we litumu li: **2** Aakatsala nsia a Ndagha a Nzaami, aakasa epini mu okaluo yo matala mwohono, ngu okala mu matala ma mabwe bwunu we ma mabi, aakabihi maluo ma mabi, aakasyeme, nja aakaluo aakagwa mpama kunsu okuru mukolo mu okebe. **3** Mu kuulu, matala sa magya maala baara ka bafiridzyi ogyughu maluo mama nsumu o. Lo bwunu a bu badzyi bo, bo sa basagha okala a baluo balagha ba akala baakabululyele bo mandagha ma badzyi bo okagyughu. **4** Bo sa babihi okagyughu maluo mama enganma, sa bagwunumu mu okabulugyughu masaba. **5** Lo we, aakakala a nzya-nzyara yi faana ya yi budziri mu mandagha mwohono, aakakuru mukolo nja nkulu a mpara, aakatsala nsia a Nsia yi Mbwe, aakasala esala e we kii muluo kuu mukughu. **6** Mu kuulu, mu mi mitala me, matala ma aangye me maato, mu kuulu batsala makili ma me ti anga mukaba. **7** Me aandzwana mvulu yi mbwe, me aamana obara ntyini, me aankebe kana. **8** Obaana matala ma, Nzaami aalwunu me muburu wu a bunsumu. Mu etsughu ekye, Mfumu, nsughu a lamana wu a nsumu, sa agwa me nde, ya ka yini a kundaa me aagwa nde o, lo si kundaa baara bwohono ba bali mu okakebe ya dzyi omonono o nde. **9** Sa mpini mu obaayamono me. **10** Mu kuulu, mu nkooro a dzyi li bilogho bi nsie yi, Demase aabulunyaghala me ya aagyene ku bvulu lili Tesalonike. Lo Keresense aagyene ku etsulu e nsie kii Ngalati, ya Tite ku etsulu e nsie kii Dalamati. (aion g165) **11** Yini a Luk li ya me. Gwolo Mareke ya ligya ya nde, nde li mupfunu mu esala e me. **12** Me aangweghe Tisyike ku bvulu lili Efedze. **13** Nja akala aagya we, gya a me enkuru e me ki ela kii kobo ki ali ansihi me kundaa Karapose ku bvulu lili Torowase. Yabiri si mikaana, emvulu-ngughu mikaana mi basono mu bibaana bi banyama. **14** Alesandere muntsulu bisyee aamwehe me mpara yi alagha. Mfumu sa abvurulu nde bwunu a bu oli bigyighili bi nde. **15** Wehe si, sa mayele mu nde, mu kuulu nde aatemene maluo ma

bihi ngangala mu ebaghala. **16** Mu matala ma aakankala me nyuru a me nja nkulu a bansughu-a-lamana mu sa lili nsomo, me aandi ngasighi. Baara bwohono baanyaghala me. Nzaami anyaa osyeme bo mu ndagha oyo! **17** Mfumu ndeme aabaha me ya aagwi me mpini mpaala mu me Nsia yitsanama mu eteese kii mukughu, ya mpaala ba baala ka bali ba-Dzwife o bagyughu yo. Ya nde aakwulu me nja munjama a nkoho! **18** Mfumu sa akwulu me mu mandagha mwohono ma mabi ya nde sa abvwuhu me mu nkooro a Emfumu e nde kii mayulu. Nyaã nsia yikala kundaa nde mu mibvu ya mibvu! Aamene! (aion g165) **19** Gwa Pirisika ya Akila mamboro, gwa nzo a Onesifore mboro. **20** Erasete aabulusyili ku bvulu lili Korente ya me aabulunsihi Torofime mubyele ku bvulu lili Mile. **21** Sa mpini mu ogya nsomo lito mu ndo yi a mpie yi alagha. Ebulose, Pudense, Linuse, Kolodya, ya bandughu mu kana bwohono bagwi we mamboro. **22** Nyaã Mfumu akala ya mufulu a we! Nyaã bwehe bu Nzaami bukala ya be!

Tite

1 Me Poole, me ndi musala a Nzaami, ntumu a Yiiisu-Kriste. Nzaami ásuolo me mu obiri ku kana babo ba ásuolo nde. Nde áagwi me litumu mu osa kuulu ti bo basoolo enganyma ki eli bwunu a bu oli enzaami. **2** Mu obo, mu Nzaami bo bakughu osa emiini mu laama lili mibvu ya mibvu. Nzaami wuulu ka aakapfiri o ásiini a bihi laama lilo nsomo Nde agyighili nsie. (aiōnios g166) **3** Mu matala ma ákuru nde, Nzaami wu li mubvwuhu a bihi ályele ndagha a nde mu nsia yi ágwi nde me, ya yi átuumu nde me okabulutsala. **4** Me nsono mukaana wu kundaa we Tite, nkara a mwana a me mu kana li liikabvughu bihi a we: Nyaá bwehe ya edzuunu bi bifi kundaa Nzaami Taara ya kundaa Yiiisu-Kriste Mubvwuhu a bihi, bikala ya we! **5** Kala ti me aansihie we mu etsulu e nsie kii elyi kii Kerete mu kuulu we mana ogyighili mandagha ma maasyili ya we twulu bakwuru ba libwunu mu nswe bvulu, ti bwunu a bu a aantumu me we. **6** Mukwuru a libwunu faana okala mbwuru wu gwene a ndagha yi baasyeme nde, akala mulumu a mukaha yini a mutsyini, wu li a baana ba bali banga-a-kana. Baana ba nde ka bafaana ofwunu bo mu mi mitala enkwunu o, bo ka bafaana okala ba baakabihi litumu o. **7** Mu kuulu, mukwuru a libwunu faana okala mbwuru wu gwene a ndagha yi baasyeme nde. Mu obo, mu nkooro a leme li esala e Nzaami ki ali a nde, nde ka faana okala nga-a-liwagha o, ngu okala nga-a-mankehe, enkolo-mala, nga-a-nzuṅṅu, bwunu we wu aakadzyi busini bu baakabagha mu manzili ma mabi. **8** Lo nde faana okala mbwuru wu aakagyagha banzyi ku obwe, mbwuru wu akadzyi okasa mandagha ma mabwe, mbwuru wu budziri, wu bunsumu, wu a ngili, wu aakakuru nyuru a nde bubwe. **9** Mu omana, nde faana okala mbwuru wu aakasa kana mu ndagha a Nzaami yi a nganyma, bwunu a bu baaluo nde yo mpaala agwa babamo mpama mu maluo mama ngili ya okuru baluo baba mpya muṅṅma. **10** Mu kuulu, oli a baara balagha ba bali mu okabihi litumu, ba baakabulupfiri bana mu mbiili a bo yigwene a mupfunu ya yi a mpya, ṅa kara li bo emvulu-ngughu ba-Dzwife. **11** We faana okuru bo muṅṅma. Mu kuulu bo bali mu okabwihie kana li baara bwohono mu madzumu, bu bali mu okabululuo mandagha maala ka

bafaana oluo mo o, mpaala babagha ndaana yi baakabagha mu manzili ma mabi. **12** Mumō ṅa kara li bo, mubighili a bomo, ályele ti: Basi-kerete bali banga-a-mpya matala mwohono, baara ba bali ti anga banyama ba babi, banga-a-elyili ba bali babolo. **13** Bumpughulu bu buli bubu nganyma. Me mu obo we faana osyeme bo mu ebaghala mpaala bo bakala baba nsumu mu kana, **14** ya banyaá onama masaba ma ba-Dzwife ya mikele mi baara ba baakabihi osalala enganyma. **15** Mandagha mwohono mali mama tse-tse kundaa baara ba bali tse-tse. Lo kundaa babo ba basugumu ya ba bagwene a kana elogho si emō ka eli kii tse-tse o, mu kuulu mayele ma bo ya bitsimi bi bo bili bibi sugumu. **16** Bo baakalyele ti bo basoolo Nzaami, lo bigyighili bi bo biikasuo ti bo ka basoolo nde o. Bo bali baara baba nkara a bubi, ba baakabihi litumu ya baala ka bakughu ogyighili ndagha si mō yi mbwe o.

2 Lo we me wuulu aakaluo mandagha ma mafaana ya maluo mama nsumu. **2** Aakaluo biṅmini bi babaghala mu okala a nzya-nzyara yi faana ya yi a budziri. Bo bafaana okala baara baba nsumu mu kana, mu dzyi ya mu mukama. **3** Aakaluo si biṅmini bi bakaha, bi básuolo ya bátwulu mu libee mu osalala Nzaami, bikakala a nzya-nzyara yi faana. Bo banyaá okala banga a makuhu, bankana ba bviini. Nyaá bo bakaluo mandagha ma mabwe, **4** mpaala bo bakagyihie batughu bu baakadzyi balumu ya baana babo, **5** bu bakughu okakala a nzya-nzyara yi a budziri, bu bakughu okala baba tse-tse ya okasala bisala bi manzo ma bo bu ofaana, mu okala bakaha ba babwe, ba baakakihie litumu li balumu ba bo, mpaala banyaá okatsaala ndagha a Nzaami. **6** Aakagwa si bampala mpama, bakakala a nzya-nzyara yi budziri. **7** Mu mandagha mamō mwohono, we faana okala efaana ki ebwe mu bigyighili bi bibwe, ya maluo mama tse-tse, mama budziri, **8** mbiili yi bunsumu yiili baara ka bakughu obili bubi mu mo o, mpaala mutaara akpa budzwa ya agwene a ndagha yi mbi yi aalyele mu bihi. **9** Nyaá ti bankana bakakihie litumu li bamfumu ba bo ya bakasa myehene mu okala baara ba babwe ṅa nkulu a bo. Bo bafaana okasa mpini mu okala baara ba babwe ṅa nkulu a bamfumu ba bo ya banyaá okatemene a bitsimi bi bamfumu ba bo nsumu. **10** Bo banyaá okaturu bilogho bi bamfumu ba bo, lo bakakala baara baala bakughu osa kana mu bo, mu ogwa maluo

ma Nzaami budziri, nde wu li mubvwuhu a bihi. **11** Mu kuulu Nzaami aasuo bwehe bu nde mu obvwughu o baara bwohono. **12** Bwehe bubo buli mu okaluo bihi mu obihi bumweē bu bubi ya bisee bi nsie yi, mpaala likala a nzya-nzyara yi budziri, yi bunsumu ya yi a enzaami. (aiōn g165) **13** Me obo bihi lifaana okebe etsughu ki esee ki lili mu okasa bihi emiini ya omojono o nsia a Nzaami a bihi wu Munene ya Mubvwuhu, Yiisu-Kriste. **14** Nde ndeme ágwi bumweē bu nde mu nkooro a bihi mpaala nde akwulu bihi mu bubi bwohono ya atsehebe ekaana ki eekala kii ndaa nde, ki eekala a mbaa mu okasa bigyighili bi bibwe. **15** Obo me bu faana obili we, ogwa mpama, osyeme ya litumu lwohono. Mbwuru si mumō anyaa otsaala we!

3 Aakalibili banga-a-kana mweē ti bo bafaana okakihi litumu li bamfumu ba nsie ya lili ba baakatumu, bakakala a bintamana ya bakakala baba mukughu mu bigyighili byehene bi bibwe. **2** Bo banyaā okakuhi baara, bakala banga-a-edzuunu, ba baakatwu eyiē ŋa kara li baara, ya bo bakasuo nzya-nzyara yi edzuunu matala mwohono kundaa baara bwohono. **3** Mu kuulu, mu matala ma makulu bihi-a-be si líli baara ba bagwene a mayele, baara baala ka bákakihi litumu li Nzaami o, ba bádzimini nzili, bankana ba nzala ya bisee bibi mawa-mawa. Bumweē bu bihi búli kunsu bubi ya bihi lílwlulu mu nsu-nsughu a mukolo, baara bákabele bihi ya bihi a bihi líkabele babake. **4** Lo mu matala ma omojono mu baara, bubwe bu Nzaami Mubvwuhu a bihi-a-be, ya dzyi li nde, **5** -Ka mu kuulu ti bihi liisi bigyighili bibi bunsumu o, lo mu nkooro a nyiī yi aakamono nde bihi- nde aabvwuhu bihi bu asuagha bihi mu libogho lili mbu-mburu yi nyaghara ya yi a Mufulu a Ngili. **6** Mufulu a Ngili wu, Nzaami aagyirili bihi nde ku olagha mu nzili a Yiisu-Kriste mubvwuhu a bihi, **7** mpaala, mu bwehe bu nde Nzaami asa bihi baba nsumu, ya ba baagwolo pfa ti bwunu a bu oli emiini kii laama lili mibvu ya mibvu. (aiōnios g166) **8** Ndagha yi yili yi a nganma, ya me ndzyi ti we sa epini mu okaluo yo mpaala ba baasi kana li bo mu Nzaami, basa mukolo a bo mu okala a bigyighili bi bibvulu bubwe. Obo oli bubwe ya mubwughu kundaa baara bwohono. **9** Lo we faana obihi munsohobo mu mandagha ma magwene a mupfunu, mu mi mitala mankwumu ma bankagha-kwuru, mu

mimbanana, mu munsohobo mu mikyene. Mu kuulu mandagha mwohono mamo mali mama bwunu ya ma magwene a mupfunu. **10** Mbwuru wu aakasa munkabala, we faana ogyehe nde sa lili nsomo ya lili gyolo, ya ŋa nseele, kala ti nde ka gyughu o, paha nde mu libwunu. **11** We soolo ti mbwuru wu obo aadzimini nzili ya li mu okasa masumu. Nde li mu okagwa nyuru a ndeme ebili. **12** Mu matala ma akala aangweghe me we Aratemase bwunu we Tisyike, we faana ogya ku ndi me ku bvulu lili Nikopolise. Mu kuulu me aangwolo munkaana wu oluhu ndo yi a mpie yi alagha oko. **13** We faana ogyighili obaha Dzenase wu gyighili osoolo mikyene ya Apolose mu bilogho bi bali a bo nzala a bye mu midzye, mpaala banyaā ogwene a elogho. **14** Baara ba bihi-a-be si bafaana okagyighi bigyighili bibi nkara a bubwe, mpaala baleene okabaha ba baakakala a nzala a libaha mu bilogho bibi mupfunu, mu kuulu banyaā okala ba bagwene a bimburu. **15** Baara bwohono ba bali ya me bagwi we mamboro. Gwa mamboro kundaa babo ba bali bandughu ba bihi mu kana. Nyaā bwehe bu Nzaami bukala ya be bwohono!

Filemō

1 Me Poole wu ndi mu boloko mu nkooro a Yiiisu-Kriste, ya Timote ndughu a me mu kana, lisono mukaana wu kundaa we Filemō, ndughu a bihi wu a dzyi mu esala. **2** Bihi ligweghe si mukaana wu kundaa nkele a bihi Apya, kundaa Aresyipe ndughu a bihi wu mamvulu, ya kundaa libwunu li Nzaami li lili mu nzo a we. **3** Nyaā bwehe ya edzuunu bi bifi kundaa Nzaami Taara a bihi ya kundaa Mfumu Yiiisu-Kriste bikala ya be! **4** Matala mwohonono ma aakansamana me mu we, me aakambvurulu matuono kundaa Nzaami a me, **5** mu kuulu me ndi mu okagyughu bu bali mu okabili mu dzyi li li a we mu baana ba Nzaami bwohonono ya mu kana li we mu Mfumu Yiiisu. **6** Me aakansamana Nzaami ti kana lili a we emō ya bihi likala a mpini, mpaala we gyighili obaghala mandagha ma mabwe ma lili a mo mu Kriste. **7** Ndughu a me mu kana, dzyi li li a we liigwi me esee ya bukyini, mu kuulu mu we mikolo mi baana ba Nzaami miibagha edzuunu. **8** Me mu obo, ngu okala ti mu Kriste me ndi bunya-nyaā mu otumu we ndagha yifaana ogyighili, **9** lo me nduomo we ndagha mō mu nkhwumu a dzyi li bihi a we, me Poole, ejmini ya mbwuru a boloko si mu matala ma mu nkooro a Yiiisu-Kriste. **10** Me mbuono we mu obwana a Onesime, mwana a me mu matala ma ndi me mu boloko. **11** Mu matala ma maaluru, nde ka ákakala a mupfunu kundaa we o, lo mu matala ma nde li a mupfunu kundaa we ya kundaa me. **12** Me mbvurulu nde kundaa we, nde wu li ti anga mukolo a me. **13** Me áakandzyi ti nde asyili ŋa bele a me, mpaala nde asalala me ŋa ebini e we mu matala mwohonono ma ankala me mu boloko mu nkooro a Nsia yi Mbwe. **14** Lo me ka ndzyi ogyighili ndagha si mō o kala ti we ka gwi me muswa o, mpaala ndagha yi mbwe yi aasa we mu me yinyaā okala yi ti anga yi okwighi, lo yo yikala yi aasa we mu dzyi li weme. **15** Mu kuulu, okughu okala ti Onesime mu mana matala ákaghaba ya we, mpaala we firikala ya nde mu matala mwohonono. (aiōnios g166) **16** Mu kuulu mu matala ma, nde ka aafirisyili yini a nkana o, lo nde bvulu nkana mu mupfunu, ti anga ndughu mu kana wu a dzyi. Me ndzyi nde ku olagha, ya we sa bvuludzyi nde ku olagha mu kuulu nde li mbwuru ya ndughu mu kana mu

Mfumu. **17** Mu obo, kala we aakamono ti me ndi ndughu a we, bwana a nde ti anga me we li mu okabwana a nde. **18** Kala ti nde aasi we ndagha yimbi, ya kala ti nde li a ebyimi e we, twulu kye mu nkhwumu a me. **19** Me Poole nsono ndagha yi mu kwogho e meme: Meme sa mfiri ebyimi e we. Me ka ndi a nzala a olyele o ti wehe si li a ebyimi e me, ebyimi ekye me bumweē bu weme. **20** Eē, ndughu a me mu kana, gyighili me ndagha oyo mu nkooro a Mfumu, sa kuulu ti mukolo a me akala kunsu edzuunu mu Kriste. **21** Me nsono we mukaana wu mu kuulu me ndi a emiini mu bintamana bi we, bu nsoolo ti we sa gyighili mandagha ma maluru ya ma aantumu me we. **22** Me firinduomo we mu ogyighili me ebini kii ogyojomo, mu kuulu me ndi a emiini ti Nzaami sa agwa mvuru mu nsamana a be, ya nde sa abvurulu me kundaa be. **23** Epafarase, ndughu a me wu a boloko mu nkooro a Yiiisu-Kriste, gwi we mboro. **24** Bandughu ba me baba esala: Mareke, Arisitareke, Demase ya Luk bagwi we mamboro. **25** Nyaā bwehe bu Mfumu a bihi Yiiisu-Kriste bukala ya be!

Ba-Eebere

1 Mu matala ma makulu, Nzaami ábili mu bifaana bilagha ya mu mansa malagha kundaa bankagha-kwuru mu mibighili. **2** Lo mu bitsughu bibi masini bi, nde aabili kundaa bihi-a-be mu Mwana, wu aatwulu nde mu ogwolo mapfa ma bilogho byehene. Me mu ndehe si nde ágyighili byehene bi bili. (aiōn g165) **3** Mwana wu, wu li osehene o nsia a Nzaami, ya wu li omorono kuu bu ali nde, aakasughu byehene mankaana mu ndagha a nde yi a lileene. Bu amana otsehebe baara banga a masumu, nde aabwi-nsini ku kwogho kii babaghala kii nsia mu mayulu. **4** Mwana bu abvulu bangye-yulu, nde ágwolo pfa li nkulumu yibvulu bunene ya nkulumu yi a ndaa-bo. **5** Mu kuulu, kundaa nki ngye-yulu Nzaami ámaalyele ti: «We li Mwana a me wu baghala, lolo li me aamburu we?» Bwunu we ti: «Me sa nkala taara a nde Ya nde sa akala Mwana a me wu baghala?» **6** Lo mu matala ma ágweghe nde mwana a nde wu a nsomo mu nsie, nde ályele ti: «Nyaá bangye-yulu ba Nzaami bwohono bakunu mabuo ŋa nkulu a nde!» **7** Mu bangye-yulu, nde ályele bu: «Nde aakasa ti bangye-yulu ba nde bakala mifulu, Ya ti, basala ba nde bakala mile mi mbaa.» **8** Lo mu Mwana, nde ályele ti: «A Nzaami, likubu li we lili lili mibvu ya mibvu! Ya mukaana a emfumu e we li mukaana wu bunsumu. (aiōn g165) **9** We aadzyi bunsumu ya we aabele bubi, Me mu obo Nzaami, Nzaami a we, áseme we Bu agyiri ŋa yulu a mutswi a we maala mama esee Nde aabvulusuo dzyi mu we ti bambaala ba we.» **10** Ya nde áfirilyele ti: «Mfumu, ku ebaana, me we áagyigili nsie, Ya mayulu mali bigyighili bi myaá mi we. **11** Byehene bibye sa bidzimini, lo we sa kala bwunu a bu li, Byehene sa birimini ti anga binkuru, **12** Ya we sa fughuru bye ti anga bu baakafughuru enkuru ki ela ki baakalaha ŋa yulu, Ya sa basobo bye ti anga bu baakasobo enkuru, Lo we, we li wunu munde ya we sa kala mu matala mwohono.» **13** Kundaa nki ngye-yulu Nzaami ámaalyele ti: «Bwa-nsini ku kwogho e me kii babaghala, Tee mu matala ma aansa me ti mitaara mi we mikala nkara a myili mi we?» **14** Bangye-yulu bwohono ka bali mifulu mi miikasalala Nzaami o, ya mi bágweghe mu osalala ba bafaana obagha pfa lili obvwughu?

2 Me mu obo, bihi-a-be lifaana osa mukolo mu nsia yi liigyughu kala ti ka lidzyi ogwujumu o. **2** Mu kuulu, kala ti ndagha yi ólyele bangye-yulu yíkeelee, ya kala ti bo bwohono ba bátsumunu mangili ya ba bási nkyini bábagha mufuru wu a faana, **3** bunu bihi likughu obvwughu, kala ti liikameŋene obvwughu ku onene kuu bubo, yi óbaana oluo Mfumu, yi ólyele bihi babo ba báguyughu yo ti yili yi a nganma? **4** Ya Nzaami si ányeme bumpughulu bu bo mu bilyimi ya bimaá, mu bigyighili bi mpaana bibi mawa-mawa, ya mu bikaba bi Mufulu a Ngili bi ákaba nde, ti bwunu a bu oli waa li nde. **5** Buulu ka kundaa bangye-yulu Nzaami ágwi litumu li nsie yi akala aagya o, yi lili mu okabili bihi-a-be. **6** Lo bumpughulu bu ndagha oyo buli mu Bisoŋo bi biikalyele ti: Mbwuru nande ali, mu kuulu we libili mweé mu nde? Bwunu we mwana a mbwuru nande ali, mu kuulu we tsimini nde? **7** We áatwulu nde ku nsie a bangye-yulu mu mana matala, We áalaha nde kaghalili nsia ya lili budziri, **8** We áatwulu bilogho byehene ŋa nsie a myili mi nde. Mu kuulu, Nzaami bu átwulu bilogho byehene kunsá litumu li nde, nde ka ányaá elogho si etsyini ki ekughu obihi litumu li nde o. Ya mu matala ma, bihi-a-be nkini liimono o ti byehene bili kunsá litumu li nde. **9** Lo bihi liikamono ti Yiisu, munde wu bátwulu mu mana matala ku nsie a bangye-yulu, mu nkooro a bu amono mpara yi a lipfu, aalaha kagha lili nsia ya lili budziri. Mu kuulu, mu bwehe bu Nzaami, nde ákpi mu nkooro a baara bwohono. **10** Mu kuulu, ali ofaana kundaa Nzaami wu aagyighili byehene ya aakakebe bye mu osa kuulu ti mu mpara yi ómono Yiisu, Yiisu akala wu aakughu mpaala abiri baana balagha mu osomo mu nsia a nde. Mu kuulu me Yiisu aakabiri bo ku obvwughu. **11** Mu kuulu wu aakatsehebe baara ya ba bábatsehebe, bo bwohono Taara mumō. Me mu obo nde ka kughu omono budzwa o mu ota bo ti baana ba bataara a nde, **12** ŋa alyele nde ti: Me sa ndyele nkulumu a we kundaa baana ba taara a me, Me sa nsyighi we ŋa kara li emvujunu. **13** Ya ábwehe ti: Me sa nsa emiini ki elagha mu nde. Ya áfirilyele ti: Me ndindi, me ya baana ba oogwi me Nzaami. **14** Mu obo, buulu baana bali baara baba makili ya nyuru mō, bwunu obo si Yiisu ágwolo nyuru yi obo, mpaala mu lipfu li nde, nde amana mpini a dyabulu, munde wu áali ya litumu mu lipfu, **15** ya okwulu

babo ba báli kunsá bunkana mu bumweē bu bo bwohono mu nkooro a nzalamweē a lipfu. **16** Mu kuulu Yíisu ka ágyi mu oyabaha bangye-yulu o, lo mu oyabaha baara baba musyi a dzumu li Abarahame. **17** Me mu obo, nde áli faana okala ti baana ba taara a nde mu myehene, mpaala akala mukwuru a bangaa ba Nzaami nga-a-nyĩ ya wu bakughu osa kana mu nde mu esala e Nzaami, mu omaha masumu ma baara. **18** Mu kuulu, nde ndeme ámono mpara mu bigyelee, nde kughu obaha babo ba baakasomo kunsá bigyelee.

3 Me mu obo, bandughu mu kana baba ngili, be ba lili emō mu mbili a Nzaami, litaha mihi kundaa Yíisu, munde wu lisoolo ti li ntumu ya mukwuru a bangaa ba Nzaami, me mu nde bihi liikasa kana. **2** Nzaami ásuolo nde mu osa esala ya nde ásala kye mu bunsumu, ti bwunu a bu óli Moyidze mu nzo a nde yohono. **3** Mu kuulu, nsia a nde yibvulu bunene ya yi a Moyidze. Mutwu-manzo aakabvulu a nsia ya nzo yomo. **4** Nswe nzo yili a wu aakatwu yo, lo wu aakatwu byehene ngu Nzaami. **5** Mu mi mitala Moyidze nde áli mbwuru wu bakughu osa kana mu nzo a nde yohono ti anga musala mpaala akala mpughulu mu mandagha ma bákalyele. **6** Lo Kriste li bunsumu ti anga mwana wu oogwi Taara litumu mu nzo. Bihi-a-be lili nzo a nde kala ti bihi-a-be lisi kana lili mukughu ya emiini bi lili a bye mutwunu. **7** Me mu obo, ti anga bu ookalyele Mufulu a Ngili: «Lolo li, kala ti be ligyughu likyi li nde, **8** Ka likala a mikolo ngyi o, ti anga mu matala ma líbihi be osa litumu li Nzaami, Mu etsughu ki lígyeele be nde ku syehe, **9** Jaala bankagha-kwuru ba be bágyeele me mu omono bu aansa me, Ya bo bámono bigyighili bi me **10** Mu mibvu makwumu mana. Me mu obo me ánkolo eseene ekye nkehe Ya me ándyele ti: “Mikolo mi bo miikagwunumu matala mwohono, Ya bo ka baasoolo manzili ma me o.” **11** Mu obo, kunsá nkehe a me, me áandaba mukihi ti: Si okala ka bunu, bo ka basomo mu ebini kii ogwumu ki angyighili me bo ol!» **12** Bandughu mu kana, lisa mayele, mbwuru si mumō mu be anyaa okala a mukolo mubi wu gwene a kana ya wu aatyeghe Nzaami wu a mweē ebughu. **13** Lo nswe etsughu, liikagwa be a be bukyini, mu matala mwohono ma bakughu oleye ti «Lolo li», mpaala mbwuru si mumō mu be anyaa

osa mutswi mpini mu nkooro a emfiri-a-mfiri ki masumu. **14** Mu kuulu, bihi-a-be lili emō ya Kriste, kala ti ligyighili onama nde tee ku masini ti bu líbaana. **15** Bwunu a bu bályele ti: Lolo li, kala ti be ligyughu likyi li nde, Ka likala a mikolo ngyi o, ti anga mu matala ma líbihi be osa litumu li Nzaami. **16** Mu kuulu, ba na báabihi osa litumu li Nzaami nga mbihi a nga bágyughu bo nde? Ka oli bo bwohono ba bápala mu Edzipite kunsá litumu li Moyidze o? **17** Ya kundaa ba na Nzaami ákolo nkehe mu mibvu makwumu mana? Ka oli kundaa babo ba bási masumu, babo ba bákpi ku syehe o? **18** Ya kundaa ba na nde álabá mukihi ti bo ka basomo mu ebini e nde kii ogwumu o? Ka oli babo ba bási nkyini o? **19** Ya bihi lili mu omono ti bo bákuono osomo omo mu nkooro a ku bábihi osa kana.

4 Matala maala misiini mimi osomo mu ebini kii ogwumu o nde nkini mali, lisa mayele, mu kuulu mbwuru si mumō mu be anyaa omonono ti nde aakuono osomo omo. **2** Mu kuulu báluo bihi nsia yi mbwe ti anga bu báluo bankagha-kwuru si. Lo ndagha yi bágyughu bo, bo ka bábagha ndaana mu yo o, mu kuulu bo ka báli emō mu kana ya babo ba bágyughu yo o. **3** Bihi-a-be ba liikasa kana liikasomo mu ebini kii ogwumu, bwunu a bu ályele nde ti: Kunsá nkehe a me, me aandaba mukihi ti: Si okala ka bunu, bo ka basomo mu ebini e me kii ogwumu o! Bigyighili bi nde, bámana ogyighili bye obaana ku ebaana e nsie. **4** Buulu, mu mi mitala etsughu kii nsáama, bályele mu Bisono ti: Ya mu etsughu kii nsáama Nzaami ágwumu mu bisala bi nde byehene. **5** Ya mu Bisono byini bibye, nde áfirilyele ndiri: Si okala ka bunu, bo ka basomo mu ebini e me kii ogwumu o me o! **6** Mu obo, ba bágyughu nsia yi mbwe nsomo ka básomo mu ebini kii ogwumu ekye o mu nkooro a bu bágwene a bintamana, ankoho babake bakughu nkini osomo omo. **7** Nde áfirikuru etsughu, ki aakata ti «lolo li». Matala malagha bu maluru, nde ályele mu murjma a Dabvide mu nkooro a etsughu ekye, ti bu bátswama oleyele nsomo ti: Lolo li, kala ti be ligyughu likyi li nde, Ka likala a mikolo ngyi o. **8** Mu kuulu, kala ti Dzodzuwe ásohobo bo mu ebini kii ogwumu, nkini ali nga mbihi oŋo, Nzaami ka ákaafiribili mu etsughu ekimi o. **9** Mu obo oli a ogwumu kuu etsughu kii Sabate, ogwumu oko ku bábunu

mu baara ba Nzaami. **10** Mu kuulu, munde wu áasomo mu ogwumu, ndehe si aasomo mu ogwumu mu bisala bi nde ti bwunu a bu ógwumu Nzaami mu bisala bi nde. **11** Mu obo, litswe lisa maswa mu osomo kunsu ogwumu oko, mpaala onyaa okala a mbwuru wu aabwa mu efaana ki babo ba bágwene a bintamana. **12** Buulu, ndagha a Nzaami yili yi a mweē, yili a lileene ya yibvulu lipee lili mampele mwolo mu oto. Yo yiikasomo ya yiikakaba muwumunu ya mufulu, yo yiikakaba mu bábvughu binama ya yo yiikakaba musojo. Yo yiikalamana mi ookadzyi mukolo ya bitsimi bi mukolo. **13** Ka oli a elogho si emō ki bágyighili ki eegwene okamojono ŋa busu bu yo o, byehene biigyighili okamojono bwunu a bu bili ŋa nkulu a yo. Ya me kundaa yo akala bihi liisuo bisala bi bihi. **14** Buulu bihi-a-be lili a mukwuru a bakwuru ba bangaa ba Nzaami, wu áabulusaghaba mayulu, Yiisu, Mwana a Nzaami, litswe likwara mu mpini bumpughulu bu kana. **15** Mu kuulu, bihi-a-be ka lili a mukwuru a bangaa ba Nzaami o wu aakwono okala emō ya bihi mu mpara a bihi. Lo mukwuru a bangaa ba Nzaami a bihi bágyeele nde mu mandagha mwohonono ti anga bu bali mu okagyele bihi bameme, lo nde ka ási masumu o. **16** Mu obo, litswe libehene mu kana lwohonono ŋa likubu li nsia a Nzaami, mpaala libagha nyii ya bwehe, ya babaha bihi-a-be mu matala ma mafaana.

5 Nswe mukwuru a bangaa ba Nzaami baakasuo nde ŋa kara li baara ya baakatwulu nde mu osalala Nzaami mu ndaana a baara. Esala e nde me mu okagwa bikaba ya mikaba mu nkooro a masumu. **2** Nde kughu obaghala babo ba bagwene osoolo ya ba baakagwumumu, buulu nde ndeme si li mbwuru. **3** Ya mu obo, nde faana ogwa mikaba mu nkooro a masumu ma ndeme ya mama baara. **4** Mbwuru mu endeme ka kughu oleye o ti nde mukwuru a bangaa ba Nzaami, nsia oyo baakagyagha yo mu mbili a Nzaami, ti anga bu ógyagha yo Aarō. **5** Bwunu obo si Kriste ndeme ka ágwolo nsia yi okala mukwuru a bangaa ba Nzaami o, nde ágyagha yo kundaa munde wu áalyele nde ti: We li mwana a me, lolo li me aamburu we. **6** Ti bwunu a bu ookalyele ndagha yinke yi: We li ngaa a Nzaami mu matala mwohonono ti bu óli Melekisedeke. (aiōn g165) **7** Me nde wuulu mu bumweē bu nde ŋa nsie, áasamana ya áapele

mu bingubu ya mansaja munde wu áakughu obvwuhu nde mu lipfu, ya nde ábagha mvuru mu nkooro a bintamana bi nde. **8** Ngu okala ti nde áli Mwana a Nzaami, nde ágyighi bintamana mu myehene mi mímwehē nde mpara. **9** Ya Nzaami ási nde akala mu kughu ya akala munde wu aakagwa obvwughu kuu mibvu ya mibvu kundaa baara bwohonono ba ba bali a bintamana mu nde. (aiōnios g166) **10** Mu kuulu Nzaami ályele ti nde mukwuru a bangaa ba Nzaami ti bu oli Melekisedeke. **11** Mu ndagha oyo, bihi lili a mandagha malagha ma liilyele, lo mambaala ma mo mali mpara, mu kuulu be ayi lili ya maleme mu obaghala mandagha. **12** Nkini be áyi baluo, lo be ofirikasagha ti mbwuru mukimi aluo be mandagha ma Nzaami, mama nkara ebaana. Be tee sonali nkini mu okajma mabiene, lo ka bi-odza bi bikubu o? **13** Nswe munde wu li nkini mu okajma mabiene ka kughu osa lisobo mu mandagha mama nsumu o, mu kuulu nde li nkini mwana wu a ŋa nzeeme. **14** Lo bi-odza bi bikubu bili bibi bakwuru, mu nsa-nsala a bo, bo bágyihini ya básoolo osa lisobo ŋa kara a mandagha ma mabwe ya ma mabi.

6 Me mu obo, litswe litaha ku maluo mama bakwuru bu lisihi ku mbihi maluo mama ebaana mu Kriste, bihi ka lifiritwu bitsini bi ndagha yi o: Ogyiŋi mayele mu onyaa bigyighili bi bíkpi ya osa kana mu Nzaami, **2** maluo mu mi mitala liboghoru ya onaā myaā ŋa yulu a mutswi, osighili o ba bákpí mu lipfu ya mumfwunu wu mibvu ya mibvu. (aiōnios g166) **3** Bihi me obo liigyighili, kala ti Nzaami gwi muswa. **4** Mu kuulu, ka okughu okala o ti baara ba bámaagyagha otsyeme o Nzaami, ba bámaalyini ekaba kii mayulu, ba bámaagyagha Mufulu a Ngili, **5** ba bámaalyini ndagha a Nzaami yi mbwe ya lileene lili nsie yi aagya, (aiōn g165) **6** lo bo babwi, si okala ka bunu, bo ka bakughu ofirigiŋi mayele o mu sa lili ywolo, bu bafiribanjana Mwana a Nzaami ŋa yulu a kuruwa ya bagwi baara matala mama otughu nde. **7** Mu engajma, nsie yi ookanoŋo bamvulu mu nswe matala ya yi ookamene bisagha bi bili a mupfunu kundaa ba baakasala manseghe mu yo, yo yili yi óseme Nzaami. **8** Lo kala ti yo yiburu mansiene ya mingaama, yo ka yili a mupfunu o, edzighi ebi esyili sa babiili yo epwolo ya ku masini sa batsughu yo mbaa. **9** Bandughu baba mukolo, ngu okala ti bihi lili mu

okabili obo, bihi lili a kana ti ndagha yimbwe yili mu okakebe, ndagha me ngu obvwughu. **10** Mu kuulu Nzaami ka li wu gwene a bunsumu o, nde ka kughu odzimini bigyighili ya dzyi li liisuo be mu nkumu a nde o, mu esala ki liisi be mu matala ma máluru ya ki lili mu ofirikasa mu matala ma kundaa ba bangili. **11** Lo bihi lidzyi ti nswe mbwuru mu be asuo mbaa gyini oyo tee ku masini, mpaala emiini e nde ekala kii mukughu, **12** be linyaã okala babolo, lo be likanama efaana kii babo ba baakagwolo mu kana ya mu mukama pfa li bágwi misiini. **13** Mu matala ma ógwi Nzaami misiini kundaa Abarahame, Nzaami álabá mukihí mu nkumu a ndeme, mu kuulu ka óli a mbwuru mukimi wu áabvulu nde bukwuru o, wuulu nde alaba mukihí mu nkumu a nde. **14** Nzaami ályele ti: Nganyama, me sa ngyighili osemi we ya me sa ngwa we baana ya bateghele ba balagha. **15** Mu obo, Abarahame ási mukama ya ágyagha bi osiini a nde Nzaami. **16** Baara baakalaba mukihí mu nkumu a mbwuru wu bvulu bombo bukwuru, ya mukihí li nsughu yi aakasuo ti ndagha a bo yili yi a nganyama ya nde aakasuhubu munsohobo. **17** Lo Nzaami ádzyi osuo nya tse-tse kundaa ba baakagyagha pfa li ásiini a nde bo. Nde ádzyi osuo ti nde ka kughu osobo mukakana a nde o. Nde ási obo nya ányeme misiini mimye mu mukihí wu álabá nde. **18** Me mu obo, misiini ya mu mukihí wu álabá nde bili mandagha mwolo maala ka bakughu osobo o. Mu mo, si okala ka bunu, Nzaami ka kughu opfiri o. Mo maakagwa bihi-a-be ba lísihi byehene bukyini bubu mpini, mu okasa emiini mu misiini mi bátwulu nya nkulu a bihi. **19** Emiini eli kundaa muwumunu a bihi-a-be ti anga enkulu kii mpini ki eekatehebe bwara mu madza, kye eekasomo tee ku mbihi a nkpaña eko yi a ngwumu yi a ngili. **20** Omo mu ósomo Yíisu nsomo ya bihi mu nkooro a bihi, nde ayi li mukwuru a bangaa ba Nzaami mu mibvu ya mibvu, ti anga Melekisedeke. (aiōn g165)

7 Melekisedeke wu, áli Mukogho a Saleme, ngaa a Nzaami a Nzaami wu a Nkara Yulu. Me nde áyibwana ya áseme Abarahame mu matala ma áfi nde ku odzwana mvulu yi ábagha nde nya nkulu a mikogho. **2** Me kundaa nde Abarahame ágwi kaba limō mu makaba kwumu mu byehene bi ábagha nde. Nsomo, mbaala a nkumu a nde «mukogho wu bunsumu», ya nya nseele nde li

«Mukogho a Saleme», mbaala ti «mukogho wu edzuunu». **3** Nde ka áli a taara o, ka áli a ngughu o, ka áli a bankagha-kwuru o, ka áli a etsughu ki báburu nde o, ka áli a etsughu ki lipfu o, lo nde áli ti anga Mwana a Nzaami, nde li ngaa a Nzaami mu matala mwohonu. **4** Limono mupfunu a mbwuru wu! Kundaa nde Abarahame, nkagha-kwuru, ágwi kaba limō mu makaba kwumu mu bi bibvulu bubwe mu bi ábagha nde. **5** Ankoho, baana ba Lebvi babo ba bágyagha bungaa bu Nzaami, ti bwunu a bu óli Mikyene, báli a litumu mu ogwolo kaba limō mu makaba kwumu kundaa baara ba nsie. Odzyi olyele ti, kundaa baana ba taara ba bombo, ba bápala boho si mu Abarahame. **6** Lo Melekisedeke wuulu ka li mu musyi a bankagha-kwuru ba bo o, ágwolo kaba limō mu makaba kwumu kundaa Abarahame ya áseme munde wu bágwi misiini. **7** Baara bwohonu basoolo ti: Mukwuru áakaseme muke-muke. **8** Ya nya, ba baakatolo kaba limō mu makaba kwumu bali baara ba baakakpa, lo kundaa Melekisedeke mbwuru wu baakasuo bumpughulu ti nde li mweē. **9** Ya likughu olyele ti, Lebvi wu áakagwolo kaba limō mu makaba kwumu, ndehe si ágwi kaba limō mu makaba kwumu, mu embihi ki Abarahame. **10** Mu kuulu, Lebvi áli nkini munsá mweē a nkagha-kwuru a nde, mu matala ma óbwana Melekisedeke Abarahame. **11** Bangaa ba Nzaami baakasuo lo bo mu dzumu li Lebvi ti bu okasala Aarō ti bwunu a bu ookatumu Mikyene mi basi-Isaraye. Lo esala ki bákasala bo ka éli kii mukughu o. Áli ofaana ti ngaa a Nzaami mukimi wu a ti anga Melekisedeke apala, lo ka mu efaana kii Aarō o. **12** Mu kuulu, nya baakasobo esala kii bungaa bu Nzaami, bafaana osobo si Mikyene. **13** Ya munde wu otala bisono bi, li mbwuru wu a dzumu likimi, liili si mbwuru mutsyini mu lo nkini ka ámaasala nya ebini ki baakagwa bikaba ti anga ngaa a Nzaami o. **14** Buulu, baara bagyighili osoolo ti Mfumu a bihi ápala mu dzumu lili Yuda, mu dzumu liili Moyidze ka ályele ndagha o mu mi mitala bangaa ba nzaami. **15** Ya mandagha mali nkara tse-tse: ngaa a Nzaami mukimi aapala ya nde li ti anga Melekisedeke. **16** Nde ka li ngaa a Nzaami mu litumu li Mikyene mimi musyi a dzumu o, lo mu lileene li laama li liigwene a masini. **17** Mu kuulu, básuo bumpughulu ba mu nde: We li ngaa a Nzaami mu mibvu ya mibvu, ti anga Melekisedeke. (aiōn g165) **18** Mu obo,

baamaha mukyene wu mukulu, mu kuulu nde ka aafirisyili a mpini ya mupfunu o, **19** buulu Mikyene ka miikasa ti elogho ekala mukugho o, lo baagwi bihi emiini ki ebvulu bubwe, mu kye bihi liikabehene ya Nzaami. **20** Mandagha mamó mukughu mu mukihí wu ólaba Nzaami. Lo baara ba dzumu li Lebvi ayi bangaa ba Nzaami gwene a mukihí wu ólaba Nzaami. **21** Lo Yiisu aapala ngaa a Nzaami mu mukihí wu ólaba munde wu áalyele kundaa nde ti: «Mfumu álabá mukihí, nde ka akala aafirisoobo bitsimi o: “We li ngaa a Nzaami mu mibvu ya mibvu.”» (aiñ g165) **22** Mu obo, Yiisu li esughu kii ogwihini ku obvulu bubwe. **23** Lisobo li like me li, balagha baakakiri mu esala ki bungaa bu Nzaami, mu kuulu lipfu liikakahaba bo mu okasala esala kii bungaa bu nzaami mu matala mwohonó. **24** Lo Yiisu, buulu nde li mu matala mwohonó, nde li a bungaa bu Nzaami bu bugwene a masini. (aiñ g165) **25** Me mu obo nde kughu obvwuhu kuu mankulu babo baala mu nde, baakayabehene ya Nzaami, mu kuulu nde li mweé mu matala mwohonó mu okasamana mu bo. **26** Mukwuru a bangaa ba Nzaami wu faana mu bihi me munde wu a ngili, wu gwene a ebili, wu gwene a masumu, wu áakaghaba ya banga-a-masumu, wu báseene ku nkara a mayulu. **27** Nde ka li ti anga bakwuru ba bangaa ba Nzaami babake o ba baakagwa mikaba nswe etsughu, nsomo mu masumu mama ndaa-bomo, ña mbihi mu mama baara. Mu kuulu, nde ágyighili ndagha oyo mu sa limó, bu ágwi nyuru a ndeme. **28** Mikyene miikabyaha bakwuru ba bangaa ba Nzaami baara baala ka bali bakughu o, lo olaba mukihí ógyi ña mbihi a Mikyene, olaba mukihí oko óbyaha Mwana wu baghala, wuli mukughu mu matala mwohonó. (aiñ g165)

8 Ndagha yibvulu mupfunu mu mi lili mu okalyele ngu yi: bihi-a-be lili a mukwuru a bangaa ba Nzaami wu obo, wu áabwi-nsini ku ngulu a kwogho kii babaghala ki likubu li Nzaami mu mayulu, **2** ti anga musala wu a ebini kii ngili ya wu a ngo ebvulu ki ótwu Mfumu, lo ka mbwuru o. **3** Nswe mukwuru a bangaa ba Nzaami baakabyaha nde mpaala akagwa bikaba ya mikaba. Oli bubwe ti ndehe si akala a elogho ki aagwa. **4** Kala ti Kriste áli ña nsie, nkini nde ka áakaakala ngaa a Nzaami o, mu kuulu oli a bangaa ba Nzaami bakimi ba baakagwa bikaba ti bwunu a bu ookatumu Mikyene. **5** Bangaa ba

Nzaami babo baakasala mu nzo a Nzaami mu efaana ki esala kii mu mayulu, edzyimi-a-dzyimi ki mandagha ma mali mu engarjma mu mayulu. Mu kuulu, ña óbaana Moyidze otwu ebvulu, Nzaami ályele kundaa nde ti: Mono, gyighili myehene bwunu a bu oli efaana ki ánsuo me we ku yulu a munguo. **6** Lo mu bu, Nzaami aagwi nde esala ki ebvulu mupfunu, buulu nde li nzili yi obvurulu ogwihini ku obvulu bubwe, ku oli mu misiini mi mibvulu bubwe. **7** Buulu, kala ti ogwihini kuu nsomo oko óli kuu mukughu, nkini áli ka bákaasagha ogwihini kuu nsa ywolo o. **8** Lo ásyeme bo mu epfwumu ki ámono nde mu bo ña ályele ti: Bu me bu olyele Mfumu: Mu bitsughu bi bili mu ogya, me sa nsa ogwihini ya nzo a Isarayeleye, ogwihini ku onyaghara ya nzo a Yuda. **9** Ogwihini oko ka okala ti anga ku ánsi me ya bataara ba bo o mu etsughu ki ánkware me bo mu kwogho, mu opaha bo mu nsie yi a Edzipite. Buulu bomo ka bási mukama mu ogwihini o me o, mehe si áanyaghala bo, obo me bu olyele Mfumu. **10** Ña mbihi a bitsughu bibye, obo me bu olyele Mfumu Mono ogwihini ku akala aansa me ya nzo a Isarayeleye: me sa ntwulu Mikyene mi me mu bitsimi bi bo, me sa nsono nye mu mikolo mi bo. Me sa nkala Nzaami a bo, bo sa bakala ekaana e me. **11** Ka ofirikala a mbwuru si mumó o wu akala aaluo nganda-mbwuru a nde wu bali nsie mó, bwunu we wu aalyele kundaa mbaala a nde ti: Soolo Mfumu! Mu kuulu, bo bwohonó sa basoolo me obaana mu baara ba basala tee mu bakwuru. **12** Buulu, me sa nsa bo kolokolo mu bipfwumu bi bo, me ka afirindibili mweé mu masumu ma bo o. **13** Nzaami bu abili mu ogwihini ku onyaghara, nde aasi kuulu ti ogwihini kuu nsomo okala ku okulu. Lo elogho kiili ayi ki ekulu ya ki enjmini, kye eekagye ku odzimini.

9 Ogwihini kuu nsomo oko óli a mikele mu obuono Nzaami ya ebini e nde kii ngili ña nsie. **2** Buulu bátehebe ebvulu kii nsomo, ki baakata ti ebini kii ngili, oño óli a ebini ki baakatwulu miindi, tabele, ya mampa ma bágwi bikaba kundaa Nzaami. **3** Ya ku mbihi a eko kii byele, óli ya ebvulu ki baakata ti ebini kii nkara a ngili. **4** Omo óli a gyiri lili mu oore li baakatsughu mananaase, ya nkobo yi a ogwihini yi bákili oore mu mangulu mwohonó, munsá nkobo óli a eberjene kii mu oore ki eli a maane, óli si a mukaana a Aaró wu áafulu, ya mameé

ma básono mikyene mimi ogwihini. 5 Nja yulu a nkobo yi a ogwihini, basyerubē baba nsia bákaufughu mu bidzyimi-a-dzyimi bi bo ebini ki baakagwa makili mu oluomo kolokolo a masumu. Lo ka lidzuru ndagha ela-ela o. 6 Bilogho byehene bibye bátwulu bye omo, ya mu nswe matala, bangaa ba Nzaami bákasomo mu ebvulu kii nsomo, mu osa esala e bo kii osamana Nzaami. 7 Lo mu ebvulu kii byele, yini a mukwuru a bangaa ba Nzaami áakasomo omo sa limō mu mvulu, mu ogwa ekaba kii makili mu nkooro a bibili bi ndeme ya bibi ndaa baara. 8 Obo bu ókasuo Mufulu a Ngili ti nzili yi a ebini kii ngili nkini ka bádzubulu yo o, buulu ebvulu kii nsomo éli nkini mu mutele. 9 Ekye me elyimi ki mu matala mama lolo ki eekasuo ti bikaba ya mikaba bi baakagwa ka bikughu otsehebe mukolo a munde wu aakabuono Nzaami obo o. 10 Mimye mi mitala bi-odza, bi-onjma, miswagha mimi mawa-mawa. Mimye mili yini a mikele mimi embwuru, mi bágwi tee mu matala ma baasobo mandagha mwohonono. 11 Lo Kriste ágyi ti anga mukwuru a bangaa ba Nzaami wu bilogho bi bibwe bi biigya. Nde ásomo mu ebvulu kii ebvulu bunene ya ki ebvulu mukughu, ki bágwene ogyighili mu myaā mi baara, mbaala ti, kye ka eli ki e nsie yi o. 12 Nde ásomo sa limō mu ebini kii ngili, nde ka ágwi makili mama bantaba ya mama mapulu ma bangoomo o, lo ya makili mama ndaa ndeme mu ofiri ekolo kii mibvu ya mibvu mu bihi. (aiōnios g166) 13 Mu kuulu, kala ti makili ma bantaba ya mama balumu ba bangoomo, bwunu we munyeē a eburu e ngoomo wu baakagyiri nja yulu a ba baasujumu biikagwa bungili mu otsehebe manyuru ma bo, 14 lo bunu-abo makili ma Kriste, wu áagwi nyuru a nde yi gwene a epfwumu mu Mufulu wu a mibvu ya mibvu kundaa Nzaami, maakuono obvulu otsehebe mikolo mi bihi mu bigyighili bi bíkpi, mu kuulu lisakasamana Nzaami wu a mweē. (aiōnios g166) 15 Me mu obo Kriste ali mubvughu endughu kii ogwihini ku onyaghara, mu kuulu lipfu li nde bu ligyi mu okala esughu kii okwulu baara ba bátsumunu mangili ma ogwihini kuu nsomo, babo ba bágýughu mbili, bo bagwolo pfa lili mibvu ya mibvu li bágwi bo misiini. (aiōnios g166) 16 Buulu, oño nja badzyi onama waa ya manzili ma ósuo wu áapki, oli mupfunu mu osuo ti mbwuru munde wu áalyele mandagha mamó ákpi. 17 Waa ya manzili ma ósuo wu áapki bili

mupfunu kala ti mbwuru wu áasuo bye aakpi. Bye ka bili a mupfunu o kala ti munde wu áasuo bye li nkini mweē. 18 Me mu obo, ogwihini kuu nsomo ka ókughu obaana okala o kala ti makili ka matsanjama o. 19 Mu kuulu, Moyidze bu amana otanja nswe litumu nja nkulu a baara bwohonono, bwunu a bu oli Mikyene, nde ágwolo makili ma mapulu ma bangoomo ya mama bantaba, ábvughu mo ya madza, ágwolo mupa eko kii mungala ya ágwolo mpala a idzope, ya ábwi onyahala mo mu mukaana a Mikyene ya mu baara bwohonono, 20 ya ákalyele ti: Ma ngu makili mama ogwihini ku oosi Nzaami mu be. 21 Ya nde anyahala si makili nja yulu a ebvulu, ya nja yulu a byehene bi baakasalala mu obuono Nzaami. 22 Ya Mikyene miikalyele ti byehene biikakala tse-tse mu makili. Kala ti makili ka matsanjama o, lo kolokolo lo we. 23 Kala ti bibye bi bili bifaana bi bilogho bi bili ku mayulu bikughu okala tse-tse mu otsanjama ku makili, ofaana okala ti bilogho byeme bibi ku mayulu bikala bi bitsyeme mu mikaba mi mibvulu bubwe. 24 Mu kuulu, Kriste ka ásomo mu ebini kii ngili ki ógyighili myaā mi baara o, ki eli mu efaana ki ebini kii ngili kii nganjma, lo nde ásomo mu yulu, mu omorjono mu matala ma nja busu bu Nzaami, mu nkooro a bihi-a-be. 25 Ya ka oli kuulu ti nde agwa nyuru a nde nsalagha o, bwunu a bu ookasa mukwuru a bangaa ba Nzaami wu aakasomo mu ebini kii nkara ngili nswe mubvu, ya makili maala ka mali mama ndaa-deme o. 26 Buulu nde ákaakamono mpara nsalagha, obaana ku bagyighili nsie. Lo mu matala mama masini ma, Kriste aamorjono sa limō, mu omaha masumu bu agwi nyuru a nde ti anga mukaba. (aiōn g165) 27 Ya buulu bákehe ti baara okakpa sa yina limō, nja mbihi oño basa mumfwunu, 28 bwunu obo si Kriste ágwi nyuru a nde mukaba sa limō mu omaha masumu ma mpwumu a baara. Nde sa akala amorjono sa lili ywolo, ka mu oyamaha masumu o, lo mu oyabvwughu babo ba bali mu okakebe nde.

10 Mikyene mi Moyidze mili yini a efaana ki bilogho bi akala biigya, lo ka mili enganjma ki bilogho byeme o. Me mu obo, mye ka miikasa kuulu ti babo ba baakabehene ya Nzaami bakala mukughu o nja baakagwa bo mikaba myini mimye matala mwohonono mu nswe mubvu. 2 Kala pele, ba baakasamana Nzaami obo, bákaakala tse-tse sa limō mu masumu ma báli

a mo. Bo ka bákaafirikala a ebili ki masumu ma bo o. Ya bákaanyaã ofirikagwa mikaba. 3 Lo mu mikaba mi baakagwa, baara baakalibili mweë mu masumu ma bo nswe mubvu. 4 Buulu ka okughu okala o ti makili ma balumu ba bangoomo ya mama balumu ba bantaba mamaha masumu. 5 Me mu obo, Kriste bu agyi ña nsie nde ályele ti: «We ka aafiridzyi ti bagwa we mikaba ya bikaba o, Lo we aabuo me nyuru. 6 We ka aamono esee mu mikaba mi baakatsughu myehene ya mikaba mimi mu kolokolo a masumu o. 7 Oño me áandyele ti: “Me ndindogho, me aangyi mu osa gwaa li we Nzaami”, bwunu a bu básono mu mi mitala me mu Mukaana wu a ngili.» 8 Nsomo nde átswama olyele ti: We ka aadzyi o ya ka aakihi o, ngu okala mikaba mimi ogwa, bikaba, mikaba mi baakatsughu myehene, ya mikaba mimi mu kolokolo a masumu, bibaakagwa ti bwunu a bu ookalyele Mikyene. 9 Ña mbihi nde áfirilyele ti: Me ndindogho, me aangyi mu osa gwaa li we Mu obo, nde ámahá ngwa-ngwa a mikaba yi a nsomo ya ákyihi yi a gyolo. 10 Me mu waa lilo baasi bihi-a-be baba ngili mu ekaba ki nyuru a Yíisu-Kriste, ki bágwi sa limõ. 11 Nswe ngaa a Nzaami aakatemele nswe etsughu ña mbughu a esala e nde ya aakagwa mikaba myini mimye nsalagha, lo mye ka mikughu omaha masumu o. 12 Lo nde bu amana ogwa mukaba mumõ mu kolokolo a masumu, nde ábwi-nsini ku kwogho e Nzaami kii Nzaghala mu matala mwohonó. 13 Ya mu bu, nde li mu okakebe tee mu matala ma baatwulu mitaara mi nde mikala nkara a myili mi nde. 14 Mu kuulu, me mu ekaba yini a emõ ekye nde ási kuulu ti babo ba ási nde baba tse-tse bakala mukughu mu matala mwohonó. 15 Mufulu a Ngili si li mu osuo bihi bumpughulu, buulu ña mbihi nde aakalyele ti: 16 Ku me ogwihini ku akala aansa me ya bo, ña mbihi a bitsughu bibye, obo me bu olyele Mfumu: Me sa ntwulu Mikyene mi me munsá mikolo mi bo, me sa nsono mye munsá bitsimi bi bo 17 Ya ti: Me akala ka afirindibili mweë mu masumu ya mu bubi bu bo o. 18 Buulu, ña baasi masumu kolokolo, ka baafirikagwa ekaba mu nkooro a masumu o. 19 Bandughu mu kana, me mu obo bihi-a-be lili a kana mu osomo mu bumpoholo mu ebini kii ngili mu makili ma Yíisu, 20 oño, bihi li li a nzili yi nyaghara ya yi bumweë yi aadzubulu nde bihi ña kara li eko, mbaala ti, mu nyuru a nde yi musunu. 21 Ya bihi lili a mukwuru a bangaa ba Nzaami wu bábyaha mu otumu nzo a Nzaami. 22 Lo litswe likabehene ya Nzaami mu mukolo mumõ ya kana lili mukughu, mu mukolo wu gwene a ebili, ya nyuru yi básuagha mu madza mama tse-tse. 23 Litswe likakwara emiini e bihi ki liikalyele ña nkulu a baara bwohonó ti eli kii nganma, mu kuulu munde wu aasi misiini li wu baakughu osa kana mu nde. 24 Litswe likakagwa banganda mpini bihi-a-bihi mu okala a dzyi ya okasa bigyighili bi bibwe. 25 Ka linyaghala bimvurunu bi bihi o, ti anga bu oli epfu kii babake. Lo litswe likagwa bihi-a-bihi mpama mu kuulu be lili mu omono ti Etsughu eebehene. 26 Buulu, kala ti bihi liikasa masumu mu nko ña mbihi a ña lisoolo enganma, ndagha yi ogwa mikaba mu nkooro a masumu ka yifirisyi o. 27 Lo ndagha yi aasyili yini a okebe mu nzalamweë mufwunu ya kyanjana kii mbaa yi aatsughu ba baakabihi okasa waa li Nzaami. 28 Kala ti mbwuru aatsumunu Mikyene mi Moyidze ya kala ti oli a bampughulu buolo, bwunu we batere mu ndagha oyo, lo bafaana odzwa nde ku ogwene a nyií. 29 Mu bitsimi bi be, nsa masyeme mafaana kundaa munde wu aatsua Mwana a Nzaami, wu aatsaala bungili bu makili mama ogwihini maala nde ábagha bungili mu mo, ya wu aatughu Mufulu wu a nyií? 30 Buulu, bihi lisoolo munde wu ályele ti: Me me aakambvurulu etere, me me aakangwa mufuru! Ya wu áafirilyele ti: Mfumu sa alamana baara ba nde. 31 Obwa ña myaã mi Nzaami wu a mweë oli ndagha yi a nsihi. 32 Lo lilibili mweë mu mi líbwana a be mu matala ma máluru, maala be bu lísaagyagha otsyeme o Nzaami, be límono kimini ya líisi mukama mu odzwana ekyini kii mpini. 33 Mu kuulu matala mana bákgayanana be ña mihi mi baara bwohonó mpaala bákatughu ya bákamwehë be kimini, matala ma make be líbvwununu emõ ya babo ba bákamono kimini ti anga be. 34 Mu kuulu, be líikamono nyií a ba báli mu boloko, ya be líikihi mu esee ti bagwohonó bilogho bi be, bu lisoolo ti be lili a busini bu bubvulu bubwe ya baala ka buukafa o. 35 Mu obo, ka linyaghala kana li be o, mu kuulu lo lili a mufuru wu munene. 36 Mu kuulu, be lili a nzala a mukama, buulu ña mbihi a ña líisa be waa li Nzaami, be ligyagha bibye bi ásiini a nde be. 37 Mu kuulu básono ti: Osiyili mana matala, edzighi ebi, ya munde wu aagya sa agya, nde ka gyili o. 38 Wu a me Wu-

a-bunsumu sa akala mweē mu kana, lo kala ti nde bvughuru mbihi, me ka mono esee mu nde o. **39** Bihi, bihi me baala ka lili baara babo ba baakabvughuru ku mbihi ya baakagwunumu o, lo bihi lili baara babo ba baakasa kana ya bali mu nzili yi obvwughu.

11 Kana me osa emiini kii ngan̄ma ya okihi ti limaabagha bilogho bibye bi lili mu okakebe, nzili yi obaghala bi liigwene okamono. **2** Me mu kana básuo bumpughulu bu bubwe kundaa bakwuru ba bihi. **3** Mu kana, bihi liikabaghala ti nsie bábuo yo mu Ndagha a Nzaami, mu obo bilogho bi biikamonojono bágyighili bye mu bi biigwene okamonojono. (aion̄ g165) **4** Me mu kana, Abele ágwi Nzaami mukaba wu abvulu wu a Kayē mu bubwe. Mu kana lilo, básuo bumpughulu mu nde ti nde li wu bunsumu. Nzaami ndeme ásuu bumpughulu mu bikaba bi nde. Mu kana lilo, nde nkini li mu okabili, ngu okala ti nde ákpi. **5** Mu kana bágyene a Enoke ku mayulu mpaala anyaa okpa, ya ka báfirimono nde o mu kuulu Nzaami áseene nde mu mayulu. Lo nsomo aseene nde mu mayulu, Nzaami ásuu bumpughulu mu nde ti Enoke ákagwa Nde esee. **6** Ankoho, gwene a kana, mbwuru ka kughu omojono mubwe ŋa nkulu a Nzaami o. Buulu, munde wu aabehene ya Nzaami faana osa kana ti Nzaami li, ya me nde aakagwa mufuru kundaa babo ba baakasagha nde. **7** Mu kana, Nzaami ágyehe Nowe mu mandagha maala nkini ali ka bákamono mo o, nde ágyughu Nzaami ya átwu bwara ba bunene mu obvwuhu dzumu li nde. Obo me bu ásuu nde ti baara ba nsie báli babi, ya mu kana nde ágyagha pfa lili bunsumu. **8** Mu kana, Abarahame bu akihi mbili yi ágyughu nde, nde ágyene ku nsie yi áfaana nde ogyagha ti pfa, ya nde ágyene gwene osoolo ku ákagye. **9** Mu kana, nde áyikalá mu nsie yi misiini ti anga ku nsie yi bunzyi, nde ákakala kunsá bibvulu. Idzake ya Dzakobe si bákakala kunsá bibvulu, ya boho si bágyagha pfa li misiini myini mimye. **10** Buulu nde ákakebe bvulu li lili a bitsini bi bibagha bi bigwama, liili ngu Nzaami ndeme áasuo bu baatwu ya áatwu lo. **11** Mu kana, Sara ndeme si, wu áli etini ya wu ómaaluru bamvulu baba oburu, ábagha lileene li obagha mwana ya bateghele, mu kuulu nde ási kana ti, munde wu ágwi misiini, sa asa ti mye mikeele. **12** Me mu obo si, mu mbwuru mumō, wu áali

ku bele a lipfu, báburu biseene bi bipfini ti banomajomo mu yulu, ya ka bakughu otala bye o ti anga dzyele lili mu mukogho a mubu. **13** Baara bwohono babo bákpi ya kana, ku ogwene a obagha bilogho bi básiini a bo. Lo bo bátaala bye ku la, ya bámono esee mu bye, bo bábaghala ti bo báli banzyi ya minduru-nzili ŋa yulu a nsie. **14** Buulu, ba baakabili obo, baakasuo emwehē ti bo bali mu okabulusagha nsie yi a bomo. **15** Ya kala ti bo báli a manguo mu nsie a bo yi básihi, lo nkini bo bákabagha matala mama obvughuru oko. **16** Lo bo bákasagha nsie yi bvulu bubwe, nsie yi a ku yulu. Me mu obo, Nzaami ka li a budzwa o ŋa baakata bo nde ti Nzaami a bo. Buulu me nde áagyili bvulu lilo mu bo. **17** Mu kana Abarahame, wu ógyeele Nzaami kana, ágwi Idzake mwana a nde wu a mbunu ti anga mukaba, nde wu áagyagha misiini. **18** Ya Nzaami ályele kundaa nde ti: Me mu Idzake we akala aabagha baana ya bateghele. **19** Nde ákatsimi ti Nzaami áli a lileene mu osiili mbwuru wu áakpi. Me mu obo bábvurulu nde mwana a nde. Ndagha oyo yili nkumu. **20** Mu kana, Idzake áseme si Dzakobe ya Edzawu mu nkooro a mandagha ma maagya ku nkulu. **21** Me mu kana, Dzakobe mu matala mama osomo mu lipfu, nde áseme baana ba Dzodzefe mumō-mumō, ya bu asiŋi mu mukaana a nde, ásamana Nzaami. **22** Me mu kana, Dzodzefe, mu matala mama osomo mu lipfu, nde ábili mu opala o baana ba Isarayele mu Edzipite ya átswi bo mikele mu mi mitala miwehe mi nde. **23** Mu kana, ŋa mbihi a ŋa baburu Moyidze, taara ya ngughu a nde básweghe nde mu bangoono batere. Bu bámono bubwe bu mwana, bo ka báli a nzalamweē mu obihi onama mukyene wu ógwi mukogho o. **24** Mu kana, Moyidze bu akulu, nde ábihi ti bakata nde ti mwana a mwana a Faraō wu mukaha. **25** Nde ásuolo mu omono kimini emō ya baara ba Nzaami ŋa ebini kii omono esee kii masumu mu mana a matala. **26** Nde ámono ti bupfuru ba ómono Kriste búli ti anga busini bu bubvulu bunene ya busini bu nsie a Edzipite, mu kuulu bitsimi bi nde bíli mu mufuru wu aagya ku nkulu. **27** Mu kana, nde ámara Edzipite gwene a obara nkehe a mukogho, nde ákuru mukolo buulu nde áli ti anga mbwuru wu li mu okamono munde wu aagwene okamonojono. **28** Mu kana, nde ási kyiri kii Paake ya ákaha musuagha wu makili mu bidzughubu bi manzo, mpaala Wu-aakadzwa anyaa odzwa baana ba

Isaraye le ba babaghala ba bansomo. **29** Mu kana, bo bápala mubu wu a Bie ti anga ŋa yulu a nsie yi a kee, lo basi-Edzipite ba bágyeele opala mubu, bákpi mu madza. **30** Mu kana, baana ba Isaraye le bádženene bibagha bi bvulu li Dzeriko mu bitsughu nsaama ya ŋa mbihi bye bíbwi. **31** Mu kana, Rahabe, mukaha nga-a-enkwunu, ka ákpi emó ya ba baagwene okanama litumu o, mu kuulu nde ágyagha bubwe babo ba báyakere bvulu. **32** Nki ndagha me aafirindyele? Me ka mbagha matala o mu obili mu myehene mi mitala Dzedeō, Barake, Samesō, Dzefete, Dabvide, Samwele ya mibighili. **33** Mu kana, bo bábwihi bimpu, básalala bunsumu, bámono misiini bu mikeele, bákuru miŋma mi bankoho, **34** bádzihibi mpini a mbaa, bábvwughu mu lipfu lili mpele a lipee, bo bádzughu mu mabyele ma bo, básuo bukyini mu mamvulu, bábyi mampwumu ma bambumbulu baba banzyi. **35** Mu osighili mu lipfu, bakaha báfirimono baara ba bo ba bákpi. Lo babake bámwehē bo mpaara tee ku lipfu, mu ku bábihi ti bakwulu bo, mpaala babagha osighili mu lipfu ku obvulu bubwe. **36** Bakimi, bámono mpara yi a munkulu, yi a nswa-nswa, yi a bibolo ya yi a boloko. **37** Bádzwi bo mu mameē ya bátsyiri bo mu bitsulu byele mu ewaala, bádzwi bo mu lipee. Bo bákabulugye magye-agye, bo bálaha bibaana bi bindoomo ya bibaana bi bantaba, bo ka báli a elogho o, bámwehē bo kimini. **38** Nsie oyo ka yili nsie yimbwe kundaa bo o, bo bákabulugye magye-agye ku masyehe ya ku yulu a minguo, kunsu mangala ya kunsu mambie. **39** Ngu okala ti básuo bumpughulu bu bubwe mu bo bwohonu, mu nkooro a kana li bo, lo bo ka bábagha bilogho bi bágwi bo misiini o. **40** Buulu Nzaami ábunu bihi-a-be bilogho bi bibvulu bubwe, ya nde ka ádzyi o ti baara babo bakala mukughu gwene a bihi.

12 Mu obo, buulu mpwumu a bampughulu yi alagha yiidzyi bihi-a-be, litswe litsili leme lwohonu ya masumu ma maakadzyi bihi-a-be gwene a mpara, ya litswe libara ntyini yi a engili-angi yi ooluo mo bihi-a-be Nzaami tee ku masini. **2** Litswe litaha mihi kundaa Yiisu, munde wu aakasa ti bihi libagha kana ya wu aakasa ti lo likala mukughu. Nde wuulu, bu amono esee ki ékakebe nde, ákihi okpa ŋa kuruwa gwene a budzwa. Ya mu matala ma, nde aabwi-nsini ku kwogho kii babaghala ki

likubu li Nzaami. **3** Litsimi munde wu áakuru mukolo mu mi ógyighili nde banga-a-masumu, mpaala be linyaā okolo ya bukyini bu be bunyaā ofa. **4** Mu ekyini e be ya masumu, be nkini liisi ngyi mu odzwana tee ku lipfu o. **5** Ya be liidzimini mpama yi bágwi be ti anga yi bágwi kundaa baana ba babaghala: A mwana a me! Ka mono o ti masyeme ma Mfumu mali mama bwunu. Ka kolo o kala ti nde fyeē we. **6** Mfumu aakafyeē munde wu aakadzyi nde, Mu kuulu, nswe mwana wu aakadzyi Nde, Nde aakakaha nde nswa-nswa. **7** Mpara yi lili mu okamono be, me mu otwulu be bunsumu. Nzaami aakagwolo be ti anga baana ba nde ba babaghala. Munde nki mwana wuulu taara a nde ka aakasyeme nde o? **8** Kala ti ka batwulu be bunsumu bwunu a bu baakatwulu baana bwohonu bunsumu o, be ka lili nkara a baana o, lo be lili baana ba báburu ku mbala. **9** Buulu bihi bwohonu lílil a taara wu a mu musunu wu áakasyeme bihi ya wu líkagwa budziri, lo mu emakye liiakwono obvulu okihi litumu li Taara wu mayulu, mpaala libagha bumweē? **10** Taara munde ákasyeme bihi mu mana matala, ti bwunu a bu ákadzyi nde, lo Nzaami aakasyeme bihi-a-be mu nkooro a bubwe bu bihi, mpaala agwa bihi-a-be bungili bu nde. **11** Oli ngayma ti matala ma baakatwulu mbwuru mu bunsumu ka maakamogono ti matala mama esee o, lo mama minyoō. Lo ŋa nseele, mo maakaburu bimburu bibi edzuunu ya bibi bunsumu kundaa babo ba baakihi ti batwulu bo mu bunsumu. **12** Me mu obo, ligwa myaā mi be mi miikolo ya mabuo ma be ma mali mu okateghere mpini. **13** Ya mu nkooro a myili mi be, lisa manzili makala nsumu, mu kuulu kwulu kii nga-a-epfwumu enyaā omiŋi, lo kye edzughu. **14** Liikasagha okala mu edzuunu ya baara bwohonu, ya liikasagha bungili, buulu gwene a bungili, mbwuru akala ka mono Mfumu o. **15** Likahala mihi mpaala mbwuru si mumō anyaa okuono a bwehe bu Nzaami, ya mu kuulu mudza wu a nkala bu alughubu, anyaa osohobo mpaatsala ya obyihl baara balagha. **16** Likahala mihi mu kuulu mbwuru si mumō anyaa okala a enkwunu bwunu we wu a gwene a budziri mu bilogho bibi ngili, ti anga Edzawu wu áatyeghe bukwuru bu nde mu nkooro a bi-odza. **17** Be lisoolo ti, ŋa nseele, Edzawu bu asagha obagha liseme kundaa taara a nde, taara a nde ábihi nde lo ogwa. Mu obo, nde ka áleene osobo bitsimi bi taara a nde o, ngu okala ti nde álili

ku olagha. **18** Mu kuulu, be ka líiyabehene ya bilogho bi bakughu oberene a bye o: Ngu okala mbaa yi aakalughulu, ngu okala mpyibi, ngu okala mpyibi yi a laŋa-laŋa, ngu okala efulu kii mpini, **19** ngu okala likyi li mvulu-a-mvulu, ngu okala nkele a ndiŋi yi áakabili. Ba bákagyughu yo báluomo ti banyaá ofiribwehe ndagha si mō nkimi. **20** Buulu bo ka bákughu okuru mukolo mu litumu li o: «Nswe munde wu aaberene a munguo sa badzwa nde mu mameē, ngu okala ti nyama.» **21** Mandagha ma bámono bo mábvulu nsihi ya Moyidze ályele ti: «Me ndi a nzalamweē yi alagha ya enkwughu.» **22** Lo be líiyabehene ya munguo a Siyō ya bvulu li Nzaami wu a mweē, Yerusaleme lili mayulu, ya mapfwunu ma bangye-yulu ba bábvuŋunu mu kyiri, **23** ya emvuŋunu kii baana ba báburu nsomo, baala mankwumu ma bo básono mu mayulu, ya Nzaami wu li nsughu-a-lamana a baara bwohonon, ya mifulu mi baba bunsumu ba bali baara baba mukughu, **24** ya Yīisu wu aakabvurulu endughu kii ogwihiini ku onyagħara, ya muswagħa wu a makili ma maakabili bubwe ku oluru mama Abele. **25** Lisa mayele, ka libihi ogyugħu munde wu li mu okabili kunda a be o! Buulu, babo ba bábihi ogyugħu munde wu áakagyehe bo ŋa nsie ka bábvwugħu mu masyeme o. Bihi-a-be si ka libvwugħu mu masyeme o kala ti libihi ogyugħu munde wu li mu okabili mu mayulu. **26** Likyi li nde áli linyihi nsie, ya mu matala ma nde li mu ogwa misiini mi: Mu sa likimi me ka firinyihi yini a nsie o, lo ya yulu si. **27** Mbiili yi: Mu sa likimi yili mu osuo ti bilogho bi bágyighili sa binyiŋi ya sa bidzimini, buulu bibye biili ka biikanyiŋi o bikakala. **28** Mu obo, buulu bihi-a-be lili mu ogyagħa empu kiili ka bakugħu onyihi o, litswe likabvurulu Nzaami matuono, likasamana nde mu osamana ku ookagwa nde esee, budziri ya enzaami. **29** Mu kuulu Nzaami a bihi li si mbaa yi aakatsugħu.

13 Nyaá dzyi lili bandugħu mu kana likakala ŋa kara li be. **2** Liikagyighili ogyagħa banzyi ku obwe, mu kuulu mu baara ba bási obo, bana bágyagħa bangye-yulu ku ogwene a osoolo. **3** Likatsimini baara babo ba bali mu maboloko, ti anga be lili emō ya bo munsá boloko. Likatsimini babo baala bali mu okamwehē bo kimini, buulu behe si lili a manyuru ti anga bo. **4** Nyaá baara bwohonon bakagwa mabala budziri, ya nyaá

mbugħu yi mabala yikakala yi a ngili, mu kuulu Nzaami sa alamana banga-a-enkwunu ya ba baakabvugħu mbugħu ya mukala bwunu we mulumu a nganda-mbwuru. **5** Linyaá okadzyara mu litumu li ntono a nzi. Likala a esee mu bilogho bi lili a be, mu kuulu Mfumu ndeme ályele ti: Si okala ka bunu, me akala ka anyaá we o, me akala ka nyagħala we o! **6** Me mu obo bihi likugħu olyele ya bukyini bwohonon ti: Mfumu li mubaha a me Me ka nkala a nzalamweē o Emakye mbwuru akugħu osa me? **7** Likalibili mweē babo ba bákatumu be, ba bákalu o be Ndagħa a Nzaami. Limono bu ósugħu bumweē bu bo ya linama efaana kii kana li bo. **8** Yīisu-Kriste li wuunu munde, matsighi, lolo ya mu matala mwohonon. (aiōn g165) **9** Banyaá opfiri be mu maluo mama mawa-mawa mama bunzyi. Mu kuulu, oli bubwe ti mikolo mi be mibagħa mpini mu bwehe bu Nzaami, lo ka mu mikyene mi mitala bi-odza o, miili babo ba baakanama mye ka baakabagħa ndaana mu mo o. **10** Bihi-a-be lili a ebini ki baakagwa bikaba, ya ba baakasala munsá ebvulu ka bali a muswa mu odza bilogho bi baakagwa bikaba ŋa ebini ekye o. **11** Mu kuulu, bibiyimi bi banyama biili mukwuru a bangaa ba Nzaami aakabiri makili ma bo munsá ebini kii ngili mu nkooro a kolokolo li masumu, baakatsugħu bye ku mbala a mamfulu. **12** Me mu obo Yīisu si ákpi ku mbala a bvulu, mpaala akirili baara bakala baba ngili mu makili ma ndeme. **13** Mu obo, litswe lipala ku mbala a mamfulu mu oyibwana a nde, mpaala limono bupfuru bwunu a bu ámonon nde. **14** Mu kuulu, ŋa busu bu nsie ŋa bihi-a-be ka lili a bvulu li lili mu matala mwohonon o, lo bihi-a-be lili mu osagħa bvulu li lili mu ogya. **15** Mu Yīisu, litswe likagwa mikaba mimi masyighi kunda a Nzaami mu nswe matala, mbaala ti, mandagħa ma maapala mu miŋma mi bihi makasyighi nkwumu a nde. **16** Lo ka likadzimini okagyighili mandagħa ma mabwe ya okabaha babake o, mu kuulu, mimye me mikaba mi miikagwa Nzaami esee. **17** Likakala a bintamana ŋa nkulu a ba baakatumu be, likanama litumu li bo. Mu kuulu bo baakakahala mihi mu nkooro a miwumunu mi be, bu basoolo ti bo sa basuo esala bo ekye kunda a Nzaami. Likasa obo mpaala bo bakasala esala mu esee, lo ka mu minyoō o. Mu kuulu kala ti bo baakabulunyoo, be ka libagħa ndaana o. **18** Likasamana Nzaami mu bihi, mu kuulu bihi lili a kana ti bitsimi bi bihi bili tse-tse ya

lili a waa lili okala a nzya-nzyara yi mbwe mu mandagha mwohono. **19** Me ngwi be mpama yi alagha mu okasamana Nzaami mu mimye, mu kuulu babaabvurulu me kundaa be. **20** Nyaã Nzaami wu a edzuunu, munde wu áasiili ña kara li ba bákpí munkaala-bibuolo wu munene, Mfumu a bihi-a-be Yiisu, mu makili mama ogwihini kuu mibvu ya mibvu, **(aiōnios g166)** **21** asa be likala baara ba bakughu ogyighili mandagha mwohono ma mabwe mu okuhu waa li nde. Nde asa mu bihi mandagha ma aakadzyi nde, mu Yiisu-Kriste. Nyaã nde akala a nsia mu mibvu ya mibvu. Amene! **(aiōn g165)** **22** Bandughu ba me mu kana, me nduomo be mu okala a mukolo wu munene mu okebe ndagha yi a mpama yi oyo. Mu kuulu mukaana wu áansono be li mupfi. **23** Lisoolo ti baapaha mu boloko Timote ndughu a bihi-a-be mu kana. Kala ti nde baagya, lo bihi a nde sa liyamono be. **24** Ligwa bwohono ba baakatumu be ya baba ngili bwohono mamboro. Babo ba bali ku Itali bagweghe be mamboro. **25** Nyaã bwehe bu Nzaami bukala ya be bwohono!

Dzake

1 Me, Dzake musala a Nzaami ya wu a Mfumu Yiiisu-Kriste, ngwi mamboro kundaa bikaana kwumu ya byele bi bitsajama mu nsie yohono. **2** Bandughu ba me mu kana, likala ya esee mu matala ma baakatsihi be mu bifa byehene. **3** Mu kuulu be lisoolo ti kimini li baakasuo mu otsihi kana li be, liikaburu mukama. **4** Lo mukama faana osala mu be mpaala be likala mukughu, ku ogwene a epfwumu, ya elogho si emō ka ekuono be o. **5** Kala ti mbwuru ŋa kara li be gwene a bunsughu, nde aluomo bo kundaa Nzaami, ya Nzaami sa agwa nde bo. Nzaami aakagwa mu bunya-nyaā kundaa baara bwohono, gwene a masyeme. **6** Lo nde faana oluomo ya kana, ya anyaa okala a makeŋe. Buulu mbwuru wu li a makeŋe li efaana ki mampo ma mubu, ma oonyihi ya ooseene lipwubu. **7** Mbwuru wu obo anyaa otsimi ti Mfumu sa agwa nde elogho nga-emō. **8** Mu kuulu nde li mbwuru wu mikolo myele, ya nde aakasobo bitsimi mu mandagha mwohono. **9** Nyaā ndughu mu kana wu li muwele akala a mutwunu mu kuulu Nzaami aakuhubu nde mu yulu, **10** lo esini, Nzaami sa abwihi kye mu nsie, mu kuulu nde sa aluru ti anga efulu kii bisagha. **11** Tala liipala ya kyanjana kii mbaa, lo liikehe esagha, efulu e kye eebwi ya bumpala bu kye buudzimini. Me obo si baakuomo esini mu bisala bi nde. **12** Esee kundaa mbwuru wu aakakuru mukolo mu bigyeele! Mu kuulu, ŋa mbihi a bigyeele, nde sa abagha kagha lili laama lili mibvu ya mibvu li ósiini a Nzaami babo ba baakadzyi nde. **13** Kala ti mbwuru li kunsu bigyeele, anyaa olyele ti: «Nzaami li mu okagyeele me.» Mu kuulu bubi ka bukughu oggyeele Nzaami o. Mu obo ndehe si ka kughu oggyeele mbwuru o. **14** Nswe mbwuru aakasomo mu bigyeele mu nkooro a nzala a obagha a nde, yi aakakobo nde ya yiikapfiri nde. **15** ŋa nseele, nzala a obagha yibvulu, yiikaburu lisumu ya lisumu bu ligyele, lo liburu lipfu. **16** Bandughu ba me mu kana baba mukolo, ka ligwunumu o. **17** Nswe kaba li libwe ya nswe embwaā kii mukughu biikafa ku yulu, kundaa Taara nga-a-mambaa, mu nde ka oli a lisobo o, ka oli a edzyimi-a-dzyimi ki eenyiŋi o. **18** Mu waa li ndeme, Nzaami áburu bihi mu ndagha a nde yi engarjma mpaala bihi likala baba nsomo mu bilogho byehene

bi ágyighili nde. **19** Bandughu ba me mu kana baba mukolo, lisoolo ti nswe mbwuru faana okala a mamamana mu ogyughu, maleme mu obili, ya maleme mu obagha nkehe. **20** Mu kuulu nkehe a mbwuru ka yiikakuhu bunsumu bu Nzaami o. **21** Mu obo, litsili mubviini wohono ya bubi bwohono. Likihi Ndagha a Nzaami mu edzuunu, Ndagha yi bákuu mu mikolo mi be, ya yikughu obvwuhu be. **22** Liikasalala Ndagha a Nzaami, ka likagyughu yini a ogyughu o, kala pele, be beme lili mu okapfiri. **23** Mu kuulu, kala ti mbwuru gyughu Ndagha ya ka salala yo o, nde afaana ti baghala wu li mu okatala edzili e nde mu tala-tala. Nde li mu omono bu oli efa e nde. **24** Bu amana otala, nde gyene ya ŋaana oŋo, nde dzimini nsimi bu ali nde. **25** Lo munde wu aagyighili okehene mikyene mimi mukughu, mikyene mi miigwa bihi bunya-nyaā ya nabara mu mye, nde ka agyughu yini a ogyughu o mpaala ŋa mbihi adzimini nsimi, lo nde aakasalala mye. Nde sa akala a esee mu okasalala mye. **26** Kala ti mbwuru tsimi ti nde li aakasamana Nzaami, ya kuono okuru nzalisogho a nde misyi, lo nde li mu opfiri ndeme, enzaami e nde eli kii ngolo. **27** Enzaami kii tse-tse ya ki egwene a mpiri ŋa nkulu a wu li Nzaami ya Taara me ki: okabaha bisyana ya bapfiili mu mpara a bo ya anyaa obagha mviini yohono yi bilogho bi nsie.

2 Bandughu ba me mu kana, be ba lili a kana mu Mfumu a bihi Yiiisu-Kriste wu li a nsia, ka likakala a munsuolo a bidzili o. **2** Kala ti baara buolo bayasomo munsu emvununu e be, mumō ya mulwu wu a oore ŋa mulyeme a nde ya binkuru bibi ntala, wu muke muwele ya li a binkuru bibi mubviini, **3** ya be likaghala kundaa mbwuru wu aalaha binkuru bibi ntala ya lilyele kundaa nde ndiri: «We bwa-nsini ŋa ebini kii budziri ki», ya be lilyele kundaa muwele ti: «We temene ŋa», bwunu we «bwa-nsini ŋa nsie ŋa aakantwulu me myili ŋa». **4** Be ka lili mu okasa munsuolo a bidzili o, ya be ka lili bansughu-a-lamana ba baakatsimi bubi o? **5** Bandughu ba me mu kana baba mukolo, ligyughu! Ka oli Nzaami aasuolo babo ba bali bawele ŋa mihi mi baara ba nsie mu osa bo bisini mu kana ya ba bagwolo pfa li Emfumu ki ásiini a nde babo ba baakadzyi nde o? **6** Ya be, be liikatsaala muwele. Lo, ka oli bisini biikamwehē be kimini ya biikabiri be ku mambala ma miyala o? **7** Ka oli boho si

baakatsua nkwumu yi mbwe yi ógwi be Nzaami o? **8** Mu engarjma, kala be liikasalala mikyene mi empu, ti bu ookalyele Bisoño ti: «Dzyi nganda-mbwuru ti bu dzyi we nyuru a we», be liikasa bubwe. **9** Lo kala ti be liikasa munsuolo a bidzili, be liikasa lisumu, ya Mukyene li mu okafwunu be ti be liikatsumunu mangili. **10** Mu kuulu, munde wu aakakebe Mikyene myehene, kala ti tsala litumu limō, nde sa abagha ebili mu Mikyene myehene. **11** Mu kuulu, munde wu aalyele ti: «Ka bvughu mbughu ya mukala bwunu we mulumu a nganda-mbwuru o», me ndehe si aalyele ti: «Ka dzwa mbwuru o». Mu obo, kala ti we ka bvughu mbughu ya mukala bwunu we mulumu a nganda-mbwuru o, lo we dzwa mbwuru, we Mikyene tsumunu. **12** Liikabili ya liikakala a bigyighili ti anga baara ba akala baalamana bwunu a bu oli mikyene mi miikagwa bunya-nyaã. **13** Mu kuulu, mu matala ma ookalamana Nzaami baara, nde ka aakamono nyii a babo ba baagwene okamono banganda nyii o. Lo mbwuru nga-a-nyii a babake, Nzaami ka aakagwa nde ebili o. **14** Bandughu ba me mu kana, ndaana ma kundaa munde wu aakalyele ti nde li a kana, lo nde ka li a bigyighili o? Kana lii obo likughu obvwuhu nde? **15** Kala ti ndughu mu kana gwene a bi-olaha ya bi-odza bibi nswetsughu, **16** ya kala ti mumō mu be lyele nde ti: «Gye mu edzuunu! Laha binkuru bibi mpie, ya dza gyughuru!» Lo nde nde bilogho bi bali a bo nzala a bye ogwa we, bunu mbimbili oyo yiikala a ndaana? **17** Bumō si mu kana, kala ti lo ka lili a bigyighili o, lo kana lili lomo li likpi. **18** Mbwuru mumō kughu olyele ti: «We li a kana, me ndi a bigyighili!» Lo me mbvuhulu kundaa nde ti: «Suo me kana li we li ligwene a bigyighili. Ya me, me sa nsuo we mu bigyighili bi me ti me ndi a kana.» **19** We aakasa kana ti Nzaami li yini a mumō? We aakasa bubwe: Mifulu mi mibi miikasa kana oboho si, ya miikateghere mu nzalamweē. **20** We wu gwene a mayele! Soolo ti kana li ligwene a bigyighili ka lili a mupfunu o. **21** Ka oli mu nkooro a bigyighili bi nde o, Abarahame taara a bihi, bámono ti nde mbwuru wu bunsumu, bu ágwi mwana a nde Idzake ŋa ebini ki baakatsughu mikaba? **22** We aamono! Kana li nde líkasala emō ya bigyighili bi nde, ya mu nkooro a bigyighili bi nde, kana li nde líto mukughu. **23** Obo bu okeele Bisoño bi Nzaami: «Abarahame ási kana mu Nzaami, ya Nzaami ágwolo nde ti anga mbwuru wu bunsumu mu

nkooro a kana li nde», ya báti nde ti ndughu a Nzaami. **24** Be lili mu omono ti mbwuru ka li wu bunsumu yini a mu kana o, lo mu bigyighili si. **25** Rahabe, mukaha nga-a-enkwunu, ka mu nkooro a bigyighili bi nde bámono ti nde li wu bunsumu, bu ábwana bantumu ba Isaraye, ya ábaha bo bagye mu nzili nkimi o? **26** Mu obo, bwunu a bu oli nyuru yigwene a mufulu yili yi a kpi, bumō si kana li ligwene a bigyighili lili li likpi.

3 Bandughu ba me mu kana, ka likala balagha ba baaluo mandagha ma Nzaami o. Mu kuulu be lisoolo ti bihi baluo, Nzaami sa alamana bihi mu mpini. **2** Bihi bwohonon liikabwa mu masumu mansa malagha. Kala ti mbwuru ka bwi mu mbiili o, nde li mbwuru wu mukughu, wu aakaleene otumu nyuru a nde yohono. **3** Kala liikatwulu esyerje munsu miŋma mi basyevale mpaala bo basa bu lidzyi bihi, obo si bihi liikatumu nyuru a bo yohono. **4** Limono mabwara ma manene: kanswe bu mali manene, bifulu bibi mpini biikatsiini mo, lo mbwuru wu aakabiri mo, aakabiri mo oko ku aadzyi nde ogye mu nkaba yi aakabiri bwara. **5** Bumō si nzalisogho yili enama kii esala mu nyuru a mbwuru, lo yo yili a masyighi mu mandagha ma manene. Limono ati bunu-a-bo mana liŋe li mbaa likughu otsughu musuru wu munene! **6** Ankoho nzalisogho si yili mbaa, yo yili nsie yi bubi. Nzalisogho yili enama e nyuru a bihi, yo yiikasa nyuru yohono mubiini, ya yiikatsughu elaama kyehehe, buulu yo yomo yiikadzighi mu mile mimi mungele-a-mbaa. (Geenna g1067) **7** Mawa mwohonon mama banyama baba musuru, barjmini, banyama ba baakagye mu etulu ya banyama baba mu madza bakughu osuo bo bintamana, ya mbwuru ásuu bo bintamana. **8** Lo nzalisogho, mbwuru si mumō ka kughu osuo yo bintamana o! Yo yili ewa kiili ka bakughu odzarala o, ya yo yilwulu mu misuo mi miikadzwa. **9** Me mu nzalisogho bihi liikaseme Mfumu ya Taara, mu yo si bihi liikabiili baara ba bali mu efafaana e Nzaami mpwoho. **10** Mu muŋma wuunu munde ookapala liseme ya mpwoho. Bandughu ba me mu kana, ka ofaana okala obo o. **11** Musweswe a madza nga-mumō kughu opaha madza ma mabwe ya mama muŋba? **12** Bandughu ba me mu kana, muti a finge kughu oburu mburu a olibve, bwunu we musyi a bviini kughu oburu mburu a

finge? Bwunu obo si musweswe a madza mama mungba ka kughu opaha madza ma mabwe o. **13** Nande ŋa kara li be li nsughu ya nga-a-maye? Nyaā nde asuo bigyighili bi nde mu nzya-nzyara yi mbwe, mu edzuunu ya mu busunghu. **14** Lo kala ti be lili a sughu li mukolo, ebaa kii nkala ya bitsimi bi embagha, lo ka likakala a mutwunu mu mandagha mamō o, ya ka libiyi enganjma mu mpya o. **15** Bunsughu baa bubo ka buukafa ku yulu o, bo buli babu nsie, baa embwuru ya baa mifulu mi mibi. **16** Mu kuulu ŋa ebini ki oli sughu li mukolo ya bitsimi bi embagha, oli a mpaatsala ya bigyighili bibi mawa-mawa bi bibi. **17** Lo bunsughu bubu yulu buli nsomo-a-nsomo bubu tse-tse, ŋa nseele baa edzuunu, bubu mukolo wu mubwe, bubu ogwihini, bu bulwulu mu nyi ya bimburi bi bibwe, kuu ogwene a munsuolo a bidzili ya kuu ogwene a bumpibi. **18** Lo liburu lili bunsumu lili li bakunu kunsu edzuunu kunda ba baakasalala edzuunu.

4 Kunu-ako mimbanjana miikafa ŋa kara li be?

Kunu-ako bikyini biikafa? Ka oli mu nzala a obagha yi mbi yi aakadzana munsu manyuru ma be o? **2** Be liikasa nzala a obagha, lo ka liikabagha o. Mu nkoro a sughu li mukolo li be, be liikadza ya be liilwulu mu ebaa, be ka likughu obagha bi liikasughu be mukolo o. Be liikasa mimbanjana ya bikyini, lo be ka liikabagha o, mu kuulu be ka liikaluomo o. **3** Kala ti be liikaluomo ya be ka liikabagha o, mu kuulu be liikaluomo bubi, ya mu bitsimi bii okuhu bisee bi be. **4** Be ba liikabvughu mbughu ya bakala bwunu we balumu ba banganda, ka lisoolo o ti dzyi li nsie lili mbele a Nzaami? Munde wu dzyi okala ndughu a nsie nde li mutaara a Nzaami. **5** Be bu litsimi ti ku obwunu Biso bi Nzaami biikalye ti: «Nzaami li a ebaa kii mpini mu Mufulu wu atwulu nde mu bihi?» **6** Lo bwehe ba aakagwa nde bubulu bunene, mu kuulu Biso bi Nzaami biikalye ti: «Nzaami aakakala ngi mu banga a ligwagha, lo aakagwa bwehe kunda ba bakughulu.» **7** Mu obo liikasa litumu li Nzaami ya liikabihi dyabulu, ya nde sa abara la ya be. **8** Liyabehene ya Nzaami ya nde sa ayabehene ya be. Be banga-a-masumu, liswagha myaā mi be, ya be banga-a-mikolo myele, litsehebe mikolo mi be. **9** Likihi kimini li be, lilaha pfiili, lilili. Nyaā osebe o be okighiri pfiili ya esee e be ekighiri minyoō! **10** Likala ba

bakughulu ŋa nkulu a Mfumu nsompiri nde akuhubu be. **11** Bandughu ba me mu kana, ka likakuhi be a be o. Wu aakuhu ndughu mu kana bwunu we lamana nde, nde li mu okakuhi miyene ya li mu okalamana mye. Lo kala ti we li mu okalamana miyene, we ka li mbwuru wu aakasala mye o, lo we li nsughu-a-lamana. **12** Yini a mumō aakagwa miyene ya nde li nsughu-a-lamana, munde wu kughu obvwuhu ya odzwa. We, we nande li mu okala nsughu-a-lamana a nganda-mbwuru? **13** Kunda ba be ba liikalye ti: «Etsughu kii lolo bwunu we mbala, bihi sa ligye ku bvulu li mfu-nga-empele, bihi sa likala oko mvulu mumō, bihi sa lita-nkaala, bihi sa libagha ndaana», **14** lo be ka lisoolo bu ookala laama li be mu etsughu kii mbala o, mu kuulu be lili libwii, lo liikapala mu mana matala ya ŋa nseele liikadzimini! **15** Be lifaana okalye ti: «Kala Mfumu dzyi, bihi sa lilaama ya sa lisa bu ya bu.» **16** Lo mu bu, be liikasa mutwunu mu ligwagha li be. Mutwunu wu obo li wu mubi. **17** Mu obo kala ti mbwuru soolo osa bubwe ya ka si obo o, nde lisumu asi.

5 Mu bu, be bisini, lilili, likehe bingubu mu nkoro a kimini li lili mu ogya mu be! **2** Busini bu be buubolo, bansiele baali binkuru bi be. **3** Oore li be ya ngele a be biibwi malalamana. Malalamana mamō sa masuo bumpughulu mu be, mo sa madza misunu mi be ti anga bu ookadza mbaa mye. Mu bitsughu bibi masini, be lili mu okakuhi busini! **4** Mufuru a ba baakatolo bimburi munsu manseghe ma be li mu okakehe bingubu mu kuulu be ka liigwi bo nde o ya kyele ki ba baakatolo bimburi biiyato mu matswi ma Mfumu Sabahote. **5** ŋa yulu a nsie ŋa, be liikakala kunsu bisee ya busini. Be liili, liiguyuguru ti anga mu etsughu ki baadzwa banyama. **6** Be liitsyiri mukakana wu lipfu, be liidzwi mbwuru wu bunsumu, nde ka aakala nyuru a nde o. **7** Bandughu ba me mu kana, liikakuru mikolo mu okebe tee ŋa ogya Mfumu. Musala-manseghe aakakebe bimburi bi nsie bibi mupfunu ya nde aakakuru mukolo mu okebe tee ŋa aatolo nde bimburi bibi nsomo ya bibi masini. **8** Behe si liikakuru mikolo mu okebe, liikagwama mu mikolo, mu kuulu ogya o Mfumu oobehene. **9** Bandughu ba me mu kana, ka likakuhi be a be o, mpaala banyaā olamana be. Nsughu-a-lamana aatemene ŋa miŋma mi manzo. **10** Bandughu ba me mu kana, mu mi mitala mpara

ya okuru mukolo mu okebe, ligwolo efaana kii mibighili mi miibili mu nkwumu a Mfumu. **11** Bihi liikalyele ti esee kundaa babo ba bali a mukama! Be liigyughu bu bábili mu mukama a Dzobe ya be liimono masini ma ógwi nde Mfumu, mu kuulu mukolo a Mfumu alwulu mu ngebe ya mu nyiĩ. **12** Bandughu ba me mu kana, ka likalaba mukihí o, ngu okala mu nkwumu a yulu, ngu okala mu nkwumu a nsie, ngu okala mu musibi mukimi. Liikalyele obo me obo, pele me pele, mpaala banyaã olamana be. **13** Kala ti ŋa kara li be mbwuru li mu okamono mpapa, nyaã nde asamana. Kala ti mbwuru li kunsá esee, nyaã nde agyimi bikwumu. **14** Kala ti mbwuru mumō mu be li mubyele, nyaã nde agweghe bambiŋini kundaa bakwuru ba libwunu. Bo basamana mu nde ya bakili nde maala mu nkwumu a Mfumu. **15** Osamana kuu mu kana sa odzuhu mubyele ya Mfumu sa atehebe nde. Kala ti nde aasi masumu, sa basa nde mo kolokolo. **16** Liikakihí masumu ma be be a be ya liikasamana mu bana be a be mpaala be lidzughu. Lisamana li mbwuru wu a bunsumu lili a lileene li lilagha. **17** Eli áli mbwuru ti anga bihi, nde ásamana mu mukama mpaala mvulu anyáã onogho ŋa yulu a nsie, ya mvulu ka ánogho o mu mibvu mitere ya bangoono basemene. **18** ŋa nseele, nde áfirisamana, yulu lígwi mvulu ya nsie yíburu bimburu. **19** Bandughu ba me mu kana, kala ti mbwuru mumō mu be aagwuŋumu ya aagyene la ya engañma, ya mbwuru mukimi yabvughuru a nde mu engañma, **20** nyaã nde asoolo ti munde wu aamaha nga-a-masumu mu nzili yi aagwuŋumu nde, nde sa abvwuhu laama li nde mu lipfu ya sa afughu masumu malagha.

1 Piere

1 Me Piere, ntumu a Yiisu-Kriste, nsono mukaana wu kundaa babo ba básuolo ba bali mu mansie mama bunzyi, ba bátsarjama mu bitsulu bi mansie bi: Pō, Ngالاتي, Kapadose, Adzi ya Bitini. **2** Be ba ótswana osuolo Nzaami Taara, bwunu a bu oli bitsimi bi nde, mu nzili a Mufulu a Ngili, mpaala be likala a bintamana mu Yiisu-Kriste, ya likala ba básuagha mu makili ma nde. Nyaā bwehe ya edzuunu bi Nzaami bipfina kundaa be! **3** Masyighi kundaa Nzaami, Taara a Mfumu a bihi Yiisu-Kriste! Mu nyii a nde yi nene, nde ási ti baburu bihi mu mbumburu yi nyaghara, mu osighili o Yiisu-Kriste mu lipfu, mu emiini kii mweē, **4** mu nkooro a pfa li liigwene okabyi, liili ka lisunumu o, li liigwene okakighiri, li bárunu be mu mayulu mu be **5** ba ookakebe lileene li Nzaami mu nzili a kana li be, mu obvwuhu ku oomoronu mu matala mama masini. **6** Mu obo be liilwulu mu esee, ngu okala ti mu matala ma, mu mana edzighi, be lili kunsu minyoō mu nkooro a bu baakatsihi be mu bifa byehene. **7** Mpaala bagwa mupfunu a kana li be li bátsihi, li libvulu mupfunu ya oore li liikapfighili li bátsehebe mu mbaa, budziri, masyighi ya nsia yi alagha, mu matala ma oomoronu Yiisu-Kriste. **8** Munde wuulu be nkini ka liimono nde o, lo be liikadzyi nde. Mu matala ma, be ka lili mu okamono nde o, lo be liisi kana mu nde ya be lili mu okasya mu esee kiili bu balyele we ya ki eli a nsia yi alagha, **9** buulu be libagha obvwughu ti anga ndaana a kana li be. **10** Mibighili mísagha osoolo ya mígyighili ofaana ndagha yi a obvwughu oko, ya mibighili mu nkooro a bwehe bu básiini a be. **11** Mye mígyighili ofaana mu kuulu misoolo matala ya bu ookeele mandagha ma ótswana oleye mye Mufulu a Kriste wu áali mu bo. Mandagha mamu matala mpara yi ofaana omonu Kriste ya nsia yi akala aagya ŋa mbihi. **12** Nzaami ásuobo ti ndagha yi ályele nde ka yili mu nkooro a bomu o, lo mu nkooro a be. Ya mu matala ma baluo ba Nsia yi Mbwe bamaalyele be yo mu Mufulu a Ngili wu aafi ku yulu. Bangye-yulu si baakadzyi osoolo ndagha oyo. **13** Mu obo, likala a bumweē bu bubwe ya yeelee! Lisa emiini e be kyehene mu bwehe bu oogwa be Nzaami ŋa akala oomoronu Yiisu-Kriste. **14** Ti anga baana ba bali a bintamana, ka likanama nsogho

a nyuru yi líli a be ŋa nsomo o, ŋa líli be kunsu ogwene osoolo. **15** Lo, bwunu a bu oli wu aati be mbili wu a ngili, behe si likala ba bangili mu nzya-nzyara a be yohono, **16** buulu básono ti: «Likala ba bangili, mu kuulu me ndi wu a ngili.» **17** Ya ŋa liikabuono be, be liikata Taara munde wu aakalamana nswe mbwuru mu bigyighili bi nde, gwene a munsuolo a bidzili, lo liikadzyara mu budziri mu matala ma lili be mu midzye ŋa nsie, **18** bu lisoolo ti ka oli mu bilogho bi biikapfighili o, nzi bwunu we oore, bakwulu be mu nzya-nzyara yi gwene a mupfunu li líbagha be kundaa bataara ba be. **19** Lo mu makili ma Kriste mama ntala, ti anga mama mwana a endoomo wu gwene a epfwumu ya wu gwene a mpiri. **20** Nzaami ásuolo nde nsomo nde agyighili nsie, ya mu nkooro a bubwe bu be, nde aasuo nde mu matala ma mama li maa masini. **21** Mu nde be liisi kana mu Nzaami wu aasiili nde mu ba bákpi, ya wu aagwi nde nsia mpaala kana ya emiini bi be bikala mu Nzaami. **22** Be liitsehebe miwumunu mi be mu okihi litumu li engayma mpaala lisalala dzyi li banganda gwene a opfiri. Liikadzyi be a be ku olagha mu mukolo wu a tse-tse. **23** Be ba baaburu mu mbumburu yi nyaghara, ka oli mu mburu yi aakapka o, lo mu mburu yi aagwene okapka, mu ndagha yi a mweē yi a Nzaami, yi gwene a masini. (aiōn g165) **24** Buulu: «Nswe mbwuru li ti anga esagha, Ya nsia a nde yohono yili ti anga efulu ki esagha Esagha eekakee, ya efulu e nde eekabwa, **25** lo Ndagha a Mfumu aakagyili mu matala mwohonu.» Ndagha oyo me Nsia yi Mbwe yi bályele be. (aiōn g165)

2 Mu obo, litsili mandagha mwohonu ma mabi ya mayele bubi, bumpibi, osughu mukolo ya makuhu mwohonu. **2** Ti anga baana ba baburu lili, likala a nzala a mabyene mama tse-tse mama Ndagha a Nzaami, mpaala mu mo be likulu ya libvwughu, **3** kala ti «be liilyini ti Mfumu li bubwe.» **4** Liyabehene kundaa nde, limeē lili mweē, libatsili kundaa baara, lo li osuolo Nzaami ya lili lili ntala ŋa nkulu a nde. **5** Beme si, ti anga mameē mama mweē, likala mameē ma batwu mu nzo yi Mufulu, mu ogyighili emvugunu ki bangaa-ba-nzaami kii ngili, mu ogwa bikaba bibi Mufulu bi ookihi Nzaami mu Yiisu-Kriste. **6** Buulu liikatala mu Ndagha a Nzaami ti: «Limono! Me ntwulu mu Siyō limeē lili ŋa etswuu,» «li basuolo, lili ntala,»

«ya nswe munde wu aasa kana mu lo, ka kpa budzwa o.» 7 Mu obo, kundaa be ba liikasa kana, limeē lilo lili lili mupfunu. Lo kundaa babo ba baagwene okasa kana, «Limeē li otsili mutwumanzo, lo ayi lili nsomo ŋa etswuu.» 8 «Ya lo ayi: Limeē li baakubu makya, ya li liikabwihi makubu.» Bo bali mu okakubu makya mu lo, bu babihi osa kana mu Ndagha a Nzaami, me mandagha mamō mafaana obwa mu bo. 9 Lo be, be lili etswumu ki basuolo, bangaa-ba-nzaami ba mukogho, «ekaana kii ngili, mpwumu a baara ba ōsi Nzaami baba ndaa nde, mpaala be litsala nsia a mandagha ma manene mama munde wu aapaha be mu mpyibi-a-nswi ya asohobo be mu otsyeme kuu okijimi.» 10 Be baala, «mu ena ki ekulu ka lili mpwumu a baara ba Nzaami o», lo mu matala ma be ayi mpwumu a baara ba nde. «Mu ena ki ekulu Nzaami ka akamono be nyii o», lo mu matala ma, nde li mu okamono be nyii. 11 Bandughu ba me baba mukolo, me mbuono be ti anga baara ba baaluru ya ba bali bandzyi ŋa yulu a nsie, liikakuru mikolo mpaala linyaā obwa mu nsogho a musunu yi aakadzwana mvulu ya muwumunu. 12 Ŋa kara li ba bagwene osoolo Nzaami, likala a nzya-nzyara yi mbwe, mpaala ŋa oogyughu ba baakabuulu be mandagha ti be liikasa bubi, lo bo bamono bigyighili bi be bi bibwe, bo sa bagwa Nzaami nsia mu etsughu ki aagya nde. 13 Mu nkooro a Mfumu, liikakihī mandagha ma litumu ma bamfumu ba nsie: Mama mukogho, mu kuulu nde li mfumu a baara bwohono, 14 mama bamfumu ba bitsulu bi nsie ba ookagweghe mukogho mu osyeme ba baakasa bubi ya mu ogwa nsia kundaa ba baakasa bubwe. 15 Buulu waa li Nzaami me li: Bu lisi mandagha ma mabwe, be likuru miŋma mi ba bagwene osoolo mandagha ya mimi biwulu. 16 Liikadzyara ti anga baara ba bali bumpoholo, ya bumpoholo bu be bunyaā okala eko ki eefughu mandagha ma be ma mabi. Lo liikadzyara ti anga bankana ba Nzaami. 17 Liikagwa baara bwohono budziri, liikadzyi bandughu mu kana ba be, liikakala a nzalamweē a Nzaami, liikagwa mukogho budziri. 18 Be basala, mu budziri, ka likakala a nkyini ŋa nkulu a bamfumu ba be o. Liikakihī litumu li bamfumu ngu okala ba babwe ya ba badzuunu bwunu we ba bali a mukolo mubi. 19 Buulu oli bwehe, mu nkooro a budziri bu Nzaami, mbwuru akakuru mukolo mu mpara yiili nde

ka li a ebili mu yo o. 20 Nsa ndaana be liibagha kala ti be liikakuru mukolo mu masyeme ma mandagha ma mabi ma liikagyighili be? Lo, kala ti ŋa mbihi a ogyighili mandagha ma mabwe be lili mu okamono mpara ya okakuru mukolo mu okebe, bubo bwehe ŋa mihi mi Nzaami. 21 Ankoho me mu obo Nzaami ati be mbili, buulu Kriste si āmono mpara mu nkooro a be, bu āsihi be efaana mpaala be linama bitaama bi nde. 22 Nde wuulu ka āsi lisumu o, ya mu muŋma a nde ka ōli a mpya o. 23 Nde wuulu bu batughu nde, ka ābvuhulu etughu o, ŋa bamwehē nde kimini, nde ka āraana o, lo āgwi nyuru kundaa Nsughu a lamana wu bunsumu. 24 Mu nyuru a nde, nde abiri masumu ma bihi ŋa yulu a kuruwa, mpaala kala ti likpi mu masumu, likala mweē mu nkooro a bunsumu. Mu mabogho ma nde be likadzughu. 25 Buulu be lili ti anga bindoomo bi bidzimini, lo mu matala ma be liibvughuru kundaa munkala bibuulo wu aakakebe miwumunu mi be.

3 Bwunu obo si, be bakaha liikakihī litumu li balumu ba be, mu kuulu, babo ba baakabihi osa kana mu Ndagha a Nzaami, basa kana ku ogwene a ndagha, mu nzya-nzyara a bakala ba bo, 2 ŋa baamono bo nzya-nzyara a be yi a tsetse kunsā budziri. 3 Bumpala bu be bunyaā okala ba ookamono baara mu: bibara bi mfu, nsia yi a mu ore, binkuru bibi bumpala, 4 lo bumpala bu be bufaana okala kunsā kara a be. Buli bumpala bubu mu mukolo wu adzuunu ya ba edzuunu, bo ka buukafa o ya buli a mupfunu wu alagha ŋa mihi mi Nzaami. 5 Obo bu ōkasa bakaha baba ngili ya ba bākasa emiini mu Nzaami, bo bākakihī litumu li balumu ba bo. 6 Ti anga Sara wu aakasa litumu li Abrahame, bu akata nde mu «mfumu a me». Be lili nkara baana ba Sara ba bakaha kala be liikasa bubwe, ya bu liigwene okakala a nzalamweē mu ndagha si mo. 7 Bwunu obo si kundaa be balumu, liikakala mu eyenje ya bakala ba be, bu lisoolo ti bo ka bali a mpini yi alagha o. Liikagwa bo budziri, buulu boho si bafaana obagha pfa li bwehe bu laama emō ya be. Liikasa obo mpaala ŋa liibuono be Nzaami onyaā okala a mankaghara. 8 Mu omana, liikagwihini be bwohono, liikakala a nyii a ba bamo, liikadzyi bandughu mu kana, liikakala a ngebe, liikakala baara ba bakughulu. 9 Ka likabvuhulu bubi mu bubi bwunu we etughu mu etughu o, lo be liikaseme, buulu mu nkooro a

liseme báti be mbili, mpaala be libagha mukobo a liseme. **10** Mu obo básono mu Mukaana a Nzaami: «Mbwuru wu dzyi laama ya omono bitsughu bibi esee, faana okebe nzalisogho a nde mu bubi ya bibolo bi nde mu mandagha mama mpya. **11** Nde faana otyeghe bubi mbihi ya osa bubwe, nde faana osagha edzuunu ya mukama wohono. **12** Buulu mihi mi Mfumu mili ŋa yulu a baara baba nsumu, ya matswi ma nde maagyighili okagyughu nsamana a be. Lo Mfumu aakatyeghe ebughu kunda ba baakasa bubi.» **13** Na kughu osa be bubi kala ti be lili a mbaa mu osa bubwe? **14** Ngu okala ti be libwi omono mpara mu nkooro a bunsumu, be likala a esee! «Ka likakala a nzalamweē a bo o ya mikolo mi be minyaā okala mu yulu». **15** Lo munsu mikolo mi be, liikakihi ti yini a Kriste li wu a ngili, nde li Mfumu a be. Liikakala yeelee matala mwohono mu ogwa mvuru kundaa nswe munde wu aafwulu be mu mi mitala emiini ki eli mu be. **16** Lo be lifaana obvuhulu bo mvuru mu edzuunu ya budziri, ya bitsimi bi bibwe, mpaala mu matala ma oobuulu be baara mpya mu nzya-nzyara a be yi a bakriste, bomo bamono budzwa. **17** Buulu, kala ti li lo me waa li Nzaami, bubwe mu omono mpara mu okasa bubwe, ŋa ebini ki osa bubi. **18** Mu kuulu Kriste ndeme ámono mpara sa limo mu nkooro a masumu ma baara, nde wu li nsumu ámono mpara ŋa ebini ki ba bagwene nsumu, mpaala abiri be kundaa Nzaami. Nde wu bádzwi mu musunu a nde, lo Mufulu ábvuhulu nde mu bumweē. **19** Me mu obo nde áyiluo mifulu mi mili mu boloko, **20** mimye mi mibihi osa kana mu matala ma makulu, ŋa ókakuru Nzaami mukolo mu okebe, mu bitsughu bi Nowa, bi ákatwu nde bwara bu bunene, munsu bo baara basala básomo, yini a baara mpuomo báabvwughu mu madza. **21** Ekye eli efaana ki liboghoru li lili mu okabvwuhu be mu matala ma mu nzili a osighili o Yíisu-Kriste. Liboghoru lilo ka liikaswagha mubviini a nyuru o, lo lili okihi Nzaami mu bitsimi bibi tse-tse. **22** Yíisu-Kriste wuulu bu agyene ku yulu, li ku kwogho-a-kwogho e Nzaami. Bangye-yulu ya baara ba bali a bimbumu ya mpaana, bali kunsu litumu li nde.

4 Buulu Kriste ámono mpara mu musunu a nde, behe si lisoolo munsu bitsimi bi be dangha yi: Munde wu aamono mpara mu musunu a nde, nde aakaghaba ya lisumu. **2** Mu matala

ma asyili a nde ŋa nsie, nde anyaa okanama sughu li mukolo li baara, lo akagyighili waa li Nzaami. **3** Ookughu bwunu obo, buulu mu matala ma makulu be liikagyighili waa li ba bagwene osoolo Nzaami, ŋa líli be kunsu empala, osughu li mukolo, okolo mala, byiri bibi bilyili ya bibi oŋma mala ma malagha, ya obuono ku banzaami ba babi. **4** Mu matala ma, bo bali mu okakiŋimi ya bali mu okakutughu be, mu kuulu be ka lili mu ofirikagyighili mandagha ma mabi ya bo o. **5** Lo bo sa bagwa mvuru kundaa munde wu akala aalamana ba bamweē ya ba bákpí. **6** Mu obo báluo Nsia yi Mbwe ya kundaa ba bákpí si, buulu bu balamana bo ti anga baara mu musunu, bo bakala mweē mu Mufulu ti nga Nzaami. **7** Masini ma bilogho byehene maabehene. Likala a bumweē bu bubwe ya yeelee mpaala likughu okabuono. **8** Nsomo-a-nsomo, likala a dzyi li lilagha be a be, buulu dzyi liikafughu masumu malagha. **9** Liikabwana a bandughu mu manzo ma be be a be, gwene a okanjununu. **10** Nswe mbwuru asalala kaba li ábagha nde kundaa Nzaami mu nkooro a bubwe bu babake. Obo be sa likala ba baatumu makaba ma Nzaami mamalagha. **11** Kala mbwuru li a kaba lili ndagha, aluo ndagha a Nzaami, wu li a kaba lili osalala, asalala ya mpini yi ookagwa Nzaami, mpaala mu Yíisu-Kriste Nzaami abagha nsia yohono, buulu nsia ya litumu bili bibi ndaa Nzaami mu biseene ya biseene. Aamene! (aiŋn g165) **12** Bandughu ba me baba mukolo, ka likakiŋimi o bu lili kunsu mbaa a bigyelee, ti anga ndagha yi ligwene ogyihini a yo yibwi mu be. **13** Lo bu lileene okaba mpara a Kriste, likala a esee mpaala ŋa oomogono nsia a nde, behe si likala kunsu munyuru ya esee. **14** Kala baakatughu be mu nkooro a nkwumu a Kriste, esee kundaa be, buulu Mufulu wu a nsia, Mufulu wu a Nzaami, li ŋa yulu a be. **15** Mbwuru ti mutsyini ŋa kara li be anyaa omono mpara ti anga wu aadzwi mbwuru, nga-a-pfyibi, wu aasi bubi, bwunu we wu aasomo mandagha ma baara. **16** Lo kala ti nde mono mpara ti anga mbwuru a Kriste, nde anyaa omono budzwa, nyaā agwa nsia kundaa Nzaami bu alaha nkwumu oyo. **17** Ma me matala ma oobaana munfwunu mu nzo a Nzaami. Mu obo, kala ti nde baana mumfwunu mu bihi, bunu ookala masini ma babo ba babihi osa kana mu Nsia yi Mbwe? **18** Ya «kala ti baara baba bunsumu babvwughu mu mpara, bunu ookala

kundaa baara ba babi ya banga-a-masumu?» 19 mu dzyi. Nyaã edzuunu ekala ya be bwohono Mu obo, nyaã ti ba baakamono mpara bwunu ba lili mu Kriste! a bu oli waa li Nzaami bagwa miwumunu mi bo kundaa wu agyighili bilogho byehene, wu aagwene okasobo, mu okasa bubwe.

5 Mu matala ma me ngwi bukyini kundaa bakwuru ba libwunu ba bali ŋa kara li be. Mehe si ndi mukwuru ti anga bo, ya mpughulu a mpara yi ómono Kriste, me wu ndi a kaba li nsia yi akala aamojono. Me ndyele bo bu: 2 liikabujunu mukaã a bibuolo bi Nzaami wu bágwi be, liikakebe nde mu waa li beme ti bu odzyi Nzaami, lo ka ti anga okwighi baakakwighi be o. Ka mu obagha mufuru wu budzwa o, lo mu mbaa. 3 Ka likakala a litumu lili mpini o ŋa yulu a babo ba ógwi be Nzaami, lo liikakala bifaana bi bibwe kundaa mukaã. 4 Mu obo, ŋa àkala oomojono mfumu a minkaala bibuolo, be sa libagha mpu yi a nsia, mpu yi aagwene okafa bumpala. 5 Bumō si kundaa be bampala, liikakihi litumu li bakwuru. Ya be bwohono, mu nzya-nzyara a be ya babake, ka likakala a masyighi o, mu kuulu «Nzaami ka dzyi banga-a-masyighi o, lo kundaa ba bakughulu, nde aakagwa bwehe.» 6 Lipfujumu gwene a masyighi ŋa nsa kwogho e Nzaami kii lileene, mpaala mu matala ma ákuru nde, nde sa aseene be mu yulu. 7 Ligwa nde maleme ma bitsimi bi be mwohono, buulu nde aakatsyaha be. 8 Likala a bumweë bu bubwe ya likala yeelee! Mutaara a be, dyabulu, ti anga nkoho wu li mu okabighi ya okabuludzenene, li mu okasagha na aadza. 9 Libihi nde bu likuru mukolo mu kana ya bu lisoolo ti bandughu ba be mu kana ba bali mu nsie nsyini baakamono mpara oyo si. 10 Mpara a be sa yigyili mana matala. Lo Nzaami nga-a-bwehe bwohono wu aati be mbili mpaala be libagha nsia yi a mibvu ya mibvu mu Kriste, sa asa be baba mukughu, sa agwa be ligwama, amyehe be midza ya atehebe be gwene obwa. (aiōnios g166) 11 Kundaa nde litumu mu mibvu ya mibvu! Aamene. (aiōn g165) 12 Silivanuse aabaha me mu osono be mana mandagha ma, nde wu li ndughu a me wu bakughu osakana u nde, mpaala me ngwa be luo ya nsuo be ti be liikihi bwehe bu Nzaami bubu enganyma. 13 Libwunu li Nzaami lili ba básuolo ti anga be li lili ku Babilone ligwi be mboro. Mareke mwana a mehe si gwi be mboro. 14 Be a be si ligwihini a mamboro mu okabumunu kuu

2 Piere

1 Me Simō-Piere, musala ya ntumu a Yiisu-Kriste, nsono mukaana wu kundaa babo ba bagyagha kana li lili a ntala mo ya lili ndaa bihi mu nzili a bunsumu bu Nzaami a bihi ya Mubvwuhu Yiisu-Kriste. **2** Nyaã bwehe ya edzuunu bikala bipfini kundaa be mu ligyahaba li Nzaami ya lili Yiisu-Kriste Mfumu a bihi. **3** Mu lileene li nde ti anga Nzaami, Yiisu aagwi bihi bilogho byene bibi mupfunu mu olaama mu enzaami, mu usuo mu engarjma munde wu aati bihi mbili, mu nsia a nde ya mu mpini a nde. **4** Mu bilogho bibye baagwi bihi misiini mi minene ya ntala, mpaala mu mye be libvwughu mu obyí ku oli mu nsie mu nkooro nzala a nsie yimbi, ya be libagha kaba lili mu enzaami. **5** Mu obo, libvulu osa mpini yohono mu obwehe ŋa yulu a kana li be bipfu bi bibwe, ŋa yulu a bipfu bi bibwe ligyahaba, **6** ŋa yulu a ligyahaba okuru nyuru, ŋa yulu a okuru nyuru mukama, ya ŋa yulu a mukama, enzaami, **7** ŋa yulu a enzaami, dzyi lili bandughu mu kana, ŋa yulu a dzyi lili bandughu mu kana dzyi lii engarjma. **8** Buulu, kala be lili a bipfu bi bi bilagha, be sa libvulu osoolo Mfumu a bihi Yiisu-Kriste. **9** Lo kundaa munde wu gwene a bipfu bibye, nde li enkpa-mihi wu li mu okasagha nzili mu okabebere. Nde dzimini ti Nzaami aaswagha nde mu masumu ma nde mwohonono. **10** Mu obo bandughu ba me mu kana, lifirigwama mu mbaa mpaala be lisuo ti Nzaami aati mbili ya aasuolo be. Kala be lisi obo, ngu okala ka bunu, be kalibwa munsu bubi o. **11** Me mu obo be liibagha kuu bwunu nzili yi osomo munsu Empu kii mibvu ya mibvu, empu e Mfumu ya Mubvwuhu a bihi Yiisu-Kriste. (aiōnios g166) **12** Me mu obo, me sa kandibili be mweē mu matala mwohonono mandagha mwohonono mamo, ngu okala ti be lisoolo mo, mpaala be linyaã onyī munsu engarjma kii matala ma. **13** Me nsimi ti oli bubwe, mu matala ma ndi me nkini ŋa nsie, me kandimbili be mandagha mamo mweē mpaala be likala yeelee. **14** Mu kuulu me nsoolo ti matala ma aansihí me nsie maabehene, bwunu a bu oosuo me Mfumu a bihi Yiisu-Kriste. **15** Lo me sa nsa kuulu ti ŋa mbihi ŋa aangye me, be likalibili mweē mandagha mamo mu matala mwohonono. **16** Mu buulu, ŋa lilyele bihi be ti Mfumu a bihi Yiisu-Kriste sa agya mu lileene,

ka oli mu masaba ma baakagyighili okata o, lo mu kuulu lili bampughulu ba bámono nde mu mihi mi bihi bameme ya nsia a nde. **17** Mu kuulu nde aagyagha kundaa Nzaami Taara, budziri ya nsia, ŋa óbili likyi li lífi ku yulu ti: «Wu me Mwana a me wu Mukolo, me mu nde me aakamono esee.» **18** Bihi bameme lígyughu likyi lilo li lífi ku yulu ŋa lili bihi ya nde ŋa yulu a munguo wu a ngili. **19** Bihi lili a ndagha a mibighili yili mpini. Be lili a bwuu mu otala yo ti anga mwindi wu aakasehene kunsu mpyibi, tee ku okya bwili ya ŋa ootemene ŋomanomo wu epala kunsu mikolo mi be. **20** Be ligyighili osoolo ti: mbwuru si mumō ka kughu obaala ngasighi mandagha ma mibighili ma mali mu Bisoño bi Nzaami o. **21** Mu kuulu, mbwuru si mumō ka kughu obighili mu dzyi li ndeme o, lo me Mufulu a Ngili áakatsiini baara mu okabili mu nkwwu ma Nzaami.

2 Mu nsi-nkulu, mibighili mimi mpya míyapala ŋa kara li basi-Isarayelee, bumō si baluo baba mpya baayapala ŋa kara li be. Bo sa basohobo maluo mama mpya mama kughu odzwa. Bo sa batunu tee Muluo wu aakwulu bo, obo bu baadzuru bo mu manyuru ma bo lipfu lili nkara. **2** Ya baara balagha sa banama bo mu manzili ma bo mama empala. Mu nkooro a bo, sa bakatughu nzili yi engarjma, **3** ya mu nkooro a dzyi li ndaana, bo sa bagwolo bilogho bi be mu mbiili yi a mpya. Kundaa bo, ya obaana edzighi mumfwunu ka aafirisiyili o ya lipfu li bo ka lifirikebe o. **4** Buulu Nzaami ka ámono bangye-yulu ba bási masumu nyī o, lo nde átsili bo ku mungele-a-mbaa, ku bákurú bo bibolo mpaala bakebe mumfwunu. (Tartaroō g5020) **5** Bumō si Nzaami ka ágwene osyeme nsie yi nkulu o. Lo ŋa ádzahaba nde nsie ya baara ba babi, nde ábvuwu Nowa wu áakaluño bunsumu, mumō ŋa kara li baara mpuomo ba bábvuwu. **6** Ya nde átsughu mabvulu mama Sodome ya Ngomoro mbaa, mo mákighiri lifufunu mpaala makala efaana ki eegya kundaa baara ba babi. **7** Lo nde ákwulu Lote, mbwuru wu bunsumu, wu áakamono mpara mu mukolo a nde mu nkooro nzya-nzyara yi mbi ya yi empala yi a baara baba eseene e nde ba bágwene okanama mikyene mi Nzaami. **8** Buulu nde áli wu a nsumu ŋa kara li bo, nswé etsughu nde ákamono bo ya ákagyughu bo, ya nde ákamono mpara mu muwumunu a nde mu nkooro a nzya-nzyara

a bo yi masumu. **9** Obo oosuo ti Mfumu leene okwulu banga a enzaami mu mpapa, ya okebe ba bagwene nsumu mpaala asyeme bo mu etsughu kii mumfwunu. **10** Nde sa abvulu osyeme babo ba baakanama nzala a manyuru ma bo, babo ba badzyi okasa mandagha mama osujumu ya baakatsaala bumfumu. Bo babvulu a kana mu bomo. Baluo baba mpya babo bali a ligwagha ya ka bali a nzalamwee mu okatughu bibi nsia o. **11** Ngu okala bangye-yulu ba babvulu bo mu mpini ya mu lileene, ka baakatsaala mifulu mimi nsia mimye ŋa busu bu Mfumu o. **12** Baara babo baakasa mi bagwene osoolo. Me mu obo sa bakpa ti anga banyama ba bagwene a mayele, ba bágyighili mpaala bakoghólo mu myere ya badzwa bo. **13** Obo bo baabagha mufuru mu bubi bwohono bu baasi. Bo baakamono esee mu okakuhu nzala a musunu mu mwiŋ wu ebala. Ŋa baakadza bo emō ya be, bo yini a be baakapfiri mpya mu nkooro a esee e bomo ya obo oli nkara budzwa kundaa be. **14** Bitsimi bi bo yini a mu bakaha, mu kuulu babvughu mbughu ya bo, ka baakakolo mu osa masumo o, bo baakalebe baara ba bagwene a mukama, mikolo mi bo milwulu mu ntono a nzi, bo bali baana ba epwolo. **15** Bu bamana osihi nzili yi a nsumu, bo bágwuŋumu mu nzili a Balaame mwana a Bosore. Nde wu áakadzyi nzi yi bákafulu nde mpaala akasa bubi. **16** Lo nde ágyagha masyeme mu nkooro a bu átsuŋumu mangili: Nyama wu aagwene okabili, bu agwolo likyi li mbwuru, ákahaba lala li mubighili. **17** Baara babo bali mikele mi migwene a madza, bidzi bi biikagye mu lipwubu. Nzaami ábunu bo ebini kuu mpyibi yi a laŋa-laŋa. **18** Bo baakabili mandagha ma manene ma magwene a mupfunu. Mu ntono a bisee bi musunu bibi empala, bo baakabagha mu myere babo ba bayapala kunsá baara ba bagwuŋumu. **19** Bo baakasiini ogwa bo bumpoholo lo bomo bali bankana ba bipfu bi bibi bi biikabyihi bo. Buulu nswe mbwuru li nkana a bibye bi biikatumu nde. **20** Mu obo, oli a baara ba baabvwughu mu osujumu o nsie, mu ku basoolo bo Mfumu ya Mubvwuhu a bihi Yiiisu-Kriste. Lo kala ti bo bafirikihi osomo ya okala kunsá litumu li nsie, bubi bu bo bubu masini bubvulu bubu nsomo. **21** Mu obo ali obvulu bubwe kundaa bo mu ogwene osoolo nzili yi bunsumu, ya buulu bu basoolo yo, batyeghe litumu lili ngili li bágwí bo ebughu. **22** Mandagha ma ookalyele nkumu yi

mali mama nganma: «Mbwa aafiridza bilughu bi nde» ya: «Ngubulu, bu asaamana ogyogho madza, aafiriŋyigyoŋomo munsá mutogho».

3 Bandughu ba me baba mukolo, wu me mukaana wu a buolo wu nsono me be. Munsá mikaana minsá myele, me ndibili be mwee mu mandagha ma máluru mu osiili be mayele ma mabwe, **2** mpaala be lilibili mwee mandagha ma ótswana oylele mibighili mimi ngili ya litumu li Mfumu ya Mubvwuhu li ógwi be bantumú. **3** Nsomo a nsomo, be lisoolo ti, mu bitsughu bibi masini, ba bálwulu mu munsensehe sa bagya. Bo sa bakala mu litumu li ntono a dzyi li libi li bo. **4** Bo sa balyele ti: «Misiini mii ogya o nde kunu-ako mili? Mu kuulu, edzighi ki ókpi bataara, bilogho byehene bili bwunu a bu bágyighili bye ku ebaana». **5** Mu kuulu, bo baakadzimini mu nko ti mu matala ma makulu Nzaami ágyighili mayulu ya nsie mu ndagha a nde. Nde ápaha nsie mu madza ya ábvughu yo ŋa kara li madza, **6** ya me mu madza si nsie yi matala mamo yípfighili, yidzyama mu madza. **7** Ankohe me mu Ndagha gyini-oyo báunu mayulu ya nsie bibi matala ma mu nkooro a mbaa, mu nkooro a etsughu kii mumfwunu ya kii opfighili ki ba babi. **8** Lo, bandughu ba me baba mukolo, oli a ndagha nsyini yiili be ka lifaana odzimini o: Kundaa Mfumu etsughu etsyini eli ti anga pfwunu li mibvu ya pfwunu li mibvu lili ti anga etsughu etsyini. **9** Mfumu ka li mu ogyili mu okuhu misiini mi nde o, bwunu a bu ookatsimi baara babake ti oogyili. Lo nde li mu okakuru mukolo mu okebe bihi, mu kuulu nde ka dzyi o ti baara babake bapfighili, lo bwohono bagyiŋi mayele. **10** Etsughu e Mfumu sa egya ti anga nga-a-pfyibi. Mu etsughu ekye mayulu sa madzimini munsá nkele yi alagha, bilogho bi biilughulu mbaa sa bisujumu ya nsie ya bigyighili bi ba bali mu yo sa bagya ku mumfwunu. **11** Buulu byehene bibye sa bisujumu, be nki baara lifaana okala? Be lifaana okala baara baba bungili ya babaagwa Nzaami budziri. **12** Be ba lili mu okakebe ya obiŋini ogya ku etsughu e Nzaami, mu etsughu ekye mbaa sa yitsughu mayulu ya bilogho bi bili ku yulu sa bisujumu. **13** Bihi liikakebe mayulu ma manyaghara ya nsie yinyaghara ku ookala bunsumu, bwunu a bu oli misiini mi nde. **14** Mu obo bandughu ba me baba mukolo, mu matala ma lili mu okakebe be, lisa mpini mpaala

nde ayabagha be kunsu edzuunu, bu ligwene a bipfwumu ya mandagha ma baasyeme be. **15** Ya ligyighili osoolo ti ogyili kuu okuru mukolo mu okebe kuu Nzaami oli obvwughu o be. Me mu obo Poole, ndughu a bihi ya mbaala a bihi, ásono be mukaana bwunu a bu oli bunsunghu bu ógwi nde Nzaami. **16** Me bwunu obo si nde ásono mu mikaana myehene mi miikabili mandagha ma. Munsu mikaana mimye, oli a bitsulu bi mandagha bi bili mpara mu obaala, mu obo biwulu ya ba bagwene a kana baakasobo mbaala a mo. Bwunu obo si baakasa mu bitsulu bi Mandagha ma Nzaami makimi, mu opfighili o bomo. **17** Bandughu ba me baba mukolo, mono me bu ngyehe be! Likala yeelee mpaala linyaã ogwujumu mu odzimini kuu baara ba bagwene okanama mikyene mi Nzaami ya linyaã obwa mu kana mu beme. **18** Likulu munsu bwehe ya ligyahaba li Mfumu ya Mubvwuhu a bihi Yiisu-Kriste. Kunda nde nsia obaana mu matala ma tee mu etsughu kii egwene a obaana ya masini. Amene! (aiōn g165)

1 Dzã

1 Ndagha yi áali ku ebaana, yi liigyughu bihi, yi liimono bihi mu mihi mi bihi bameme, yi liikehene bihi, ya yi oobyeme myaã mi bihi, ngu ndagha yi a laama lili mibvu ya mibvu. **2** Mu kuulu laama lilo liimono. Ya bihi liimono lo, ya bihi lili bampughulu ba lo, ya bihi lili mu okatsala be nsia a laama lili mibvu ya mibvu li lili kundaa Taara ya li liiyamono kundaa bihi. (aiōnios g166) **3** Mi liimono ya liigyughu bihi, bihi lili mu okalyele be mye si, mu kuulu behe si likala bumō ya bihi, ya bumō bu bihi buli ya Taara, ya Mwana a nde, Yiisu-Kriste. **4** Ya bihi lili mu osono be mandagha ma, mu kuulu esee e bihi ekala mukughu. **5** Nsia yi liigyughu bihi kundaa Yiisu-Kriste, ya yi lili mu otuoho bihi kundaa be me yi: Nzaami li otsyeme, ya mpyibi ka yili mu nde o. **6** Kala ti bihi-a-be liikalyele ti: «Bihi lili bumō ya nde», ya lili mu okadzyara kunsu mpyibi, bihi-a-be lili mu okapfiri mpya, ya ka lili mu okadzyara mu engajma o. **7** Lo kala ti bihi-a-be lili mu okadzyara kunsu otsyeme, ti bwunu a bu oli Nzaami ndeme kunsu otsyeme, bihi-a-be lili bumō ya babake, ya makili ma Yiisu, Mwana a nde, maakatsehebe bihi-a-be mu masumu mwohonon. **8** Kala ti bihi-a-be liikalyele ti: «Bihi ka lili a masumu o», bihi-a-be liikapfiri manyuru ma bihi bameme, ya engajma ka eli mu bihi o. **9** Kala ti bihi-a-be liikakih masumu ma bihi, Nzaami li bunsumu ya li wu aakakuhu misiini mi nde. Nde sa asa masumu ma bihi-a-be kolokolo, ya sa atsehebe bihi-a-be mu bubi bwohonon. **10** Kala ti bihi-a-be liikalyele ti: «Bihi ka lisi masumu o», bihi-a-be liikasa ti Nzaami akala nga-a-mpya, ya ndagha a nde ka yili mu mikolo mi bihi o.

2 Baana ba me, me nsono be mandagha ma mu kuulu be linyaã osa masumu. Lo kala ti mbwuru bwi mu masumu, bihi-a-be lili a munkala ŋa nkulu a Taara, me Yiisu-Kriste wu li wu a nsumu. **2** Nde ágwi bumweē bu nde mukaba mu okala nzili a kolokolo a masumu ma bihi-a-be. Ya ka oli yini a mu nkooro a masumu ma bihi-a-be o, lo ya mu mama baara ba nsie nsyini. **3** Kala ti bihi-a-be liikakebe mikyene mi Nzaami, obo me bu liigyahaba ti bihi-a-be lisoolo nde. **4** Nswe munde wu aakalyele ti: «Me nsoolo Nzaami», ya aakakuono onama mikyene mi Nzaami, nde li nga-a-mpya ya engajma ka

eli mu nde o. **5** Lo nswe munde wu aakanama ndagha a Nzaami, dzzyi li Nzaami lili nkara a mukughu mu nde. Obo me bu liikasoolo bihi ti, bihi lili bumō ya Nzaami. **6** Nswe munde wu aakalyele ti nde li emō ya Nzaami, nde ndeme faana okadzyara ti anga bu óokadzyara Yiisu. **7** Bandughu ba me baba mukolo, mukyene wu ndi me mu osono be wu, ka li wu munyaghara o, lo mukyene wu mukulu, wu lígyagha be obaana ku ebaana. Mukyene wu mukulu munde, me ndagha yi liigyughu be. **8** Lo mu embihi ki emō, munde mukyene wu munyaghara me ndi mu osono kundaa be, Ndagha oyo yili yi a ngajma kundaa nde ya kundaa be, Mu kuulu mpyibi yili mu okaluru, Ya otsyeme kuu ngajma ayi oli mu okasehene. **9** Nswe munde wu aakalyele ti nde li kunsu otsyeme, Ya aakabele ndughu mu kana, Nde li nkini kunsu mpyibi. **10** Nswe munde wu aakadzyi ndughu mu kana, Li kunsu otsyeme, Ya ka oli a elogho si emō mu nde o ki ekughu osa ti nde abwa mu masumu. **11** Lo nswe munde wu aakabele ndughu mu kana, Li kunsu mpyibi, Nde aakadzyara kunsu mpyibi, Ya nde ka aakasoolo ku ali mu okagye o, Mu kuulu mpyibi yiidzwi nde mihi. **12** Baana ba me, me ndi mu osono be mukaana wu, mu kuulu: «Nzaami aasi masumu ma be kolokolo mu nkooro a nkwwu a Yiisu». **13** Bataara, me nsono be mukaana wu mu kuulu: «Be lisoolo munde wu li obaana ku ebaana.» Minkuru-mbala, me nsono be mukaana wu mu kuulu: «Be liilughulu ŋa nkulu a Wu Mubi.» **14** Baana ba me, me aansono be mukaana wu mu kuulu: «Be lisoolo Taara.» Bataara, me aansono be mukaana wu mu kuulu: «Be lisoolo munde wu li obaana ku ebaana.» Minkuru-mbala, me aansono be mukaana wu mu kuulu: «Be lili a mpini, ya ndagha a Nzaami yili mu be, ya be liilughulu ŋa nkulu a Wu Mubi.» **15** Ka lidzyi nsie o, ngu okala bilogho bi bili mu yo, Kala ti mbwuru dzzyi nsie, Dzzyi li Taara ka lili mu nde o. **16** Mu kuulu, byehene bi bili mu nsie, Bisee bi nyuru, Ntono a mihi, Ya mubili a nyuru mu nkooro a kana mu busini, Byehene bibye ka biikafa kundaa Taara o, Lo bye biikafa mu nsie. **17** Ankoho nsie yili mu oluru, yo ya bilogho bi ookasughu baara mukolo. Lo munde wu aakasa gwaa li Nzaami sa alaama mu mibvu ya mibvu. (aiōn g165) **18** Baana ba me, Ma me matala mama masini. Be liigyughu bakalyele ti Mutaara a Kriste li mu ogya, Ya mu matala ma, mitaara mi Kriste milagha miimono.

Me obo bihi lisoolo ti ma me matala mama masini. **19** Baara babo bápala ya kara li bihi-a-be, Lo bo ka báli baba ndaa bihi-a-be o. Mu kuulu, kala ti bo báli baba ndaa bihi-a-be, Kini li bákaakala ya bihi-a-be. Obo oli mu osuo ti si mumō mu bo ka li wu a ndaa bihi-a-be o. **20** Lo be, be liigyagha Mufulu a Ngili wu ookagwa Kriste, Ya be bwohonon ligyahaba engan̄ma. **21** Me bu aansono be, ka mu kuulu ti be ka lisoolo engan̄ma o, Lo mu kuulu be lisoolo kye, Ya mu kuulu ka oli a si mpya mu engan̄ma o. **22** Nande li nga-a-mpya? Munde wu aakabihi ti Yiisu me Kriste, Munde me mutaara a Kriste, Mu kuulu nde aakabihi Taara ya Mwana. **23** Nswe mbwuru wu aabihi Mwana, ka li ya Taara si o. Munde wu kihi Mwana, nde li ya Taara si. **24** Mu mi mitala be, nyaā mandagha mwohonon ma lígyughu be obaana ku ebaana makala mu be. Kala ti mandagha mamō ma lígyughu be obaana ku ebaana makala mu be, Behe si sa likala mu Mwana ya mu Taara. **25** Misiini mi ógwi bihi-a-be Kriste, Me laama lili mibvu ya mibvu. (aiōnios g166) **26** Me aansono be mandagha mamō, Mu nkooro a baara ba bali mu okapfiri be. **27** Lo be, Mufulu a ngili wu lígyagha be kundaa Kriste li mu be. Ya be ka lili a nzala a kuulu ti bafiriluo be o, Mu kuulu Mufulu a Ngili aakaluo be mu mandagha mwohonon, Ya mo mali mama ngan̄ma, Ka mali mama mpya o. Mu obo, be likala emō ya Kriste, Ti bwunu a bu óluo be Mufulu a Ngili. **28** Be baana ba me, likala emo ya kriste mu matala ma, Mpaala matala ka nswe matala ma akala aamoronon nde, bihi-a-be likala a kana, Ya linyaā okala la ya nde mu nkooro a budzwa. **29** Kala be lisoolo ti nde li bunsumu, Lisoolo si ti, nswe munde wu aakasalala bunsumu, li mwana a Nzaami.

3 Limono nki dzyi Taara ali a lo mu bihi-a-be, Mpaala bata bihi-a-be baana ba Nzaami. Mu engan̄ma, bihi lili baana ba Nzaami. Me mu obo, baara ba nsie baggwene ogyahaba bihi-a-be, Mu kuulu bo kaala ka bagyahaba Nzaami o. **2** Bandughu ba me baba mukolo, Mu matala ma bihi-a-be lili baana ba Nzaami, Lo bihi-a-be nkini liisoolo bu akala liikala ku nkulu o. Yi lisoolo bihi-a-be me yiili ka nswe matala ma akala oomoronon Kriste, Bihi-a-be sa likala ti nde mu kuulu sa limono nde bwunu a bu ali nde. **3** Ya nswe munde wu li a emiini kii bubo mu Kriste aakatsehebe mukolo a nde, Ti bwunu

a bu oli Kriste wu a tse-tse. **4** Nswe munde wu aakasa masumu, Nde bubi si aakasa. Mu kuulu masumu mali bubi. **5** Lo, be lisoolo ti Yiisu ágyi mu ogyamaha masumu ma bihi, Ya mu nde ka oli a lisumu o. **6** Nswe munde wu li emō ya nde ka aafirikasa masumu o. Nswe munde wu aakasa masumu ka aamono nde o, ya ka asoolo nde o. **7** Baana ba me, Mbwuru anyaa opfiri be. Mbwuru wu aakasa mandagha mama bunsumu li wu a bunsumu, Ti bwunu a bu oli Kriste wu a bunsumu. **8** Mbwuru wu aakasa masumu li wu a ndaa dyabulu, Mu kuulu dyabulu ábaana osa masumu obaana ku ebaana. Mwana a Nzaami ágyi mu otsala bigyighili bi dyabulu. **9** Nswe munde wu li mwana a Nzaami ka aakasa masumu o, Buulu bumweē bu buufi kundaa Nzaami buli mu nde. Nde ka kughu ofirisa masumu o, Mu kuulu nde li Mwana a Nzaami. **10** Limono bunu a bo likughu ogyahaba baana ba Nzaami ya baana ba dyabulu: Nswe mbwuru wu aagwene okasalala bunsumu ka li mwana a Nzaami o, Ya bumō si kundaa wu gwene dzyi nganda-mbwuru. **11** Mandagha ma lígyughu be obaana ku ebaana me ma: Litswe likakala a dzyi ŋa kara li bihi-a-be. **12** Bihi-a-be linyaā osa ti bu ósi Kayē, Nde áli mbwuru a dyabulu, ya nde ádzwi mbwee a nde. Mu emakye nde ádzwi nde? Mu kuulu bigyighili bi nde bíli bi bibi, Lo bibi mbwee a nde bíli bibi bunsumu. **13** Bandughu mu kana, Ka likinjimi o kala ti baara ba nsie bali mu okabele be. **14** Bihi-a-be lisoolo ti bihi-a-be áyi liimara kunsu lipfu ya lili mweē, Mu kuulu liikadzyi bandughu mu kana. Mbwuru wu ggwene a dzyi li nkini kunsu lipfu. **15** Mbwuru wu aakabele ndughu mu kana li ti anga munde wu aakadzwa baara. Be lisoolo ti mbwuru wu aakadzwa baara ka li a laama lili mibvu ya mibvu o. (aiōnios g166) **16** Limono bu liisoolo bihi-a-be dzyi: Yiisu-Kriste ágwi laama li nde mu nkooro a bihi-a-be. Me mu obo bihi-a-be si lifaana ogwa laama li bihi mu nkooro a bandughu mu kana. **17** Lo kala ti mbwuru li a bilogho bi nsie yi, Ya nde mono nganda-mbwuru wu aakeghele mu elogho, Ya nde kuru mukolo a nde, Lo bunu a bo dzyi li Nzaami likughu okala mu nde? **18** Baana ba me, Ka likadzyi yini a mu bibolo ya mu mbiili yimbwe o, Lo bihi-a-be likala a dzyi li liikamoronon mu bigyighili ya mu engan̄ma. **19** Me obo bihi akala liisoolo ti bihi-a-be lili baba engan̄ma, Ya mikolo mi bihi sa mikala kunsu edzuunu

ɗa busu bu nde. **20** Mu kuulu, kala ti mikolo mi bihi mifwunu bihi, Nzaami bvulu mikolo mi bihi mu bunene ya nde soolo mandagha mwohonon. **21** Bandughu ba me baba mukolo, Kala ti mikolo mi bihi-a-be ka mifwunu bihi o, Lo bihi-a-be lili a kana ɗa busu bu Nzaami. **22** Ya sa liikagyagha nswe elogho ki liiluomonde, Mu kuulu liikasalala mikyene mi nde, Ya liikasa mandagha ma maakagwa nde esee. **23** Mukyene a nde me wu: Bihi lifaana osa kana mu nkwumu a Mwana a nde Yiisu-Kriste, Ya okala a dzyi mu banganda, Ti bwunu a bu oli mukyene wu ágwi nde bihi. **24** Nswe munde wu aakasalala mikyene mi Nzaami li emõ ya Nzaami, ya Nzaami li emõ ya nde. Bihi-a-be liikasoolo ti Nzaami li emõ ya bihi, Mu nkooro a Mufulu wu ágwi nde bihi-a-be.

4 Bandughu ba me baba mukolo, Ka likasa kana mu mifulu myehene o, Lo liikakeene mifulu, Mu osoolo kala ti mye mili mimi Nzaami. Mu kuulu mibighili mimi mpya milagha miipala mu nsie. **2** Bu me bu liisoolo be Mufulu a Nzaami: Nswe mufulu wu aalyele ti, Yiisu-Kriste ágyi mu efaana kii mbwuru, Nde li mufulu a Nzaami. **3** Ya nswe mufulu wu aabihi okihi Yiisu, Ka li wu a Nzaami o. Nde li mufulu a mutaara a Kriste, Wu lígyughu be nsia ti li mu ogya, Ya mu matala ma nde ayi li mu nsie. **4** Be baana ba me, be lili baba Nzaami, Ya be liilughulu mibighili mimi mpya mimye, Mu kuulu munde wu li mu be bvulu bunene, Ya munde wu li mu nsie. **5** Mibighili mimye mili mimi nsie, Mu obo mye mili a mbiili yi a nsie, Ya nsie yiikagyughu mye. **6** Lo bihi, bihi lili baba Nzaami. Munde wu soolo Nzaami aakagyughu bihi. Munde wuulu ka ali wu a Nzaami o, ka akaakagyughu bihi o. Obo me bu liikasoolo bihi Mufulu wu engajma ya mufulu wu a mpya. **7** Bandughu ba me baba mukolo, Litswe likakala a dzyi mu banganda-baara, Mu kuulu dzyi liikafa kundaa Nzaami, Ya nswe munde wu dzyi, Nde li mwana a Nzaami ya nde soolo Nzaami. **8** Mbwuru wu ggwene a dzyi mu banganda-baara nkini asoolo Nzaami o, Mu kuulu Nzaami li dzyi. **9** Bu, me bu oosuo Nzaami dzyi li nde ɗa kara li bihi-a-be: Nde aagweghe Mwana a nde wu a mbunu mu nsie, Mu kuulu bihi-a-be likala baba mweẽ mu nde. **10** Ya dzyi lilo lili bu: Ka oli ti bihi-a-be líidzyi Nzaami o, Lo me nde áadzyi bihi-a-be, Ya áagweghe Mwana a nde ti anga

mukaba wu osa masumu ma bihi-a-be kolokolo. **11** Bandughu ba me baba mukolo, Kala ti Nzaami ádzyi bihi-a-be mu eteese kii bu, Bihi-a-be si lifaana odzyi banganda-baara. **12** Mbwuru si mumõ nkini ámaamono Nzaami o. Kala ti bihi-a-be liikadzyi banganda-baara, Nzaami li mu bihi-a-be ya dzyi li nde lili mukughu mu bihi-a-be. **13** Bu me bu liisoolo ti bihi-a-be lili mu nde, Ya nde li mu bihi-a-be: Nde aagwi bihi-a-be Mufulu a nde. **14** Ya bihi, bihi liimono nde ya bihi lili mu osuo bumpughulu, Ti Taara áagweghe Mwana a nde, mu ogyabvwuhu nsie. **15** Nswe mbwuru wu aakihi ti Yiisu li Mwana a Nzaami, Nzaami li mu nde ya nde li mu Nzaami. **16** Ya bihi, bihi-a-be liisoolo dzyi li oli a Nzaami mu bihi, Ya bihi-a-be liikasa kana mu lo. Nzaami li dzyi. Mbwuru wu li mu dzyi li mu Nzaami, ya Nzaami li mu nde. **17** Bu me bu ookamõjono dzyi lili mukughu mu bihi-a-be, Mu kuulu likala a kana mu etsughu kii muyala. Ya bumweẽ bu bihi-a-be mu nsie yi, Bukala ti anga bubu Kriste. **18** Mu dzyi ka oli a Nzalamweẽ o, Lo dzyi lili mukughu liikamaha nzalamweẽ, Mu kuulu okala a nzalamweẽ ookasuo ti bihi-a-be lili mu okakebe masyeme. Ya munde wu li a nzalamweẽ, ka li mukughu mu dzyi o. **19** Lo, bihi-a-be liikadzyi banganda-baara, Mu kuulu Nzaami ádzyi bihi-a-be nsomo. **20** Kala mbwuru lyele ti: «Me ndzyi Nzaami», Ya nde li mu okabele nganda-mbwuru, Nde li nga-a-mpya. Mu kuulu, mbwuru wu ggwene dzyi nganda-mbwuru wu ali mu okamono nde, Ka kughu odzyi Nzaami wuulu nde ka aakamono nde o. **21** Li me litumu li ágwi nde bihi-a-be: Mbwuru wu dzyi Nzaami, Nde faana odzyi si nganda-mbwuru.

5 Nswe munde wu aasa kana ti Yiisu li Kriste, nde li mwana Nzaami. Ya nswe munde wu dzyi Nzaami, Dzyi si mwana a nde. **2** Bu me bu liikasoolo ti bihi-a-be liikadzyi baana ba Nzaami: Mu matala ma liikadzyi Nzaami ya ma liikanama litumu li nde. **3** Mu kuulu, dzyi li Nzaami lili ti, Bihi-a-be liikanama mikyene mi nde. Ya mikyene mimye ka mili a leme o. **4** Mu kuulu, nswe munde wu li mwana a Nzaami, aakalughulu ɗa nkulu a mandagha ma nsie. Ya me mu kana bihi-a-be liikalughulu ɗa nkulu a mandagha ma nsie. **5** Nande aalughulu ɗa nkulu a mandagha ma nsie, Kala ka munde o wu aakasa kana ti Yiisu li Mwana a Nzaami?

6 Yiesu-Kriste li munde, Wu ágyi mu madza ya mu makili. Nde ka ágyi yini a ya madza o, Lo nde ágyi ya madza ya makili. Mufulu li mu osuo bumpughulu mu nde, Mu kuulu Mufulu li engarjma. 7 Mu kuulu bampughulu bali batere: 8 Mufulu, madza ya makili. Ya bumpughulu bu bo bansa batere buli mu okagye nzili mō. 9 Kala ti bihi-a-be liikakihi bumpughulu bu baara, Lo bumpughulu bu Nzaami bubvulu bunene, Bumpughulu, bu bo, ngu bu ásuo nde mu mi mitala Mwana a nde. 10 Munde wu aakasa kana mu Mwana a Nzaami, Nde li a bumpughulu bu bo munsu mukolo a nde. Munde wu aagwene okasa kana mu Nzaami, Aakasa ti Nzaami akala nga-a-mpya, Mu kuulu nde ka aasi kana mu bumpughulu Bu ookasuo Nzaami mu Mwana a nde o. 11 Bumpughulu bubo me bu: Nzaami ágwi bihi-a-be laama lili mibvu ya mibvu, ya laama lilo lili mu Mwana a nde. (aiōnios g166) 12 Wu li a Mwana li a laama, wu gwene a Mwana a Nzaami ka li a laama o. 13 Me aansono be mandagha ma, Mpaala be lisoolo ti, be lili a laama lili mibvu ya mibvu, Be ba liikasa kana mu nkumu a Mwana a Nzaami. (aiōnios g166) 14 Emiini ki lili a bihi mu nde me ki: Kala ti bihi liluomo nde elogho ti bwunu a bu oli gwaa li nde, Lo nde aakagyughu bihi. 15 Ya buulu bihi lisoolo ti, Nzaami aakagyughu bihi, Bihi lisoolo si ti sa likabagha nswe kye ki liluomo nde. 16 Kala ti mbwuru mono ndunghu mu kana mu okasa lisumu, lisumu li liigwene okabiri ku lipfu, Nyaā nde asamana, ya Nzaami sa agwa laama kundaa munde wu li mu okasa lisumu. Me mbili obo, mu babo ba baakasa masumu ma maagwene okabiri ku lipfu. Lo, me ka ndyele be o, mu osamana mu nkooro mbwuru wu aakasa lisumu li liikabiri mu lipfu. 17 Nswe ndagha yiili ka yili yi a bunsumu o, yili lisumu, Lo oli a lisumu liili ka liikabiri ku lipfu o. 18 Bihi lisoolo ti nswe munde, wu li mwana a Nzaami ka aafirika masumu o, Mu kuulu Yiesu-Kriste aakakebe nde, Ya Wu Mubi ka kughu osa nde si elogho o. 19 Bihi lisoolo ti bihi lili baba Nzaami, Ya byehene bi bili ŋa yulu a nsie, bili kunsu lileene li Wu Mubi. 20 Lo bihi lisoolo si ti Mwana a Nzaami aagy, Ya aagwi bihi mayele, Mpaala bihi lisoolo munde wu li Wu-a-Ngarjma. Ya bihi lili mu Ngarjma mu nzili a Mwana a nde Yiesu-Kriste. Me nde li Nzaami Wu-a-ngarjma ya laama lili mibvu ya mibvu. (aiōnios g166) 21 Baana ba me, Lisa mayele mu banzaami baba mpya!

2 Dzã

1 Wu me mukwuru ndi mu osono mukaana wu kundaa Mukaha wu ósuolo Nzaami ya kundaa baana ba we ba aakandzyi me mu engañma kyehene, ka yini a me ngasighi o aakandzyi be, lo ya baara bwohono ba basoolo engañma, **2** mu kuulu engañma eli mu bihi, ya kye sa ekala ya bihi mu mibvu ya mibvu. (aiñ g165) **3** Nyaã bubwe, nyii ya edzuunu, bi biikafa kundaa Nzaami Taara, ya kundaa Yiisu-Kriste Mwana a Taara, bikala ya bihi-a-be mu engañma ya mu dzyi. **4** Me aandi a esee ki elagha mu omono baana ba we ba bali mu okadzyara mu nzili yi engañma, bwunu a bu oli mukyene wu lígyagha bihi-a-be kundaa Taara. **5** Ya mu matala ma, ma Mukaha, yi nduomo me we yi: Litswe likala a dzyi ña kara li bihi-a-be ya mu banganda-baara, ya boho si bakadzyi bihi-a-be. Me ka ndi mu osono we mukyene wu munyaghara o, lo munde wu lili a bihi-a-be obaana ku ebaana. **6** Ya bu me bu oli dzyi: Nyaã be likadzyara ti bwunu a bu ookaluomo mikyene, munde me mukyene wu lígyubu be, obaana ku ebaana. **7** Mu kuulu banga-a-mpya balagha baalwulu mu nsie. Bo ka bali mu okakihi o ti Yiisu-Kriste ágyi mu nyuru yi a musunu. Wu aabili obo li mbwuru nga-a-mpya ya mutaara a Kriste. **8** Mu obo, be beme lisa mayele, mu kuulu be linyaã opfihili mimburu mi liibagha bihi mu esala e bihi. Lo be libagha mufuru wu munene. **9** Nswe munde wu aagwene onama luo li Kriste, lo bwehe ndagha nkimi ña yulu, ka li mu Nzaami o. Munde wu aanabara mu luo lilo, nde li emõ ya Taara ya Mwana. **10** Mu obo, kala ti mbwuru gyi kundaa be, ya nde ka luo be luo lilo o, ka ligyagha nde kundaa be o, ya ka ligwa nde mboro o. **11** Mu kuulu munde wu aagwa nde mboro, ayi li emõ ya nde mu bigyighili bi nde bi bibi. **12** Me ndi a mandagha malagha ma olyele be, lo me ka aandzyi osono mo mu mukaana wu o. Mu kuulu me ndi a kana ti me sa ngya kundaa be, ya me sa mbili ya be meme, mpaala esee e bihi-a-be ekala kii mukughu. **13** Baana ba mbwee a we wu mukaha wu ósuolo Nzaami si, bagwi we mboro.

3 Dzã

1 Wu me mukwuru ndi mu osono mukaana wu, kundaa we Ngayuse ndughu a me wu mukolo, wu aakandzyi me mu enganyma. **2** Ndughu a me wu mukolo, me nzyi ti mandagha ma we mwohonon makala ma mabwe, ya nyuru a we yikala mu bunsili ti bu li we bunsili mu mufulu. **3** Me aamono esee ki elagha, mu kuulu matala mwohonon ma ookagya bandughu mu kana kunu bo baakasuo bumpughulu mu enganyma ki eekamononon mu bumweẽ bu we, ya bu aakadzyara we kunsu otsyeme ku enganyma. **4** Esee e me ki ebvulu olagha, me mu ogyughu ti, baana ba me bali mu okadzyara kunsu enganyma. **5** Ndughu a me wu mukolo, we li mu okasala bwunu a bu ookatumu kana mu mandagha mwohonon ma aakasa we mu bandughu mu kana, ngu okala mu banzyi. **6** Na nkulu a libwunu, bo baasuo bumpughulu bu dzyi li we. Kala ti we baha bo mu bilogho bi bali a bo nzala a bye mu midzie mi bo mimi esala, we sa sa bubwe, ti bwunu a bu ofaana kundaa Nzaami. **7** Mu kuulu, me mu nkooro a Nkwumu a Kriste, bo baagyene gwene obagha elogho, ki eefi na myaa mi babo ba bagwene osoolo Nzaami. **8** Mu obo, bihi-a-be lifaana okagyagha baara baba obo, mu kuulu lisala emõ ya bo, mu esala kii otsala nsia yi a enganyma. **9** Me aansono mukaana wu mupfi kundaa libwunu. Lo Dyoterefe, wu dzyi okakala mpfumu a babake, ka aakakihi mi liikalyele bihi o. **10** Mu obo, na akala aangya me, me sa nsuo mandagha mamu mwohonon ma aakasa nde, mandagha ma mabi ya mama mpya, ma aakabili nde mu manyuru ma bihi. Ya na yulu onjo, nde aakabihi ogyagha bandughu mu kana. Ya babo ba baakadzyi ogyagha bo, nde aakakahaba bo ti banyaã ogyagha babo, ya aakabyi bo mu libwunu. **11** Ndughu a me wu mukolo, ka nama efaana ki ebi o, lo nama efaana ki ebwe. Munde wu aakasa bubwe li wu a Nzaami, lo munde wu aakasa bubi, ka amono Nzaami o. **12** Baara bwohonon bali mu osuo bumpughulu bu bubwe mu Demeteryose, ya enganyma kyeme eli mu osuo bumpughulu bu nde. Lo bihi si lili mu osuo bumpughulu mu nde, ya we soolo ti bumpughulu bu bihi buli bubu nganyma. **13** Me ndi a mandagha malagha makimi mama olyele we, lo me ka nzyi osono we mo mu mukaana o. **14** Mu kuulu me ndi a

kana ti me sa mono we mu bitsughu bibi nkulu, ya me meme sa mbili ya be. Me ndi a kana lili ofirimono we mu bitsughu bibi nkulu, ya me meme sa mbili ya we. Nyaã edzuunu ekala ya we! Bandughu bagwi we mboro. Wehe si gwa mumõ-mumõ mu bandughu mboro.

Dzude

1 Me Dzude, musala a Yiisu-Kriste, mwana a taara a Dzake, nsono mukaana wu kundaa babo ba óti Nzaami Taara mbili, babo ba aakadzyi Nde, ya ba aakakebe Nde mu Yiisu-Kriste. **2** Nyaã ngebe, edzuunu ya dzyi bi Nzaami bipfini kundaa be ku olagha! **3** Bandughu ba me baba mukolo, buulu me áakankala a nzala a osono be mu mi mitala obvwughu o bihi bwohono. Me áamono ti me ali mfaana osono be, mpaala me ngwa be mpama mu odzwana mvulu yi a kana li baagwi kundaa baana ba Nzaami sa limō kuu mankulu. **4** Mu kuulu baara babake baasomo mu ensweghe ŋa kara li be, baara baala mumfwunu a bo áyi básono nde edzighi, baara ba babi ba baakasobo bwehe bu Nzaami a bihi mu enkwunu ya ba baakatunu Yiisu-Kriste, Muluo ya Mfumu a bihi. **5** Kundaa be ba lisoolo mandagha mwohono mamo, me ndzyi olibili be mweē ti Mfumu, bu amana obvwuhu ekaana e nde mu nsie yi a Edzipite, ŋa nseele nde ádzwi ba bábihi osa kana mu nde. **6** Bwunu obo si, bangye-yulu ba bábihi okala ŋa ebini ki ógwi bo Nzaami, lo ba bábulusihi ebini ekye, Nzaami ábunu bo mu mibvu ya mibvu kunsu misyi mimi bisyeē kunsu mpyibi yi a laŋa-laŋa mu okebe Mumfwunu wu a etsughu ki enene. (aiðios g126) **7** Lilibili si mweē mu bvulu lili Sodome ya lili Ngomore ya mu mabvulu ma máli be-bele ya mo. Baara baba mabvulu mamo básalala enkwunu ya basagha obvughu mbughu ya baara baala ka báli baara ti anga bo o. Baara baba mabvulu mamo baakamono mpara yi masyeme mama mbaa yi mibvu ya mibvu ya obo me ogyehe o baara bwohono. (aiðnios g166) **8** Bwunu obo si, baara ba baasomo mu ensweghe ŋa kara li be bali a bipfu bi baara baba mabvulu mamo. Bo baakatsimi mandagha ma maakasohobo manyuru ma bo mu masumu, baakatsaala litumu li Mfumu, baakatughu bangye-yulu ba bali a nsia. **9** Lo Misyale, mukwuru a bangye-yulu, mu matala ma ákatemene a nde dyabulu ngangala ya ma ákadzuulu nde nyuru a Moyidze ya nde, nde ka ási dyabulu mumfwunu wu bitughu o, lo nde ályele nde ti: «Nyaã Mfumu asyeme we!» **10** Lo bo baakatughu bi bagwene osoolo. Ya mandagha ma bagyahaba bo, bo bagyahaba mo mu embwuru ti anga banyama ba bagwene a

mayele. Me mandagha mamo maakadzwa bo. **11** Nyii mu bo, bo baanama nzili a Kayē. Bo básomo kunsu ogwujumu o Balaame mu nkooro a mufuru, ya bápfighili kunsu munsohobo ti bu ósi Kore! **12** Me bo baakasa ti baara bakubu makya mu matala ma baakadza bi-odza bibi ebvughu mu okadza ya okan̄ma gwene a bupfiri ya bo baakatsimi yini a mila mi bomo. Bo me bidzi bi bigwene a madza bi ookabiri efulu. Bo bali ti anga miti mi migwene a bimburu mu ndo yi baakatolo bimburu, miti mi bátumunu, mi mísaakpa. **13** Bo bali ti anga mimpaa mi madza ma mubu mimi mpini mi miikapaha fulu li bigyighili bi bo bibi bupfiri. Bo bali efaana ki banomajomo ba baakabulugye magye-a-gye, ba óbunu Nzaami kunsu mpyibi yi a laŋa-laŋa mu mibvu ya mibvu. (aiðn g165) **14** Me mu obo, Enoke mbwuru wu a nsama obaana Adā, ábighili ya ályele ti: «Mono, Mfumu aagyi ya bangye-yulu ba nde baba ngili **15** mu osa mumfwunu wu a baara bwohono, ya mu osyeme bo mu bigyighili bi bo bi bibi, bibi ogwene osoolo Nzaami, ya mbiili a bo yi bitughu yi oli a banga-a-masumu ba bagwene a budziri ŋa nkulu a Nde.» **16** Bo bali baara ba baakan̄junu, ba bagwene a esee mu bumweē bu bo ya ba baakabuludzyara bwunu a bu ookatumu nsogho a embwuru e bo. Bo baakabili ya masyighi ya baakapele baara mpaala babagha ndaana. **17** Lo be, bandughu ba me baba mukolo, liikalibili mweē mu mandagha ma ótswama olyele bantumu ba Mfumu a bihi Yiisu-Kriste. **18** Bo bákalyele be ti: «Mu matala mama masini, sa okala a banga-a-munsighi ba baakanama nsogho a bo yi mbi.» **19** Limono, bo me banga-a-munkabala, ba baakabuludzyara mu embwuru, ya bo ka bali a Mufulu a Nzaami o. **20** Lo be, bandughu ba me baba mukolo, liikatwu bumweē bu be ŋa yulu a kana li be lili nkara a ngili, ya liikabuono mu Mufulu a Ngili. **21** Liikakala beme kunsu dzyi li Nzaami, bu lili mu okakebe ti Mfumu a bihi Yiisu-Kriste amono be ngebe mu laama lili mibvu ya mibvu. (aiðnios g166) **22** Liikamono ba bali a makeē ngebe. **23** Babake, liikabvwuhu bo bu ligwohono bo munsu mbaa. Kundaa bana, liikamono boho si ngebe kunsu nzalamweē, mu okabele binkuru bi bo bibi mubviini mu nkooro a bigyighili bibi musunu. **24** Kundaa munde wu kughu okebe be mpaala be linyaã obwa mu masumu, ya otehebe be ŋa nkulu a nsia a nde, gwene a epfwumu, kunsu muyayaã, **25** nsia, bunene, litumu ya

lileene bikala yini a kunda Nzaami, Mubvwuhu
a bihi mu Yiisu-Kriste Mfumu a bihi, nsomo a
matala mwohono, mu matala ma tee mu mibvu
ya mibvu! Aamene! (aiōn g165)

Apokalipese

1 Mukaana wu li mu usuo mandagha mama ensweghe ma ógwi Nzaami Yiisu-Kriste, mu kuulu nde asuo kundaa basala ba nde mandagha ma mafaana ogya edzi-dzighi. Ya nde ágweghe ngye-yulu a nde mu osuo mo kundaa musala a nde Dzã. **2** Me Dzã aasuo bumpughulu mu mandagha mwohonono ma aamono nde: Ndagha a Nzaami ya bumpughulu bu Yiisu-Kriste. **3** Esee kundaa munde wu li mu okataã mukaana wu libighi wu! Esee kundaa babo ba baagyughu ya ba baakebe mandagha ma básonono mu nde, mu kuulu matala maabehene. **4** Me Dzã nsonono mukaana wu kundaa Mabwunu ma Nzaami nsaama ma mali ku etsulu e nsie kii Adzi. Nyaã bwehe ya edzuunu bi bifi kundaa munde wu li, Wu áali ya wu li mu ogya, bi bifi kundaa mifulu nsaama mi mili ña nkulu a likubu li nde, **5** ya bi bifi kundaa Yiisu-Kriste, mpughulu wu aakakebe mukihhi wu álabá nde, wu áasighili nsomo mu ba bápkí, ya mfumu a mikogho mi nsie. Kundaa munde wu dzyi bihi, wu áakwulu bihi mu masumu ma bihi mu makili ma nde **6** ya wu ási bihi baara ba empu, bangaa ba Nzaami mu osalala Nzaami, Taara a nde. Nyaã nsia ya lileene bikala kundaa nde mu mibvu ya mibvu! «Aamene!» (aiñ g165) **7** «Limono, nde li mu ogya ña kara li bidzi: Ya nswe mbwuru sa amono nde, ngu okala babo ba baatobolo nde libee, ya madzumu mwohonono mama nsie, sa masomo pfiili mu nkooro a nde. Eê! Aamene!» **8** Me ndi Alafa ya Omenga, obo bu olyele Mfumu Nzaami, munde wu li, wu áakakala ya wu li mu ogya, Nga-a-Mpwũ. **9** Me Dzã, ndughu a be mu kana wu lili emõ ya be mu kimini, mu emfumu ya mu mukama mu Yiisu. Me áandi ku elyi kii Patamose mu nkooro a Ndagha a Nzaami ya mu nkooro a bumpughulu ba ánsuo me mu Yiisu. **10** Mu matala ma óbagha me Mufulu mu etsughu e Mfumu, me áangyughu likyi lili mpini ti anga likyi li mvulu-a-mvulu ku mbihi a me, **11** li líkalyele ti: Mandagha ma li mu okamono we, sono mo munsá mukaana, ya gweghe nde kundaa Mabwunu ma Nzaami nsaama ma mali: Ku Efese, ku Simirine, ku Perengame, ku Tyatire, ku Saradese, ku Filadelefí, ya ku Lawodise. **12** Me áankaghala mu omonono munde wu áakabili ya me, ya bu nkaghala, me áamono bilogho nsaama bi baakatwulu miindi bi bili mu oore. **13** Ya ña

kara-a-kara li bilogho nsaama bi baakatwulu miindi bibye me áamono wu áafaana ya mwana a mbwuru. Nde álahá enkuru ki ela tee ku myili, ya álahá likee lili mu oore mu etulu. **14** Mutswi ya mfu a nde bíli ti anga mfu a bindoomo bi bipejeme, ti anga buju, ya mihi mi nde míli ti anga míle mi mbaa. **15** Myili mi nde mifaana ya boronze lili ntala, li bátsehebe ña yiri-a-mbaa, ya likyi li nde áli lifaana ya nkele a mimpagha mi madza ma manene. **16** Mu kwogho-a-kwogho e nde, nde ákwara banjomanomo nsaama, ya mu murjma a nde ókapala lípee lili mampele muolo li lito. Edzili e nde ékasehene ti anga bu ookasehene tala mu mpini a lo lwohonono. **17** Mu matala ma ámonono me nde, me áambwi ña myili mi nde ti anga mbwuru wu aapki. Lo nde átwulu kwogho-a-kwogho e nde ña yulu a me ya ályele ti: «Ka kala a nzalamweê o! Me ndi wu a Nsomo ya wu Masini, **18** ya Wu a Mweê. Me áli aankpi, ya mu matala ma, me ndi mweê mu mibvu ya mibvu, ya me ndi a mankogholo ma lipfu ya mama nsie a ba bápkí. (aiñ g165, Hadēs g86) **19** Mu obo, sono mandagha ma aamono we, ma mali ya ma mafaana ogya ña mbihi. **20** Mbaala a mpaana a banjomanomo nsaama ba aamono we mu kwogho-a-kwogho e me ya bilogho bi baakatwulu miindi nsaama bi bili mu oore ngu yi: Banjomanomo nsaama bali bangye-yulu baba Mabwunu ma Nzaami nsaama, ya bilogho bi baakatwulu miindi nsaama bili Mabwunu ma Nzaami nsaama.»

2 Nde ályele me ti: Sono bu kundaa ngye-yulu wu a Libwunu li Nzaami lili mu bvulu lili Efedze: Ma me mandagha ma olyele munde wu aakwara banjomanomo nsaama mu kwogho-a-kwogho e nde, wu aakabulugye ña kara-a-kara a bilogho nsaama bi baakatwulu miindi nsaama bibi mu oore. **2** Nde lyele ti: Me nsoolo bigyighili bi we, esala e we kii mpini, ya mukama a we. Me nsoolo ti we aakabihi okala emõ ya bantumú baba mpya. We aatsihi babo ba baakalyele ti bo bali bantumú, lo bo ka bali bantumú o. Me nsoolo ti we aabaghala ti bo bali banga-a-mpya. **3** We li a mukama, me aamono mpara mu nkooro a nkwwu a me, ya we ka aakolo o. **4** Lo ndagha yi mbele me kundaa we me yi: We aatsili mbaa a dzyi li áli a we nsomo mu me. **5** Mu obo, libili mweê ñana-ango we aabwi ya ñana-ango we li mu bu! Gyiñi mayele ya yabvughuru mu bigyighili bi we bibi nsomo. Kala ti we ka gyiñi

mayele o, me sa ngwa kundaa we ya me sa maha elogho e we ki baakatwulu miindi na mbughu a kye. **6** Lo ndagha yimbwe yi li a we me yi: We aakabele bigyighili bi baara ba emvujunu e Nikola, bigyighili bi aakabele meme si. **7** Nyaã munde wu li a matswi, agyughu mandagha ma olyele Mufulu kundaa Mabwunu ma Nzaami! Kundaa mbwuru wu akala aalughulu, me sa ngwa nde nzili mu odza bimburu bi muti wu aakagwa bumweë wu li ku paradise li Nzaami. **8** Nde alyele me ti: Sono bu kundaa ngye-yulu a Libwunu li Nzaami lili mu bvulu lili Simirene: Ma me mandagha ma olyele Wu-a-Nsomo ya Wu Masini, munde wu aapki ya wu aayavughuru mu bumweë. **9** Me nsoolo mpara a we ya buwele bu we, lo we li esini! Me nsoolo otsaala ku oli mu okatsaala we baara babo ba bali mu okakoboro ntulu ti bo bali ngu ba-Dzwife. Ankoho bo ka bali ba-Dzwife o, lo bo bali baara baba emvujunu e Satana. **10** Ka kala a nzalamweë mu mpara yi faana omono we o. Mono, Dyabulu sa alo baara babake na kara li be mu boloko, mu kuulu bagyeele kana li be. Be sa limono mpara mu bitsughu kwumu. Lo we kebe mukihi wu alaba we tee ku lipfu, ya me sa ngwa we muburu wu bumweë. **11** Nyaã munde wu li a matswi, agyughu mandagha ma olyele Mufulu kundaa Mabwunu ma Nzaami! Munde wu akala aalughulu, nde akala ka kpa mu sa lili gywolo o. **12** Nde ályele me ti: Sono bu kundaa ngye-yulu wu a Libwunu li Nzaami lili mu bvulu lili Perengame: Ma me mandagha ma olyele munde wu li a lipee lili mampele muolo ma mato. **13** Me ngyighili osoolo ku aakakala we: Ojo me na oli likubu li Satana. Lo we aagyighili okwara nkumu a me. Antipase mpughulu a me wu aakebe mukihi wu alaba, bádzwi nde kundaa be, oko ku ookakala Satana. Ngu okala ti mandagha mamó aluru oko, lo we ka aatunu kana li li a we mu me o. **14** Lo me ndi a mana mandagha ma aansyeme me we. Oli a baara kundaa we ba aakebe maluo ma Balaame mubighili wu a mpya. Me Balaame áakaluo mukogho Balake bunu-a-bo nde akughu otsiini baana ba Isarayelee mu obwa mu masumu, mu okadza tuo li ágwi mikaba kundaa bityeghe ya mu okasa enkwunu. **15** Bwunu obo, wehe si li a baara ba aakebe maluo ma baara ba emvujunu e Nikola. **16** Me mu obo, we gyinji mayele ya sobo bipfu bi we! Kala pele, edzi-dzighi me sa ngwa kundaa we, ya me sa ndzwana mvulu ya bo mu lipee lili munja a me. **17** Nyaã munde wu li a matswi agyughu mandagha ma olyele Mufulu kundaa Mabwunu ma Nzaami! Kundaa munde wu akala aalughulu, me sa ngwa bi-odza bi baakata ti «maane» ma básweghe mu mayulu. Me sa ngwa nde kele li lipejeme. Na yulu a kele lilo básono nkumu yi nyaghara yiili mbwuru si mumó ka soolo yo o, kala ti ka yini a munde wu gyagha lo o. **18** Nde ályele me ti: Sono bu kundaa ngye-yulu wu a Libwunu li Nzaami li lili mu bvulu lili Tyatire. Ma me mandagha ma olyele Mwana a Nzaami, wu li a mihi ti anga mule a mbaa ya myili mi nde mifaana ya boronze lili ntala. **19** Me nsoolo bigyighili bi we, dzyi li we, kana li we, esala e we ya mukama a we. Me ngyighili osoolo ti bigyighili bi we bibi nsele bibvulu bibi nsomo mu mutala. **20** Lo ndagha yi mbele me kundaa we me yi: We li mu okanyaá Dziedzabele wu, mukaha wu aakakoboro ntulu ti nde li mubighili a Nzaami, nde wu li mu okasa ti basala ba me bagwujumu, bu ali mu okaluo bo okasamana banzaami baba bityeghe ya mu okadza tuo li ágwi mikaba kundaa banzaami baba bityeghe. **21** Me aangwi nde matala mama ogyinji mayele, lo nde ka dzyi onyaa okasamana banzaami baba bityeghe o. **22** Mono, me sa ntsili nde ya babo ba baakasa enkwunu ya nde na yulu a mbughu munsá kimini li lilagha, kala ti bo ka bagyinji mayele mu bigyighili bi bo bi bibi o. **23** Me sa ndzwa baana ba nde. Me obo, Mabwunu ma Nzaami mwohonó akala maasoolo ti ngu me aakankeene bitsimi ya mikolo. Ya me sa mbvurulu kundaa mbwuru-mbwuru mu be, bwunu a bu oli bigyighili bi nde. **24** Lo kundaa be, be banga a kana babake ba lili mu bvulu lili Tyatire, be ba liigwene okihi maluo ma nde, ya be baala nkini liibaghala mandagha mama «muyighi a Satana» o, me ka nkwichi be leme likimi o. **25** Lo mandagha ma lili a be, likebe mo tee na akala aayamvughuru me. **26** Kundaa mbwuru wu aalughulu, kundaa munde wu aakebe bigyighili bi me tee ku masini, me sa ngwa nde litumu na yulu a mansie. **27** «Nde sa atumu mo ya mukaana wu a esyeë, ti bu baakabulu mayughu mama mu bumweë,» **28** bwunu obo si me aangyagha litumu kundaa Taara a me. Ya me sa ngwa nde njomajomo wu epala. **29** «Nyaã munde wu li a matswi, agyughu mandagha ma olyele Mufulu kundaa Mabwunu ma Nzaami!»

3 Nde ályele me ti: Sono bu kundaa ngye-yulu wu a Libwunu li Nzaami li lili mu bvulu lili Saradese. Ma me mandagha ma oleyele munde wu li a mifulu nsaama mi Nzaami ya barjomaromo nsaama. Me nsoolo bigyighili bi we. Me ngyighili osoolo ti baara baakasa we nsia ti we li mweë, lo we li wu aakpi! **2** Kahala mihi! Gwa kana li lisyili a we mpama nsomo lo likpa. Mu kuulu, me ka aamono bigyighili bi we bibi mukughu na nkulu a Nzaami a me o. **3** Me mu obo, we faana olibili mweë mu maluo ma aabagha ya ma aagyughu we. Kebe mo ya gyinji mayele. Kala ti we ka kahala mihi o, me sa ngya ti anga nga-a-pfyibi, ya we ka soolo o mu nki tala me akala aangya ensihibi kundaa we. **4** Lo we li a ndaama a baara ku Saradese ba baagwene osa binkuru bi bo mubviini. Bo sa bakadzyara ya me ya binkuru bi bipjegeme, mu kuulu bo bafaana mu olaha bye. **5** Munde wu akala aalughulu, sa alaha binkuru bi bipjegeme. Si okala ka bunu, me akala ka amaha nkumu a nde mu mukaana wu a bumweë o, lo me sa nkihi ti me nsoolo nkumu a nde na nkulu a Taara a me ya na nkulu a bangye-yulu ba nde. **6** Nyaã munde wu li a matswi agyughu mandagha ma oleyele Mufulu kundaa Mabwunu ma Nzaami! **7** Nde ályele me ti: Sono bu kundaa ngye-yulu a Libwunu li Nzaami lili mu bvulu lili Filadelefi. Ma me mandagha ma oleyele Wu-a-Ngili, Wu-a-Nganma, wu li a bvungulu li mukogho Dabvide. Kala ti me ndzubulu edzughubu, mbwuru ka kughu okuru kye o. Kala ti me nkuru edzughubu, mbwuru ka kughu odzubulu kye o. **8** Me nsoolo bigyighili bi we. Mono, me aantwulu na nkulu a we murjma a nzo bwaha, wuulu mbwuru ka kughu okuru nde o. Mu kuulu, we ka li a mpini yi alagha o, lo we aakebe ndagha a me ya we ka aatunu nkumu a me o. **9** Me sa ngwa we baara baba emvununu e Satana, ba baakalyele ti bo bali ba-Dzwife lo bo ka bali ba-Dzwife o, mu kuulu bo bali banga a mpya. Me sa nsa kuulu ti bo bayakunu mabuo na myili mi we, ya basoolo ti me aandzyi we. **10** Buulu we aakebe ndagha a me ya mukama, me meme sa nkebe we mu matala mama bigyele ma maagya na yulu a nsie yohono, mu ogyeele baara ba nsie bwohono. **11** Edzi-dzighi me ndi mu ogya. Gyighili okwara kana li li a we mu me, mpaala mbwuru anyaa ogwohono muburu a we. **12** Kundaa munde wu akala aalughulu, me sa nsa nde akala kwii li linene mu nzo a Nzaami a me. Si okala ka bunu nde ka afiripala omo o. Me sa nsono nkumu a Nzaami a me na yulu a nde ya nkumu a bvulu li Nzaami a me: Yerusaleme li linyaghara li lifi ku yulu kundaa Nzaami a me. Me sa nsono si nkumu a me yi nyaghara na yulu a nde. **13** Nyaã munde wu li a matswi agyughu mandagha ma oleyele Mufulu kundaa Mabwunu ma Nzaami! **14** Nde ályele me ti: Sono bu kundaa ngye-yulu wu a Libwunu li Nzaami lili mu bvulu lili Lawodise. Bu me bu oleyele bu baakata ti «Aamene», Mpughulu wu aakakebe mukihwi wu álabá ya Mpughulu wu a nganma, wu li ebaana e byehene bi ógyighili Nzaami. **15** Me nsoolo bigyighili bi we, me ngvili osoolo ti we ka li mudzili o, we ka li mbaa o. Ali bubwe we kala mudzili bwunu we mbaa! **16** Mu obo, buulu we li eyeene ya we ka li mudzili bwunu we mbaa o, me sa ndughu we mu murjma a me. **17** Mu kuulu we li mu okalyele ti: Me ndi esini, me aambagha busini, me ka afirinsyili a nzala a elogho o. Lo we weme ka soolo o ti bumweë bu we buli bubu minyoö, bubu nyii, we li muwele, enkpa-mihwi ya mpene. **18** Me mpi we luu mu oswumu kundaa me oore li bátsehebe mu mbaa mpaala we kala esini, ya binkuru bibi pjegeme mpaala we laha bye, ya budzwa bu mpene a we bunyaã omogono. Swumu si mukele a mihi mu kuulu balo we nde mu mihi, mpaala we firimono. **19** Me, me aakamfyeë ya aakansyeme babo bwohono ba aakandzyi me. Mu obo, aakakala a mbaa mu esala ya gyinji mayele! **20** Mono, me aantemene na murjma a nzo ya me ndi mu okakoboro. Kala ti mbwuru gyughu likyi li me, ya dzubulu murjma a nzo, me sa nsomo mu nzo a nde, me sa ndza emö ya nde, ya nde sa adza emö ya me. **21** Kundaa munde wu akala aalughulu, me sa mbwihwi nde nsini ya me na likubu li me, ti bwunu a bu aandughulu meme si, ya aambwi nsini ya Taara a me na likubu li nde. **22** «Nyaã munde wu li a matswi agyughu mandagha ma oleyele Mufulu kundaa Mabwunu ma Nzaami!»

4 Na mbihwi onjo, me áamono murjma a nzo wu bádzubulu mu mayulu. Likyi lili nsomo li ángyughu me mu okabili kundaa me ti anga mvulu-a-mvulu, liflyele me ti: Gya kumu na, ya me sa nsuo we mandagha ma maagya na nsele. **2** Naana onjo, Mufulu ábagha me, ya me áamono likubu mu mayulu, ya na yulu a likubu lilo mbwuru mumö ábwi-nsini. **3** Munde wu

ábwi-nsini ákasehene ti anga mameē mama ntala ma baakata ti dzasepe ya saradwane. Ya mungongolo wu áakasehene ti anga limeē lili ntala li baakata ti emerode ádzzi likubu me. 4 Óli a makubu makimi makwumu-muolo ya mana ma mádzzi likubu lilo, ya ŋa yulu a mo, bakwuru makwumu-muolo ya bana bábwinsini. Bo bálahá binkuru bi bipejeme ya miburu mimi mu oore mu mitswi mi bo. 5 Mu likubu ókapala misehene, nkyi ya bipama. Miindi nsaama mikanama ŋa nkulu a likubu. Miindi mimye me mifulu nsaama mi Nzaami. 6 Ŋa nkulu a likubu óli ti anga mubu wa madza ma maakasehene ti anga bipehe bi mbwara. Ŋa kara-a-kara a likubu ya mu mambee ma lo, óli a bibuo bibi mweē bina bi bílwulu mu mihi ku nkulu ya ku mbihi. 7 Ebuo kii mweē kii nsomo éfaana ya nkoho, kii buolo éfaana ya pulu li mulumu a ngoomo, kii bitere éli a edzili ti anga mbwuru, ya kii bina éfaana ya mbini wu li mu okaluru ku yulu. 8 Nswe ebuo kii mweē mu bibuo binsa bina bibye éli a mapaba masemene. Mapaba mamó málwulu mu mihi ngulu ya ngulu. Mpyibi ya mwī, bo ka baakakolo o mu okalyele ti: «Wu-a-ngili, Wu-a-ngili, Wu-a-ngili,» «Mfumu Nzaami, Nzaami-a-Mpwū,» wu áli, wu li ya wu aagyá! 9 Ya nswe matala ma ookagwa bibuo bibi mweē bibye nsia, budziri ya matuono kunda mundu wu aabwi nsini ŋa yulu a likubu, mundu wu li mweē mu mibvu ya mibvu, (aiōn g165) 10 bakwuru makwumu-muolo ya bana bakakunu mabuo ŋa nkulu a wu aabwi nsini ŋa yulu a likubu, bakasamana mundu wu li mweē mu mibvu ya mibvu, batsili miburu mi bo ŋa nkulu a likubu mu okalyele ti: (aiōn g165) 11 Mfumu a bihi ya Nzaami a bihi, we faana mu ogyagha nsia, budziri, ya lileene, mu kuulu we áagyighili bilogho byehene, ya mu waa li we bye bíli, ya bágyighili bye.

5 Ya me áamono ku kwogho kii babaghala ki mundu wu áabwi-nsini ŋa yulu a likubu, mukaana wu bádzzi ti anga ekala ya wu básono mangulu mansa muolo. Básununu nde mu makumu nsaama. 2 Ya me áamono ngye-yulu wu a lileene wu áakata mukwu mu likyi lili mpini ti: Nande li wu a kughu mu odzubulu mukaana ya onyana makumu? 3 Lo ka óli a mbwuru si mumō o ku yulu, ŋa nsie, ya ku nsini a nsie, wu áli lileene li odzubulu mukaana ya otala nde. 4 Me áandili ku olagha, mu kuulu

ka bábagha mbwuru si mumō wu áali lileene li odzubulu mukaana ya otala nde o. 5 Lo mumō mu bakwuru ályele kunda me ti: Ka lili o! Mono nkoho wu a dzumu li Yuda, wu a mu etagha e Dabvide, nde áalughulu: Nde li a lileene mu odzubulu makumu nsaama ya odzubulu mukaana. 6 Me áamono Mwana a endoomo wu li ti anga wu bagwi mukaba, nde áatemene ŋa kara a li likubu ya bibuo bibi mweē bina, ya ŋa kara li bakwuru. Nde áli a mansieme nsaama ya mihi nsaama, mimye me mifulu nsaama mi Nzaami mi ágweghe nde mu nsie nsyini. 7 Mwana a endoomo ágyagha mukaana mu kwogho kii babaghala ki mundu wu áabwi-nsini ŋa yulu a likubu. 8 Ya bu amana ogyagha mukaana, bibuo bibi mweē bina, ya bakwuru makwumu muolo ya bana bábwinsini ŋa nkulu a Mwana a endoomo. Nswe mukwuru áli a nguomo ya bibaha bibi mu oore bi bílwulu mu mananaase. Mananaase mamó me nsamana a ba bangili. 9 Bo bákgiyimi ekwumu ki enyaghara ti: We faana mu ogyagha mukaana, ya mu odzubulu makumu ma nde, mu kuulu bágwí mukaba, ya mu makili ma we, we áfiriswumu Nzaami baara, baba madzumu mwohonu, mandiri mwohonu, bikaana byehene ya mansie mwohonu. 10 Ya mu nkoro a Nzaami a bihi, we áasi bo baara ba empu ya bangaa ba Nzaami, ya bo sa batumu ŋa yulu a nsie. 11 Me áli mu okamono ya áangyughu likyi li mampwumu ma bangye-yulu ma malagha ba bádzzi likubu ya lili bibuo bibi mweē ya lili bakwuru. Mutala a bo áli mapfwunu ŋa yulu a mapfwunu ya mapfwunu. 12 Bo bákgilyele mu likyi lili mpini ti: Mwana a endoomo wu bágwí mukaba, faana ogyagha lileene, busini, bunsughu, mpini, budziri, nsia ya masyighi. 13 Ya me áangyughu bi bágyighili byehene bi bili ku mayulu, ŋa nsie, ku nsini a nsie, mu mubu ya byehene bi bili omo, bákgiwimi ti: Nyaá masyighi, budziri, nsia ya lileene bikala kunda mundu wu aabwi-nsini ŋa likubu, ya kunda Mwana a endoomo, mu mibvu ya mibvu! (aiōn g165) 14 Ya bibuo bibi mweē bina bíkalyele ti: «Amene!» Ya bakwuru bákunú mabuo ŋa nsie ya bákabuono.

6 Ya me áamono ŋa ónyana Mwana a endoomo kumu lili nsomo mu makumu nsaama mama mukaana, oŋo me áangyughu ebuo kii mweē emo mu bibuo bibi mweē bina élyele mu likyi lili ti anga epama ti: Gya! 2 Ensihibi, me áamono

syevale wu a pejeme. Munde wu áabwi-nsini
 ɲa yulu a nde ákwara kpala, bágwi nde kagha ya
 nde ágyene wu aalughulu ya mu ofirilughulu. **3**
 ɲa ányana nde kumu lili muolo, me áangyughu
 ebuo kii mweē kii byele ki élyele ti: Gya! **4** Oɲo
 syevale mukimi wu a bie ti anga mbaa áyapala.
 Bágwi kundaa munde wu áabwi-nsini ɲa yulu a
 nde lipée li linene ya lileene lili omaha edzuunu
 ɲa nsie, mu kuulu baara bakatsyiri bana mabolo
 bo-a-bo. **5** ɲa ányana nde kumu lili matere, me
 áangyughu ebuo kii mweē kii bitere ki élyele ti:
 Gya! Me áamono syevale wu a pyini. Munde wu
 áabwi-nsini ɲa yulu a nde ákwara egyeele mu
 kwogho e nde. **6** Ya me áangyughu ti anga likyi
 ɲa kara li bibuo bibi mweē bina li lílyele ti: Kilo
 li farine lili bele mu denali mumō, bakilo batere
 baba farine lili orodze mu denali mumō. Lo we
 ka byihi maala ya bviini o. **7** ɲa ányana Mwana
 a endoomo kumu lili mana, me áangyughu
 ebuo kii mweē kii bina ki élyele ti: Gya! **8** Ya
 me áamono syevale wu a laā lili madza ma
 ngakuo. Nkwumu a mbwuru wu áabwi-nsini
 ɲa yulu a syevale lilo Lipfu, ya nsie a ba bápki
 yfakabulunama nde ɲa mbihi. Bágwi bo lileene
 mu odzwa kaba limō mu makaba mana ma
 baara ba nsie mu lipée, mu munzyala, mu byene
 bibi kughu ogyabiri lipfu ya mu banyama baba
 musuru ba bali ɲa nsie. (Hades g86) **9** ɲa ádzubulu
 nde kumu lili mataana, me áamono ɲa nsie a
 ebini ki baakagwa mikaba, miwumunu mi babo
 ba bádzwi mu nkooro a ndagha a Nzaami ya mu
 nkooro a bumpughulu bu báسو bo mu yo. **10** Bo
 bákehe bingubu ti: Muluo wu-a-ngili ya wu-a-
 nganjma, tee nki matala we aakebe mu olamana
 ya mu obvurulu etere kundaa baara ba nsie mu
 makili ma bihi ma baatsala? **11** Bágwi kundaa
 nswe mbwuru mu bo enkuru ki ela kii pejeme,
 ya bályele bo ti bafirikebe mana matala, tee ku
 ookughu mutala a bambaala ba bo mu esala ya
 bandughu mu kana ba akala baadzwa ti anga
 bo. **12** ɲa ányana nde kumu lili masemene,
 me áamono munyíi a nsie wu munene. Tala
 lípyini ti anga mupa a eko wu bágyighili mupfu
 a nyama, ya ngoono ndehene ábie ti anga
 makili. **13** Banomajomo baba ku yulu bábwi ɲa
 nsie ti anga ɲa ookabwa bimburi bi finge bibi
 munku ɲa ookanyihí efulu ki enene mufinge.
14 Yulu lídzimini ti anga mukaana wu bali mu
 okadzyi, minguo myehene ya bilyi bámaha bye
 mu bibini bi bye. **15** Mikogho mi nsie, baara
 baba budziri, bakwuru ba bambumbulu, bisini

ya banga-a-lileene, baara bwohonu, bankana ya
 ba bali bumpoholo, báýisweme kunsu mangala
 ya kunsu mameē ma manene mama minguo. **16**
 Bo bákalyele kundaa minguo ya kundaa mameē
 ma manene ti: Libwa ɲa yulu a bihi ya lisweghe
 bihi la ya edzili e munde wu aabwi-nsini ɲa
 yulu a likubu, ya nkehe a Mwana a endoomo
 yinyaā obwa mu bihi! **17** Mu kuulu, etsughu ki
 enene kii nkehe a bo eegyí, ya nande kughu
 obvwughu?

7 ɲa mbihi oɲo, me áamono bangye-yulu bana
 ba bátémene mu manto mana ma nsie. Bo
 bádzarala bifulu bina bi nsie, mu kuulu efulu si
 emō enyaā oluru, ngu okala ɲa nsie, ngu okala
 ɲa yulu a mubu, ngu okala ɲa yulu a muti si
 mumō. **2** Ya me áamono ngye-yulu mukimi wu
 áakapala ku nkolo yi ookapala tala. Nde ákwara
 enyeme e Nzaami wu a mweē. Nde ákehe engubu
 kundaa bangye-yulu bana ba ágwi nde lileene
 lili osa nsie ya mubu bubi. **3** Nde ályele ti: Ka lisa
 nsie bubi o, ngu okala mubu, ngu okala miti, tee
 mu matala ma lisa bihi elyimi ɲa yulu a mambwi
 ma basala ba Nzaami a bihi. **4** Ya me áangyughu
 mutala a baara ba bási elyimi. Bo báli baara
 mapfwunu nkama ya makwumu mana bana ba
 báfi mu bikaana bi baana ba Isarayele byehene:
5 Mu ekaana e Yuda, mapfwunu kwumu ya
 muolo ma baara ba bási elyimi, mu ekaana
 e Rubene, mapfwunu kwumu ya muolo ma
 baara, mu ekaana e Ngade, mapfwunu kwumu
 ya muolo ma baara. **6** Mu ekaana e Asere,
 mapfwunu kwumu ya muolo ma baara, mu
 ekaana e Nefetali, mapfwunu kwumu ya muolo
 ma baara, mu ekaana e Manase, mapfwunu
 kwumu ya muolo ma baara, **7** mu ekaana e
 Simeō, mapfwunu kwumu ya muolo ma baara,
 mu ekaana e Lebvi, mapfwunu kwumu ya muolo
 ma baara, mu ekaana e Isakare, mapfwunu
 kwumu ya muolo ma baara, **8** mu ekaana e
 Dzabulō, mapfwunu kwumu ya muolo ma baara,
 mu ekaana e Dzodzefe, mapfwunu kwumu
 ya muolo ma baara, mu ekaana e Benzamē,
 mapfwunu kwumu ya muolo ma baara ba bási
 elyimi. **9** ɲa mbihi oɲo, me áamono mpwumu a
 baara yi nene yiili mbwuru si mumō ka kughu
 otala o, baara baba mansie mwohonu, baba
 madzumu mwohonu, baba bikaana byehene, ya
 baba mandinj mwohonu. Bo bátémene ɲa nkulu
 a likubu ya ɲa nkulu a Mwana a endoomo. Bo
 bálaha binkuru bi bila bibi pejeme ya bákwaru

matswene ma maba ŋa myaā. **10** Bo bákakehe bingubu ti: Obvwughu oli kundaa Nzaami a bihi wu aabwi-nsini ŋa yulu a likubu ya kundaa Mwana a endoomo! **11** Ya bangye-yulu bwohonon ba badzyi likubu mu mutele, bakwuru ya bibuo bibi mweē binsa bina, bákunu mabuo ŋa nkulu a likubu, masu mu nsie, bákasamana Nzaami **12** ya bákalyele ti: Aamenel! Nyaā masyighi, nsia, bunsughu, matuono, budziri, lileene ya mpini bikala kundaa Nzaami a bihi mu mibvu ya mibvu! Amenel! (aiōn g165) **13** Mu obo, mumō mu bakwuru áfwulu me ti: «Baara ba, ba baalaha binkuru bi bila bi bipejeme, bana bali? Bo kunu-ako baafi?» **14** Me áamvuhulu nde ti: «Mfumu a me, ngu we soolo!» Nde ályele kundaa me ti: «Ba me ba baafi ku kimini li lilagha. Bo baaswagha binkuru bi bo mu makili ma Mwana a endoomo, me obo binkuru bi bo biipejeme. **15** Me mu obo bo bali ŋa nkulu a likubu li Nzaami, ya bali mu okasamana nde mwīi ya mpyibi ŋa ebini e nde kii ngili. Munde wu aabwi-nsini ŋa yulu a likubu sa akala bo.» **16** Bo ka bafirikala a nzala o, ka bafiribagha nyoro o, ka bafirimono kyanjana ya mbaa a mwīi o. **17** Mu kuulu Mwana a endoomo wu li ŋa kara-a-kara a likubu sa akala munkala a bo, ya sa abiri bo ku oli mikele mi madza ma maakagwa laama, ya Nzaami sa agyala mansanja mwohonon mu mihi mi bo.

8 ŋa ódzubulu Mwana a endoomo kumu lili nsama, mayulu mákala pii ku bele a ndaama a tala limō. **2** Me áamono bangye-yulu nsama ba baakatemeŋe ŋa nkulu a Nzaami. Bo bágyagha mamvulu-a-mvulu nsama. **3** Ngye-yulu mukimi áyateme ŋa bele a ebini ki baakagwa Nzaami bikaba. Nde ákwara elogho ki baakatsughu malyimi mama mpihi kii mu oore. Ya bágwi nde malyimi mama mpihi malagha mpaala agwa mo mukaba emō ya nsamana a ba bangili bwohonon ŋa yulu a ebini ki baakatsughu malyimi kii mu oore, ki éli ŋa nkulu a likubu. **4** Lwuu li malyimi mama mpihi ya nsamana a ba bangili bíkakumu nzili mō ya kwogho e ngye-yulu ŋa nkulu a Nzaami. **5** Ngye-yulu ágwolo elogho ki baakatsughu malyimi mama mpihi, áluhu kye mu mbaa yi ágwolo nde ŋa ebini ki baakagwa Nzaami bikaba ya átu bu kye ŋa yulu a nsie. Mu obo, bipama bíbwi, nkyi yídзумu, misehene mímoŋono ya nsie yínyii. **6** Bangye-yulu nsama ba bákware mamvulu-a-mvulu nsama básele mpaala bafulu mo. **7** Ngye-yulu wu a nsomo

áfulu mvulu-a-mvulu. Mvulu wu a makele ya wu a mbaa wu aabvuŋunu ya makili ánoō ŋa yulu a nsie. Etsulu e nsie emō mu bitsulu bitere édzighi mbaa, kaba li miti limō mu makaba matere lídzhighi mbaa, ya bisagha byehene bi bibihi bídzighi mbaa. **8** Ngye-yulu wu a buolo áfulu mvulu-a-mvulu. Bátubu elogho ki eli ti anga munguo wu munene wu áakalughulu mbaa mu mubu. Kaba limō mu makaba matere ma mubu líkighiri makili. **9** Kaba limō mu makaba matere li bibi mweē bi bíli mu mubu ya bi bíli a muwumunu líkpi, ya kaba limō mu makaba matere li mabwara ma manene lítsanama. **10** Ngye-yulu wu batere áfulu mvulu-a-mvulu. ŋomaŋomo wu munene wu áakalughulu mbaa ti anga etsyi e mbaa, áfi ku yulu, ábwi ŋa nsie. Nde ábwi mu kaba limō mu makaba matere li manzala ya ŋa yulu a mikele mi madza. **11** ŋomaŋomo munde nkumu a nde «Abisente», mbaala ti, «nkala». Kaba limō mu makaba matere li madza líkighiri nkala, ya baara balagha bákpi mu nkooro a madza mama nkala mamō. **12** Ngye-yulu wu bana áfulu mvulu-a-mvulu. Ya Elogho emō énama mu kaba limō mu makaba matere lili tala, mu lili ngoono ya mu lili baŋomaŋomo. Epa emō mu bipa bitere bibi tala, bibi ngoono ya bibi baŋomaŋomo ésomo kunsu mpyibi, ya kaba limō mu makaba matere lili mwīi ya lili mpyibi lípfihili otsyeme o lo. **13** Me áli mu okamono ya áangyughu mbini wu áakaluru ku nkara a yulu ya wu áakalyele mu likyi lili mpini ti: «Nyii! Nyii! Nyii! kundaa baara ba nsie, ŋa akala oofulu bangye-yulu batere babake mamvulu-a-mvulu ma bo!»

9 Ngye-yulu wu bataana áfulu mvulu-a-mvulu. Me áamono ŋomaŋomo wu áafi ku yulu ya ábwi ŋa nsie. Bágwi nde nkoghola a mbie yi nda ya nsihii. (Abyssos g12) **2** Nde ádzubulu mbie yi nda ya nsihii, ya lwuu líkapala mu mbie ti anga lwuu li mungele a mbaa. Lwuu li mbie lífughu tala, tala ya lipwubu bísyi mpyibi. (Abyssos g12) **3** Ya mu lwuu lilo, bansense bátsanama ŋa yulu a nsie, ya bágwi bo lileene ti anga lileene li bangie baba ŋa nsie. **4** Bálighi bo mu osa bubi kundaa bisagha bi bili ŋa nsie, ngu okala bisagha bi bibihi, ngu okala miti, lo yini a kundaa baara baala ka báli a elyimi e Nzaami ŋa yulu a mambwi ma bo o. **5** Ka bágwi bo muswa wu odzwa baara babo o, lo yina muswa wu omwehē kimini mu bangoono bataana bágwi bo. Ya

kimini lilo líli ti anga li ookamono mbwuru kala ti ngie tswi nde. **6** Mu bitsughu bibye, baara sa basagha lipfu, lo ka babagha lo o. Sa bakala a nzala a okpa, lo lipfu sa libara bo. **7** Bansense babo báli ti anga basyevale ba baalaha bidzwana bibi mvulu. **Ŋa** yulu a mitswi mi bo óli a bilogho ti anga miburu mimi mu oore, ya bidzili bi bo bífaana ya bidzili bi baara. **8** Bo báli a mfu yinda, ya myini mi bo míli ti anga myini mi bankoho. **9** Bo bákyi bitulu bi bo mu bidzwana bibi mu esyeē. Ya nkele a mapaba ma bo yíli ti anga nkele a basyare ba balagha, ba oli mu okadzuru basyevale ba baakagye ku mvulu. **10** Bo báli a mikili mimi ya biba, mi mifaana a mimi bangie. Me mu mikili mi bo óli a lileene lili osa baara bubi mu bangoono bataana. **11** Mukogho wu áakatumu bo me ngye-yulu a mbie yi nda ya nsihi, nkwumu a nde mu eebele Abadō ya mu engereke «Apolyō», mbaala ti, «Wu-aakatsala». (Abyssos g12) **12** Mpara yi a nsomo yiiluru. Mpara gyolo nkimi yili mu ogya ŋa mbihi. **13** Ngye-yulu wu basemene áfulu mvulu-a-mvulu. Me áangyughu likyi li líkafa mu mansieme mana ma mali ŋa yulu a ebini ki baakatsughu malyimi mama mpihi kii mu oore ki eli ŋa nkulu a Nzaami. **14** Likyi lilo líkalyele kundaa ngye-yulu wu basemene wu áali a mvulu-a-mvulu ti: «Nyana bange-yulu bana ba bákuru mu mukogho a Efarate, nzala yi nene. **15** Mu obo, bányana bange-yulu bana ba báli mukughu mu matala, etsughu, ngoono ya mvubu, mu odzwa kaba limō mu makaba matere ma baara. **16** Ya me áangyughu mutala a bambumbulu ba báli ŋa yulu a basyevale. Bo áli bamilyō nkama ywolo.» **17** Me mu obo me ámono mu limono, basyevale ya ba baakakumu ŋa yulu a bo. Bo bálaha bidzwana bibi mu bisyeē bi biikakyi butulu. Bye bili bi bibie ti anga mbaa, bibi ngyini ti anga efulu ki baakata ti yasēte ya lili musagha a nkeene ti anga limeē li baakata ti sufere. Mitswi mi basyevale míli ti anga mimi bankoho. Mbaa, lwuu ya limeē li sufere bíkapala mu miŋma mi bo. **18** Kaba limō mu makaba matere ma baara ba nsie líkpi mu biwa bitere bi: Mu mbaa, mu lwuu ya mu limeē li sufere bi bíkapala mu miŋma mi bo. **19** Mu kuulu litumu li basyevale líli mu miŋma ya mu mikili mi bo. Mikili mi bo míli ti anga bantaala, mye míli a mitswi, ya me mu mitswi mimye mye míkasa baara bubi. **20** Lo baara babake, ba ógwene odzwa biwa bibye, ka bágyinji mayele

mu bigyighili bi myaā mi bo o. Bo ka bányaā okasamana mifulu mi mibi ya banzaami baba bityeghe bibi mu oore o, bwunu we bibi mu ngele, bibi mu boronze, bibi mu mameē ya bibi mu miti, biili ka biikamono o, ka biikagyughu o ya ka biikadzara o. **21** Bo ka bányaā okadzwa baara o, ka banyaā emfiri e bo o, ka banyaā esighi e bo o ya ka banyaā pfyibi li bo o.

10 **Ŋa** nseele, me áamono ngye-yulu mukimi wu a lileene wu áafi ku mayulu mu okayasughuru. Nde álahe edzi ti anga ekuru, nde áli a mungongolo ŋa yulu a mutswi a nde, edzili e nde ékasehene ti anga tala, ya myili mi nde míli ti anga makwii ma manene ma mali mu okalughulu mbaa. **2** Nde ákwara ŋa ekee e nde mukaana wu asala wu bádzubulu. Nde átwulu kwulu e nde kii babaghala ŋa yulu a mubu, ya kii bakaha ŋa yulu a nsie, **3** ya ákakehe engubu mu mpini ti anga bu ookagyama nkoho. Bu amana okehe engubu, bipama nsaama bíbili. **4** Ya bipama nsaama bu bimana obili, me áakaasono, lo me áangyughu likyi mu yulu li líkalyele ti: Kebe mansweghe ma óolyele we bipama nsaama ya ka sono mo o. **5** Oŋo ngye-yulu wu ámono me wu áatemene ŋa yulu a mubu ya ŋa yulu a nsie, áseene kwogho e nde kii babaghala ku yulu **6** ya álahe mukihí mu nkwumu a munde wu li mweē mu mibvu ya mibvu, wu áagyighili yulu ya byehene bi bili mu lo, nsie ya byehene bi bili mu yo, mubu ya byehene bi bili mu nde, ndiri: Ka ofirikala a matala o! (aiōn g165) **7** Lo matala ma akala oofulu ngye-yulu wu a nsaama mvulu-a-mvulu, mansweghe ma okuru Nzaami sa makeele, ti bwunu a bu oli nsia yi mbwe yi átwoho nde kundaa mibighili, basala ba nde. **8** Likyi li ángyughu me li lífi ku yulu, lífirilyele kundaa me ti: Yigwolo mukaana wu asala wu bádzubulu wu li ŋa kwogho e ngye-yulu wu aatemene ŋa yulu a mubu ya ŋa yulu a nsie. **9** Me áangyene kundaa ngye-yulu ya me áanduomo nde mukaana wu asala. Nde ályele kundaa me ti: Gwolo nde ya mini nde. Nde sa aluhu mila mi we mu nkala, lo mu muŋma a we, nde sa akala a ntyere ti anga nyuŋu. **10** Me áangwolo mukaana wu asala mu kwogho e ngye-yulu ya áamini nde. Munsu muŋma a me, nde áli a ntyere ti anga nyuŋu, lo me bu mana odza nde, mila mi me mílwulu mu nkala. **11** Mu obo, bályele kundaa me ti: We faana ofiribighili

kundaa baara balagha, kundaa bikaana, kundaa mandiji ya kundaa mikogho.

11 Ogo, bágwí me libanjana li lili ti anga elyimi kii otagha bula ya bályele kundaa me ti: Gye ya tagha ebini kii ngili, ebini ki baakagwa mikaba ya tala baara ba baakasamana omo. **2** Lo ka tagha mbala a nzo a Nzaami o, nyaã yo, mu kuulu baagwi yo kundaa bikaana. Me bikaana bibye akala biidzyara bvulu lili ngili mu bangoono makwumu-mana ya buolo. **3** Me sa ngwa muswa kundaa bampughulu ba me buolo mu obighili, bu balaha binkuru bibi bupfiili, mu bitsughu pfwunu ya nkama ywolo, ya makwumu masemene. **4** Bampughulu bwolo babo me miti mi-Olibve myele ya bilogho bi baakatwulu miindi byele bi bili ña nkulu a Mfumu a nsie. **5** Kala ti mbwuru dzyi osa bo bubi, lo mbaa yipala mu miñma mi bo ya yitsughu mitaara mi bo. Eë, kala ti mbwuru dzyi osa bo bubi, ali bubwe nde akpa obo. **6** Bo bali a litumu lili okuru mvulu mu matala ma baasala bo esala kii mibighili. Ya bo bali a litumu lii okirili madza makili ya lii ogwa nsie biwa bibi mawa-mawa, nswe matala ma badzyi bo. **7** Lo mu matala ma akala baamana bo osuo bumpughulu bu bo, nyama wu a nkehe wu aapala kunsu mbie yi nda ya nsihi sa adzwana a bo, sa alughulu ña nkulu a bo ya sa adzwa bo. (Abyssos g12) **8** Bibiyimi bi bo sa bikala ña munsagha wu munene mu bvulu li linene mu bákomu Mfumu a bo ña kuruwa. Bvulu lilo bákata lo mu efaana kii bvulu lili Sodome ya nsie yi a Edzipite. **9** Baara baba bikaana byehene, bitswumu byehene, mandiji mwohonon ya mansie, sa bamono bibiyimi bi bo mu bitsughu bitere ya ndaama, ya ka bagwa muswa ti badzyighi bibiyimi bibye o. **10** Baara ba nsie sa bakala kunsu esee mu nkooro a lipfu li bo, sa basa kyiri ya sa bagweghe bo-a-bo bimbwaã, mu kuulu mibighili minsa myele mimye míkamwehë bo kimini. **11** Lo ña mbihi a bitsughu bitere ya ndaama bibye, mufulu wu a bumweë wu áafi kundaa Nzaami ásono mu bo ya bo bátemene. Ba bákamono bo bábagha nzalamweë yi alagha. **12** Mibighili myele mimye mígyughu likyi li linene li lílyele kundaa bo ti: Liyakumu ña. Bo bákomu ku yulu kunsu edzi ña mihi mi mitaara mi bo. **13** Mu tala lyini lilo, nsie yínyii mu mpini, kaba limõ mu makaba kwumu ma bvulu líbwi, ya baara mapfwunu nsama bápki mu munyíi a nsie munde. Baara

bana bábagha nzalamweë ya bágwí Nzaami wu a mu mayulu nsia. **14** Mpara yi a gyolo yiiluru. Mpara yi matere yili mu ogya edzi-dzighi. **15** Mu obo, ngye-yulu wu a nsama áfulu mvulu-a-mvulu. Nkyi yi a mpini yídzumu mu yulu yíkalyele ti: Empu e nsie eeluru kundaa Mfumu a bihi ya kundaa Kriste a nde. Nde sa atumu mu mibvu ya mibvu! (aiñ g165) **16** Bakwuru makwumu-muolo ya bana ba bábwi-nsini ña nkulu a Nzaami ña yulu a makubu ma bo bábwi mapfumunu, bákonu mabuo ña nsie ña nkulu a Nzaami, **17** bákalyle ti: Mfumu Nzaami Nga-a-mpwü, bihi libvurulu we matuono, we wu li ya wu áli, mu kuulu we aasalala lileene li we li linene, ya we aabwihi empu e we nsini. **18** Bikaana biibagha nkehe, lo nkehe yi a ndaa we yiigyi, ya matala mama olamana ba bákpi, mu ogwa mufuru kundaa basala ba we mibighili, ba bangili ya ba baakagwa nkumu a we budziri, bike-bike ya bakwuru, ya obiyi ba baakabyihi nsie! **19** Bádzubulu nzo a Nzaami yi li mu mayulu ya nkobo yi endughu e nde yímonono omo. Mu matala maana mamu óli a misehene, nkyi, banganzele, minyíi mi nsie ya mvulu wu makele wu a mpini.

12 Mu obo, elyimi kii okinjimi émonono mu yulu: Mukaha wu áalaha tala ti anga enkuru, átwulu myili mi nde ña yulu a ngoono, ya áalaha mu mutsyi a nde muburu wu áali a banomajomo kwumu ya buolo. **2** Nde áli a yimi ya ákasyama mu nkooro a misuo ya mpara yi oburu. **3** Elyimi ekimi kii okinjimi émonono mu yulu: Ndarango wu munene wu a bie ti anga mbaa. Nde áli a mitswi nsama ya mansieme kwumu. Ya ña yulu a mitswi mi nde, óli a miburu nsama. **4** Mukili a nde ákwomo kaba limõ mu makaba matere ma banomajomo ba báli ku yulu, ya átsili bo ña nsie. Ndarango átemene ña nkulu a mukaha wu áakaburu mpaala ña aasaaburu nde, nde adza mwana a nde. **5** Mukaha áburu mwana wu baghala. Me nde akala aatumu bikaana byehene ya mukaana wu esyeë. Ya maswa-maswa, bábiru mwana a nde kundaa Nzaami ya ña likubu li nde. **6** Lo mukaha ábara ku syehe, ku ógyighili nde Nzaami ebini, mpaala babujunu nde oko mu bitsughu pfwunu ya nkama-gyolo ya makwumu-masemene. **7** Mu obo mvulu yíbwi ku mayulu. Misyele ya bangye-yulu ba nde bádzwana mvulu ya ndarango.

Ndarango ya bangye-yulu ba nde si bádzwana mvulu ya bo. **8** Lo, ndarango ka álughulu o, nde ya bangye-yulu ba nde ka báfirikala a ebini ku mayulu o. **9** Bátsili ndarango wu munene ku nsie, ntaala wu mukulu, wu baakata ti dyabulu ya Satana, munde wu aakapfiri baara ba nsie. Bátsili nde ku nsie, nde ya bangye-yulu ba nde. **10** Ya me áangyughu likyi lili mpini ku yulu li líkalyele ti: Mono, matala maato mama obvwughu, mama lileene, mama Emfumu e Nzaami a bihi, ya mama litumu li Kriste a nde. Mu kuulu baatsili ku nsie wu aakafwunu baana ba taara a bihi, munde wuulu mpyibi ya mwii áakafwunu bo ŋa nkulu a Nzaami a bihi. **11** Lo bo báalughulu ŋa nkulu a nde mu nkooro a makili ma mwana a endoomo, ya mu nkooro a ndagha a bumpughulu bu baasuo bo. Bo ka bádzyi laama li bo o, ngu okala ŋa nkulu a lipfu. **12** Mu obo, mayulu ya be ba liikakala omo, likala mu esee! Lo nyii kundaa be, nsie ya mubu, mu kuulu dyabulu aasughuru kundaa be ya nkehe yi alagha, bu asoolo ti matala masala masyili a nde. **13** Ndarango bu amono ti baatsili nde ku nsie, nde ábwi onama mukaha wu áaburu mwana wu baghala. **14** Lo bágwi mukaha mapaba muolo ti anga mama ngo-mbini, mpaala nde adzughu mu yulu, obaana ku syehe tee ku ebini e nde, mu kuulu babujunu nde oko, la ya ntaala, mu mvulu mu mō, mu bamvulu bwolo, ya bangoono basemene. **15** Mu obo, ntaala álughu madza mu muŋma a nde ti anga nzala ku mbihi a mukaha mpaala ndwuru a nzala yibiri nde. **16** Lo nsie yiyabaha mukaha, yo yídzubulu muŋma ya yímini nzala yi ólughu ndarango. **17** Mu obo, Ndarango akolo mukaha nkehe, áyidzwana mvulu ya musyi a dzumu li mukaha, babo ba baakasalala mikyene mi Nzaami ya baakasuo bumpughulu bu Yiisu.

13 ŋa mbihi, nde átemene ŋa yulu a dzyele lili mu mukogho a mubu. Ōŋo me áamono nyama mumō wu áapala mu mubu wu áali a mansieme kwumu ya mitswi nsaama. ŋa yulu a mansieme ma nde óli a miburu kwumu, ya ŋa yulu a mitswi mi nde, básono mankwumu mama bitughu bibi otsaala Nzaami. **2** Nyama wu ámono me áfaana ya ngo, myili mi nde mfilu ti anga mimi nyama wu baakata uruse, ya muŋma a nde ti anga wu a nkoho. Ndarango ágwi nde lileene li nde, likubu li nde ya litumu li linene. **3** Mumō mu mitswi mi nde áli ti anga

wu baatsyiri bolo, lo bogho li líkaadzwa nde lilo lídzughu. Nsie nsyini yíkinjimi ya yínama nyama. **4** Ya bákasamana ndarango mu kuulu nde ágwi litumu kundaa nyama, bákasamana nyama ya bákalyele ti: Nande aafaana ya nyama ya nande kughu odzwana mvulu ya nde? **5** Bágwi nde muswa mu olyele mandagha mama ligwagha ya mama otsaala Nzaami, ya bágwi nde litumu lili okasa obo mu bangoono makwumu-mana ya buolo. **6** Mu obo, nde ádzubulu muŋma a nde mu otsaala Nzaami, mu otughu nkwumu a Nzaami, ebvulu e Nzaami ya babo ba baakala ku mayulu. **7** Bágwi nde muswa mu odzwana mvulu ya baba ngili ya mu olughulu ŋa nkulu a bo. Bágwi nde litumu ŋa yulu a bikaana byehene, baara bwohono, mandinji mwohono, ya mansie mwohono. **8** Baara ba nsie bwohono, baala ka básono mankwumu ma bo mu mukaana wu a bumweē wu a Mwana a endoomo wu bágwi mukaba o, obaana ebaana e nsie, sa bakasamana nde. **9** Nyaā munde wu li a matswi agyughu! **10** Kala ti mbwuru faana ogye ku bunkana, nde sa agye ku bunkana, Kala ti mbwuru faana okpa mu lipee, nde sa akpa mu lipee. Ma me matala mama mukama ya mama kana li ba bangili. **11** ŋa nsele me áamono nyama mukimi wu áapala mu nsie. Nde áli a mansieme muolo ti anga mama mwana a endoomo, ya nde ákabili ti anga ndarango. **12** Nde ákasalala litumu lwohono lili nyama wu a nsomo ŋa busu bu nde. Nyama munde ákasa ti nsie ya baara ba bali mu yo bakasamana nyama wu a nsomo wuulu bogho li líkaadzwa nde li lídzughu. **13** Nde ási bilyimi bi okinjimi bi binene, tee bu ásurulu nde mbaa yi a yulu ŋa nsie ŋa mihi mi baara bwohono. **14** Nde ákapfiri baara ba nsie mu bilyimi bibi okinjimi bi bágwi nde muswa mu osa ŋa nkulu a nyama. Nde ákalyele kundaa baara ba nsie ti bagyighili efaana kii nyama wu bádzwaha mu lipee ya wu aasighili mu lipfu. **15** Bágwi nyama wu a buolo munde muswa mu ogwa muwumunu kundaa efaana kii nyama wu a nsomo, mpaala efaana ekye ebili ya edzwa nswe munde wu aagwene osamana kye. **16** Nde ási kuulu ti basa elyimi mu nko mu kwogho kii babaghala bwunu we ŋa yulu a mbwii kundaa baara bwohono, bike-bike ya bakwuru, bisini ya bawe, baara baba bumpoholo ya bankana. **17** Ya mbwuru si mumō ka ákughu oswumu bwunu we otyeghe o, kala ti nde ka áli a elyimi o. Elyimi me ngu nkwumu a nyama bwunu

we mutala a nkhwumu a nde. **18** Ma me matala mama okala a bunsughu: Nyaã munde wu li a mayele, atala mutala a nyama, mu kuulu nde li mutala a nkhwumu a mbwuru, ya mutala munde me nkama-semene ya makwumu masemene ya bisemene.

14 Ŋa mbihi oŋo me áamono Mwana a endoomo wu áatemene ŋa yulu a munguo a Siyō, ya emō ya nde, mapfwunu nkama ya makwumu-mana ya mana ma baara baala áli básono ŋa mambwi ma bo nkhwumu a mwana endoomo ya yi a Taara a nde. **2** Me áangyughu likyi li lífi ku yulu ti anga likyi li madza ma manene, ti anga mudzumu a nganzele wu mpini, ya likyi li ángyughu me lífi ti anga lili binkulu manguomo ba bali mu okasighi bilue bi bo. **3** Bo bákagyimi ekwumu ki enyaghara ŋa nkulu a likubu, ŋa nkulu a bibuo bibi mweē bina ya ŋa nkulu a bakwuru. Ka óli a mbwuru si mumō wu áakughu ogyighi ekwumu ekye o, yini a mapfwunu nkama ya makwumu-mana ya mana ma baara ba bákwulu ŋa nsie. **4** Bo me baala ka básuŋumu mu bakaha o, mu kuulu bo bali nkini minkyini. Bo baakanama Mwana a endoomo nswe ku aakagye nde. Bo baakwulu bo ŋa kara li baara ti anga bimburu bi binsomo bi baagwa ekaba kundaa Nzaami ya kundaa Mwana a endoomo. **5** Ya mu miŋma mi bo, ka bámono ndagha yi a mpya o, ka báli a epfwumu si emō o. **6** Ya me áamono ngye-yulu mukimi wu áakaluru ku nkara a yulu. Nde áli a Nsia yi Mbwe yi a mibvu ya mibvu yi otuoho kundaa baara ba bali ŋa nsie: Mansie mwohonono, bikaana byehene, mandinji mwohonono, baara mwohonono. (aiōnios g166) **7** Nde ákalyele mu likyi lili mpini ti: Ligwa Nzaami budziri ya ligwa nde nsia, mu kuulu tala li mumfwunu a nde liito. Lisamana munde wu áagyighili yulu ya nsie, mubu ya mikele mi madza! **8** Ngye-yulu mukimi, wu a buolo, ánama wu a nsomo ya ákalyele ti: Lo liibwi, lo liibwi, bvulu li Babilone li Linene! Lo li liikaŋmihi mansie mwohonono bviini lili nkehe a esighi e lo. **9** Ya ngye-yulu mukimi, wu batere, ákanama bo buolo baba nsomo ya ákalyele mu likyi lili mpini ti: Kala ti mbwuru kunu mabuo ŋa nkulu a nyama ya ŋa nkulu efaana e nde, ya kala ti nde gyagha elyimi ŋa yulu a mbwii bwunu we ŋa ekee, **10** ndehe si sa aŋma bviini li nkehe a Nzaami, li bátaba mu ebaha e nkehe a nde wene a obvughu ya elogho

ekimi, ya nde sa amono kimini munsu mbaa ya munsu sufere, ŋa nkulu a bangye-yulu baba ngili ya ŋa nkulu a Mwana a endoomo! **11** Lwuu li kimini li bo sa likumu mu mibvu ya mibvu, ba baakabuono nyama ya efaana e nde, bo ka bakala a edzuunu o mpyibi ya mwii, ya nswe mu nde wu aagyagha elyimi kii nkhwumu a nde. (aiōn g165) **12** Ma me matala mama mukama a ba bangili ba baakakebe Mikyene mi Nzaami ya baakasa kana mu Yiisu. **13** Ya me áangyughu likyi limō li lífi ku yulu li líkalyele ti: Sono, obaana mu matala ma, esee kundaa baara ba bápki mu Mfulu! Mufulu ályele: Eē, mpaala bo bagwumu mu bisala bi bo, mu kuulu bigyighili bi bo bili mu okanama bo! **14** Ŋa mbihi oŋo me áamono edzi ki epeŋeme, ya ŋa yulu a edzi mbwuru wu áafana ya mwana a mbwuru ábwi-nsini. Nde álaha kagha lili mu oore ŋa yulu a mutswi a nde, ya ákwara mu kwogho e nde mukpere wu a furunu wu ato. **15** Ngye-yulu mukimi ápala mu ebini kii ngili ya ákehe engubu kundaa munde wu áabwi-nsini ŋa yulu a edzi ti: Tere mukpere a we wu a furunu ya tolo bimburu! Matala mama otolo bimburu maato, mu kuulu bimburu bi nsie biigyele! **16** Oŋo munde wu áabwi-nsini ŋa yulu a edzi átsili mukpere a nde wu a furunu ŋa nsie, ya bátolo bimburu bi nsie. **17** Ngye-yulu mukimi ápala mu ebini kii ngili ki eli mu mayulu. Ndehe si áli a mukpere wu a furunu wu ato. **18** Ngye-yulu mukimi wu áali a litumu mu mbaa, ápala ŋa ebini ki baakatsughu malyimi mama mpihi. Nde ákehe engubu kundaa munde wu áali a mukpere wu a furunu wu ato ti: Tere mukpere a we, ya ka binsia bi nsege a bviini bi nsie, mu kuulu bye biigyele. **19** Ngye-yulu átere mukpere a nde ŋa nsie. Nde átolo bimburu bi nsege a bviini ya átubu bye munsu ndoŋo yi nene yi a nkehe a Nzaami. **20** Bákamana bimburu bi bviini munsu ndoŋo yi nene ku mbala a bvulu, ya makili mápala mu ndoŋo yi nene, mákumu tee mu misyi mi baakakuru miŋma mi basyevale mu etiiri kii bakilemetere nkama-tere.

15 Ŋa mbihi oŋo, me áamono mu yulu elyimi ekimi ki enene ya kii okiŋjimi: Bangye-yulu nsaama bákwara biwa nsaama bibi masini. Mu kuulu, me mu bye nkehe a Nzaami yikeele. **2** Me áamono mubu wu áakasehene ti anga bipehe bi mambwara, bi bábvughu ya mbaa. Babo ba bálughulu mvulu ŋa nkulu a nyama,

ḡa nkulu a efaana e nde ya ḡa mutala a nkwumu a nde. Bo bátemene ḡa yulu a mubu wu áakasehene ti anga bipehe bi mambwara ya bákware manguomo ma Nzaami. **3** Bo bákagyimi ekwumu e Moyidze, musala a Nzaami, ya ekwumu e Mwana a endoomo: Mfumu Nzaami Nga-a-Mpwū! Bigyighili bi we bili bi binene ya bibi okinjimi Mukogho a mansie Manzili ma we mali nsumu ya mama nganjma. **4** Mfumu, nande aagwene ogwa nkwumu a we budziri, ya wu aagwene ogwa nkwumu a we nsia? Mu kuulu, yini a we li wu a ngili. Bikaana byehene sa biyabuono we mu kuulu, bunsumu buumojono. **5** ḡa mbihi oḡo, me áamono mu mayulu ebvulu kii bumpughulu ki eli ḡa ebini kii ngili enyaā. **6** Bangye-yulu nsaama ba bákware biwa nsaama bápala mu ebini kii ngili. Bo bálaha binkuru bibi mu lino lili tse-tse li líkasehene, ya bákuru makee mama mu oore mu bitulu. **7** Mumō mu bibuo bibi mweē bina ágwi bangye-yulu nsaama mandono nsaama mama mu oore, ma málwulu mu nkehe a Nzaami wu li mweē mu mibvu ya mibvu. (aiōn g165) **8** Ebini kii ngili élwulu mu lwuu, mu nkooro a nsia a Nzaami ya mu lileene li nde. Ya ka óli a mbwuru wu áakugghu osomo munsu ebini kii ngili o tee mu matala ma oofa biwa nsaama bibi bangye-yulu nsaama.

16 Ya me áangyugghu likyi lili mpini li lífi ku ebini kii ngili li líkalyele kundaa bangye-yulu nsaama ti: Ligye, litsala ḡa yulu a nsie mandono nsaama mama nkehe a Nzaami. **2** Ngye-yulu wu a nsomo ágyene ya átsala ndono a nde ḡa yulu a nsie. Baara ba báli a elyimi kii nyama ya ba bákasamana efaana e nyama munde bábagha bibono bi biikakolo ku olagha. **3** Ngye-yulu wu a buolo átsala ndono a nde ḡa yulu a mubu, ḡaana oḡo mubu ákighiri makili ti anga makili ma mbwuru wu ákpi, ya bibuo byehene bibi mweē bi bíli mu mubu bíkpi. **4** Ngye-yulu wu batere átsala ndono a nde ḡa yulu a manzala ya mikele mi madza, ya madza mwohonono mákighiri makili. **5** Me áangyugghu ngye-yulu wuli a litumu ḡa yulu madza ákalyele ti: We li wu a nsumu, we wu li ya we wu áali, we Wu a Ngili, mu kuulu we aalamana obo. **6** Buulu bo baatsala makili ma ba bangili ya mama mibighili, we aagwi bo makili mpaala banjma, me obo ofaana mu bo! **7** Ya me áangyugghu ebini ki baakatsugghu malyimi mama mpihi élyele ti: Eē, Mfumu Nzaami Nga-a-Mpwū, ndandamana

a we yili yi a nganjma ya yi a nsumu! **8** Ngye-yulu wu bana átsala ndono a nde ḡa yulu a tala. Bágwi tala muswa mu otsugghu baara mu mbaa. **9** Ya baara bádzigghi mu kyanjana kii mpini. Bo bábwi otsaala nkwumu a Nzaami wu li a lileene ḡa yulu a biwa bibye. Ya bo bábihi ogyiḡi mayele mu ogwa nde nsia. **10** Ngye-yulu wu bataana átsala ndono a nde ḡa yulu a likubu li nyama. Empu e nde ésomo kunsu mpyibi. Baara bákatswa manzalisoggho myini mu nkooro a mpara. **11** Bo bákatsala Nzaami wu a ku mayulu mu nkooro a mpara ya mu nkooro a bibono, lo bo ka bágviḡi mayele mu bigyighili bi bo o. **12** Ngye-yulu wu basemene átsala ndono a nde ḡa yulu a Efarate, nzala yi nene. Madza ma nzala mákee mu odzubulu nzili kundaa mikoggho mi miikafa ku ookapala tala. **13** ḡa mbihi oḡo, me áamono mifulu mitere mi misunumu mi mifaana ti madzugghu, mi mípala mu munjma a ndarango, mu munjma a nyama, ya mu munjma a mubighili wu a mpya. **14** Mye mili mifulu mi mibi mimi Satana, mi miikasa bilyimi bibi okinjimi ya miikagye kundaa mikoggho mi nsie nsyini, mu kuulu mibvugghu mye emō mu odzwana mvulu yi a etsugghu ki enene kii Nzaami, Nga-a-Mpwū. **15** Mono, me ndi mu ogya ti nga-a-pfyibi. Esee kundaa munde wu aakahala mihi ya wu aakakebe binkuru bi nde mpaala anyaa ogye mpene ya baara banyaā omono mpene a nde. **16** Mifulu mimi bi mi mye, bábvugghu mye ḡa ebini ki baakata mu eebele ti Aramangedō. **17** ḡa nseele ngye-yulu wu a nsaama átsala ndono a nde mu yulu. Mu ebini kii ngili, likyi lili mpini lípala, lo lífi ḡa likubu ya lílyele ti: Oofi! **18** Mu obo, óli a misehene, nkyi, banganzele ya munyiḡ a nsie wu munene, wuulu obaana bu oli baara ḡa yulu a nsie, nkini ka bámaamono nsie mu onyiḡ obo o. **19** Bvulu li linene líkaghaba mu bipa bitere. Mabvulu mama mansie mábwi ya Nzaami álibili mweē mu Babilone li Linene, mpaala agwa lo ndono a bviini a nkehe a nde yi nene. **20** Bilyi byehene bíbara, ya minguo mídzimini. **21** Mvulu wu makele ma manene, mama leme lili ku bele a bakilo makwumu-matere ánoō ḡa yulu a baara, ya bo bátsala Nzaami mu nkooro a ewa kii mvulu wu makele, mu kuulu ewa ekye éli nkara ki enene.

17 Mu obo, mumō mu bangye-yulu nsaama ba bákware mandono nsaama áyabili ya

me ya ályele ti: «Gya, me sa nsuo we masyeme ma oobagha mukaha nga-a-esighi ki elagha, wu aabwi nsini nga yulu a madza ma manene.» **2** Mikogho mi nsie miibvughu mbughu yi esighi ya nde, ya bviini li esighi e nde liikolo baara ba nsie. **3** Ngye-yulu ábiri me mu Mufulu ku syehe. Me áamono mukaha mutsyini wu áabwi nsini nga yulu a nyama wu abie. Nyama munde áli alwulu mu mankwumu ma maakatsaala Nzaami. Nde áli a mitswi nsaama ya mansieme kwumu. **4** Mukaha munde álaaha binkuru bibi mungala ya bi bibie, ya milwuu mimi mu oore, mimi mameé mama ntala, ya nsia yi a ntala. Nde ákwara ku kwogho e nde ndogo yi mu oore, yi alwulu mu mandagha ma maluru bubi ya mama mubviini a esighi e nde. **5** Nga yulu a mbwii a nde básono nkwwu yiili mbaala ensweghe. Yi me mbaala a kwumu me: «Babilone li Linene, ngughu a bakaha banga-a-esighi ya mandagha ma nsie ma mabvulu bubi.» **6** Me áamono mukaha me ákolo mu makili ma ba bangili ya mu makili ma bampughulu ba Yiisu. Nga ámono me nde, me áankijimi ku olagha. **7** Ngye-yulu ályele kundaa me ti: «Mu ema we kijimi? Me sa ndyele we mbaala ma mansweghe mama mukaha ya mama nyama wu li mu okabulubiri nde, wu li a mitswi nsaama ya mansieme kwumu.» **8** «Nyama wu aamono we áli, lo nde ka aafirisyili o. Nde sa apala kunsu mbie yi nda ya nsihi, sa agye ku opfighili. Baara ba nsie baala mankwumu ma bo ka básono mo mu mukaana wu bumweé o, sa bakijimi nga akala baamono bo nyama, mukaana me áli obaana ku ebaana e nsie. Bo sa bákiijimi mu kuulu nde áli, nde ka aafirisyili o, lo nde sa afirigya. (Abyssos g12) **9** Ma me matala mama okala a mayele mama ya bunsughu.» «Mitswi nsaama mimye me minguo nsaama miili nga yulu a mye mukaha ábwi nsini. Mye mili si mikogho nsaama. **10** Mu mikogho nsaama mi mye, mitaana miibwi, mumó li, wu muke nkini ka aagyí o. Lo nga akala aagya nde, nde yini a mu mana matala aakala. **11** Nyama wu áali ya wuulu ka aafirisyili o, li ndeme mukogho wu a mpuomo. Nde li si ti anga mikogho nsaama ya li mu ogye ku opfighili.» **12** «Mansieme kwumu ma áamono we mali mikogho kwumu miili nkini miibagha empu o. Lo mye sa migyagha litumu lii otumu kundaa nyama mu tala litsyini. **13** Mye mili a etsimi emó ya miikagwa lileene ya litumu li bo kundaa nyama. **14** Bo sa badzwana mvulu ya Mwana a endoomo, ya Mwana a endoomo

sa alughulu nga nkulu a bo, mu kuulu nde li Mfumu a bamfumu ya Mukogho a mikogho. Ya emó ya nde, babo ba báti mbili, ba básuolo, ya babo ba baakakebe mukihi wu bálabá, sa balughulu si.» **15** Ngye-yulu ályele kundaa me ti: «Madza ma áamono we maala nga yulu a mo mukaha nga-a-esighi aabwi nsini, me baara bwohonó, mampwumu, bikaana byehene ya mandiji. **16** Mansieme kwumu ma aamono we ya nyama sa makabele mukaha nga-a-esighi. Bo sa bagwohonó nde byehene bi ali a bye, sa batwulu nde mpene, sa badza misunu mi nde ya sa batsughu nde ndehene mu mbaa. **17** Mu kuulu, Nzaami aatwulu mu mikolo mi bo etsimi kii osalala bitsimi bi nde. Bo bwohonó sa bagwihini mu ogyaha litumu li empu e bo kundaa nyama, tee nga ookeele mandagha ma ólyele Nzaami. **18** Ya mukaha wu aamono we, me bvulu li linene li lili a empu nga yulu a mikogho mi nsie.»

18 Nga mbihi ogo, me áamono ngye-yulu mukimi, wu áafi ku yulu mu okayasughuru nga nsie. Nde áli a litumu li linene ya nsie yfi kunsu otsyeme kuu nsia a nde. **2** Nde ákehe engubu mu likyi lili mpini ti: «Bvulu li Babilone li Linene liibwi, liibwi! Lo ayi bvulu li mifulu mi mibi, ebini ki nswe mufulu wu a sujumu, ebini ki nswe gmini wu a sujumu, ebini ki nswe nyama wu a sujumu wu bábele. **3** Mu kuulu, bikaana byehene biigmi bviini lili esighi e nde ki ebvulu. Mikogho mi nsie miibvughu mbughu mu esighi ya nde, ya minta-nkaala mi nsie miibagha busini mu lileene li bilogho bi nde bi bibvulu bubwe ya ntala.» **4** Ya me áangyughu likyi likimi ku yulu li líkalyele ti: «Baara ba me! Lipala mu bvulu li, mpaala banyaá obvughu be emó ya masumu ma lo, ya be linyaá obagha kaba mu biwa bi biibwa mu lo. **5** Mu kuulu, masumu ma lo maasi mudzu tee ku yulu, ya Nzaami ka aadzimini bubi bu lo o. **6** Libvurulu lo etere ti bwunu a bu liisi lo babake! Libvurulu lo makaba muolo ma bigyighili bi lo! Mu ebaha ki aataba nde mala, litaba nde makaba muolo ma mala ma nde. **7** Bwunu a bu áakamono nde esee mu nsia a nde ya mu busini bu nde bu bubvulu, bwunu obo si be liibvurulu nde kimini ya pfili. Mu kuulu, nde aakalyele kunsu mukolo a nde ti: “Me aambwi-nsini ti anga ngasa, ya me ka ndi mupfiili o. Si okala ka bunu, me akala ka nsomo pfili o.” **8** Mu nkooro a bitsimi

bibye, biwa bi sa bigya mu nde mu etsughu emō: lipfu, pfiili ya munzyala. Nde wohono sa asadzighi ku mbaa, mu kuulu, Mfumu Nzaami wu aalamana nde li a mpini.» **9** Mikogho mi nsie myehene mi mikavughu mbughu yi esighi ya Babilone nga-a-esighi, ya mi mikamono esee mu busini bu bubvulu emō ya lo, mye sa milili. Mye sa minyoō mu nkooro a lo, ŋa akala miimono mye lwuu li mbaa li liidzihi lo. **10** Mye sa mikala mana la ya bvulu, mu nkooro a nzalamweē a kimini li lo li bali mu okataala bo. Mye sa milyele ti: Nyii! Nyii! Kundaa bvulu li Linene, Babilone bvulu lili mpini, mu tala li mō, masyeme ma we maagyi! **11** Bumō si minta-nkaala mimi ŋa nsie mi mili mu okalili ya miisomo pfiili mu nde, mu kuulu ka ofirisyili a mbwuru wu aaswumu bilogho bibo o. **12** Bo sa banya ofiritankaala yi a: oore, ngele, mameē mama ntala, nsia, biko bibi lino lili tse-tse ya ntala, biko bibi mungala, biko bibi mu swa, biko bi bibie, miti mimi mpihi yi mbwe, bilogho byehene bi bāgyighili mu myini mi nzogho, mu miti mimi ntala, mu boronze, mu bisyeē bwunu we mu mameē ma mabwe. **13** Bo sa banya si ofiritankaala yi a: bibu bi miti ya bilogho bibi mpihi yi mbwe, mananaase, miire, malyimi ma baakatsughu, bviini, maala, farine lili tse-tse, bele, bangoomo, bindoomo, basyevale, basyare, manyuru bwunu we miwumunu mi baara. Minta-nkaala sa milyele ti: **14** Bimburu bi býele bi ákadzyi we, biigyene la ya we! Busini bu bubvulu bubwe ya ntala, bye byehene biidzimini, ya si okala ka bunu ka bafirimono bye o! **15** Minta-nkaala mi miibagha busini mu bvulu li, sa mikala mana la ya lo mu nkooro a nzalamweē a kimini li lo li bali mu okataala bo, sa milili ya sa misomo pfiili. **16** Mye sa milyele ti: «Nyii! Nyii! Kundaa bvulu li Linene, li liilaha biko bibi mu lino lili tse-tse, bibi mungala ya bibi bie, li liilaha milwuu mimi mu oore, mimi mameē mama ntala, ya nsia yi a ntala. **17** Mu tala li mō, busini bwohono bubo buupfighili!» Mimbiri mabwara myehene ya ba baakagye mu mabwara, ba baakasala mu mabwara ya babo bwohono ba baakasala mu mubu, sa bakala mana la ya lo. **18** Bo bu bamono lwuu li ókadzighi bvulu mu mbaa, bákakehe bingubu ya bákalyele ti: «Nk! bvulu líifaana ya bvulu li linene li?» **19** Baara bákagyiri lifufunu ku yulu a mitswi mi bomo, bo bákali, bo básomo pfiili ya bákakehe bingubu ti: Nyii! Nyii! Kundaa bvulu li linene!

Me lo liigwi busini kundaa babo bwohono ba bali a mabwara mu mubu. Mu tala li mō, lo liikighiri syehe. **20** Nyaā Yulu likala mu esee mu lo! Nyaā behe si ba bangili, bantummu ya mibighili, likala mu esee. Mu kuulu, Nzaami aasuo bunsumu bu nde kundaa be bu aalamana lo. **21** Oŋo ngye-yulu nga-a-lileene ágwolo limeē li linene ti anga li baakasighi mburu, átsili lo mu mubu ya ályele ti: «Ya mu nzunju gyini oyo akala baatsili Babilone, bvulu li linene, ya akala ka bafirimono lo o. **22** Kundaa we, akala ka baafirigyughu o, binkulu manguomo, bagyimi bikwumu, bimfulu biwebe-a-webe bwunu we mamvulu-a-mvulu. Kundaa we ka baafirimono, banga-a-bisala bibi myaā o, ka bafirigyughu nkele a limeē li baakasighi mburu o. **23** Si okala ka bunu, otsyeme o mwindi ka ofirisehene mu nzo a we o. Si okala ka bunu, ka baafirigyughu o, likyi li baghala wu aakye ya lili mukala wu aakye kundaa we. Mu kuulu, minta-nkaala mi we míli baara ba babvulu mupfunu mu baara ba nsie. Mu emfiri e we, bikaana byehene biigwunumu. **24** Kundaa we baamono makili ma mibighili, mama ba bangili, ya mama ndaa babo bwohono ba bádzwí ŋa yulu a nsie.»

19 ŋa mbihi oŋo, me áangyughu ti anga likyi lili mpini lili mpwumu a baara yi nene mu mayulu li líkalyele ti: «Aleluya! Obvwughu, nsia ya lileene bili bibi ndaa Nzaami a bihi! **2** Mu kuulu, ndandamana a nde yili yi a nganma ya yi a nsumu. Nde áalamana mukaha nga-a-esighi ki enene wu aakabulubiyihi nsie mu esighi e nde, ya nde áabvurulu etere kii makili ma basala ba nde bu aaluomo nde mo.» **3** Bo bályele mu sa lili yuolo ti: «Aleluya! Lwuu li nde lili mu okakumu mu mibvu ya mibvu!» (aiōn g165) **4** Bakwuru makwumu muolo ya bana ya bibuo bibi mweē bana bákunu mabuo ŋa nsie, bákasamana Nzaami wu áabwi-nsini ŋa yulu a likubu ya bákalyele ti: «Aamene! Aleluya!» **5** Likyi lípala ŋa likubu li líkalyele ti: «Ligwa Nzaami a bihi nsia, be bwohono basala ba nde, be ba liikagwa nde budziri, bike-bike ya bakwurulu!» **6** Ya me áangyughu ti anga likyi lili mpini lili mpwumu a baara yi nene, ti anga bu ookagwuomo madza ma manene, ti anga bipama bi banganzele bi binene, li líkalyele ti: «Aleluya! Mu kuulu, Mfumu Nzaami a bihi Nga-a-Mpwū aasuo empu e nde. **7** Litswe likala a esee, litswe likala a muyayaā ya ligwa nde

nsia, mu kuulu, matala ma mabala ma Mwana a endoomo maato, ya mukala a nde ayii li mukughu. **8** Baagwi nde mu olaha biko bibi lino lili tse-tse ya ntala, mu kuulu lino lili tse-tse ya ntala li liikasehene, me bigyighili bi ba bangili bibi bunsumu.» **9** Ngye-yulu ályele kundaa me ti sono: «Esee kundaa babo ba baagwi mpighi a kyiri kii mabala ma Mwana a endoomo!» Ya nde áfirilyele kundaa me ti: «Ma mali mandagha ma Nzaami mama ngan̄ma.» **10** Oŋo, me áambwi ŋa nsie a myili mi nde mu obuono nde, lo nde ályele kundaa me ti: «Nyāa ka sa obo o! Me ndi mbaala a we wu esala ya mumō mu bandughu mu kana ba we, ba baakasuo bumpughulu bu Yiiisu. Samana Nzaami! Mu kuulu, ngu bumpughulu bu Yiiisu buli mufulu wu a libighi.» **11** Oŋo me áamono yulu bwaha, ya syevale wu a pejeme ápala. Mumbiri syevale nkwumu a nde Wu-aakakebe mukih wu álaba ya Wu-a-ngan̄ma. Nde aakalamana ya aakadzwana mvulu mu bunsumu. **12** Mihi mi nde mili ti anga mile mi mbaa, ya ŋa yulu a mutswi a nde oli a miburu milagha mimi litumu. Nde li a nkwumu yi básono mu nde, yiili mbwuru mukimi ka asoolo yo o, kala ti ka yini a nde o. **13** Nde áalaha enkuru ki ebolo mu makili. Nkwumu a nde Ndagha a Nzaami. **14** Mikāa mi bambumbulu baba mayulu mikabulunama nde mu basyevale ba bapejeme. Bo bálaha binkuru bibi mu lino lili ntala, lili pejeme ya lili tse-tse. **15** Mu muŋma a nde ókapala lipee li lito. Mu lo nde afaana osyeme bikaana. Me nde akala aatumu bo mu mukaana wu esyeē, me nde li mu okadzarya ndoŋo yi nene yi a bviini lili nkehe a Nzaami Nga-a-Mpwū. **16** Mu enkuru e nde ki ela tee mu myili básono nkwumu yi: «Mukogho a mikogho ya Mfumu a bamfumu.» **17** ŋa mbihi, me áamono ngye-yulu mumō wu áatemene kunsu tala. Nde ákehe engubu kundaa ban̄mini bwohonu ba bálaluru ku nkara yulu ti: «Ligya, libvuŋunu mu nkooro a kyiri e Nzaami ki enene, **18** mpaala lidza misunu mi mikogho, misunu mi bamfumu ba bambumbulu, misunu mi banga-a-lileene, misunu mi basyevale ya mimi mimbiri mi bo, misunu mi baara bwohonu, misunu mi ba bali bumpoholo ya bankana, bike-bike ya bakwuru.» **19** Me áamono nyama, mikogho mi nsie ya mikāa mi bambumbulu ba bo, ba bábvununu mu odzwana mvulu ya mumbiri syevale ya mukāa a bambumbulu ba nde. **20** Básyimi nyama emō ya mubighili wu a mpya, wu áasi ŋa nkulu a nde

bilyimi bibi okiŋimi, bi bíkadzihibi babo ba bálí a elyimi kii nyama, ya ba bákasamana efaana e nde. Bátsili bo bansa buolo ba bamweē mu bana li mbaa li liikalughulu mu sufere. (Limnē Pyr g3041 g4442) **21** Básyili, bádzwi bo mu lipee li líkapala mu muŋma a mumbiri syevale, ya ban̄mini bwohonu bagyughuru mu misunu mi bo.

20 ŋa nseele, me áamono ngye-yulu mumō wu áafi ku yulu mu okayasughuru ŋa nsie. Nde ákwara ŋa kwogho e nde nkogholo a mbie yi nda ya nsihí ya syene li linene. (Abyssos g12) **2** Nde ásyimi ndarango, ntaala wu mukulu, wu li dyabulu ya Satana, ya nde ákuru nde bibolo mu syene mu mibvu pfwunu. **3** Ngye-yulu átubu nde ku mbie yi nda ya nsihí, ákuru ya ási yo enyeme, mpaala ndarango anyaa ofiridzihibi bikaana tee ku ookughu mibvu pfwunu mimye. ŋa mbihi oŋo, bafaana opaha nde mu mana matala. (Abyssos g12) **4** Ya me áamono makubu. Kundaa babo ba bábwí-nsini ŋa yulu a mo, bágwi litumu lili olamana. Me áamono si miwumunu mi ba bátsyiri mitswi mu nkooro a bumpughulu bu bo mu Yiiisu ya mu Ndagha a Nzaami, ya babo ba bábihi osamana nyama ya efaana nyama, ba bágwene a elyimi mu mambwi, ngu okala mu myaa mi bo. Bo bábvughuru mu bumweē ya bátumu emō ya Kriste mu mibvu pfwunu. **5** Ba babake ba bákpi ka bábvughuru mu bumweē o nsomo mibvu pfwunu mimye mikughu. Oko me osighili mu lipfu kuu nsomo. **6** Nyāa babo ba bali a kaba mu osighili kuu nsomo mu lipfu, bakala a esee ya ba bangili! Lipfu lili yuolo ka lili a litumu ŋa yulu a bo o, lo bo sa bakala bangaa ba Nzaami ya baba Kriste, ya sa batumu emō ya nde mu mibvu pfwunu. **7** ŋa akala ookughu mibvu pfwunu, sa bapaha Satana mu boloko li nde, **8** ya nde sa apala mu odzihibi Ngonge ya Mangonge, mbaala ti, bikaana bi bili mu manto ma nsie mana, mpaala abvughu bo mu odzwana mvulu. Mutala a bo li ti anga bangi ba dzyele baba mukogho a mubu. **9** Bo bádzyi nsie yohonu ya básono kunsu mfulu a ba bangili, bvulu li Nzaami lili mukolo. Lo mbaa yífi ku yulu yídzihi ya yidzwi bo. **10** Bátubu dyabulu wu áakadzihibi bo mu bana li mbaa ya lili sufere, ku oli nyama ya mubighili wu a mpya. Bo sa bamono kimini mwíi ya mpyibi mu mibvu ya mibvu. (aiōn g165, Limnē Pyr g3041 g4442) **11** Me áamono likubu li linene li lipenje me ya

munde wu áabwi-nsini ŋa yulu a lo. Yulu ya nsie bɪbara la ya nde, ya ka báfrimono bye o. **12** Oŋo me áámono ba bákpi, baba mufwunu ya ba bagwene a mufwunu bátemene ŋa nkulu a likubu. Bádzubulu mikaana ya báfridzubulu mukaana mukimi, wu li mukaana wu bumweē. Bálamana ba bákpi bwunu a bu óli mi básono mu mikaana, ti bwunu a bu óli bigyighili bi bo. **13** Mubu ábvurulu ba bákpi ba báli mu nde, lipfu ya nsie a ba bákpi bɪbvurulu ba bákpi babo. Ya bálamana bo, nswe mbwuru, bwunu a bu óli bigyighili bi nde. (Hadēs g86) **14** Lipfu ya nsie a ba bákpi bátubu bye kunsá bana li mbaa. Bana li mbaa me lipfu lili yuolo! (Hadēs g86, Limnē Pyr g3041 g4442) **15** Nswe munde wu bágwene osono nkwumu mu mukaana wu bumweē, bátsili nde ku bana li mbaa. (Limnē Pyr g3041 g4442)


21 Oŋo me áámono yulu li linyaghara ya nsie yi nyaghara, mu kuulu yulu lili nsomo ya nsie yi a nsomo bídzimini, ya mubu ka áfrisyili o. **2** Ya me áámono bvulu lili ngili, Yerusaleme li linyaghara li lifi ku yulu kundaa Nzaami, líkayasughuru ŋa nsie ti anga mukaha wu bàakie, wu baabwehe mu nkooro a mulumu a nde. **3** Me áangyughu likyi lili mpini li lípala ŋa likubu líkalye ti: «Mono nzo a Nzaami yili ŋa kara li baara! Nde sa akala ya bo, bo sa bakala baara ba nde ya nde ŋa kara li bo sa akala Nzaami a bo. **4** Nde sa agyala mansaŋa mwohonon mu mihi mi bo, lipfu ka lifirikala o, ya ka ofirikala a pfili o, ngu okala mingili mimi mpara, ngu okala mpara, mu kuulu bilogho bibi nsomo bimaaluru.» **5** Munde wu áabwi nsini ŋa yulu a likubu álye ti: «Limono, me nsi bilogho byehene bi binyaghara.» Ya nde áfirilye ti: «Sono, mu kuulu mandagha ma mali ma bakughu osa kana ya mama ngarjma.» **6** Nde álye kundaa me ti: «Myehene miikughu! Me ngu Alafa ya Omenga, ebaana ya masini. Kundaa munde wu li a nyoro, me sa ngwa mukele a madza ma maakagwa laama, wene a oswumu. **7** Lilo me pfa li wu aalughulu. Me sa nkala Nzaami a nde, ya nde sa akala mwana a me. **8** Lo kundaa babo ba bagwene a bukyini, ba bagwene okakebe mukihi wu bálabá, banga-a-mandagha mama nyara, ba baakadzwa baara, banga-a-esighi, banga-a-emfiri, ba baakasamana banzaami baba mpya, ya banga-a-mpya bwohonon, kaba lili ndaa bo lili bana lili mile mi mbaa ya sufere: “Lilo me

lipfu lili yuolo”.» (Limnē Pyr g3041 g4442) **9** Ya mumō mu bangye-yulu nsaama ba bákwará mandogon nsaama ma malwulu mu biwa nsaama bibi ensiele-mbihi, áyabili ya me. Nde álye kundaa me ndiri: «Gya, me sa nsuo we mukaha wu bákíe, mukala a Mwana a endoomo.» **10** Ngye-yulu ábiri me mu lileene li Mufulu a Nzaami ku yulu a munguo wu munene ya wu mula. Nde ásuu me bvulu lili ngili, Yerusaleme, li líkafa ku yulu kundaa Nzaami, líkayasughuru ŋa nsie. **11** Lo líli a nsia a Nzaami ya líkasehene ti anga bu ookasehene limeē lili ntala, libaakata ti yasepe li líkasehene ti anga epehe e mbwara. **12** Bvulu lilo áli badzyi lo mu ebagha kii mubighi wu munene ya mutele wu mula. Lo líli a miŋma kwumu ya myele. ŋa nswe muŋma óli a ngye-yulu mumō. Ya ŋa nswe muŋma, básono nkwumu a ekaana emō mu bikaana kwumu ya byele bi baana ba Isaraye. **13** Ku Esete miŋma mitere, ku Nore miŋma mitere, ku Sude miŋma mitere, ya ku Wesete miŋma mitere. **14** Bibagha bi bvulu bíli a bitsini bibi mu mameē kwumu ya muolo, ya ŋa yulu a nswe limeē básono nkwumu a ntumu mumō mu bantumu kwumu ya buolo ba Mwana a endoomo. **15** Ngye-yulu wu áakabili ya me ákwara elyimi ki baakatagha, libaŋana lili mu oore, mu otagha bvulu, bidzughubu bi lo ya bibagha bi lo. **16** Manto ma bvulu mansa mana máli bula bumō: bula bu lo ya bunene bu lo bíli nsihi. Ngye-yulu átagha bvulu mu libaŋana, lo líli mapfwunu kwumu ya muolo ma basatide: bula, bunene, mutele bi bvulu bíli nsihi. **17** Ngye-yulu átagha si ebagha e bvulu, ya ábagha bakude nkama ya makwumu-mana ya bana, nde ásalala elyimi ki ookasalala baara mu otagha. **18** Ebagha bátwu kye mu mameē mama yasepe, ya bvulu lomo bátwu lo mu oore lili tse-tse li líkasehene ti anga epehe e mbwara. **19** Bitsini bi bibagha bi bvulu bábwehē bye mu mameē mama ntala mama mawa-mawa. Etsini kii nsomo éli mu limeē lili ntala li baakata yasepe, kii byele mu lili safire, kii bitere mu lili angate, kii bina mu lili emerode, **20** kii bitaana mu lili onise, kii bisemene mu lili saradwane, kii nsaama mu lili kirisolite, kii mpuomo mu lili berile, kii wa mu lili topadze, kii kwumu mu lili kirisoparase, kii kwumu ya emō mu lili yasēte ya kii kwumu ya byele mu lili ametisite. **21** Miŋma kwumu ya myele míli nsia kwumu ya yuolo. Nswe muŋma áli a nsia yini a mō. Munsagha a bvulu wu munene áli mu oore lili tse-tse ti

anga epehe e mbwara kii eekasehene. **22** Lo me ka ámono nzo a Nzaami munsá bvulu lilo o, mu kuulu nzo a Nzaami a nde me Mfumu Nzaami Nga-a-Mpwū ya Mwana a endoomo. **23** Bvulu ka lili a nzala a tala o, bwunu we ngoono mu okala kunsá otsyeme, mu kuulu nsia a Nzaami yiikagwa lo otsyeme, ya mwinda a lo ngu Mwana a endoomo. **24** Bikaana sa bikadzyara kunsá otsyeme o ko, ya mikogho mi nsie sa mikagye a nsia a bomo kunsá bvulu. **25** Mu mwiī, si okala ka bunu, ka akala bakuru bidzughubu bi bvulu o, mu kuulu ka okala a mpyibi o. **26** Bo sa bagya a nsia ya budziri bu mansie omo. **27** Si okala ka bunu, mu lo akala ka osomo elogho ki esujumu o, bwunu we mbwuru wu aakasa mandagha mama nyara ya mpya o, lo yini a babo baala mankwumu ma bo básono mo mu mukaana wu a bumweē wu a Mwana a endoomo.

22 Ngye-yulu ásuó me nzala a madza ma maakagwa bumweē. Madza máli matsyeme ti anga bipehe bi mambwara ya mákapala mu likubu li Nzaami ya lili Mwana a endoomo. **2** Ija kara li munsagha a bvulu wu munene ya mu mikogho mi nzala minsá myele, óli a muti wu bumweē wu aakaburu bimburu mbala kwumu ya yuoló, nswe ngoono mbala mō. Bakasalala matsyiri ma nde mu okadzuhu baara ba mansie mwohonó. **3** Ka ofirikala a epwolo o. Likubu li Nzaami ya lili Mwana a endoomo sa likala munsá bvulu, ya basala ba nde sa bakasamana nde. **4** Bo sa bamono edzili e nde ya sa basono nkwwumu a nde ŋa yulu a mambwi ma bo. **5** Ka ofirikala a mpyibi o, baara ka bafiríkala a nzala a otsyeme o, ngu okala otsyeme kuu mwinda, ngu okala otsyeme kuu tala. Mu kuulu, me Mfumu Nzaami akala aatwulu bo kunsá otsyeme ya bo sa batumu mu mibvu ya mibvu. (aiōn g165) **6** Ngye-yulu ályele kundaa me ti: «Mandagha ma mali ma bakughu osa kana ya mama ngan̄ma. Mfumu, Nzaami wu aakagwa kundaa mibighili mandagha ma bafaana olyele, nde aagweghe ngye-yulu a nde mu osuo kundaa basala ba nde, mandagha ma mafaana ogya edzi-dzighi. **7** Edzi-dzighi me ndi mu ogya. Esee kundaa munde wu aakakebe mandagha ma libighi ma mali mu mukaana wu!» **8** Ngu me Dzā áangyughu ya áamono mandagha ma. Me bu ngyughu ya bu mono mo, me áambwi ŋa myili mi ngye-yulu wu áasuo me mo, mu osamana nde. **9** Lo nde ályele kundaa me ti: «Ka

sa obo o! Me ndi yini a musala ti anga we ti anga bandughu mu kana ba we mibighili, ti anga babo ba baakakebe mandagha ma mukaana wu. Samana Nzaami!» **10** Ya ngye-yulu ályele me ti: «Ka sweghe mandagha ma libighi ma mukaana wu o, mu kuulu matala maabehene. **11** Nyaā munde wu gwene a bunsumu afirikala wu gwene a bunsumu, nyaā munde wu li a mubviini afirigyogho mubviini, nyaā munde wu li nsumu afirigyili mandagha mama bunsumu, ya nyaā wu li wu a ngili, afirikala wu a ngili!» **12** Yiisu ályele: «Mono, edzi-dzighi me ndi mu ogya. Ya me ndi mu oyagwa mufuru kundaa nswe mbwuru mbwuru, ti bwunu a bu oli bigyighili bi nde. **13** Me ngu Alafa ya Omenga, Wu-a-nsomo ya Wu masini, Ebaana ya masini.» **14** «Esee kundaa babo ba baakaswagha binkuru bi bo, mu osomo mu bvulu mu miŋma mi lo ya mpaala babagha muswa mu odza bimburu bi muti wu bumweē. **15** Bambwa, banga-a-emfiri, banga-a-enkwunu, ba baakadzwa baara, ba baakasamana banzaami baba mpya ya nswe munde wu aakadzyi ya wu aakasa mpya, sa bakala ku mbala!» **16** «Me Yiisu, aangweghe ngye-yulu a me mu oyasuo bumpughulu ba mu mi mitala Mabwunu ma Nzaami. Ngu me ndi musumunu wu a mu etagha ya mu musyi a dzumu li Dabvide, me ndi ti anga ŋomaŋomo wu aakasehene mu epala.» **17** Mufulu ya mutughu wu baakie bali mu okalyele ti: «Gya!» Nyaā munde wu aagyughu alyele ndiri: «Gya!» Nyaā munde wu li a nyoro agya. Munde wu dzyi, agwolo madza mama bumweē gwene a oswumu. **18** Me Dzā ndi mpughulu kundaa nswe munde wu aagyughu mandagha ma libighi ma mukaana wu: «Kala ti mbwuru bwehe ndagha mu mo, Nzaami sa abwehe nde biwa bi baalyele munsá mukaana wu. **19** Kala ti mbwuru maha mandagha ma mali mu mukaana a libighi wu, Nzaami sa amaha kaba lili nde mu muti wu bumweē ya mu bvulu lili ngili li baasuo mu mukaana wu.» **20** Munde wu aasuo bumpughulu mu mandagha ma lyele ti: «Eē, edzi-dzighi me ndi mu ogya! Aamene, Mfumu Yiisu, gya!» **21** Nyaā bwehe bu Mfumu Yiisu bukala ya be bwohonó!



*Ya me áamono bvulu lili ngili, Yerusaleme li linyaghara li lífi ku yulu kundaa Nzaami,
líkayasughuru ŋa nsie ti anga mukaha wu bàakie, wu baabwehe mu nkooro a mulumu a
nde. Me áangyughu likyi lili mpini li lípala ŋa likubu líkalyele ti: «Mono nzo a Nzaami yili ŋa
kara li baara! Nde sa akala ya bo, bo sa bakala baara ba nde ya
nde ŋa kara li bo sa akala Nzaami a bo.*

Revelation 21:2-3

Reader's Guide

Teke-Tyee at AionianBible.org/Readers-Guide

The Aionian Bible republishes public domain and Creative Common Bible texts that are 100% free to copy and print. The original translation is unaltered and notes are added to help your study. The notes show the location of eleven special Greek and Hebrew Aionian Glossary words to help us better understand God's love for individuals and for all mankind, and the nature of afterlife destinies.

Who has the authority to interpret the Bible and examine the underlying Hebrew and Greek words? That is a good question! We read in 1 John 2:27, *"As for you, the anointing which you received from him remains in you, and you do not need for anyone to teach you. But as his anointing teaches you concerning all things, and is true, and is no lie, and even as it taught you, you remain in him."* Every Christian is qualified to interpret the Bible! Now that does not mean we will all agree. Each of us is still growing in our understanding of the truth. However, it does mean that there is no infallible human or tradition to answer all our questions. Instead the Holy Spirit helps each of us to know the truth and grow closer to God and each other.

The Bible is a library with 66 books in the Protestant Canon. The best way to learn God's word is to read entire books. Read the book of Genesis. Read the book of John. Read the entire Bible library. Topical studies and cross-referencing can be good. However, the safest way to understand context and meaning is to read whole Bible books. Chapter and verse numbers were added for convenience in the 16th century, but unfortunately they can cause the Bible to seem like an encyclopedia. The Aionian Bible is formatted with simple verse numbering, minimal notes, and no cross-referencing in order to encourage the reading of Bible books.

Bible reading must also begin with prayer. Any Christian is qualified to interpret the Bible with God's help. However, this freedom is also a responsibility because without the Holy Spirit we cannot interpret accurately. We read in 1 Corinthians 2:13-14, *"And we speak of these things, not with words taught by human wisdom, but with those taught by the Spirit, comparing spiritual things with spiritual things. Now the natural person does not receive the things of the Spirit of God, for they are foolishness to him, and he cannot understand them, because they are spiritually discerned."* So we cannot understand in our natural self, but we can with God's help through prayer.

The Holy Spirit is the best writer and he uses literary devices such as introductions, conclusions, paragraphs, and metaphors. He also writes various genres including historical narrative, prose, and poetry. So Bible study must spiritually discern and understand literature. Pray, read, observe, interpret, and apply. Finally, *"Do your best to present yourself approved by God, a worker who does not need to be ashamed, properly handling the word of truth."* 2 Timothy 2:15. *"God has granted to us his precious and exceedingly great promises; that through these you may become partakers of the divine nature, having escaped from the corruption that is in the world by lust. Yes, and for this very cause adding on your part all diligence, in your faith supply moral excellence; and in moral excellence, knowledge; and in knowledge, self-control; and in self-control patience; and in patience godliness; and in godliness brotherly affection; and in brotherly affection, love. For if these things are yours and abound, they make you to be not idle nor unfruitful to the knowledge of our Lord Jesus Christ,"* 2 Peter 1:4-8.

Glossary

Teke-Tyee at AionianBible.org/Glossary

The Aionian Bible un-translates and instead transliterates eleven special words to help us better understand the extent of God's love for individuals and all mankind, and the nature of afterlife destinies. The original translation is unaltered and a note is added to 64 Old Testament and 200 New Testament verses. Compare the meanings below to the Strong's Concordance and Glossary definitions.

Abyssos g12

Greek: proper noun, place

Usage: 9 times in 3 books, 6 chapters, and 9 verses

Meaning:

Temporary prison for special fallen angels such as Apollyon, the Beast, and Satan.

aīdios g126

Greek: adjective

Usage: 2 times in Romans 1:20 and Jude 6

Meaning:

Lasting, enduring forever, eternal.

aīōn g165

Greek: noun

Usage: 127 times in 22 books, 75 chapters, and 102 verses

Meaning:

A lifetime or time period with a beginning and end, an era, an age, the completion of which is beyond human perception, but known only to God the creator of the aīōns, Hebrews 1:2. Never meaning simple endless or infinite chronological time in Greek usage. Read Dr. Heleen Keizer and Ramelli and Konstan for proofs.

aīōnios g166

Greek: adjective

Usage: 71 times in 19 books, 44 chapters, and 69 verses

Meaning:

From start to finish, pertaining to the age, lifetime, entirety, complete, or even consummate. Never meaning simple endless or infinite chronological time in Koine Greek usage. Read Dr. Heleen Keizer and Ramelli and Konstan for proofs.

eleēsē g1653

Greek: verb, aorist tense, active voice, subjunctive mood, 3rd person singular

Usage: 1 time in this conjugation, Romans 11:32

Meaning:

To have pity on, to show mercy. Typically, the subjunctive mood indicates possibility, not certainty. However, a subjunctive in a purpose clause is a resulting action as certain as the causal action. The subjunctive in a purpose clause functions as an indicative, not an optative. Thus, the grand conclusion of grace theology in Romans 11:32 must be clarified. God's mercy on all is not a possibility, but a certainty. See ntgreek.org.

Geenna g1067

Greek: proper noun, place

Usage: 12 times in 4 books, 7 chapters, and 12 verses

Meaning:

Valley of Hinnom, Jerusalem's trash dump, a place of ruin, destruction, and judgment in this life, or the next, though not eternal to Jesus' audience.

Hadēs g86

Greek: proper noun, place

Usage: 11 times in 5 books, 9 chapters, and 11 verses

Meaning:

Synonymous with Sheol, though in New Testament usage Hades is the temporal place of punishment for deceased unbelieving mankind, distinct from Paradise for deceased believers.

Limnē Pyr g3041 g4442

Greek: proper noun, place

Usage: Phrase 5 times in the New Testament

Meaning:

Lake of Fire, final punishment for those not named in the Book of Life, prepared for the Devil and his angels, Matthew 25:41.

Sheol h7585

Hebrew: proper noun, place

Usage: 66 times in 17 books, 50 chapters, and 64 verses

Meaning:

The grave or temporal afterlife world of both the righteous and unrighteous, believing and unbelieving, until the general resurrection.

Tartaroō g5020

Greek: proper noun, place

Usage: 1 time in 2 Peter 2:4

Meaning:

Temporary prison for particular fallen angels awaiting final judgment.

Glossary +

AionianBible.org/Bibles/Teke-Tyee---Teke-Tyee-Bible/Noted

Aionian Glossary references are below. Strong's Hebrew and Greek number notes are added to 64 Old Testament and 200 New Testament verses. Questioned verse translations do not contain Aionian Glossary words but may wrongly imply *eternal* or *Hell*. Note placement is skipped or adjusted for verses with non-standard numbering.

Abyssos

Luke 8:31
Rome 10:7
Apokalipese 9:1
Apokalipese 9:2
Apokalipese 9:11
Apokalipese 11:7
Apokalipese 17:8
Apokalipese 20:1
Apokalipese 20:3

Bigyighili 3:21
Bigyighili 15:18
Rome 1:25
Rome 9:5
Rome 11:36
Rome 12:2
Rome 16:27
1 Korente 1:20
1 Korente 2:6
1 Korente 2:7
1 Korente 2:8

1 Piere 1:25
1 Piere 4:11
1 Piere 5:11
2 Piere 3:18
1 Dzā 2:17
2 Dzā 1:2
Dzude 1:13
Dzude 1:25
Apokalipese 1:6
Apokalipese 1:18
Apokalipese 4:9
Apokalipese 4:10
Apokalipese 5:13
Apokalipese 7:12
Apokalipese 10:6
Apokalipese 11:15
Apokalipese 14:11
Apokalipese 15:7
Apokalipese 19:3
Apokalipese 20:10
Apokalipese 22:5

āidios

Rome 1:20
Dzude 1:6

1 Korente 3:18
1 Korente 8:13
1 Korente 10:11
2 Korente 4:4
2 Korente 9:9
2 Korente 11:31

aiōn

Matye 12:32
Matye 13:22
Matye 13:39
Matye 13:40
Matye 13:49
Matye 21:19
Matye 24:3
Matye 28:20
Mareke 3:29
Mareke 4:19
Mareke 10:30
Mareke 11:14
Luke 1:33
Luke 1:55
Luke 1:70
Luke 16:8
Luke 18:30
Luke 20:34
Luke 20:35
Dzā 4:14
Dzā 6:51
Dzā 6:58
Dzā 8:35
Dzā 8:51
Dzā 8:52
Dzā 9:32
Dzā 10:28
Dzā 11:26
Dzā 12:34
Dzā 13:8
Dzā 14:16

Ngalate 1:4
Ngalate 1:5
Efedze 1:21
Efedze 2:2
Efedze 2:7
Efedze 3:9
Efedze 3:11
Efedze 3:21
Efedze 6:12
Filipe 4:20
Kolose 1:26
1 Timote 1:17
1 Timote 6:17
2 Timote 4:10
2 Timote 4:18
Tite 2:12
Ba-Eebere 1:2
Ba-Eebere 1:8
Ba-Eebere 5:6
Ba-Eebere 6:5
Ba-Eebere 6:20
Ba-Eebere 7:17
Ba-Eebere 7:21
Ba-Eebere 7:24
Ba-Eebere 7:28
Ba-Eebere 9:26
Ba-Eebere 11:3
Ba-Eebere 13:8
Ba-Eebere 13:21
1 Piere 1:23

aiōnios

Matye 18:8
Matye 19:16
Matye 19:29
Matye 25:41
Matye 25:46
Mareke 3:29
Mareke 10:17
Mareke 10:30
Luke 10:25
Luke 16:9
Luke 18:18
Luke 18:30
Dzā 3:15
Dzā 3:16
Dzā 3:36
Dzā 4:14
Dzā 4:36
Dzā 5:24
Dzā 5:39
Dzā 6:27
Dzā 6:40
Dzā 6:47
Dzā 6:54
Dzā 6:68

Dzā 10:28
Dzā 12:25
Dzā 12:50
Dzā 17:2
Dzā 17:3
Bigyighili 13:46
Bigyighili 13:48
Rome 2:7
Rome 5:21
Rome 6:22
Rome 6:23
Rome 16:25
Rome 16:26
2 Korente 4:17
2 Korente 4:18
2 Korente 5:1
Ngalate 6:8
2 Tesalonike 1:9
2 Tesalonike 2:16
1 Timote 1:16
1 Timote 6:12
1 Timote 6:16
2 Timote 1:9
2 Timote 2:10
Tite 1:2
Tite 3:7
Filemō 1:15
Ba-Eebere 5:9
Ba-Eebere 6:2
Ba-Eebere 9:12
Ba-Eebere 9:14
Ba-Eebere 9:15
Ba-Eebere 13:20
1 Piere 5:10
2 Piere 1:11
1 Dzā 1:2
1 Dzā 2:25
1 Dzā 3:15
1 Dzā 5:11
1 Dzā 5:13
1 Dzā 5:20
Dzude 1:7
Dzude 1:21
Apokalipese 14:6

eleēse

Rome 11:32

Geenna

Matye 5:22
Matye 5:29
Matye 5:30
Matye 10:28
Matye 18:9
Matye 23:15
Matye 23:33
Mareke 9:43

Mareke 9:45
Mareke 9:47
Luke 12:5
Dzake 3:6

Hadēs

Matye 11:23
Matye 16:18
Luke 10:15
Luke 16:23
Bigyighili 2:27
Bigyighili 2:31
1 Korente 15:55
Apokalipese 1:18
Apokalipese 6:8
Apokalipese 20:13
Apokalipese 20:14

Limnē Pyr

Apokalipese 19:20
Apokalipese 20:10
Apokalipese 20:14
Apokalipese 20:15
Apokalipese 21:8

Sheol

Genesis 37:35
Genesis 42:38
Genesis 44:29
Genesis 44:31
Numbers 16:30
Numbers 16:33
Deuteronomy 32:22
1 Samuel 2:6
2 Samuel 22:6
1 Kings 2:6
1 Kings 2:9
Job 7:9
Job 11:8
Job 14:13
Job 17:13
Job 17:16
Job 21:13
Job 24:19
Job 26:6

Psalms 6:5
Psalms 9:17
Psalms 16:10
Psalms 18:5
Psalms 30:3
Psalms 31:17
Psalms 49:14
Psalms 49:15
Psalms 55:15
Psalms 86:13
Psalms 88:3
Psalms 89:48


Psalms 116:3
Psalms 139:8
Psalms 141:7
Proverbs 1:12
Proverbs 5:5
Proverbs 7:27
Proverbs 9:18
Proverbs 15:11
Proverbs 15:24
Proverbs 23:14
Proverbs 27:20
Proverbs 30:16
Ecclesiastes 9:10
Song of Solomon 8:6
Isaiah 5:14
Isaiah 7:11
Isaiah 14:9
Isaiah 14:11
Isaiah 14:15
Isaiah 28:15
Isaiah 28:18
Isaiah 38:10
Isaiah 38:18
Isaiah 57:9
Ezekiel 31:15
Ezekiel 31:16
Ezekiel 31:17
Ezekiel 32:21
Ezekiel 32:27
Hosea 13:14
Amos 9:2
Jonah 2:2
Habakkuk 2:5

Tartaroō


2 Piere 2:4

Questioned


None yet noted




Mu kana, Abarahame bu akihi mbili yi ágyughu nde, nde ágyene ku nsie yi áfaana nde ogyagha ti pfa, ya nde ágyene gwene osoolo ku ákagye. - Hebrews 11:8



"When Pharaoh had let the people go, God didn't lead them by the way of the land of the Philistines, although that was near; for God said, 'Lest perhaps the people change their minds when they see war, and they return to Egypt'" Exodus 13:17



Mu kuulu Mwana a mbwuru ka aagyi mu kuulu baara basalala nde o, lo mu osalala baara ya mu ogwa laama li nde mu ofiri ekolo mu baara balagha. - Mark 10:45



Me Poole, musala a Yisuu-Kriste, wu báti mbili mu okala ntumu ya wu básuolo mu otsala Nsia yi Mbwe yi a Nzaani. - Romans 1:1

Creation 4004 B.C.

Adam and Eve created	4004
Tubal-cain forges metal	3300
Enoch walks with God	3017
Methuselah dies at age 969	2349
God floods the Earth	2349
Tower of Babel thwarted	2247
Abraham sojourns to Canaan	1922
Jacob moves to Egypt	1706
Moses leads Exodus from Egypt	1491
Gideon judges Israel	1245
Ruth embraces the God of Israel	1168
David installed as King	1055
King Solomon builds the Temple	1018
Elijah defeats Baal's prophets	896
Jonah preaches to Nineveh	800
Assyrians conquer Israelites	721
King Josiah reforms Judah	630
Babylonians capture Judah	605
Persians conquer Babylonians	539
Cyrus frees Jews, rebuilds Temple	537
Nehemiah rebuilds the wall	454
Malachi prophecies the Messiah	416
Greeks conquer Persians	331
Seleucids conquer Greeks	312
Hebrew Bible translated to Greek	250
Maccabees defeat Seleucids	165
Romans subject Judea	63
Herod the Great rules Judea	37

(The Annals of the World, James Usher)

Jesus Christ born 4 B.C.



New Heavens and Earth



- Christ returns for his people**
- 1956** Jim Elliot martyrd in Ecuador
- 1830** John Williams reaches Polynesia
- 1731** Zinzendorf leads Moravian mission
- 1614** Japanese kill 40,000 Christians
- 1572** Jesuits reach Mexico
- 1517** Martin Luther leads Reformation
- 1455** Gutenberg prints first Bible
- 1323** Franciscans reach Sumatra
- 1276** Ramon Llull trains missionaries
- 1100** Crusades tarnish the church
- 1054** The Great Schism
- 997** Adalbert martyrd in Prussia
- 864** Bulgarian Prince Boris converts
- 716** Boniface reaches Germany
- 635** Alopen reaches China
- 569** Longinus reaches Alodia / Sudan
- 432** Saint Patrick reaches Ireland
- 397** Carthage ratifies Bible Canon
- 341** Ulfilas reaches Goth / Romania
- 325** Niceae proclaims God is Trinity
- 250** Denis reaches Paris, France
- 197** Tertullian writes Christian literature
- 70** Titus destroys the Jewish Temple
- 61** Paul imprisoned in Rome, Italy
- 52** Thomas reaches Malabar, India
- 39** Peter reaches Gentile Cornelius
- 33** Holy Spirit empowers the Church

(Wikipedia, Timeline of Christian missions)

Resurrected 33 A.D.

What are we?			▶		Genesis 1:26 - 2:3	
How are we sinful?			▶		Romans 5:12-19	
Where are we?			▶			
					Innocence	
			Eternity Past		Creation 4004 B.C.	
▶ Who are we?	God	Father		John 10:30	Genesis 1:31 God's perfect fellowship with Adam in The Garden of Eden	
		Son		God's perfect fellowship		
		Holy Spirit				
	Mankind	Living				
		Deceased believing				
		Deceased unbelieving				
	Angels	Holy		Genesis 1:1 No Creation No people	Genesis 1:31 No Fall No unholy Angels	
		Imprisoned				
		Fugitive				
		First Beast				
		False Prophet				
		Satan				
Why are we?			▶		Romans 11:25-36, Ephesian 2:7	

Mankind is created in God’s image, male and female He created us

Sin entered the world through Adam and then death through sin

When are we?				
Fallen				Glory
Fall to sin No Law	Moses' Law 1500 B.C.	Christ 33 A.D.	Church Age Kingdom Age	New Heavens and Earth
1 Timothy 6:16 Living in unapproachable light				Acts 3:21 Philippians 2:11 Revelation 20:3 God's perfectly restored fellowship with all Mankind praising Christ as Lord in the Holy City
John 8:58 Pre-incarnate		John 1:14 Incarnate	Luke 23:43 Paradise	
Psalm 139:7 Everywhere		John 14:17 Living in believers		
Ephesians 2:1-5 Serving the Savior or Satan on Earth				
Luke 16:22 Blessed in Paradise				
Luke 16:23, Revelation 20:5,13 Punished in Hades until the final judgment				
Hebrews 1:14 Serving mankind at God's command				
2 Peter 2:4, Jude 6 Imprisoned in Tartarus				Matthew 25:41 Revelation 20:10 Lake of Fire prepared for the Devil and his Angels
			Revelation 20:13 Thalaasa	
1 Peter 5:8, Revelation 12:10 Rebelling against Christ Accusing mankind			Revelation 19:20 Lake of Fire	
			Revelation 20:2 Abyss	

For God has bound all over to disobedience in order to show mercy to all

Destiny

Teke-Tyee at AionianBible.org/Destiny

The Aionian Bible shows the location of eleven special Greek and Hebrew Aionian Glossary words to help us better understand God's love for individuals and for all mankind, and the nature of after-life destinies. The underlying Hebrew and Greek words typically translated as *Hell* show us that there are not just two after-life destinies, Heaven or Hell. Instead, there are a number of different locations, each with different purposes, different durations, and different inhabitants. Locations include 1) Old Testament *Sheol* and New Testament *Hadēs*, 2) *Geenna*, 3) *Tartaroō*, 4) *Abyssos*, 5) *Limnē Pyr*, 6) *Paradise*, 7) *The New Heaven*, and 8) *The New Earth*. So there is reason to review our conclusions about the destinies of redeemed mankind and fallen angels.

The key observation is that fallen angels will be present at the final judgment, 2 Peter 2:4 and Jude 6. Traditionally, we understand the separation of the Sheep and the Goats at the final judgment to divide believing from unbelieving mankind, Matthew 25:31-46 and Revelation 20:11-15. However, the presence of fallen angels alternatively suggests that Jesus is separating redeemed mankind from the fallen angels. We do know that Jesus is the helper of mankind and not the helper of the Devil, Hebrews 2. We also know that Jesus has atoned for the sins of all mankind, both believer and unbeliever alike, 1 John 2:1-2. Deceased believers are rewarded in Paradise, Luke 23:43, while unbelievers are punished in Hades as the story of Lazarus makes plain, Luke 16:19-31. Yet less commonly known, the punishment of this selfish man and all unbelievers is before the final judgment, is temporal, and is punctuated when Hades is evacuated, Revelation 20:13. So is there hope beyond Hades for unbelieving mankind? Jesus promised, *"the gates of Hades will not prevail,"* Matthew 16:18. Paul asks, *"Hades where is your victory?"* 1 Corinthians 15:55. John wrote, *"Hades gives up,"* Revelation 20:13.

Jesus comforts us saying, *"Do not be afraid,"* because he holds the keys to *unlock* death and Hades, Revelation 1:18. Yet too often our *Good News* sounds like a warning to *"be afraid"* because Jesus holds the keys to *lock* Hades! Wow, we have it backwards! Hades will be evacuated! And to guarantee hope, once emptied, Hades is thrown into the Lake of Fire, never needed again, Revelation 20:14.

Finally, we read that anyone whose name is not written in the Book of Life is thrown into the Lake of Fire, the second death, with no exit ever mentioned or promised, Revelation 21:1-8. So are those evacuated from Hades then, *"out of the frying pan, into the fire?"* Certainly, the Lake of Fire is the destiny of the Goats. But, do not be afraid. Instead, read the Bible's explicit mention of the purpose of the Lake of Fire and the identity of the Goats, *"Then he will say also to those on the left hand, 'Depart from me, you cursed, into the consummate fire which is prepared for... the devil and his angels,'"* Matthew 25:41. Bad news for the Devil. Good news for all mankind!

Faith is not a pen to write your own name in the Book of Life. Instead, faith is the glasses to see that the love of Christ for all mankind has already written our names in Heaven. *"If the first fruit is holy, so is the whole,"* Romans 11:16. Though unbelievers will suffer regrettable punishment in Hades, redeemed mankind will never enter the Lake of Fire, prepared for the devil and his angels. And as God promised, all mankind will worship Christ together forever, Philippians 2:9-11.



Mu obo, bu liigye, lisa ti bikaana byehene bikala binduono bi me, liboghoru bo mu nkwuumu yi a Taara, ya yi a Mwana, ya yi a Mufutu a Ngili. - Matthew 28:19

